


Nuevo Testamento
Guaraní Pe



New Testament in Guaraní, Western Bolivian (BL:gnw:Guaraní,
Western Bolivian)

Nuevo Testamento Guaraní Pe

New Testament in Guaraní, Western Bolivian (BL:gnw:Guaraní, Western Bolivian)

copyright © 2012 Wycliffe Bible Translators, Inc.

Language: Guaraní, Western Bolivian

Translation by: Wycliffe Bible Translators, Inc.

Guaraní, Western Bolivian [gnw], Bolivia

Copyright Information

© 2012, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.
The New Testament

in Guaraní, Western Bolivian

© 2012, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25

PDF generated using Haiola and XeLaTeX on 29 Jan 2022 from source files dated 29 Jan 2022

09a8356f-416c-5877-91cf-40f681db481e

Contents

SAN MATEO	1
SAN MARCOS	48
SAN LUCAS	77
SAN JUAN	127
HECHOS	161
ROMANOS	202
1 CORINTIOS	220
2 CORINTIOS	237
GÁLATAS	249
EFESIOS	255
FILIPENSES	261
COLOSENSES	265
1 TESALONICENSES	269
2 TESALONICENSES	273
1 TIMOTEO	275
2 TIMOTEO	281
TITO	285
FILEMÓN	287
HEBREOS	288
SANTIAGO	303
1 PEDRO	308
2 PEDRO	313
1 JUAN	316
2 JUAN	321
3 JUAN	322
JUDAS	323
APOCALIPSIS	325

EL SANTO EVANGELIO SEGUN SAN MATEO

Jesucristo itenondegua reta
(Lc 3.23-38)

¹ Tamimbeu cua tupapire pe Jesucristo itenondegua reta. Jesucristo co jae David inemoñaeta reta pegua. Jae ramiño vi jae co Abraham inemoñaeta reta pegua.

² Abraham inemoñaeta Isaac, jare Isaac inemoñaeta Jacob, jare Jacob inemoñaeta Jada. Jare tiquei reta jare tivi reta. ³ Jare Jada umiñemoñaeta Tamar güi Fares jare Zara. Jare Fares inemoñaeta Esrom, jare Esrom inemoñaeta Aram. ⁴ Jare Aram inemoñaeta Aminadab, jare Aminadab inemoñaeta Naasón, jare Naasón inemoñaeta Salmón. ⁵ Jare Salmón umiñemoñaeta Rahab güi Booz. Jare Booz umiñemoñaeta Rut güi Obed. Jare Obed inemoñaeta Isai. ⁶ Jare Isai inemoñaeta David. Jae co Israel pegua reta juvicha guasu.

Jare mburuvicha guasu David umiñemoñaeta Urías jembirecocue güi Salomón. ⁷ Jare Salomón inemoñaeta Roboam, jare Roboam inemoñaeta Abías, jare Abías inemoñaeta Asa. ⁸ Jare Asa inemoñaeta Josafat, jare Josafat inemoñaeta Joram, jare Joram inemoñaeta Uzías. ⁹ Jare Uzías inemoñaeta Jotam, jare Jotam inemoñaeta Acaz, jare Acaz inemoñaeta Ezequías. ¹⁰ Jare Ezequías inemoñaeta Manasés, jare Manasés inemoñaeta Amón, jare Amón inemoñaeta Josías. ¹¹ Jare Josías inemoñaeta Jeconías jare tivi reta. Jare Jeconías ico yave, ivi Babilonia pegua reta umiamiri Israel pegua reta jare güiraa jeta Israel pegua reta Babilonia pe.

¹² Jare yugüiraa ma Babilonia pe yave, Jeconías inemoñaeta Salatiel, jare Salatiel inemoñaeta Zorobabel. ¹³ Jare Zorobabel inemoñaeta Abiud, jare Abiud inemoñaeta Eliaquim, jare Eliaquim inemoñaeta Azor. ¹⁴ Jare Azor inemoñaeta Sadoc, jare Sadoc inemoñaeta Aquim, jare Aquim inemoñaeta Eliud. ¹⁵ Jare Eliud inemoñaeta Eleazar, jare Eleazar inemoñaeta Matán, jare Matán inemoñaeta Jacob. ¹⁶ Jare Jacob inemoñaeta José - jae co María ime. Jare María imembi Jesús - jae co Cristo jee vae.

¹⁷ Jáeramo yaipapa catorce ñemoñaeta Abraham güi David pe. Jae ramiño vi yaipapa catorce ñemoñaeta David güi Jeconías pe. Echa'ã Jeconías ico yave, Israel pegua reta uyereraaca Babilonia pe. Jae ramiño vi yaipapa catorce ñemoñaeta Jeconías güi Cristo pe.

Jesucristo oa vae regua
(Lc 2.1-7)

¹⁸ Añave tamimbeu quirãi Jesucristo oa ichi güi vae regua. María José ndive umendata yave, ndei José güireco mbove, uyecuaa ipurúa oĩ. Ipurúa co Espíritu Santo imbaepuere pe. ¹⁹ Jayave José ipia pe uyemingueta jei vaerã chupe ndarau umenda jae ndive, ãrei uipota'ã uyapo opaete vae reta jovaque. Echa'ã José penti cuimbae jupi vae co jare uipota'ã umimaraca María opaete vae reta jovaque. ²⁰ ãrei cua re ipia pe uyemingueta oĩ rambueve, penti ángel yandeYa pe uyeyocui vae uyecuaa chupe ipau pe jare jei chupe:

—José. Nde co jae David inemoñaeta reta pegua. Ndepuere nemenda María ndive ndequiye mbae reve. Echa'ã ipurúa oĩ Espíritu Santo imbaepuere pe —jei—. ²¹ Jare imembita penti cuimbae jare nembijeeta Jesús. Echa'ã jae umbiasata ivi pegua reta. Echa'ã umbaita imbaeyoa reta —jei.

²² Jare opaete cua uyeyapo, Tumpa inee araca umimbeu vae rupi yandeYa jei vae uyeyapo vaerã. ²³ Echa'ã jei cuarãi:

“Mase, penti cuñatai cuimbae güireco'ã etei vae ipuruata jare imembita penti cuimbae. Jare umbijeeta reta Emanuel.”

Jucuarãi jei. (Cua tee uipota jei: “Tumpa ime yande ndive oĩ”.)

²⁴ Jayave José usareco yave, umenda María ndive ángel yandeYa pe uyeyocui vae jei chupe rami. ²⁵ ãrei José opoco'ã María re ndei imembiripi oa mbove. Jare María imembi oa ma yave, José umbijee Jesús.

¹ Jesús oa ma yave tenta guasu Belén ivi Judea pegua pe, Herodes ico mburuvicha guasurã. Jare jocua ara rupi yugüeru cuimbae reta yasitata re uyemboe vae reta guarasi oẽ vae coti güi uvãe tenta guasu Jerusalén pe. ² Jare jei reta:

—¿Quiape pa ime oĩ sambiai judío reta juvicha guasurã icota vae? Echa'ã nduecha yasitata uicuaaca oreve vae guarasi oẽ vae coti. Jáeramo ndoyu ma nuvãe numbiadora vaerã —jei reta.

³ Mburuvicha guasu Herodes cua uyandu yave, uyemipia'ã. Opaete Jerusalén pegua reta uyemipia'ã vi. ⁴ Jayave Herodes umbatica opaete sacerdote reta itenondegua reta jare mboroyocui re oporombocue vae reta, jare upirandu chupe reta quiape ra oata Cristo, Tumpa ombou vae. ⁵ Jare jae reta jei chupe:

—Oata Belén Judea pegua pe. Echa'ã Tumpa ñínee aracae umimbeu vae jei cuarãi:

⁶ Belén Judea pegua penti tenta guasu Judea pegua icavi vae.

Echa'ã joco pe oata penti mburuvicharã.

Jae oyocuita Israel pegua reta.

Israel pegua reta chembae co.'

Jucuarãi jei —jei reta chupe.

⁷ Jayave Herodes uenica viari jocua yasitata re uyemboe vae reta, jare upirandu chupe reta quirãi yave ra uyecuaa jocua yasitata. ⁸ Jayave Herodes jei chupe reta:

—Pecua Belén pe peeca cavi jocua sambiai. Jare pevãe ma chupe yave, peyu ye cua pe pemimbeu cheve, che vi aa vaerã ambiadora —jei.

⁹ Uyandu reta ma yave mburuvicha guasu jei vae, cuimbae reta yugüiraa Jerusalén güi. Jare uecha reta ye jocua yasitata guarasi oẽ vae coti ñugüinoi yave uecha vae. Jare yasitata oo jae reta jenonde uyemboi sambiai oĩ vae iárambo. ¹⁰ Jocua yasitata uecha reta yave, cuimbae reta tuicha rupi uyerovia. ¹¹ Jare uique reta yave sambiai oĩ vae pe, uecha reta sambiai ichi ndive - jae co María jee vae. Jayave jae reta uyeatica jare umbiadora sambiai. Jayave uipea jivita reta jare umee sambiai pe güeru reta chupe vae - oro jare mbae ipiche cavi vae reta incienso jare mirra jee vae.

¹² Jare Tumpa umimbeu cuimbae reta pe ipau pe agüiye vaerã yugüiraa ye Herodes jenta rupi. Jáeramo yugüiraa ye iivi pe ñru tape rupi.

Herodes uyucaca sambiai reta

¹³ Jare cuimbae reta yugüiraa ma yave, penti ángel yandeYa pe uyeyocui vae uyecuaa José pe ipau pe jare jei chupe:

—Epüa. Eraa sambiai jare ichi pecua Egipto pe. Pepita joco pe amimbeu ye ndeve regua. Echa'ã Herodes uecacata sambiai uyucaca vaerã —jei.

¹⁴ Jayave José upüa, jare pítu oĩ reve güiraa sambiai jare ichi ivi Egipto coti. ¹⁵ Jare jae reta upita Egipto pe Herodes umano regua. Jucuarãi uyapo José, uyeyapo vaerã Tumpa ñínee aracae umimbeu vae rupi yandeYa jei vae. Echa'ã jei cuarãi: “Egipto güi aeni cheRai.”

¹⁶ Jayave Herodes uicuaa jocua yasitata re uyemboe vae reta uyapo'ã co jae jei vae. Jáeramo tanta rupi pochi jare omondo sundaro reta uyuca vaerã opaete sambiai cuimbae mi retaño Belén pe jare Belén iyipi rupi ñugüinoi vae reta ndei mocui año güinoi vae. Echa'ã yasitata re uyemboe vae reta opou Herodes pe yave, Herodes upirandu cavi chupe reta quirãi yave ra uecha yasitata.

¹⁷ Jare jucuarãi uyeyapo Tumpa ñínee aracae umimbeu vae Jeremías jei vae. ¹⁸ Echa'ã jei cuarãi:

“Ramá pe uyendu ñee.

Uyendu uyao ñugüinoi tuicha ipiatiti vae reta.

Raquel uyao oĩ imembi reta re.

Ipuere'ã etei quía umbipiacatu imembi reta umano ma ramo.”

Jucuarãi jei.

¹⁹ Ërei Herodes umano ma yave, José Egipto pe oĩ rambueve, penti ángel yandeYa pe uyeyocui vae uyecuaa José pe ipau pe. ²⁰ Jare jei chupe:

—Epüa. Eraa ye sambiai jare ichi Israel pegua reta iivi pe. Echa'ã uipota tẽi uyucaca sambiai vae reta umano ma —jei.

²¹ Jayave José upūa jare güiraa sambiai jare ichi Israel pegua reta iivi pe. ²² Ērei uyandu quirāi Arquelao ico mburuvicha guasurā Judea pe. Echa'ā Arquelao Herodes tai co. Jayave José uquiye oo vaerā Judea pe. Ērei Tumpa umimbeu José pe ipau pe oo vaerā ivi Galilea pe. Jáeramo jocoti oo. ²³ Jare José oo uvāe penti tenta guasu Nazaret jee vae pe jare joco pe ico, uyeyapo vaerā Tumpa iñee aracae umimbeu vae reta jei vae. Echa'ā jei reta cuarāi: “Īru vae reta umbijeeta penti Nazaret pegua.”

3

Juan upurumbibautiza vae umimbeu Tumpa iñee

(Mr 1.1-8; Lc 3.1-20; Jn 1.19-28)

¹ Jocua ara reta rupi ou Juan ñana Judea pe oī vae pe upurumbibautiza jare umimbeu Tumpa iñee. ² Jae jei:

—Peeya piyemingueta icavi mbae vae pepia pe oī vae. Echa'ā outa ma uvāe mboroy-ocua ara pegua —jei.

³ Tumpa iñee aracae umimbeu vae Isaías jee vae imiari Juan re. Echa'ā Isaías jei cuarāi: “Jae iñeeāta reve jeita ñana pe:

‘Piyapicatu yandeYa japerā.

Pemisimi tape.’ ”

Jucuarāi jei.

⁴ Jare Juan jemimonde maemimba camello jee vae jaagüe pegua co, jare jumbicuaa guacapi pegua co. Jare jembú co jae tucu jare ei ñana rupigua. ⁵ Jare jeta Jerusalén pegua reta jare Judea pegua reta jare jeta tenta iāca Jordán iyipi rupi ñugüinoi vae pegua reta yugüiraa Juan oī vae pe. ⁶ Jare Juan umbibautiza reta iāca Jordán pe imbaeyoa reta opa umimbeu yave. ⁷ Jare jeta fariseo reta jare saduceo reta yugüeru Juan oī vae pe, jae umbibautiza vaerā. Jare Juan uecha reta yave, jei chupe reta:

—Pe reta co jae mboi reta rami. ¿Quía pa umimbeu peve piyero vaerā Tumpa coti agüiye vaerā Tumpa uiporaraca peve? ⁸ Piyapo icavi vae, jucuarāi picuaaca vaerā añetete peeya co piyemingueta icavi mbae vae pepia pe oī vae. ⁹ Agüiye pere piyupe pepia pe: ‘Yandetenondegua co jae Abraham.’ Echa'ā che jae peve cua: Tumpa ipuere uyapo cua ita reta güi Abraham iñemoñaa retarā —jei Juan chupe reta—. ¹⁰ Yamijaanga penti temiti. Temiti ía icavi'ā yave, iya uyasia japo reve jare uapi. Jae ramiño vi piyapo'ā yave icavi vae, Tumpa uiporacata peve —jei—. ¹¹ Che pumbibautiza i pe piyemingueta icavi mbae vae pepia pe oī vae peeya yave. Ērei cheraicue rupi outa ipuere ete chegüi vae. Jupi'ā co che amboi araa vaerā ipipasa. Jae pembibautizata Espíritu Santo pe jare tata pe —jei—. ¹² Jae co trigo uipoo vae rami. Echa'ā trigo uipoo vae umbiveve trigo uequi vaerā iti. Jayave uñuvatu trigo jiru pe. Ērei uapi iti tata pe. Tata Cristo uiporuta vae opa mbae vae co —jei.

Juan umbibautiza Jesús

(Mr 1.9-11; Lc 3.21-22)

¹³ Jare Jesús ou Galilea güi uvāe Jordán pe Juan oī vae pe, Juan pe uyembibautizaca vaerā. ¹⁴ Ērei Juan ñatēi umbibautiza Jesús. Jáeramo jei chupe:

—¿Maera pa ndipota che numbibautiza vaerā? Echa'ā icavi co nde chembibautiza vaerā —jei.

¹⁵ Jayave Jesús jei chupe:

—Icavi co nde chembibautiza vaerā añave. Echa'ā jucuarāi icavi co yayapo vaerā opaete jupi vae —jei.

Jayave Juan umbibautiza Jesús. ¹⁶ Jare Juan umbibautiza ma yave, Jesús oē i güi. Jare jupivoi uecha ara uyepa oī, jare uecha vi Tumpa iEspíritu ugüeyi jese picasu rami. ¹⁷ Jare jupivoi uyendu ñee ara güi jei:

—Cua co jae cheRaí aau ete vae. Chembiyero via ete —jei.

4

Aña guasu umingueta Jesús uyavica vaerā tēi chupe

(Mr 1.12-13; Lc 4.1-13)

¹ Jayave Espíritu Santo güiraa Jesús ñnaa pe. Jare joco pe ña guasu umingueta uyavica vaerã tẽi chupe. ² Jare Jesús jou'ã mbae ave cuarenta ara. Jáeramo cuarenta ara uasa ma yave, iyembai. ³ Jayave ña guasu umingueta uyavica vaerã tẽi chupe.

—Nde co jae Tumpa Tai yave, ere cua ita reta pe uyeyapo vaerã mbiyaperã —jei.

⁴ Èrei Jesús jei chupe:

—Tumpa ñnee pe uyecuatía oĩ cuarãi:

'Icavi co ivi pegua reta jou vaerã mbiyape güinoi vaerã tecove.

Èrei icavi ete co uyapisaca vaerã Tumpa ñnee re jare uyapo vaerã jei vae güinoi vaerã tecove opa mbae vae.'

Jucuarãi uyecuatía oĩ —jei.

⁵ Jayave ña guasu güiraa Jesús Jerusalén pe jare umbuyupi Tumpa jo iyapite re.

⁶ Jayave jei chupe:

—Nde co jae Tumpa Tai yave, ea cua güi. Echa'ã Tumpa ñnee pe uyecuatía oĩ cuarãi:

'Tumpa oyocuita ángel reta uyandareco vaerã nderẽ.

Ipo pe ndepisi ndeocota reta,

agüiye vaerã ndepi uyererocua ita re.'

Jucuarãi uyecuatía oĩ —jei.

⁷ Jayave Jesús jei chupe:

—Tumpa ñnee pe uyecuatía oĩ cuarãi: 'Che co jae ndeYa Tumpa. Agüiye mbae iyapo ndicuaa vaerã tuicha ra chepiaguasu.' Jucuarãi uyecuatía oĩ —jei.

⁸ Jayave ña guasu güiraa Jesús penti ivitu guasu ivate vae re jare uechaca chupe opaete mburuvicha guasu reta iporoyocua ivi pe ñugüinoi vae reta opaete ipõra vae reve. ⁹ Jayave ña guasu jei chupe:

—Tamee ndeve opaete cua, ndiyeatica yave chembiadora vaerã.

¹⁰ Jayave Jesús jei chupe:

—Esiri chegüi, Satanás. Echa'ã Tumpa ñnee pe uyecuatía oĩ cuarãi: 'Che co jae ndeYa Tumpa. Chembiadora. Jaẽño cheve iyeyocui.' Jucuarãi uyecuatía oĩ —jei.

¹¹ Jayave ña guasu usiri Jesús güi, jare jupivoi yugüeru ángel reta ombori Jesús.

Jesús umbipi iparaviqui

(Mr 1.14-15; Lc 4.14-15)

¹² Jare Jesús uicuaa ma yave Juan uyemiingueca ma co peresoriru pe, oo Galilea pe.

¹³ Oo Nazaret güi uvãe tenta guasu Capernaum pe jare joco pe ico, (Capernaum oĩ i guasu jembei pe Zabulón jare Neftalí iivi pe) ¹⁴ uyeyapo vaerã Tumpa ñnee aracae umimbeu vae Isafás jei vae. Echa'ã jae jei cuarãi:

¹⁵ "Zabulón iivi jare Neftalí iivi, i guasu jembei pe, Jordán jovaicho pe, Galilea judío mbae vae reta pegua.

¹⁶ Pítumimbi pe yugüireco vae reta uecha ma tembipe tuicha vae.

Mano iguarasía pe yugüireco vae reta pe uyecuaa tembipe."

Jucuarãi jei.

¹⁷ Jayave Jesús umbipi umimbeu Tumpa ñnee. Jae jei:

—Peeya piyemingueta icavi mbae vae pepia pe oĩ vae. Echa'ã outa ma uvãe mboroyocua ara pegua —jei.

Jesús ueni irundi cuimbae pira uipisi vae reta

(Mr 1.16-20; Lc 5.1-11)

¹⁸ Jare uguata rambueve Galilea pe i guasu jembei rupi, Jesús uecha Simón - jae co Pedro jee vae - jare Simón tiví Andrés jee vae. Jae reta omombo ñugüinoi pisa i guasu pe, pira uipisi vaerã. Echa'ã jae reta pira uipisi vae reta co. ¹⁹ Jare Jesús jei chupe reta:

—Peyu cherupíe, jare che chembaepuere pe pemboeta ñru vae reta güirovia vaerã cheré.

²⁰ Jayave jae reta ueya voi ipisa, jare yugüiraa jae jupíe.

²¹ Jesús oo catu ñe joco güi, jare uecha Zebedeo tai reta. Penti jee Jacobo jare tiví jee Juan. Uyapicatu ñugüinoi pisa reta chalana pe tu ndive. Jayave Jesús ueni. ²² Jayave jae reta ueya voi chalana jare tu, jare yugüiraa jae jupíe.

Jesús ombœ jeta vae

(Lc 6.17-19)

²³ Jare Jesús oo opaete Galilea rupi, jare oporomboe judío reta itupaopao rupi. Umimbeu ñee icavi vae Tumpa iporoyocui pegua, jare umbigüera imbaerasi vae reta ipotave mbaerasi güi. ²⁴ Jare opaete ivi Siria pegua reta uyandu Jesús uyapo vae regua. Jare ñru vae reta güeru jae oĩ vae pe imbaerasi vae reta. Amocue vae uiporara ete jasi vae, jare añu oya amocue vae re, jare amocue vae imbiquere, jare amocue vae ipuere mbae omi vae. Jayave Jesús umbigüera reta. ²⁵ Jare yugüiraa Jesús jaicue jeta vae Galilea güi, jare ivi Decápolis jee vae güi, jare Jerusalén güi, jare Judea güi, jare iaca Jordán jovaicho güi.

5

Ívitu guasu re Jesús jei vae

(Lc 6.20-23)

¹ Jare Jesús jeta vae reta uecha yave, uyupi penti ívitu guasu re. Joco pe uguapi oĩ, jare jemimboe reta yugüeru jae oĩ vae pe. ² Jayave Jesús umbipi omboe reta. ³ Jei chupe reta: —Tuyerovia icoi Tumpa ueca vae reta. Echa'ã Tumpa umeeta chupe reta yugüireco vaerã mboroyocui ara pegua pe —jei—. ⁴ Tuyerovia ipiatiti vae reta. Echa'ã Tumpa umbipiacatuta reta —jei—. ⁵ Tuyerovia ñemímichi vae reta. Echa'ã Tumpa umeeta chupe reta ivi imbaerã —jei—. ⁶ Tuyerovia iquirëi jupi vae uyapo vae reta. Echa'ã Tumpa umbujupita reta —jei—. ⁷ Tuyerovia ñru vae reta uiparareco vae reta. Echa'ã Tumpa uipararecota reta —jei—. ⁸ Tuyerovia ipia iquia mbae vae reta. Echa'ã uechata reta Tumpa —jei—. ⁹ Tuyerovia ñru vae reta umbipiacatu vae reta. Echa'ã Tumpa jeita chupe reta: 'Pe co jae cherai reta' —jeita, jei—. ¹⁰ Tuyerovia jupi vae uyapo ramo ñru vae reta icavi mbae vae uyapo chupe vae reta. Echa'ã Tumpa umeeta chupe reta yugüireco vaerã mboroyocui ara pegua pe —jei—.

¹¹ ñru vae reta jeita icavi mbae vae peve jare uyapota icavi mbae vae peve. Ipotave icavi mbae vae jeita pecoti iyapu reve, pe reta cherau ramo. Ërei piyeroviaño peĩ —jei—. ¹² Piyerovia ete. Echa'ã Tumpa güinoi ara pe mbae icavi ete vae pembaerã. Echa'ã jae reta itenondegua reta uyapo cua nunga icavi mbae vae Tumpa ñnee araca umimbeu vae reta pe —jei—.

Yuqui rami vae

(Mr 9.50; Lc 14.34-35)

¹³ Pe reta co jae yuqui rami cua ivi pe. Ërei yuqui jembochi'ã ma yave, ¿quirãita ra jembochi ye? Icavi'ã ma mbaerã. Icavi co yamombo vaerã jare ñapiro jese vaerã —jei—.

Mechero rami vae

¹⁴ Pe reta co jae penti mechero ivi pegua reta pe tembipe umee vae rami. Yayapo yave tenta guasu penti ívitu re, yandepuere'ã etei ñañomi. Opaete vae ipuere uecha —jei—. ¹⁵ Jae ramiño vi mechero yamiendi yave, ndarau ñañono yapepo uyembovapo oĩ vae igüi pe. Ñañono co mechero jenda pe, opaete o pe ñugüinoi vae reta güinoi vaerã tembipe —jei—. ¹⁶ Mechero umee yandeve tembipe. Jae ramiño vi pe reta pico cavi ñru vae reta jovaque, jae reta uicuaa vaerã pe reta piyapo co icavi vae. Echa'ã jucuarã yave, umbiadorata reta peRu ara pe oĩ vae —jei—.

Jesús jare mboroyocui

¹⁷ Aramoi pe reta pepia pe piyemingueta che ayu co ambai vaerã Moisés iporoyocui jare Tumpa ñnee araca umimbeu vae reta jei vae. Ërei jucuarã'ã co. Che ayu ayapo vaerã, ayu'ã co ambai vaerã —jei—. ¹⁸ Añete che jae peve, ara jare ivi uasa regua ndarau uyembai penti cuatia michi ete vae yepe Moisés iporoyocui güi ndei opaete uyeyapo mbove —jei—. ¹⁹ Ime yave quía penti mboroyocui michi vae uyapo'ã jare umimbeu ñru vae reta pe agüiye vaerã uyapo vae, ñru vae reta jeita jae co taicuegua vae mboroyocui ara pegua pe. Ërei ime yave quía uyapo jare umimbeu ñru vae reta pe uyapo vaerã vae, ñru vae reta jeita jae co tenondegua vae mboroyocui ara pegua pe —jei—. ²⁰ Echa'ã che jae peve cua: Jupi vae pe reta piyapo vae jupi ete'ã yave jupi vae mboroyocui re oporomboe vae reta jare fariseo reta uyapo vae güi, ndarau etei pico mboroyocui ara pegua pe —jei—.

Jesús iporomboe mbochi regua
(Lc 12.57-59)

²¹ Piyandu ma quirāi Moisés jei yandetenondegua reta pe cuarāi: 'Agüiye epuruyuca. Echa'ā upuruyuca vae uñeāacata co.' Jucuarāi jei —jei—. ²² Ērei che jae peve, ime yave quía pochi tiví pe vae, uñeāacata co. Jare ime yave quía tiví güiriro vae, judío reta itenondegua reta uāata. Jare ime yave quía tiví pe: 'Nembiquere', jei vae, tata guasu pe uiporarata —jei—. ²³ Jáeramo nderu yave penti ofrenda uñemeearenda pe, jare joco pe nemandúa yave quirāi nderiví pochi ndeve mbae re, ²⁴ eeya joco pe jocua ofrenda uñemeearenda jovai. Ecuá rani iyeyapicatu nderiví ndive. Jayave taicue rupi ndepuereta nemeé jocua ofrenda Tumpa pe —jei—.

²⁵ Iyeyapicatu imambaé uipota uñeapo nderé mbae re vae ndive jae ndive ndeo rambueve tape rupi mburuvicha oī vae coti. Echa'ā ndiyeyapicatu'ā yave, uñeapota nderé mburuvicha pe, jare mburuvicha nemondota peresorirú iyandarecoa pe jare peresorirú iyandarecoa neñonota peresorirú pe —jei—. ²⁶ Añete che jae ndeve, ndarau etei neé peresorirú güi ndei opaete ndepía nembiepi mbove —jei—.

Jesús iporomboe menda re uyuvanga vae regua

²⁷ Piyandu ma quirāi Moisés jei yandetenondegua reta pe cuarāi: 'Agüiye iyuvanga menda re.' Jucuarāi jei —jei—. ²⁸ Ērei che jae peve, ime yave quía umae cuña re uipota reve vae, uyuvanga ma menda re ipia pe —jei—. ²⁹ Jare nderesa ndeacata cotigua uyapoca yave mbaeyoa ndeve, enoē emombo ndiyugüi. Icavi co penti nderesa ucañi vaerā ndegüi, tata guasu pe opaete nderete reve Tumpa nemondo vaerā tēi güi —jei—. ³⁰ Jae ramiño vi ndepo ndeacata cotigua uyapoca yave mbaeyoa ndeve, iyasia emombo ndiyugüi. Icavi co penti ndepo ucañi vaerā ndegüi, tata guasu pe opaete nderete reve Tumpa nemondo vaerā tēi güi —jei—.

Jesús iporomboe omombo jembireco vae regua
(Mt 19.1-10; Mr 10.1-12; Lc 16.18)

³¹ Aracae Moisés jei vi cuarāi: 'Jembireco omombo vae tumee chupe tupapire umimbeu vaerā pipe omombo ma vae co.' Jucuarāi jei —jei—. ³² Ērei che jae peve, penti cuimbae ipuere omombo jembireco, cuña aguasa uyapo yave. Ērei cuña uyapo'ā yave aguasa jare cuimbae omombo yave jembireco, jocua cuña uyuvanga co menda re umenda yave ĩru cuimbae ndive. Jae ramiño vi jocua cuimbae cuña ndive umenda vae uyuvanga co menda re —jei—.

Jesús iporomboe Tumpa jee re jei vae

³³ Piyandu ma quirāi Moisés jei yandetenondegua reta pe cuarāi: 'Agüiye ere: YandeYa jee re ayapota, ndepurumbitavi vaerā. Echa'ā ndere yave: YandeYa jee re ayapota, iyapo.' Jucuarāi jei —jei—. ³⁴ Ērei che jae peve, agüiye ere jucuarāi. Agüiye ere: 'Ara jee re ayapota.' Echa'ā ara Tumpa iguapia co. ³⁵ Agüiye vi ere: 'Ivi jee re ayapota.' Echa'ā ivi Tumpa ipi jenda co. Agüiye vi ere: 'Jerusalén jee re ayapota.' Echa'ā Jerusalén Mburuvicha Guasu mbaepuere güinoi vae jenta guasu co. ³⁶ Agüiye vi ere: 'Cheāca jee re ayapota.' Echa'ā ndepuere'ā ndiyapo ndea tī ani jū —jei—. ³⁷ Ērei ndipota yave ndere: 'Ayapota', ere: 'Ayapota.' Jae ramiño vi ndipota yave ndere: 'Ndarau ayapo', ere: 'Ndarau ayapo.' Echa'ā jeta cua güi ndere yave, ndiyapota icavi mbae vae —jei—.

Jesús iporomboe ueyepi vae regua
(Lc 6.27-31)

³⁸ Piyandu ma quirāi Moisés aracae jei cuarāi: 'Ime yave quía ĩru vae jesa urucumegua vae, ĩru vae reta turucumegua vi jae jesa. Jae ramiño vi ime yave quía ĩru vae jāi omopē vae, ĩru vae reta tomopē vi jae jāi.' Jucuarāi jei —jei—. ³⁹ Ērei che jae peve, emaeño ĩru vae re uyapo vaerā ndeve icavi mbae vae. Ime yave quía ocua nderovaique re vae, erova ipuere vaerā ocua ye jovaicho re. ⁴⁰ Jae ramiño vi ime yave quía uñeapo nderé ndecamisa upiro vaerā ndegüi vae, emaeño jese upiro vaerā ndegüi ndeasoya vi —jei—. ⁴¹ Jae ramiño vi ime yave quía ndeocui nderaa vaerā jivita penti kilómetro, eraa chupe mocui kilómetro rupi —jei—. ⁴² Jae ramiño vi ime yave quía uyerure ndeve mbae re vae, emee chupe, jare ime yave quía mbae uiporu ndeve vae, iporuca chupe —jei—.

Peau perovaicho reta
(Lc 6.27-36)

⁴³ Piyandu ma quirāi Moisés aracaē jei cuarāi: 'Eau neīru jare emitarēi nderovaicho.' Jucuarāi jei —jei—. ⁴⁴ Ērei che jae peve, peau perovaicho reta. Piyure Tumpa pe umivendise vaerā uyepipeyu peré vae reta. Piyapo icavi vae pemitarēi vae reta pe. Piyerure Tumpa pe icavi mbae vae uyapo peve vae reta re —jei—. ⁴⁵ Jucuarāi piyapo yave, picota peRu ara pe oī vae tai retarā. Echa'a peRu umee guarasi icavi mbae vae uyapo vae reta jare icavi vae uyapo vae reta pe, opaete vae güinoi vaerā tembipe. Jae ramiño vi umee ama jupi vae reta jare jupi mbae vae reta pe, opaete vae güinoi vaerā i —jei—. ⁴⁶ Echa'a peau yave perau vae retaño, jocua mbaeti etei co mbae icavi vae. Jáeramo Tumpa ndarau umee peve mbae jocua jeco pegua. Echa'a mburuvicha peguarā ocvara vae reta vi uyapo jucuarāi —jei—. ⁴⁷ Jae ramiño vi pembisaluda picuāva reve yave perivi retaño, jocua mbaeti etei co mbae icavi vae. Echa'a upurugüirovia mbae vae reta vi uyapo jucuarāi —jei—. ⁴⁸ Jáeramo jecuaeño piyapo icavi vae. Echa'a peRu ara pe oī vae jecuaeño uyapo icavi vae —jei—.

6

Quirāi nemeē vaerā mbae iparavete vae reta pe

¹ Jupi vae piyapo yave, agüiye piyapo opaete vae jovaque jae reta uecha vaeraño. Echa'a piyapo yave opaete vae jovaque, peRu ara pe oī vae ndarau umee peve mbae jocua jupi vae piyapo vae jeco pegua —jei—.

² Jáeramo nemeē mbae iparavete vae reta pe yave, agüiye iyapo upurumbitavi vae reta uyapo rami. Echa'a jae reta omondo jenonde judío reta itupao reta pe jare calle rupi uyemimbi vae, īru vae reta icavi uyemingueta jese vaerā umee mbae iparavete vae reta pe yave. Añete che jae peve, jocua upurumbitavi vae reta güinoita'a imbaerā jucuarāi uyapo ramo —jei—. ³ Ērei nde nemeē mbae iparavete vae reta pe yave, agüiye tuicuaa ndepo ndeaso cotigua ndepo ndeacata uyapo vae, ⁴ agüiye vaerā quía ye uicuaa nde ndiyapo vae regua. Ērei ndeRu uicuaata nde ndiyapo viari vae jare umeeta ndeve mbae opaete vae jovaque —jei—.

Jesús oporomboe yerure re
(Lc 11.1-4)

⁵ Jare ndiyerure Tumpa pe yave, agüiye iyapo upurumbitavi vae reta uyapo rami. Echa'a jae reta uyerure Tumpa pe yave, uipota quía reta uecha vaerā. Jáeramo uyemboi judío reta itupao reta pe jare calle uyerea pe uyerure Tumpa pe yave. Añete che jae peve, jocua upurumbitavi vae reta güinoita'a imbaerā jucuarāi uyapo ramo —jei—. ⁶ Ērei nde ndiyerure Tumpa pe yave, ique ndero pe jare iyuquenda onque. Jayave iyerure ndeRu pe quía reta uicuaa mbae reve. Jare ndeRu uicuaata nde ndiyapo viari vae jare umeeta ndeve mbae opaete vae jovaque —jei—.

⁷ Ērei piyerure Tumpa pe yave, agüiye iyapo upurugüirovia mbae vae reta uyapo rami. Echa'a jae reta jecuaeño umbiaicueruere jei penti vaeño. Echa'a ipia pe uyemingueta tēi Tumpa uyapisacata jese reta jucuarāi uyapo yave —jei—. ⁸ Jáeramo agüiye piyapo jae reta uyapo rami. Echa'a peRu uicuaa mbae uata peve vae ndei piyerure chupe jese mbove —jei—. ⁹ Jáeramo piyerure Tumpa pe cuarāi: 'OreRu ara pe neī vae, tuyembidoraca nderee.

¹⁰ Tou ndeporoyocua.

Tuyeyapo nde ndere vae cua ivi pe ara pe uyeyapo oī rami.

¹¹ Emee oreve opa ara orerembiurā.

¹² Embiasa oreve orembaeyoa reta, ore numbiasa ipotave iyoa orecoti vae pe rami.

¹³ Jare agüiye emaeño aña guasu re uyapoca vaerā oreve mbaeyoa.

Orerepi aña guasu güi.

Echa'a nembae co mboroyocua.

Nde nenoī opaete mbaepuere.

Opaete vae nembidorata jaeño mai pegua.

Amén.'

Jucuarāi piyerure —jei—.

¹⁴ Echa'ã pe reta pembiasa yave iyoa pecotí vae reta, peRu ara pe oí vae umbiasata vi peve pembaeyoa reta —jei—. ¹⁵ Èrei pembiasa'ã yave iyoa pecotí vae reta, peRu ndarau vi umbiasa peve pembaeyoa reta —jei—.

Tembú güi uyecuacu vae reta

¹⁶ Piyecuacu tembú güi yave, agüiye piyapo upurumbitavi vae reta uyapo rami. Echa'ã jae reta uyecuacu tembú güi yave, uyecuua ipiatiti, íru vae reta uicuaa vaerã uyecuacu co ñugüinoi tembú güi. Añete che jae peve, jae reta güinoita'ã imbaerã jucuarã uyapo ramo —jei—. ¹⁷ Èrei nde tembú güi ndiyecuacu yave, iyapicatu ndea jare iyovae, ¹⁸ agüiye vaerã íru vae reta uicuaa ndiyecuacu co neí tembú güi. Jaeño ndeRu uicuaata ndiyecuacu co neí tembú güi vae. NdeRu uicuaata nde ndiyapo viari vae jare umeeta ndeve mbae opaete vae jovaque —jei—.

Piñuvatu mbaembae icavi vae piyueguarã ara pe

(Lc 12.32-34)

¹⁹ Agüiye piñuvatu cua ivi pe jeta mbaembae icavi vae piyueguarã. Echa'ã cua ivi pe cupii reta urucumegua mbaembae jare íru mbaembae iyuquiri urucumegua, jare imonda vae reta uique viari mbaembae oñomi vaerã —jei—. ²⁰ Piñuvatu mbaembae icavi vae piyueguarã ara pe. Echa'ã joco pe ndarau cupii reta urucumegua vaerã mbaembae jare ndarau mbae iyuquiri, jare ndarau imonda vae reta uique viari mbaembae oñomi vaerã —jei—. ²¹ Echa'ã piñuvatu yave mbaembae icavi vae piyueguarã ivi pe, jecuaeño pepia pe piyeminguetata ivi pegua re. Èrei piñuvatu yave mbaembae icavi vae piyueguarã ara pe, jecuaeño pepia pe piyeminguetata ara pegua re —jei—.

Tembipe yanderete pegua

(Lc 11.34-36)

²² Tembipe uique yanderete pe yanderesa rupi. Icavi yave nderesa, nderete tineeta tembipe pe. ²³ Èrei icavi'ã yave nderesa, nderete tineeta pítumimbi pe. Nderete tineeta tēi tembipe pe. Èrei tinee yave pítumimbi pe, pítumimbi ete co —jei—.

Mocui patrón

(Lc 16.13)

²⁴ Penti uyeyocui vae uipota yave uyeyocui mocui patrón pe, umitarēita penti patrón jare uauta íru vae, ani uparaviqui cavita penti patrón pe jare güirōta íru vae. Pepuere'ã piyeyocui Tumpa pe corepoti peau reve —jei—.

Agüiye piyemipia'ã mbaembae re

(Lc 12.22-31)

²⁵ Jáeramo che jae peve, agüiye piyemipia'ã mbae re. Agüiye piyemipia'ã perembiurã vae re. Jae ramiño vi agüiye piyemipia'ã peremimonderã vae re. Ndarau pepuere pico cavi jecuaeño piyemipia'ã yave perembiurã vae re jare peremimonderã vae re —jei—. ²⁶ Pemaē güira reta re. Jae reta umaeti'ã jare umbaeviro'ã. Uñuvatu'ã vi avati avatfo pe. Èrei peRu ara pe oí vae umingaru reta. Jare Tumpa perau ete güira reta güi —jei—. ²⁷ Aramoi piyemipia'ã pipota tēi pepucu ramo. Èrei ndarau etei pepuere piyembicuacuaa pepucu ete vaerã —jei—.

²⁸ ¿Maera pa piyemipia'ã peremimonderã vae re? Pemaē mbaepoti reta re, quirãi ucuacuaa reta. Uparaviqui'ã reta. Umaepova'ã reta vi. ²⁹ Èrei che jae peve, mbaepoti reta ipōra ete Salomón jemimonde ipōra vae güi. ³⁰ Tumpa omopōra ñana, yepe tēi penti ara ñana oí co pe jare piareve pe ocai. Jáeramo Tumpa umeeta co peve peremimonderã. Michi ete co pepurugüirovia —jei—. ³¹ Agüiye piyemipia'ã mbae re. Agüiye piyemipia'ã perembiurã vae re. Jae ramiño vi agüiye piyemipia'ã peremimonderã vae re —jei—. ³² Echa'ã opaete ivi pegua reta uyemipia'ã cua mbaembae re. Jare peRu ara pe oí vae uicuaa icavi co penoi vaerã opaete cua mbaembae —jei—. ³³ Èrei icavi co pipota ete vaerã Tumpa iporoyocua jare pipota vaerã piyapo jupi vae Tumpa jupi vae uyapo rami. Jucuarã yave, Tumpa umeeta peve opaete cua mbaembae —jei—. ³⁴ Jáeramo agüiye piyemipia'ã piareve peguarã vae re. Echa'ã piareve pe uyeyapo yeta mbae pemipia'ã vaerã. Opa ara uyeyapo mbaembae pemipia'ã vaerã —jei—.

7

Agüiye piñera ñru vae re
(Lc 6.37-38, 41-42)

¹ Agüiye piñera ñru vae re, agüiye vaerã ñru vae iñera peré. ² Echa'ã piñera yave ñru vae re, ñru vae iñerata vi peré. Jae ramiño vi icavi vae piyapo yave ñru vae pe, ñru vae uyapota vi icavi vae peve. Jae ramiño vi icavi mbae vae piyapo yave ñru vae pe, ñru vae uyapota vi icavi mbae vae peve —jei—. ³ Agüiye emae iti michi vae neñru jesa pe oñ vae re, ime yave nenoï iti tuicha vae nderesa pe —jei—. ⁴ Ndarau ndepuere ndere neñru pe: 'Cherivi, taequi nderesa güi jocua iti michi vae.' Echa'ã nde nenoï iti tuicha vae nderesa pe —jei—. ⁵ Nde co jae upurumbitavi vae. Eequi rani iti tuicha vae nderesa güi. Jayave nemaë cavita ndepuere vaerã ndeequi iti michi vae neñru jesa güi —jei—.

⁶ Agüiye pemee mbae uñeñono tee Tumpa peguarã vae yimba reta pe. Jae ramiño vi agüiye piñono ita ipõra vae reta cuchi reta ñugüinoï vae rupi. Echa'ã jucuarã piyapo yave, upiõra jese reta jare aramoï uyerovata pesuu vaerã —jei—.

Yerure regua
(Lc 11.9-13; 6.31)

⁷ Piyerure Tumpa pe mbae re, jare Tumpa umeeta peve. Peeca, jare pevãeta. Pembopu onque, jare onque uyepeata peve —jei—. ⁸ Echa'ã piyerure yave Tumpa pe mbae re, Tumpa umeeta peve. Jare peeca yave mbae, pevãeta. Jare pembopu yave onque, uyepeata peve —jei—. ⁹ Nde nenoï yave penti nderai, nderai uyerure yave ndeve mbiyape re, ndarau nemee chupe penti ita mbiyape ipepica pe —jei—. ¹⁰ Jae ramiño vi nderai uyerure yave ndeve pira re, ndarau nemee chupe penti mboï pira ipepica pe —jei—. ¹¹ Yepe tõi pe reta jecuaeño piyapo icavi mbae vae, ãrei pemee co mbaembae icavi vae pesambiai reta pe. Jáeramo peRu ara pe oñ vae iquirõi umee mbaembae icavi vae uyerure chupe jese vae reta pe —jei—.

¹² Jáeramo piyapo ñru vae reta pe pipota ñru vae reta uyapo vaerã peve vae rami. Echa'ã cua co jae mboroyocui jei vae jare Tumpa iñee aracae umimbeu vae reta jei vae —jei—.

Onque ipi-rai vae
(Lc 13.24)

¹³ Pique onque ipi-rai vae rupi. Echa'ã onque ipiguasu vae rupi uique vae reta uguata tape ipiguasu vae rupi, ãrei yugüiraa cañiteï pe. Jare jeta vae uique jocua onque ipiguasu vae rupi —jei—. ¹⁴ Echa'ã onque ipi-rai vae rupi uique vae reta uguata tape ipi-rai vae rupi, ãrei yugüiraa tecove opa mbae vae güinoï vae reta ñugüinoï vae pe. Jare mboviño uvãe jocua onque ipi-rai vae —jei—.

Ía icavi vae jare ía icavi mbae vae
(Lc 6.43-45)

¹⁵ Amocue upurumbitavi vae reta jeita: 'Che co jae Tumpa iñee umimbeu vae.' Agüiye perovia. Jae reta jei peve uipota co umimbeu peve Tumpa iñee, ãrei uipota uyapo icavi mbae vae peve —jei—. ¹⁶ Picuaata jae reta upurumbitavi vae reta co icavi mbae vae uyapo ramo. Yaequi'ã uva penti yai jãti vae güi. Jae ramiño vi yaequi'ã ìva penti yai jãti vae güi —jei—. ¹⁷ Pentì temiti icavi vae umee ía icavi vae. Jae ramiño vi pentì temiti icavi mbae vae umee ía icavi mbae vae —jei—. ¹⁸ Pentì temiti icavi vae umee'ã ía icavi mbae vae. Jae ramiño vi pentì temiti icavi mbae vae umee'ã ía icavi vae —jei—. ¹⁹ Temiti ía icavi'ã yave, ìya uyasia jare uapi —jei—. ²⁰ Jáeramo picuaata jae reta upurumbitavi vae reta co icavi mbae vae uyapo ramo —jei—.

Pucuaa'ã etei
(Lc 13.25-27)

²¹ Jeta vae jeita cheve: 'CheYa, cheYa.' ãrei amocue jucuarã jei vae ndarau yugüireco mboroyocua ara pegua pe. Echa'ã jaëno cheRu ara pe oñ vae jei vae uyapo vae reta yugüirecota joco pe —jei—. ²² Jeta vae jeita cheve jocua ara: 'CheYa, cheYa, ore numimbeu Tumpa iñee nderee pe. Jae ramiño vi nderee pe numbisiri aña reta oya jese vae reta güi. Jae ramiño vi nderee pe nduyapo jeta miacañi reta.' Jucuarã jeita —jei—. ²³ ãrei che jaeta chupe reta: 'Che pucuaa'ã etei. Pesiri chegüi. Echa'ã pe reta piyapo icavi mbae vae.' Jucuarã jaeta —jei—.

Tenta iguapica
(Lc 6.46-49)

²⁴ Jáeramo ime yave quía uyapisaca cheré vae, jae uyapo yave che jae chupe uyapo vaerã vae, jae co penti cuimbae iyaracuaa vae jentarã uyapo vae rami. Echa'ã cuimbae iyaracuaa vae oñono jenta iguapicarã itape re —jei—. ²⁵ Jayave tuicha oqui jare jeta i usiri tenta coti. Tanta vi ivitu tenta re. I jare ivitu umbiyaparata tēi tenta. Ērei uyapara'ã. Echa'ã iguapica oĩ penti itape re —jei—.

²⁶ Ērei ime yave quía uyapisaca cheré vae, uyapo'ã yave che jae chupe uyapo vaerã vae, jae co penti cuimbae iyaracuaa mbae vae jentarã uyapo vae rami. Echa'ã cuimbae iyaracuaa mbae vae uyapo jentarã ivicuĩti re —jei—. ²⁷ Jayave tuicha oqui jare jeta i usiri tenta coti. Tanta vi ivitu tenta re. I jare ivitu umbiyapara. Opa uyembai jocua tenta —jei.

²⁸ Jare Jesús opaete cua jei ma yave, opaete uyapisaca jese vae reta ipiacañi iporombocui re. ²⁹ Echa'ã ombocui reta mbaepuere güinoi vae rami. Jucuarã'ã oporombocui mboroyocui re oporombocui vae reta.

8

Jesús umbigüera cuimbae ipire ocui vae
(Mr 1.40-45; Lc 5.12-16)

¹ Jare Jesús ugüeyi ma ivitu guasu güi yave, jeta yugüiraa jaicue. ² Jayave ou Jesús oĩ vae pe penti cuimbae ipire ocui vae. Uyeatica Jesús jovai.

—CheYa, ndipota yave, ndepuere chembigüera —jei chupe.

³ Jayave Jesús oñono ipo jese.

—Aipota. Ecuera —jei chupe.

Jare jupivoiño cuimbae ucuera imbaerasi güi. Ocui'ã ma ipire. ⁴ Jayave Jesús jei chupe: —Agüiye emimbeu quía pe. Ecu iyeachaca sacerdote pe, jare emee ofrenda Moisés peocui rami, tenta guasu pegua reta uicuaa vaerã ndecuera ma co —jei.

Jesús umbigüera sundaro reta juvicha jembiocui
(Lc 7.1-10)

⁵ Jare Jesús oo uvãe yave Capernaum pe, ou jae oĩ vae pe penti sundaro reta juvicha uyerure vaerã chupe mbae re. ⁶ Jae jei Jesús pe:

—CheYa, cherembiocui imbaerasi oĩ cherenta pe. Ipuere'ã omi. Jasi ete oĩ chupe —jei.

⁷ Jayave Jesús jei chupe:

—Taa tambigüera.

⁸ Ērei sundaro reta juvicha jei chupe:

—CheYa, agüiye ecua cherenta pe. Echa'ã mbae'ã co che. Ndepuere ndere cua güiño cherembiocui ucuera vaerã jare ucuerata co —jei—. ⁹ Echa'ã ime mburuvicha mbaepuere güinoi cheré vae reta. Jae ramiño vi che anoi mbaepuere sundaro reta re. Che jae penti sundaro pe: 'Ecu', jare jae oo. Jae ramiño vi che jae iru sundaro pe: 'Eyu', jare jae ou. Jae ramiño vi che jae cherembiocui pe: 'Iyapo cua', jare jae uyapo —jei.

¹⁰ Jare Jesús cua uyandu yave, ipiacañi sundaro reta juvicha re, jare jei yugüiraa jaicue vae reta pe:

—Añete che jae peve, avãe'ã cua nunga mburugüirovia tuicha vae Israel pegua reta ipite pe. ¹¹ Jare che jae peve, jeta vae yugüeruta guarasi oẽ vae coti güi jare guarasi uique vae coti güi jare uguapita reta Abraham jare Isaac jare Jacob ndive mboroyocua ara pegua pe —jei—. ¹² Ērei mboroyocua pe yugüirecota tēi vae reta uyemombocata oca pe pitumimbi oĩ vae pe. Joco pe uyaota reta jare jãi umbiquiririuta —jei.

¹³ Jayave Jesús jei sundaro reta juvicha pe:

—Ndepuere ndeo. Ayapo ma ndipota ayapo vaerã vae nderovia cheré ramo —jei.

Jare jocua ora pe etei sundaro reta juvicha jembiocui ucuera.

Jesús umbigüera Pedro jaicho
(Mr 1.29-31; Lc 4.38-39)

¹⁴ Jare Jesús uique Pedro jenta pe yave, uecha Pedro jaicho jacu oĩ jupa pe. ¹⁵ Jayave Jesús uipisi ipo pe jare jacu upita voi chugüi. Jayave cuña upã jare umee mbae jou reta vaerã.

Jesús umbigüera jeta imbaerasi vae reta

(Mr 1.32-34; Lc 4.40-41)

¹⁶ Jare guarasi uique ma yave, tenta guasu pegua reta güeru Jesús pe jeta añä oya jese vae reta. Jayave Jesús oyocui añä reta usiri vaerä opaete oya jese vae reta güi, jare umbigüera opaete imbaerasi vae reta. ¹⁷ Jucuaräi uyapo Jesús uyeyapo vaerä Tumpa iñee araca umimbeu vae Isaías jei vae. Echa'a jae jei cuaräi: "Jae etei güiraa yandegüi yanembaerasi reta."

Jesús jupíe uipota yugüiraa vae reta

(Lc 9.57-62)

¹⁸ Jare jeta yugüeru Jesús oí vae pe. Jare Jesús uecha yave, jei jemimboe reta pe yugüiraa vaerä i guasu jovaicho pe. ¹⁹ Jare penti mboroyocui re oporomboe vae ou Jesús oí vae pe jare jei chupe:

—Oporomboe vae, taa nderupíe opaete que rupi ndeo vae rupi.

²⁰ Jayave Jesús jei chupe:

—Aguara reta güinoi icua reta, jare güira reta güinoi jaiti reta. Ërei che cuimbaerä ayeyapo vae mbaeti cherenta —jei.

²¹ Jare iru jemimboe jei Jesús pe:

—CheYa, emaeño rani cheré aa vaerä aico cheru re umano regua.

²² Ërei Jesús jei chupe:

—Eyu cherupíe. Tecove opa mbae vae güinoi mbae vae reta toñoti umano vae reta —jei.

Jesús umiquíi ivitu jare i guasu

(Mr 4.35-41; Lc 8.22-25)

²³ Jayave Jesús uyupi chalana pe jare jemimboe reta vi uyupi pipe. ²⁴ Jare ou ivitu tanta uyeyapo, jare i uyembiaparoaroa uique chalana pe, jare umitínee seri ma. Ërei Jesús oque oí. ²⁵ Jayave Jesús jemimboe reta yugüiraa omomba. Jei reta chupe:

—OreYa, orerepi. Ñamanota ma.

²⁶ Jayave Jesús jei chupe reta:

—¿Maera pa pequiye? Michi ete co pepurugüirovia —jei.

Jayave upña jare uñeengata ivitu jare i guasu pe. Jare opaete voi quíi ngatu upita.

²⁷ Jare Jesús jemimboe reta ipiacañi jare jei:

—¿Mbae nunga cuimbae pa cua? Ivitu jare i guasu uyapo jae oyocui vae.

Mocui cuimbae añä oya jese vae reta

(Mr 5.1-20; Lc 8.26-39)

²⁸ Jayave yugüiraa uväe i guasu jovaicho pe, gadareno reta iivi pe. Jare yugüeru teögüerirurenda güi ooväiti Jesús mocui cuimbae añä oya jese vae reta. Pochi reta. Jáeramo mbaeti quía ipuere uguata jocua tape rupi. ²⁹ Jare jae reta iñeëata reve jei:

—¿Maera pa ndeyu oremambeco, Jesús? Nde co jae Tumpa Tai. ¿Ndeyu pa ndiporaraca oreve añave? Taicue rupi ramo co ndiporaracata tēi oreve —jei reta.

³⁰ Jare mbiri catu jeta cuchi reta ucara ñugüinoi. ³¹ Jare añä reta uyerure Jesús pe:

—Cua cuimbae reta güi orembisiri yave, emaeño orerer ndoo vaerä ndoya cuchi reta re.

³² Jayave Jesús jei chupe reta:

—Pecua.

Jare yugüiraa ma yave cuimbae reta güi, añä reta yugüiraa oya cuchi reta re. Jayave opaete cuchi reta tanta osi ivia rupi oa i guasu pe, jare joco pe opa ipitupa reta.

³³ Jayave cuchi iyandarecoa reta opa osi, jare yugüiraa tenta guasu pe, jare umimbeu joco pegua reta pe opaete uyeyapo vae regua. Umimbeu vi chupe reta mbae añä oyase jese vae reta pe uyeyapo vae. ³⁴ Jayave opaete joco pegua reta yugüeru ooväiti Jesús. Jare uecha yave, umiñera oo ye vaerä jae reta iivi güi.

Jesús umbigüera cuimbae ipuere mbae omí vae

(Mr 2.1-12; Lc 5.17-26)

¹ Jare Jesús uyupi ye penti chalana pe jare oo ye i guasu jovaicho pe. Jayave oo uvãe jenta guasu pe. ² Jayave amocue vae güeru penti cuimbae imbaerasi vae. Cua cuimbae ipuere mbae omi vae. Jupa pe oĩ. Jesús cua uecha yave, uicuaa jae reta güirovia co jese, jare jei cuimbae ipuere mbae omi vae pe:

—Iyerovia, cherivi. Nembraeyoa reta uyembai ma —jei.

³ Jayave amocue mboroyocui re oporombocue vae reta ipia pe uyemingueta: “Cua cuimbae jei icavi mbae vae Tumpa coti.”

⁴ Ērei Jesús uicuaa jae reta ipiayemingueta, jare jei chupe reta:

—¿Maera pa penoi pepia pe yemingueta icavi mbae vae reta? ⁵ Chepuere jae cua cuimbae pe: ‘Nembraeyoa reta uyembai ma.’ Jae ramiño vi chepuere jae chupe: ‘Epũa eguata.’ ¿Mbae nunga pa yavai jae vaerã? —jei—. ⁶ Ērei aipota picuaa vaerã cua: Che cuimbaerã ayeyapo vae chepuere ambiasa quía pe imbaeyoa reta cua ivi pe aĩ rambueve —jei.

Jayave jei cuimbae ipuere mbae omi vae pe:

—Epũa evoi nderupa, jare ecua nerenta pe.

⁷ Jayave cuimbae upũa, jare oẽ oo jenta coti. ⁸ Ērei jeta joco pe ñugüinoi vae reta uecha yave, uiquiye jare umbiadora reta Tumpa, mbaepuere tuicha vae umee Jesús pe ramo.

Jesús ueni Mateo

(Mr 2.13-17; Lc 5.27-32)

⁹ Jare Jesús joco güi oo yave, uecha penti cuimbae Mateo jee vae uguapi oĩ mburuvicha peguarã ocovara ñugüinoi vae pe, jare jei chupe:

—Eyu cherupíe.

Jayave Mateo upũa, jare oo jae jupíe.

¹⁰ Jare Jesús ucaru oĩ rambueve Mateo jenta pe, jeta mburuvicha peguarã ocovara vae reta jare teco icavi mbae vae uyapo vae reta yugüeru ucaru vaerã Jesús jare jemimboe reta ndive. ¹¹ Jare fariseo reta cua uecha yave, jei Jesús jemimboe reta pe:

—¿Maera pa ucaru pemboe vae ocovara vae reta jare teco icavi mbae vae uyapo vae reta ndive?

¹² Ērei Jesús cua uyandu yave, jei chupe reta:

—Icove catu vae reta ueca'ã upurupiano vae. Imbaerasi vae retaño ueca —jei—. ¹³ Pecua piyemboe mbae uipota jei cua: ‘Aipota pepuruparareco vaerã, aipota'ã maemimba uyeyucacue reta pemee cheve vaerãño.’ Echa'ã che ayu aeca vaerã iyoa vae reta. Ayu'ã aeca vaerã jupi vae reta —jei.

Maera Jesús jemimboe reta uyecuacu'ã tembú güi

(Mr 2.18-22; Lc 5.33-39)

¹⁴ Jayave yugüeru Juan jemimboe reta Jesús oĩ vae pe jare upirandu chupe:

—¿Maera pa ore jare fariseo reta nduyecuacu tembú güi, ěrei nderemimboe reta uyecuacu'ã tembú güi?

¹⁵ Jayave Jesús jei chupe reta:

—Umendata vae pe ñugüinoi vae reta ndarau etei uyecuacu tembú güi, umendata vae jae reta ndive oĩ rambueve. Ērei outa uvãe ara umendata vae uyereraaca vaerã chugüi reta. Jayave ramo uyecuacuta tembú güi —jei—.

¹⁶ Icavi'ã yamboya vaerã temimonde indechi vae maemboyaa ipiau vae pe. Echa'ã jucuarãi yayapo yave, maemboyaa ipiau vae umiãta temimonde indechi vae, jare temimonde jeiete osoro —jei—. ¹⁷ Jae ramiño vi icavi'ã yambiru vaerã vino ipiau vae vino jiru guacapi indechi vae pe. Echa'ã jucuarãi yayapo yave, vino omondoro jiru, jare vino uyepiyere, jare jiru icavi'ã ma. Jáeramo yambiru vino ipiau vae jiru ipiau vae pe. Echa'ã jucuarãi yayapo yave, jiru osoro'ã jare vino uyepiyere'ã —jei.

Jairo tayi jare cuña Jesús jemimonde uyaviqui vae

(Mr 5.21-43; Lc 8.40-56)

¹⁸ Jare Jesús cua jei chupe reta rambueve, ou Jesús oĩ vae pe uvãe penti mburuvicha. Jae uyeatica Jesús jovai jare jei:

—Cherayi umanota ma oĩ. Ērei yaa iñono ndepo jese embigüera, agüiye vaerã umano —jei.

¹⁹ Jayave Jesús jare jemimboe reta yugüiraa mburuvicha jupíe.

²⁰ Jare penti cuña doce año ma uiporara tugüiguasu vae oya Jesús re icupe coti jare uyaviqui jemimonde jembei. ²¹ Echa'ã jae jei ma iyupe ipia pe: “Yepe tēi jemimondeño tayaviqui, acuerata co.” ²² Ērei Jesús uyerova, jare uecha yave, jei chupe:

—Cherindi, ndepiacatu. Ndecuera ma nderovia cheré ramo.

Jare jupivoiño cuña ucuera.

²³ Jare Jesús uique mburuvicha jo pe yave, uecha uyemimbi vae reta umiñee ma jemimbi reta teōgüe güiraa oñoti vaerã jare jeta joco pe yati ñugüinoi vae reta umbiapu ñugüinoi. ²⁴ Jayave jei chupe reta:

—Pecua oca pe. Cua cuñatai umano'ã co. Oqueño co oĩ —jei.

Ērei joco pe ñugüinoi vae reta oyoyai Jesús. ²⁵ Jayave Jesús omoë opaete vae oca pe. Jayave uique ye o pe jare uipisi cuñatai ipo pe, jare cuñatai upüa voi. ²⁶ Jare opaete jocua ivi pegua reta pe jerãcua quirãi Jesús uyapo cua miacañi.

Mocui cuimbae jesa mbae vae reta

²⁷ Jare Jesús joco güi oo yave, mocui cuimbae jesa mbae vae reta yugüiraa jaicue, jare iñeeãta reve jei chupe:

—Nde co jae David iñemoñaa reta pegua. Orepapareco.

²⁸ Jare Jesús uique ma yave o pe, cuimbae jesa mbae vae reta vi uique jaicue. Jayave Jesús upirandu chupe reta:

—¿Perovia pa chepuere co ayapo cua peve?

—Ndugüirovia, oreYa —jei reta.

²⁹ Jayave Jesús uyaviqui jae reta jesa, jare jei chupe reta:

—Perovia ramo, pema.

³⁰ Jare mocui reve ipuere umae. Jayave Jesús jei chupe reta:

—Agüiye pemimbeu quía pe ave.

³¹ Ērei jae reta yugüiraa ma yave, umimbeu jeta jocua ivi pegua reta pe Jesús uyapo chupe reta vae.

Iupa vae umbipi uyemingueta

³² Jare jae reta yugüiraa ma yave, ñru vae reta güeru Jesús oĩ vae pe penti cuimbae iupa vae, aña oya jese vae. ³³ Jayave Jesús umbisiri aña chugüi jare iupa vae umbipi uyemingueta. Jare jeta vae reta ipiacañi jare jei reta:

—Yaecha'ãi cua nunga miacañi Israel pe.

³⁴ Ērei fariseo reta jei:

—Aña guasu imbaepuere pe umbisiri aña reta oya jese vae reta güi.

Jeta co yaaviro vaerã

³⁵ Jare Jesús oo opaete tenta guasu reta jare tenta guasu-rai reta rupi, jare oporomboc judío reta itupaopao pe. Umimbeu ñee icavi vae Tumpa iporoyocua pegua, jare umbigüera imbaerasi vae reta ipotave mbaerasi güi. ³⁶ Ērei uecha yave jeta vae, uipapareco umae jese reta. Echa'ã jae reta uyemipia'ã jare ipiatiti. Ovecha mbaeti iyandarecoa güinoi vae reta rami co. ³⁷ Jayave Jesús jei jemimboe reta pe:

—Jeta ete co yaaviro vaerã. Ērei mbovi ete co umbaeviro vae reta. ³⁸ Jáeramo pe reta piyerure yandeYa pe omondo vaerã uparaviqui vae reta umbaeviro reta vaerã —jei.

10

Jesús jemimondo reta jee

(Mr 3.13-19; Lc 6.12-16)

¹ Penti ara Jesús umbati jocua doce jemimboe reta, jare umee chupe reta mbaepuere umbisiri vaerã aña reta oya jese vae reta güi jare umbigüera vaerã imbaerasi vae reta ipotave mbaerasi güi. ² Cua co jae jocua doce Jesús jemimondo reta jee: Simón (Pedro jee vae), jare Simón tivi Andrés jee vae, jare Zebedeo tai reta Jacobo jare Juan jee vae, ³ Felipe, Bartolomé, Tomás, Mateo ocovara vae, Alfeo tai Jacobo jee vae, Tadeo, ⁴ Simón (jae co Zelote pe ueni vae), jare Judas Iscariote (cua cuimbae umee Jesús jovaicho reta pe).

Jesús omondo jocua doce jemimboe reta

(Mr 6.7-13; Lc 9.1-6)

⁵ Jare ndei omondo reta mbove, Jesús oyocui cua doce reve.

—Agüiye pecua judío mbae vae reta ñugüinoi vae pe. Agüiye pecua Samaritano jenta guasu reta pe —jei—. ⁶ Pecua Israel pegua reta ñugüinoi vae pe. Echa'á jae reta ovecha ucañi vae reta rami co —jei—. ⁷ Jare peguata rambueve, pemimbeu ñru vae reta pe cuarai: 'Mboroyocui ara pegua outa ma uväe' —jei—. ⁸ Pembigüera imbaerasi vae reta. Pembigüera ipire ocui vae reta. Pembijecove ye umanocue vae reta. Pembisiri añra reta oya jese vae reta güi. Che amee ma peve cua mbaepuere jepi mbae reve. Jáeramo agüiye pecovara mbae quía pe piyapota chupe vae re —jei—. ⁹ Agüiye peraa oro jare corepoti. ¹⁰ Agüiye ví peraa peurupucu, jare agüiye peraa mocui camisa. Peraa jaëño penti pepopoca jare pepipasa pemonde vae. Echa'á icavi co ñru vae reta umbiepi vaerã upraviqui vae pe —jei—.

¹¹ Jare peo yave penti tenta guasu pe ani penti tenta guasu-rai pe, pepirandu quía ra pepuere perovia catu joco pe. Jayave pico joco pe peo ye regua —jei—. ¹² Jare pevãe yave penti tenta pe, pere: 'Tumpa tumee peve mbiacatu.' ¹³ Jare pepuere yave perovia catu joco pe yugüireco vae reta, Tumpa umeeta chupe reta mbiacatu. Ërei pepuere'ã yave perovia catu, pe retaño penoita mbiacatu —jei—. ¹⁴ Jare ime yave tenta pegua reta ani tenta guasu pegua reta uipota'ã pepita vaerã joco pe jare uipota'ã uyapisaca peré vae, pecuaño joco güi, jare pemitimo ivicui pepi güi —jei—. ¹⁵ Añete co jae peve, Tumpa uãa yave ivi pegua reta, jocua tenta guasu pegua reta tanta uiporarata Sodoma jare Gomorra pegua reta güi —jei—.

Uiporarata co

¹⁶ Mase, pomondo icavi mbae vae uyapo vae reta ipite rupi. Pe reta ovecha reta rami co. Jae reta co yaguapita reta rami. Jáeramo pearacuaa catu mboi iyaracuaa catu rami. Jae ramiño vi agüiye piyapo icavi mbae vae picasu uyapo'ã icavi mbae vae rami —jei—. ¹⁷ Piñemoa ngatu. Echa'á ñru vae reta pereraata mburuvicha reta yati vae pe, uñeapo vaerã peré. Jare penupata judío reta itupao reta pe —jei—. ¹⁸ Jare piyerreraacata mburuvicha reta jare mburuvicha guasu retajovai chereco pegua, pepuere vaerã chemimbeu chupe reta jare judío mbae vae reta pe —jei—. ¹⁹ Ërei jae reta pemee yave, agüiye piyemipia'ã mbae pereta mburuvicha reta pe vae re. Echa'á Espiritu Santo uicuaacata peve jocua ora pe etei mbae pere vaerã —jei—. ²⁰ Echa'á peRu iEspiritu pemborita piyemingueta vaerã, pe retaiño'ã co piyeminguetata —jei—.

²¹ Jare penti cuimbae umeeta tivi uyeyucaca vaerã. Jae ramiño vi penti cuimbae umeeta tai uyeyucaca vaerã. Jare sambiai reta oyovaichota tu jare ichi ndive, jare uyucacata —jei—. ²² Jare piñemitarëicata opaete vae pe chereco pegua. Ërei jösata oo uväe iyapi pe vae uyembiasacata co —jei—. ²³ Ërei penti tenta guasu pe uyapo reta icavi mbae vae peve yave, pesi ñru tenta guasu pe. Añete che jae peve, ndarau peo opaete Israel pegua reta jenta guasu pe ndei che cuimbaerã ayeyapo vae ayu ye mbove —jei—.

²⁴ Pentu uyemboe oñ vae uicuaa ete'ã oporomboe vae uicuaa vae rami. Jae ramiño vi pentu uyeyocui vae imbaepuere tuicha'ã ete ipatrón imbaepuere rami —jei—. ²⁵ Icavi co pentu uyemboe oñ vae uyemboe cavi vaerã oporomboe vae uicuaa vae re. Jae ramiño vi icavi co pentu uyeyocui vae uiporu cavi vaerã mbaepuere ipatrón umee chupe vae. Che co jae peYa, jare ñru vae reta chembijee Beelzebú. Jáeramo pembijeeta Beelzebú tai reta. Echa'á pe reta piyeyocui cheve —jei—.

Pequiye Tumpa güi

(Lc 12.2-7)

²⁶ Ërei agüiye pequiye chugüi reta. Ime yave mbae uyeyasoi vae, uyeechacañotai co. Jare ime yave mbae uñeñomi vae, uyecuaañotai co —jei—. ²⁷ Pítumimbi pe che jae peve vae re piyemingueta tembipe pe. Jare che jae viari peve vae pemimbeu opaete vae pe —jei—. ²⁸ Agüiye pequiye upuruyuca vae reta güi. Echa'á pereteño ipuere uyuca. Ipuere'ã uyuca perecove. Pequiye Tumpa güi. Echa'á jae ipuere omondo quía jete jare jecove tata guasu pe —jei—. ²⁹ Picuaa co quirai umaemee vae reta umee mocui güira-rai mbovi ete corepoti re. Ërei mbaeti penti yepe umano oa ivi pe peRu uicuaa'ã reve —jei—. ³⁰ Tumpa uicuaa mbovi pea penoi peãca re vae —jei—. ³¹ Jáeramo agüiye pequiye. Echa'á Tumpa perau ete jeta güira-rai reta güi —jei—.

*Īru vae reta jovaque uyecuaaca vae
(Lc 12.8-9)*

³² Ime yave quía ĩru vae reta jovaque jei yave: ‘Che co jae Jesús jemimboe’, che jaeta cheRu ara pe oĩ vae jovaque: ‘Cua co jae cheremimboe’ —jaeta, jei Jesús—. ³³ Ĕrei ime yave quía ĩru vae reta jovaque checuacu vae, che vi aicuacuta cheRu ara pe oĩ vae jovaque —jei—.

*Ayu uyembiyao vaerã uyugüi ivi pegua reta
(Lc 12.51-53; 14.26-27)*

³⁴ Aramoĩ pepia pe piyemingueta che ayu co amee vaerã mbiacatu ivi pegua reta pe. Ĕrei jucuarãĩ co. Che ayu uyembiyao vaerã uyugüi ivi pegua reta, mbaeti güinoi vaerã mbiacatu —jei—. ³⁵ Ayu penti cuimbae oyovaicho vaerã tu ndive, jare cuñatai oyovaicho vaerã ichi ndive, jare cuña oyovaicho vaerã imesi ndive —jei—. ³⁶ Jare cuimbae jenta pegua reta oyovaichota jae ndive —jei—. ³⁷ Ime yave quía uau ete tu jare ichi chegüi vae, ndarau ipuere ico cheremimboerã. Jae ramiño vi ime yave quía uau ete isambiai reta chegüi vae, ndarau ipuere ico cheremimboerã —jei—. ³⁸ Jare ime yave quía ovoĩã icurusu oo vaerã cherupie vae, ndarau ipuere ico cheremimboerã —jei—. ³⁹ Uipota uñuvatu jecove vae ndarau ipuere. Ĕrei umeeta jecove chereco pegua vae uñuvatuta co —jei—

*Ambijecoviata co chupe
(Mr 9.41)*

⁴⁰ Ime yave quía uyapo icavi vae peve, cheve uyapo icavi vae. Jare jocua cheve uyapo icavi vae, uyapo vi icavi vae chembou vae pe —jei—. ⁴¹ Ime yave quía icavi vae uyapo penti Tumpa ñee umimbeu vae pe Tumpa ñee umimbeu ramo, Tumpa umeeta chupe ñee umimbeu vae pe umeeta vae. Jae ramiño vi ime yave quía icavi vae uyapo penti jupi vae uyapo vae pe jupi vae uyapo ramo, Tumpa umeeta chupe jupi vae uyapo vae pe umeeta vae —jei—. ⁴² Añete che jae peve, ime yave quía umee penti vaso i roĩsa vae yepe penti sambiai jou vaerã vae, uyapo yave jucuarãĩ jae co cheremimboe ramo, ambijecoviata co chupe —jei—.

11

*Juan ombou vae reta
(Lc 7.18-35)*

¹ Jare Jesús opa ma oyocui yave jocua doce jemimboe reta, jae etei oo joco güi oporomboe vaerã jare umimbeu vaerã Tumpa ñee Israel pegua tenta guasu reta pe.

² Jare Juan peresoriru pe oĩ rambueve, uicuaa Cristo uyapo oĩ vae regua. Jayave ombou mocui jemimboe reta Jesús oĩ vae pe ³ jei vaerã chupe:

—¿Nde pa co jae Cristo outa vae? ani ¿nuãrota pa ĩru vae ou vaerã?

⁴ Jayave Jesús jei chupe reta:

—Pecua ye pemimbeu Juan pe piyandu jare peecha vae regua. ⁵ Jesa mbae vae reta umae ma. Ipuere mbae uguata vae reta uguata ma. Ipire ocui vae reta ucuera ma. Iyapisa mbae vae reta uyandu ma. Umanocue vae reta icove ye ma. Iparavete vae reta uyapisaca ñee icavi vae re —jei—. ⁶ Jare Tumpa umivendiseta jecuae güirovia cheré vae reta —jei—.

⁷ Jare yugüiraa ye yave Juan ombou vae reta, Jesús umbipi umingueta joco pe ñugüinoi vae reta Juan re. Jei chupe reta:

—¿Quía re pa co peo ñuu pe pemae? Jae ipirãta mbae vaerã co tacuarãsi omi ivitu uipeyu yave vae rami —jei—. ⁸ ¿Quía re pa co peo pemae? Jae omondeã temimonde ipõra vae. Mase, temimonde ipõra vae omonde vae reta yugüireco mburuvicha guasu reta jenta pe —jei—. ⁹ ¿Quía re pa co peo pemae? ¿Peo ra pemae vaerã penti Tumpa ñee umimbeu vae re? Añete che jae peve, Tumpa umee chupe uyapo vaerã jeta ete ĩru Tumpa ñee umimbeu vae reta uyapo vae güi —jei—. ¹⁰ Tumpa ñee uyecuatía oĩ jese cuarãĩ: ‘Mase’ —jei Tumpa—, ‘che amondota chiñee güiraata vae nderenonde, uyapicatu vaerã nderaperã.’

Jucuarãĩ uyecuatía oĩ —jei—. ¹¹ Añete che jae peve, Tumpa umee Juan upurumbibautizase vae pe uyapo vaerã jeta ete ĩru Tumpa ñee umimbeu vae reta uyapo vae güi. Ĕrei taicuegua vae ara pegua mboroyocua pegua uyembutuichaca eteta Juan güi —jei—.

¹² Juan upurumbibautizase vae umbipi Tumpa iporoyocua regua umimbeu güive, opaete vae uipota uique jocua mboroyocua ara pegua pe —jei—. ¹³ Echa'ã opaete Tumpa iñee araca umimbeu vae reta uicuatía vae jare mboroyocui vi uicuaaca Tumpa iporoyocua regua ndei Juan oo mbove —jei—. ¹⁴ Jare pipota yave perovia, jae co Elías. Echa'ã Tumpa iñee araca umimbeu vae jei outa co Elías —jei—. ¹⁵ Uipota uyandu vae tuyapisaca cua re —jei—.

¹⁶ Tamimbeu peve mbae ndive amboyovaque añave yugüireco vae reta. Jae reta co sambiai plaza pe uguapi ñugüinoi vae reta rami. Jae reta jei uyupe cuarãi: ¹⁷ 'Nduyemimbi ma peve, ãrei pe reta pepirae'ã. Orepiatiti perovaque, ãrei pe reta piyao'ã.' Jucuarãi jei —jei—. ¹⁸ Echa'ã Juan ou, jare jae uyecuacu tembü jare vino güi. Jáeramo uicuaa vae reta jei añaa oya co Juan re —jei—. ¹⁹ Che cuimbaerã ayeyapo vae ayu, jare che ayecuacu'ã tembü jare vino güi. Jáeramo checuaa vae reta jei cuarãi: 'Mase, jae jou jeta tembü jare vino. Jae co mburuvicha peguarã ocovara vae reta jare teco icavi mbae vae uyapo vae reta iamigo.' Jucuarãi jei —jei—. ãrei opaete iyaracuaa vae reta uicuaaca aracuaa icavi co —jei—.

Tenta guasu pegua uiporarata vae reta
(Lc 10.13-15)

²⁰ Jayave Jesús umbipi uñeengata jocua tenta guasu jeta miacañi uyapo pipe vae reta pe. Echa'ã jocua tenta guasu pegua reta ueya'ã iyemingueta icavi mbae vae ipia pe oñ vae. Jae jei:

²¹ —Corazín pegua reta uiporarata co. Betsaida pegua reta uiporarata co. Echa'ã jeta miacañi reta ayapo ipite pe chembaepuere pe. Jucuarãi ayapo yave mona Tiro jare Sidón pe, joco pegua reta ueyata tõi araca ma iyemingueta icavi mbae vae ipia pe oñ vae. Omondeta tõi temimonde jaimbe vae jare oñonota tõi tanimbu iñãca re uicuaaca vaerã ipiatiti co —jei—. ²² ãrei che jae peve, Tumpa uãa yave ivi pegua reta, Corazín jare Betsaida pegua reta tanta uiporarata Tiro jare Sidón pegua reta güi —jei—. ²³ Jare Capernaum pegua reta ipia pe uyemingueta tõi icavi co yugüireco vaerã Tumpa ndive. ãrei Tumpa omondota reta yugüireco vaerã cañitei pe. Echa'ã jeta miacañi reta ayapo ipite pe chembaepuere pe. Jucuarãi ayapo yave mona Sodoma pe, Sodoma ndarau tõi uyembai —jei—. ²⁴ ãrei che jae peve, Tumpa uãa yave ivi pegua reta, Capernaum pegua reta tanta uiporarata Sodoma pegua reta güi —jei—.

Peyu checoti peputuu vaerã
(Lc 10.21-22)

²⁵ Jayave Jesús jei:

—CheRu, nde co jae ara pegua reta jare ivi pegua reta iYa. Ameer yasurupai ndeve quirã nde nemaño'ã cua ivi pegua iyaracuaa vae reta re uicuaa vaerã cua mbaembae, ãrei ndicuaaca sambiai rami vae reta pe. ²⁶ Icavi co, cheRu. Echa'ã icavi co ndeve ndiyapo vaerã jucuarãi —jei—.

²⁷ Jayave jei vi:

—CheRu umee ma cheve opaete. Mbaeti quía uicuaa cavi cheregua, jaño cheRu. Jae ramiño vi mbaeti quía uicuaa cavi cheRu regua, jaño che jare che aicuaaca chupe vae reta —jei—.

²⁸ Opaete piyemipia'ã jare pepiatiti pico vae peyu checoti. Che tambuputuu perecove —jei—. ²⁹ Piñemñiru che ndive jare piyemboe che aipota pomboe jese vae re. Echa'ã che añemimichi. Ayembutuicha'ã etei. Jucuarãi piyapo yave, perecove uputuuta —jei—. ³⁰ Echa'ã piñemñiru yave che ndive, ndarau piyemipia'ã jare ndarau pepiatiti —jei—.

12

Jesús jemimboe reta uipoo trigo mbutuu ara pe
(Mr 2.23-28; Lc 6.1-5)

¹ Mbutuu ara pe Jesús oo co rupi jemimboe reta ndive. Jesús jemimboe reta iyembai jare umbipi uipoo trigo jare jou. ² ãrei fariseo reta uecha yave, jei Jesús pe:

—Mase, nderemimboe reta uyapo ñugüinoi aguiyeta tõi uyapo mbutuu ara pe vae.

³ Jayave Jesús jei chupe reta:

—¿Pemingüeta'ã pa David uyapocue vae regua, jae jare jae ndive ñugüinoi vae reta iyembai yave? ⁴ David uique Tumpa jo pe jare jou mbiyape Tumpa jo pe uñeño tee vae reta. Agüiyeta tēi co David jare jae ndive ñugüinoi vae reta jou jocua mbiyape. Jaeño sacerdote reta ipuere jou —jei—. ⁵ Jare ¿pemingüeta'ã etei pa mboroyocui pe quirãi mbutuu ara pe sacerdote Tumpa jo pe ñugüinoi vae reta uyapo agüiyeta tēi quía uyapo mbutuu ara pe vae? Ërei Tumpa umbijeco'ã reta —jei—. ⁶ Ërei che jae peve, che cua pe aĩ vae ayembutuichaca ete Tumpa jo güi —jei—. ⁷ Ërei picuaa'ã mbae uipota jei cua Tumpa iñee pe uyecuatía oĩ vae: 'Aipota pepuruparareco vaerã' —jei Tumpa—, 'aipota'ã maemimba uyeyucacue reta pemee cheve vaerãño.' Jucuarãi uyecuatía oĩ. Echa'ã picuaa yave mona, ndarau tēi pembijeco mbaeti teco güinoi vae reta —jei—. ⁸ Echa'ã che cuimbaerã ayeyapo vae chepuere jae mbae icavi uyeyapo vaerã mbutuu ara pe —jei.

Cuimbae ipo jovaicho tipa vae
(Mr 3.1-6; Lc 6.6-11)

⁹ Jare Jesús oo joco güi uique judío reta itupao pe. ¹⁰ Jare joco pe oĩ penti cuimbae ipo jovaicho tipa vae. Jare joco pe ñugüinoi vae reta upirandu Jesús pe:

—¿Icavi pa yambigüera vaerã quía mbutuu ara pe? ¿Mbae pa jei mboroyocui cua re? —jei reta.

Echa'ã jae reta uipota tēi umbijeco Jesús.

¹¹ Jayave Jesús jei chupe reta:

—Penti cuimbae güinoi yave penti ovecha, jare ovecha oa yave ivicua pe mbutuu ara pe, cuimbae uipisi voita güinoẽ ivicua güi. ¹² Ërei penti cuimbae jepi ete penti ovecha güi. Jáeramo jupi co yayapo vaerã icavi vae mbutuu ara pe —jei.

¹³ Jayave jei cuimbae pe:

—Eupi ndepo.

Jayave cuimbae ipo uupi, jare ucuera voi. Oyovaque ma ipo jovaicho ipo icavi vae ndive. ¹⁴ Jayave fariseo reta oẽ judío reta itupao güi, jare uyemboemboe quirãi ra uyucacata Jesús.

Cherembicui aiparavo vae

¹⁵ Ërei Jesús cua uicuaa yave, oo joco güi. Jare jeta vae reta yugüiraa jaicue, jare Jesús umbigüera opaete imbaerasi vae reta. ¹⁶ Jare Jesús oyocui reta agüiye vaerã umimbeu quía co jae vae. ¹⁷ Cua uyapo, uyeyapo vaerã Tumpa iñee araca umimbeu vae Isaías jei vae. Echa'ã jae jei cuarãi:

¹⁸ "Mase, jae co cherembicui aiparavo vae" —jei Tumpa—.

"Aau ete. Ayerovia tuicha jese.

Ameeta chupe cheEspíritu, jare jae uãata judío mbae vae reta.

¹⁹ Ndarau uyeaca quía ndive. Ndarau vi quía uyandu iñee calle rupi.

²⁰ Ndarau uaquio tacuarãsi uyeca vae.

Ndarau vi ombove mechero michi ete jendi oĩ vae, ndei upurumiamiri upuruãa vaerã mbove.

²¹ Jare jae jee re judío mbae vae reta güiroviata."

Jucuarãi jei.

Jei reta icavi mbae vae Espíritu Santo coti
(Mr 3.20-30; Lc 11.14-23; 12.10)

²² Jayave amocue vae güeru Jesús oĩ vae pe penti cuimbae aña oya jese vae. Cuimbae jesa mbae vae jare iupa vi. Jare Jesús umbigüera. Cuimbae uma ma jare uyemingueta ma. ²³ Jare opaete joco pe ñugüinoi vae reta ipiacañi jare jei:

—¿Cua ra co jae David iñemoñaã reta pegua?

²⁴ Ërei fariseo reta cua uyandu yave, jei reta:

—Aña guasu Beelzebú imbaepuere pe umbisiri aña reta oya jese vae reta güi.

²⁵ Jesús uicuaa fariseo reta ipiyemingueta jare jei chupe reta:

—Penti tenta guasu pegua reta oyovaicho uyupii yave, opata co jocua tenta guasu. Jae ramiño vi penti tenta pegua reta oyovaicho uyupii yave, opata co jocua tenta —jei—.

²⁶ Jare Satanás umbisiri yave Satanás oya jese vae reta güi, imbaepuere uyembiyao ma co. Jáeramo ndarau etei ma oĩ iporoyocuiã —jei—. ²⁷ Ërei che ambisiri yave aña reta oya jese vae reta güi Beelzebú imbaepuere pe, ¿quía imbaepuere pe ra umbisiri aña reta oya

jese vae reta güi perentarā reta? Pepuere pepirandu chupe reta jese —jei—. ²⁸ Ērei che ambisiri aña reta oya jese vae reta güi Tumpa iEspíritu imbaepuere pe. Jáeramo pepuere picuaa ou ma co uvāe peve Tumpa iporoyocua —jei—.

²⁹ Ime yave quía uipota uique cuimbae ipirāta vae jenta pe upīro vaerā imbaembae chugüi vae, uipocuata rani cuimbae ipirāta vae. Jayave ramo ipuereta upīro imbaembae chugüi —jei—.

³⁰ Ime yave quía uipota'ā ico cheīrurā vae, oyovaicho co che ndive. Jae ramiño vi ime yave quía chembori'ā vae, uyapo co icavi mbae vae checoti —jei—. ³¹ Jáeramo che jae peve, opaete ivi pegua reta imbaeyoa reta jare opaete iñee icavi mbae Tumpa coti vae Tumpa ipuer umbai. Ērei Tumpa ndarau etei umbiasa jei icavi mbae vae Espiritu Santo coti vae pe —jei—. ³² Jare ime yave quía jei icavi mbae vae che cuimbaerā ayeyapo vae coti vae, Tumpa umbiasata chupe. Ērei ime yave quía jei icavi mbae vae Espiritu Santo coti vae, Tumpa ndarau etei umbiasa chupe, añave jare ara reta outa vae pe —jei—.

Ía icavi vae jare ía icavi mbae vae
(Lc 6.43-45)

³³ Penoi yave temiti icavi vae, penoita vi ía icavi vae. Jae ramiño vi penoi yave temiti icavi mbae vae, penoita vi ía icavi mbae vae. Echa'ā peeche yave temiti ía, picuaata icavi ra temiti —jei—. ³⁴ Pe reta co jae mboi pochi vae reta rami. Echa'ā pe reta piyapo icavi mbae vae. Jáeramo pepuere'ā etei pere icavi vae. Echa'ā penti penti uyemingueta ipia pe güinoi vae rupi —jei—. ³⁵ Quía nunga jecocavi vae güinoi icavi vae ipia pe. Jáeramo jei icavi vae. Jae ramiño vi quía nunga jecopochi vae güinoi icavi mbae vae ipia pe. Jáeramo jei icavi mbae vae. ³⁶ Ērei che jae peve, jocua ara Tumpa upuruāa yave, jae umbijecota ivi pegua reta opaete ñee icavi mbae vae regua re —jei—. ³⁷ Echa'ā Tumpa jeita icavi vae co piyapo, icavi vae pere yave. Jae ramiño vi Tumpa jeita icavi mbae vae co piyapo, icavi mbae vae pere yave —jei—.

Uipota reta uecha miacañi
(Mr 8.12; Lc 11.29-32)

³⁸ Jayave amocue mboroyocui re oporomboc vae reta jare fariseo reta jei Jesús pe:
—Oporomboc vae, nduipota ndiyapo vaerā mbae ndicuaaca vaerā oreve quía co nde.

³⁹ Jayave Jesús jei chupe reta:

—Añave yugüireco vae reta icavi mbae vae uyapo vae reta co. Upurugüirovia'ā. Jáeramo uipota ayapo vaerā miacañi chupe reta. Ērei jaeño uyeyapota mbae Tumpa iñee aracae umimbeu vae Jonás pe uyeyapo vae rami, jae reta uicuaa vaerā quía co che —jei—. ⁴⁰ Echa'ā Jonás upita mbapi ara jare mbapi piare jocua pira guasu jie pe. Jae ramiño vi che cuimbaerā ayeyapo vae apitata mbapi ara jare mbapi piare ivigüi pe —jei—. ⁴¹ Tumpa upuruāa yave, Nínive pegua reta upūata umbijeco vaerā añave yugüireco vae reta. Echa'ā jae reta ueya iyemingueta icavi mbae vae ipia pe oī vae, Jonás umimbeu chupe reta yave Tumpa iñee. Ērei chembaepuere tuicha ete co Jonás imbaepuere güi —jei—. ⁴² Tumpa upuruāa yave, jocua cuña mburuvicha guasu ico sur coti vae upūata umbijeco vaerā añave yugüireco vae reta. Echa'ā jae ou mbiri ete güi uyapisaca vaerā Salomón iyaracuaa catu vae re. Ērei che chearacuaa catu ete Salomón güi —jei—.

Aña usiri jare ou ye vae
(Lc 11.24-26)

⁴³ Penti aña usiri ma yave oya jese vae güi, uguata ñana rupi ueca quiape ico vaerā. Ērei ipuere'ā yave uvāe quiape ico vaerā, ⁴⁴ jei iyupe: Taa ye jocua chero ayu chugüi vae pe —jei, jei—. Echa'ā yandepuere yamijaanga penti o jocua cuimbae aña usiri ma chugüi vae re. Aña ou ye uvāe yave jocua o pe, uecha ipo'ā. O iya utupeí ma jare uyapicatu —jei—. ⁴⁵ Jayave oo ye aña güeru siete aña icavi mbae ete chugüi vae reta jocua o pe. Jayave ocho reve uique o pe, joco pe yugüireco vaerā. Tenonde yave, penti aña oya jese yave, jocua cuimbae uiporara. Ērei taicue rupi ocho aña reta oya jese. Jáeramo tanta uiporara. Jae ramiño vi uyeyapota añave yugüireco vae icavi mbae vae uyapo vae reta pe —jei—.

Jesús ichi jare tivi reta
(Mr 3.31-35; Lc 8.19-21)

⁴⁶ Jare Jesús uyemingueta rambueve joco pe ñugüinoi vae reta pe, Jesús ichi jare tivi reta yugüeru uväe jae oï vae pe, jare oca pe ñugüinoi. Jae reta uipota uyemingueta Jesús ndive. ⁴⁷ Jayave penti joco pe oï vae jei Jesús pe:

—¡Aipo! Ndesi jare nderiví reta oca pe ñugüinoi. Uipota uyemingueta nde ndive —jei.

⁴⁸ Ērei Jesús jei chupe:

—¿Quía nunga pa co jae chesi jare cheriví reta?

⁴⁹ Jayave uupi ipo jemimboe reta coti, jare jei:

—Cua nunga reta co jae chesi jare cheriví reta. ⁵⁰ Echa'ã opaete cheRu ara pe oï vae jei vae uyapo vae reta co jae cheriví jare cherindi jare chesi —jei.

13

Jesús umijaanga umaeti vae

(Mr 4.1-9; Lc 8.4-8)

¹ Jocua ara Jesús oë tenta güi oo uguapi i guasu jembei pe. ² Jare jeta vae uyembati Jesús oï vae pe. Jáeramo Jesús uyupi penti chalana i guasu pe oï vae pe, jare uguapi pipe. Jare yati vae reta uyemboi ñugüinoi i guasu jembei pe. ³ Jare Jesús omboe reta jeta mbaembae re umijaanga reve. Jei chupe reta:

—Penti cuimbae oo umaeti vaerã. ⁴ Umaeti yave, umiai temiti, jare amocue oa tape rupi. Jayave yugüeru güira reta opa jou —jei—. ⁵ Īru temiti oa mboviño ivi itape iárambo oï vae pe. Cua imambae oë, jeta'ã ivi chupe ramo —jei—. ⁶ Ērei guarasi jasi yave, ipiru. Jare japo quipe'ã oï ramo, utini —jei—. ⁷ Īru temiti oa ñanapite pe. Nana ucuacuaa yave, opa uyuca temiti. ⁸ Jare ĩru temiti oa ivicavi pe. Cua reta ucuacuaa cavi jare ía. Amocue jeta ete jāi, jare ĩru jeta catu jāi, jare ĩru mboviño jāi —jei—. ⁹ Uipota uyandu vae tuyapisaca cua re —jei.

Maera Jesús oporomboe umijaanga reve

(Mr 4.10-12; Lc 8.9-10)

¹⁰ Jayave Jesús jemimboe reta yugüeru upirandu chupe:

—¿Maera pa nemingueta reta nemijaanga reve?

¹¹ Jayave Jesús jei chupe reta:

—Amimbeu ma peve mboroyocua ara pegua regua. Cua uyecuaa'ã ĩru vae reta pe —jei—. ¹² Echa'ã güinoi vae pe uñemĩruta, jeta güinoi vaerã. Ērei mbaeti güinoi vae güi mbovi ete güinoi vae uyeequita —jei—. ¹³ Jáeramo amingueta reta amijaanga reve, agüiye vaerã uicuaa cavi, yepe tēi uecha, jare agüiye vaerã uicuaa, yepe tēi uyandu —jei—. ¹⁴ Jare uyeyapo chupe reta Tumpa ĩnee aracae umimbeu vae Isaiás jei vae. Echa'ã jae jei cuarāi: 'Piyandu tēita, ěrei ndarau picuaa.

Peecha tēita, ěrei ndarau picuaa cavi.

¹⁵ Echa'ã cua reta ipiatanta,

jare iyapisa pe uyandu tēi,

jare usapimiño,

agüiye vaerã uecha jesa pe,

jare agüiye vaerã uyandu iyapisa pe,

jare agüiye vaerã uicuaa ipia pe,

jare agüiye vaerã uyerova checoti.

Echa'ã uyerova checoti yave, ambaita tēi imbaeyoa reta' —jei Tumpa.

Jucuarāi jei Isaiás —jei—.

¹⁶ Ērei Tumpa pemivendise ma. Echa'ã pe reta peecha peresa pe, jare piyapisaca peapisa pe —jei—. ¹⁷ Añete che jae peve, jeta Tumpa ĩnee aracae umimbeu vae reta jare jupi vae reta uipota tēi uecha pe reta peecha ma vae, ěrei uecha'ã. Jae ramiño vi jae reta uipota tēi uyandu pe reta piyandu ma vae, ěrei uyandu'ã —jei—.

Umaeti vae uyemijaanga jese vae

(Mr 4.13-20; Lc 8.11-15)

¹⁸ Amimbeu ma peve amijaanga reve cuimbae umaeti vae. Jáeramo piyapisaca ye jese —jei—. ¹⁹ Ime yave quía uyapisaca Tumpa iporoyocua re vae, uicuaa cavi'ã yave uyandu vae, ou voi jocua icavi mbae vae jare umiacañi Tumpa ĩnee güi. Amijaanga cua nunga re temiti tape rupi oa vae —jei—. ²⁰ Jae ramiño vi jocua temiti uñeñoti mboviño ivi itape

járambo oí vae pe vae uyemijaanga íru vae reta Tumpa ínee uyandu vae re. Jupivoiño uyerovia reta, jare uipota cua ñee —jei—. ²¹ Ērei cua reta jocua temiti japo quipe'ã oí vae rami co. Jáeramo imambae icueri reta. Mbaesusere uyeyapo chupe reta ani íru vae reta uyapo icavi mbae vae chupe reta Tumpa ínee uicuaa ramo. Jare Jupivoiño uipota'ã ma yapisaca reta Tumpa ínee re —jei—. ²² Jae ramiño vi jocua temiti uñeñoti ñanapite pe vae uyemijaanga íru vae reta Tumpa ínee uyandu vae re. Ērei jae reta umbipi uyemipia'ã ivi pe mbaembae uyeyapo vae re, jare uyembitavi, uipota icocatu ramo. Jare opaete cua umiacañi reta Tumpa ínee güi. Jáeramo jae reta jocua temiti ia'ã vae rami co —jei—. ²³ Ērei jocua temiti uñeñoti ivicavi pe vae uyemijaanga íru vae reta Tumpa ínee uyandu vae re. Cua reta uicuaa cavi Tumpa ínee. Amocue vae jocua temiti jeta ete jāi vae rami co. Íru vae reta jocua temiti jeta catu jāi vae rami co. Jare íru vae reta jocua temiti mboviño jāi vae rami co —jei.

Trigo jare trigo-raanga

²⁴ Jesús imiari ye yati vae reta pe umijaanga reve. Jei chupe reta:

—Mboroyocua ara pegua penti cuimbae temiti icavi vae ico pe oñoti vae rami co.

²⁵ Ērei opaete vae oque rambueve, cuimbae jovaicho ou oñoti trigo-raanga trigo ipite rupi, jare oo ye —jei—. ²⁶ Trigo ucuacuaa jare ía. Ērei ucuacuaa vi trigo-raanga trigo ipite rupi —jei—. ²⁷ Jáeramo co iya jembiocui reta yugüeru ipatrón pe jei chupe: 'Patrón, ¿niñoti'ã pa trigo icavi vae ndeco pe? ¿Maera pa ucuacuaa trigo-raanga?' —jei reta, jei—. ²⁸ Jayave ipatrón jei chupe reta: 'Penti cherovaicho oñoti.' Jayave jembiocui reta jei chupe: '¿Ndipota pa ndoo vaerã nduequi trigo-raanga?' ²⁹ Ērei ipatrón jei: 'Agüiye peequí. Echa'ã peequí yave trigo-raanga, aramoí peequita vi trigo trigo-raanga ndive' —jei, jei—. ³⁰ 'Tucuacuaa päve mocui reve trigo yaipoo regua. Jare yaipoo yave, jaeta uipoo vae reta pe: Pembati rani trigo-raanga piyocua peapi vaerã. Ērei pembati trigo jiru pe' —jei, jei.

Mostaza jāicue

(Mr 4.30-32; Lc 13.18-19)

³¹ Jesús imiari ye yati vae reta pe umijaanga reve. Jei chupe reta:

—Mboroyocua ara pegua penti mostaza jāicue cuimbae güiraa oñoti ico pe vae rami co. ³² Cua jāicue michi-rai ete opaete íru temiti reta jāicue güi. Ērei ucuacuaa ma yave, tuicha ete opaete íru temiti penti año peguaño ucuacuaa vae reta güi. Uyeyapo penti ivira. Jáeramo güira reta ipuere uyapo jaitirã jāca reta re —jei.

Levadura

(Lc 13.20-21)

³³ Jesús imiari ye yati vae reta pe umijaanga reve. Jei chupe reta:

—Mboroyocua ara pegua levadura rami co. Cuña umbiyea levadura jeta catu harina ndive, levadura uñemiai vaerã opaete masa rupi —jei.

Maera Jesús oporombocue umijaanga reve

(Mr 4.33-34)

³⁴ Opaete cua jei Jesús yati vae reta pe umijaanga reve. Jare jecuaeño imiari chupe reta umijaanga reve, ³⁵ uyeyapo vaerã Tumpa ínee aracae umimbeu vae jei vae. Echa'ã jei cuarãi:

“Chemiarita amijaanga reve.

Amimbeuta ivi uyeyapo güive uyecuaa mbae vae.”

Jucuarãi jei.

Mbae trigo jare trigo-raanga uyemijaanga jese vae

³⁶ Jayave Jesús omondo ye yati vae reta, jare uique o pe. Jare Jesús jemimboe reta yugüeru jei chupe:

—Nemimbeu ma oreve nemijaanga reve jocua co trigo-raanga ucuacuaa pipe vae. Emimbeu oreve mbae uipota jei vae.

³⁷ Jayave Jesús jei chupe reta:

—Temiti icavi vae oñoti vae uyemijaanga che cuimbaerã ayeyapo vae re. ³⁸ Jocua co uyemijaanga opaete ivi re. Trigo icavi vae uyemijaanga Tumpa iporoyocuaa pegua reta re. Ērei trigo-raanga uyemijaanga icavi mbae vae uyapo vae reta re —jei—. ³⁹ Jocua co iya

jovaicho trigo-raanga oñoti vae uyemijaanga aña guasu re. Mbaepoo uyemijaanga cua ara reta iyapi re. Umbaepoo vae reta uyemijaanga ángel reta re —jei—. ⁴⁰Jocua trigo-raanga uyembatica jare ocái tata pe. Jae ramiño vi jucuaráita uyeyapo cua ara reta iyapi pe —jei—. ⁴¹Che cuimbaré ayeyapo vae ámbouta ángel cheve uyeyocui vae reta, jare jae reta umbatita opaete iyoa vae reta jare icavi mbae vae uyapo vae reta, omombo reta vaerá cheporoyocua güi —jei—. ⁴²Jare omombota reta tata guasu pe. Joco pe uyaota reta jare jái umbiquiririuta —jei—. ⁴³Jayave jupi vae reta uyecuata Tu iporoyocua pe guarasi jembipe rami. Uipota uyandu vae tuyapisaca cua re —jei—.

Corepoti uñeñoti vae

⁴⁴Mboroyocua ara pegua corepoti uñeñoti vae rami co. Echa'á penti cuimbaré uváe yave jocua corepoti uñeñoti vae, oñomi ye, jare uyerovia reve oo umee corepoti re opaete imbaembaré ogua vaerá jocua co —jei—.

Ita ipõra vae

⁴⁵Mboroyocua ara pegua penti umaemee vae ita ipõra vae reta ueca vae rami co —jei—. ⁴⁶Uvãe yave penti ita ipõra vae jepi ete vae, oo umee corepoti re opaete imbaembaré ogua vaerá jocua ita ipõra vae —jei—.

Pisa jare jevae i rupigua reta

⁴⁷Mboroyocua ara pegua penti pisa rami co. Echa'á cuimbaré reta omombo pisa i guasu pe omboa vaerá ipotave jevae i rupigua reta —jei—. ⁴⁸Jare pisa tinee ma yave, cuimbaré reta güeru i guasu jembei pe. Jayave uguapi joco pe jare umbati umbiru jevae i rupigua icavi vae reta jiru pe, érei omombo jevae i rupigua icavi mbae vae reta —jei—. ⁴⁹Jae ramiño vi jucuaráita uyeyapo cua ara reta iyapi pe. Ángel reta yugüeruta jare umbatita icavi mbae vae uyapo vae reta omombo vaerá jupi vae reta ipite güi —jei—. ⁵⁰Jare omombota reta tata guasu pe. Joco pe uyaota reta jare jái umbiquiririuta —jei—.

Mbaembaré ipiau vae jare indechi vae

⁵¹Jayave Jesús upirandu chupe reta:

—¿Picuaa cavi ma pa opaete cua?

—Nduicuaa cavi ma, oreYa —jei reta chupe.

⁵²Jayave Jesús jei chupe reta:

—Penti mboroyocui re oporombóe vae mboroyocua ara pegua re uyembóe vae, penti tenta iya rami co. Echa'á tenta iya umee jenta pegua reta pe mbaembaré ipiau vae jare mbaembaré indechi vae jo pe unuvatu vae güi —jei—.

Jesús Nazaret pe

(Mr 6.1-6; Lc 4.16-30)

⁵³Jare Jesús opa ma yave cua jei umijaanga reve, oo ye joco güi. ⁵⁴Jare oo uvãe yave iivi pe, oporombóe judío reta itupao pe, jare uyapisaca jese vae reta ipiacañi jare jei.

—¿Quíape ra uyembóe cua cuimbaré iyaracuaa catu vaerá? ¿Quía ra umee chupe mbaepuere cua miacañi reta uyapo vaerá? ⁵⁵Jae co carpintero tai. Jae co María imembi. Jae co Jacobo, José, Simón jare Judas tiquei —jei reta—. ⁵⁶Jare opaete jindi reta yugüireco yandepite pe. Jáeramo ¿quirái ra ipuere uyapo opaete cua? —jei reta.

⁵⁷Jáeramo jae reta pochi Jesús pe. Jayave Jesús jei chupe reta:

—Opaete vae uipiu penti Tumpa iñee umimbeu vae. Jaeño jentaigua reta jare jenta pegua reta uipiu'á reta —jei—.

⁵⁸Jare joco pe ipuere'á uyapo jeta miacañi reta jae reta güirovia'á jese ramo.

14

Juan imano

(Mr 6.14-29; Lc 9.7-9)

¹Jare jocua ara reta pe mburuvicha guasu Herodes uyandu Jesús regua. ²Jare jei jembiocui reta pe:

—Jae co Juan upurumbibautizase vae. Icove ye ma ou umanocue vae reta ipite güi. Jáeramo uyapo cua miacañi reta —jei—.

³Echa'á ndei Juan umano mbove, Herodes uipisca Juan, jare oñonoca peresoriru pe, Herodías jei ramo. Herodías co jae Herodes tivi Felipe jee vae jembireco. ⁴Echa'á tenonde

yave Juan jei Herodes pe: “Icavi’ã nemenda vaerã nderivi jembireco ndive.” ⁵ Jáeramo Herodes uipota tēi uyucaca Juan. Ērei uquiye tenta guasu pegua reta güi. Echa’ã jae reta güiherovia Juan co jae penti Tumpa iñee umimbeu vae.

⁶ Ērei Herodes uyebiara yave oa vae regua, Herodías imembi cuña ou upirae ipite pe jare umbiyerovia Herodes. ⁷ Jayave Herodes jei Tumpa jee re umeeta co cuñatai pe ipotave mbae ueca chupe vae. ⁸ Jayave cuñatai jei Herodes pe:

—Emee cheve cua pe Juan upurumbibautizase vae iñaca penti plato pe.

Echa’ã cuñatai ichi umimbeu ma chupe jucuarãi jei vaerã.

⁹ Jayave mburuvicha guasu ipiatiti. Ērei Tumpa jee re jei chupe ramo, jare ĩru vae reta uyandu ramo, omondo sundaro Juan iñaca güeru vaerã umee chupe. ¹⁰ Jayave oo sundaro peresoriru pe uñacasia Juan. ¹¹ Jayave güeru iñacacue penti plato pe, jare umee cuñatai pe. Jayave cuñatai güiraa umee ichi pe. ¹² Jare Juan jemimboe reta yugüeru güiraa jetecue jare oñoti. Jayave yugüiraa umimbeu Jesús pe.

Jesús umingaru cinco mil cuimbae reta

(Mr 6.30-44; Lc 9.10-17; Jn 6.1-14)

¹³ Jare Jesús cua uyandu yave, oo penti chalana pe quĩ ngatu vae pe. Ērei jeta vae uicuaa yave, yugüiraa ivi rupiño tenta guasu reta güi Jesús oo vae pe. ¹⁴ Jesús ugüeyi yave chalana güi, uecha jeta vae, jare uiparareco reta. Jayave umbigüera imbaerasi vae joco pe ñugüinoi vae reta.

¹⁵ Caaru ma yave, Jesús jemimboe reta yugüeru jei chupe:

—Mbaeti quiave ico cua rupi, jare caaru ma oĩ. Emondo cua jeta vae, oqua vaerã jemiurã tenta tenta rupi —jei reta.

¹⁶ Ērei Jesús jei chupe reta:

—Agüiye tuyugüiraa. Pe reta pemee tucaru —jei.

¹⁷ —Jaeño ime cua pe nonoi pandepo mbiyape jare mocui pira —jei reta chupe.

¹⁸ —Peru cheve cua pe —jei.

¹⁹ Jayave Jesús oyocui jocua jeta vae reta uguapi vaerã capiichape re. Jayave uipisi jocua pandepo mbiyape jare mocui pira, jare umae ara coti, jare umee yasurupai Tumpa pe. Jayave upisã mbiyape, jare umee jemimboe reta pe, jae reta umee vaerã yati vae reta pe. ²⁰ Opareve ucaru, jare iyangapii reta. Jayave Jesús jemimboe reta umbati tembü uñepisãacue jembire vae, jare umitinee doce canasta. ²¹ Jare ucaru vae reta güi cuimbae retaño uyepapa cinco mil rupi. Uyepapa’ã cuña reta jare sambiaí reta.

Jesús uguata i iárambo

(Mr 6.45-52; Jn 6.16-21)

²² Jare jupivoiño Jesús oyocui jemimboe reta uyupi vaerã chalana pe, jare yugüiraa vaerã jenonde i guasu jovaicho pe, jae omondo rambueve uyembati vae reta. ²³ Jare opa omondo yave, Jesús uyupi ivitu guasu re uyerure vaerã Tumpa pe. Jare pĩtu ma yave, jaeño Jesús joco pe oĩ. ²⁴ Ērei chalana oo ma uvãe i guasu mbite pe. Yavai Jesús jemimboe reta uruguata vaerã. Echa’ã tuicha i uyembiaparoaroa jare ivitu tanta oovãiti. ²⁵ Jare cõeta ma yave, Jesús uguata oo i iárambo güiraa uepiti. ²⁶ Jare Jesús jemimboe reta uecha yave uguata ou i iárambo rupi, uquiye. Jei reta:

—Penti mbae iãcue co.

Usapicai reta uquiye güi.

²⁷ Ērei jupivoiño Jesús ombou iñee chupe reta.

—Piñemiatangātu. Che co. Agüiye pequiye —jei.

²⁸ Jayave Pedro jei chupe:

—CheYa, jae co nde yave, cheocui aguata vaerã aa i iárambo rupi ndecoti.

²⁹ —Eyu —jei Jesús chupe.

Jayave Pedro ugüeyi chalana güi, jare umbipi uguata i iárambo oo vaerã Jesús coti. ³⁰ Ērei uecha yave quirãi ivitu tanta chupe, Pedro uquiye. Jayave umbipi uique i pe, jare iñeãta reve jei:

—CheYa, cherepi.

³¹ Jupivoiño Jesús uupi ipo jare uipisi Pedro. Jayave jei chupe:

—Michi ete ndepurugüirovia. ¿Maera pa nderovia’ã cheré? —jei.

³² Jare uyupi reta yave chalana pe, upita ivitu. ³³ Jare chalana pe ñugüinoi vae reta umbiadora Jesús. Jei reta:

—Añete co, nde co jae Tumpa Tai.

Jesús umbigüera Genesaret pegua imbaerasi vae reta

(Mr 6.53-56)

³⁴ Jare i guasu uasa reta yave, yugüiraa uvãe ivi Genesaret pe. ³⁵ Jare joco pegua reta uicuaa jae co Jesús. Jáeramo jae reta yugüiraa opaete jocua ivi rupi, jare güeru Jesús oï vae pe imbaerasi vae reta. ³⁶ Jare güeru vae reta uyerure Jesús pe umaño imbaerasi vae reta uyaviqui vaerã jemimonde jembei yepe. Jare opaete jemimonde uyaviqui vae reta ucuera.

15

Yandepia umingüia vae

(Mr 7.1-23)

¹ Jayave fariseo reta jare mboroyocui re oporomboe vae reta yugüeru Jerusalén güi Jesús oï vae pe jare jei chupe:

² —¿Maera pa nderemimboe reta uyapo'ã yandetenondegua reta iporomboe? ¿Maera pa ucaru reta uyepoe mbae reve? —jêi reta.

³ Jayave Jesús jei chupe reta:

—¿Maera pa pe reta piyavi Tumpa iporoyocui piyapo vaerã yandetenondegua reta iporoyocui? ⁴ Tumpa oporoyocui cuarãi: 'Ipiu nderu jare ndesi.' Jare oporoyocui vi cuarãi: 'Jei icavi mbae vae tu ani ichi coti vae uyeyucacata co.' Jucuarãi oporoyocui Tumpa —jêi—. ⁵ Èrei pe reta pere cuarãi: 'Penti vae ipuere jei tu jare ichi pe umeeta tõi chupe reta ombori vaerã vae umee ma Tumpa pe.' Jucuarãi pere —jêi—. ⁶ Jare jucuarãi ombori'ã tu jare ichi. Jucuarãi pe reta pemombo Tumpa iporoyocui piyugüi piyapo vaerã yandetenondegua reta iporoyocui —jêi—. ⁷ Pe reta co jae upurumbitavi vae reta. Añete yepe Isaías imiari peré. Echa'ã jae jei cuarãi:

⁸ 'Cua reta chepiu iyuru peño' —jêi Tumpa—.

'Èrei ipia pe chepiu'ã etei.

⁹ Chembiadora-raangaiño.

Oporomboe cuimbae iporoyocui re.

Che jucuarãi'ã aporoyocui' —jêi Tumpa.

Jucuarãi jei Isaías —jêi.

¹⁰ Jare Jesús ueni opaete joco pe ñugüinoi vae reta.

—Piyapisaca cua re, picuaa cavi vaerã —jêi—. ¹¹ Ipotave mbae peu vae ipuere'ã umingüia pepia. Jupi mbae vae pere vae, jocua umingüia pepia —jêi.

¹² Jayave Jesús jemimboe reta yugüeru jei chupe:

—¿Ndicuaa pa fariseo reta pochi co ndeve jocua ndere chupe reta vae re?

¹³ Jayave Jesús jei chupe reta:

—Opaete temiti reta cheRu ara pe oï vae oñoti'ã vae uyeequita co. ¹⁴ Pemaño jese reta. Echa'ã jae reta jesa mbae vae reta uechaca ñugüinoi tape ñru jesa mbae vae reta pe vae rami co. Jare jesa mbae vae uechaca yave tape ñru jesa mbae vae pe, mocui reve uasavita ivicua pe —jêi.

¹⁵ Jayave Pedro jei Jesús pe:

—Emimbeu oreve mbae uipota jei cua nemijaanga reve ndere vae.

¹⁶ Jayave Jesús jei chupe reta:

—¿Pe retave pa picuaa cavi'ã? ¹⁷ Picuaa cavi cua: Ipotave mbae peu vae oo perie pe, jare pemombo —jêi—. ¹⁸ Èrei jupi mbae vae pere vae, jocua umingüia pepia. Echa'ã pere vae ou pepia güi —jêi—. ¹⁹ Echa'ã pepia güi oë opaete icavi mbae vae: pepia pe piyemingueta icavi mbae vae, pepuruyuca, piyuvanga menda re, piyapo aguaa, pemonda, peapu ñru vae reta re, icavi mbae vae pere ñru vae reta coti —jêi—. ²⁰ Cua reta umingüia pepia. Èrei pecaru yave piyepoe mbae reve, jocua umingüia'ã pepia —jêi.

Cuña Canaán pegua ipuruüirovia

(Mr 7.24-30)

²¹ Jayave Jesús oo ye joco güi Tiro jare Sidón iyipi rupi. ²² Jare penti cuña ivi Canaán pegua joco pe ico. Jae ou Jesús oĩ vae pe jare iñeeäta reve jei chupe:

—CheYa, cheparareco. Nde co jae David iñemoñaäta reta pegua. Chemembi cuña uiporara oĩ. Echa'ã penti aña oya ma jese —jei.

²³ Ērei Jesús jei'ã mbae chupe. Jayave Jesús jemimboe reta yugüeru jei chupe:

—Emondo ye jocua cuña. Echa'ã iñeeäta ou yanderaicue.

²⁴ Jayave Jesús jei:

—Tumpa chembou Israel pegua reta peño. Jae reta ovecha ucañi vae reta rami co —jei.

²⁵ Jayave cuña ou uyeatica Jesús jovai, jare jei chupe:

—Carai, chembori.

²⁶ Ērei Jesús jei chupe:

—Icavi'ã yaequi vaerã tembü sambiai reta güi, ñamee vaerã yimba-rai reta pe —jei.

²⁷ —Añete tēi co, carai —jei cuña Jesús pe—. Ērei yimba-rai reta jou tembü usururucue iya imesa güi oa vae —jei.

²⁸ Jayave Jesús jei chupe:

—Cuña, tuicha co ndepurugüirovia. Tuyeyapo ndeve nde ndipota rupi —jei.

Jare jupivoiño cuña imembi ucuera.

Jesús umbigüera jeta vae

²⁹ Jayave Jesús oo joco güi uvãe i guasu Galilea pe oĩ vae pe. Jayave uyupi penti ivitu guasu re, jare uguapi joco pe. ³⁰ Jare jeta vae yugüeru jae oĩ vae pe. Jae reta güeru icõcho vae reta, jare ipo jovaicho mbae vae reta, jare jesa mbae vae reta, jare iupa vae reta, jare jeta iru imbaerasi vae reta oñono Jesús jovai. Jayave Jesús umbigüera reta. ³¹ Jáeramo joco pe yati vae reta ipiacañi. Echa'ã uyandu iupa vae reta uyemingüeta, jare uecha ipo jovaicho mbae vae reta ucuera, jare icõcho vae reta uguata cavi, jare jesa mbae vae reta umae. Jare opaete vae umbiadora Israel pegua reta iTumpa.

Jesús umingarü cuatro mil cuimbae reta

(Mr 8.1-10)

³² Jayave Jesús ueni jemimboe reta jare jei chupe reta:

—Aiparareco cua yati vae reta. Echa'ã mbapi ara ma ñugüinoi che ndive, jare mbaeti mbae güinoi jou vaerã. Ndarau amondo ye reta ucaru mbae reve, agüiye vaerã ipitu tape rupi —jei.

³³ Jayave Jesús jemimboe reta upirandu chupe:

—¿Quirãita pa yandepuere ñamee mbiyape cua jeta vae reta pe cua mbaeti quiave ico vae pe, jae reta ucaru cavi vaerã?

³⁴ Jayave Jesús upirandu chupe reta:

—¿Mbovi pa mbiyape penoi?

—Ime nonoi siete, jare mbovi pira —jei reta.

³⁵ Jayave Jesús oyocui yati vae reta uguapi vaerã ivi pe. ³⁶ Jayave uipisi jocua siete mbiyape jare mbovi pira, jare umee yasurupai Tumpa pe. Jayave upisãa mbiyape jare pira, jare umee jemimboe reta pe, jae reta umee vaerã yati vae reta pe. ³⁷ Opaveve ucaru, jare iyangapii reta. Jayave Jesús jemimboe reta umbati tembü uñepisãacue jembire vae, jare umitínee siete canasta. ³⁸ Jare ucaru vae reta güi cuimbae retaño uyepapa cuatro mil rupi. Uyepapa'ã cuña reta jare sambiai reta.

³⁹ Jayave Jesús omondo ye yati vae reta. Jayave uyupi chalana pe, jare oo uvãe ivi Magdala pe.

16

Uipota reta uecha miacañi

(Mr 8.11-13; Lc 12.54-56)

¹ Jare fariseo reta jare saduceo reta yugüeru Jesús oĩ vae pe, jare jei chupe uechaca vaerã chupe reta miacañi ara güi. Echa'ã jae reta uipota uicuaa uyapota ra miacañi chupe reta. ² Ērei Jesús jei chupe reta:

—Amo pe pĩtuta ma yave pe reta pere: 'Ara cavita co curiye. Echa'ã pĩta co amapĩtu reta.' ³ Jae ramiño vi amo pe neimbove yave pere: 'Ara pochita co cua ara. Echa'ã pĩta co amapĩtu reta jare ara uyasoĩ oĩ' —pere, jei—. Pe reta co jae upurumbitavi vae reta.

Echa'a ara re pemae yave, picuaa mbae uyeyapota vae. Ērei picuaa'a etei mbae añave uyeyapo oī vae —jei—. ⁴ Añave yugüireco vae reta icavi mbae vae uyapo vae reta co. Upurugüirovia'a. Jáeramo uipota ayapo vaerã miacañi chupe reta. Ērei jaeño uyeyapota mbae Tumpa iñee aracae umimbeu vae Jonás pe uyeyapo vae rami, jae reta uicuaa vaerã quía co che —jei.

Jayave Jesús oo ye chugüi reta.

Fariseo reta ilevadura

(Mr 8.14-21)

⁵ Jesús jare jemimboe reta uyupi chalana pe yugüiraa i guasu jovaicho coti. Jare i guasu jovaicho pe yugüiraa ma uvãe yave ramo, Jesús jemimboe reta uicuaa ñacañi co güeru vaerã mbiyape. ⁶ Jare Jesús jei chupe reta:

—Piñemoa ngatu fariseo reta jare saduceo reta ilevadura güi.

⁷ Jayave jemimboe reta jei uyupe:

—Cua jei, yaru'a mbiyape ramo.

⁸ Jesús uicuaa chugüi mbae jei reta vae, jare jei chupe reta:

—Michi ete co pepurugüirovia. ¿Maera pa piyemingueta mbiyape peru mbae vae re? —jei—. ⁹ ¿Ndeño pa picuaa cavi? ¿Pemandua'a pa? Cue yave apisãa pandepo mbiyape ucaru vaerã cinco mil vae reta. Tembú jembirecue pembati yave, ¿mboví canasta pa pemitínee? —jei—. ¹⁰ Jare siete mbiyape apisãa vi, ucaru vaerã cuatro mil vae reta? Tembú jembirecue pembati yave, ¿mboví canasta pa pemitínee? —jei—. ¹¹ ¿Maera pa picuaa'a che jae peve vae? Che jae peve piñemoa ngatu vaerã fariseo reta jare saduceo reta ilevadura güi. Jae'a peve mbiyape re —jei.

¹² Jayave ramo jemimboe reta uicuaa Jesús jei'a co chupe reta uñemoa ngatu vaerã mbiyape ilevadura güi. Jaeño uipota jei chupe reta uñemoa ngatu vaerã fariseo reta jare saduceo reta iporomoe güi.

Pedro jei Jesús co jae Cristo, Tumpa ombou vae

(Mr 8.27-30; Lc 9.18-21)

¹³ Jare Jesús coño ma oo uvãe tenta guasu Cesarea Filipino güi. Jayave upirandu jemimboe reta pe:

—¿Quía pa co che cuimbaerã ayeyapo vae ñru vae reta pe?

¹⁴ Jayave jae reta jei chupe:

—Amocue vae jei nde co jae Juan upurumbibautizase vae, jare ñru vae reta jei nde co jae Elías, jare ñru vae reta jei nde co jae Jeremías ani ñru Tumpa iñee aracae umimbeu vae —jei reta.

¹⁵ Jayave Jesús upirandu chupe reta:

—Ērei ¿quía pa co che peve?

¹⁶ Jayave Simón Pedro jei chupe:

—Nde co jae Cristo, Tumpa ombou vae. Nde co jae Tumpa jecuaeño ico vae Tai —jei.

¹⁷ Jayave Jesús jei Pedro pe:

—Simón, nde co jae Jonás tai. Tumpa nemivendise ma. Echa'a cheRu ara pe oī vae uicuaaca ndeve cua. Mbaeti quía ye uicuaaca ndeve —jei—. ¹⁸ Jare che jae ndeve, nde co jae Pedro. (Pedro uipota jei: “ita”.) Jare che etei amimirãta aiparavo vae reta, ipirãta vaerã penti tenta ita tuicha vae iárambo oī vae ipirãta rami. Jáeramo cañitei ndarau ipuere jese reta —jei—. ¹⁹ Jare ameeta ndeve mboroyocua ara pegua illave reta. Jare ime yave mbae ivi pe niñapítita vae, Tumpa vi uñapítita ara pe. Jae ramiño vi ime yave mbae ivi pe ndiyorata vae, Tumpa vi oyorata ara pe —jei.

²⁰ Jayave Jesús oyocui jemimboe reta agüiye vaerã umimbeu quía pe jae co Cristo, Tumpa ombou vae.

Jesús umimbeu umanota co

(Mr 8.31-9.1; Lc 9.22-27)

²¹ Jare jocua ara reta güive Jesús umimbeu jemimboe reta pe quirã jae oota co Jerusalén pe, jare quirã tenta guasu pegua reta itenondegua reta jare sacerdote reta itenondegua reta jare mboroyocui re oporomoe vae reta uiporaracata co chupe, jare quirã jae uyeyucacata, jare quirã mbapi ara rupi icove yeta ou umanocue vae reta ipite güi.

²² Jayave Pedro güiraa Jesús írú reta ipite güi, jare umbipi umbieta chupe. Jei:

—Tumpa tanembori, cheYa. Agüiye ete tuyeyapo ndeve cua —jehi.

²³ Èiri Jesús uyerova jare jei Pedro pe:

—Esiri chegüi, Satanás. Ndipota chembiavai. Echa'ã nde ndiyemingueta neĩ ivi pegua reta uyemingueta rami, ndiyemingueta'ã Tumpa uyemingueta rami —jehi.

²⁴ Jayave Jesús jei jemimboe reta pe:

—Ime yave quía uipota oo cherupíe vae, tiñacañi iyugüi, tovoi icurusu, jare too cherupíe —jehi—. ²⁵ Uipota uñuvatu jecove vae ndarau ipuere. Èiri umeeta jecove chereco pegua vae uñuvatuta co —jehi—. ²⁶ ¿Mbae ra uminganata quía, umingana yave opaete ivi pegua, èrei ipuere'ã yave uñuvatu jecove? ¿Mbovi ra umbiepita quía ogua ye vaerã jecove? —jehi—. ²⁷ Echa'ã che cuimbaerã ayeyapo vae ayu yeta cheRu imbaepuere reve ángel cheve uyeyocui vae reta ndive. Jare jayave ameeta opaete vae pe penti penti uyapo vae rupi —jehi—. ²⁸ Añete che jae peve, ndei amocue cua pe ñugüinoi vae reta umano mbove, cherechata che cuimbaerã ayeyapo vae cheporoyocua pe —jehi.

17

Jesús uyembiambie

(Mr 9.2-13; Lc 9.28-36)

¹ Seis ara ma uasa yave, Jesús güiraa Pedro, Jacobo jare Juan - jae co Jacobo tivi - írú reta ipite güi penti ivitu guasu ivate vae re. ² Jare joco pe uyembiambie jae reta jovai. Jova jembipe guarasi jembipe rami, jare jemimonde tĩ asi jare uvera. ³ Jare uyecuaa chupe reta Moisés jare Elías uyemingueta ñugüinoi Jesús ndive. ⁴ Jayave Pedro jei Jesús pe:

—OreYa, icavi co ñai vaerã cua pe. Nde ndipota yave, turuyapo cua pe mbapi guarasiã ñanaroqui pegua, penti nembraerã, penti Moisés peguarã jare penti Elías peguarã —jehi.

⁵ Pedro uyemingueta oĩ rambueve, amapĩtu jembipe vae umiguarasiã reta, jare amapĩtu güi uyendu ñee.

—Cua co jae cheRai aau ete vae. Chembiyerovia ete. Piyapisaca jese —jehi.

⁶ Jare Jesús jemimboe reta cua uyandu yave, oa ivi re. Echa'ã uquiye ete reta. ⁷ Jayave Jesús ou oñono ipo jese reta jare jei:

—Pepüa. Agüiye pequiye.

⁸ Jare umae reta ye yave, uecha'ã ma quía jae reta ndive, jaeño Jesús.

⁹ Jare ivitu guasu güi ugüeyi yugüeru rambueve, Jesús oyocui reta:

—Agüiye pemimbeu quía pe cua pecha vae, ndei che cuimbaerã ayeyapo vae aicove ye ayu umanocue vae reta ipite güi mbove.

¹⁰ Jayave jemimboe reta upirandu chupe:

—¿Maera pa jei mboroyocui re oporombocue vae reta Elías rani co outa?

¹¹ —Añete Elías rani co outa —jehi Jesús—, jare opaete uyapicatuta. ¹² Èrei che jae peve, Elías ou ma co, jare Israel pegua reta uicuaa'ã. Jáeramo uyapo reta chupe jae reta uipota vae. Jae ramiño vi jae reta uiporaracata cheve —jehi.

¹³ Jayave Jesús jemimboe reta uicuaa jae imiari oĩ chupe reta Juan upurumbibautizase vae re.

Jesús umbigüera cunumi aña oya jese vae

(Mr 9.14-29; Lc 9.37-43)

¹⁴ Jare yugüeru uvãe yave jeta ñugüinoi vae pe, penti cuimbae ou oovãiti Jesús. Uyeatica jae jovai, jare jei chupe:

¹⁵ —CheYa, iparareco cherai. Echa'ã imbaerasi iñaca pe jare uiporara oĩ. Jeta vese ma oa tata pe. Oa vi i pe —jehi—. ¹⁶ Aru nderemimboe reta pe umbigüera vaerã tẽi, èrei jae reta ipuere'ã —jehi.

¹⁷ Jayave Jesús jei joco pe ñugüinoi vae reta pe:

—Yavai pe reta cua ivi pe pico vae pepurugüirovia vaerã. ¿Quirã regua ra apitata pe reta ndive? ¿Quirã regua ra arupiata peve? Peru cheve cua pe jocua cunumi —jehi.

¹⁸ Jayave Jesús uñeengata aña pe, jare aña usiri cunumi güi. Jare jupivoiño cunumi ucuera.

¹⁹ Jayave Jesús jemimboe reta yugüeru Jesús oĩ vae pe upirandu chupe, jae retaño jae ndive ñugüinoi yave:

—¿Maera pa ore orepuere'ā numbisiri añā?

²⁰ —Pepurugüirovia'ā ramo —jei Jesús chupe reta—. Añete che jae peve, aramo pepurugüirovia michi ete penti mostaza jáicue michi-rai vae rami. Ērei jocua nunga mburugüirovia penoi yave, pepuereta pere cua ivitu guasu pe: 'Ecuā cua güi epita joco pe', jare oota co. Ndarau mbae yavai peve —jei—. ²¹ Ērei ndarau pepuere pembisiri cua nunga añā, jaeño piyerure yave Tumpa pe piyecuacu reve tembú güi —jei.

Jesús umimbeu ye umanota co

(Mr 9.30-32; Lc 9.44-45)

²² Jare Galilea pe ñugüinoi rambueve, Jesús jei jemimboe reta pe:

—Che cuimbaerā ayeyapo vae penti vae chemeeta ĩru vae reta pe. ²³ Jae reta cheyucata. Ērei amano ma yave, mbapi ara rupi aicove yeta ayu umanocue vae reta ipite güi —jei. Jayave jemimboe reta ipiatiti tuicha.

Mburuvicha ocovara vae

²⁴ Jare Capernaum pe yugüiraa uvāe yave, mburuvicha peguarā ocovara vae reta yugüeru upirandu Pedro pe:

—¿Umbiepi pa pemboe vae mburuvicha ocovara vae?

²⁵ —Umbiepi —jei Pedro chupe reta.

Jare uique yave tenta pe, Jesús jei Simón Pedro pe:

—Simón, mburuvicha ivi pegua reta ocovara ĩru vae reta pe. ¿Ocovara reta vi pa tai reta pe ani ĩru vae reta peño? ¿Mbae pa ndepia pe ndiyemingueta cua re? —jei.

²⁶ —Īru vae reta peño —jei Pedro.

Jayave Jesús jei chupe:

—Jáeramo tai reta umbiepi'ā chupe reta. ²⁷ Ērei agüiye vaerā yayapo icavi mbae vae echa chupe reta, ecua epindapo i guasu pe. Ipea jocua pira tenonde ndipisi vae iyuru. Joco pe nevāeta penti corepoti. Eraa emee mburuvicha peguarā ocovara vae reta pe cheve peguarā jare ndeve peguarā —jei.

18

Tenondegua vae

(Mr 9.33-37; Lc 9.46-48)

¹ Jayave jemimboe reta yugüeru jei Jesús pe —¿Quía pa co jae tenondegua vae mboroyocua ara pegua pe?

² Jayave Jesús ueni penti sambiai, jare oñono jae reta ipite pe.

³ —Añete che jae peve, piyero'ā yave Tumpa coti jare piyeyapo'ā yave sambiai reta rami, ndarau pique mboroyocua ara pegua pe —jei—. ⁴ Ime yave quía uñemimichi cua sambiai rami vae, jae icota tenondeguarā mboroyocua ara pegua pe —jei—. ⁵ Jare ime yave quía uyapo icavi vae cua nunga sambiai pe cheree pe vae, cheve co uyapo icavi vae —jei—.

Mbaeyoa uyapoca vae

(Mr 9.42-48; Lc 17.1-2)

⁶ Ime cheré güirovia vae reta. Ime yave quía penti cua nunga pe mbaeyoa uyapoca vae, icavita tēi co ĩru vae reta uñapiti vaerā iyayu re penti ita tuicha vae umbaesio pipe vae, omombo vaerā i tipi pe i guasu pe jae ipitupa vaerā —jei—. ⁷ Amocue ivi pegua reta uiporara ĩru vae reta uyapoca chupe reta mbaeyoa ramo. Jecuāeño amocue vae reta uyapoca mbaeyoa ĩru vae reta pe. Ērei jocua mbaeyoa uyapoca vae reta uiporarata vi co —jei—.

⁸ Jáeramo ndepo jovaicho ani ndepi jovaicho uyapoca yave mbaeyoa ndeve, iyasia emombo ndiyugüi. Icavi co tecove opa mbae vae neno vaerā ndepo jovaicho mbae reve ani ndepi jovaicho mbae reve, tata guasu opa mbae vae pe mocui ndepo reve ani mocui ndepi reve Tumpa nemondo vaerā tēi güi —jei—. ⁹ Jae ramiño vi nderesa jovaicho uyapoca yave mbaeyoa ndeve, eequi emombo ndiyugüi. Icavi co tecove opa mbae vae neno vaerā nderesa jovaicho mbae reve, tata guasu pe mocui nderesa reve Tumpa nemondo vaerā tēi güi —jei—.

Ovecha ucañi vae
(Lc 15.3-7)

¹⁰ Agüiye perïro penti upurugüirovia vae. Che jae peve, ara pe ángel uyandareco cua nunga sambiai reta re vae reta jecuaeño ñugüinoi cheRu ara pe oï vae jovai —jei—. ¹¹ Echa'ã che cuimbaerã ayeypao vae ayu ambiasa vaerã ucañi Tumpa güi vae reta —jei—.

¹² Pepia pe piyemingueta cua re. Ime yave penti cuimbae cien ovecha güinoi vae, penti ovecha ucañi yave, cuimbae ueya jocua noventa y nueve ovecha reta oo ivitu guasu rupi ueca ucañi vae —jei—. ¹³ Jare uvãe chupe yave, añete che jae peve, uyerovia tuicha jocua ovecha re noventa y nueve ovecha ucañi mbae vae reta re güi. ¹⁴ Jae ramiño vi peRu ara pe oï vae uipota'ã cua upurugüirovia vae reta güi penti ave ucañite vaerã —jei—.

Nderivi iyoa yave ndecoti
(Lc 17.3-4)

¹⁵ Jare nderivi iyoa yave ndecoti, ecua emimbeu chupe uyapo vae regua quía uicuaa mbae reve. Jare nderivi uyapisaca nderé yave, ndiyeyapicatuta jae ndive —jei—. ¹⁶ Ërei uipota'ã yave uyapisaca nderé, eraa nderupie penti ani mocui neïrurã, ñru vae reta uicuaa vaerã mocui ani mbapi vae rupi mbae pere vae —jei—. ¹⁷ Jare uipota'ã yave uyapisaca jese reta, emimbeu upurugüirovia vae reta pe. Ërei nderivi uipota'ã yave uyapisaca upurugüirovia vae reta re, emae jese penti upurugüirovia mbae vae rami ani mburuvicha peguarã ocovara vae rami —jei—. ¹⁸ Añete che jae peve, ime yave mbae ivi pe piñapitita vae, Tumpa vi uñapitita ara pe. Jae ramiño vi ime yave mbae ivi pe piyorata vae, Tumpa vi oyorata ara pe —jei—.

¹⁹ Jare che jae ye peve, mocui vae ivi pegua omboyovaque iyemingueta jei yave: 'Yayerure Tumpa pe jocua re', cheRu ara pe oï vae uyapota chupe reta uyerure chupe jese vae —jei—. ²⁰ Echa'ã mocui ani mbapi vae uyembati yave cheree re, jae reta ipite pe che aïta —jei—.

²¹ Jayave Pedro ou jei Jesús pe:

—CheYa, cherivi iyoa yave checoti jeta vese, ¿mbovi vese pa ambiasata chupe? ¿Siete vese pa? —jei—.

²² Jayave Jesús jei Pedro pe:

—Che jae ndeve, embiasa chupe setenta vese siete, mbaeti siete veseño.

Mocui cuimbae ipía vae reta

²³ Echa'ã mboroyocua ara pegua penti mburuvicha guasu jembiocui reta pe ipía uipota ocovara vae rami co —jei—. ²⁴ Mburuvicha guasu umbipi ocovara chupe reta yave, ou uyemboi jae jovai penti jembiocui jeta ete corepoti re ipía chupe vae —jei—. ²⁵ Jocua jembiocui ipuere'ã umbiepi. Jáeramo mburuvicha guasu oyocui uñemee vaerã corepoti re jembiocui jare jembireco jare isambiai reta, jare opaete imbaembae, jembiocui ipuere vaerã umbiepi chupe —jei—. ²⁶ Jayave jembiocui uyeatica mburuvicha guasu jovai, jare jei chupe: 'Agüiye ndepochi cheve. Ndepiaguasu cheve yave, ambiepi ndeve opaete' —jei, jei—. ²⁷ Jayave mburuvicha guasu uiparareco jocua jembiocui jare oyora. Umbai chupe ipía —jei—.

²⁸ Ërei jocua uyeyocui vae oë mburuvicha guasu oï vae güi jare uvãe ñru uyeyocui vae mbovi corepoti re ipía chupe vae. Jayave uipisi uyasiombiri jare jei chupe: 'Embiepi cheve ndepía.' ²⁹ Jayave jocua ñru uyeyocui vae uyeatica jae jovai, jare uyerure chupe: 'Agüiye ndepochi cheve. Ndepiaguasu cheve yave, ambiepi ndeve opaete' —jei, jei—.

³⁰ Ërei uipota'ã ipiaguasu chupe. Umiinguca peresoriru pe opaete ipía umbiepi regua —jei—. ³¹ Jare ñru uyeyocui vae reta uicuaa yave uyeyapo vae, ipiatiti, jare yugüiraa umimbeu mburuvicha guasu pe opaete uyeyapo vae regua —jei—. ³² Jayave mburuvicha guasu ueni jocua jembiocui, jare jei chupe: 'Nde co jae cherembiocui icavi mbae vae. Che ambai ndeve opaete ndepía, nde ndiyerure cheve jese ramo' —jei, jei—. ³³ '¿Maera pa ndiparareco'ã nderapicha, che nduparareco rami?' —jei, jei—. ³⁴ Jayave mburuvicha guasu pochí jembiocui pe, jare oyocui peresoriru iyandarecoa reta uiporaraca vaerã chupe opaete ipía umbiepi regua —jei—.

³⁵ Jae ramiño vi cheRu ara pe oï vae uyapota jucuarãi peve, pambiasa'ã yave opaete pepia reve perivi iyoa pecoti vae pe —jei—.

19

¿Jupi pa cuimbae omombo vaerã jembireco?

(Mr 10.1-12; Lc 16.18)

¹ Jare Jesús opaete cua jei ma yave, oo Galilea güi Judea pe Jordán jovaicho pe. ² Jare jeta vae yugüiraa jaicue. Jayave Jesús umbigüera imbaerasi vae joco pe ñugüinoi vae reta. ³ Yugüeru vi fariseo reta Jesús oí vae pe. Jae reta uipota tēi uyavica chupe. Jáeramo upirandu reta chupe:

—¿Jupi pa cuimbae omombo vaerã jembireco ipotave mbae jeco pegua?

⁴ Jayave Jesús jei chupe reta:

—¿Pemingueta'ã pa Tumpa iñee pe quirãi Tumpa uyapo ramo yave, uyapo cuimbae jare cuña? —jei—. ⁵ Jare Tumpa jei cuarãi: 'Jáeramo cuimbae usirita tu jare ichi güi, jare oota ico vaerã jembireco ndive. Jare mocui vae uyeyapota penti ramiño.' Jucuarãi jei Tumpa —jei—. ⁶ Jáeramo mbaeti ma mocui rami. Yugüireco penti ramiño. Jáeramo agüiye quía tumbisiri Tumpa umiiru vae reta —jei.

⁷ Jayave fariseo reta jei chupe:

—¿Maera pa Moisés oyocui cuimbae uicutafã vaerã tupapire jembireco omombo vaerã?

⁸ —Moisés umaño peré pemombo vaerã pembireco pepiatanta ramo —jei Jesús—. Ërei Tumpa uyapo ramo yave, jucuarãi'ã —jei—. ⁹ Jare che jae peve, penti cuimbae ipuere omombo jembireco, cuña aguasa uyapo yave. Ërei cuña uyapo'ã yave aguasa, jare cuimbae omombo yave jembireco, jocua cuimbae uyuvanga co menda re umenda yave ñru cuña ndive. Jae ramiño vi ñru cuimbae umenda yave jocua cuña uyemomboca vae ndive, jae vi uyuvanga menda re —jei.

¹⁰ Jayave Jesús jemimboe reta jei chupe:

—Jucuarãi yaveño cuimbae ipuere omombo jembireco, icavi'ã cuimbae umenda vaerã.

¹¹ Ërei Jesús jei chupe reta:

—Amocue vaenõ ipuere uicuaa cua che jae peve vae. Jocua Tumpa umee uicuaa vaerã vae reta peño ipuere uicuaa —jei—. ¹² Echa'ã amocue vae ichi güi oa güiive yugüireco eunucorã reta. Jare amocue vae yugüireco eunucorã reta ñru vae reta uapiavo reta ramo. Jare amocue vae yugüireco eunucorã reta rami mboroyocuiã ara pegua jeco pegua. Ime yave quía ipuere uicuaa cua, tuicuaa —jei.

Jesús uyerure Tumpa pe sambiai reta re

(Mr 10.13-16; Lc 18.15-17)

¹³ Jare amocue vae güeru Jesús oí vae pe sambiai reta, Jesús oñono vaerã ipo jese reta jare uyerure vaerã Tumpa pe jese reta. Ërei jemimboe reta uñeengata güeru vae reta pe.

¹⁴ Ërei Jesús jei:

—Pemaño sambiai reta re yugüeru vaerã checoti. Echa'ã cua nunga uyeyocui Tumpa pe mboroyocuiã ara pegua pe —jei.

¹⁵ Jayave oñono ipo jese reta. Jayave oo joco güi.

Cuimbae icocatu vae

(Mr 10.17-31; Lc 18.18-30)

¹⁶ Jare penti cuimbae ou jei Jesús pe:

—Oporomboe vae, nde ndepiacavi co. ¿Mbae nunga mbae icavi vae pa ayapota anoi vaerã tecove opa mbae vae? —jei.

¹⁷ Jayave Jesús jei chupe:

—¿Maera pa ndere cheve chepiacavi vae co? Mbaeti quía ipiacavi, jaeño co Tumpa. Ërei ndipota yave neno tecove opa mbae vae, iyapo mboroyocui reta —jei.

¹⁸ —¿Mbae nunga reta pa? —jei Jesús pe.

Jayave Jesús jei chupe:

—'Agüiye epuruyuca. Agüiye iyuvanga menda re. Agüiye nemonda. Agüiye ndapu ñru vae reta re. ¹⁹ Ipiu nderu jare ndesi. Jare eau nderapicha nde ndiyerau rami' —jei.

²⁰ Jayave cuimbae jei Jesús pe:

—Ayavi'ã penti ave cua mboroyocui reta chemichi güiive. ¿Mbae ye pa uata cheve ayapo vaerã? —jei.

²¹ Jayave Jesús jei chupe:

—Ndipota yave ndiyapo opaete icavi ndiyapo vaerā vae, ecua emee opaete mbaembae neno vae corepoti re, jare emee ndecorepoti iparavete vae reta pe, jare ndicocatuta ara pe. Jayave eyu cherupíe —jei.

²² Ērei cua uyandu yave, cuimbae oo ipiatiti reve. Echa'a jeta mbaembae güinoi.

²³ Jayave Jesús jei jemimboe reta pe:

—Añete che jae peve, yavai ete co icocatu vae uique vaerā mboroyocua ara pegua pe.

²⁴ Che jae ye peve, yavai ete icocatu vae uique vaerā Tumpa iporoyocua pe, maemimba camello jee vae yuu jesacua rupi uasa vaerā güi —jei.

²⁵ Jesús jemimboe reta cua uyandu yave, ipiacañi jare jei:

—Jucuarāi yave, ¿quía pa ipuere uyembiasaca?

²⁶ Jayave Jesús uma jese reta jare jei:

—tvi pegua reta ipuere'a uyembiasa. Ērei Tumpa ipuere umbiasa reta. Echa'a Tumpa ipuere uyapo opaete mbaembae —jei.

²⁷ Jayave Pedro jei chupe:

—Mase, ore opaete mbaembae ndueya, ndoyu vaerā nde ndive. ¿Mbae pa nonoita ore?

²⁸ Jayave Jesús jei jemimboe reta pe:

—Añete che jae peve, che cuimbaerā ayeyapo vae aguapita cheguapia pe ayembadoraca vaerā, opaete uyeyapicatu yave. Jae ramiño vi pe reta che ndive peyu vae peguapita doce guapia pe, jare peāata doce ati Israel pegua reta —jei—. ²⁹ Jare ime yave quía ueya jenta, ani tiquei reta, ani tiví reta, ani jindí reta, ani tu, ani ichi, ani jembireco, ani isambiai reta, ani iivi reta chereco pegua vae, cien rupi jecoviata co chupe, jare güinoita imbaerā tecove opa mbae vae —jei—. ³⁰ Ērei Tumpa umbitaicuenta uyembutuicha vae reta, jare umitenondeta uñemimichi vae reta —jei—.

20

Co pe uparaviqui vae reta

¹ Echa'a mboroyocua ara pegua penti co iya rami co. Co iya oē neimbove asi ueca quía ipuere uparaviqui vaerā ico pe —jei—. ² Upirandu amocue vae pe uparaviquita ra chupe umbiepi yave chupe penti denario ara rupi. (Penti denario co penti ara mbaraviqui jepi pegua.) Jare jae reta jei uparaviquita co chupe. Jayave co iya omondo reta ico pe —jei—. ³ Jayave co iya oē ye guarasi ivate catu mi yave, jare uecha iru vae reta uyemboi ñugüinoi plaza pe. Mbaeti co jae reta iparaviqui. ⁴ Jayave co iya jei chupe reta: 'Pe reta vi pecua peparaviqui checo pe. Tambiepi peve jupi co ambiepi peve vaerā vae' —jei, jei—. Jayave jae reta yugüiraa co pe —jei—. ⁵ Jayave co iya oē ye guarasi ara mbite ma oī yave, jare omondo iru vae reta ico pe uparaviqui vaerā. Jae ramiño vi oē ye mbapi ora ma caaru yave, jare omondo ye iru vae reta ico pe uparaviqui vaerā —jei—. ⁶ Jare co iya oē ye caaru ete yave, jare uecha iru vae reta uyemboi ñugüinoi mbaeti iparaviqui ramo. Jayave jei chupe reta: '¿Maera pa pei cua pe opaete ara peparaviqui mbae reve?' —jei, jei—. ⁷ 'Mbaeti quía oremimbaraviquica ramo' —jei reta, jei—. Jayave co iya jei chupe reta: 'Pe reta vi pecua peparaviqui checo pe. Tambiepi peve jupi ambiepi peve vaerā vae' —jei, jei—.

⁸ Guarasi uique ma yave, co iya jei jembiocui pe: 'Eeni uparaviqui vae reta embiepi chupe reta. Embiepi rani taicue rupi umbipi uparaviqui vae reta pe, jare taicue rupi embiepi tenonde yave umbipi uparaviqui vae reta pe' —jei, jei—. ⁹ Jare co güi yugüeru ye yave caaru ete umbipi uparaviqui vae reta, co iya jembiocui umee penti penti pe penti denario —jei—. ¹⁰ Jare neimbove asi umbipi uparaviqui vae reta co güi yugüeru yave, ipia pe yemingqueta tēi co iya jembiocui umbiepi co chupe reta jeta caaru ete umbipi uparaviqui vae reta pe umbiepi vae güi. Ērei co iya jembiocui umbiepi vi chupe reta penti denario iru reta pe rami —jei—. ¹¹ Jayave penti denarioño güinoi yave, ñeenguru co iya pe —jei—. ¹² Jae reta jei chupe: 'Cua taicue rupi umbipi uparaviqui vae reta penti oraño uparaviqui. Ērei nde nembiepi chupe reta penti denario oreve nembiepi rami, yepe tēi ore nduparaviqui tanta guarasi jasi reve' —jei reta, jei—. ¹³ Ērei co iya jei penti vae pe: 'Cheamigo, ayapo'a etei icavi mbae vae ndeve. Echa'a nde ndere cheve ndeparaviquita checo pe che ambiepi ndeve yave penti denario' —jei, jei—. ¹⁴ 'Ecua eraa cua neminganacue. Aipota ambiepi taicue rupi umbipi uparaviqui vae pe penti denario ndeve ambiepi rami' —jei, jei—. ¹⁵ 'Echa'a jupi co che ayapo vaerā aipota vae

chembaembae ndive. Agüiye neacatãa cua ñru vae re che ayapo icavi vae chupe ramo' —jei, jei—.

¹⁶ Jae ramiño vi Tumpa umbitaicueta uyembutuicha vae reta, jare umitenondeta uñemimichi vae reta —jei.

*Jesús umimbeu ye umanota co
(Mr 10.32-34; Lc 18.31-34)*

¹⁷ Jare Jesús Jerusalén coti oo rambueve, ueni jocua doce jemimboe reta ñru reta ipite güi, jare jei chupe reta:

¹⁸ —Mase, yaa co ñaï Jerusalén pe. Jare che cuimbaerã ayeyapo vae penti vae chemeeta sacerdote reta itenondegua reta jare mboroyocui re oporombocue vae reta pe. Jae reta jeita amano vaerã, ¹⁹ jare chemeeta judío mbae vae reta pe. Jae reta cheyoyaita, chenupata chicote pe, jare checututa curusu re. Ërei mbapi ara rupi aicove yeta ayu umanocue vae reta ipite güi —jei.

*Jacobo jare Juan uipota vae
(Mr 10.35-45)*

²⁰ Cua jaicue rupi ou Jesús oï vae pe Zebedeo jembireco imembi reta Jacobo jare Juan ndive. Cuña uyeatica Jesús jovai jare jei chupe uipota uyapo vaerã mbae chupe. ²¹ Jayave Jesús upirandu cuña pe:

—¿Mbae pa ndipota?

—Emaeño cua mocui chemembi re uguapi vaerã ndeyipi pe ndeporoyocua pe, penti ndeacata coti jare ñru ndeaso coti —jei cuña chupe.

²² Ërei Jesús jei Jacobo jare Juan pe:

—Picuaa'ã mbae re piyerure vae. ¿Pepuereta pa piporara che aiporarata vae rami? ¿Pepuereta pa piyembibautizaca che ayembibautizacata vae rami? —jei.

—Orepuereta co —jei reta.

²³ —Añete pe reta piporarata che aiporarata vae rami, jare pe reta piyembibautizacata che ayembibautizacata vae rami —jei Jesús chupe reta—. Ërei chepuere'ã jae peve peguapi vaerã cheyipi pe, penti cheacata coti jare ñru cheaso coti. Echa'ã cheRu umicuatiro ma joco pe uguapita vae reta peguarã —jei.

²⁴ Jare ñru diez Jesús jemimboe reta cua uyandu yave, pochi reta Jacobo jare Juan pe. ²⁵ Jayave Jesús ueni reta.

—Picuaa cavi co cua —jei chupe reta—. Mburuvicha ivi pegua reta oporoyocui, jare mbaepuere güinoi vae reta jei ñru reta pe mbae uyapo vaerã —jei—. ²⁶ Ërei pe reta agüiye piyapo jucuarã —jei—. Ime yave penti pepite pe oï vae uipota mbaepuere güinoi vae, tuyeyocui ñru reta pe —jei—. ²⁷ Jare ime yave penti pepite pe oï vae uipota tenondeguarã ico vae, tuyeyocui ñru reta pe —jei—. ²⁸ Echa'ã che cuimbaerã ayeyapo vae ayu ayeyocui vaerã ñru vae reta pe. Ayu'ã ñru vae reta uyeyocui cheve vaerã. Ayu amano vaerã, jeta vae aepi vaerã —jei.

*Mocui cuimbae jesa mbae vae
(Mr 10.46-52; Lc 18.35-43)*

²⁹ Jare yugüiraa yave tenta guasu Jericó güi, jeta vae yuguiraa Jesús jaicue. ³⁰ Jare mocui cuimbae jesa mbae vae uguapi ñugüinoi joco pe tape jembei pe. Jare uicuaa reta Jesús uasa oo oï yave, iñeeãta reve jei reta:

—OreYa, oreparareco. Nde co jae David iñemoñaã reta pegua.

³¹ Jeta joco pe ñugüinoi vae reta uñeengata chupe reta. Uipota tēi umiqui. Ërei jae reta jeiete iñeeãta reve jei:

—OreYa, oreparareco. Nde co jae David iñemoñaã reta pegua.

³² Jayave Jesús uyemboi, jare uenica cuimbae jesa mbae vae reta.

—¿Mbae pa pipota ayapo vaerã peve? —jei chupe reta.

³³ —Nduipota numae, oreYa —jei reta chupe.

³⁴ Jayave Jesús uiparareco reta jare uyaviqui jesa chugüi. Jare jupivoiño mocui reve puere umae, jare yuguiraa Jesús jaicue.

21

Jesús oo Jerusalén pe

(Mr 11.1-11; Lc 19.28-40; Jn 12.12-19)

¹ Jare coiño ma Jerusalén güi ñugüinoi yave, yugüiraa uvæe tenta guasu-rai Betfagé iyipi pe, ivitu guasu Olivos jovai. Jayave Jesús oyocui mocui jemimboe reta:

² —Pecua pea tenta guasu-rai vanderovai oí vae pe —jei—. Peo pevæe yave, pevæeta penti mburica uñeñapiti oí, jare pevæeta vi mburica tairusu vae jae ndive. Piyora peru —jei—. ³ Jare ime yave quía mbae jei peve, pere chupe: ‘YandeYa uipota uiporu, ãrei imambae güeruruca yeta cua pe’ —pere, jei.

⁴ Opaete cua uyeyapo, Tumpa iñee aracae umimbeu vae jei vae uyeyapo vaerã. Echa'ã jae jei cuarã:

⁵ “Pemimbeu Jerusalén pegua reta pe:

‘Mase, peRuvicha Guasu ou peve.

Uñemimichi oí.

Echa'ã opo ou mburica tairusu vae re.’ ”

Jucuarãi jei.

⁶ Jayave Jesús jemimboe reta yugüiraa, jare uyapo Jesús jei chupe reta uyapo vaerã vae. ⁷ Jare güeru mburica jare mburica tairusu vae Jesús oí vae pe. Jayave Jesús jemimboe reta oñono iyasoya maemimba reta icupe re, jare Jesús opo mburica tairusu vae re. ⁸ Jare jeta vae uipiso iyasoya tape rupi mburica tairusu vae jenonde, jare írú vae reta uyasia ñanaroqui jare oñono tape rupi. ⁹ Jare Jesús jenonde yugüiraa vae reta jare jaicue rupi yugüiraa vae reta iñeeãta reve jei:

—¡Cavi co! Cua co jae David iñemoñaã reta pegua. Tuyembidoraca yandeYa jee re ou vae. Tei reta ‘icavi co’ ara pe —jei reta.

¹⁰ Jare Jesús oo ma uvæe yave Jerusalén pe, opaete Jerusalén pegua reta ipiacañi reve jei:

—¿Quía pa co jae?

¹¹ Jare jeta vae reta jei:

—Cua co jae Jesús. Jae co penti Tumpa iñee umimbeu vae Nazaret pegua. Nazaret Galilea pegua co —jei reta.

Jesús Tumpa jo pe uyapo vae

(Mr 11.15-19; Lc 19.45-48; Jn 2.13-22)

¹² Jayave Jesús uique Tumpa jo pe, jare omoë joco güi opaete umaemee vae reta jare mbae ogua vae reta, jare umbiyapara corepoti uipepica vae reta imesa reta jare picasu reta umee vae reta jenda reta. ¹³ Jare jei chupe reta:

—Tumpa iñee pe uyecuatía oí cuarã: ‘Chero uyembijeeta o yerure pegua pe.’ Jucuarãi uyecuatía oí. ãrei pe reta piyapo ma imonda vae reta iñemia rami —jei.

¹⁴ Jare yugüeru Jesús oí vae pe Tumpa jo pe jesa mbae vae reta jare icõcho vae reta, jare Jesús umbigüera reta. ¹⁵ Jare sacerdote reta itenondegua reta jare mboroyocui re oporomboe vae reta uecha miacañi Jesús uyapo vae reta, jare uyandu vi sambiaí Tumpa jo pe ñugüinoi vae reta iñeeãta reve jei:

—¡Cavi co! Cua co jae David iñemoñaã reta pegua.

Jáeramo jae reta pochi. ¹⁶ Jayave jei reta Jesús pe:

—¿Ndiyandu pa cua reta jei vae?

Jayave Jesús jei chupe reta:

—Ayandu. ¿Pemingueta'ã pa cua Tumpa iñee pe uyecuatía oí vae?

‘Nde neme sambiaí reta jare imeño ucambu vae reta pe nembidora vaerã.’

Jucuarãi uyecuatía oí —jei.

¹⁷ Jayave Jesús ueya reta. Oo Jerusalén güi Betania pe, jare joco pe ico.

Iva ía mbae vae

(Mr 11.12-14, 20-26)

¹⁸ Piareve pe neimbove yave Jesús oo ye Jerusalén coti, jare iyembai. ¹⁹ Jare uecha penti iva coiño tape güi. Jayave oo umae jese, ãrei uvæe'ã ía, jaeño joqui. Jayave jei iva pe:

—Ndarau etei ma ndeía.

Jare imambae iva yipi.

²⁰ Jare Jesús jemimboe reta uecha yave iva yipi vae, ipiacañi jese jare jei:

—Imambae yipi jocua iva.

²¹ Jayave Jesús jei chupe reta:

—Añete che jae peve, pepurugüirovia yave, pe reta vi pepuereta piyapo che ayapo iva pe vae rami. Ërei pepurugüirovia yave, pepuereta vi pere cua ivitu guasu pe: 'Pecua cua güi piyemombo i guasu pe', jare jucuarãita uyeyapo. Pere'ã yave pepia pe: 'Ndarau ndipo uyeyapo', uyeyapota co peve —jei—. ²² Jare ime yave mbae pipota vae, piyerure Tumpa pe jese. Jare perovia yave Tumpa umeeta co peve, penoita co —jei.

Jesús imbaepuere

(Mr 11.27-33; Lc 20.1-8)

²³ Jare Jesús uique ye yave Tumpa jo pe, sacerdote reta itenondegua reta jare tenta guasu pegua reta itenondegua reta yugüero jae oĩ vae pe oporomboe rambueve, jare upirandu chupe:

—¿Mbae nunga mbaepuere pa nenoĩ cua mbaembae ndiyapo vaerã? ¿Quía pa umeẽ ndeve mbaepuere cua ndiyapo vaerã? —jei reta.

²⁴ Jayave Jesús jei chupe reta:

—Che vi tapirandu peve mbae re. Pemimbeu yave cheve, che vi amimbeuta peve mbae nunga mbaepuere anoi cua mbaembae ayapo vaerã —jei—. ²⁵ ¿Quía pa ombou Juan upurumbibautiza vaerã? ¿Tumpa pa ombou? anĩ ¿ivi pegua reta pa ombou? —jei.

Jayave jae reta jei uyupe:

—Yae yave: 'Tumpa co ombou', jae jeita yandevẽ: 'Jucuarãĩ yave, ¿maera pa perovia'ã?' —jei reta uyupe—. ²⁶ Ërei yandepuere'ã yae: 'Ivi pegua reta co ombou.' Echa'ã yaquĩye tenta guasu pegua reta güi. Echa'ã opaete vae güirovia Juan co jae penti Tumpa inee umimbeu vae —jei reta uyupe.

²⁷ Jayave jei reta Jesús pe:

—Nduicuaa'ã.

—Che vi ndarau amimbeu peve mbae nunga mbaepuere anoi cua mbaembae ayapo vaerã —jei Jesús chupe reta—.

Mocui tai reta

²⁸ ¿Quirãĩ pa pepia pe piyemingueta cua re? Penti cuimbae güinoĩ mocui tai reta. Ou jei penti tai pe: 'Cheraĩ, cua ara ecua eparaviqui checo pe.' ²⁹ Tai jei chupe: 'Aata'ã aparaviqui.' Ërei taicue rupi iquirẽĩ oo. Jáeramo oo uparaviqui tu ico pe —jei—. ³⁰ Jare cuimbae jei ñru tai pe: 'Cheraĩ, cua ara ecua eparaviqui checo pe.' Tai jei chupe: 'Aata aparaviqui, cheru.' Ërei oo'ã —jei—. ³¹ ¿Quía nunga pa cua mocui vae güi uyapo tu jei vae? —jei.

Jayave jae reta jei chupe:

—Jocua tenonde tu oyocui vae.

Jayave Jesús jei chupe reta:

—Añete che jae peve, mburuvicha peguarã ocovara vae reta jare cuña aguasa rupi yugüireco vae reta uiqueta perenonde Tumpa iporoyocua pe. ³² Echa'ã Juan ou uicuaaca peve jupi vae, ãrei pe reta perovia'ã. Ërei mburuvicha peguarã ocovara vae reta jare cuña aguasa rupi yugüireco vae reta güirovia. Jare yepe tẽi cua picuaa, ãrei peeya'ã piyemingueta icavi mbae vae pepia pe oĩ vae. Jecuae peatẽi perovia Juan —jei—.

Co iporúa icavi mbae vae reta

(Mr 12.1-12; Lc 20.9-19)

³³ Tamimbeu ye peve amijaanga reve cua: Ico penti cuimbae icorã uiquẽse vae. Jayave oñoti pipe jeta uva. Jayave oyoo ivi, jare uyapo uva uitami pipe vaerã. Uyapo vi penti chapapa, umaẽ vaerã ivate güi opaete co re. Jayave uiporuca ico ñru vae reta pe, jae reta uyandareco vaerã jese. Jayave co iya oo mbiri ambie ivi pe —jei—. ³⁴ Jare uva yagüiye ma yave, co iya ombou amocue jembiocui reta co iporúa reta pe, jae reta umbiyao vaerã tẽi uva reta, iya güinoĩ vaerã imbaerã —jei—. ³⁵ Ërei co iporúa reta uipisi co iya jembiocui reta, jare uinupa penti vae, jare uyuca ñru vae, jare uyapi ita pe ñru vae —jei—. ³⁶ Jayave co iya ombou ye jeta catu ete jembiocui reta tenonde ombou vae güi. Ërei co iporúa reta jecuae jucuarãĩ uyapo ye chupe reta —jei—. ³⁷ Jayave taicue rupi co iya ombou tai. Jei tẽi iyupe: 'Aramoi uipiuta cheraĩ' —jei, jei—. ³⁸ Ërei co iporúa reta uecha yave co iya tai, jei

reta uyupe: 'Cua co jae iyarā vae. Yaa yayuca, jare yande yaicota co iyarā' —jei reta, jei —. ³⁹ Jayave jae reta uipisi co iya tai omombo co güii jare uyuca —jei—.

⁴⁰ Jáeramo co iya ou ye yave, ¿mbae ra uyapota jocua co iporúa reta pe? —jei.

⁴¹ Jayave jae reta jei Jesús pe:

—Opata uyuca jocua cuimbae icavi mbae vae reta, jare uiporucata ico ambie vae reta pe. Jae reta umeeta co iya pe imbaerā uva yagüiye ma yave —jei reta.

⁴² Jayave Jesús jei chupe reta:

—¿Pemingueta'ā pa cua Tumpa iñee pe uyecuatía oī vae?

'Ita tenta iyapoa reta omombo vae uyeyapo ma ita tenondegua vae.

YandeYa uyapo cua.

Yaecha ma, jare yandepiacañi jese.'

Jucuarāi uyecuatía oī —jei—.

⁴³ Jáeramo che jae peve, pe reta ndarau pico Tumpa iporoyocua pe. Tumpa umeeta ĩru reta pe yugüireco vaerā joco pe. Jae reta uyapota jupi vae —jei—. ⁴⁴ Ime yave quía jocua ita re uyepiaca vae, uñemopēta co. Jare ime yave quía jocua ita oa jese vae, opata umbiperasorasos —jei.

⁴⁵ Jare sacerdote reta itenondegua reta jare fariseo reta cua uyandu yave, uicuaa cua Jesús umijaanga reve jei vae uicuaaca quirāi jae reta teco güinoi. ⁴⁶ Jare jae reta uipota tēi uipisi Jesús. Ērei ipuere'ā. Echa'ā uquiye jeta vae reta güi. Echa'ā jocua jeta vae reta güirovia Jesús co jae penti Tumpa iñee umimbeu vae.

22

Parea menda pegua

(Lc 14.15-24)

¹ Jare Jesús imiari ye joco pe ñugüinoi vae reta pe umijaanga reve. Jei chupe reta:

² —Mboroyocua ara pegua penti mburuvicha guasu rami co. Jocua mburuvicha guasu tai umendata. Jáeramo mburuvicha guasu uyapo parea —jei—. ³ Uparea ma amocue vae pe yugüeru vaerā menda pe. Jayave omondo jembiocui reta ueni reta vaerā. Ērei jae reta ñatēi yugüeru —jei—. ⁴ Jayave mburuvicha guasu oyocui ye ĩru jembiocui reta. Jei chupe reta: 'Pecua pemimbeu apareta chupe vae reta pe: Mase, jáema oī peu vaerā. Ayucaca ma chegüeye reta jare ĩru cherimba iquira vae reta. Ayapicatu ma opaete. Pecua menda pe' —pere, jei, jei—. ⁵ Ērei jae reta uipota'ā yugüiraa. Penti vae oo ico pe. ĩru vae oo umaeme. ⁶ Jare ĩru reta uipisi mburuvicha guasu jembiocui reta, uyapo icavi mbae vae chupe reta jare uyuca reta —jei—. ⁷ Ērei mburuvicha guasu uicuaa yave cua regua, pochi ete co. Jáeramo omondo isundaro reta opa vaerā uyuca jocua upuruyuca vae reta jare uapí vaerā jenta guasu —jei—. ⁸ Jayave mburuvicha guasu jei jembiocui reta pe: 'Opaete uyeyapicatu ma oī yayapo vaerā menda. Ērei apareta chupe vae reta uyapo'ā jupi vae' —jei, jei—. ⁹ Jáeramo pecua calle rupi jare pere opaete pevāe chupe vae reta pe yugüeru vaerā menda pe' —jei, jei—. ¹⁰ Jayave mburuvicha guasu jembiocui reta yugüiraa calle rupi jare umbati opaete uvāe chupe vae reta - icavi vae uyapo vae reta jare icavi mbae vae uyapo vae reta. Jare mburuvicha guasu jo tinee ma —jei—.

¹¹ Jare mburuvicha guasu ou uvāe yave umaē vaerā yugüeru vae reta re, uecha joco pe penti cuimbae temimonde menda pegua mbaeti güinoi vae —jei—. ¹² Jayave jei chupe: 'Cheamigo, ¿quirāi pa ndique cua pe temimonde menda pegua mbae reve?' Ērei cuimbae jei'ā mbae ave —jei—. ¹³ Jayave mburuvicha guasu jei jembiocui reta pe: 'Piñapiti ipo rupi jare ipi rupi, jare peraa cua güii pemombo oca pe pitumimbi oī vae pe. Joco pe uyaota jare jāi umbiquiririuta' —jei—. ¹⁴ Echa'ā Tumpa ueni jeta vae reta ěrei mboviño uiparavo —jei.

¿Jupi pa yambiepi vaerā César pe?

(Mr 12.13-17; Lc 20.20-26)

¹⁵ Jayave fariseo reta uyembati, jare uyemboemboe quirāi ipuere uyavica Jesús pe jae uyemingueta yave. ¹⁶ Jayave jae reta omondo jemimboe reta Jesús oī vae pe herodiano reta ndive. Jae reta jei Jesús pe:

—Oporomboe vae, nduicuaa nde ndere vae añete co. Nde ndeporomboe cavi quirāi Tumpa uipota yaico vaerā vae re. Nde nemaē oyovaque opaete pāve re. Nembutuicha'ā penti ave ĩru vae güii —jei reta—. ¹⁷ Jáeramo emimbeu oreve, ¿quirāi pa ndepia pe

ndiyemingueta cua re? César yandeocui yambiepi vaerā chupe corepoti pe. ¿Jupi pa yambiepi vaerā chupe? ani ¿jupi'ā pa? —jei reta.

¹⁸ Ērei Jesús uicuaa jae reta uipota tēi co uyapo icavi mbae vae chupe, jare jei chupe reta:

—¿Maera pa pipota piyavica cheve? Pe reta co jae upurumbitavi vae reta —jei—.

¹⁹ Peechaca cheve corepoti mburuvicha guasu ocovara peve vae —jei.

Jayave güeru reta chupe penti corepoti. ²⁰ Jayave Jesús upirandu chupe reta:

—¿Quía jova íā pa cua? ¿Quía jee pa cua uyecuatía oī vae? —jei.

²¹ —Jocua César imbae co —jei reta.

Jayave Jesús jei chupe reta:

—Pemeé César pe Cesar pegua, jare pemeé Tumpa pe Tumpa pegua.

²² Cua uyandu reta yave, ipiacañi reta jese. Jayave jae reta yugüüraa Jesús güi.

¿Icove yeta pa umanocue vae reta?

(Mr 12.18-27; Lc 20.27-40)

²³ Jare jocua ara etei amocue saduceo reta yugüeru Jesús oī vae pe. Opaete saduceo reta jei umanocue vae reta icove ye'ā co. Saduceo yugüeru vae reta jei Jesús pe:

²⁴ —Oporomboe vae, Moisés jei ueya yandevé cuarāi: 'Penti tiquei vae umano yave, jembirecocue mbaeti imembi chupe yave, cuimbae amiri tiví tumenda jocua cuña ndive. Jayave cuña imembi yave, cuimbae tumbijee sambiai tiquei amiri jee pe.' Jucuarāi jei Moisés —jei reta chupe—. ²⁵ Ico orepite pe penti cuimbae seis tiví reta güinoi vae. Cua cuimbae umenda, jare umano umimembi mbae reve. Cuimbae amiri jaicue rupigua umenda jembirecocue ndive —jei reta—. ²⁶ Ērei jae vi umano umimembi mbae reve. Jae ramiño vi uyeyapo jaicue rupigua ye pe. Opaete siete reve umenda jocua cuña ndive, jare opaete siete reve umano umimembi mbae reve —jei reta—. ²⁷ Taicue rupi cuña umano vi. ²⁸ Jayave umanocue vae reta icove ye yave, ¿quía nunga vae jembirecorā pa icota jocua cuña? Echa'a opaete siete reve umenda jae ndive —jei reta.

²⁹ Ērei Jesús jei chupe reta:

—Pe reta piyavi co. Echa'a picuaa'ā Tumpa iñee uyecuatía oī vae jare Tumpa imbaepuere —jei—. ³⁰ Umanocue vae reta icove ye yave, cuimbae reta jare cuña reta ndarau umenda. Yugüirecota ángel ara pe ñugüinoi vae reta yugüireco rami —jei—. ³¹ Tamimbeu peve umanocue vae reta regua. Icove yeta co. ¿Pemingueta'ā pa Tumpa iñee pe uyecuatía oī vae? ³² Echa'a uyecuatía oī cuarāi: 'Che co jae Abraham, Isaac jare Jacob iTumpa' —jei Tumpa. Jucuarāi uyecuatía oī —jei—. Tumpa mbaeti co umanocue vae reta iTumpa. Jae co tecove güinoi vae reta iTumpa —jei.

³³ Jare yatí vae reta cua uyandu yave, ipiacañi Jesús iporomboe re.

Mboroyocui tenondegua vae

(Mr 12.28-34)

³⁴ Ērei fariseo reta uicuaa yave saduceo reta ipuere'ā ma co mbae jei Jesús pe, amocue jae reta uyembati Jesús oī vae pe. ³⁵ Jayave penti fariseo - jae co penti mboroyocui re oporomboe vae vi - upirandu Jesús pe mbae re. Uipota tēi uyavica chupe. ³⁶ Jei chupe:

—Oporomboe vae, ¿mbae nunga mboroyocui pa co jae tenondegua vae?

³⁷ Jayave Jesús jei chupe:

—Mboroyocui tenondegua vae co cua: 'Eau ndeYa Tumpa opaete ndepia reve, opaete nderecove reve, jare opaete ndepiyemingueta reve' —jei—. ³⁸ Cua co jae mboroyocui tenondegua vae —jei—. ³⁹ Jare jaicue rupigua vae co cua: 'Eau nderapicha nde ndiyerau rami' —jei—. ⁴⁰ Cua mocui mboroyocui ndiyapo yave, ndiyapo ma co opaete Moisés iporoyocui jei vae jare Tumpa iñee aracaé umimbeu vae reta jei vae —jei.

¿Quía iñemoñaeta reta pegua pa co Cristo?

(Mr 12.35-37; Lc 20.41-44)

⁴¹ Jare fariseo reta Jesús oī vae pe uyembati yave, Jesús upirandu chupe reta:

⁴² —¿Mbae pa pepia pe piyemingueta Cristo re? ¿Quía iñemoñaeta reta pegua pa co jae? —Jae co David iñemoñaeta reta pegua —jei reta chupe.

⁴³ —Jucuarāi yave, ¿maera pa David etei jei chupe: 'CheYa'? Echa'a Espiritu Santo uicuaa David pe jucuarāi jei vaerā —jei chupe reta—. ⁴⁴ Echa'a David jei cuarāi: 'YandeYa jei cheYa pe:

Eguapi cheyipi pe cheacata coti,
nderovaicho reta opa amiamiri regua' —jei yandeYa.
Jucuarāi jei David aracaē —jei—. ⁴⁵ ¿Quirāi pa ipuere ico David iñemoñaā reta peguarā?
Echa'ā David etei jei chupe: 'CheYa' —jei Jesús chupe reta.

⁴⁶ Jare mbaeti quía ipuere umimbeu chupe. Jare jocua ara güiwe mbaeti ye quía uipota upirandu Jesús pe mbae re.

23

Jesús umbijeco mboroyocui re oporomböe vae reta jare fariseo reta
(Mr 12.38-40; Lc 11.37-54; 20.45-47)

¹ Jayave Jesús jei jeta vae pe jare jemimboe reta pe:

² —Mboroyocui re oporomböe vae reta jare fariseo reta umimbeu peve Moisés iporoyocui reta. ³ Jáeramo jecuaēño piyapo jei reta peve piyapo vaerā vae. Ērei agüiye piyapo jae reta uyapo rami. Echa'ā jae reta etei uyapo'ā jei peve piyapo vaerā vae —jei—. ⁴ Jae reta jei ĩru vae reta pe uyapo vaerā yavai uyapo vaerā vae. Yamijaanga penti tivita. Jae reta jei ĩru vae reta pe ovoi vaerā penti tivita poi vae. Ērei jae reta ombori'ā etei ovoi vaerā. Uyaviqui'ā etei reta jivita —jei—. ⁵ Mboroyocui re oporomböe vae reta jare fariseo reta mbae uyapo yave, uipota ĩru vae reta uecha vaerā. Echa'ā jae reta oñono iyee Tumpa iñee ĩru tuicha vae jare uyapo jemimonde pucu —jei—. ⁶ Yugüiraa yave tupao pe jare para pe, jecuaēño uipota uguapi tenda tenondegua vae reta pe —jei—. ⁷ Jare uipota ĩru vae reta pe uyembisaludaca vaerā calle reta rupi jare jei vaerā chupe reta: 'Oporomböe vae' —jei—. ⁸ Ērei agüiye pipota ĩru vae reta jei vaerā peve: 'Oporomböe vae.' Echa'ā che co jae pomboe vae, jare opaete pe reta cherivi reta co —jei—. ⁹ Jare agüiye pere: 'Cheru', penti cuimbae ivi pegua pe. Echa'ā pentiño co jae peRu, jare jae ico ara pe —jei—. ¹⁰ Jare agüiye pipota ĩru vae reta jei vaerā peve: 'Cheya.' Echa'ā pentiño co jae peYa. Jae co che. Echa'ā che co jae Cristo, Tumpa ombou vae —jei—. ¹¹ Ime yave quía uipota tenondeguarā ico vae, tuyeyocui opaete ĩru reta pe —jei—. ¹² Echa'ā uyembutuicha vae uñemimichicata co. Jae ramiño vi uñemimichi vae uyembutuichacata co —jei.

¹³ Jayave Jesús jei mboroyocui re oporomböe vae reta jare fariseo reta pe:

—Pe reta co jae mboroyocui re oporomböe vae reta jare fariseo reta. Piporarata co. Pe reta co jae upurumbitavi vae reta. Echa'ā pe reta piyopia ĩru vae reta agüiye vaerā uique mboroyocui ara pegua pe. Pe reta etei pique'ā. ĩru vae reta uipota tēi uique, Ērei pe reta piyopia reta agüiye vaerā uique —jei—. ¹⁴ Pe reta co jae mboroyocui re oporomböe vae reta jare fariseo reta. Piporarata co. Pe reta co jae upurumbitavi vae reta. Echa'ā peñiro cuña ime umano vae reta güi opaete imbaembae, jare pucu piyerure Tumpa pe pepurumbitavi vaerā. Jáeramo piporara eteta co —jei—. ¹⁵ Pe reta co jae mboroyocui re oporomböe vae reta jare fariseo reta. Piporarata co. Pe reta co jae upurumbitavi vae reta. Echa'ā peo peeca opaete i guasu rupi jare ivi rupi pevāe vaerā penti pepuere pemiquirēi peporomböe güirovia vaerā vae. Jare güirovia yave peporomböe, jecuae pemboe mbaembae re. Jocua jeco pegua jae uveyapo icavi mbae vaerā. Pe reta peota tata guasu pe. Jare jae peporomböe re güirovia ramo, oota vi tata guasu pe —jei—. ¹⁶ Pe reta co jae jesa mbae vae uechaca ñugüiñoi tape ĩru vae reta pe vae reta rami. Piporarata co. Echa'ā pe reta pere: 'Ime yave quía: Tumpa jo jee re ayapota, jei vae, jocua mbae'ā co. Ērei ime yave quía: Oro Tumpa jo pegua jee re ayapota, jei vae, uyapota co jocua jei uyapota vae' —pere, jei—. ¹⁷ Pe reta co jae jesa mbae vae reta rami. Pe reta pearacua'ā. Echa'ā jocua oro uñeñoño tee Tumpa peguarā, Tumpa jo pegua co ramoño. Jáeramo Tumpa jo uyembujupica ete jocua oro Tumpa jo pegua güi —jei—. ¹⁸ Jae ramiño vi pe reta pere: 'Ime yave quía: Uñemeearenda jee re ayapota, jei vae, jocua mbae'ā co. Ērei ime yave quía: Ofrenda jee re uñemeearenda pe oĩ vae ayapota, jei vae, uyapota co jei uyapota vae' —pere, jei—. ¹⁹ Pe reta co jae jesa mbae vae reta rami. Pe reta pearacua'ā. Echa'ā jocua ofrenda uñeñoño tee Tumpa peguarā, uñemeearenda pe oĩ ramoño. Jáeramo uñemeearenda uyembujupica ete ofrenda uñemee vae güi —jei—. ²⁰ Jáeramo ime yave quía: Uñemeearenda jee re ayapota, jei vae, opaete ofrenda uñemeearenda pe oĩ vae uñemĩru uñemeearenda ndive —jei—. ²¹ Jae ramiño vi ime yave: Tumpa jo jee re ayapota, jei vae, Tumpa jo pe ico vae uñemĩru Tumpa jo ndive —jei—. ²² Jae ramiño vi ime yave quía: Ara jee re ayapota, jei vae, Tumpa uñemĩru ara ndive. Echa'ā ara

Tumpa iguapia co —jei—. ²³ Pe reta co jae mboroyocui re oporombocoe vae reta jare fariseo reta. Piporarata co. Pe reta co jae upurumbitavi vae reta. Echa'ã pemee Tumpa pe diezmo temiti reta penoi vae güi. Èrei cua michi ete. Mboroyocui jei peve piyapo vaerã jeta ete cua güi. Echa'ã jei peve piyapo vaerã jupi vae jare pepuruparareco vaerã jare pepurugüirovia vaerã. Piyapo'ã opaete cua. Icavi co pemee vaerã Tumpa pe jocua nunga diezmo. Èrei piyapota tõi jupi vae jare pepurupararecota tõi jare pepurugüiroviata tõi —jei—. ²⁴ Pe reta co jae jesa mbae vae uechaca ñugüinoi tape ñru vae reta pe vae reta rami. Pe reta peatõi pemocui penti ñeti, èrei pemocui penti camello —jei—. ²⁵ Pe reta co jae mboroyocui re oporombocoe vae reta jare fariseo reta. Piporarata co. Pe reta co jae upurumbitavi vae reta. Echa'ã pe reta jare plato icupe rupiño uyeyoc vae rami. Èrei pepia iquia co. Echa'ã pipota ñru vae reta imbaembae jare piyapo icavi mbae vae —jei—. ²⁶ Pe reta co jae fariseo reta. Pe reta co jae jesa mbae vae reta rami. Piyoc rani pepia, taza jare plato japipe rupi piyoc rami. Jayave icupe rupi vi uyeyoceta —jei—. ²⁷ Pe reta co jae mboroyocui re oporombocoe vae reta jare fariseo reta. Piporarata co. Pe reta co jae upurumbitavi vae reta. Echa'ã pe reta co jae teögüeriru ñemotõi cavi vae reta rami. Jocua nunga teögüeriru ipõra echa, èrei japipe pe tinee umanocue vae reta icägüecue reta pe jare iquia —jei—. ²⁸ Jae ramiño vi ñru vae reta ipia pe uyemingueta tõi pe reta co jae jupi vae reta, èrei pepia tinee tavi jare icavi mbae vae pe —jei—.

²⁹ Pe reta co jae mboroyocui re oporombocoe vae reta jare fariseo reta. Piporarata co. Pe reta co jae upurumbitavi vae reta. Echa'ã pe reta piyapo Tumpa ñnee aracae umimbeu vae reta iteögüeriru reta, jare pemopõra jupi vae reta iteögüeriru reta —jei—. ³⁰ Jare pere: 'Yande yaico yave mona yandetenondegua reta yugüireco yave, yande yamborita'ã tõi jare reta uyuca yave Tumpa ñnee aracae umimbeu vae reta' —pere, jei—. ³¹ Jucuarãi pere ramo, picuaaca quirãi pe reta co jae Tumpa ñnee aracae umimbeu vae reta uyuca vae reta ñnemoñaeta reta pegua —jei—. ³² Agüiyeta tõi ma piyapo petenondegua reta uyapo rami —jei—. ³³ Pe reta mboi reta rami co. Añete co, pe reta mboi reta ñnemoñaeta reta rami co. Ndarau etei piyerepi Tumpa perãa yave peo vaerã tata guasu pe —jei—. ³⁴ Amondota peve chĩnee umimbeu vae reta jare iyaracuaa catu vae reta jare cheporoyocui re oporombocoe vae reta. Picututa curusu re amocue vae piyuca, jare pinupata chicote pe amocue vae petupao reta pe jare peaicuemoñaeta reta penti tenta guasu güi ñru tenta guasu pe —jei—. ³⁵ Jare pe reta penoita teco opaete jupi vae reta imano re. Tenonde voi Abel uyeyucaca - jae co jupi vae - jare taicue rupi Berequías tai Zacarías jee vae uyeyucaca. Echa'ã Zacarías umano maemimba uyeyucacue ñnemearendeta jare Tumpa jo ipãu pe —jei—. ³⁶ Añete che jae peve, cua reta jare opaete ñru vae reta imano re pe reta añave pico vae piyembijecota —jei—.

Jesús ipiatiti Jerusalén pegua reta re

(Lc 13.34-35)

³⁷ Jerusalén pegua reta, pe reta piyuca Tumpa ñnee aracae umimbeu vae reta. Pe reta piyapi ita pe piyuca Tumpa ombou peve vae reta. Jeta vese ma chequirõi tõi pumbati, uru umbati imembi reta ipepo igüi pe rami, èrei pe reta pipota'ã —jei—. ³⁸ Mase, Tumpa usirita ma pegüi. ³⁹ Che jae peve, ndarau ma cherecha pere regua: 'Tuyembidoraca yandeYa jee re ou vae' —jei.

24

Tumpa jo uyeitita

(Mr 13.1-2; Lc 21.5-6)

¹ Jayave Jesús oẽ Tumpa jo güi. Jare jemimboe reta yugüeru uechaca Jesús pe opaete o Tumpa jo pe ñugüinoi vae reta. ² Jare Jesús jei chupe reta:

—¿Pema pa peĩ opaete cua o reta re? Añete che jae peve, ndarau upita penti ave ita ñru ita iárambo. Opaete uyeitita co —jei.

Mbaesusereta uyeyapota vae

(Mr 13.3-23; Lc 21.7-24; 17.22-24)

³ Jare Jesús uguapi oĩ rambueve ivitu guasu Olivos re, jemimboe reta yugüeru jae oĩ vae pe jare jei chupe, jae retaño jae ndive ñugüinoi yave:

—Emimbeu oreve, ¿quirāi yave pa cua uyeyapota? Jare ndeyu yeta ma yave, ¿quirāita pa nduicuaa? Jare cua ara reta opata ma yave, ¿quirāita pa nduicuaa? —jei reta.

⁴ Jayave Jesús jei chupe reta:

—Piñemoa ngatu agüiye vaerā petavi. ⁵ Echa'ā yugüeruta jeta cheree pe uyembijeeta vae reta. Jare reta jeita: 'Che co jae Cristo.' Jare umbitavita jeta vae reta —jei—. ⁶ Imeta co ñerāro reta coiño pegüi. Imeta vi ñerāro reta mbirī pegüi. Piyandu yave cua reta regua, agüiye pequiye. Cua susere reta uyeyapoñotai co. Ērei cua susere reta ndei ave co opa vaerā —jei—. ⁷ Penti ivi pegua reta uñerārota ambie ivi pegua reta ndive, jare mburuvicha reta uñerārota ĩru mburuvicha reta ndive. Jare imeta caruai reta jare ivicāta jeta que rupi —jei—. ⁸ Ērei cua susere reta uyembipi ramo co oĩ —jei—.

⁹ Jayave ĩru vae reta pemeeta uiporaracata peve vae reta pe, jare piyeyucacata. Jare piñemitarēcāta opaete vae pe chereco pegua —jei—. ¹⁰ Jare jeta vae uñatima yeta Tumpa güi jare uñemeeta reta jare uñemitarēita —jei—. ¹¹ Jare jeta upurumbitavi vae reta jeita: 'Che co jae penti Tumpa iñee umimbeu vae.' Jáeramo jae reta umbitavita jeta vae —jei—. ¹² Jare jeta vae uyapota icavi mbae vae. Jáeramo jeta tenonde yave upuruau vae reta ndarau ma upuruau —jei—. ¹³ Ērei jōsata oo uvāe iyapi pe vae uyembiasacata co —jei—. ¹⁴ Jare cua ñee icavi vae Tumpa iporoyocua pegua jerācuata opaete ivi rupi opaete ivi pegua reta yandu vaerā. Jayave cua ara reta opata co —jei—.

¹⁵ Jare peechata icavi mbae vae opaete urucumegua vae uyemboi oĩ o uñeño tee Tumpa peguarā vae pe. Tumpa iñee aracae umimbeu vae Daniel jei uyecuaata co. (Umingueta vae tuicuaa) —jei—. ¹⁶ Jayave Judea pe ñugüinoi vae reta tosi ivitu guasu coti. ¹⁷ Jare o cupe re oĩ vae agüiye tuique jo pe güiraa vaerā imbaembae —jei—. ¹⁸ Jare ico pe oĩ vae agüiye tou ye jenta pe güiraa vaerā iyasoya —jei—. ¹⁹ Jare ipurúa vae reta jare umicambu vae reta uiporara eteta jocua ara reta pe —jei—. ²⁰ Jare pijerure Tumpa pe agüiye vaerā pesi roi ma yave ani mbutuu ara pe —jei—. ²¹ Echa'ā jocua ara reta pe ivi pegua reta uiporara eteta. Jucuarāi'ā uiporara reta ivi uyeyapo güive, jare ndarau ye jucuarāi uiporara reta —jei—. ²² Jare yandeYa uipota'ā yave opa vaerā jocua ara reta, mbaetita tēi quía ipuere ico. Ērei Tumpa uiparavo vae reta jeco pegua opata jocua ara reta —jei—.

²³ Aramoi jocua ara reta pe quía jeita peve: 'Mase, co oĩ Cristo', ani jeita: 'Mase, pee oĩ Cristo.' Jucuarāi jei yave, agüiye perovia —jei—. ²⁴ Amocue upurumbitavi vae reta jeita: 'Che co jae Cristo', jare ĩru upurumbitavi vae reta jeita: 'Che co jae Tumpa iñee umimbeu vae.' Jare jae reta uyapota miacañi reta, umbitavi vaerā tēi Tumpa uiparavo vae reta —jei—. ²⁵ Mase, amimbeu ma peve cua, ndei uyeyapo mbove —jei—.

²⁶ Jayave ĩru vae reta jei yave peve: 'Mase, ime co ñana pe oĩ', agüiye pecua. Jare ĩru vae reta jei yave peve: 'Mase, ime co cua o pe oĩ', agüiye perovia —jei—. ²⁷ Tamijaanga ama uvera vae. Echa'ā ama uvera vae uyecuaa opaete ara re guarasi oē vae coti güi guarasi uique vae coti pe. Jare ramiño vi che cuimbaerā ayeyapo vae ayecuaata opaete vae pe ayu ye yave —jei—.

²⁸ Umano vae jetecue oĩ vae pe uyembitata uruvi reta —jei—.

Cuimbaerā uyeyapo vae ou yeta

(*Mt 13.24-37; Lc 21.25-36; 17.26-36*)

²⁹ Jayave opa uiporara reta jocua ara reta pe yave, guarasi uñemipitumimbata, jare yasi ndarau ma jembipe, jare yasitata reta oata ara güi, jare opaete ara re mbaepuere güinoi vae reta ucātata —jei—. ³⁰ Jayave mbae uyecuaata ara re. Jocua uicuaacata ivi pegua reta pe che cuimbaerā ayeyapo vae ayu yeta co. Jayave opaete ati Israel pegua reta ipiatitita jare cherechata ayu amapitu reve ara güi. Che cuimbaerā ayeyapo vae anoita mbaepuere tuicha vae, jare ayembidoracata opaete vae pe —jei—. ³¹ Jare amondota ángel cheve uyeyocui vae reta trompeta uñee reve, jae reta güeru vaerā aiparavo vae reta opaete ivi rupi güi —jei—.

³² Yandepuere yamijaanga iva. Piyemboe jese —jei—. Joqui yave, picuaa uyaro ma co ama oqui vaerā —jei—. ³³ Jare ramiño vi pe reta peecha yave opaete cua mbaembae uyeyapo ñugüinoi vae, picuaata che coiño ma co aĩ —jei—. ³⁴ Añete che jae peve, cua ivi pe añave yugüireco vae reta ndarau opa umano ndei opaete cua mbaembae uyeyapo mbove —jei—. ³⁵ Ara jare ivi opata, ĩrei chiñee ndarau opa —jei—.

³⁶ Ērei mbaeti quía uicuaa mbae ara pe ani mbae ora pe yepe cua uyeyapota, jaëno cheRu. Ángel ara pe ñugüinoi vae reta uicuaa'ã. Che co jae Tumpa Tai. Ērei che ave aicuaa'ã —jei—. ³⁷ Noé ico rambueve, ivi pegua reta uyapo icavi mbae vae. Jae ramiño vi che cuimbaerã ayeyapo vae ayu ye yave, ivi pegua reta uyapota icavi mbae vae —jei—. ³⁸ Ndei iporu guasu ou mbove, ivi pegua reta ucaruñoi jare ucauñoi yugüireco, jare jecuaëno cuimbae reta umenda cuñatai reta ndive jare tu reta umee tayi reta cuimbae reta pe umenda jae ndive vaerã. Ērei penti ara Noé uique jocua chalana guasu pe —jei—. ³⁹ Jare uyepocouca reta, iporu guasu ou yave. Jáeramo iporu guasu opa uyuca reta. Jucuarãita vi uyeyapo che cuimbaerã ayeyapo vae ayu ye yave —jei—. ⁴⁰ Jocua ara mocui cuimbae imeta co pe ñugüinoi. Penti vae uyereraacata jare ñru vae upitata co pe —jei—. ⁴¹ Jae ramiño vi mocui cuña umbaesota ñugüinoi penti angüa pe. Penti vae uyereraacata jare ñru vae upitata —jei—. ⁴² Jáeramo jecuaëno peãro. Echa'ã picuaa'ã mbae ara pe ayu yeta. Che co jae peYa —jei—. ⁴³ Aipota picuaa vaerã cua: Penti tenta iya uicuaa yave mbae ora pe outa uvãe imonda vae oñomi vaerã imbaembae jenta güi, uñemicuatirota tãi jare ndarau tãi umaëno imonda vae re güiraa vaerã imbaembae chugüi —jei—. ⁴⁴ Jae ramiño vi pe reta peãro, agüiye vaerã che cuimbaerã ayeyapo vae ayu ye avãe piyandareco'ã pãi yave —jei—.

Uyeyocui vae uyapo'a ipatrón jei vae
(Lc 12.41-48)

⁴⁵ Penti uyeyocui vae iyaracuaa vae uyapo ipatrón jei chupe uyapo vaerã vae. Jare ipatrón umee chupe ico vaerã ñru jembiocui reta juvicharã, jare umee vaerã chupe reta jembiurã opa ara —jei—. ⁴⁶ Ipatrón ou ye uvãe yave jenta pe, uecha yave jocua jembiocui uyapo oĩ iparaviqui, jocua jembiocui uyeroviata co —jei—. ⁴⁷ Añete che jae peve, ipatrón umeeta chupe uyandareco vaerã opaete imbaembae re —jei—. ⁴⁸ Ērei aramo uyeyocui vae uyapo icavi mbae vae jare jei iyupe ipia pe: 'Chepatrón ndarau ou ye imambae.' ⁴⁹ Jare umbipi uinupa ñru uyeyocui vae reta, jare ucaru jare ucau usavipo vae reta ndive —jei—. ⁵⁰ Jayave penti ara ipatrón ou yeta uvãe jembiocui uyandareco'ã oĩ yave. Jocu ora pe etei ipatrón uipocouta —jei—. ⁵¹ Jayave ipatrón uiporaracata chupe jare omondota ico vaerã opaete ñru upurumbitavi vae reta ndive. Joco pe uyaota jare jãi umbiquiririuta —jei—.

25

Diez cuñatai cuimbae güireco'ã etei vae reta

¹ Mboroyocua ara pegua diez cuñatai cuimbae güireco'ã etei vae reta rami co. Penti penti cuñatai güiraa ilámpara oë ou ñeovãiti vaerã cuimbae umendata vae ndive —jei—. ² Jare pandepo jocua cuñatai reta iyaracuaa, jare ñru pandepo vae reta iyaracuaa mbae vae —jei—. ³ Jocu iyaracuaa mbae vae reta güiraa ilámpara, ãrei güiraa'ã aceite lámpara peguarã —jei—. ⁴ Ērei iyaracuaa vae reta güiraa vi aceite lámpara peguarã aceite jiru pe —jei—. ⁵ Jare ndeño ou uvãe cuimbae umendata vae. Jáeramo opaete cuñatai reta jopei jare oue —jei—.

⁶ Jare piare mbite yave uyendu ñee. 'Mase, outa ma uvãe cuimbae umendata vae. Pecua peovãiti' —jei, jei—. ⁷ Jayave opaete jocua cuñatai reta upãa jare uyapicatu ilámpara —jei—. ⁸ Jare cuñatai iyaracuaa mbae vae reta jei cuñatai iyaracuaa vae reta pe: 'Pemea mi oreve michi peaceite. Echa'ã orelámpara ove ma' —jei reta, jei—. ⁹ Ērei cuñatai iyaracuaa vae reta jei: 'Numee yave peve, ndarau ndipo uepiti oreve. Icavi ndipo pe reta peo vaerã aceite umee vae reta pe pegua vaerã piyupe' —jei reta, jei—. ¹⁰ Jare cuñatai iyaracuaa mbae vae reta yugüiraa aceite ueca rambueve, ou uvãe cuimbae umendata vae. Jare cuñatai iyaracuaa vae reta uique jae ndive menda uyeyapo oĩ vae pe. Jayave onque uyeyuquenda —jei—.

¹¹ Jare taicue rupi yugüeru uvãe jocua ñru cuñatai reta jare jei: 'Oreya, oreya, ipea oreve onque.' ¹² Ērei cuimbae jei chupe reta: 'Añete che jae peve, pucuaa'ã.'

¹³ Jáeramo jecuaëno peãro. Echa'ã picuaa'ã mbae ara pe jare mbae ora pe che cuimbaerã ayeyapo vae ayu yeta —jei—.

Talento reta
(Lc 19.11-27)

¹⁴ Tamijaanga penti cuimbae iivi güi ambie ivi mbiri oĩ vae pe oota vae. Ndei oo mbove, ueni jembiocui reta jare jei chupe reta uyandareco vaerã imbaembae re —jei—. ¹⁵ Jayave umee penti jembiocui pe pandepo corepoti talento jee vae. Jare umee ñru jembiocui pe mocui talento. Jare umee ñru jembiocui pe penti talento. Echa'ã umee chupe reta penti penti ipuereta uyapo vae rupi. Jayave cuimbae oo ambie ivi coti —jei—. ¹⁶ Jayave pandepo talento güinoi vae umbipi umimbaraviqui icorepoti, jare jucuarã umiñru jocua pandepo talento ndive pandepo ye —jei—. ¹⁷ Jae ramiño vi mocui talento güinoi vae umbipi umimbaraviqui icorepoti, jare jucuarã umiñru jocua mocui talento ndive mocui ye —jei—. ¹⁸ Ërei penti talento güinoi vae oo oyoo ivi jare oñomi ivigüi pe corepoti ipatrón umee chupe vae —jei—.

¹⁹ Jare ima ma yave jocua uyeyocui vae reta ipatrón ou ye uvãe iivi pe jare upirandu chupe reta mbae ra uyapo icorepoti umee chupe reta vae pe —jei—. ²⁰ Jare tenonde yave pandepo talento güinoi vae güeru jocua pandepo talento ñru pandepo talento umiñru vae reve, jare jei ipatrón pe: 'Patrón, nde neme cheve pandepo talento. Mase, amiñru jae reta ndive pandepo talento ye' —jei, jei—. ²¹ Jayave ipatrón jei chupe: 'Icavi ndiyapo. Nde co jae cherembiocui icavi vae. Ndiyeyocui cavi cheve cua mbovi vae re. Jáeramo tamee ndive jeta mbaembae ndiyandareco jese vaerã. Iyerovia che ndive' —jei, jei—. ²² Jae ramiño vi tenonde yave mocui talento güinoi vae ou jei ipatrón pe: 'Patrón, nde neme cheve mocui talento. Mase, amiñru jae reta ndive mocui talento ye' —jei, jei—. ²³ Jayave ipatrón jei chupe: 'Icavi ndiyapo. Nde co jae cherembiocui icavi vae. Ndiyeyocui cavi cheve cua mbovi vae re. Jáeramo tamee ndive jeta mbaembae ndiyandareco jese vaerã. Iyerovia che ndive' —jei, jei—. ²⁴ Jayave tenonde yave penti talento güinoi vae ou jei ipatrón pe: 'Patrón, che nducuaa co. Aicuaa nde co jae penti cuimbae jecopochi vae. Nde nepiro mbaembae ñru vae reta güi, jare ndeaviro ñru vae reta oñoti vae' —jei, jei—. ²⁵ 'Jáeramo aquiye ndegüi ramo, aa añomi ndecorepoti ivigüi pe. Mase, co oĩ nembae' —jei, jei—. ²⁶ Jayave ipatrón jei chupe: 'Nde co jae cherembiocui icavi mbae vae. Nde aqui co. Nde ndicuaa quirã apiro mbaembae ñru vae reta güi jare quirã avairo ñru vae reta oñoti vae' —jei, jei—. ²⁷ 'Jáeramo nderaata tẽi checorepoti banco pe. Echa'ã jucuarã ndiyapo yave, ayu ye yave nemeeta tẽi co cheve corepoti amee ndeve vae jare mbovi ye banco pegua reta umiñruta tẽi jae ndive vae' —jei, jei—. ²⁸ Jayave ipatrón jei jembiocui reta pe: 'Pepiro chugüi jocua penti talento emee diez talento güinoi vae pe' —jei, jei—. ²⁹ 'Echa'ã güinoi vae pe uñemiñruta. Jeta eteta güinoi. Ërei mbaeti güinoi vae güi mbovi ete güinoi vae uyeequita' —jei, jei—. ³⁰ 'Ërei pemombo cua cherembiocui uyeyocui cavi'ã cheve vae oca pe pĩtumimbi oĩ vae pe. Joco pe uyaota jare jãi umbiquiririuta' —jei, jei—.

Opaete ivi pegua reta uñeaãcata

³¹ Che cuimbaerã ayeyapo vae ayu ye yave ayembiadoraca vaerã, opaete ángel uñeñoño tee Tumpa peguarã vae reta yugüeruta che ndive. Jayave aguapita cheguapia yembiadora pegua pe —jei—. ³² Jare uyembatita cherovai opaete ivi pegua reta. Jare ambiyaota amocue vae ñru vae reta güi, penti cuimbae umbiyao iovecha reta icapura reta güi rami —jei—. ³³ Jare añonocata ovecha reta cheacata coti jare capura reta cheaso coti —jei—. ³⁴ Che co jae Mburuvicha Guasu. Jaeta cheacata coti ñugüinoi vae reta pe: 'Peyu pico mboroyocua ivi uyeyapo güive uñemicuatiro peve vae pe. CheRu pemivendise ma' —jaeta, jei—. ³⁵ 'Echa'ã chiyembai yave, pemee acarú. Cheúe aico yave, pemee jau i. Yepe tẽi che co jae ambie ivi pegua, Ërei pemaño vite cheré aico vaerã perenta pe' —jaeta, jei—. ³⁶ 'Chenani yave, pemee cheve cheremimonderã. Chembaerasi yave, pepou chepi. Peresorirú pe aĩ yave, peyu pepou chepi' —jaeta, jei—. ³⁷ Jayave jupi vae reta jeita cheve: 'OreYa, ¿quirã yave pa nduecha ndiyembai yave jare numee ndecaru? ¿Quirã yave pa nduecha ndeite yave jare numee ndeu i?' —jeita, jei—. ³⁸ '¿Quirã yave pa nduecha penti ambie ivi peguarã ndico yave, jare numaeño nderé ndico vaerã orenta pe? ¿Quirã yave pa nduecha nenani jare numee ndeve nderemimonderã?' —jeita, jei—. ³⁹ '¿Quirã yave pa nduecha nembraerasi ani peresorirú pe jare ndopou ndepi?' —jeita, jei—. ⁴⁰ Jayave che jaeta chupe reta: 'Añete che jae peve, jucuarã piyapo cheriví reta pe, yepe tẽi uñereriroca. Jare jucuarã piyapo yave, piyapo co cheve vi' —jaeta, jei—.

⁴¹ Jayave jaeta cheaso coti ñugüinoi vae reta pe: 'Pesiri chegüi pecua tata opa mbae vae pe. Jocua tata uñemicuatiro ma oĩ añu guasu jare opaete ángel chupe uyeyocui vae

reta pe. Tumpa uiporacata peve' —jaeta, jei—. ⁴² 'Echa'ā chiyembai yave, pemee'ā acaru. Cheúe yave, pemee'ā i jau' —jaeta, jei—. ⁴³ 'Che co jae ambie ivi pegua jare pemaño'ā cheré aico vaerā perenta pe. Chenani yave, pemee'ā cheve cheremimonderā. Chemaerasi yave jare peresoriru pe aī yave, pepou'ā chepi' —jaeta, jei—. ⁴⁴ Jayave jae reta vi jeita cheve: 'OreYa, ¿quirāi yave pa nduecha ndiyembai yave, ani ndeúe yave, ani ambie ivi peguarā ndico yave, ani nenani yave, ani nemaerasi yave, ani peresoriru pe neī yave, jare nombori'ā?' —jeita, jei—. ⁴⁵ Jayave che jaeta chupe reta: 'Añete che jae peve, pembori'ā cherivi uñereriroca vae reta. Jare jucuarāi co chembori'ā' —jaeta, jei—. ⁴⁶ Jare cua reta yugüiraata tata guasu pe. Joco pe uiporata reta jaeño mai pegua. Ërei jupi vae reta güinoita tecove opa mbae vae —jei.

26

Uipota reta uyucaca Jesús

(Mr 14.1-2; Lc 22.1-2; Jn 11.45-53)

¹ Jare opaete cua jei ma yave, Jesús jei jemimboe reta pe:

² —Picuaa mocui araño ma co uata pascua iara uvæ vaerā, jare che cuimbaerā ayeyapo vae añemecata co ayecutuca vaerā —jei.

³ Jare sacerdote reta itenondegua reta jare tenta guasu pegua reta itenondegua reta uyembati sacerdote tenondegua joca pe. Sacerdote tenondegua jee co Caifás. ⁴ Jare uyemboemboe reta quirāi ipuere uipisi viari Jesús uyucaca vaerā. ⁵ Ërei jei reta:

—Agüiye yaipisi pascua ara rupi, agüiye vaerā tenta guasu pegua reta uyapo tecorai.

Cuña upiyere mbae ipiche cavi vae Jesús re

(Mr 14.3-9; Jn 12.1-8)

⁶ Jare Jesús oī rambueve tenta guasu-rai Betania pe Simón ipire ocuise vae jenta pe, ⁷ uique penti cuña. Jae güeru iru-rai ita alabastro jee vae pegua. Cua iru-rai tinee mbae ipiche cavi vae jepi vae pe. Jare cuña upiyere mbae ipiche cavi vae Jesús inñaca re, Jesús mesa pe uguapi oī rambueve. ⁸ Jare Jesús jemimboe reta cua uecha yave, pochi cuña pe. Jei reta:

—¿Maera pa umicañitei? ⁹ Echa'ā umee yave corepoti re, guinoita tēi jeta corepoti umee vaerā iparavete vae reta pe —jei reta.

¹⁰ Ërei Jesús uicuaa jei reta vae, jare jei chupe reta:

—¿Maera pa pemambeco cuña? Icavi vae co uyapo cheve —jei—. ¹¹ Echa'ā yugüirecoñotai co iparavete vae reta pe reta ndive, Ërei che ndarau aicoño pe reta ndive —jei—. ¹² Cua mbae ipiche cavi vae upiyere cheré vae pe chembipiche cavi ma, ndei añeñotica mbove —jei—. ¹³ Añete che jae peve, opaete ivi rupi ñee icavi vae jerācua vae rupi, cua uyapo vae vi jerācuata, ñru vae reta imandúa vaerā jese —jei.

Judas umeeta Jesús

(Mr 14.10-11; Lc 22.3-6)

¹⁴ Jayave jocua doce jemimboe reta güi penti Judas Iscariote jee vae oo sacerdote reta itenondegua reta ñugüinoi vae pe, ¹⁵ jare jei chupe reta:

—¿Mbae pa pemeeta cheve, amee yave Jesús peve?

Jayave jae reta jei umeeta co chupe treinta corepoti. ¹⁶ Jayave jocua güiive Judas ueca quirāi ipuere umee Jesús chupe reta.

Jesús ucaru jemimboe reta ndive

(Mr 14.12-25; Lc 22.7-23; Jn 13.21-30; 1 Cor 11.23-26)

¹⁷ Jare jocua ara judío reta umbipi jou mbiyape ovu mbae vae yave, Jesús jemimboe reta yugüeru jei chupe:

—¿Quíape pa ndipota nduyapicatu vaerā, tembíu pascua pegua ndeu vaerā?

¹⁸ Jayave Jesús jei chupe reta:

—Pecua tenta guasu pe pere cuimbae amimbeu peve vae pe: 'Oporomboe vae jei: Ora uvæ ma. Jauta tembíu pascua pegua nerenta pe cheremimboe reta ndive' —jei, pere chupe, jei.

¹⁹ Jayave jemimboe reta uyapo Jesús jei chupe reta uyapo vaerā vae. Jare uyapo reta tembíu pascua pegua jou reta vaerā.

²⁰ Jare pĩtu ma yave Jesús uguapi ucaru vaerã jocua doce jemimboe reta ndive. ²¹ Jare ucaru ñugüinoi rambueve, Jesús jei chupe reta:

—Añete che jae peve, penti pepite pe oĩ vae chemeeta cherovaicho reta pe.

²² Jayave jae reta ipiatiti, jare jei Jesús pe penti penti rupi:

—CheYa, ¿che pa co jae?

²³ Jayave Jesús jei chupe reta:

—Mbiyape umãqui oĩ che ndive plato pe vae co jae. ²⁴ Che cuimbaerã ayeyapo vae añotai amano vaerã, uyecuatía oĩ cheregua rami. Ērei jocua cuimbae chemeeta vae uiporarata co. Icavi tẽi mona jocua cuimbae mbaeti ico yave —jei.

²⁵ Jayave Judas (Jesús umee vae) jei chupe:

—Oporomboe vae, ¿che pa co jae?

—Ndere ma co —jei Jesús chupe.

²⁶ Jare ucaru ñugüinoi rambueve, Jesús uipisi mbiyape, jare umee yasurupai Tumpa pe. Jayave upisãa mbiyape jare umee jemimboe reta pe.

—Peu —jei chupe reta—. Cua co jae cherete —jei.

²⁷ Jayave Jesús uipisi vi penti copa, jare yasurupai umee ye yave Tumpa pe, umee jemimboe reta pe.

—Peu opaete pe reta —jei—. ²⁸ Cua co jae cherugüi. Cherugüi uyepiyereta, Tumpa jei piau ye vae uyeyapo vaerã, jare Tumpa umbiasa vaerã jeta vae pe imbaeyoa reta —jei—.

²⁹ Ērei che jae peve, ndarau ma jau uva ticuecue, cheRu iporoyocua pe uva ticuecue ipiau vae pe reta ndive jau regua —jei.

Pedro uicuacuta Jesús

(Mr 14.26-31; Lc 22.31-34; Jn 13.36-38)

³⁰ Jare opa yave ucanta reta Tumpa pe, oẽ reta yugüiraa ivitu guasu Olivos coti.

³¹ Jayave Jesús jei chupe reta:

—Opaete pe reta chereyata cua pĩtu. Echa'ã Tumpa iñee pe uyecuatía oĩ cuarãi: 'Ayucata ovecha reta iyandarecoa, jare ovecha reta opata uñemiai.' Jucuarãi uyecuatía oĩ —jei—. ³² Ērei aicove ye ayu yave umanocue vae reta ipite güi, aata perenonde Galilea pe —jei.

³³ Jayave Pedro jei Jesús pe:

—Yepe tẽi opaete ĩru reta tandereya, ěrei che ndarau ndueya.

³⁴ —Añete che jae ndeve —jei Jesús chupe—, cua pĩtu etei, ndei uru cuimbae uñee mbove, mbapi vese ma checuacuta —jei.

³⁵ Ērei Pedro jei chupe:

—Yepe tẽi tamano nde ndive, ěrei ndarau nducuacu.

Jare jucuarãi vi jei opaete Jesús jemimboe reta.

Jesús uyerure Getsemaní pe

(Mr 14.32-42; Lc 22.39-46)

³⁶ Jayave Jesús oo jae reta jupíe uvãe Getsemaní pe. Jare Jesús jei jemimboe reta pe:

—Peguapi cua pe, che aa pea pe ayerure Tumpa pe rambueve.

³⁷ Jayave güiraa Pedro jare jocua mocui Zebedeo tai reta, jare umbipi ipiatiti jare uiporara. ³⁸ Jayave jei jocua mbapi jemimboe reta pe:

—Tuicha chepiatiti, jare amano pota echa. Pepita cua pe, jare agüiye peque —jei.

³⁹ Jayave Jesús usiri catu chugüi reta, jare uyeatica ivi re jare uyerure Tumpa pe.

—CheRu, nde ndipota yave, embiasa chegüi cua aiporarata vae. Ērei tuyeyapo cheve nde ndere vae. Agüiye tuyeyapo che jae vae —jei.

⁴⁰ Jayave Jesús ou ye jemimboe reta ñugüinoi vae pe, jare uecha oque ñugüinoi. Jayave jei Pedro pe:

—¿Peppure'ã pa penti ora yepe peque mbae peĩ chembori vaerã? ⁴¹ Agüiye peque. Piyerure Tumpa pe, agüiye vaerã peyoa. Pepia pe peratangātu co, ěrei perete iyaqui co —jei.

⁴² Jayave Jesús usiri ye uyerure Tumpa pe.

—CheRu, nde ndipota yave aiporara vaerã, tuyeyapo cheve nde ndere vae —jei.

⁴³ Jayave ou ye jemimboe reta ñugüinoi vae pe, jare uecha oque ye ñugüinoi. Echa'ã jae reta jopei ete ma.

⁴⁴ Jayave Jesús usiri ye chugüi reta uyerure Tumpa pe. Uyerure ye tenonde yave uyerure rami. ⁴⁵ Jayave ou ye jemimboe reta ñugüinoi vae pe jare jei chupe reta:

—Peque jare peputuño ma. Mase, ora uvãe ma. Che cuimbaerã ayeyapo vae penti vae chemeeta cuimbae jeco pochi vae reta pe —jei—. ⁴⁶ Pepüa. Yaaño ma. Mase, chemeeta vae coiño ma ou —jei.

Uipisi reta Jesús

(Mr 14.43-50; Lc 22.47-53; Jn 18.2-11)

⁴⁷ Jare uyemingueta oĩ rambueve, ou Judas - jae co jocua doce vae güi penti. Jeta vae yugüeru jae ndive iquisepucu reve jare iivira reve reve. Sacerdote reta itenondegua reta jare tenta guasu pegua reta itenondegua reta ombou Jesús pe cua reta. ⁴⁸ Jare umeeta vae umimbeu ma ñru reta pe mbae uyapota vae. Jei ma chupe reta:

—Jocua ayurupiteta vae co jae. Pipisi curi —jei.

⁴⁹ Judas ou voi Jesús oĩ vae pe.

—Pĩtu ma, oporomböe vae —jei chupe.

Jayave uyurupite.

⁵⁰ Jayave Jesús jei chupe:

—Cheamigo, ¿maera pa ndiyapo jucuarãi?

Jayave ñru reta yugüeru uipisi Jesús. ⁵¹ Jare penti Jesús ndive oĩ vae uipisi iquisepucu jare uequi jiru güi, jare uiporu sacerdote tenondegua jembiocui inambi re, jare uyasia inambi chugüi. ⁵² Jayave Jesús jei chupe:

—Ñono ye quisepucu jiru pe. Echa'ã opaete quisepucu uiporu vae reta uyeyucacata quisepucu pe —jei—. ⁵³ Aipota yave, chepuere ayerure cheRu pe ombou voi vaerã jeta ángel reta cherepi vaerã. ¿Ndicuaa'ã pa cua? —jei—. ⁵⁴ Èrei jucuarãi yave, ¿quirãita pa uyeyapo Tumpa ñnee pe uyecuatía oĩ vae? Echa'ã jei jucuarãita co uyeyapo cheve —jei.

⁵⁵ Jayave Jesús jei yugüeru vae reta pe:

—¿Maera pa peru quisepucu reta jare ivira reta chepisi vaerã, imonda vae pipisi vae rami? Opa ara aguapi pe reta ndive Tumpa jo pe. Joco pe aporomböe, jare chepisi'ã —jei—. ⁵⁶ Èrei opaete cua uyeyapo oĩ Tumpa ñnee aracaie umimbeu vae reta uicuatía vae uyeyapo vaerã —jei.

Jayave opaete jemimboe reta ueya Jesús, jare opa osi.

Jesús uyemboi jovaicho reta jovai

(Mr 14.53-65; Lc 22.54, 63-71; Jn 18.12-14, 19-24)

⁵⁷ Jayave Jesús uipisi vae reta güiraa sacerdote tenondegua Caifás jenta pe. Jare joco pe uyembati ma mboroyocui re oporomböe vae reta jare tenta guasu pegua reta itenondegua reta. ⁵⁸ Jare Pedro oo vi Jesús jaicue. Èrei mbiriño oo chugüi. Jae uique sacerdote tenondegua joca pe, jare uguapi sacerdote tenondegua jembiocui reta ndive, uecha vaerã mbae uyeyapota vae. ⁵⁹ Jare sacerdote reta itenondegua reta jare opaete ñru mburuvicha reta ueca quía uñeapo vaerã Jesús re iyapu reve, uyucaca vaerã. ⁶⁰ Èrei uvãe'ã reta teco jese, yepe tẽi jeta vae iyapu reve uñeapo jese. Taicue rupi mocui vae iyapu reve uñeapo jese. ⁶¹ Jae reta jei:

—Cua cuimbae jei: 'Chepuere ambusururu Tumpa jo jare ayapo ye mbapi ara pe' —jei, jei reta.

⁶² Jayave sacerdote tenondegua upüa uyemboi jare upirandu Jesús pe:

—¿Maera pa niñee nemo'e'ã? ¿Mbae re pa cua reta uñeapo nderé? —jei.

⁶³ Èrei Jesús quiñño. Jayave sacerdote tenondegua upirandu ye chupe:

—¿Nde pa co jae Cristo, Tumpa ombou vae? ¿Nde pa co jae Tumpa Tai? Che ndoyocui Tumpa jecuaeño ico vae jee re nemimbeu vaerã oreve —jei.

⁶⁴ Jayave Jesús jei chupe:

—Nde ndere rami jae co che. Èrei che jae peve, che cuimbaerã ayeyapo vae cherechata co aguapi aĩ Tumpa mbaepuere güinoi vae iyipi pe iyacata coti. Cherechata ví ayu amapĩtu reve ara güi —jei.

⁶⁵ Jayave sacerdote tenondegua cua uyandu yave, pochi ramo omondoro jemimondei, jare jei:

—Jei ma icavi mbae vae Tumpa coti. ¿Maera ma pa yaeca yeta ĩru vae reta uñeapo vaerã jese? Mase, pe reta piyandu ma icavi mbae vae jei Tumpa coti —jei—. ⁶⁶ ¿Mbae pa pere añave? —jei.

Īru reta jei chupe:

—Icavi'ã co. Icavi co yayucaca vaerã —jei reta.

⁶⁷ Jayave amocue vae undivĩ Jesús jova re, jare uinupa. Jare ĩru vae reta ocua jese, ⁶⁸ jare jei chupe:

—Nde co jae Cristo, Tumpa ombou vae yave, emimbeu oreve quía ra ocua oĩ nderé.

Pedro uicuaqu Jesús

(Mr 14.66-72; Lc 22.56-62; Jn 18.15-18, 25-27)

⁶⁹ Jare Pedro uguapĩ oĩ oca pe. Jare penti cuñatai ou jei chupe:

—Nde vi co jae Jesús Galilea pegua ĩru.

⁷⁰ —Che jae ĩru'ã co —jei Pedro opaete vae jovaque—. Aicuaa'ã mbae ndere vae —jei.

⁷¹ Jayave Pedro oo onque tuicha vae coti. Jare ĩru cuñatai uecha jare jei joco pe ñugüinoi vae reta pe:

—Cua cuimbae co jae penti Jesús Nazaret pegua ĩru.

⁷² Ĕrei Pedro jei ye:

—Che jae ĩru'ã co. Tumpa jee re aicuaa'ã jocua cuimbae —jei.

⁷³ Jare ndei ima mbove joco pe ñugüinoi vae reta yugüeru jei Pedro pe:

—Añete co, nde co jae penti Jesús ĩru. Echa'ã nde ndiyemingueta Jesús ĩru reta uyemingueta vae rami —jei reta.

⁷⁴ Jayave Pedro jei Tumpa jee re:

—Tumpa tuiporaraca cheve cua jae vae añetete'ã yave. Aicuaa'ã jocua cuimbae.

Jare Jupivoi uru cuimbae uñee. ⁷⁵ Jare Pedro imandúa Jesús jei chupe vae re: “Ndei uru cuimbae uñee mbove, mbapĩ vese ma checuacuta.” Jayave Pedro oẽ joco güi, jare tanta ipiatiti reve uyao.

27

Jesús uyemboi Pilato jovai

(Mr 15.1; Lc 23.1-2; Jn 18.28-32)

¹ Jare cõe ma yave, opaete sacerdote reta itenondegua reta jare tenta guasu pegua reta itenondegua reta uyemboemboe Jesús re, uyucaca vaerã. ² Jayave uipocua Jesús jare güiraa mburuvicha guasu Poncio Pilato pe umee.

Judas imano

³ Jayave Judas (Jesús umee vae) ipiatiti uyapo vae re. Echa'ã uicuaa ma quirãi Jesús jovaicho reta umbijeco ma Jesús. Jayave güiraa ye jocua treinta corepoti sacerdote reta itenondegua reta jare tenta guasu pegua reta itenondegua reta ñugüinoi vae pe. ⁴ Jare jei chupe reta:

—Ayapo mbaeyoa. Echa'ã amee peve jocua cuimbae teco güinoi mbae vae piyucaca vaerã —jei.

Jayave jae reta jei Judas pe:

—Jocua mbae'ã co oreve. Nde co nenoĩ teco.

⁵ Jayave Judas omombo corepoti Tumpa jo pe. Jayave oẽ Tumpa jo güi oo uyeyuvi.

⁶ Jayave sacerdote reta itenondegua reta omonoo jocua corepoti jare jei:

—Jupĩ'ã co ñañoño ye vaerã cua corepoti jiru Tumpa jo pe oĩ vae pe. Echa'ã ñamee Judas pe yandepuere vaerã yayucaca Jesús —jei reta.

⁷ Jayave uyemingueta reta uicuaa vaerã mbae ra uyapota corepoti pe. Jayave ogua ñaeu iyapoa iivi, uñeñotica vaerã joco pe ambie ivi pegua reta. ⁸ Jãeramo umbijee jocua ivi: İvi tugüi jepicue.

⁹ Jare jucuarãi uyeyapo Tumpa iñee araca umimbeu vae Jeremías jei vae. Echa'ã jae jei cuarãi: “Jare jae reta omonoo jocua treinta corepoti. Echa'ã Israel pegua reta umbiepi treinta corepoti jocua cuimbae re. Jepi co treinta corepoti. ¹⁰ Jayave ogua pipe ñaeu iyapoa ico, yandeYa jei cheve rami.” Jucuarãi jei.

Pilato uyemingueta Jesús ndive

(Mr 15.2-5; Lc 23.3-5; Jn 18.33-38)

¹¹ Jare Jesús uyemboi mburuvicha guasu jovai. Jayave mburuvicha guasu upirandu chupe:

—¿Nde pa co jae judío reta juvicha guasu? —jei.

—Nde ndere rami jae co che —jei Jesús chupe.

¹² Jare sacerdote reta itenondegua reta jare tenta guasu pegua reta itenondegua reta uñeapo Jesús re yave, Jesús jei'ã mbae ave. ¹³ Jayave Pilato jei chupe:

—¿Ndiyandu'ã pa quirãi jeta mbaembae re uñeapo reta nderé?

¹⁴ Ërei Jesús jei'ã mbae ave chupe. Jáeramo mburuvicha guasu ipiacañi jese.

Pilato jei Jesús umanota co

(Mr 15.6-20; Lc 23.13-25; Jn 18.38-19.16)

¹⁵ Jare pascua ara rupi Pilato oyoracañoi penti pereso tenta guasu pegua reta uipota vae. ¹⁶ Jare peresoriru pe oĩ penti cuimbae jerãcua vae. Jee co Barrabás. ¹⁷ Jayave Pilato upirandu yati vae reta pe:

—¿Pipota pa ayoraca vaerã peve Barrabás ani Jesús, Cristo jee vae?

¹⁸ Echa'a'ã jae uicuaa judío reta umee Jesús chupe ñacatãa jese ramo.

¹⁹ Jare Pilato uguapí oĩ yave uãa vaerã Jesús, jembireco ombou quía jei vaerã chupe:

—Agüiye iyapo mbae jocua cuimbae jupí vae pe. Echa'a'ã aiporara ma piare chepau pe jae jeco pegua.

²⁰ Ërei sacerdote reta itenondegua reta jare tenta guasu pegua reta itenondegua reta omboemboe yati vae reta uyerure vaerã Pilato pe oyoraca vaerã Barrabás jare uyucaca vaerã Jesús. ²¹ Jayave Pilato upirandu chupe reta:

—¿Quía nunga pa cua mocui cuimbae güi pipota ayoraca vaerã peve?

—Barrabás —jei reta chupe.

²² Jayave Pilato upirandu chupe reta:

—Jucuarãi yave, ¿mbae pa pipota ayapo vaerã Jesús, Cristo jee vae pe?

Jayave opaete vae jei:

—Tuyecutuca curusu re.

²³ Ërei Pilato upirandu chupe reta:

—¿Mbae icavi mbae vae pa uyapo?

Ërei jae reta iñeeãta reve jei:

—Tuyecutuca curusu re.

²⁴ Jare Pilato uicuaa yave ipuere'ã mbae uyapo oyoraca vaerã Jesús - echa'a'ã judío reta umbipi uyapo tecorai - jei güeru vaerã chupe i jare uyepoe yati vae reta jovai. Jayave jei chupe reta:

—Che anoi'ã teco cua cuimbae jupí vae imano re. Pe reta penoi teco —jei.

²⁵ Jayave opaete yati vae reta jei:

—Ore jare oriñemoñaeta turugüinoi teco imano re.

²⁶ Jayave Pilato oyoraca chupe reta Barrabás. Jare uinupaca ma yave Jesús chicote pe, umee sundaro reta pe, uicutu vaerã curusu re.

²⁷ Jayave mburuvicha guasu isundaro reta güiraa Jesús palacio pe, jare umbati opaete ñru sundaro reta joco pe. ²⁸ Jayave sundaro reta omboi Jesús güi jemimonde jare omondeca chupe temimonde pita vae. ²⁹ Jayave oñope reta yurãti catuui vae jare umbapúa oñoño Jesús iñãca re. Umee reta vi chupe penti tacuarãsi uipisi vaerã ipo iyacata pe. Jayave uyeatica reta jae jovai jare oyoyai.

—¡Viva, judío reta juvicha guasu! —jei reta.

³⁰ Jare undiví reta jese. Jayave uipisi reta tacuarãsi uiporu iñãca re. ³¹ Jare opa oyoyai reta yave, sundaro reta omboi chugüi temimonde pita vae, jare omondeca ye chupe jemimondei. Jayave güiraa reta mburuvicha guasu joca güi, uicutu vaerã curusu re.

Jesús uyecutuca curusu re

(Mr 15.21-32; Lc 23.26-43; Jn 19.17-27)

³² Jare yugüiraa reta rambueve, uecha penti cuimbae Simón jee vae. (Cua Simón tenta guasu Cirene pegua co.) Jayave sundaro reta güiraa Simón pe Jesús icurusu. ³³ Jare sundaro reta güiraa Jesús Gólgata jee vae pe. (Cua uipota jei: “Acacuerenda”.) ³⁴ Jayave umee reta Jesús pe vino uyea mbae iro vae ndive vae. Ërei Jesús uicuaa yave mbae jocua, jou'ã.

³⁵ Jayave sundaro reta uicutu curusu re. Jayave uyuguari reta Jesús jemimonde re, uicuaa vaerã mbae nunga penti penti güüraa iyupe vaerã. Jucuarã uyapo reta uyeyapo vaerã Tumpa inñee aracae umimbeu vae jei vae. Echa'ã jei cuarã: “Uyuguari reta cheremimonde re, uicuaa vaerã mbae nunga penti penti güüraa iyupe vaerã.” Jucuarã jei. ³⁶ Jayave sundaro reta uguapi joco pe uyandareco vaerã Jesús re. ³⁷ Jare oñono reta curusu re Jesús inñaca iárambo uyecuatía mbae umbijeco jesegua vae: “Cua co Jesús, judío reta juvicha guasu.” ³⁸ Jare sundaro reta uicutu vi mocui imonda vae reta, jare oñono penti Jesús iyacata coti jare ñru iyaso coti.

³⁹ Jare uasa vae reta uñeãcambivava reve jei icavi mbae vae Jesús pe.

⁴⁰ —Nde ndere nembusururuta co Tumpa jo jare ndiyapo yeta mbapi ara pe —jei reta chupe—. Iyerepi. Nde co jae Tumpa Tai yave, egüeyi curusu güi —jei reta.

⁴¹ Jae ramiño vi sacerdote reta itenondegua reta jare mboroyocui re oporombocoe vae reta jare tenta guasu pegua reta itenondegua reta oyoyai.

⁴² —Jae uepi ñru vae reta —jei reta—. Èrei ipuere'ã jae uyerepi. Jae co Israel pegua reta juvicha guasu yave, tugüeyi añave curusu güi, yarovia vaerã jese —jei reta—. ⁴³ Güürovia Tumpa re; Tumpa tuepi añave, uipota yave. Echa'ã jae jei: ‘Che co jae Tumpa Tai’ —jei, jei reta.

⁴⁴ Jare imonda vae Jesús ndive uyecutuca vae reta jei icavi mbae vae chupe.

Jesús umano

(Mr 15.33-41; Lc 23.44-49; Jn 19.28-30)

⁴⁵ Jare guarasi ara mbíte güiive mbapi ora rupi uñemipñitumimbi opaete ivi pe. ⁴⁶ Jayave mbapi ora ma caaru yave Jesús inñeãta reve jei:

—Elí, Elí, ¿lama sabactani? (Cua uipota jei: “CheTumpa, cheTumpa, ¿maera pa chereya?”)

⁴⁷ Amocue joco pe ñugüinoi vae reta uyandu jare jei tõi:

—Mase, Elías ueni.

⁴⁸ Jare jupivoi penti vae osi oo umãqui esponja vinagre pe, jare oñono tacuarãsi re, jare omondo Jesús iyuru coti. ⁴⁹ Èrei ñru reta jei:

—Èãro. Yaecha ou Elías umbigüeyi vaerã.

⁵⁰ Jayave Jesús tanta usapicai, jare umano.

⁵¹ Jayave Tumpa jo umbiyao vae osoro mbíte rupi ivate güi ivi coti. Jare ivi ucãta jare itape reta ovo. ⁵² Jare teögüeriru reta uyepea, jare jeta uñeñoño tee Tumpa peguarã umanocue vae reta icove ye, ⁵³ jare oẽ teögüeriru reta güi Jesús icove ye yave ou umanocue vae reta ipite güi. Jae reta yugüüraa Jerusalén pe jare uyecuaa jeta vae pe.

⁵⁴ Jare sundaro reta juvicha Jesús re uyandareco oĩ vae jare jae ndive ñugüinoi vae reta uecha yave quirã ivi ucãta jare opaete uyeyapo vae, uquiye ete jare jei:

—Añeteñoi yepe, cua cuimbae co jae Tumpa Tai.

⁵⁵ Jare jeta cuña reta umaẽ ñugüinoi mbiri güi. Cua cuña reta yugüeru Jesús ndive Galilea güi uyeyocui vaerã chupe. ⁵⁶ Cua reta ipite pe ñugüinoi María Magdalena, jare Jacobo jare José ichi María jee vae, jare Zebedeo tai reta ichi.

José oñono Jesús jetecue teögüeriru pe

(Mr 15.42-47; Lc 23.50-56; Jn 19.38-42)

⁵⁷ Jare guarasi uique ma yave, penti cuimbae icocatu vae tenta guasu Arimatea pegua José jee vae - jae vi co penti Jesús jemimboe - ⁵⁸ oo Pilato pe, jare uyerure chupe Jesús jetecue re. Jayave Pilato oyocui uñemee vaerã chupe Jesús jetecue. ⁵⁹ Jayave José umbigüeyi Jesús jetecue, jare oñoma penti nieso iquia mbae vae pe. ⁶⁰ Jayave oñono penti teögüeriru ipiau vae itape uyeyoo vae pe, (José imbae co jocua teögüeriru) jare umbiyapayere ita tuicha vae teögüeriru jonque re. Jayave José oo ye teögüeriru güi. ⁶¹ Jare María Magdalena jare ñru cuña María jee vae uguapi ñugüinoi teögüeriru jovai.

Sundaro reta uyandareco teögüeriru re

⁶² Jare jocua ara opaete judío reta uyeyapicatu ñugüinoi piareve peguarã. Jayave piareve pe sacerdote reta itenondegua reta jare fariseo reta yugüüraa Pilato pe, ⁶³ jare jei chupe:

—Oreruvicha, oremandúa ma quirã jocua cuimbae upurumbitavise vae ndei umano mbove jei mbapi ara rupi icove yeta ou umanocue vae reta ipite güi. ⁶⁴ Iyocui ndesundaro

reta uyandareco vaerā teōgüeriru re mbapi ara pegua, agüiye vaerā jemimboe reta yugüiraa joco pe p̄itu yave oñomi vaerā jetecue. Echa'ā jucuarāi yave, jeita reta opaete vae pe icove ye ma co ou umanocue vae reta ipite güi. Jare jucuarāi yave, jae reta umbitavita jeta Jesús umbitavi vae reta güi —jei reta.

⁶⁵Jayave Pilato jei chupe reta:

—Joco pe penoi chesundaro reta. Pecua pembiyandarecoca cavi jese pepuere rupi —jei.

⁶⁶Jayave jae reta yugüiraa jare uyuquenda cavi teōgüeriru jonque. Echa'ā oñono mbae ita tuicha vae re agüiye vaerā quífa uipea, jare ueya joco pe sundaro reta uyandareco vaerā teōgüeriru re.

28

Jesús icove ye

(Mr 16.1-8; Lc 24.1-12; Jn 20.1-10)

¹Mbutuu ara uasa ma yave, neimbove asi domingo ara pe María Magdalena jare ĩru cuña María jee vae yugüiraa teōgüeriru coti. ²Jare ivi tanta ucāta. Echa'ā penti ángel yandeYa pe uyeyocui vae ugüeyi ara güi jare umbisiri ita tuicha vae teōgüeriru jonque güi. Jayave ángel uguapi oĩ ita re. ³Jare jova uyecuaa ama uvera vae rami. Jare jemimonde tĩ asi roi tĩ asi vae rami. ⁴Jare teōgüeriru re uyandareco ñugüinoi vae reta uriri uquiye ramo, jare umano vae echa upita reta.

⁵Jayave ángel jei cuña reta pe:

—Agüiye pequiye. Echa'ā aicuaa peeca peĩ Jesús curusu re uyecutuca vae. ⁶Mbaeti ma cua pe oĩ. Icove ye ma ou umanocue vae reta ipite güi, jae jei rami. Peyu pemaie jendacue re —jei—. ⁷Jare pecua voi pere jemimboe reta pe: 'Jae icove ye ma ou umanocue vae reta ipite güi. Jae oota perenonde Galilea pe. Joco pe peechedata.' Amimbeu ma co peve —jei chupe reta.

⁸Jayave cuña reta oẽ voi teōgüeriru güi. Uquiye reta jare uyerovia tuicha reta. Jare osi yugüiraa umimbeu vaerā Jesús jemimboe reta pe.

⁹Jare Jesús uñeovāiti jae reta ndive jare jei chupe reta:

—Piyerovia catu.

Jayave cuña reta uyeatica ivi pe uicuāva ipi rupi jare umbiadora. ¹⁰Jayave Jesús jei chupe reta:

—Agüiye pequiye. Pecua pemimbeu cherivi reta pe yugüiraa vaerā Galilea pe. Joco pe cherechata —jei.

Sundaro reta umimbeu vae

¹¹Jare cuña reta yugüiraa ye rambueve teōgüeriru güi, amocue sundaro tenonde yave teōgüeriru re uyandareco vae reta yugüiraa vi tenta guasu pe, jare umimbeu sacerdote reta itenondegua reta pe opaete uyeyapo vae re. ¹²Jare sacerdote reta itenondegua reta uyembati tenta guasu pegua reta itenondegua reta ndive. Jare uyemboemboe ma yave, umee jeta corepoti sundaro reta pe. ¹³Jare jei chupe reta:

—Pere: 'Jesús jemimboe reta yugüiraa teōgüeriru pe p̄itu yave, jare oñomi Jesús jetecue ore ndoque noĩ rambueve' —pere, jei reta—. ¹⁴Jare mburuvicha guasu cua uicuaa yave, numimbeuta chupe pe reta mbaeti co teco penoi —jei reta.

¹⁵Jayave sundaro reta uipisi corepoti jare uyapo sacerdote reta itenondegua reta jare tenta guasu pegua reta itenondegua reta jei chupe reta uyapo vaerā vae. Jare jecuaeño opaete judío reta jei jucuarāi co uyeyapo.

Jesús oyocui jocua once jemimboe reta

(Mr 16.14-18; Lc 24.36-49; Jn 20.19-23)

¹⁶Jayave jocua once Jesús jemimboe reta yugüiraa Galilea pe penti ivitu guasu re Jesús umimbeu chupe reta vae rami. ¹⁷Jare jemimboe reta uecha yave Jesús, umbiadora. Ērei amocue vae ipuere'ā güirovia jae co Jesús vae. ¹⁸Jare Jesús ou jei chupe reta:

—Opaete mbaepuere uñemee ma cheve ara pe jare ivi pe. ¹⁹Jáeramo pecua peporombocue opaete que rupi rupi jare pembibautiza cheRu jee re jare cheree re jare Espřitu Santo jee re —jei—. ²⁰Jare pemboe reta opaete che poyocui vae re. Jare che āita pe reta ndive jaeño mai pegua cua ara reta opa regua —jei.

EL SANTO EVANGELIO SEGUN SAN MARCOS

Juan upurumbibautiza vae umimbeu Tumpa iñee

(Mt 3.1-12; Lc 3.1-20; Jn 1.19-28)

¹ Añave aicutía aī ñee icavi vae Jesucristo regua. Jesucristo co jae Tumpa Tai.

² Isaías co jae penti Tumpa iñee aracae umimbeu vae. Jae uicutía cuarāi:

“Mase” —jei Tumpa—, “che amondota chiñee güiraa vae nderenonde, uyapicatu vaerā nderaperā.

³ Jae iñeeāta reve jeita ñana pe:

‘Piyapicatu yandeYa japerā.

Pemisimi tape’ ” —jeita, jei Tumpa.

Jucuarāi uicutía Isaías. ⁴ Jđeramo Juan ou upurumbibautiza ñana pe, jare umimbeu yati ñugüinoi vae reta pe:

—Peeya piyemingueta icavi mbae vae pepia pe oī vae, jare che pumbibautizata, Tumpa umbiasa vaerā peve pembaeyoa reta —jei chupe reta. ⁵ Jare jeta ivi Judea pegua reta jare tenta guasu Jerusalén pegua reta yugüiraa Juan oī vae pe. Jare Juan umbibautiza reta iāca Jordán jee vae pe, imbaeyoa reta opa umimbeu yave. ⁶ Jare Juan jemimonde maemimba camello jee vae jaagüe pegua co, jare jumbicuaa guacapi pegua co. Jare jembú co jae tucu jare ei ñana rupigua. ⁷ Jae umimbeu yati vae reta pe:

—Cheraicue rupi outa ipuere ete chegüi vae. Jupí’ā co che chepe ayora vaerā ipipasa ichā. ⁸ Che pumbibautiza i pe, erei jae pembibautizata Espíritu Santo pe —jei chupe reta.

Juan umbibautiza Jesús

(Mt 3.13-17; Lc 3.21-22)

⁹ Jare mbovi ara rupi ou Jesús tenta guasu Nazaret ivi Galilea pegua güi. Jare Juan umbibautiza Jesús iāca Jordán pe. ¹⁰ Jare Jesús oē ye i güi yave, uecha ara uyepea oī, jare uecha vi Espíritu Santo ugüeyi jese picasu rami. ¹¹ Jayave uyendu ñee ara güi jei:

—Nde co jae cheRai nduau ete vae. Chembiyerovia ete —jei.

Satanás umingueta Jesús uyavica vaerā tēi chupe

(Mt 4.1-11; Lc 4.1-13)

¹² Jayave Espíritu Santo omondo Jesús ñana pe. ¹³ Jare upita ñana pe cuarenta ara, jare Satanás umingueta uyavica vaerā tēi chupe. Jare ico Jesús maemimba ñana rupigua reta ñugüinoi vae pe. Jare yugüero ángel reta ombori vaerā.

Jesús umbipi iparaviqui

(Mt 4.12-17; Lc 4.14-15)

¹⁴ Juan uyemiingueca ma peresoriru pe yave, oo Jesús Galilea pe, jare umimbeu ñee icavi vae Tumpa iporoyocua regua. ¹⁵ Jesús jei:

—Ara uvāe ma. Outa uvāe Tumpa iporoyocua. Peeya piyemingueta icavi mbae vae pepia pe oī vae, jare perovia Tumpa iñee icavi vae —jei.

Jesús ueni irundi cuimbae pira uipisi vae reta

(Mt 4.18-22; Lc 5.1-11)

¹⁶ Jare uguata rambueve i guasu Galilea jembei rupi, Jesús uecha Simón jare Simón tivi Andrés jee vae. Jae reta omombo ñugüinoi pisa i guasu pe, pira uipisi vaerā. Echa’ā jae reta pira uipisi vae reta co. ¹⁷ Jayave Jesús jei chupe reta:

—Peyu cherupíe, jare che chembaepuere pe pemboeta írú vae reta güirovia vaerā cheré —jei.

¹⁸ Jayave ueya reta ipisa, jare yugüiraa jae jupíe. ¹⁹ Ndei mbiri oo mbove, Jesús uecha Zebedeo tai reta. Penti jee Jacobo, jare tivi jee Juan. Uyapicatu ñugüinoi pisa reta chalana pe. ²⁰ Jare Jesús ueni voi. Jayave jae reta ueya tu chalana pe uparaviqui chupe vae reta ndive, jare yugüiraa Jesús jupíe.

Cuimbae aña oya jese vae

(Lc 4.31-37)

²¹ Jare yugüiraa uvãe tenta guasu Capernaum pe. Jare mbutuu ara pe Jesús uique judío reta itupao pe, jare joco pe oporombœ. ²² Jare uyapisaca jese vae reta ipiacañi iporombœ re. Echa'ã ombœe reta mbaeuere güinoi vae rami. Jucuarã'i'ã oporombœ mboroyocui re oporombœ vae reta. ²³ Jare uique oo tupao pe cuimbae aña oya jese vae. Jae ifñeãta reve jei:

²⁴ —¿Maera pa ndeyu oremambeco, Jesús Nazaret pegua? ¿Ndeyu pa oremicañite vaerã? Che nducuaa. Nde co jae Tumpa Tai —jei.

²⁵ Jayave Jesús uñeengata aña pe.

—¡Nequii! Esiri chugüi —jei.

²⁶ Jayave aña umbiriri ete jocua cuimbae, jare tanta jãse reve usiri chugüi. ²⁷ Jare opaete uecha vae reta ipiacañi, jare upirandu uyupe:

—¿Mbae pa co cua uyapo vae? ¡Morombœe ipiau vae ndipo! Mbaeuere pe oyocui aña reta usiri vaerã oya jese vae reta güi, jare jae reta uyapo oyocui vae —jei reta.

²⁸ Jayave imambaeño jerãcua jesegua opaete Galilea rupi.

Jesús umbigüera Pedro jaicho

(Mt 8.14-15; Lc 4.38-39)

²⁹ Jare Jesús judío reta itupao güi oë ye yave, oo Simón jare Andrés jenta pe Jacobo jare Juan ndive. ³⁰ Simón jaicho jacu oï jupa pe. Jare ñru reta umimbeu Jesús pe jesegua.

³¹ Jayave Jesús oo uipisi ipo pe, jare umupã. Jare jacu upita voi chugüi. Jayave jocua cuña umee mbae jou reta vaerã.

Jesús umbigüera jeta imbaerasi vae reta

(Mt 8.16-17; Lc 4.40-41)

³² Jare guarasi uique ma yave, tenta guasu pegua reta güeru Jesús pe imbaerasi vae reta jare aña oya jese vae reta. ³³ Jare jeta joco pegua reta uyembati jocua tenta jonque pe. ³⁴ Jayave Jesús umbigüera jeta imbaerasi vae reta ipotave mbaerasi güi, jare umbisiri jeta aña reta oya jese vae reta güi. Jare umaeño'ã aña reta re uyemingueta vaerã. Echa'ã jae reta uicuaa quía co jae.

Jesús oo ivi Galilea rupi umimbeu Tumpa ñnee

(Lc 4.42-44)

³⁵ Piareve pe Jesús upã ndei cõe mbove, jare oë oo quii ngatu vae pe. Joco pe uyerure oï Tumpa pe. ³⁶ Jayave Simón jare jae ndive ñugüinoi vae reta yugüiraa ueca. ³⁷ Jare uvãe chupe yave, jei reta Jesús pe:

—Ndereca ñugüinoi reta —jei reta.

³⁸ Jayave Jesús jei chupe reta:

—Yaa ñru tenta guasu-rai reta coiño ñugüinoi vae pe, joco pe vi amimbeu vaerã Tumpa ñnee. Echa'ã ayu cua ayapo vaerã —jei.

³⁹ Jare oo opaete ivi Galilea rupi, jare umimbeu Tumpa ñnee judío reta itupaopao rupi, jare umbisiri aña reta oya jese vae reta güi.

Jesús umbigüera cuimbae ipire ocui vae

(Mt 8.1-4; Lc 5.12-16)

⁴⁰ Jayave ou Jesús oï vae pe penti cuimbae ipire ocui vae. Uyeatica Jesús jovai jare uyerure chupe:

—Ndipota yave, ndepuere chembigüera —jei chupe.

⁴¹ Jesús uiparareco umaie jese, jare oñono ipo jese.

—Aipota. Ecuera —jei chupe.

⁴² Jare jupivoiño cuimbae ucuera imbaerasi güi. Ocui'ã ma ipire. ⁴³ Jare jupivoiño Jesús oyocui ete, ndei omondo mbove:

⁴⁴ —Agüiye emimbeu quía pe. Ecua iyeechaca sacerdote pe, jare emee ofrenda Moisés peocui rami, tenta guasu pegua reta uicuaa vaerã ndecuera ma co —jei.

⁴⁵ Ërei cuimbae oo, jare umbipi umimbeu ñru vae reta pe. Jecuae umimbeu jeta vae pe. Jáeramo Jesús ipuere'ã ma oo tenta guasu reta pe joco pegua reta jovaque. Upita ñana rupi, jare yugüeru jae oï vae pe opaete que rupi rupi güi.

2

Jesús umbigüera cuimbae ipuere mbae omi vae
(Mt 9.1-8; Lc 5.17-26)

¹ Mbovi ara rupi Jesús oo ye Capernaum pe, jare jeräcua jae ime oĩ jenta pe. ² Jayave jeta vae uyembati joco pe, jare tinee ñugüinoi o pe jare onque rupi. Jare Jesús umimbeu Tumpa inee chupe reta. ³ Jayave amocue yugüeru vae reta güeru penti cuimbae imbaerasi vae. Cua cuimbae ipuere mbae omi vae. Uyerevoica oo irundi cuimbae reta pe. ⁴ Ërei güeru vae reta ipuere'ã uruique jocua cuimbae Jesús oĩ vae pe, uyembiape'ã ye ñugüinoi reta ramo. Jáeramo uruyupi o iárambo jare uipea chupe Jesús jese catu. Joco pe umbigüeyi jocua cuimbae ipuere mbae omi vae jupa reve. ⁵ Jesús cua uecha yave, uicuaa jae reta güirovia co jese, jare jei cuimbae ipuere mbae omi vae pe:

—Nembaeyoa reta uyembai ma, cherivi.

⁶ Amocue mboroyocui re oporomböe vae reta uguapi ñugüinoi joco pe, jare ipia pe uyemingueta reta: ⁷ “¿Maera pa jei cuarãi cua cuimbae? Jei icavi mbae vae Tumpa coti. Tumpaño co ipuere umbiasa quã pe imbaeyoa reta.” Jucuarãi ipia pe uyemingueta reta.

⁸ Jare Jesús uicuaa voi jae reta ipiyemingueta, jare jei chupe reta:

—¿Maera pa pepia pe piyemingueta jucuarãi? ⁹ Chepuere jae cua cuimbae ipuere mbae omi vae pe: ‘Nembaeyoa reta uyembai ma.’ Jae ramiño vi chepuere jae chupe: ‘Epüa evoi nderupa, jare eguata.’ ¿Mbae nunga pa yavai jae vaerã? —jei Jesús chupe reta—. ¹⁰ Ërei aipota picuaa vaerã cua: Che cuimbaerã ayeyapo vae chepuere ambiasa quã pe imbaeyoa reta cua ivi pe aĩ rambueve —jei.

Jayave jei cuimbae ipuere mbae omi vae pe:

¹¹ —Che jae ndeve: Epüa evoi nderupa, jare ecua nerenta pe.

¹² Jayave cuimbae upüa, jare ovoï jupa, jare oẽ voi oo opaete joco pe ñugüinoi vae reta joque. Opaveve ipicañi, jare umbiadora reta Tumpa.

—Yaecha'ãi cua nunga —jei reta.

Jesús ueni Leví

(Mt 9.9-13; Lc 5.27-32)

¹³ Jayave Jesús oo ye i guasu jembei pe. Jare jeta vae reta uyembati jae oĩ vae pe, jare jae omböe reta. ¹⁴ Jare joco güi oo yave, uecha Alfeo tai Leví jee vae uguapi oĩ mburuvicha peguarã ocovara ñugüinoi vae pe, jare jei chupe:

—Eyu cherupíe.

Jayave Leví upüa, jare oo jae jupíe.

¹⁵ Jare Jesús ucaru oĩ rambueve Leví jenta pe, jeta mburuvicha peguarã ocovara vae reta jare teco icavi mbae vae uyapo vae reta ucaru vi ñugüinoi Jesús jare jemimboe reta ndive. Echa'ã jecuaeño jeta jae reta yugüiraa Jesús ndive. ¹⁶ Jayave mboroyocui re oporomböe vae reta jare fariseo reta uecha yave Jesús ucaru oĩ ocovara vae reta jare teco icavi mbae vae uyapo vae reta ndive, jei jemimboe reta pe:

—¿Maera pa ucaru pemboe vae ocovara vae reta jare teco icavi mbae vae uyapo vae reta ndive?

¹⁷ Jesús cua uyandu yave, jei chupe reta:

—Icove catu vae reta ueca'ã upurupiano vae. Imbaerasi vae retaño ueca. Che ayu aeca vaerã iyoa vae reta. Ayu'ã aeca vaerã jupi vae reta —jei.

Maera Jesús jemimboe reta uyecuacu'ã tembú güi

(Mt 9.14-17; Lc 5.33-39)

¹⁸ Jare Juan jemimboe reta jare fariseo jemimboe reta uyecuacu ñugüinoi tembú güi. Jayave amocue vae yugüeru, jare upirandu Jesús pe:

—¿Maera pa Juan jemimboe reta jare fariseo jemimboe reta uyecuacu tembú güi, Ërei nderemimboe reta uyecuacu'ã chugüi?

¹⁹ Jayave Jesús jei chupe reta:

—Umendata vae pe ñugüinoi vae reta ndarau etei uyecuacu tembú güi, umendata vae jae reta ndive oĩ rambueve. Echa'ã umendata vae jae reta ndive oĩ rambueve, uyecuacu'ã tembú güi. ²⁰ Ërei outa uvãe ara umendata vae uyereraaca vaerã chugüi reta. Jayave ramo uyecuacuta tembú güi —jei—. ²¹ Icavi'ã yamboya vaerã temimonde indechi vae maemboyaa ipiau vae pe. Echa'ã jucuarãi yayapo yave, maemboyaa ipiau vae umiãta

temimonde indechi vae, jare temimonde jeiete osoro —jei—. ²² Jae ramiño vi icavi'ã yambiru vaerã vino ipiau vae vino jiru guacapi indechi vae pe. Echa'ã jucuarã yayapo yave, vino omondo jiru, jare vino uyepiyere, jare jiru icavi'ã ma. Jáeramo yambiru vino ipiau vae jiru ipiau vae pe —jei chupe reta.

Jesús jemimboe reta uipoo trigo mbutuu ara pe
(Mt 12.1-8; Lc 6.1-5)

²³ Mbutuu ara pe Jesús oo co rupi jemimboe reta ndive. Uasa rambueve, jemimboe reta uipoo trigo. ²⁴ Jayave fariseo reta jei Jesús pe:

—Mase, ¿maera pa uyapo reta agüiyeta tēi uyapo mbutuu ara pe vae?

²⁵ Jesús jei chupe reta:

—¿Pemingueta'ã pa David uyapocue vae regua, jae jare jae ndive ñugüinoi vae reta mbaeti ma mbae güinoi yave jare iyembai reta? —jei—. ²⁶ David uique Tumpa jo pe, sacerdote tenondegua Abiatar jee vae ico yave, jare jou mbiyape Tumpa jo pe uñeño tee vae reta. Agüiyeta tēi co quía jou jocua mbiyape, jaeño sacerdote reta. Jare David umee vi jae ndive ñugüinoi vae reta pe —jei chupe reta.

²⁷ Jayave Jesús jei chupe reta:

—Mbutuu ara uyeyapo yanembori vaerã. Yande yayeyapo'ã mbutuu ara peguarã. ²⁸ Jáeramo che cuimbaerã ayeyapo vae chepuere jae mbae icavi uyeyapo vaerã mbutuu ara pe —jei.

3

Cuimbae ipo jovaicho tipa vae
(Mt 12.9-14; Lc 6.6-11)

¹ Jesús uique ye judío reta itupao pe, jare joco pe oĩ penti cuimbae ipo jovaicho tipa vae. ² Jare joco pe ñugüinoi vae reta umae ngatu Jesús re, uecha vaerã umbigüerata ra quía mbutuu ara pe. Echa'ã jae reta uipota tēi umbijeco Jesús. ³ Jayave Jesús jei cuimbae ipo jovaicho tipa vae pe:

—Epüa eyu iyemboi cua reta jovai.

⁴ Jare Jesús upirandu joco pe ñugüinoi vae reta pe:

—¿Yayapota pa icavi vae ani icavi mbae vae mbutuu ara pe? ¿Icavi pa yapuruepi ani yapuruyuca vaerã mbutuu ara pe? ¿Mbae pa jei mboroyocui cua re? —jei chupe reta.

Èrei jae reta jei'ã mbae ave. ⁵ Pochi reve Jesús umae iyipi rupi ñugüinoi vae reta re, jare tuicha ipiatiti jae reta ipiatanta ramo.

—Eupi ndepo —jei cuimbae pe.

Jayave cuimbae ipo uupi, jare ucuera voi. ⁶ Jayave fariseo reta oē judío reta itupao güi, jare uyemboemboe voi herodiano reta ndive Jesús re, quirãita ra uyucaca vaerã.

Jeta uyembati i guasu jembei pe

⁷⁻⁸ Jayave Jesús jare jemimboe reta yugüiraa i guasu pe, jare yugüiraa vi jaicue jeta Galilea güi. Jare yugüeru vi jae oĩ vae pe jeta Judea pegua reta, Jerusalén pegua reta, ivi Idumea pegua reta, Jordán jovaicho pegua reta, jare tenta guasu Tiro jare Sidón iyipi rupigua reta, uyandu yave opaete Jesús uyapo vae regua. ⁹ Jare Jesús oyocui jemimboe reta umicuatiro chalana jae oĩ vaerã pipe, agüiye vaerã oyopi yati vae reta. ¹⁰ Echa'ã jae umbigüera ma jeta vae, jare opaete ñru imbaerasi vae reta uñemiañamiaña yugüeru icoti. Echa'ã uipota oya jese, uyaviqui vaerã. ¹¹ Jare ñña reta uecha Jesús yave, uyeatica jae jovai jare ñneeãta reve jei:

—Nde co jae Tumpa Tai.

¹² Jare Jesús oyocui ete:

—Agüiye pemimbeu quía co che.

Jesús uiparavo doce cuimbae reta
(Mt 10.1-4; Lc 6.12-16)

¹³ Jayave Jesús oo ivitu guasu re, jare ueni jae uiparavo vae retaño. Jare jae reta yugüeru jae oĩ vae pe. ¹⁴ Jare jocua reta güi uiparavo doce cuimbae reta umĩru vaerã. Jae omondota reta umimbeu vaerã Tumpa ñnee. ¹⁵ Umeeta vi chupe reta mbaepuere umbigüera vaerã imbaerasi vae reta jare umbisiri vaerã ñña reta oya jese vae reta güi. ¹⁶ Cua co jae uiparavo vae reta jee: Simón (Jesús umbijee Pedro), ¹⁷ jare Zebedeo tai reta

Jacobo jare Juan jee vae (Jesús umbijee cua mocui reve Boanerges. Cua jee uipota jei: “Ara jiapu vae rami”),¹⁸ jare Andrés, Felipe, Bartolomé, Mateo, Tomás, Alfeo tai Jacobo jee vae, Tadeo, Simón (jare co Zelote pe ueni vae),¹⁹ jare Judas Iscariote (cua cuimbae umees Jesús jovaicho reta pe). Jayave Jesús ou ye jenta pe jae reta ndive.

Jei reta icavi mbae vae Espíritu Santo coti
(Mt 12.22-32; Lc 11.14-23; 12.10)

²⁰ Jare uyembati ye jeta vae. Jáeramo Jesús jare jemimboe reta iquii'ã ucaru vaerã.

²¹ Jesús jentarã reta cua uicuaa yave, yugüeru güüraa vaerã tõi.

—Iyaracuaa'ã ma oï —jei reta.

²² Jare mboroyocui re oporomböe vae yugüeru Jerusalén güü vae reta jei:

—Aña guasu Beelzebú jee vae oya ma jese, jare aña guasu imbaepuere pe umbisiri aña reta oya jese vae reta güü —jei reta.

²³ Jayave Jesús ueni reta, jare jei chupe reta umijaanga reve:

—Ndarau Satanás jaei uyembisiri cuimbae güü. ²⁴ Penti tenta guasu pegua reta oyovaicho uyupii yave, opata co jocua tenta guasu. ²⁵ Jae ramiño vi penti tenta pegua reta oyovaicho uyupii yave, opata co jocua tenta. ²⁶ Jare Satanás pochi iyupe yave, jare imbaepuere uyembiyao yave, ndarau tõi ma ico. Opata tõi co —jei chupe reta—. ²⁷ Ime yave quía uipota uique cuimbae ipirãta vae jenta pe upïro vaerã imbaembae chugüü vae, uipocuata rani cuimbae ipirãta vae. Jayave ramo ipuereta upïro imbaembae chugüü —jei—.

²⁸ Añete che jae peve, opaete ivi pegua reta imbaeyoa reta jare opaete iñee icavi mbae Tumpa coti jei reta vae Tumpa ipuere umbai. ²⁹ Èrei Tumpa ndarau etei umbiasa jei icavi mbae vae Espiritu Santo coti vae pe. Uyembijecota jaeño mai pegua —jei chupe reta.

³⁰ Echa'ã tenonde yave jae reta jei:

—Aña oya ma jese.

Jáeramo Jesús jei jucuarãi chupe reta.

Jesús ichi jare tivi reta
(Mt 12.46-50; Lc 8.19-21)

³¹ Jayave Jesús ichi jare tivi reta yugüeru uvãe Jesús oï vae pe, jare oca güü omondo uenica. ³² Jare uguapi ñugüünoi iyipi rupi vae reta jei chupe:

—¡Aipo! Ndesi jare nderivi reta oca pe ñugüünoi, jare ndereca.

³³ —¿Quía nunga pa co jae chesi jare cherivi reta? —jei Jesús chupe reta.

³⁴ Jayave unga iyipi rupi uguapi ñugüünoi vae reta re.

—Cua nunga reta co jae chesi jare cherivi reta —jei—. ³⁵ Echa'ã Tumpa jei vae uyapo vae reta co jae cherivi jare cherindi jare chesi —jei.

4

Jesús umijaanga umaeti vae
(Mt 13.1-9; Lc 8.4-8)

¹ Jesús umbipi ye oporomböe i guasu jembei pe. Jayave jeta yugüeru uyembati jae oï vae pe. Jáeramo Jesús uyupi penti chalana i guasu pe oï vae pe, jare uguapi pipe. Jare yati vae reta ñugüünoi i guasu jembei pe. ² Jare Jesús omböe reta jeta mbaembae re umijaanga reve. Jei chupe reta:

³ —Piyapisaca cheré. Penti cuimbae oo umaeti vaerã —jei—. ⁴ Umaeti yave, umiai temiti, jare amocue oa tape rupi. Jayave yugüeru güüra reta opa jou —jei—. ⁵ Ìru temiti oa mboviño ivi itape írambo oï vae pe. Cua imambae oë, jeta'ã ivi chupe ramo. ⁶ Èrei guarasi jasi yave, ipiru. Jare japo quipe'ã oï ramo, utini —jei—. ⁷ Ìru temiti oa ñanapite pe. Ñana ucuacuaa yave, opa uyuca temiti. Jáeramo temiti ia'ã —jei—. ⁸ Jare Ìru temiti oa ivicavi pe. Cua reta oë, jare ucuacuaa, jare ía. Amocue mboviño jã, jare Ìru jeta catu jã, jare Ìru jeta ete jã —jei chupe reta. ⁹ Jayave Jesús jei chupe reta:

—Uipota uyandu vae tuyapisaca cua ñee re.

Maera Jesús oporomböe umijaanga reve
(Mt 13.10-17; Lc 8.9-10)

¹⁰ Mboviño ma upita jae ndive yave, jocua doce uiparavo vae reta jare Ìru upita vae reta upirandu Jesús pe umijaanga reve jei vae re. ¹¹ Jayave Jesús jei chupe reta:

—Amimbeu ma peve Tumpa iporoyocua regua. Cua uyecuaa'ā ĩru vae reta pe. Jáeramo amboe ĩru vae reta amijaanga reve —jei—. ¹² Cua ayapo agüiye vaerā uicuaa cavi, yepe tēi uecha, jare agüiye vaerā uicuaa, yepe tēi uyandu, jare agüiye vaerā uyerova Tumpa coti, imbaeyoa reta uyembai vaerā —jei.

Umaeti vae uyemijaanga jese vae

(Mt 13.18-23; Lc 8.11-15)

¹³ Jayave Jesús jei chupe reta:

—¿Picuaa'ā pa mbae cua amijaanga reve jae peve vae uipota jei vae? Picuaa'ā yave, ¿quirāita pa picuaa mbae opaete amijaanga reve jaeta peve vae uipota jei vae? —jei—. ¹⁴ Jocua umaeti vae uyemijaanga Tumpa ĩnee umimbeu vae re —jei—. ¹⁵ Temiti tape rupi oa vae uyemijaanga amocue Tumpa ĩnee uyandu vae re. Ĕrei jupivoiño ou Satanás, jare umiacañi Tumpa ĩnee güi —jei—. ¹⁶ Jae ramiño vi jocua temiti uñeñoti mboviño ĩvi itape íárambo oĩ vae pe vae uyemijaanga ĩru vae reta Tumpa ĩnee uyandu vae re. Jupivoiño uyerovia reta, jare uipota ete cua ñee. ¹⁷ Ĕrei cua reta jocua temiti japo quipe'ā oĩ vae rami co. Jáeramo imambae icueri reta. Mbaesusere uyeyapo chupe reta ani ĩru vae reta uyapo icavi mbae vae chupe reta Tumpa ĩnee uicuaa ramo. Jare jupivoiño uipota'ā ma uyapisaca reta Tumpa ĩnee re —jei—. ¹⁸ Jae ramiño vi jocua temiti uñeñoti ñanapite pe vae uyemijaanga ĩru vae reta Tumpa ĩnee uyandu vae re. ¹⁹ Ĕrei jae reta umbipi uyemipia'ā ĩvi pe mbaembae uyeyapo vae re, jare uyemitavi, uipota icocatu ramo. Uipota vi güinoi jeta mbaembae. Jare opaete cua umiacañi reta Tumpa ĩnee güi. Jáeramo jae reta jocua temiti ia'ā vae rami co —jei—. ²⁰ Ĕrei jocua temiti uñeñoti ĩvicavi pe vae uyemijaanga ĩru vae reta Tumpa ĩnee uyandu vae re. Cua reta güirovia. Amocue vae jocua temiti mboviño jāi vae rami co. ĩru vae reta jocua temiti jeta catu jāi vae rami co. Jare ĩru vae reta jocua temiti jeta ete jāi vae rami co —jei.

Uñeñomi vae uyeechañotai co

(Lc 8.16-18)

²¹ Jayave Jesús jei chupe reta:

—Mechero yaruique yave o pe, ndarau ñañoño yapapo uyembovapo oĩ vae igüi pe, ani güirapembi igüi pe. Nañoño co mechero jenda pe —jei—. ²² Ime yave mbae uñeñomi vae, uyeechañotai co. Jae ramiño vi ime yave mbae uyeeyasoĩ vae, uyecuaañotai co —jei—. ²³ Uipota uyandu vae tuyapisaca cua ñee re —jei Jesús.

²⁴ Jare jei chupe reta:

—Pepia pe piyemingueta cavi piyandu vae re. Tumpa umiaangata umee peve pemiaanga pemee ĩru vae reta pe rami, jare umĩruta vi peve —jei—. ²⁵ Echa'ā güinoi vae pe uñemĩruta, jare mbaeti güinoi vae güi mbovi ete güinoi vae uyeequita —jei.

Jesús umijaanga temiti ucuacuaa vae

²⁶ Jare Jesús jei chupe reta:

—Tumpa iporoyocua penti cuimbae oo umaeti vae rami co —jei—. ²⁷ Cuimbae oque pĩtu yave, jare upña cõe yave. Temiti oẽ jare ucuacuaa, jare umaeti vae uicuaa'ā quirāi ra ucuacuaa vae. ²⁸ Echa'ā temiti ucuacuaa yambori mbae reve, tenonde ii, jayave avatiqui, joco güi avati —jei—. ²⁹ Jare yagüiye ma yave, iya uaviro. Echa'ā uvãe ma ara uaviro vaerā —jei chupe reta.

Jesús umijaanga mostaza jāicue

(Mt 13.31-32; Lc 13.18-19)

³⁰ Jare Jesús jei:

—¿Mbae ra ipuere uyemijaanga Tumpa iporoyocua re? ¿Mbae ra yamijaangata jese? —jei—. ³¹ Yandepuere yamijaanga jese penti mostaza jāicue —jei—. Uñeñoti yave, cua jāicue michi-rai ete opaete ĩru temiti reta jāicue ĩvi pe oĩ vae güi. ³² Ĕrei uñeñoti yave, ucuacuaa, jare tuicha ete opaete ĩru temiti penti año peguaño ucuacuaa vae reta güi, jare tuicha jāca uyeyapo. Jáeramo güira reta ipuere uyapo jaitirā jese guarasía pe —jei chupe reta.

Maera Jesús umijaanga mbaembae

(Mt 13.34-35)

³³ Jeta cuarāi Jesús umimbeu Tumpa in̄ee chupe reta umijaanga reve, jae reta ipuere uicuaa rupiño. ³⁴ Jare jecuaño imiari chupe reta umijaanga reve. Ērei jemimboe reta peño uicuaaca cavi mbae uipota jei vae.

Jesús umiquīi i guasu
(Mt 8.23-27; Lc 8.22-25)

³⁵ Jocua ara guarasi uique ma yave, Jesús jei jemimboe reta pe:

—Yaa i guasu jovaicho pe —jei.

³⁶ Jayave jae reta ueya yati vae reta, jare güiraa Jesús jocua chalana oī pipe vae pe. Jare ĩru vae reta yugüiraa vi ambie chalana reta pipe. ³⁷ Jare ou ivitu tanta uyepuyu, jare i uyembiparoaroa uique chalana pe, jare umitinee seri ma. ³⁸ Jare Jesús uñemiācanita chalana iyapi pe, jare oque oī. Jayave jae reta omomba jare jei chupe:

—¡Oporomboe vae! ¿Ndepia'ā pa opata ma ñamano?

³⁹ Jayave Jesús upūa, jare uñeengata ivitu pe.

—¡Epita! ¡Nequīi! —jei i guasu pe.

Jare ivitu javoi upita, jare opaete quīi ngatu. ⁴⁰ Jayave Jesús upirandu chupe reta:

—¿Maera pa pequīye? ¿Ndeñiño pa pepurugüirovia? —jei.

⁴¹ Jare uquiye ete reta, jare jei uyupe:

—¿Mbae nunga cuimbae pa cua? Ivitu jare i guasu uyapo jae oyocui vae —jei reta.

5

Gadara pegua añā oya jese vae
(Mt 8.28-34; Lc 8.26-39)

¹ Jayave yugüiraa uvāe i guasu jovaicho pe, gadareno reta iivi pe. ² Jesús ugüeyi chalana güi rupive, ou oovāiti teögüerirurenda güi penti cuimbae añā oya jese vae. ³ Jae ico teögüerirurenda rupi, jare ipuere'ā ma quía uñapiti, yepe tēi uñapiti cadena pe. ⁴ Jeta vese ma jae reta uipocua tēi ipo jare ipi cadena pe. Ērei jae opa omondoo cadena reta. Jare ipuere'ā quía jese. ⁵ Jare jecuaño p̄itu rupi jare ara rupi oī teögüerirurenda rupi jare ivitu guasu rupi, jare jecuae usapicai jare uyembipere ita pe. ⁶ Cua cuimbae uecha yave Jesús mbiri güi, osi ou icoti jare uyeatica jovai. ⁷ Jare in̄eeāta reve jei:

—¿Maera pa ndeyu chemambeco, Jesús? Nde co jae Tumpa ara pe oī vae Tai. Ayerure ndeve Tumpa jee re agüiye iporaraca cheve —jei.

⁸ Echa'ā Jesús jei añā pe:

—Esiri cua cuimbae güi, añā.

⁹ Jayave Jesús upirandu chupe:

—¿Mbae pa nderee?

—Cheree co jae jeta vae. Echa'ā jeta vae co ore —jei chupe.

¹⁰ Jare añā reta uyerure Jesús pe agüiye vaerā umbisiri reta jocua ivi güi. ¹¹ Jare joco pe jeta cuchi reta ucaru ñugüiñoi coñiño ivitu guasu güi. ¹² Jayave añā reta uyerure Jesús pe:

—Oremondo pea cuchi reta coti. Emaño oreré ndoya vaerā jese reta —jei reta.

¹³ Jayave Jesús umaño jese reta. Jare añā reta usiri cuimbae güi, jare oya cuchi reta re. Jayave cuchi reta tanta osi ivia rupi oa i guasu pe, jare joco pe opa ipitupa reta. Cuchi reta uyepapa dos mil rupi.

¹⁴ Jayave cuchi iyandarecoa reta opa osi, jare umimbeu tenta guasu pegua reta pe jare joropropi ñugüiñoi vae reta pe cua uyeyapo vae regua. Jare uyandu vae reta yugüeru, uecha vaerā mbae uyeyapo vae. ¹⁵ Jare yugüeru uvāe yave Jesús oī vae pe, uecha cuimbae añā oyase jese vae uguapi oī joco pe. Uecha uyemonde ma jare iyarcuaaño ma oī. Jae co tenonde yave jeta añā reta oyase jese vae. Jare opaete yugüeru vae reta uquiye. ¹⁶ Jare jocua tenonde yave uecha vae reta umimbeu ĩru reta pe quirāi uyeyapo cuimbae añā oyase jese vae pe jare cuchi reta pe. ¹⁷ Jayave yati vae reta umiñera Jesús oo ye vaerā jae reta iivi güi. ¹⁸ Jare Jesús uyupi ye ma oī yave chalana pe, jocua cuimbae añā reta oyase jese vae uyerure chupe:

—Emaño cheré aa vaerā nderupíe —jei.

¹⁹ Ērei Jesús umaño'ā jese.

—Ecuá nerenta pe emimbeu nerentarā reta pe mbae icavi vae ndeYa uyapo ndeve vae, jare quirāi ndeparareco vae —jei chupe.

²⁰ Jayave cuimbae oo, jare umbipi umimbeu ivi Decápolis jee vae rupi mbae icavi vae Jesús uyapo chupe vae. Jare opaete ipiacañi jese.

*Jairo tayi jare cuña Jesús jemimonde uyaviqui vae
(Mt 9.18-26; Lc 8.40-56)*

²¹ Jesús oo uvāe yave i guasu jovaicho coti chalana pipe, yugüeru jeta vae reta jae oĩ vae pe. Jare Jesús upita i guasu tēi reve, jare opaete ma icorepoti umee iyugüi upurupiano vae reta pe. Ërei ucuera'ā. Jeseve jeieteño ma imbaerasi. ²⁷ Jae uyandu Jesús regua yave, oya Jesús re icupe coti jeta vae reta ipite rupi, jare uyaviqui jemimonde.

—Cherayi umano ma oĩ —jei—. Yaa ñono ndepo jese embigüera, agüiye vaerā umano —jei chupe.

²⁴ Jayave Jesús oo voi jupíe. Jare jeta yugüiraa Jesús jupíe, jare oyopi reta. ²⁵ Jare jae reta ipite pe oo penti cuña doce año ma uiporara tugüiguasu vae. ²⁶ Jare uiporara ma jeta upurupiano vae reta uipiano tēi reve, jare opaete ma icorepoti umee iyugüi upurupiano vae reta pe. Ërei ucuera'ā. Jeseve jeieteño ma imbaerasi. ²⁷ Jae uyandu Jesús regua yave, oya Jesús re icupe coti jeta vae reta ipite rupi, jare uyaviqui jemimonde.

²⁸ —Yepe tēi jemimondeño tayaviqui, acuerata co —jei.

²⁹ Jare jupivoiño jugüiguasu upita chugüi, jare uyandu jete ucuera ma imbaerasi güi. ³⁰ Jayave Jesús uicuaa umbigüera ma co quía imbaepuere pe. Jáeramo uyerova umae jeta vae re, jare upirandu:

—¿Quía pa cheremimonde uyaviqui?

³¹ Jayave jemimboe reta jei chupe:

—Ndecha co cua jeta vae reta ndeopi ñugüinoi. ¿Maera pa ndepirandu: 'Quía pa cheremimonde uyaviqui?' —jei reta chupe.

³² Ërei Jesús umae iyipi rupi, uecha vaerā quía ra jucuarāi uyapo. ³³ Cuña uicuaa uyeyapo ma chupe vae, jare ou icoti. Uquiye güi uriri, jare uyeatica Jesús jovai, jare umimbeu chupe opaete uyeyapo ma vae. ³⁴ Jayave Jesús jei chupe:

—Ndecuera ma, cherindi, nderovia cheré ramo. Ecuá ndepiacatu reve. Ndecuera ma co nembraerasi güi —jei.

³⁵ Jare Jesús uyemingueta oĩ rambueve, yugüeru uvāe amocue vae tupao re uyandareco vae jenta güi. Jare jei reta Jairo pe:

—Nderayi umano ma. Agüiye ma emambeco oporomboe vae —jei reta chupe.

³⁶ Ërei Jesús cua uyandu yave, jei tupao re uyandareco vae pe:

—Agüiye ndepiatiti. Epurugüiroviaño —jei.

³⁷ Jare umaño'ā ñru reta re yugüiraa vaerā jae ndive, jaeño Pedro, Jacobo jare Juan. Juan co jae Jacobo tivi. ³⁸ Yugüiraa uvāe yave tupao re uyandareco vae jenta pe, Jesús uecha jeta vae reta icorai jare uyao ñugüinoi reta jāse reve. ³⁹ Jesús uique yave o pe, jei chupe reta:

—¿Maera pa picorai jare piyao? Cua cuñatai umano'a co. Oqueño co oĩ —jei.

⁴⁰ Ërei jae reta oyoyai. Jayave Jesús omoë opaete vae oca pe, jare uruique cuñatai oĩ vae pe cuñatai tu jare ichi, jare jemimboe jae ndive yugüiraa vae reta. ⁴¹ Jayave Jesús uipisi cuñatai ipo pe.

—Talita cumi —jei chupe. (Cua uipota jei: “Cuñatai, che jae ndeve, epüa.”)

⁴² Jayave cuñatai upüa jare umbipi uguata. Cua cuñatai doce año ma güinoi. Jare Jesús ndive ñugüinoi vae reta ipiacañi ete. ⁴³ Jayave Jesús oyocui ete reta agüiye vaerā umimbeu quía pe ave, jare oyocui vi umingarua vaerā cuñatai.

6

*Jesús Nazaret pe
(Mt 13.53-58; Lc 4.16-30)*

¹ Jesús oo joco güi iivi pe, jare jemimboe reta yugüiraa jupíe. ² Jayave mbutuu ara pe Jesús umbipi oporomboe judío reta itupao pe. Jare jeta vae uyapisaca jese, jare ipiacañi reta. Jei reta uyupe:

—¿Quiape ra uyemboe cua cuimbae opaete cua re? ¿Mbae nunga aracuaa ra uñemee chupe? ¿Mbae nunga miacañi ra cua uyapo ipo pe vae? —jei reta—. ³ Cua co jae carpintero. Jae co María imembi. Jae co Jacobo, José, Judas jare Simón tiquei. Jare jindi reta yugüireco vi yandepite pe —jei reta.

Jáeramo jae reta pochi Jesús pe. ⁴ Jayave Jesús jei chupe reta:

—Opaete vae uipiu penti Tumpa iñee umimbeu vae. Jaeño jentaigua reta, jentarā reta jare jenta pegua reta uipiu'ā reta —jei.

⁵ Jare joco pe ipuere'ā uyapo jeta miacañi. Jaeño oñono ipo mbovi imbaerasi vae reta re umbigüera vaerā. ⁶ Jare Jesús ipiacañi jese reta, güirovia'ā jese ramo.

Jayave Jesús oo oporomboe ñru tenta guasu-rai jocoropi ñugüinoi vae reta rupi.

Jesús omondo jocua doce jemimboe reta

(Mt 10.5-15; Lc 9.1-6)

⁷ Penti ara Jesús umbati jocua doce jemimboe reta, jare omondo mocui mocui rupi, jare umee chupe reta mbaepuere umbisiri vaerā aña reta oya jese vae reta güi. ⁸ Jare oyocui:

—Peo yave, agüiye mbae peraa, jaeño pepopoca. Agüiye peraa peurupucu, perembiurā jare corepoti —jei chupe reta—. ⁹ Pemonde pepipasa, jare agüiye peraa mocui camisa —jei.

¹⁰ Jare jei vi chupe reta:

—Peo pevãe yave penti tenta pe, joco pe pei, jocua tenta guasu güi peo ye regua —jei—.

¹¹ Jare ime yave penti tenta guasu pegua reta uipota'ā pepita vaerā joco pe jare uipota'ā uyapisaca peré vae, pecuaño joco güi, jare pemitimo ivicui pepi güi, uicuaa vaerā jae reta co teco güinoi —jei—. Añete che jae peve, Tumpa uãa yave ivi pegua reta, jocua tenta guasu pegua reta tanta uiporarata Sodoma jare Gomorra pegua reta güi —jei.

¹² Jayave jae reta yugüiraa, jare umimbeu ñru vae reta pe:

—Peyea piyemingueta icavi mbae vae pepia pe oï vae.

¹³ Jare jae reta umbisiri jeta aña reta oya jese vae reta güi, jare jeta imbaerasi vae reta re oñono aceite umbigüera vaerā.

Juan imano

(Mt 14.1-12; Lc 9.7-9)

¹⁴ Opaete vae uyandu ma Jesús regua. Mburuvicha guasu Herodes jee vae uyandu vi. Jae jei:

—Juan upurumbibautizase vae icove ye ma ou umanocue vae reta ipite güi. Jáeramo uyapo cua miacañi reta —jei.

¹⁵ Ñru vae reta jei:

—Jae co Elías.

Jare ñru vae reta jei:

—Jae co penti Tumpa iñee umimbeu vae Tumpa iñee aracae umimbeu vae rami.

¹⁶ Ërei Herodes uyandu yave, jei:

—Jae co Juan añácasiaca vae. Icove ye ma ou manocue vae reta ipite güi —jei.

¹⁷ Echa'ā ndei Juan umano mbove, Herodes umenda Felipe jembireco Herodías jee vae ndive. Felipe co jae Herodes tiví. Jayave Herodes omondo uipisica Juan, jare oñonoca peresoriru pe, Herodías jei ramo. ¹⁸ Echa'ā tenonde yave Juan jei Herodes pe: “Icavi'ā nemenda vaerā nderivi jembireco ndive.”

¹⁹ Jáeramo Herodías pochi Juan pe, jare uipota tēi uyucaca, ërei ipuere'ā. ²⁰ Echa'ā Herodes uicuaa Juan co jae cuimbae jupi vae. Jáeramo uipiu, jare umaño'ā quía re uyapo vaerā icavi mbae vae chupe. Jare uyandu yave Juan jei vae, uyemipia'ā tuicha. Ërei jecuaño uipota uyapisaca jese. ²¹ Ërei uvãe ara Herodías uyapo vaerā icavi mbae vae Juan pe. Jocua ara Herodes uyembiara oa vae regua, jare umbatica ñru mburuvicha reta, sundaro reta juvicha reta, jare icocatu vae reta Galilea pegua, umingarú vaerā. ²² Jare Herodías imembi cuña uique upirae yave, umbiyerovia Herodes jare jae ndive ucaru ñugüinoi vae reta. Jayave Herodes jei cuñatai pe:

—Eeca cheve mbae ndipota vae, jare che ameeta ndeve —jei.

²³ Jare jei ye chupe Tumpa jee re:

—Ipotave mbae ndeeca cheve vae ameeta co ndeve, cheivi mbite rupi yepe.

²⁴ Jayave cuñatai oē oo upirandu ichi pe:

—¿Mbae pa aecata chupe?

—Eeca chupe Juan upurumbibautizase vae iñāca —jei ichi chupe.

²⁵ Jayave imambaeño cuñatai uique ye mburuvicha guasu oī vae pe.

—Aipota neme vaeerā cheve añave voi Juan upurumbibautizase vae iñāca penti plato pe —jei chupe.

²⁶ Jayave mburuvicha guasu ipiatiti tuicha. Ērei Tumpa jee re jei chupe ramo, jare ĩru vae reta uyandu ramo, uipota'ā uicuacu iñee. ²⁷ Jáeramo omondo sundaro Juan iñāca güeru vaerā. ²⁸ Jayave oo sundaro peresoriru pe uñācasia Juan. Jare güeru iñācacue penti plato pe, jare umee cuñatai pe. Jayave jae umee ichi pe. ²⁹ Jare Juan jemimboe reta cua uicuaa yave, yugüeru güiraa jetecue oñoti vaerā.

Jesús umingararu cinco mil cuimbae reta

(Mt 14.13-21; Lc 9.10-17; Jn 6.1-14)

³⁰ Jesús jemimondo reta uyembati ye yave jae ndive, umimbeu reta chupe opaete uyapo vae jare oporomboe jese vae. ³¹ Jayave Jesús jei chupe reta:

—Pe retaño peyu yaa quii ngatu vae pe, peputuu vaerā michi pegua —jei.

Echa'ā jecuaecuae jeta vae yugüeru opou ipi. Jáeramo Jesús jare jemimboe reta iquii'ā ucaru vaerā. ³² Jayave jae retaño yugüiraa chalana pe quii ngatu vae pe. ³³ Ērei jeta vae reta uecha yugüiraa, jare uicuaa quía co jae vae. Jare yugüiraa ivi rupiño tenta guasu reta güi Jesús oo vae pe, jare yugüiraa uvāe ndei Jesús oo uvāe mbove, jare uyembati joco pe. ³⁴ Jesús ugüeyi yave chalana güi, uecha jeta vae, jare uiparareco reta. Echa'ā jae reta ovecha mbaeti iyandarecoa güinoi vae reta rami co. Jare umbipi omboe reta jeta mbaembae re.

³⁵ Caaru ma yave, Jesús jemimboe reta yugüeru jei chupe:

—Mbaeti quiave ico cua rupi, jare caaru ma oī. ³⁶ Emondo cua reta ogua vaerā jemiurā tenta tenta rupi. Echa'ā mbaeti mbae jou reta vaerā cua pe —jei reta.

³⁷ Ērei Jesús jei chupe reta:

—Pe reta pemee tucaru.

—¿Ndoota pa ndogua doscientos ara mbaraviqui jepi pegua mbiyape, numee jou reta vaerā? —jei reta chupe.

³⁸ Jesús jei chupe reta:

—¿Mbovi pa mbiyape ime penoi? Pecua peeca —jei.

Jae reta uicuaa ma yave, umimbeu Jesús pe:

—Ime nonoi pandepo mbiyape jare mocui pira —jei reta.

³⁹ Jayave Jesús oyocui opaete vae uyembatimbatí vaerā uguapi capiichape re. ⁴⁰ Jayave uyembatimbatí reta uguapi cien rupi jare cincuenta rupi. ⁴¹ Jayave Jesús uipisi jocua pandepo mbiyape jare mocui pira, jare umae ara coti, jare umee yasurupai Tumpa pe. Jayave upisāa mbiyape, jare umee jemimboe reta pe, jae reta umee vaerā yati yati ñugüinoi vae reta pe. Jesús upisāa vi jocua mocui pira, uñemee vaerā opaete vae pe. ⁴² Opareve ucaru, jare iyangapii reta. ⁴³ Jayave Jesús jemimboe reta umbati tembúu uñepisāacue jembire vae, jare umitinee doce canasta. ⁴⁴ Jare ucaru vae reta güi cuimbae retaño uyepapa cinco mil.

Jesús uguata i iárambo

(Mt 14.22-27; Jn 6.16-21)

⁴⁵ Jare jupivoiño Jesús oyocui jemimboe reta uyupi vaerā chalana pe, jare yugüiraa vaerā jenonde i guasu jovaicho pe tenta guasu Betsaida pe, jae omondo rambueve uyembati vae reta. ⁴⁶ Jare opa omondo yave, Jesús uyupi ivitu guasu re uyerure vaerā Tumpa pe. ⁴⁷ Pĩtu ma yave, jemimboe reta yugüiraa chalana pe i guasu mbite rupi, jare Jesús jaeño upita ivi pe. ⁴⁸ Jare Jesús uecha tanta ma uparaviqui reta, uruguata vaerā chalana. Echa'ā ivitu tanta oovāiti. Jare cōeta ma yave, Jesús uguata oo i iárambo rupi güiraa uepiti. Jare uasata tēi chuguii reta. ⁴⁹ Jae reta uecha yave uguata oo i iárambo rupi, ipia pe uyemingueta tēi uecha mbae iācue, jare usapicai reta. ⁵⁰ Echa'ā opaete jae reta uecha, jare uquiye ete reta. Ērei jupivoiño Jesús ombou iñee chupe reta:

—Piñemiatangātu. Che co. Agüiye pequiye —jei.

⁵¹ Jayave Jesús ou uyupi chalana pe, jare upita ivitu. Jare jae reta ipiacañi. ⁵² Echa'ã jocua miacañi mbiyape regua uyapo yave, Jesús uipota tēi jae reta uicuaa cavi vaerã. Ērei ndeiño uicuaa. Echa'ã jecuaeño ipiatanta.

Jesús umbigüera Genesaret pegua imbaerasi vae reta
(Mt 14.34-36)

⁵³⁻⁵⁴ I guasu uasa reta yave, yugüüraa uvãe ivi Genesaret pe. Jare ugüeyi reta yave chalana güi i guasu jembei pe, jupivoiño joco pegua reta uicuaa jae co Jesús vae. ⁵⁵ Jare yugüüraa opaete jocua ivi rupi, jare umbipi güeru imbaerasi vae reta jupa reve Jesús oĩ vae pe. Īru vae reta umimbeu chupe reta quiape oĩ vae. ⁵⁶ Jare Jesús oo tenta guasu-rai reta rupi, jare tenta guasu reta rupi, jare tenta ñana rupi ñugüüinoi vae reta pe. Jare oo vae rupi joco pegua reta güeru oñono imbaerasi vae reta tape rupi, jare uyerure Jesús pe umaeño imbaerasi vae reta uyaviqui vaerã jemimonde jembei yepe. Jare opaete uyaviqui vae reta ucuera.

7

Yandepia umingüia vae
(Mt 15.1-20)

¹ Fariseo reta jare amocue mboroyocui re oporomböe vae Jerusalén güi yugüeru vae reta uyembati Jesús oĩ vae pe. ² Jae reta uecha amocue Jesús jemimboe reta ucaru ñugüüinoi uyepöe mbae reve. Echa'ã jae reta uyapo ve'ã ma itenondegua reta iporomböe. Jáeramo umbijeco reta. ³ Echa'ã fariseo reta jare opaete judío reta uyepoeñoi ndei ucaru mbove, uyapo vaerã itenondegua reta iporomböe. ⁴ Jare yugüeru ye yave umaemee vae reta ñugüüinoi vae güi, jecuaeño uyepöe ndei ucaru mbove. Jare uyapoñoi reta jeta ĩru mbaembae itenondegua reta iporomböe. Echa'ã oyöe vaso reta, yapöe reta, paila reta jare tupa reta. ⁵ Jayave fariseo reta jare mboroyocui re oporomböe vae reta upirandu Jesús pe:

—¿Maera pa nderemimboe reta uyapo'ã yandetenondegua reta iporomböe? ¿Maera pa ucaru reta uyepöe mbae reve? —jei reta.

⁶ Jayave Jesús jei chupe reta:

—Añete yepe Isaías imiari peré. Echa'ã jae uicuatía upurumbitavi vae reta re cuarãi: 'Cua reta chepiu iyuru peño' —jei Tumpa—.

‘Ērei ipia pe chepiu'ã etei.

⁷ Chembiadora-raangaiño.

Che jucuarãi'ã aporoyocui' —jei Tumpa.

Jucuarãi uicuatía Isaías —jei Jesús—. ⁸ Echa'ã pe reta piyapo'ã Tumpa iporoyocui, ěrei piyapo cavi yandetenondegua reta iporomböe. Piyöe yapöe reta jare vaso reta, jare jeta cua nunga piyapo —jei.

⁹ Jare Jesús jei chupe reta:

—Tumpa iporoyocui pemombo co, piyapo vaerã yandetenondegua reta iporoyocui. ¹⁰ Moisés jei cuarãi: 'Ipiu nderu jare ndesi.' Jare jei vi cuarãi: 'Jei icavi mbae vae tu ani ichi coti vae uyeyucacata co.' Jucuarãi jei Moisés —jei chupe reta—. ¹¹ Ērei pe reta pere cuarãi: 'Penti cuimbae ipuere jei tu ani ichi pe umeeta tēi chupe ombori vaerã vae Corbán co.' Jucuarãi pere —jei—. (Corbán uipota jei: "Ame ma Tumpa pe".) ¹² Jayave pe reta pemaño'ã ma jese ombori vaerã tu jare ichi —jei—. ¹³ Jare jeta cua nunga piyapo. Jucuarãi pe reta pemombo Tumpa iporoyocui piyugüi piyapo vaerã yandetenondegua reta iporoyocui. Jare pemboe vi pesambiai reta uyapo vaerã yandetenondegua reta iporoyocui —jei Jesús chupe reta.

¹⁴ Jare Jesús ueni umbati opaete joco pe ñugüüinoi vae reta.

—Piyapisaca cua re opaete pe reta, picuaa cavi vaerã —jei chupe reta—. ¹⁵ Ipotave mbae peu vae oo perie pe. Jáeramo umingüia'ã pepia. Jocua piyapo vae jare pere vae umingüia pepia —jei—. ¹⁶ Uipota uyandu vae tuyapisaca cua ñee re —jei chupe reta.

¹⁷ Jare Jesús ueya yati vae reta yave, uique jo pe. Jayave jemimboe reta upirandu chupe umijaanga reve jei vae re. ¹⁸ Jayave Jesús jei chupe reta:

—¿Pe retave pa picuaa cavi'á? Picuaa cavi cua: Ipotave mbae peu vae uminguaia'á pepia. ¹⁹ Echa'á oo'á pepia pe. Oo perie pe jare pemombo. Jucuarái uveyapo opaete tembú pe —jei chupe reta.

²⁰ Jare Jesús jei:

—Jocua piyapo vae jare pere vae uminguaia pepia. ²¹ Echa'á pepia güi oë opaete icavi mbae vae: pepia pe piyemingueta icavi mbae vae, piyuvanga menda re, piyapo aguasa, pepuruyuca, ²² pemonda, pipota íru vae reta imbaembae, piyapo icavi mbae vae, pepurumbitavi, pembiquere, peacatáa, icavi mbae vae pere perapicha coti, piyembicate jare pico iyaracuaa mbae vae reta rami —jei—. ²³ Opaete cua icavi mbae vae oë pepia güi. Jare cua reta uminguaia pepia —jei chupe reta.

Cuña sirofenicia pegua ipurugüirovia

(Mt 15.21-28)

²⁴ Jayave Jesús oo ye joco güi Tiro jare Sidón iyipi rupi. Jare uique yave penti tenta pe, uipota'á tēi quiave uicuaa vaerá jae joco pe oí vae. Ērei uicuaañoi joco pegua reta. ²⁵ Jare penti cuña aña oya imembi cuña re vae uyandu Jesús regua, jare ou uyeatica jae jovai. ²⁶ Jae co penti sirofenicia griega pe uyemingueta vae. Jae uyerure Jesús pe umbisiri vaerá aña imembi güi. ²⁷ Ērei Jesús jei chupe:

—Tianganpi rani sambiai reta. Icavi'á yaequi vaerá tembú sambiai reta güi, ñamee vaerá yimba-rai reta pe —jei.

²⁸ —Añete tēi co, carai —jei cuña Jesús pe—. Ērei yimba-rai mesa igüi pe ñugüinoi vae reta jou tembú usururucue sambiai reta uiti vae —jei.

²⁹ Jayave Jesús jei chupe:

—Cua ndere vae jeco pegua ndepuere ndeo. Aña usiri ma nemembi güi —jei.

³⁰ Jayave cuña oo uvãe jenta pe yave, uecha imembi jupa pe oí. Aña usiri ma chugüi.

Jesús umbigüera cuimbae iupaupa jare iyapisa mbae vae

³¹ Jayave Jesús ou Tiro iyipi rupigua güi, jare uasa Sidón jare Decápolis rupi, jare ou uvãe i guasu Galilea pe oí vae pe. ³² Jare amocue vae güeru chupe penti cuimbae iupaupa jare iyapisa mbae vae. Güeru vae reta uyerure Jesús pe oñono vaerá ipo jese. ³³ Jayave Jesús güiraa cuimbae yati vae reta ipite güi. Oñono ipoãca cuimbae iyapisa pe. Jayave undivi, jare uyaviqui cuimbae icü chugüi. ³⁴ Jayave umae ara coti, jare iañeequi, jare jei:

—¡Efata! (Cua uipota jei: “¡lyepeal!”)

³⁵ Jayave cuimbae uyandu ma, jare icü omi cavi, jare uyemingueta cavi ma. ³⁶ Jayave Jesús oyocui reta agüiye vaerá umimbeu quía pe. Ērei yepe tēi oyocui ye ye, jeseve jae reta umimbeuñoi íru vae reta pe. ³⁷ Jae reta ipiacañi ete, jare jei:

—Opaete mbaembae uyapo vae icavi ete co. Umbigüera iyapisa mbae vae reta uyandu vaerá, jare umbigüera vi upa reta uyemingueta vaerá.

8

Cuatro mil ucaru vae reta

(Mt 15.32-39)

¹ Pentí ara jeta uyembati yave, mbaeti ma mbae güinoi reta jou vaerá. Jayave Jesús ueni jemimboe reta.

² —Aiparareco cua yati vae reta —jei—. Echa'á mbapi ara ma ñugüinoi che ndive, jare mbaeti ma mbae güinoi jou vaerá —jei jemimboe reta pe—. ³ Amondo yave jenta coti ucaru mbae reve, ipituta co reta tape rupi. Echa'á amocue yugüeru mbiri güi —jei chupe reta.

⁴ —¿Quiráita pa yandepuere ñamee mbiyape chupe reta cua mbaeti quiave ico vae pe? —jei jemimboe reta Jesús pe.

⁵ Jayave Jesús upirandu chupe reta:

—¿Mbovi pa mbiyape penoi?

—Ime nonoi siete —jei reta chupe.

⁶ Jayave Jesús oyocui yati vae reta uguapi vaerá ivi pe. Jayave uipisi jocua siete mbiyape, jare umee yasurupai Tumpa pe. Jayave upisãa mbiyape, jare umee jemimboe reta pe, jae reta umee vaerá yati vae reta pe. Jayave jucuarái uyapo reta. ⁷ Jare güinoi vi mbovi pira michi vae reta. Cua re vi Jesús umee yasurupai Tumpa pe, jare jei

jemimboe reta pe cua vi umee vaerā yati vae reta pe. ⁸ Opareve ucaru, jare iyangapii reta. Jayave Jesús jemimboe reta umbati tembú uñepisāacue jembire vae, jare umitinee siete canasta. ⁹ Jare joco pe ñugüinoi vae reta uyepapa cuatro mil rupi. Jayave Jesús omondo ye yati vae reta. ¹⁰ Jayave jae jare jemimboe reta uyupi chalana pe, jare yugüiraa ivi Dalmanuta jee vae pe.

Fariseo reta uipota uecha miacañi

(Mt 16.1-4; Lc 11.29; 12.54-56)

¹¹ Jayave yugüeru fariseo reta, jare umbipi uyeaca Jesús ndive.

—Eechaca oreve miacañi ara güi —jei reta chupe.

Jae reta uipota uicuaa uyapota ra miacañi chupe reta. ¹² Jayave Jesús iañeequi.

—¿Maera pa añave yugüireco vae reta uipota aechaca vaerā chupe reta miacañi? —jei—.

Añete che jae peve, ndarau uyeechaca miacañi cua reta pe —jei chupe reta.

¹³ Jayave Jesús ueya reta, jare uyupi ye chalana pe oo i guasu jovaicho pe.

Fariseo reta ilevadura

(Mt 16.5-12)

¹⁴ Jare Jesús jemimboe reta ñacañi güeru vaerā mbiyape. Pentiño mbiyape güinoi chalana pe. ¹⁵ Jare Jesús jei chupe reta:

—Piñemoa ngatu fariseo reta jare Herodes ilevadura güi.

¹⁶ Jayave jemimboe reta jei uyupe:

—Cua jei, yaru'ā mbiyape ramo.

¹⁷ Jesús uicuaa chugüi mbae jei reta vae, jare jei chupe reta:

—¿Maera pa piyemingueta mbiyape peru mbae vae re? ¿Ndeño pa picuaa cavi? ¿Tanta mbate pa co pepia? —jei—. ¹⁸ Peresa jare peapia penoi. ¿Peecha'ā pa jare piyandu'ā pa? ¿Pemandua'ā pa? —jei—. ¹⁹ Cue yave apisāa pandepo mbiyape, ucaru vaerā cinco mil vae reta. Tembú jembirecue pembati yave, ¿mbovi canasta pa pemitinee? —jei.

—Numitinee doce —jei reta chupe.

²⁰ —Jare siete mbiyape apisāa vi, ucaru vaerā cuatro mil vae reta. Tembú jembirecue pembati yave, ¿mbovi canasta pa pemitinee? —jei Jesús.

—Numitinee siete —jei reta chupe.

²¹ Jayave Jesús jei chupe reta:

—¿Ndeño pa picuaa cavi?

Jesús umbigüera jesa mbae vae Betsaida pe

²² Jare yugüiraa uvāe Betsaida pe. Jayave amocue vae güeru Jesús pe cuimbae jesa mbae vae, jare jae reta uyerure chupe oñono vaerā ipo jese. ²³ Jayave Jesús uipoco güiraa cuimbae jesa mbae vae tenta guasu güi. Jayave undivi cuimbae jesa re, jare oñono ipo jese.

—¿Ndepuere pa mbae ndeecha? —jei chupe.

²⁴ Cuimbae umae.

—Cuimbae reta aecha —jei Jesús pe—. Ērei ivira reta echa cheve. Ērei aecha uguata ñugüinoi —jei.

²⁵ Jayave Jesús oñono ye ipo jesa re, uecha cavi vaerā. Jayave ramo uecha cavi opaete mbaembae. ²⁶ Jayave Jesús oyocui:

—Agüiye ecua cua tenta guasu rupi. Jare agüiye emimbeu quía pe ave jcoropi —jei chupe.

Jayave omondo jenta pe.

Pedro jei Jesús co jae Cristo, Tumpa ombou vae

(Mt 16.13-20; Lc 9.18-21)

²⁷ Coiño tenta guasu Cesarea Filipino güi ñugüinoi amocue tenta guasu-rai reta. Jocoti yugüiraa Jesús jare jemimboe reta. Jare tape rupi Jesús upirandu jemimboe reta pe:

—¿Quía pa co che ñru vae reta pe?

²⁸ Jae reta umimbeu chupe:

—Amocue vae jei nde co jae Juan upurumbibautizase vae, jare ñru vae reta jei nde co jae Elías, jare ñru vae reta jei nde co jae penti Tumpa iñee aracae umimbeu vae —jei reta.

²⁹ Jayave Jesús upirandu chupe reta:

—Jare ¿quía pa co che peve?

Jayave Pedro jei chupe:

—Nde co jae Cristo, Tumpa ombou vae.

³⁰ Jayave Jesús oyocui reta agüiye vaerã umimbeu quía pe.

Jesús umimbeu umanota co

(Mt 16.21-28; Lc 9.22-27)

³¹ Jayave Jesús umimbeu chupe reta:

—Che cuimbaerã ayeyapo vae jetata co aiporara. Jare tenta guasu pegua reta itenondegua reta, sacerdote reta itenondegua reta, jare mboroyocui re oporomboe vae reta chererĩrota jare cheyucacata. Èrei mbapi ara rupi aicove yeta ayu umanocue vae reta ipite güi —jei chupe reta.

³² Cua umimbeu cavi chupe reta. Jayave Pedro güiraa Jesús ĩru reta ipite güi, jare umbipi umbieta chupe. ³³ Èrei Jesús uyerova umae ĩru jemimboe reta coti, jare uñeengata Pedro pe.

—Esiri chegüi, Satanás —jei chupe—. Echa'ã nde ndiyemingueta neĩ ivi pegua reta uyemingueta rami, ndiyemingueta'ã Tumpa uyemingueta rami —jei.

³⁴ Jare Jesús ueni jemimboe reta jare ĩru joco pe ñugüinoi vae reta. Jayave jei chupe reta:

—Ime yave quía uipota oo cherupíe vae, tiñacañi iyugüi, tovoi icurusu, jare too cherupíe —jei—. ³⁵ Uipota uñuvatu jecove vae ndarau ipuere. Èrei jocua umeeta jecove chereco pegua jare Tumpa ñíee icavi vae jeco pegua vae uñuvatuta co —jei—. ³⁶ ¿Mbae ra uminganata quía, umingana yave opaete ivi pegua, èrei ipuere'ã yave uñuvatu jecove? ³⁷ ¿Mbovi ra umbiepita quía ogua ye vaerã jecove? —jei—. ³⁸ İvi pegua añave yugüireco vae reta güirovia'ã Tumpa jare uyapo icavi mbae vae. Ime yave quía imara cheré jare chiñee re cua reta ipite pe vae, che cuimbaerã ayeyapo vae chemarata vi jese, ayu ye yave cheRu imbaepuere reve ángel uñeñono tee Tumpa peguarã vae reta ndive —jei chupe reta.

9

¹ Jesús jei chupe reta: —Añete che jae peve, ndei amocue cua pe ñugüinoi vae umano mbove, uechata reta Tumpa iporoyocua mbaepuere pegua.

Jesús uyembiambie

(Mt 17.1-13; Lc 9.28-36)

² Seis ara ma uasa yave, Jesús güiraa Pedro, Jacobo jare Juan ĩru reta ipite güi penti ivitu guasu ivate vae re, jare joco pe uyembiambie jae reta jovai. ³ Jemimonde umbipi uvera jare tĩ asi. Mbaeti penti ave umbaeputuca vae ipuere umitĩ asi jucuarãi. ⁴ Jare uyecuaa chupe reta Elías jare Moisés uyemingueta ñugüinoi Jesús ndive. ⁵ Jayave Pedro jei Jesús pe:

—Oporomboe vae, icavi co ñãi vaerã cua pe. Nduyapota mbapi guarasã ñanaroqui pegua, penti nembraerã, penti Moisés peguarã jare penti Elías peguarã —jei.

⁶ Echa'ã Jesús jemimboe reta uquiye ete, jare Pedro uicuaa'ã mbae jei vaerã. ⁷ Jayave ou amapĩtu umĩguarasã reta, jare amapĩtu güi uyendu ñee jei:

—Cua co jae cheRai aau ete vae. Piyapisaca jese —jei.

⁸ Jare aramoĩño umae reta yave, uecha'ã ma quía jae reta ndive, jaeño Jesús.

⁹ Jare ivitu guasu güi ugüeyi yugüeru rambueve, Jesús oyocui reta:

—Agüiye pemimbeu quía pe cua peecha vae, ndei che cuimbaerã ayeyapo vae aicove ye ayu umanocue vae reta ipite güi mbove —jei chupe reta.

¹⁰ Jáeramo umimbeu'ã quía pe, èrei upirandu reta uyupe:

—¿Mbae pa uipota jei cua umimbeu yandevae vae? ¿Quirãita pa icove ye ou umanocue vae reta ipite güi? —jei reta.

¹¹ Jayave jae reta upirandu Jesús pe:

—¿Maera pa jei mboroyocui re oporomboe vae reta Elías rani co outa?

¹² —Añete Elías rani co outa —jei Jesús chupe reta—, jare opaete uyapicatuta. Jare ¿mbae ra uyecuatía oĩ Tumpa ñíee pe che cuimbaerã ayeyapo vae re? Uyecuatía oĩ che

jeta aiporara jare ĩru vae reta chererĩrota —jei—. ¹³ Ęrei che jae peve, Elías ou ma co, jare amocue vae uyapo chupe jae reta uipota vae, Tumpa ĩnee pe uyecuatía oĩ rami —jei chupe reta.

Jesús umbigüera cunumi añã oya jese vae
(Mt 17.14-21; Lc 9.37-43)

¹⁴ Jare yugüeru uvãe yave ĩru jemimboe reta ñugüinoi vae pe, uecha jeta yati ñugüinoi iyipi rupi, jare mboroyocui re oporomboe vae reta uyeaca ñugüinoi jae reta ndive.

¹⁵ Jayave opaete joco pe ñugüinoi vae reta uecha Jesús, jare ipiacañi reta. Jayave osi yugüeru reta icoti, jare umbisaluda reta. ¹⁶ Jayave Jesús upirandu chupe reta:

—¿Mbae re pa piyeaca peĩ jae reta ndive?

¹⁷ Jayave penti cuimbae yati vae reta ipite pe oĩ vae jei chupe:

—Oporomboe vae, aru ndeve cherai. Añã oya jese jare umbuupa —jei—. ¹⁸ Jare que rupi oĩ vae pe añã oya jese yave, joco pe umbiriri, jare cunumi iyuru tĩriyai, jã umbiquirũni jare jete opa uñemitanta —jei—. Ayerure tẽi ma nderemimboe reta pe umbisiri vaerã añã chugüi, ěrei ipuere'ã reta —jei cuimbae Jesús pe.

¹⁹ Jayave Jesús jei chupe reta:

—Pe reta cua ivi pe pico vae pepurugüirovia'ã. ¿Quirãĩ regua ra apitata pe reta ndive? ¿Quirãĩ regua ra arupiata peve? Peru cheve cua pe jocua cunumi —jei.

²⁰ Jayave güeru chupe, jare añã uecha yave Jesús, jupivoĩño umbiriri tanta jocua cunumi jare oa ivi re. Uyapayere, jare iyuru tĩriyai. ²¹ Jayave Jesús upirandu tu pe:

—Quirãĩ yave ma pa uyeyapo chupe cua?

—Michi güiive uyeyapo chupe —jei tu—. ²² Jare jeta vese ma uiti tata pe jare ĩ pe, uyuca vaerã tẽi. Ęrei nde ndepuere yave mbae ndiyapo chupe, oreparareco jare orembori —jei chupe.

²³ Jayave Jesús jei chupe:

—¿Ndepuere pa ndepurugüirovia? Upurugüirovia vae ipuere uyapo opaete mbaembae —jei.

²⁴ Jayave cunumi tu ĩneeãta reve jei:

—Ndugüirovia. Apurugüirovia'ã yave, chembori apurugüirovia vaerã —jei.

²⁵ Jare Jesús uecha yave jeta vae uyembati joco pe, uñeengata añã pe.

—Añã upurumbuupa jare upurumbiapisa mbae vae, che ndoyocui ndesiri vaerã cua cunumi güi, jare agüiye etei ma eya ye jese —jei añã pe.

²⁶ Jare añã jãse ma yave, umbiriri tanta cunumi, jare usiri chugüi. Jare cunumi umano echa upita. Jare jeta joco pe ñugüinoi vae reta jei tẽi:

—Umano ma.

²⁷ Ęrei Jesús uipisi cunumi ipo pe, jare umupũa. Jare cunumi uyemboi. ²⁸ Jare Jesús uique yave penti o pe, jemimboe reta upirandu chupe, jae retaño jae ndive ñugüinoi yave:

—¿Maera pa ore orepuere'ã numbisiri añã?

²⁹ —Ndarau pepuere pembisiri cua nunga añã, jaeño piyerure yave Tumpa pe piye-cuacu reve tembũ güi —jei Jesús chupe reta.

Jesús umimbeu ye umanota co
(Mt 17.22-23; Lc 9.44-45)

³⁰ Jesús jare jemimboe reta yugüiraa yave joco güi, uasa Galilea rupi. Jare Jesús uipota'ã quã uicuaa vaerã. ³¹ Echa'ã omboe güinoi jemimboe reta.

—Che cuimbaerã ayeyapo vae penti vae chemeeta ĩru vae reta pe. Jae reta cheyucata —jei chupe reta—. Ęrei amano ma yave, mbapi ara rupi aicove yeta ayu umanocue vae reta ipite güi —jei.

³² Ęrei jae reta uicuaa cavi'ã mbae re ra Jesús umingueta vae, jare uipiu reta upirandu vaerã chupe jese.

¿Quã ra tenondegua ĩru reta güi vae?
(Mt 18.1-5; Lc 9.46-48)

³³ Jayave yugüiraa uvãe Capernaum pe. Jare jenta pe oĩ yave, Jesús upirandu jemimboe reta pe:

—¿Mbae re pa piyemingueta peyu tape rupi?

³⁴ Ērei jae reta iquĩĩño. Echa'ã tape rupi jae reta uyemingueta yugüeru quía ra tenondegua ĩru reta güi vae. ³⁵ Jayave Jesús uguapí, jare ueni jocua doce jemimboe reta. Jayave jei chupe reta:

—Ime yave quía uipota tenondeguarã ico vae, tuñemimichi opaete vae güi, jare tuyeyocui opaete ĩru reta pe —jei.

³⁶ Jayave ueni penti sambiaí, jare oñono jae reta ipite pe. Jayave uicuãva sambiaí, jare jei chupe reta:

³⁷ —Ime yave quía uyapo icavi vae cua nunga sambiaí pe cheree pe vae, cheve co uyapo icavi vae. Jare jocua cheve uyapo icavi vae, uyapo ví icavi vae chembou vae pe —jei.

Oyovaicho'ã yande ndive vae yanembori co

(Mt 10.42; Lc 9.49-50)

³⁸ Jayave Juan jei Jesús pe:

—Oporomboe vae, nduecha penti cuimbae nderee pe umbisiri añã reta oya jese vae reta güi, jare ndoe chupe agüiye ma uyapo vaerã. Echa'ã jae ñãneĩru'ã co —jei.

³⁹ —Agüiye pere chupe jucuarãĩ —jei Jesús chupe—. Echa'ã cheree pe miacañi uyapo vae ndarau jupivoĩño jei icavi mbae vae checoti —jei—. ⁴⁰ Echa'ã oyovaicho'ã yande ndive vae yanembori co —jei—. ⁴¹ Aramoí quía umeeta peve penti vaso i cheree pe vae. Jucuarãĩ uyapo yave cheré perovia ramo, añete che jae peve, ambijecoviata co chupe —jei—.

Mbaeyoa uyapoca vae

(Mt 18.6-9; Lc 17.1-2)

⁴² Ime cheré güirovia vae reta. Ime yave quía penti cua nunga pe mbaeyoa uyapoca vae, icavita tẽi co ĩru vae reta uñapĩti vaerã iyayu re penti ita tuiicha vae umbaesõ pipe vae, jare omombo vaerã i guasu pe —jei chupe reta—. ⁴³ Ndepo jovaicho uyapoca yave mbaeyoa ndeve, iyasia ndiyugüi. Icavi co tecove opa mbae vae nenoĩ vaerã ndepõ jovaicho mbae reve, tata guasu opa mbae vae pe mocui ndepõ reve ndeo vaerã tẽi güi —jei—. ⁴⁴ Echa'ã tata guasu pe taso ndarau umano, jare tata ndarau ove —jei—. ⁴⁵ Jae ramiño ví ndepi jovaicho uyapoca yave mbaeyoa ndeve, iyasia ndiyugüi. Icavi co tecove opa mbae vae nenoĩ vaerã ndepi jovaicho mbae reve, tata guasu opa mbae vae pe mocui ndepi reve Tumpa nemondo vaerã tẽi güi —jei—. ⁴⁶ Tata guasu pe taso ndarau umano, jare tata ndarau ove —jei—. ⁴⁷ Jae ramiño ví nderesa jovaicho uyapoca yave mbaeyoa ndeve, eequi ndiyugüi. Icavi co ndico vaerã Tumpa iporoyocua pe nderesa jovaicho mbae reve, tata guasu pe mocui nderesa reve Tumpa nemondo vaerã tẽi güi —jei—. ⁴⁸ Tata guasu pe taso ndarau umano, jare tata ndarau ove —jei ye chupe reta—. ⁴⁹ Echa'ã tata uñeñonocata opaete re, yuquí uñeñonoca tembũ pe rami. Yuquí uñeñonocata ví opaete maemimba Tumpa pe uyeyuca vae re —jei—. ⁵⁰ Yuquí icavi co yau vaerã. Ērei jembochi'ã ma yave, ¿quirãita ra jembochi ye? —jei—. Piyapo yuquí uyapo rami, jare pico cavi pãve —jei chupe reta.

10

Umenda vae uyemombo vae reta

(Mt 19.1-10; Lc 16.18)

¹ Jayave Jesús oo joco güi Judea pe Jordán jovaicho pe. Joco pe jeta uyembati ye jae oĩ vae pe. Jayave Jesús omboe reta, jecoño mai uyapo rami.

² Jayave fariseo reta yugüeru Jesús oĩ vae pe. Jae reta uipota tẽi uyavica chupe. Jáeramo upirandu reta chupe:

—¿Jupi pa cuimbae omombo vaerã jembireco?

³ —¿Mbae pa peocui Moisés? —jei Jesús chupe reta.

⁴ —Moisés umaẽño cuimbae re uicutatía vaerã tupapire jembireco omombo vaerã —jei reta chupe.

⁵ —Moisés uicutatía cua mboroyocui pepiatanta ramo —jei Jesús—. ⁶ Ērei Tumpa uyapo ramo yave, uyapo cuimbae jare cuña —jei—. ⁷ Jáeramo cuimbae usirita tu jare ichi güi, jare oota ico vaerã jembireco ndive —jei—. ⁸ Jare mocui vae uyeyapota penti ramiño. Jáeramo mbaeti ma mocui rami. Yugüireco penti ramiño —jei—. ⁹ Jáeramo agüiye quía tumbisiri Tumpa umiũru vae reta —jei chupe reta.

¹⁰ Jare o pe ñugüinoi yave, jemimboe reta upirandu ye Jesús pe cua re. ¹¹ Jayave Jesús jei chupe reta:

—Cuimbae omombo jembireco jare umenda ñru cuña ndive yave, uyuvanga menda re jembireco omombo vae coti. ¹² Jare cuña usiri ime güi jare umenda ñru cuimbae ndive yave, uyuvanga vi menda re —jei.

Jesús uyerure Tumpa pe sambiai reta re
(Mt 19.13-15; Lc 18.15-17)

¹³ Jare amocue vae güeru Jesús oĩ vae pe sambiai reta, Jesús oñono vaerã ipo jese reta. Ërei jemimboe reta uñeengata güeru vae reta pe. ¹⁴ Jesús cua uecha yave, pochi jemimboe reta pe, jare jei chupe reta:

—Pemaño sambiai reta re yugüeru vaerã checoti. Agüiye piyopia. Echa'ã cua nunga uyeyocui Tumpa pe iporoyocua pe —jei—. ¹⁵ Añete che jae peve, pipota'ã yave Tumpa pe piyeyocui vaerã penti sambiai uipota rami, ndarau pico Tumpa iporoyocua pe —jei.

¹⁶ Jayave Jesús uicuãva sambiai reta, jare oñono ipo jese reta, jare uyerure Tumpa pe jese reta.

Cuimbae icocatu vae
(Mt 19.16-30; Lc 18.18-30)

¹⁷ Jare Jesús joco güi oo yave, penti cuimbae osi ou icoti. Uyeatica Jesús jovai.

—Oporomboe vae, nde ndepiacavi co —jei Jesús pe—. ¿Mbae pa ayapota anoi vaerã tecove opa mbae vae? —jei.

¹⁸ —¿Maera pa ndere cheve chepiacavi vae co? —jei Jesús chupe—. Mbaeti quía ipiacavi, jaeño co Tumpa —jei—. ¹⁹ Nde ndicuaa co mboroyocui reta: 'Agüiye iyuvanga menda re. Agüiye epuruyuca. Agüiye nemonda. Agüiye ndapu ñru vae re. Agüiye epurumbitavi. Ipiu nderu jare ndesi' —jei chupe.

²⁰ —Oporomboe vae, ayavi'ã penti ave cua mboroyocui reta chemichi güiye —jei cuimbae chupe.

²¹ Jesús umae jese uau reve.

—Ime mbae uata ndiyapo vaerã —jei chupe—. Ecu emee opaete mbaembae neno vae corepoti re, jare emee ndecorepoti iparavete vae reta pe, jare ndicocatuta ara pe. Jayave evoi ndecurusu, jare eyu cherupé —jei.

²² Ërei cua yandu yave, cuimbae oo ipiatiti reve. Echa'ã jeta mbaembae güinoi.

²³ Jayave Jesús umae iyipi rupi, jare jei jemimboe reta pe:

—Yavai ete co icocatu vae reta uique vaerã Tumpa iporoyocua pe.

²⁴ Jemimboe reta ipiacañi Jesús jei vae re. Ërei Jesús jei ye:

—Cherivi reta, yavai ete co icocatu vae reta uique vaerã Tumpa iporoyocua pe. Echa'ã jei tēi ipia pe: 'Icavita co cheve. Echa'ã jeta mbaembae anoi' —jei, jei Jesús—. ²⁵ Yavai ete icocatu vae uique vaerã Tumpa iporoyocua pe, maemimba camello jee vae yuu jesacua rupi uasa vaerã güi —jei.

²⁶ Jayave jae reta ipiacañi ete, jare upirandu uyupe:

—Jucuarã yave, ¿quía pa ipuere uyembiasaca?

²⁷ Jesús umae jese reta jare jei:

—Ivi pegua reta ipuere'ã uyembiasa. Ërei Tumpa ipuere umbiasa reta. Echa'ã Tumpa ipuere uyapo opaete mbaembae —jei chupe reta.

²⁸ Jayave Pedro jei Jesús pe:

—Mase, ore opaete mbaembae ndueya, ndoyu vaerã nderupé.

²⁹ —Añete che jae peve —jei Jesús—, ime yave quía ueya jenta, ani tiquei reta, ani tivi reta, ani jindi reta, ani tu, ani ichi, ani jembireco, ani isambiai reta, ani iivi reta chereco pegua jare Tumpa iñee icavi vae jeco pegua vae, ³⁰ cien rupi jecoviata co chupe ivi pe ico rambueve. Jecoviata jenta reta, tiquei reta, tivi reta, jindi reta, ichi reta, isambiai reta jare iivi reta —jei—. Ërei ñru vae reta uyapota icavi mbae vae chupe. Ërei taicue rupi Tumpa umeeta chupe tecove opa mbae vae —jei—. ³¹ Ërei Tumpa umbitaicuaeta uyembutuicha vae reta, jare umitenondeta uñemimichi vae reta —jei chupe reta.

Jesús umimbeu ye umanota co
(Mt 20.17-19; Lc 18.31-34)

³² Jesús jare jae ndive ñugüinoi vae reta yugüiraa tape Jerusalén coti oo vae rupi, jare Jesús tenonde oo. Jare jaicue rupi yugüiraa vae reta ipiacañi jare uquiye. Jayave Jesús ueni ye jocua doce jemimboe reta ñru reta ipite güi, jare umbipi umimbeu chupe reta mbae uyeyapota oï chupe vae.

³³—Mase, yaa co ñai Jerusalén pe —jei chupe reta—. Jare che cuimbaerã ayeyapo vae penti vae chemeeta sacerdote reta itenondegua reta jare mboroyocui re oporombocue vae reta pe. Jae reta jeita amano vaerã, jare chemeeta judío mbae vae reta pe —jei—. ³⁴Jae reta cheyoyaita, chenukata chicote pe, undivita cheré, jare cheyucata. Ërei mbapi ara rupi aicove yeta ayu umanocue vae reta ipite güi —jei chupe reta.

Jacobo jare Juan uyerure vae
(Mt 20.20-28)

³⁵ Cua jaicue rupi Zebedeo tai reta Jacobo jare Juan jee vae yugüeru Jesús coti jare jei chupe:

—Oporombocue vae, nduipota ndiyapo vaerã oreve nduyerureta ndeve jese vae.

³⁶—¿Mbae pa pipota ayapo vaerã peve? —jei Jesús chupe reta.

³⁷—Ndiyembutuichaca yave, emaeño oreré nduguapi vaerã ndeyipi pe, penti ndeacata coti jare ñru ndeaso coti —jei reta chupe.

³⁸—Picuaa'ã mbae re piyerure vae —jei Jesús—. ¿Pepuereta pa piporara che aiporata vae rami? ¿Pepuereta pa piyembibautizaca che ayembibautizacata vae rami? —jei.

³⁹—Orepuereta co —jei reta.

—Añete pe reta piporata che aiporata vae rami, jare pe reta piyembibautizacata che ayembibautizacata vae rami —jei Jesús—. ⁴⁰ Ërei chepuere'ã jae peve peguapi vaerã cheyipipi pe, penti cheacata coti jare ñru cheaso coti. Echa'ã Tumpa umicuatiro ma joco pe uguapita vae reta peguarã —jei chupe reta.

⁴¹ Jare ñru diez Jesús jemimboe reta cua uyandu yave, pochí reta Jacobo jare Juan pe.

⁴² Jayave Jesús ueni reta.

—Picuaa cavi co cua —jei chupe reta—. Mburuvicha ivi pegua reta oporoyocui, jare mbaepuere güinoi vae reta jei ñru reta pe mbae uyapo vaerã —jei—. ⁴³ Ërei pe reta agüiye piyapo jucuarã —jei—. Ime yave penti pepite pe oï vae uipota mbaepuere güinoi vae, tuyeyocui ñru reta pe. ⁴⁴ Jare ime yave penti pepite pe oï vae uipota tenondeguarã ico vae, tuyeyocui ñru reta pe —jei—. ⁴⁵ Echa'ã che cuimbaerã ayeyapo vae ayu ayeyocui vaerã ñru vae reta pe. Ayu'ã ñru vae reta uyeyocui cheve vaerã. Ayu amano vaerã, jeta vae aepi vaerã —jei chupe reta.

Bartimeo jesa mbae vae ucuera
(Mt 20.29-34; Lc 18.35-43)

⁴⁶ Jayave yugüiraa uvãe tenta guasu Jericó pe. Jare Jesús oo ye Jericó güi jemimboe reta jare jeta vae reta ndive. Jare Timeo tai Bartimeo jee vae uguapi uyerure oï mbae re tape jembei pe. Bartimeo co jae jesa mbae vae. ⁴⁷ Jare uicuaa Jesús Nazaret pegua uasa oo oï yave, iñeëata reve jei:

—Cheparareco, Jesús. Nde co jae David iñemoñaeta reta pegua —jei.

⁴⁸ Jeta joco pe ñugüinoi vae reta uñeengata chupe. Uipota tēi umiqui. Ërei jae jeiete iñeëata reve jei:

—David iñemoñaeta reta pegua, cheparareco.

⁴⁹ Jayave Jesús uyemboi.

—Peeni —jei.

Jayave ueni reta jesa mbae vae.

—Iñemiatangātu. Epüa. Nereni ma oï —jei reta chupe.

⁵⁰ Jayave jesa mbae vae ueya iyasoya, jare upüa voi oo Jesús coti. ⁵¹ Jesús upirandu chupe:

—¿Mbae pa ndipota ayapo vaerã ndeve?

—Tamae, oporombocue vae —jei jesa mbae vae.

⁵² Jayave Jesús jei chupe:

—Ndepuere ndeo. Ndecuera ma, nderovia cheré ramo —jei.

Jupivoño ipuere umae, jare oo Jesús jaicue tape rupi.

11

Jesús uique Jerusalén pe

(Mt 21.1-11; Lc 19.28-40; Jn 12.12-19)

¹Jare coiño ma Jerusalén güi ñugüinoi yave, yugüiraa uvãe tenta guasu-rai reta Betfagé jare Betania iyipi pe, ivitu guasu Olivos jovai. Jayave Jesús oyocui mocui jemimboe reta:

²—Pecua pea tenta guasu-rai yanderovai oĩ vae pe —jei chupe reta—. Peo pevãe rupive, pevãeta penti mburica tairusu vae ñeñapíti oĩ. Ndeĩ ave etei quía opo jese. Piyora jare peru —jei—. ³Jare ime yave quía jei peve vae: ‘¿Maera pa cua piyapo?’ pere chupe: ‘YandeYa uipota uiporu, ãrei imambae güeruruca yeta cua pe’ —pere, jei chupe reta.

⁴Jayave Jesús jemimboe reta yugüiraa, jare uvãe mburica tairusu vae. Uñeñapíti oĩ tape pe penti onque jovai. Jayave jae reta oyora. ⁵Jare amocue joco pe ñugüinoi vae jei Jesús jemimboe reta pe:

—¿Maera pa piyora peĩ mburica?

⁶Jesús jemimboe reta jei chupe reta Jesús oyocui reta vae. Jayave joco pe ñugüinoi vae reta umaẽño güiraa vaerã. ⁷Jayave güeru mburica tairusu vae Jesús oĩ vae pe. Jayave Jesús jemimboe reta oñono iyasoya mburica icupe re, jare Jesús opo jese. ⁸Jare jeta vae uipiso iyasoya tape rupi mburica jenonde, jare ñru vae reta uyasia ñanaroqui jare oñono tape rupi. ⁹Jare Jesús jenonde yugüiraa vae reta jare jaicue rupi yugüiraa vae reta ñneãta reve jei:

—¡Icavi col Tuyembadoraca yandeYa jee re ou vae. ¹⁰Oporoyocuita yandetenondegua David jee vae oporoyocui rami. Tuyembadoraca. Tei reta ‘icavi co’ ara pe —jei reta.

¹¹Jare Jesús oo uvãe Jerusalén pe, jare uique Tumpa jo pe. Joco pe umae opaete mbaembae re. Jare caaru ma yave, ou ye Betania pe jocua doce jemimboe reta ndive.

Iva ía mbae vae

(Mt 21.18-19)

¹²Piareve pe yugüiraa ye Betania güi, jare Jesús iyembai. ¹³Jare mbiri güi uecha penti íva joqui reve, jare oo umae jese ime ra ía. Ërei uecha ía'ã, jaẽño joqui. Echa'ã ndei uvãe íva ía vaerã. ¹⁴Jayave Jesús jei íva pe:

—Ndarau etei ma ndeía.

Jare jemimboe reta uyandu.

Jesús Tumpa jo pe uyapo vae

(Mt 21.12-17; Lc 19.45-48; Jn 2.13-22)

¹⁵Jare yugüiraa uvãe Jerusalén pe. Jayave Jesús uique Tumpa jo pe, jare umbipi omoẽ joco güi umaemee vae reta jare mbae ogua vae reta, jare umbiyapara corepoti uipepica vae reta imesa reta jare picasu reta umee vae reta jenda reta. ¹⁶Jare umaẽño'ã quía re jivita reve uguata vaerã Tumpa jo rupi. ¹⁷Jare jei joco pe ñugüinoi vae reta pe:

—Tumpa ñnee pe uyecuatía oĩ cuarãi: ‘Chero uyembijeeta o opaete ivi pegua reta ipuere uyerure Tumpa pe pipe vaerã.’ Jucuarãi uyecuatía oĩ. Ërei pe reta piyapo ma imonda vae reta ñnemía rami —jei chupe reta.

¹⁸Jayave sacerdote reta itenondegua reta jare mboroyocui re oporomboe vae reta cua uyandu yave, ueca quirãi ipuere uyucaca vaerã Jesús. Echa'ã jae reta uquiye chugüi, opaete vae ipiacañi iporomboe re ramo. ¹⁹Jare pítuipi yave, Jesús ou ye Jerusalén güi.

Iva yipi ma

(Mt 21.20-22)

²⁰Piareve pe neimbove yave uasa yugüiraa ye yave, uecha íva yipi ma iyipi güive. ²¹Jayave Pedro imandúa jese, jare jei Jesús pe:

—¡Emae, oporomboe vae! íva pe ndere iata'ã ma vae yipi ma —jei.

²²Jesús jei jemimboe reta pe:

—Perovia Tumpa. ²³Añete che jae peve, yae yave cua ivitu guasu pe: ‘Ecuá iyemombo í guasu pe’, jare yae'ã yave yandepia pe: ‘Ndarau ndipo uyeyapo’, ãrei yarovía yave yae vae uyeyapota, uyeyapota co yandeve —jei chupe reta—. ²⁴Jáeramo che jae peve, ime yave mbae pipota vae, piyerure Tumpa pe jese. Jare perovia yave Tumpa umeeta co peve, penoita co —jei—. ²⁵Jare piyerure peĩ Tumpa pe yave, pembiasa ñru ícavi mbae vae uyapo pecoti vae pe, peRu ara pe oĩ vae umbiasa vaerã vi peve pembaeyoa reta. ²⁶Ërei

pembiasa'ã yave ñru icavi mbae vae uyapo pecoti vae pe, peRu ara pe oĩ vae ndarau vi umbiasa peve pembaeyoa reta —jei.

Jesús imbaepuere

(Mt 21.23-27; Lc 20.1-8)

²⁷ Jare yugüiraa uvãe ye Jerusalén pe. Jare Jesús uguata rambueve Tumpa jo rupi, yugüeru jae oĩ vae pe sacerdote reta itenondegua reta, mboroyocui re oporomboe vae reta, jare tenta guasu pegua reta itenondegua reta. ²⁸ Jae reta upirandu chupe:

—¿Mbae nunga mbaepuere pa nenoĩ cua mbaembae ndiyapo vaerã? ¿Quía pa umee ndeve mbaepuere cua ndiyapo vaerã? —jei reta.

²⁹ Jayave Jesús jei chupe reta:

—Che vi tapirandu peve mbae re. Pemimbeu yave cheve, che vi amimbeuta peve mbae nunga mbaepuere anoi cua mbaembae ayapo vaerã —jei—. ³⁰ ¿Quía pa ombou Juan upurumbibautiza vaerã? ¿Tumpa pa ombou? anĩ ¿ivi pegua reta pa ombou? Pemimbeu cheve —jei chupe reta.

³¹ Jayave jae reta jei uyupe:

—Yae yave: 'Tumpa co ombou', jae jeita yandave: 'Jucuarãĩ yave, ¿maera pa perovia'ã?'

³² Ani ¿yaeta pa: 'Ivi pegua reta co ombou'? —jei reta.

Èrei jae reta uquiye tenta guasu pegua reta güi. Echa'ã opaete vae güirovia Juan co jae añetete penti Tumpa ñnee umimbeu vae. ³³ Jáeramo jei reta Jesús pe:

—Nduicuaa'ã.

—Che vi ndarau amimbeu peve mbae nunga mbaepuere anoi cua mbaembae ayapo vaerã —jei Jesús chupe reta.

12

Co iporúa icavi mbae vae reta

(Mt 21.33-46; Lc 20.9-19)

¹ Jayave Jesús umbipi imiari chupe reta umijaanga reve.

—Ico penti cuimbae icorã uiquẽse vae, jare oñoti pipe jeta uva —jei—. Jayave oyoo ivi, jare uyapo uva uitami pipe vaerã. Uyapo vi penti chapapa, umae vaerã ivate güi opaete co re. Jayave uiporuca ico ñru vae reta pe, jae reta uyandareco vaerã jese. Jayave co iya oo mbiri ambie ivi pe —jei—. ² Jare uva yagüiye ma yave, co iya ombou penti jembiocui co iporúa reta pe, jae reta umbiyao vaerã tẽi uva chupe reta, iya güinoĩ vaerã imbaerã.

³ Èrei jae reta uipisi uinupa co iya jembiocui, jare omondo ye. Umee'ã etei chupe güiraa vaerã —jei—. ⁴ Jayave co iya ombou ye tẽi ñru jembiocui. Èrei co iporúa reta uyapi ita pe umpipere ññaca rupi, jare uyapo reta icavi mbae vae chupe. Jayave omondo ye —jei—.

⁵ Jayave co iya ombou ye tẽi ñru jembiocui. Èrei co iporúa reta uyuca cua. Jare jucuarãĩnoĩ uyapo reta jeta ñru co iya jembiocui reta pe. Jae reta uinupa amocue vae, jare uyuca ñru vae reta —jei Jesús—. ⁶ Co iya güinoĩ jaenõ penti tai uau ete vae. Taicue ete ombou cua tai co iporúa reta pe. Co iya jei tẽi: 'Aramoi jae reta uipiuta cheraĩ' —jei, jei chupe reta—.

⁷ Èrei co iporúa reta jei uyupe: 'Cua co jae iyarã vae. Yauca, jare yande yaicota co iyarã' —jei reta, jei—. ⁸ Jayave jae reta uipisi co iya tai uyuca omombo co güi —jei—. ⁹ ¿Mbae ra uyapota co iya? —jei—. Outa, opa uyuca vaerã jocua co iporúa reta, jare uiporucata ico ambie vae reta pe —jei Jesús—. ¹⁰ ¿Pemingueta'ã pa cua Tumpa ñnee pe uyecuatía oĩ vae? 'Ita tenta iyapoa reta omombo vae uyeyapo ma ita tenondegua vae.

¹¹ YandeYa uyapo cua.

Yaecha ma, jare yandepiacañi jese.'

Jucuarãĩ uyecuatía oĩ —jei chupe reta.

¹² Jayave jocua uyapisaca jese vae reta uipota tẽi uipisi Jesús. Echa'ã uicuaa catu cua umijaanga reve jei vae uicuaaca quirãĩ jae reta teco güinoĩ. Èrei uquiye tenta guasu pegua reta güi. Jáeramo ueyaño, jare yugüiraa.

¿Jupi pa yambiepi vaerã César pe?

(Mt 22.15-22; Lc 20.20-26)

¹³ Jayave jae reta ombou amocue fariseo reta jare herodiano reta, uyavica vaerã tẽi chupe jae uyemingueta'ã vae. ¹⁴ Jae reta yugüeru uvãe yave, jei Jesús pe:

—Oporombœ vae, nduicuaa nde ndere vae añete co. Nde nœmae oyovaque opaete pãve re. Nembutuicha'ã penti ave ïru vae güi. Nde ndeporombœ cavi quirãi Tumpa uipota yaico vaerã vae re —jei reta—. César yandœcui yambiepi vaerã chupe corepoti pe. ¿Jupi pa yambiepi vaerã chupe? ani ¿jupi'ã pa? ¿Yambiepita pa chupe? ani ¿yambiepita'ã pa chupe? —jei reta Jesús pe.

¹⁵ Èrei Jesús uicuaa jae reta uipota tẽi co umbitavi, jare jei chupe reta:

—¿Maera pa pipota piyavica cheve? Peru cheve penti corepoti taecha —jei.

¹⁶ Jae reta güeru chupe. Jayave jae upirandu chupe reta:

—¿Quía jova íã pa cua? ¿Quía jee pa cua uyecuatía oĩ vae? —jei.

—Cua César imbae co —jei reta.

¹⁷ —Pemeé César pe César pegua, jare pemee Tumpa pe Tumpa pegua —jei Jesús chupe reta.

Jare jae reta ipiacañi jese.

¿Icove yeta pa umanocue vae reta?

(Mt 22.23-33; Lc 20.27-40)

¹⁸ Jayave yugüeru vi Jesús oĩ vae pe amocue saduceo reta. Opaete saduceo reta jei umanocue vae reta icove ye'ã co. Saduceo yugüeru vae reta jei Jesús pe:

¹⁹ —Oporombœ vae, Moisés uicuatía ueya yandëve cuarã: 'Penti tiquei vae umano yave, jembirecocue mbaeti imembi chupe yave, cuimbae amiri tivi tumenda jocua cuña ndive. Jayave cuña imembi yave, cuimbae tumbijee sambiai tiquei amiri jee pe.' Jucuarã uicuatía Moisés —jei reta chupe—. ²⁰ Ico penti cuimbae seis tivi reta güinoi vae. Cua cuimbae umenda, jare umano umimembi mbae reve —jei reta—. ²¹ Cuimbae amiri jaicue rupigua umenda jembirecocue ndive, èrei umano vi umimembi mbae reve. Jae ramiño vi uyeyapo jaicue rupigua ye pe. ²² Opaete siete reve umenda jocua cuña ndive, jare opaete siete reve umano umimembi mbae reve. Taicue rupi cuña umano vi —jei reta—. ²³ Jayave umanocue vae reta icove ye yave, ¿quía nunga vae jembirecorã pa icota jocua cuña? Echa'ã opaete siete reve umenda jae ndive —jei reta.

²⁴ —Pe reta piyavi co —jei Jesús chupe reta—. Echa'ã picuaa'ã Tumpa iñee uyecuatía oĩ vae jare Tumpa imbaepuere —jei—. ²⁵ Echa'ã umanocue vae reta icove ye yave, cuimbae reta jare cuña reta ndarau umenda. Yugüirecota ángel ara pe ñugüinoi vae reta yugüireco rami —jei—. ²⁶ Tamimbeu peve umanocue vae reta regua. Icove yeta co. ¿Pemingueta'ã pa Moisés uicuatía vae? —jei—. Uyecuatía oĩ jocua yai regua, jare quirã ¿Tumpa jei Moisés pe jocua yai jendi vae ipite güi: 'Che co Abraham, Isaac jare Jacob iTumpa' —jei, jei chupe reta—. ²⁷ Tumpa mbaeti co umanocue vae reta iTumpa. Jae co tecove güinoi vae reta iTumpa. Tuicha co piyavi —jei.

Mboroyocui tenondegua vae

(Mt 22.34-40)

²⁸ Ou vi Jesús oĩ vae pe penti mboroyocui re oporombœ vae. Uyandu uyeaca reta, jare uicuaa Jesús umimbeu cavi co chupe reta. Jayave jae upirandu Jesús pe:

—¿Mbae nunga mboroyocui pa co jae tenondegua vae? —jei.

²⁹ Jesús jei chupe:

—Mboroyocui tenondegua vae co cua: 'Israel pegua, iyapisaca. YandœYa Tumpa, jaeño co Tumpa. ³⁰ Eau ndœYa Tumpa opaete ndepia reve, opaete nderecove reve, opaete ndepiyemingueta reve jare opaete nepirãta reve.' Cua co jae mboroyocui tenondegua vae —jei chupe—. ³¹ Jare jaicue rupigua co cua: 'Eau nderapicha nde ndiyerau rami.' Mbaeti ïru mboroyocui tenondegua cua reta güi vae —jei.

³² Jayave mboroyocui re oporombœ vae jei Jesús pe:

—Añete co, oporombœ vae. Icavi ndere Tumpa pentiño co jare mbaeti ye ïru.

³³ Jare yaau yave Tumpa opaete yandepia reve, opaete yanderecove reve, opaete yandepiyemingueta reve jare opaete ñanepirãta reve, jare yaau yave yanderapicha yandœ yayerau rami, jocua icavi opaete maemimba Tumpa peguarã ñamee vae reta güi —jei.

³⁴ Jare Jesús uyandu yave jae jei jupi cavi vae, jei chupe:

—Jeta'ã uata ndiyeyocui vaerã Tumpa pe iporoyocua pe.

Jare mbaeti ma quía uipota upirandu chupe mbae re.

¿Quía inemoñaá reta pegua pa co Cristo?

(Mt 22.41-46; Lc 20.41-44)

³⁵ Jare Jesús oporomboe oĩ Tumpa jo pe.

—¿Maera pa jei mboroyocui re oporomboe vae reta Cristo co jae David inemoñaá reta pegua? —jei—. ³⁶ Echa'á David etei jei Espiritu Santo rupi cuarãi:

‘YandeYa jei cheYa pe:

Eguapi cheyipi pe cheacata coti,

nderovaicho reta opa amiamiri regua.’

Jucuarãi jei David araca —jei Jesús—. ³⁷ ¿Quirãi pa ipuere ico David inemoñaá reta peguarã? Echa'á David etei jei chupe: ‘CheYa’ —jei Jesús chupe reta.

Jare jeta vae uyapisaca ñugüinoi Jesús re uyerovia reve.

Jesús umbijeco mboroyocui re oporomboe vae reta

(Mt 23.1-36; Lc 11.37-54; 20.45-47)

³⁸ Jare Jesús oporomboe yave, jei chupe reta:

—Piñemoa ngatu mboroyocui re oporomboe vae reta güi —jei—. Jae reta jecuaño uipota uguata jemimonde pucu vae reve, jare jecuaño uipota ñru vae reta pe uyembisaludaca vaerã calle reta rupi —jei—. ³⁹ Yugüiraa yave tupao pe jare para pe, jecuaño uipota uguapi tenda tenondegua vae reta pe —jei—. ⁴⁰ Jare upĩro reta cuña ime umano vae reta güi opaete imbaembae, jare pucu uyerure Tumpa pe upurumbitavi vaerã —jei—. Jae reta uiporara eteta co —jei chupe reta.

Cuña ime umano vae umee corepoti Tumpa pe

(Lc 21.1-4)

⁴¹ Penti ara Jesús uguapi oĩ corepoti jiru jovai Tumpa jo pe, jare uecha quirãi jeta yugüeru vae reta oñono corepoti pipe. Icatu vae reta oñono jeta corepoti. ⁴² Jare ou vi penti cuña ime umano vae iparavete vae. Jae oñono mocui riare. Jocua jeta'á co jepi.

⁴³ Jare Jesús ueni jemimboe reta jare jei chupe reta:

—Añete che jae peve, cua cuña ime vae iparavete vae uyapo jeta opaete ñru oñono vae reta güi —jei—. ⁴⁴ Echa'á opaete ñru reta güeru oñono jeta güinoi vae güi. Ërei cua cuña, yepe tẽi iparavete, oñono opaete güinoi vae. Jocua co jembú jepirã tẽi vae —jei chupe reta.

13

Tumpa jo uyeitita

(Mt 24.1-2; Lc 21.5-6)

¹ Jesús oẽ yave Tumpa jo güi, penti jemimboe jei chupe:

—Mase, oporomboe vae, icavi cua ita reta jare o reta.

² —¿Nemae pa neĩ cua o tuicha vae reta re? —jei Jesús chupe—. Ndarau upita penti ave ita ñru ita iárambo. Opaete uyeitita co —jei.

Mbaesusere reta uyeyapota vae

(Mt 24.3-28; Lc 21.7-24; 17.22-24)

³ Jare Jesús uguapi oĩ rambueve ivitu guasu Olivos re Tumpa jo jovai, Pedro, Jacobo, Juan jare Andrés upirandu chupe, jae retaño jae ndive ñugüinoi yave:

⁴ —Emimbeu oreve, ¿quirãi yave pa cua uyeyapota? Jare opaete cua uyeyapota ma yave, ¿quirãita pa nduicuaa? —jei reta chupe.

⁵ Jayave Jesús jei chupe reta:

—Piñemoa ngatu agüiye vaerã petavi. ⁶ Echa'á yugüeruta jeta cheree pe uyembijeeta vae reta. Jae reta jeita: ‘Che co jae Cristo.’ Jare umbitavita jeta vae reta —jei—. ⁷ Imeta co ñerãro reta coiño pegüi. Imeta vi ñerãro reta mbiri pegüi. Piyandu yave cua reta regua, agüiye pequiye. Cua susere reta uyeyapoñotai co. Ërei cua susere reta ndei ave co opa vaerã —jei Jesús—. ⁸ Penti ivi pegua reta uñerãrota ambie ivi pegua reta ndive, jare mburuvicha reta uñerãrota ñru mburuvicha reta ndive. Jare ivi tanta ucãtata jeta que rupi. Jare imeta caruai reta jare tecorai reta. Ërei cua susere reta uyembipi ramo co oĩ —jei chupe reta—.

⁹ Piñemoa ngatu. Echa'á ñru vae reta pereraata mburuvicha reta ñugüinoi vae pe, uñepo vaerã peré. Jare penupata judío reta itupao reta pe. Jare pereraata mburuvicha

guasu reta jovai chereco pegua, chemimbeu vaerã chupe reta —jei—. ¹⁰ Jare Tumpa inêe icavi vae jerãcuata co rani opaete ivi pegua reta pe —jei—. ¹¹ Jare iru vae reta pereraa yave pemee vaerã mburuvicha reta pe, agüiye piyemipia'ã mbae pereta vae re —jei—. Pemee yave, Tumpa uicuaacata peve mbae pere vaerã. Jocuãño pere. Echa'ã Espiritu Santo pendorita piyemingueta vaerã, pe retaiño'ã co piyemingueta —jei—. ¹² Tiqui umeeta tivi, uyucaca vaerã. Jare tu umeeta isambiai. Jare sambiai reta oyovaichota tu jare ichi ndive, jare uyucacata reta. ¹³ Jare piñemitarëicata opaete vae pe chereco pegua. Èrei jôsata oo uvãe iyapi pe vae uyembiasacata co —jei chupe reta—.

¹⁴ Jare peecheata icavi mbae vae opaete urucumegua vae uyemboi oĩ oĩta'ã tõi vae pe. Tumpa inêe araca umimbeu vae Daniel jei uyecuaata co. (Umingueta vae tuicuaa) —jei—. Jayave Judea pe ñugüinoi vae reta tosi ivitu guasu coti —jei—. ¹⁵ Jare o cupe re oĩ vae ugüeyi yave, agüiye tuique jo pe güiraa vaerã imbaembae. ¹⁶ Jare ico pe oĩ vae agüiye tou ye jenta pe güiraa vaerã iyasoya —jei—. ¹⁷ Jare ipurúa vae reta jare umicambu vae reta uiporara jocua ara reta pe —jei Jesús chupe reta—. ¹⁸ Piyerure Tumpa pe cuarãi: 'Agüiye emañõ tuyeyapo roi ma yave.' ¹⁹ Echa'ã jocua ara reta pe ivi pegua reta uiporara eteta. Jucuarãi'ã uiporara reta Tumpa ivi uyapo güiive, jare ndarau ye jucuarãi uiporara reta —jei—. ²⁰ Jare yandeYa uipota'ã yave opa vaerã jocua ara reta, mbaetita tõi quía ipuere ico. Èrei Tumpa uiparavo vae reta jeco pegua opata jocua ara reta —jei chupe reta—. ²¹ Aramoi jocua ara reta pe quía jeita peve: 'Mase, co oĩ Cristo', ani jeita: 'Mase, pee oĩ Cristo.' Jucuarãi jei yave, agüiye perovia —jei—. ²² Amocue upurumbitavi vae reta jeita: 'Che co jae Cristo', jare iru upurumbitavi vae reta jeita: 'Che co jae penti Tumpa inêe umimbeu vae.' Jare jae reta uyapota miacañi reta, umbitavi vaerã tõi Tumpa uiparavo vae reta —jei—. ²³ Piñemoa ngatu. Amimbeu ma peve opaete, ndei uyeyapo mbove —jei chupe reta—.

Cuimbaerã uyeyapo vae ou yeta

(Mt 24.29-44; Lc 21.25-36)

²⁴ Jayave opa uiporara reta jocua ara reta pe yave, guarasi uñemipitumimbita, jare yasi ndarau ma jembipe. ²⁵ Yasitata reta oata ara güi, jare opaete ara re mbaepuere güinoi vae reta ucãtata —jei—. ²⁶ Jayave ivi pegua reta cherechata ayu amapitu reve. Che cuimbaerã ayeyapo vae anoita mbaepuere tuicha vae, jare ayembiadoracata opaete vae pe —jei—. ²⁷ Jayave amondota ángel reta güeru vaerã aiparavo vae reta opaete ivi rupi güi —jei—.

²⁸ Yandepuere yamijaanga iva. Piyemboe jese —jei—. Joqui yave, picuaa uyaro ma co ama oqui vaerã —jei Jesús—. ²⁹ Jae ramiño vi pe reta peechea yave cua mbaembae uyeyapo ñugüinoi vae, picuaata che coiño ma co aĩ —jei—. ³⁰ Añete che jae peve, cua ivi pe añave yugüireco vae reta ndarau opa umano ndei opaete cua mbaembae uyeyapo mbove —jei chupe reta—. ³¹ Ara jare ivi opata, ãrei chiñee ndarau opa —jei—.

³² Èrei mbaeti quía uicuaa mbae ara pe ani mbae ora pe yepe cua uyeyapota, jaño cheRu. Ángel ara pe ñugüinoi vae reta uicuaa'ã. Che co jae Tumpa Tai. Èrei che ave aicuaa'ã —jei—. ³³ Jecuaño peãro, jare piyerure Tumpa pe. Echa'ã picuaa'ã quirãi yave ra uyeyapota —jei—. ³⁴ Yamijaanga penti cuimbae oo ambie ivi pe vae. Oota ma jenta güi yave, umee mbaepuere jembiocui reta pe, jare oyocui penti penti uyapo vaerã iparaviqui, jare oyocui vi taraqëra jãroa uãro cavi vaerã —jei—. ³⁵ Picuaa'ã quirãi yave ra tenta iya ou yeta uvãe. Aramoi outa uvãe pĩtu ave ma yave, ani piare catu yave, ani uru cuimbae uñee yave, ani neimbove yave —jei—. Jáeramo peãro peĩ, ³⁶ agüiye vaerã, aramoiño ou uvãe yave, pepocou peque peĩ —jei—. ³⁷ Jare cua jae peve vae jae vi opaete vae pe: Peãro peĩ —jei chupe reta—.

14

Jovaicho reta uyemingueta uyucaca vaerã Jesús

(Mt 26.1-5; Lc 22.1-2; Jn 11.45-53)

¹ Mocui araño ma uata pascua uyapo reta vaerã. Jocua ara pe judío reta jou mbiyape ovu mbae vae. Jare sacerdote reta itenondegua reta jare mboroyocui re oporombove vae reta ueca ñugüinoi quirãi ipuere uipisi tavi rupi Jesús, uyucaca vaerã. ² Èrei jei reta:

—Agüiye yaipisi pascua ara rupi, agüiye vaerã tenta guasu pegua reta uyapo tecorai.

Cuñā upiyere mbae ipiche cavi vae Jesús re
(Mt 26.6-13; Jn 12.1-8)

³Jare Jesús ucaru oĩ rambueve Betania pe Simón ipire ocuise vae jenta pe, uique penti cuñā. Jae güeru iru-rai ita alabastro jee vae pegua. Cua iru-rai tinee mbae ipiche cavi vae nardo jee vae pe. Cua nardo jepi ete. Cuñā oyoca iru-rai, jare upiyere nardo Jesús ināca re. ⁴Jayave amocue joco pe ñugüinoi vae pochí jare jei uyupe:

—¿Maera pa umicañitei? ⁵Umee yave corepoti re, güinoita tēi trescientos ara mbaraviqui jepi pegua umee vaerā iparavete vae reta pe —jei reta.

Jayave ināca reta jese.

⁶Ērei Jesús jei chupe reta:

—Pemaño jese. ¿Maera pa pemameco? Icavi vae co uyapo cheve —jei—. ⁷Echa'ā yugüirecoñotai co iparavete vae reta pe reta ndive, jare pipota yave, pepuereta pembali. Ērei che ndarau aicoño pe reta ndive —jei—. ⁸Cua cuñā uyapo ipuere vae. Chembipiche cavi ma, ndei añeñotica mbove —jei—. ⁹Añete che jae peve, opaete ivi rupi Tumpa inēe icavi vae jerācua vae rupi, cua uyapo vae vi jerācuata, iru vae reta imandúa vaerā jese —jei chupe reta.

Judas umeeta Jesús

(Mt 26.14-16; Lc 22.3-6)

¹⁰Jayave jocua doce jemimboe reta güi penti Judas Iscariote jee vae oo sacerdote reta itenondegua reta ñugüinoi vae pe, umee vaerā Jesús chupe reta. ¹¹Cua uicuaa reta yave, uyerovia reta, jare jei Judas pe umeeta co chupe corepoti. Jayave Judas umbipi ueca quirāi ipuere umee vaerā Jesús chupe reta.

Jesús ucaru jemimboe reta ndive

(Mt 26.17-29; Lc 22.7-23; Jn 13.21-30; 1 Cor 11.23-26)

¹²Pascua ara pe judío reta uyuca ovecha. Jocua ara umbipi jou mbiyape ovu mbae vae. Jayave Jesús jemimboe reta jei chupe:

—¿Quiape pa ndipota nduyapicatu vaerā, tembú pascua pegua ndeu vaerā?

¹³Jayave Jesús oyocui mocui jemimboe reta:

—Pecua tenta guasu pe —jei chupe reta—. Peovāitita joco pe penti cuimbae i güiraa iru pe vae. Pecua jaicue —jei—. ¹⁴Jare uique yave tenta pe, pere tenta iya pe: ‘Oporomboe vae jei: ¿Quiape pa ime oĩ o, joco pe jau vaerā tembú pascua pegua cheremimboe reta ndive’ —jei, pere chupe, jei Jesús—. ¹⁵Jayave tenta iya uechacata peve penti o tuicha vae jo ivate pe, opaete mbaembae yaiporuta vae reve. Joco pe piyapicatu yandevē —jei chupe reta.

¹⁶Jare Jesús jemimboe reta yugüiraa uvāe yave tenta guasu pe, uvāe opaete Jesús jei chupe reta vae rami. Jare uyapo reta tembú pascua pegua jou reta vaerā.

¹⁷Jare pĩtu ma yave, Jesús oo jocua doce jemimboe reta ndive. ¹⁸Jare mesa pe uguapi ucaru ñugüinoi rambueve, Jesús jei chupe reta:

—Añete che jae peve, penti pepite pe oĩ vae chemeeta cherovaicho reta pe. Jae co penti ucaru oĩ che ndive vae —jei.

¹⁹Jayave jae reta ipiatiti, jare upirandu Jesús pe penti penti rupi:

—¿Che pa co jae?

²⁰—Pe reta co jae doce cheremimboe reta —jei Jesús chupe reta—. Penti pepite pe oĩ vae co jae. Mbiyape umāqui oĩ che ndive plato pe vae co jae —jei—. ²¹Che cuimbaerā ayeyapo vae añotai amano vaerā, Tumpa inēe pe uyecuatía oĩ cheregua rami. Ērei jocua cuimbae chemeeta vae uiporarata co. Icavi tēi mona jocua cuimbae mbaeti ico yave —jei.

²²Jare jae reta ucaru ñugüinoi rambueve, Jesús uipisi mbiyape, jare umee yasurupai Tumpa pe. Jayave upisāa mbiyape jare umee chupe reta.

—Peu —jei chupe reta—. Cua co jae cherete —jei.

²³Jayave Jesús uipisi vi penti copa, jare yasurupai umee ye yave Tumpa pe, umee jemimboe reta pe. Jare opareve jou copa güi. ²⁴Jesús jei chupe reta:

—Cua co jae cherugüi. Cherugüi uyepiyereta, Tumpa jei piau ye vae uyeyapo vaerā, jare jeta vae reta uyembiasaca vaerā —jei Jesús—. ²⁵Añete che jae peve, ndarau ma jau uva ticuecue, Tumpa iporoyocua pe uva ticuecue ipiau vae jau regua —jei chupe reta.

Pedro uicuaacuta Jesús

(Mt 26.30-35; Lc 22.31-34; Jn 13.36-38)

²⁶ Jare opa yave ucanta reta Tumpa pe, oẽ reta yugüiraa ivitu guasu Olivos coti.

²⁷ Jayave Jesús jei chupe reta:

—Opaete pe reta chereyata cua pĩtu. Echa'ã Tumpa ñee pe uyecuatía oĩ cuarãi: 'Ayucata ovecha reta iyandarecoa, jare ovecha reta opata uñemiai.' Jucuarãi uyecuatía oĩ —jei chupe reta—. ²⁸ Ërei aicove ye ayu yave umanocue vae reta ipite güi, aata perenonde Galilea pe —jei.

²⁹ Jayave Pedro jei Jesús pe:

—Yepe tẽi opaete ñru reta tandereya, ãrei che ndarau ndueya.

³⁰ —Añete che jae ndeve —jei Jesús chupe—, cua pĩtu etei, ndei mocui vese uru cuimbae uñee mbove, mbapi vese ma checuacuta —jei.

³¹ Ërei Pedro jeiete jei:

—Yepe tẽi tamano nde ndive, ãrei ndarau nducuacu.

Jare jucuarãi vi jei opaete Jesús jemimboe reta.

Jesús uyerure Getsemaní pe

(Mt 26.36-46; Lc 22.39-46)

³² Jayave yugüiraa uvãe reta Getsemaní pe.

—Peguapĩ cua pe, che aa ayerure Tumpa pe rambueve —jei Jesús jemimboe reta pe.

³³ Jayave güiraa Pedro, Jacobo jare Juan, jare umbipi ipiatiti jare uiporara.

³⁴ —Tuicha chepiatiti, jare amano pota echa. Pepita cua pe, jare agüiye peque —jei jocua mbapi jemimboe reta pe.

³⁵ Jayave Jesús usiri catu chugüi reta, jare uyeatica ivi re. Uyerure Tumpa pe, Tumpa uipota yave, umbiasa vaerã chugüi jocua uyeyapota chupe vae.

³⁶ —CheRu, cheRu, opaete mbae ndepuere ndiyapo. Embiasa chegüi cua aiporarata vae. Ërei tuyeyapo cheve nde ndere vae. Agüiye tuyeyapo che jae vae —jei.

³⁷ Jayave Jesús ou jemimboe reta ñugüinoi vae pe, jare uecha oque ñugüinoi. Jayave jei Simón Pedro pe:

—Simón, ¿ndeque pa? ¿Ndepuere'ã pa ndeque mbae neĩ penti ora yepe? —jei chupe.

³⁸ Jei vi jemimboe reta pe:

—Agüiye peque. Piyerure Tumpa pe, agüiye vaerã peyoa. Pepia pe peratangãtu co, ãrei perete iyaqui co —jei.

³⁹ Jayave Jesús usiri ye uyerure Tumpa pe tenonde uyerure vae rami. ⁴⁰ Jayave ou ye jemimboe reta ñugüinoi vae pe, jare uecha oque ye ñugüinoi. Echa'ã jae reta jopei ete ma. Jare uicuaa'ã mbae jei vaerã Jesús pe. ⁴¹ Jayave Jesús usiri ye mbapia re, jare ou ye yave, jei chupe reta:

—Peque jare peputuño ma. Jocuãño ma. Ora uvãe ma. Che cuimbaerã ayeyapo vae penti vae chemeeta cuimbae jeco pochi vae reta pe —jei—. ⁴² Pepüa. Yaaño ma. Mase, chemeeta vae coiño ma ou —jei chupe reta.

Uipisi reta Jesus

(Mt 26.47-56; Lc 22.47-53; Jn 18.2-11)

⁴³ Jare uyemingueta oĩ rambueve, ou Judas - jae co jocua doce vae güi penti. Jeta vae yugüeru jae ndive iquisepucu reve jare iivira reve reve. Sacerdote reta itenondegua reta, mboroyocui re oporomboe vae reta, jare tenta guasu pegua reta itenondegua reta ombou Jesús pe cua reta. ⁴⁴ Jare umeeta vae umimbeu ma ñru reta pe mbae uyapota vae. Jei ma chupe reta:

—Jocua ayurupiteta vae co jae. Pipisi curi, jare peraa. Agüiye tosi —jei.

⁴⁵ Judas ou uvãe yave, ou voi Jesús oĩ vae pe.

—Oporomboe vae, oporomboe vae —jei chupe.

Jayave uyurupite. ⁴⁶ Jayave uipisi reta Jesús. ⁴⁷ Jare penti cuimbae joco pe oĩ vae uequi iquisepucu jiru güi, sacerdote tenondegua jembiocui re uiporu, jare uyasia inambi chugüi. ⁴⁸ Jayave Jesús jei yugüeru vae reta pe:

—¿Maera pa peru quisepucu reta jare ivira reta chepisi vaerã, imonda vae pipisi vae rami? ⁴⁹ Opa ara aico pe reta ndive Tumpa jo pe. Joco pe aporomboe, jare chepisi'ã. Ërei piyapo cua, Tumpa ñee uyecuatía oĩ vae uyeyapo vaerã —jei.

⁵⁰ Jayave opaete jemimboe reta ueya Jesús, jare opa osi.

Cunumi osi vae

⁵¹ Jare penti cunumi uñepëgua penti asoya pe vae oo Jesús jaicue rupi. Jare amocue joco pe ñugüinoi vae reta uipisi tõi. ⁵² Ërei jae ueya iyasoya, jare nani etei oë osi.

Jesús uyemboi jovaicho reta jovai

(Mt 26.57-68; Lc 22.54-55, 63-71; Jn 18.12-14, 19-24)

⁵³ Jayave güiraa reta Jesús sacerdote tenondegua jenta pe. Jare joco pe uyembati opaete sacerdote reta itenondegua reta, tenta guasu pegua reta itenondegua reta, jare mboroyocui re oporomböe vae reta. ⁵⁴ Jare Pedro oo vi Jesús jaicue. Ërei mbirino oo chugüi. Jae uique sacerdote tenondegua joca pe, jare uguapi sacerdote tenondegua jembiocui reta ndive uyepëe ñugüinoi tataipi pe. ⁵⁵ Jare sacerdote reta itenondegua reta jare opaete ñru mburuvicha reta ueca quía uñeapo vaerã Jesús re, uyucaca vaerã. Ërei uvãe'ã reta teco jese. ⁵⁶ Yepe tõi jeta vae iyapu reve uñeapo jese, Ërei jei reta tõi vae oyovaque'ã. ⁵⁷ Jare amocue upüa uñeapo iyapu reve jese vae jei:

⁵⁸ —Ore nduyandu jei: 'Ambusururuta Tumpa jo cuimbae reta uyapo vae, jare mbapi ara pe che ayapota ñru Tumpa jo cuimbae reta uyapota'ã vae' —jei, jei reta.

⁵⁹ Ërei yepe tõi jucuarãi jei reta, Ërei jei reta tõi vae oyovaque'ã. ⁶⁰ Jayave sacerdote tenondegua upüa uyemboi yati vae reta ipite pe, jare upirandu Jesús pe:

—¿Maera pa niñee nemoë'ã? ¿Mbae re pa cua reta uñeapo nderé? —jei.

⁶¹ Ërei Jesús quüiño. Jei'ã mbae ave. Jayave sacerdote tenondegua upirandu ye chupe:

—¿Nde pa co jae Cristo, Tumpa ombou vae? ¿Nde pa co jae Tumpa Tai? —jei.

⁶² —Jae co che —jei Jesús chupe—. Jare che cuimbaerã ayeypapo vae cherechata co aguapi aï Tumpa mbaepuere güinoi vae iyipi pe iyacata coti. Cherechata vi ayu amapütu reve —jei.

⁶³ Jayave sacerdote tenondegua cua uyandu yave, pochi ramo omondoro jemimondei, jare jei:

—¿Maera ma pa yaeca yeta ñru vae reta uñeapo vaerã jese? ⁶⁴ Piyandu ma icavi mbae vae jei Tumpa coti —jei—. ¿Mbae pa pere añave? —jei.

Jayave opaete reve jei reta:

—Icavi'ã co. Icavi co yayucaca vaerã —jei reta.

⁶⁵ Jare amocue vae umbipi undivi jese, jare uesañoma, jare ocua jese. Jare jei Jesús pe:

—Emimbeu oreve quía ra ocua oñ nderé.

Jare sacerdote tenondegua jembiocui reta ocua vi jese.

Pedro uicuacu Jesús

(Mt 26.69-75; Lc 22.56-62; Jn 18.15-18, 25-29)

⁶⁶ Jare Pedro oca pe oñ rambueve, ou penti cuñatai sacerdote tenondegua pe uyeyocui vae. ⁶⁷ Jare uecha yave Pedro uyepëe oñ, omondo umae jese.

—Nde vi co jae Jesús Nazaret pegua ñru —jei chupe.

⁶⁸ Jayave Pedro uicuacu Jesús.

—Aicuaa'ã jocua cuimbae, jare aicuaa'ã mbae ndere vae —jei Pedro chupe.

Jayave Pedro oo onque tuicha vae coti. Jare uru cuimbae uñee. ⁶⁹ Jayave cuñatai uecha ye, jare imiari jese joco pe ñugüinoi vae reta pe:

—Cua cuimbae co jae penti Jesús ñru —jei.

⁷⁰ Ërei Pedro uicuacu ye. Jare ndei ima mbove joco pe ñugüinoi vae reta jei ye Pedro pe:

—Añete nde co jae penti Jesús ñru. Echa'ã nde vi co jae penti Galilea pegua. Nde ndiyemingueta jae reta uyemingueta vae rami —jei reta chupe.

⁷¹ Jayave Pedro jei Tumpa jee re:

—Tumpa tuiaporaraca cheve cua jae vae añetete'ã yave. Aicuaa'ã jocua cuimbae piyemingueta peñ jese vae.

⁷² Jayave uru cuimbae uñee ma mocui vese. Jare Pedro imandúa Jesús jei chupe vae re: "Ndeñ mocui vese uru cuimbae uñee mbove, mbapi vese ma checuacuta." Jare cua re ipia pe uyemingueta yave, umbipi uyao.

Jesús uyemboi Pilato jovai

(Mt 27.1-2, 11-14; Lc 23.1-5; Jn 18.28-38)

¹ Jayave cõe rupive sacerdote reta itenondegua reta, tenta guasu pegua reta itenondegua reta, mboroyocui re oporombõe vae reta, jare opaete ñru mburuvicha reta uyembati uyemingueta ñugüinoi reta uyupii. Jayave uipocua Jesús jare güüraa Pilato pe umee. ² Jayave Pilato upirandu Jesús pe:

—¿Nde pa co jae judío reta juvicha guasu?

—Nde ndere rami jae co che —jei Jesús chupe.

³ Jayave sacerdote reta itenondegua reta uñeapo Jesús re jeta mbaembae re. ⁴ Jayave Pilato upirandu ye Jesús pe:

—¿Maera pa niñee nemoë'ã? Mase, jeta mbaembae re uñeapo reta nderé —jei.

⁵ Ërei Jesús jei'ã mbae ave chupe. Jáeramo Pilato ipiacañi jese.

Pilato jei Jesús umanota co

(Mt 27.15-31; Lc 23.13-25; Jn 18.38-19.16)

⁶ Jare pascua ara rupi Pilato oyoracañoi penti pereso tenta guasu pegua reta uipota vae. ⁷ Jare peresoriru pe ñugüinoi amocue upuruyuca vae reta. Cua reta upuruyuca, mburuvicha reta ndive uñerãro yave. Penti jee co Barrabás. ⁸ Jare jeta vae yugüeru uyerure Pilato pe uyapo vaerã chupe reta opa año uyapo rami. ⁹ Jayave Pilato jei chupe reta:

—¿Pipota pa ayoraca vaerã peve judío reta juvicha guasu?

¹⁰ Echa'ã jae uicuaa sacerdote reta itenondegua reta umee Jesús chupe ñacatãa jese ramo. ¹¹ Ërei sacerdote reta itenondegua reta omboemboe yati vae reta:

—Piyerure Pilato pe oyoraca vaerã peve Barrabás. Agüiye toyoraca Jesús —jei reta.

Jayave jucuarãi uyerure reta Pilato pe. ¹² Jayave Pilato upirandu chupe reta:

—Barrabás ayoraca yave, ¿mbae pa pipota ayapo vaerã cua cuimbae judío reta juvicha guasu pere chupe vae pe?

¹³ Jayave jae reta iñeeãta reve jei:

—Icutuca curusu re.

¹⁴ Ërei Pilato upirandu chupe reta:

—¿Mbae icavi mbae vae pa uyapo?

Ërei jae reta jeiete iñeeãta reve jei:

—Icutuca curusu re.

¹⁵ Jayave Pilato oyoraca chupe reta Barrabás, uipota umbiyerovia reta ramo. Jare Pilato uinupaca yave Jesús chicote pe, umee sundaro reta pe, uicutu vaerã curusu re.

¹⁶ Jayave sundaro reta güüraa Jesús juvicha joca palacio pe, jare ueni opaete ñru sundaro reta. ¹⁷ Jayave sundaro reta omondeca Jesús pe temimonde pita vae, jare oñope yurãti catuii vae, jare umbapúa oñoño Jesús iñãca re. ¹⁸ Jayave umbipi umbiadora-raanga reta.

—¡Viva, judío reta juvicha guasu! —jei reta.

¹⁹ Jare uiporu reta iñãca re ivira. Jare undivi reta jese, jare uyeatica reta jae jovai umbiadora-raanga vaerã. ²⁰ Jare opa oyoyai reta yave, sundaro reta omboi chugüi temimonde pita vae, jare omondeca ye chupe jae jemimondei. Jayave güüraa reta mburuvicha guasu joca güi, uicutu vaerã curusu re.

Jesús uyecutuca curusu re

(Mt 27.32-44; Lc 23.26-43; Jn 19.17-27)

²¹ Penti cuimbae Simón jee vae tenta guasu Cirene pegua, Alejandro jare Rufo tu, ou uvãe tenta guasu coti. Jacoropi uasa oo oï yave, sundaro reta güüraaca chupe Jesús icurusu. ²² Jare sundaro reta güüraa Jesús Gólgota jee vae pe. (Cua uipota jei: “Ácacuerenda”.) ²³ Jayave umee reta Jesús pe vino uyea mirra ndive vae. Ërei Jesús jou'ã.

²⁴ Jayave sundaro reta uicutu curusu re. Jayave uyuguari reta Jesús jemimonde re, uicuaa vaerã mbae nunga penti penti güüraa iyupe vaerã. ²⁵ Jare neimbove yave nueve pe, uicutu reta Jesús curusu re. ²⁶ Jare oñoño reta curusu re Jesús iñãca iárambo uyecuatía mbae umbijeco jesegua vae: “Judío reta juvicha guasu.” ²⁷ Jare sundaro reta uicutu vi curusu re mocui imonda vae reta, jare oñoño penti Jesús iyacata coti jare ñru iyaso coti. ²⁸ Jare

uyeyapo ma Tumpa in̄ee uyecuatía oĩ vae: “Íru vae reta jei t̄ei jae vi co penti icavi mbae vae.”²⁹ Jare uasa vae reta uñeácambivava reve jei icavi mbae vae Jesús pe.

—Aa! —jei reta—. Nde ndere nembusururuta co Tumpa jo jare ndiyapo yeta mbapi ara pe.³⁰ Iyerepi añave, jare egüeyi curusu güi —jei reta.

³¹ Jae ramiño vi sacerdote reta itenondegua reta jare mboroyocui re oporomböe vae reta imiari uyupe yave, oyoyai reta.

—Jae uepi íru vae reta —jei reta—. Ērei ipuere'ã jae uyerepi.³² Jae co Cristo, Tumpa ombou vae yave, jae co Israel pegua reta juvicha guasu yave, tugüeyi añave curusu güi, yaecha vaerã, jare yarovia vaerã —jei reta.

Jare Jesús ndive uyecutu ñugüinoi vae reta vi jei icavi mbae vae chupe.

Jesús umano

(Mt 27.45-56; Lc 23.44-49; Jn 19.28-30)

³³ Jare guarasi ara mbite güive mbapi ora rupi uñemipitumimbi opaete ivi pe.³⁴ Jayave mbapi ora ma caaru yave, Jesús in̄eeãta reve jei:

—Eloi, Eloi, ¿lama sabactani? (Cua uipota jei: “CheTumpa, cheTumpa, ¿maera pa chereya?”)

³⁵ Amocue joco pe ñugüinoi vae uyandu jare jei t̄ei:

—Mase, Elías ueni.

³⁶ Jare penti vae osi oo umãqui esponja vinagre pe, jare oñono ivira re, jare omondo Jesús iyuru coti.

—Peãro —jei—. Yaecha ou Elías umbigüeyi vaerã —jei.

³⁷ Jayave Jesús tanta usapicai, jare umano.³⁸ Jayave Tumpa jo umbiyao vae osoro mbite rupi ivate güi ivi coti.³⁹ Jare sundaro reta juvicha Jesús jovai uyemboi oĩ vae uecha yave quirãi usapicai jare umano, jei:

—Añeteñoi yepe, cua cuimbae co jae Tumpa Tai.

⁴⁰ Jare amocue cuña reta umae ñugüinoi mbiri güi. Cua reta ipite pe ñugüinoi María Magdalena, Salomé jare María. Cua María imembi reta co jae Jacobo tairusu vae jare José.

⁴¹ Jesús Galilea pe icose yave, cua cuña reta yugüiraa jae ndive uyeyocui vaerã chupe. Jare jeta íru cuña yugüeru jae ndive Jerusalén pe vae reta joco pe ñugüinoi vi.

José oñono Jesús jetecue teögüeriru pe

(Mt 27.57-61; Lc 23.50-56; Jn 19.38-42)

⁴² Jocua ara opaete judío reta uyeyapicatu ñugüinoi piareve peguarã. Echa'ã piareve pe co mbutuu ara. Jáeramo guarasi uique ma yave,⁴³ penti cuimbae tenta guasu Arimatea pegua José jee vae uñemiatangātu oo Pilato pe, jare uyerure chupe Jesús jetecue re. José co jae penti mburuvicha. Opaete tenta guasu pegua reta uipiu cua José. Jae uãro ico Tumpa iporoyocua.⁴⁴ Jare Pilato ipiacañi Jesús umano ma vae re. Jayave ueni sundaro reta juvicha, jare upirandu chupe quirãi yave ra umano Jesús.⁴⁵ Jare sundaro reta juvicha umimbeu chupe. Jayave Pilato jei José pe:

—Ndepuere nderaa Jesús jetecue.

⁴⁶ Jayave José ogua nieso. Jare umbigüeyi ma yave Jesús jetecue, oñoma nieso pe. Jayave oñono penti teögüeriru itape uyeyoo vae pe, jare umbiyapayere ita tuicha vae teögüeriru jonque re.⁴⁷ Jare María Magdalena jare José ichi María jee vae uecha quiape oñono Jesús jetecue.

16

Jesús icove ye

(Mt 28.1-10; Lc 24.1-12; Jn 20.1-10)

¹ Mbutuu ara uasa ma yave, María Magdalena, Jacobo ichi María jee vae jare Salomé ogua mbae ipiche cavi vae, jare yugüiraa uipichi vaerã Jesús jetecue re.² Jare neimbove asi domingo ara pe cua cuña reta yugüiraa teögüeriru coti.³ Jare jei reta uyupe:

—¿Quía ra umbisirita yandevé ita tuicha vae teögüeriru jonque güi?

⁴ Ērei umae reta yave, uecha ita uyembisiri ma teögüeriru jonque güi. Jocua ita tuicha co.⁵ Jare uique reta yave teögüeriru pe, uecha penti cunumi uguapí oĩ iyacata coti. Jemimonde pucu jare tí. Jare ipiacañi reta jese.⁶ Ērei cunumi jei chupe reta:

—Agüiye pepiacañi. Peeca co peĩ Jesús Nazaret pegua uyecutuca curusu re vae. Jae icove ye ma ou umanocue vae reta ipite güi. Mbaeti ma cua pe oĩ. Mase, pemaẽ jendacue re —jei—. ⁷ Pecua pere jemimboe reta pe jare Pedro pe: 'Jae oota perenonde Galilea pe. Joco pe peechata, jae jei peve vae rami' —pere chupe reta, jei.

⁸ Jayave cuña reta oẽ teögüeriru güi, jare tanta osi yugüiraa. Uquiye ramo umbipi uriri. Jare jei'ã mbae ave quía pe.

María Magdalena uecha Jesús
(Jn 20.11-18)

⁹ Jesús icove ye ou umanocue vae reta ipite güi neimbove asi domingo ara pe. Jayave uyeechaca tenonde ete María Magdalena pe. Tenonde yave Jesús umbisiri siete aña reta cua cuña güi. ¹⁰ María oo umimbeu Jesús ndive yugüirecose vae reta pe. Jae reta ipiatiti ramo uyao ñugüinoi. ¹¹ María jei chupe reta:

—Jesús icove ye ma oĩ. Aecha ma —jei chupe reta.

Ërei uyandu yave, güirovia'ã reta.

Mocui jemimboe reta uecha Jesús
(Lc 24.13-35)

¹² Cua jaicue rupi Jesús uyeechaca mocui jemimboe reta pe, jae reta yugüiraa rambueve tape rupi tenta mbae vae coti. Ambie vae echa Jesús chupe reta. ¹³ Jae reta yugüeru ye tenta guasu pe umimbeu ñru reta pe. Ërei jeseve güirovia'ã reta.

Jesús oyocui jocua once jemimboe reta
(Mt 28.16-20; Lc 24.36-49; Jn 20.19-23)

¹⁴ Cua jaicue rupi Jesús uyeechaca jocua once jemimboe reta pe etei, jae reta ucaru ñugüinoi rambueve, jare ñneengata chupe reta, upurugüirovia'ã jare ipiatanta ramo. Echa'ã ñru vae reta uecha Jesús, icove ye yave ou umanocue vae reta ipite güi, jare umimbeu tẽi jemimboe reta pe. Ërei jae reta güirovia'ã. ¹⁵ Jayave Jesús jei chupe reta:

—Pecua opaete ivi rupi. Pemimbeu Tumpa ñnee icavi vae opaete ivi pegua reta pe —jei—. ¹⁶ Jocua güiroviata jare uyembibautizacata vae uyembiasacata. Ërei jocua güirovia'ã vae ucañiteita co —jei—. ¹⁷ Jare ñru vae reta uechata güirovia vae reta uyapo ñugüinoi cua nunga miacañi reta. Cheree re jae reta umbisirita aña reta oya jese vae reta güi. Uyeminguetata ambie ñee pe. ¹⁸ Uipisita mboi reta. Jou yave imbayachi vae, ndarau mbae uyeyapo chupe reta. Oñonota ipo imbaerasi vae reta re umbigüera vaerã —jei chupe reta.

Jesús oo ara pe
(Lc 24.50-53)

¹⁹ Jayave yandeYa opa uyemingueta yave jae reta ndive, oo ara pe, jare uguapi Tumpa iyipi pe iyacata coti. ²⁰ Jare jemimboe reta yugüiraa umimbeu Tumpa ñnee opaete que rupi. Jare yandeYa ombori, jare uicuaaca ñru vae reta pe jemimboe reta jei vae añete vae miacañi reta uyapo vae rupi. Jaeño ma.

EL SANTO EVANGELIO SEGUN SAN LUCAS

Lucas uicuatía Teófilo pe

¹ Jeta vae umimbeu ma uicuatía reve opaete yandepite pe uyeyapo vae regua. ² Jocua uyeyapo vae iyipi güive uecha vae reta jucuarāi umimbeu yandeve. Echa'ā jae reta umimbeu Tumpa iñee ĩru vae reta pe. ³ Jáeramo icavi echa cheve che vi aicuatía vaerā ndeve, mburuvicha Teófilo, amimbeu vaerā ndeve quirāi opaete uyeyapo. Echa'ā che aicuaa cavi opaete iyipi güive uyeyapo vae. ⁴ Aicuatía āi ndeve cua, ndicuaa vaerā añete co jocua ndiyemboe jese vae.

Juan oata vae regua

⁵ Herodes ico yave ivi Judea pegua reta juvicha guasurā, ico vi penti sacerdote Zacarías jee vae. Jae co sacerdote penti ati Abías jee vae pegua. Zacarías jembireco co jae Aarón iñemoñaeta reta pegua jare jee co Elisabet. ⁶ Zacarías jare jembireco uyapo jupi vae jare jucuarāi umbiyerovia Tumpa. Echa'ā jecuaño uyapo yandeYa iporoyocui reta. Mbaeti quía ipuere umbijeco reta mbae re. ⁷ Ērei mbaeti co Zacarías isambiai. Echa'ā Elisabet imembi mbae vae co. Jare Zacarías jare Elisabet ucuacuaa ete ma.

⁸ Penti ara penti ati Abías jee vae pegua sacerdote reta uparaviqui ñugüinoi Tumpa jo pe. Jáeramo Zacarías uyapo oĩ iparaviqui joco pe. ⁹ Jare jocua ara Zacarías iparaviqui co uique vaerā yandeYa jo japipe pe etei uapi vaerā mbae ipiche cavi vae. Echa'ā jecuaño uyapo jucuarāi sacerdote reta. ¹⁰ Jare jeta Israel pegua reta yatí ma uyerure ñugüinoi Tumpa jo oca pe, Zacarías mbae ipiche cavi vae uapi oĩ rambueve. ¹¹ Jare uyecuaa Zacarías pe penti ángel yandeYa pe uyeyocui vae. Ángel uyemboi oĩ mbae ipiche cavi vae imesa iyacata coti. ¹² Jare Zacarías uecha yave ángel, ipiacañi jare uquiye vi. ¹³ Ērei ángel jei chupe:

—Agüiye equiye, Zacarías. Tumpa uyandu ma ndiyerure, jare nembireco Elisabet imembita ndeve cuimbae. Jare nembijeeta Juan —jei—. ¹⁴ Jare nde ndiyeroviata co tuicha. Jare jeta vi uyeroviata jae oa vae regua —jei ángel Zacarías pe—. ¹⁵ Echa'ā yandeYa umbutuichacata co. Jae ndarau etei ucau. Jare tñeeta Espíritu Santo pe ichi güi oa güive —jei chupe—. ¹⁶ Jare umbiyerovata yandeYa Tumpa coti jeta Israel pegua reta —jei—. ¹⁷ Jae oota yandeYa jenonde uauca vaerā tu reta pe isambiai reta jare Tumpa jei vae uyapo'ā vae reta uyeyapo vaerā iaracuaa vae retarā jare jupi vae retarā. Jucuarāi uyapota, Israel pegua reta uāro vaerā yandeYa. Jae icota Elías icose vae rami jare güinoita mbaepuere Elías güinoise vae rami —jei ángel Zacarías pe.

¹⁸ Jayave Zacarías jei ángel pe:

—¿Quirāita pa aicuaa añetete ra cua nde ndere cheve vae? Echa'ā che acuacuaa ete ma jare chembireco ucuacuaa ete ma vi —jei.

¹⁹ Jayave ángel jei ye Zacarías pe:

—Che co jae Gabriel. Che ayeyocui Tumpa pe. Tumpa chembou chemiari vaerā ndeve jare amimbeu vaerā ndeve cua ñee icavi vae —jei chupe—. ²⁰ Mase, niñeeta'ā ndepita cua amimbeu ndeve vae uyeyapo regua. Echa'ā nderovia'ā che jae ndeve vae. Ērei che jae ndeve vae uyeyapota co ara ou uyeyapo vaerā yave —jei.

²¹ Jare Israel pegua reta uāro ñugüinoi Zacarías oē vaerā Tumpa jo güi, jare ipiacañi reta quirāi Zacarías upita ima Tumpa jo japipe pe. ²² Jare Zacarías oē yave, ipuere'ā omoē iñee chupe reta. Jáeramo jae reta uicuaa Zacarías uecha mbae Tumpa jo pe oĩ rambueve. Echa'ā jae umupūa ipo chupe reta. Ērei ipuere'ā etei mbae jei chupe reta.

²³ Jare opa ma yave Zacarías iparaviqui Tumpa jo pe, oo ye jenta pe. ²⁴ Jare mbovi ara rupi Zacarías jembireco Elisabet ipurúa. Jayave Elisabet uñemi pandepo yasi jenta pe. Echa'ā jae jei:

²⁵ —Cuarāi yandeYa uyapo cheve. Ima ma chemara ĩru vae reta güi chemembi'ā etei ramo. Ērei añave yandeYa chembori agüiye vaerā chemara chugüi reta —jei.

Jesús oata vae regua

²⁶ Jare Elisabet seis yasi ma ipurúa yave, Tumpa ombou ángel Gabriel tenta guasu Nazaret ivi Galilea pegua pe ²⁷ María ipi. María co jae penti cuñatai güireco'ã etei cuimbae vae. Ërei jae jei ma umenda vaerã José ndive. José co jae penti David iñemoñaá reta pegua. ²⁸ Jare ángel iunique María oĩ vae pe jare jei chupe:

—Iyerovia. YandeYa ipiacavi ndeve. YandeYa oĩ nde ndive. YandeYa nemivendise ete ñru cuña reta güi —jei.

²⁹ María cua uyandu yave, ipiacañi. Echa'ã uicuaa'ã mbae ra uipota jei ángel jei chupe vae. ³⁰ Jayave ángel jei chupe:

—Agüiye equiye, María. Echa'ã Tumpa ipiacavi ndeve —jei—. ³¹ Mase, ndepuruata co jare nemembita. Jare nembijeeta nemembi Jesús —jei María pe—. ³² Jae güinoita mbaepuere tuicha vae, jare jeeta co Tumpa Tai. Jare yandeYa Tumpa uyapota Israel pegua reta juvicha guasurã itenondegua David rami —jei—. ³³ Jare jae icota Jacob iñemoñaá reta juvicha guasurã jaeño mai pegua. Jare jae iporoyocua ndarau opa —jei ángel chupe.

³⁴ Jayave María jei ángel pe:

—¿Quirãita pa uyeyapo cua? Echa'ã ndei areco cuimbae —jei.

³⁵ Jayave ángel jei María pe:

—Espíritu Santo outa ndeve. Tumpa imbaepuere rupi cua uyeyapota ndeve. Járamo nemembi oata iyoa mbae reve jare jeeta co Tumpa Tai —jei—. ³⁶ Mase, nerentarã Elisabet ipurúa vi, yepe tẽi ucuacuaa ete ma. Seis yasi ma ipurúa oĩ, yepe tẽi ñru vae reta umbijee 'Imembi mbae vae' —jei—. ³⁷ Echa'ã Tumpa ipuere uyapo opaete —jei chupe.

³⁸ Jayave María jei ángel pe:

—Mase, che co jae yandeYa pe ayeyocui vae. Tome tuyeyapo cheve nde ndere cheve vae rami —jei.

Jayave ángel oo ye María oĩ vae güi.

María opou Elisabet pe

³⁹ Jayave mbovi ara rupi María oẽ oo voi jenta güi penti tenta guasu ivitu reta re Judea pegua pe. ⁴⁰ Jare oo uvã Zacarías jenta pe, jare umbisaluda Elisabet. ⁴¹ Jare Elisabet uyandu yave María jei chupe vae, Elisabet imembi omi rai jie pe. Jare Elisabet tinee Espíritu Santo pe. ⁴² Jayave Elisabet iñeeãta reve jei:

—Tumpa nemivendise ete ñru cuña reta güi. Jare umivendiseta nemembi —jei—. ⁴³ Jare yepe tẽi nde co jae cheYa ichirã, ãrei nde ndeyu ndepou chepi. Chepiacañi cua re —jei—.

⁴⁴ Mase, nde nembipi chemingueta rupive, chemembi omi rai cherie pe uyerovia ramo —jei Elisabet María pe—. ⁴⁵ Nde nderovia yandeYa uyapota co jae jei ndeve uyapota vae. Járamo jae nemivendise ma —jei.

⁴⁶ Jayave María jei:

“Ambiadora yandeYa.

⁴⁷ Ayerovia Tumpa re.

Jae co chembiasa vae.

⁴⁸ Yepe tẽi che cheparavete, ãrei jae cheparareco.

Mase, añave güive opaete vae jeita Tumpa chemivendise co.

⁴⁹ Echa'ã Tumpa imbaepuere tuicha co.

Jae uyapo icavi vae cheve imbaepuere pe.

Jae co iyoa mbae vae jee vae.

⁵⁰ Jare Tumpa uiparareco opaete uipiu Tumpa vae reta.

⁵¹ Uicuaaca quirã imbaepuere tuicha co.

Opa umiai uyembicate vae reta.

⁵² Jae uequi imbaepuere mburuvicha reta güi,

jare umbutuichaca uñemimichi vae reta.

⁵³ Umingapii iyembaí vae reta tembú icavi vae pe.

Ërei umee'ã co mbae icocatu vae reta pe.

⁵⁴ Ombori Israel pegua uyeyocui chupe vae reta.

Echa'ã imandúa quirã jei uipararecota co.

⁵⁵ Echa'ã jucuarã jei yandetenondegua reta pe - jae reta co Abraham jare iñemoñaá reta. Echa'ã jei chupe reta uipararecota co jaeño mai pegua” —jei María.

⁵⁶ Jare María upita Elisabet ipi mbapi yasi pegua. Jayave ramo oo ye jenta pe.

Juan oa vae regua

⁵⁷ Jare ara ou uvãe yave Elisabet imembi vaerã, oa imembi cuimbae. ⁵⁸ Jare jerãcua Elisabet jentaigua reta jare jentarã reta pe quirãi yandeYa uiparareco Elisabet. Jare jae reta uyerovia Elisabet ndive.

⁵⁹ Jare sambiai ocho ara ma güinoi yave, jentarã reta yugüeru umicircuncidaca vaerã. Jare jae reta uipota oñono jese tu jee Zacarías. ⁶⁰ Èrei sambiai ichi jei chupe reta:

—Jucuarãi'ã co. Yambijeeta co Juan.

⁶¹ Èrei jae reta jei chupe:

—Mbaeti etei co nerentarã jocua tee güinoi vae.

⁶² Jayave jae reta iñãca omomi Zacarías pe upirandu vaerã chupe mbae nunga tee ra uipota oñono tai re. ⁶³ Jayave Zacarías uechaca chupe reta jae uipota mbae uicutía jese vae. Jayave uicutía cuarãi: “Jee co Juan.” Jare opaete joco pe ñugüinoi vae reta ipiacãni.

⁶⁴ Jayave jupivoi Zacarías ipuere omoë ye iñee. Jare imiari chupe reta umbiadora reve Tumpa. ⁶⁵ Jare opaete Zacarías jentaigua reta ipiacãni cua re. Jare opaete cua uyeyapo vae jerãcua opaete ivitu Judea pegua reta rupi. ⁶⁶ Jare opaete uyandu vae reta ipia pe uyemingueta cua uyeyapo vae re jare jei reta iyupe:

—¿Mbae nunga sambiai ra co aipo cua? Echa'ã yandeYa imbaepuere oĩ jae ndive.

Zacarías umimbeu Tumpa iñee

⁶⁷ Jayave Zacarías - jae co Juan tu - tinee Espiritu Santo pe jare umimbeu Tumpa iñee. Echa'ã jae jei:

⁶⁸ “Tuyembiadoraca yandeYa Tumpa.

Yande co jae Israel pegua reta.

Echa'ã Tumpa ipiacavi yandeve ramo, yanderepi ma.

⁶⁹ Jae ombou yandeve jembiocui David iñemoñaa reta pegua yanembiasa vaerã imbaepuere tuicha vae pe.

⁷⁰ Jucuarãi Tumpa jei iyipi güive Tumpa iñee umimbeu vae reta rupi.

Jae reta uñeñoño tee Tumpa peguarã.

⁷¹ Tumpa yanembiasata yanderovaicho reta güi.

Jae yanembiasata opaete ñanemitarëi vae reta güi. ⁷²⁻⁷³ Tumpa uiparareco Abraham jare ñru yandetenondegua reta.

Echa'ã Tumpa etei uyemingueta Abraham ndive,

jare añave imandúa ma jocua jei uyapota vae re.

⁷⁴ Jáeramo umeeta yandeve yayeyocui vaerã chupe yaquiye mbae reve.

Echa'ã jae yanderepita yandeYa imbae reta pe quirãi Tumpa umbiasata chupe imbaeyoa

⁷⁵ “Tumpa ñaneñoño teeta iyupeguarã jare yayapota jupi vae,

jare jae icota yande ndive cua ivi pe yaico rambueve.

⁷⁶ Jare ñru vae reta uyemingueta nderé yave, jeita:

‘Jae co penti Tumpa iñee umimbeu vae.’

Echa'ã nde, cherai, ndeota yandeYa jenonde ndiyapicatu vaerã japerã.

⁷⁷ Nemimbeuta yandeYa imbae reta pe quirãi Tumpa umbiasata chupe imbaeyoa reta jare jucuarãi uyembiasacata.

⁷⁸ Cuarãi Tumpa uyapota, yandeparareco ramo.

Jare ipuruparareco jeco pegua ombouta yanembiasa vaerã, opa ara rupi ombou guarasi yanembori vaerã rami.

⁷⁹ Jae yanemborita guarasi jembipe yanembori rami.

Echa'ã guarasi umee yandeve tembipe agüiye vaerã yaico pñtumimbi pe.

Jae yanemborita agüiye vaerã yaquiye mano güi.

Jae yanemborita yaico vaerã yandepiacatu reve” —jei Zacarías.

⁸⁰ Jare sambiai ucuacuaa, jare uñemiatangãtu Tumpa coti. Jare ico ñana rupi uyecuaa Israel pegua reta pe regua.

¹ Juan ichi güi oa yave, romano reta juvicha guasu Augusto César jee vae oyocui opaete vae uyepapaca vaerã. ² Jaeramo opaete vae uyepapaca Cirenio ico ivi Siria pegua reta juvicha guasurã yave. ³ Jare opaete vae yugüiraa itenondegua jenta guasu pe uyepapaca vaerã.

⁴ Jare José vi oo Nazaret Galilea pegua güi tenta guasu Belén Judea pegua pe. Echa'ã jae co David inemoñaã reta pegua, jare David jenta guasu co jae Belén. ⁵ Jáeramo José oo Belén pe uyepapaca vaerã, jare güiraa jembireco María. Jare María ipurúa ma. ⁶ Jare Belén pe ñugüinoi rambueve, ara ou uvãe María imembi oa vaerã. ⁷ Jare María imembiripi cuimbae oa. Jayave María oñoma penti ñomaa pe jare umbiyapacua penti maemimba icaruariru pe. Echa'ã mbaeti co José jare María jendarã tenta pe.

Ángel reta jare ovecha iyandarecoa reta

⁸ Jare jocua pïtu amocue ovecha iyandarecoa reta uyandareco ñugüinoi iovecha reta re ñana rupi coiño tenta guasu Belén güi. ⁹ Jare uyecuaa chupe reta penti ángel yandeYa pe uyeyocui vae, jare jembipe jae reta ñugüinoi vae pe. Echa'ã yandeYa imbaepuere uyecuaa chupe reta. Jare jae reta uquiye ete. ¹⁰ Jayave ángel jei chupe reta:

—Agüiye pequiye. Mase, amimbeuta peve ñee icavi vae tuicha rupi piyerovia vaerã. Cua ñee opaete vae peguarã co —jei—. ¹¹ Echa'ã cua pïtu oa upurumbiasa vae David jenta guasu pe. Jae co yandeYa Cristo, Tumpa ombou vae —jei ángel chupe reta—. ¹² Jare cuarãi picuaata: Pevãeta sambiaí uñeñoa oï penti ñomaa pe jare uyapacua oï penti maemimba icaruariru pe —jei.

¹³ Jare jupivoi uyecuaa jocua ángel ndive jeta ete ángel reta. Opaete vae umbiadora Tumpa. Echa'ã jei reta:

¹⁴ “Tuyembiadoraca Tumpa ara pe oï vae,

jare ivi pegua reta Tumpa ipiacavi chupe reta vae tipiacatu” —jei.

¹⁵ Jare ángel reta yugüiraa ye yave chugüi reta ara pe, ovecha iyandarecoa reta jei uyupe:

—Yaa Belén pe yaecha vaerã cua uyeyapo vae. Echa'ã yandeYa uicuaaca yandeve —jei reta.

¹⁶ Jayave javoi pegua yugüiraa joco pe, jare uvãe María jare José jare sambiaí. Jocua sambiaí uyapacua oï maemimba icaruariru pe. ¹⁷ Jare uecha ma yave, yugüiraa ye umimbeu ñru vae reta pe ángel jei chupe reta jocua sambiaí re vae. ¹⁸ Jare opaete uyandu vae reta ipiacañi ovecha iyandarecoa reta umimbeu chupe reta vae re. ¹⁹ Ërei María imandúa opaete cua re jare ipia pe uyemingueta cavi jese. ²⁰ Jare ovecha iyandarecoa reta yugüiraa ye Belén güi. Umbiadora reta Tumpa jare umee yasurupai chupe opaete uyandu jare uecha vae re. Echa'ã jae reta uecha ma sambiaí ángel jei chupe reta rami.

Güiraa reta Jesús Tumpa jo pe

²¹ Jare sambiaí ocho ara ma güinoi yave, tu jare ichi umicircuncidaca jare umbijee Jesús. Echa'ã ángel umimbeu María pe jucuarã umbijee vaerã ndei María ipurúa mbove.

²² Jare ara ou uvãe María oo vaerã yandeYa jo pe uyeyoeca vaerã yandeYa coti. Echa'ã jucuarã uyecuatía oï Moisés iporoyocui pe cuña imembi vae uyapo vaerã. Jayave tu jare ichi güiraa Jesús tenta guasu Jerusalén pe yandeYa jo pe oñonoca tee vaerã Tumpa peguarã. ²³ Echa'ã yandeYa iporoyocui pe uyecuatía oï cuarã: “Cuña imembiripi cuimbae oa yave, sambiaí uñeñoa teeta yandeYa peguarã.” Jucuarã uyecuatía oï. ²⁴ Jáeramo Jesús tu jare ichi uyucaca umee vaerã yandeYa pe mocui güira tórtola jee vae ani mocui picasu tairusu vae. Echa'ã jucuarã jei uyapo vaerã mboroyocui yandeYa umee chupe reta vae pe.

²⁵ Jare jocua ara penti cuimbae Jerusalén pegua Simeón jee vae oï Tumpa jo pe. Simeón jecuaeño uyapo jupi vae jare umbiadora Tumpa. Jae uãro oï omborita Israel pegua reta vae ou vaerã. Jare jae tinee Espíritu Santo pe. ²⁶ Jare Espíritu Santo uicuaaca ma Simeón pe quirã ndarau umano ndei uecha Cristo yandeYa ombouta vae mbove. ²⁷ Jare jocua ara Espíritu Santo uicuaaca ma Simeón pe oo vaerã uique Tumpa jo pe. Jare Jesús tu jare ichi güiraa Jesús uruique Tumpa jo pe uyapo vaerã mboroyocui jei vae rupi. ²⁸ Jayave Simeón ovoi Jesús jare umbiadora Tumpa. Jae jei:

²⁹ “CheYa, jecuaeño ayeyocui ndeve.

Añave ndepuere nemaeño cheré amano vaerã chepiacatu reve.

Echa'ã cuarãi nde ndere cheve uyeyapota co.

³⁰ Aecha ma upurumbiasa vae nde nembou vae.

³¹ Nde ndiparavo opaete vae peguarã.

³² Jae co penti tembipe rami.

Ime tembipe yave, yaecha cavi mbaembae.

Jae ramiño vi jae ndecuaaca cavita judío mbae vae reta pe.

Jare Israel pegua reta uyepiucata jae jeco pegua.

Echa'ã Israel pegua reta nembae reta co" —jei Simeón.

³³ Jare José jare Jesús ichi ipiacañi Simeón jei Jesús re vae re. ³⁴ Jare Simeón jei Tumpa tumivendise José jare María. Jayave jei María pe:

—Mase, Tumpa uiparavo ma cua nemembi. Jae uicuaacata Israel pegua reta pe quía co jae. Èrei jeta Israel pegua reta güirĩrota jare jeta vae güiroviata jese —jei—. ³⁵ Echa'ã uyecuaata opaete vae ipia pe oĩ vae. Jare nde etei ndepiatiti eteta jese —jei Simeón María pe.

³⁶ Jare ico vi penti cũa Ana jee vae. Jae co Fanuel tayi. Jocua Fanuel co jae penti ati Aser jee vae pegua. Ana co jae Tumpa iñee umimbeu vae. Ucuacuaa ete ma. Jaeño siete año ico ime ndive. ³⁷ Echa'ã jayave ime umano chugüi. Ana güinoi ma ochenta y cuatro año. Jecuaño ico Tumpa jo pe jare uyeyocui Tumpa pe. Echa'ã uyecuaacu tembiu güi jare uyerure Tumpa pe ara rupi jare pĩtu rupi. ³⁸ Jae ou uvãe José jare María jare Jesús ñugüinoi vae pe. Jayave jae vi umee yasurupai yandeYa pe, jare imiari Jesús re opaete Jerusalén pegua uãro ñugüinoi Cristo ou uepi vaerã vae reta pe.

Yugüiraa ye Nazaret pe

³⁹ Jare José jare María uyapo yandeYa jo pe opaete yandeYa iporoyocui jei uyapo vaerã vae. Jayave yugüiraa ye Galilea pe jae jenta guasu Nazaret pe. ⁴⁰ Jare sambiaĩ ucuacuaa jare jatangãtu. Iyaracuaa catu vi. Jare Tumpa ipiacavi oĩ jae ndive.

Jesús Tumpa jo pe

⁴¹ Jare opa año Jesús tu jare ichi yugüiraa Jerusalén pe pascua ara pe. ⁴² Jare Jesús doce año ma güinoi yave, oo jae reta jupíe pascua peguarã, jae reta jecoño mai uyapo vae rami. ⁴³ Jare uasa ma yave pascua, Jesús tu jare ichi oẽ Jerusalén güi yugüeru ye vaerã jenta pe. Èrei Jesús upita Jerusalén pe tu jare ichi uicuaa mbae reve. ⁴⁴ Echa'ã jae reta jei tẽi Jesús ou co oĩ iguataĩru reta jupíe. Èrei caaru ma yave, ueca reta tẽi jentarã reta jare ĩru uicuaa vae reta ñugüinoi vae rupi. ⁴⁵ Èrei uvãe'ã chupe. Jayave Jesús tu jare ichi yugüiraa ye Jerusalén pe ueca vaerã. ⁴⁶ Jare mbapi ara ma uasa yave, uvãe reta chupe Tumpa jo pe. Jesús uguapi oĩ mboroyocui re oporomboe vae reta ipite pe. Uyapisaca oĩ jese reta jare upirandu chupe reta mbaembae re. ⁴⁷ Jare opaete vae ipiacañi. Echa'ã Jesús uicuaa cavi opaete iporomboe jare ipuere umimbeu cavi chupe reta jae reta upirandu chupe mbae re yave. ⁴⁸ Jare Jesús tu jare ichi uecha yave, jae reta vi ipiacañi. Jayave ichi jei Jesús pe:

—Chemembi, ¿maera pa ndiyapo cuarãi oreve? Mase, nderu jare che ndueca tẽi opaete que rupi orepiatiti reve —jei.

⁴⁹ Jayave Jesús jei chupe reta:

—¿Maera pa chereca opaete que rupi? Icavi co apita vaerã cua pe ayapo vaerã cheRu iparaviqui. ¿Picuaa'ã pa cua? —jei chupe reta.

⁵⁰ Èrei jae reta uicuaa'ã mbae uipota jei jocua Jesús jei chupe reta vae. ⁵¹ Jayave Jesús ou ye Nazaret pe jae reta jupíe, jare jecuaño uyapo jae reta jei vae. Jare Jesús ichi imandúa opaete uyeyapo vae re. ⁵² Jare Jesús jecuaño ucuacuaa oo oĩ. Jare iyaracuaa catu. Jecuaño umbiyerovia Tumpa jare ĩru vae reta vi.

3

Juan upurumbibautiza vae umimbeu Tumpa iñee

(Mt 3.1-12; Mr 1.1-8; Jn 1.19-28)

¹⁻² Jare Tiberio César quince año ma

romano reta juvicha guasurã ico yave, Tumpa ombou iñee Juan pe. Juan co jae Zacarías tai, jare ico ñana pe. Jocua ara reta pe Poncio Pilato ico Judea pegua reta juvicha guasurã, jare Herodes ico Galilea pegua reta juvicha guasurã, jare Herodes tivĩ Felipe jee vae ico ivi Iturea pegua reta jare ivi Traconite pegua reta juvicha guasurã, jare Lisianias ico ivi

Abilinia pegua reta juvicha guasurā. Jare Anás jare Caifás yugüireco Israel pegua reta isacerdote tenondegua retarā. ³ Jayave Juan uguata ico opaete iāca Jordán iyipi rupi. Jare umimbeu opaete vae pe ueya vaerā iyemingueta icavi mbae vae ipia pe oī vae jare uyembibautizaca vaerā, Tumpa umbiasa vaerā chupe reta imbaeyoa reta. ⁴ Isaías co jae penti Tumpa iñee aracae umimbeu vae. Jae uicuatía cuarāi:

“Jae iñeeāta reve jeita ñana rupi:

‘Piyapicatu yandeYa japerā.

Pemisimi tape’ —jeita—.

⁵ ‘Opaete jugua reta uñemitineeta ivi pe.

Jare opaete ivitu reta uyeyapota ñuu rami.

Jare tape ipāri vae reta uñemisimicata.

Jare tape quipe quipe vae reta ipecavita.

⁶ Jare opaete vae uicuaata quirāi Tumpa ipuere upurumbiasa.’ ”

Jucuarāi uicuatía Isaías.

⁷ Jare jeta vae yugüeru Juan oī vae pe uyembibautizaca vaerā. Jayave Juan jei chupe reta:

—Pe reta co jae mboi reta rami. ¿Quía pa umimbeu peve piyero vaerā Tumpa coti agüiye vaerā Tumpa uiporaraca peve? —jei—. ⁸ Piyapo icavi vae, jucuarāi picuaaca vaerā añetete peeya co piyemingueta icavi mbae vae pepia pe oī vae. Agüiye pere piyupe pepia pe: ‘Yandetenondegua co jae Abraham.’ Echa’ā che jae peve cua: Tumpa ipuere uyapo cua ita reta güi Abraham iñemoñaa retarā —jei Juan chupe reta—. ⁹ Yamijaanga penti temiti. Temiti ía icavi’ā yave, iya uyasia japo reve jare uapi. Jae ramiño vi piyapo’ā yave icavi vae, Tumpa uiporacata peve —jei.

¹⁰ Jayave joco pe ñugüinoi vae reta upirandu Juan pe:

—¿Mbae pa nduyapota?

¹¹ Jayave Juan jei chupe reta:

—Ime yave quía mocui temimonde güinoi vae, tumee penti mbaeti temimonde güinoi vae pe. Jare ime yave quía jeta tembiu güinoi vae, tumee mbaeti tembiu güinoi vae pe —jei.

¹² Yugüeru vi Juan oī vae pe mburuvicha peguarā ocovara vae reta uyembibautizaca vaerā. Jae reta upirandu Juan pe:

—Oporomoe vae, ¿mbae pa nduyapota?

¹³ Jayave Juan jei chupe reta:

—Agüiye ma pembiasa pecovara mburuvicha reta peocui vae güi.

¹⁴ Sundaro reta vi upirandu Juan pe:

—¿Mbae pa nduyapota?

Jayave Juan jei chupe reta:

—Agüiye pemumburu iru vae reta jare agüiye peapu iru vae reta re. Jare agüiye jecuaño pipota jeta peruvicha reta umbiepi peve vae güi.

¹⁵ Opaete vae uāro ñugüinoi Cristo ou vaerā, jare ipia pe uyemingueta quirāi aramo Juan co jae Cristo. ¹⁶ Jáeramo Juan jei chupe reta:

—Che pumbibautiza i pe. Ērei outa ipuere ete chegüi vae. Jupi’ā co che ayora vaerā ipipasa ichā. Jae pembibautizata Espíritu Santo pe jare tata pe —jei—. ¹⁷ Jae co trigo uipoo vae rami. Echa’ā trigo uipoo vae umbiveve trigo uequi vaerā iti. Jayave uñuvatu trigo jiru pe. Ērei uapi iti tata pe. Tata Cristo uiporuta vae opa mbae vae co —jei.

¹⁸ Jare Juan jeta jei chupe reta umimbeu vaerā chupe reta ñee icavi vae. ¹⁹ Jare mburuvicha guasu Herodes umenda tivi Felipe jembireco Herodías jee vae ndive jare uyapo jeta mbae icavi mbae vae. Jare Juan iñeengueta Herodes pe opaete icavi mbae vae uyapo vae re. ²⁰ Jayave Herodes uyapo ye icavi mbae vae. Echa’ā oñonoca Juan peresoriru pe.

Juan umbibautiza Jesús

(Mt 3.13-17; Mr 1.9-11)

²¹ Ērei ndei Juan uñeñonoca peresoriru pe mbove, penti ara Jesús ou Juan oī vae pe. Jare Juan iru vae reta umbibautiza yave, umbibautiza vi Jesús. Jare Jesús uyerure Tumpa

pe rambueve, ara uyepéa. ²² Jare uyecuaa Espiritu Santo ugüeyi Jesús re picasu rami. Jayave uyendu ñee ara güi jei:

—Nde co jae cheRai nduau ete vae. Chembiyerovia ete —jei.

Jesús itenondegua reta

(Mt 1.1-17)

²³ Jare Jesús güinoi ma treinta año rupi. Íru vae reta ipia pe uyemingueta tēi jae co José tai. José co jae Elí tai. ²⁴ Elí co jae Matat tai. Matat co jae Leví tai. Leví co jae Melqui tai. Melqui co jae Jana tai. Jana co jae José tai. ²⁵ José co jae Matatías tai. Matatías co jae Amós tai. Amós co jae Nahum tai. Nahum co jae Esli tai. Esli co jae Nagai tai. ²⁶ Nagai co jae Maat tai. Maat co jae Matatías tai. Matatías co jae Semei tai. Semei co jae José tai. José co jae Judá tai. ²⁷ Judá co jae Joana tai. Joana co jae Resa tai. Resa co jae Zorobabel tai. Zorobabel co jae Salatiel tai. Salatiel co jae Neri tai. ²⁸ Neri co jae Melqui tai. Melqui co jae Adi tai. Adi co jae Cosam tai. Cosam co jae Elmodam tai. Elmodam co jae Er tai. ²⁹ Er co jae Josué tai. Josué co jae Eliezer tai. Eliezer co jae Jorim tai. Jorim co jae Matat tai. ³⁰ Matat co jae Leví tai. Leví co jae Simeón tai. Simeón co jae Judá tai. Judá co jae José tai. José co jae Jonán tai. Jonán co jae Eliaquim tai. ³¹ Eliaquim co jae Melea tai. Melea co jae Mainán tai. Mainán co jae Matata tai. Matata co jae Natán tai. ³² Natán co jae David tai. David co jae Isaf tai. Isaf co jae Obed tai. Obed co jae Booz tai. Booz co jae Salmón tai. Salmón co jae Naasón tai. ³³ Naasón co jae Aminadab tai. Aminadab co jae Aram tai. Aram co jae Esrom tai. Esrom co jae Fares tai. Fares co jae Judá tai. ³⁴ Judá co jae Jacob tai. Jacob co jae Isaac tai. Isaac co jae Abraham tai. Abraham co jae Taré tai. Taré co jae Nacor tai. ³⁵ Nacor co jae Serug tai. Serug co jae Ragau tai. Ragau co jae Peleg tai. Peleg co jae Heber tai. Heber co jae Sala tai. ³⁶ Sala co jae Cainán tai. Cainán co jae Arfaxad tai. Arfaxad co jae Sem tai. Sem co jae Noé tai. Noé co jae Lamec tai. ³⁷ Lamec co jae Matalalén tai. Matalalén co jae Enoc tai. Enoc co jae Jared tai. Jared co jae Mahalaleel tai. Mahalaleel co jae Cainán tai. ³⁸ Cainán co jae Enós tai. Enós co jae Set tai. Set co jae Adán tai. Adán co jae Tumpa tai.

4

Aña guasu umingueta Jesús uyavica vaerã tēi chupe

(Mt 4.1-11; Mr 1.12-13)

¹ Jare Jesús ou ye Jordán güi. Jae tinee Espiritu Santo pe. Jayave Espiritu Santo güiraa Jesús ñana pe. ² Jare Jesús upita ñana pe cuarenta ara, jare aña guasu umingueta uyavica vaerã tēi chupe. Jare jocua ara reta pe Jesús jou'a mbae ave. Jáeramo jocua ara reta opa ma yave, iyembai. ³ Jayave aña guasu jei Jesús pe:

—Nde co jae Tumpa Tai yave, ere cua ita pe uyeyapo vaerã mbiyaperã.

⁴ Ērei Jesús jei chupe:

—Tumpa iñee pe uyecuatía oĩ cuarã: 'Icavi co ivi pegua reta jou vaerã mbiyape güinoi vaerã tecove. Ērei icavi ete co uyapisaca vaerã Tumpa iñee re jare uyapo vaerã jei vae güinoi vaerã tecove opa mbae vae.' Jucuarãi uyecuatía oĩ —jei.

⁵ Jayave aña guasu güiraa Jesús penti ivitu guasu ivate vae re jare uechaca chupe penti jeia pe opaete mburuvicha guasu reta iporoyocua ivi pe ñugüinoi vae reta. ⁶ Jayave aña guasu jei Jesús pe:

—Tamee ndeve mbaepuere ndiyeyapo vaerã opaete cua juvicha guasurã, opaete vae nemiadora vaerã. Echa'a cua mbaepuere uñemee co cheve jare chepuere amee aipota amee chupe vae pe —jei—. ⁷ Nde ndiyeatca yave chembiadora vaerã, tamee ndeve nemberã —jei.

⁸ Jayave Jesús jei chupe:

—Esiri chegüi, Satanás. Echa'a Tumpa iñee pe uyecuatía oĩ cuarã: 'Che co jae ndeYa Tumpa. Chembiadora. Jaeño cheve iyeyocui.' Jucuarãi uyecuatía oĩ —jei.

⁹ Jayave aña guasu güiraa Jesús Jerusalén pe jare umbuyupi Tumpa jo iyapite re. Jayave jei chupe:

—Nde co jae Tumpa Tai yave, ea cua güi. ¹⁰ Echa'a Tumpa iñee pe uyecuatía oĩ cuarã: 'Tumpa oyocuita ángel reta uyandareco vaerã nderé.

¹¹ Ipo pe ndepisi ndeocota reta, agüiye vaerã ndepi uyererocua ita re.'

Jucuarāi uyecuatía oī —jei añã guasu chupe.

¹²Jayave Jesús jei chupe:

—Tumpa iñee pe uyecuatía oī cuarāi: ‘Che co jae ndeYa Tumpa. Agüiye mbae iyapo ndicuaa vaerã tuicha ra chepiaguasu.’ Jucuarāi uyecuatía oī —jei.

¹³Jare añã guasu opa ma umingueta yave uyavica vaerã tẽi chupe, usiri chugüi michi pegua.

Jesús umbipi iparaviqui

(Mt 4.12-17; Mr 1.14-15)

¹⁴Jayave Jesús ou ye Galilea pe. Jare güinoi mbaepuere Espíritu Santo umee chupe vae. Jare jerãcua jese opaete jocua ivi rupi. ¹⁵Jare jae oporombœe judío reta itupao reta pe jare opaete vae umbiadora.

Jesús Nazaret pe

(Mt 13.53-58; Mr 6.1-6)

¹⁶Jayave Jesús ou ye Nazaret pe - joco pe jae ucuacuaa. Jayave mbutuu ara pe uique judío reta itupao pe uyapoñoi rami, jare uyemboi Tumpa iñee umingueta vaerã. ¹⁷Jare uñemee Jesús pe penti libro. Jocua libro pe oī Tumpa iñee aracae umimbeu vae Isaías uicuatía vae. Jayave Jesús uipea libro jare uvãe umingueta vaerã. Jayave umingueta cuarāi:

¹⁸“YandeYa iEspíritu ime che ndive oī.

Jae cheparavo amimbeu vaerã ñee icavi vae iparavete vae reta pe.

Jae chembou ambipiãcatu vaerã ipiatiti vae reta.

Chembou vi amimbeu vaerã pereso reta pe ipuere ma ueyora, jare amimbeu vaerã jesa mbae vae reta pe uma vaerã.

Chembou vi ayora vaerã uiporara vae reta uiporaraca chupe vae reta imbaepuere güi.

¹⁹Chembou vi amimbeu vaerã yandeYa ipiacavita opaete vae pe.”

Jucuarāi umingueta. ²⁰Jayave Jesús uyuquenda ye libro jare umee ye libro iyandarecoa pe. Jayave uguapi ye. Jare opaete tupao pe ñugüinoi vae reta uma ngatu Jesús re. ²¹Jayave Jesús jei chupe reta:

—Cua ara cua uyecuatía oī vae ueyapõ ma perovaque.

²²Jare opaete joco pe ñugüinoi vae reta uyemingueta cavi jese. Echa'a ipiacañi iñee icavi ete vae re. Jae reta jei:

—¿Jae'a yera cua José tai?

²³Jayave Jesús jei chupe reta:

—Pereta co cheve jocua yamijaanga reve yae vae: ‘Nde co jae penti upurupiano vae. Jáeramo iñepiano. Echa'a jerãcua oreve quirāi mbaembae ndiyapo Capernaum pe. Jáeramo iyapo vi cua pe ndeivi pe’ —pereta, jei—. ²⁴Añete che jae peve, ime yave quía Tumpa iñee umimbeu jentaigua reta pe vae, jae reta güirovia'a —jei—. ²⁵Añete che jae peve, jeta cuña ime umano vae reta yugüireco Israel pe Elías ico rambueve. Mbapi año jare seis yasi oqui'a jare caruai opaete que rupi —jei—. ²⁶Èrei Tumpa omondo'a Elías penti cuña ime umano vae Israel pegua pe. Jaeño omondo penti cuña ime umano vae tenta guasu Sarepta Sidón pegua vae pe —jei Jesús chupe reta—. ²⁷Jae ramiño vi jeta ipire ocui vae reta yugüireco Israel pe Tumpa iñee aracae umimbeu vae Eliseo ico rambueve. Èrei Tumpa omondo'a Eliseo umbigüera vaerã penti ipire ocui vae Israel pegua. Jaeño omondo umbigüera vaerã Naamán, jare Naamán co jae Siria pegua —jei.

²⁸Cua uyandu reta yave, opaete tupao pe ñugüinoi vae reta pochi ete Jesús pe. ²⁹Jayave jae reta upãa jare güiraa Jesús tenta guasu güi ivitu iyapite re omombo vaerã tẽi ivi coti joco güi. Jocua tenta guasu oī ivitu guasu re. ³⁰Èrei Jesús uasa jae reta ipite rupi jare oo chugüi reta.

Cuimbae añã oya jese vae

(Mr 1.21-28)

³¹Jayave Jesús oo tenta guasu Capernaum Galilea pegua pe. Joco pe Jesús oporombœe opaete mbutuu ara pe. ³²Jare uyapisaca jese vae reta ipiacañi iporombœe re. Echa'a ombœe reta mbaepuere güinoi vae rami. ³³Jare uique oo tupao pe cuimbae añã oya jese vae. Jae iñeeãta reve jei:

³⁴—¿Maera pa ndeyu oremambeco, Jesús Nazaret pegua? ¿Ndeyu pa oremicãñitei vaerã? Che nducuaa. Nde co jae Tumpa Tai —jei.

³⁵ Jayave Jesús ñeengata chupe.

—¡Nequii! ¡Esiri chugüi! —jei.

Jayave opaete vae jovaque añã uiti ivi re cuimbae jare usiri chugüi. Ueya caviño. ³⁶Jare opaete uecha vae reta ipiacañi, jare upirandu uyupe:

—¿Mbae nunga ñee pa cua? Echa'ã mbaepuere pe oyocui añã reta usiri vaerã oya jese vae reta güi, jare jae reta uyapo oyocui vae —jei reta.

³⁷ Jare jerãcua jesegua opaete jocua ivi rupi.

Jesús umbigüera Simón jaicho

(Mt 8.14-15; Mr 1.29-31)

³⁸ Jare Jesús tupao güi oẽ ye yave, uique Simón jenta pe. Jare Simón jaicho tanta jacu oĩ. Ìru joco pe ñugüinoi vae reta uyerure Jesús pe umbigüera vaerã. ³⁹ Jayave Jesús oo cuña oĩ vae pe, jare jei jacu upita vaerã chugüi. Jayave jacu upita chugüi. Jayave jupivoiño cuña upã jare umee mbae jou reta vaerã.

Jesús umbigüera imbaerasi vae reta

(Mt 8.16-17; Mr 1.32-34)

⁴⁰ Jare guarasi uique ma yave, opaete jentarã imbaerasi vae güinoi vae reta güeru imbaerasi vae reta Jesús oĩ vae pe. Jare Jesús oñono ipo penti penti re jare umbigüera reta. ⁴¹ Jare añã reta usiri oya jese vae reta güi. Usapicai reta jare jei:

—Nde co jae Tumpa Tai.

Èrei Jesús ñeengata chupe reta. Umaeño'ã añã reta re uyemingueta vaerã. Echa'ã jae reta uicuaa jae co Cristo, Tumpa ombou vae.

Jesús oo Galilea rupi umimbeu Tumpa ñhee

(Mr 1.35-39)

⁴² Piareve pe Jesús oẽ tenta guasu güi oo quii ngatu vae pe. Jayave tenta guasu pegua reta yugüiraa ueca. Jare yugüiraa uvãe yave jae oĩ vae pe, uyerure tẽi chupe agüiye vaerã oo chugüi reta. ⁴³ Èrei Jesús jei chupe reta:

—Icavi co aa vaerã ìru tenta guasu-rai reta pe amimbeu vaerã joco pe vi ñee icavi vae Tumpa iporoyocua regua. Echa'ã cuarã Tumpa chembou —jei.

⁴⁴ Jare oo opaete ivi Galilea rupi, jare umimbeu Tumpa ñhee judío reta itupaopao rupi.

5

Uipisi reta jeta ete pira

(Mt 4.18-22; Mr 1.16-20)

¹ Jare penti ara Jesús uyemboi rambueve i guasu Genesaret jee vae jembei pe, jeta vae yugüeru jae oĩ vae pe uyapisaca vaerã Tumpa ñhee re. ² Jare Jesús uecha mocui chalana i jembei pe. Iya reta pira uipisi vae reta co. Cua iya reta ueya joco pe, pisa reta oyoe rambueve. ³ Jayave Jesús uyupi penti chalana pe, jare uyerure Simón pe uruique vaerã chalana i pe. Echa'ã Simón imbae co jocua chalana. Jayave Jesús uguapi chalana pe jare joco güi omboe joco pe ñugüinoi vae reta.

⁴ Jare opa ma uyemingueta yave, Jesús jei Simón pe:

—Ecuã i tipì vae pe pemombo pepisa reta pipisi vaerã pira.

⁵ Jayave Simón jei Jesús pe:

—CheYa, orecoe ma nduparaviqui tẽi. Nduipisi'ã mbae ave. Èrei tamombo pisa reta nde ndere cheve ramo —jei.

⁶ Jare jucuarãi uyapo reta ma yave, jeta ete pira reta uique pisa pe. Jare pisa uyembipi osoro. ⁷ Jayave uyepueru reta ìru ìru chalana pe ñugüinoi vae reta pe yugüeru vaerã ombori. Jayave jae reta yugüeru jare umitinee reta mocui reve chalana. Jare mocui reve poi ete jare usacambu pota echa. ⁸ Jare Simón Pedro cua uecha yave, uyeatica Jesús jovai jare jei chupe:

—Esiri chegüi, cheYa. Echa'ã che co jae penti cuimbae iyoa vae —jei.

⁹ Echa'ã Pedro jare opaete jae ndive ñugüinoi vae reta ipiacañi jeta ete pira uipisi vae re. ¹⁰ Jae ramiño vi Simón ìru reta Jacobo jare Juan jee vae ipiacañi jese. Jacobo jare Juan Zebedeo tai reta co. Jayave Jesús jei Simón pe:

—Agüiye equiye. Che nduyapota ìru vae reta nderu vaerã cheve cua ara güiive —jei.

¹¹ Jayave jae reta güeru icalana reta i jembe pe. Jayave ueya reta opaete, yugüiraa vaerä Jesús jupíe.

Jesús umbigüera cuimbae ipire ocui vae
(Mt 8.1-4; Mr 1.40-45)

¹² Jare Jesús oo uväe yave penti tenta guasu pe, joco pe oĩ penti cuimbae ipire ocui vae. Cuimbae uecha Jesús yave, uyeatica jae jovai jare uyerure chupe.

—CheYa —jei—, ndipota yave, ndepuere chembigüera.

¹³ Jayave Jesús oñono ipo jese.

—Aipota. Ecuera —jei chupe.

Jare jupivoiño cuimbae ucuera imbaerasi güi. Ocui'ã ma ipire. ¹⁴ Jayave Jesús oyocui: —Agüiye emimbeu quía pe. Ecu a iyeechaca sacerdote pe, jare emee ofrenda Moisés peocui rami, tenta guasu pegua reta uicuaa vaerä ndecuera ma co —jei.

¹⁵ Èrei jeta vae uyandu Jesús uyapo vae regua. Jayave jeta vae uyembati jae oĩ vae pe uyapisaca vaerä jese jare jae umbigüera vaerä imbaerasi vae reta. ¹⁶ Èrei Jesús oo chugüi reta ñuu coti uyerure vaerä Tumpa pe.

Jesús umbigüera cuimbae ipuere mbae omi vae
(Mt 9.1-8; Mr 2.1-12)

¹⁷ Jare penti ara Jesús oporomboe oĩ, jare amocue fariseo reta jare mboroyocui re oporomboe vae reta uguapi ñugüinoi jocoropi. Jae reta yugüeru Jerusalén jare opaete tenta guasu Galilea jare Judea pegua reta güi. Jare Jesús güinoi Tumpa imbaepuere umbigüera vaerä imbaerasi vae reta. ¹⁸ Jayave amocue yugüeru vae reta güeru penti cuimbae imbaerasi vae jupa reve. Cua cuimbae ipuere mbae omi vae. Güeru vae reta uipota tēi uruique imbaerasi vae o pe, oñono vaerä Jesús jovai. ¹⁹ Èrei ipuere'ã uruique Jesús oĩ vae pe, uyembiap'e'ã ye ñugüinoi reta ramo. Jáeramo uruyupi o iárambo jare uipea chupe Jesús jese catu. Joco pe umbigüeyi jocua cuimbae ipuere mbae omi vae jupa reve opaete vae ipite pe Jesús jovai. ²⁰ Jesús cua uecha yave, uicuaa jae reta güirovia co jese, jare jei cuimbae ipuere mbae omi vae pe:

—Nembaeyoa reta uyembai ma, cherivi.

²¹ Jayave mboroyocui re oporomboe vae reta jare fariseo reta ipia pe uyemingueta: “¿Quía pa co jae cuaräi jei vaerä? Jei icavi mbae vae Tumpa coti. Tumpaño co ipuere umbiasa quía pe imbaeyoa reta.” ²² Èrei Jesús uicuaa jae reta ipiyemingueta, jare jei chupe reta:

—¿Maera pa pepia pe piyemingueta jucuaräi? ²³ Chepuere jae cua cuimbae pe: ‘Nembaeyoa reta uyembai ma.’ Jae ramiño vi chepuere jae chupe: ‘Epüa eguata.’ ¿Mbae nunga pa yavai jae vaerä? —jei Jesús chupe reta—. ²⁴ Èrei aipota picuaa vaerä cua: Che cuimbaerä ayeyapo vae chepuere umbiasa quía pe imbaeyoa reta cua ivi pe aĩ rambueve —jei.

Jayave jei cuimbae ipuere mbae omi vae pe:

—Che jae ndeve: Epüa evoi nderupa, jare ecua nerenta pe —jei.

²⁵ Jayave jupivoi cuimbae upüa, jare ovoi jupa, jare oẽ oo jenta coti opaete joco pe ñugüinoi vae reta jovaque. Jare oo rambueve, umbiadora Tumpa. ²⁶ Jae ramiño vi opaete joco pe ñugüinoi vae reta umbiadora Tumpa. Echa'ã opareve ipiacañi jare uquiye. Jei reta:

—Cua añave yaecha vae ñanemipiacañi.

Jesús ueni Leví
(Mt 9.9-13; Mr 2.13-17)

²⁷ Jayave Jesús oẽ jare uecha mburuvicha peguarä ocovara vae Leví jee vae uguapi oĩ mburuvicha peguarä ocovara ñugüinoi vae pe, jare jei chupe:

—Eyu cherupíe.

²⁸ Jayave Leví upüa, jare oo jae jupíe. Ueya opaete imbaembae joco pe.

²⁹ Jare Leví uyapo pareu guasu jae jenta pe Jesús peguarä. Jare joco pe jeta mburuvicha peguarä ocovara vae reta jare ñru vae reta ucaru vi ñugüinoi Jesús jare ñru reta ndive. ³⁰ Èrei mboroyocui re oporomboe vae reta jare fariseo reta ñeenguru Jesús jemimboe reta pe. Jei reta:

—¿Maera pa pecaru mburuvicha peguarã covara vae reta jare teco icavi mbae vae uyapo vae reta ndive?

³¹ Jayave Jesús jei chupe reta:

—Icove catu vae reta ueca'ã upurupiano vae. Imbaerasi vae retaño ueca —jei—. ³² Che ayu aeca vaerã iyoa vae reta ueya vaerã iyemingueta icavi mbae vae ipia pe oĩ vae. Ayu'ã aeca vaerã jupi vae reta —jei.

Maera Jesús jemimboe reta uyecuacu'ã tembú güi

(Mt 9.14-17; Mr 2.18-22)

³³ Jare amocue vae yugüeru Jesús oĩ vae pe jare jei chupe:

—Juan jemimboe reta jeta vese uyecuacu tembú güi uyerure reve Tumpa pe. Jae ramiño vi uyapo jucuarãi fariseo reta jemimboe reta. Ërei nderemimboe reta ucaruñoi —jei reta.

³⁴ Jayave Jesús jei chupe reta:

—Umendata vae pe ñugüinoi vae reta ndarau etei uyecuacu tembú güi, umendata vae jae reta ndive oĩ rambueve —jei—. ³⁵ Ërei outa uvãe ara umendata vae uyereraaca vaerã chugüi reta. Jayave ramo uyecuacuta tembú güi —jei.

³⁶ Jayave imiari chupe reta umijaanga reve.

—Icavi'ã yamboya vaerã temimonde indechi vae maemboyaa ipiau vae pe. Echa'ã jucuarãi yayapo yave, maemboyaa ipiau vae umiãta temimonde indechi vae, jare temimonde jeiete osoro —jei—. ³⁷ Jae ramiño vi icavi'ã yambiru vaerã vino ipiau vae vino jiru guacapi indechi vae pe. Echa'ã jucuarãi yayapo yave, vino ipiau vae omondoro jiru, jare vino uyeipyere, jare jiru icavi'ã ma —jei—. ³⁸ Jáeramo yambiru vino ipiau vae jiru ipiau vae pe —jei—. ³⁹ Jare ime yave quã vino indechi vae jou vae, uipota'ã jupivoi jou vino ipiau vae. Echa'ã jae jei vino indechi vae icavi ete vino ipiau vae güi —jei.

6

Jesús jemimboe reta uipoo trigo mbutuu ara pe

(Mt 12.1-8; Mr 2.23-28)

¹ Mbutuu ara pe Jesús oo co rupi jemimboe reta ndive. Jare jemimboe reta uipoo trigo. Jayave uipoquiti uequi vaerã ipire, trigo jou vaerã. ² Jare amocue fariseo reta jei chupe reta:

—¿Maera pa piyapo piyapota'ã tẽi mbutuu ara pe vae?

³ Jayave Jesús jei fariseo reta pe:

—¿Pemingueta'ã pa David uyapocue vae regua, jae jare jae ndive ñugüinoi vae reta iyembai yave? —jei—. ⁴ David uique Tumpa jo pe jare jou mbiyape Tumpa jo pe uñeñoño tee vae reta, jare umee vi jae ndive ñugüinoi vae reta pe. Agüiyeta tẽi co quã jou jocua mbiyape, jaño sacerdote reta —jei.

⁵ Jayave Jesús jei chupe reta:

—Che cuimbaerã ayeyapo vae chepuere jae mbae icavi uyeyapo vaerã mbutuu ara pe.

Cuimbae ipo jovaicho tipa vae

(Mt 12.9-14; Mr 3.1-6)

⁶ Jare ñru mbutuu ara pe Jesús uique judfo reta itupao pe jare oporombocue. Jare joco pe oĩ penti cuimbae ipo iyacata tipa vae. ⁷ Jare mboroyocui re oporombocue vae reta jare fariseo reta umae ngatu Jesús re, uecha vaerã umbigüerata ra quã mbutuu ara pe. Echa'ã uipota tẽi umbijeco vaerã. ⁸ Ërei Jesús uicuaa jae reta ipiyemingueta, jare jei cuimbae ipo jovaicho tipa vae pe:

—Epüa eyu iyemboi cua reta jovai.

Jayave cuimbae upüa uyemboi joco pe ñugüinoi vae reta ipite pe. ⁹ Jayave Jesús jei chupe reta:

—Tapirandu peve cua: ¿Mbae pa jei mboroyocui? ¿Yayapota pa icavi vae ani icavi mbae vae mbutuu ara pe? ¿Icavi pa yapuruepi ani yapuruyuca vaerã mbutuu ara pe? —jei.

¹⁰ Jayave umae opaete iyipi rupi ñugüinoi vae reta re, jare jei cuimbae pe:

—Eupi ndepo.

Jayave cuimbae ipo uupi, jare ucuera voi.

¹¹ Jayave mboroyocui re oporombœ vae reta jare fariseo reta pochi ete Jesús pe jare uyemboemboe mbae ra uyapota Jesús pe.

Jesús uiparavo doce jemimondo retarã
(Mt 10.1-4; Mr 3.13-19)

¹² Jayave penti pïtu Jesús oo ivitu guasu re uyerure vaerã Tumpa pe, jare icõe joco pe uyerure Tumpa pe. ¹³ Jare cõe ma yave, ueni jemimboe reta. Jayave uiparavo doce umbijee temimondo reta vae: ¹⁴ Simón (Jesús umbijee Pedro), jare Simón tivi Andrés jee vae, jare Jacobo jare Juan, jare Felipe, Bartolomé, ¹⁵ Mateo, Tomás, Alfeo tai Jacobo jee vae, Simón (jæ co Zelote pe ueni vae), ¹⁶ Jacobo tivi Judas jee vae, jare Judas Iscariote (cua cuimbae umee Jesús jovaicho reta pe).

Jesús omboe jeta vae
(Mt 4.23-25)

¹⁷ Jayave Jesús ugüeyi ye ivitu guasu güi ñuu pe jæ reta ndive. Jare joco pe ñugüinoi jeta Jesús jemimboe reta jare jeta Judea pegua reta jare Jerusalén pegua reta jare tenta guasu Tiro jare Sidón iyipi rupigua reta. Tiro jare Sidón coiño co ñugüinoi i guasu güi. Opaete vae yugüeru uyapisaca vaerã Jesús re, jare Jesús umbigüera vaerã imbaerasi vae reta. ¹⁸ Jesús umbigüera vi aña oya jese vae reta. ¹⁹ Jare opaete vae uipota uyaviqui Jesús. Echa'ã jæ güinoi mbaepuere umbigüera vaerã opaete imbaerasi vae reta.

Uyerovia vae reta
(Mt 5.1-12)

²⁰ Jayave Jesús umae jemimboe reta re jare jei:
—Tuyervia iparavete vae reta. Echa'ã Tumpa umeeta chupe reta yugüireco vaerã iporoyocua pe —jei—. ²¹ Tuyervia añave iyembaï vae reta. Echa'ã Tumpa jeta umeeta chupe reta. Tuyervia añave uyao vae reta. Echa'ã upucata reta —jei—. ²² Ìru vae reta pemitarëita jare ndarau uipota yugüireco peïrurã. Jæ reta jeita icavi mbae vae peve jare uyeminguetata peägüe pe. Cuarãï uyapota reta peve, pe reta perovia cheré ramo. Che co jæ cuimbarã uyeyapo vae. Èrei piyervia —jei Jesús—. ²³ Jocua ara ou uvæ yave, piyervia. Echa'ã Tumpa güinoi ara pe mbae icavi ete vae pembarã. Echa'ã jucuarãï uyapota reta peve vae itenondegua reta uyapo cua nunga icavi mbae vae Tumpa iñee araca umimbeu vae reta pe —jei—. ²⁴ Èrei icocatu vae reta uiporarata co. Echa'ã jæ reta uyerovia ma jeta corepoti güinoi vae re —jei Jesús chupe reta—. ²⁵ Jare jeta güinoi vae reta uiporarata co. Echa'ã iyembaïta reta. Añave upuca reta. Èrei ipiatitita reta jare uyaota reta —jei—. ²⁶ Jare opaete vae jei icavi vae jese vae reta uiporarata co. Echa'ã jucuarãïño vi uyapo itenondegua reta upurumbitavi vae reta pe. Jocua upurumbitavi vae reta jei iyapu reve: 'Che co jæ Tumpa iñee umimbeu vae' —jei Jesús—.

Peau perovaicho reta
(Mt 5.38-48; 7.12)

²⁷ Èrei che jæ pe reta piyapisaca cheré vae pe cua: Peau perovaicho reta, jare piyapo icavi vae pemitarëï vae reta pe —jei—. ²⁸ Ìru vae reta uyepipeyu peré yave jæ icavi mbae vae jei peve yave, piyervia Tumpa pe jæ umivendise reta vaerã —jei—. ²⁹ Ime yave quía ocua nderovaique re vae, erova ipuere vaerã ocua ye jovaicho re. Jare ime yave quía ndeasoya upïro ndegüi vae, emaeño jese upïro vaerã ndegüi ndecamisa vi —jei—. ³⁰ Ime yave quía uyerure ndeve mbae re vae, emee chupe. Jare ime yave quía nembraembae upïro ndegüi vae, agüiye iñemiacatëï chupe —jei—. ³¹ Piyapo ñru vae reta pe pipota ñru vae reta uyapo vaerã peve vae rami —jei chupe reta—.

³² Echa'ã peau yave perau vae retãño, jocua mbaeti co mbae icavi vae. Echa'ã iyoa vae reta uyapo vi jucuarãï —jei—. ³³ Jare piyapo yave icavi vae icavi vae uyapo peve vae reta peño, jocua mbaeti co mbae icavi vae. Echa'ã iyoa vae reta uyapo vi jucuarãï —jei—. ³⁴ Jare piporuca yave mbae ñru vae pe jæ umee ye peve vaerãño, jocua mbaeti co mbae icavi vae. Echa'ã iyoa vae reta uiporuca mbaembae ñru vae pe jocua ñru vae umbijecovia ye chupe vaerã —jei—. ³⁵ Èrei peau perovaicho reta, jare piyapo icavi vae chupe reta. Piporuca mbae ñru vae pe jæ agüiye peãro umbijecovia ye peve vaerã. Jucuarãï piyapo yave, Tumpa umeeta peve mbae icavi ete vae jare peapota tai retarã. Echa'ã Tumpa

ipiacavi umee'á yasurupai chupe vae reta pe jare icavi mbae vae uyapo vae reta pe — jei—. ³⁶ Piparareco iru vae reta, peRu uiparareco rami — jei—.

Iñera iru vae re

(Mt 7.1-5)

³⁷ Agüiye piñera iru vae re, agüiye vaerã iru vae iñera peré. Agüiye pembijeco iru vae mbae re, agüiye vaerã iru vae pembijeco mbae re. Pembiasa iru vae pe, iru vae umbiasa vaerã peve — jei—. ³⁸ Peme mbaembae iru vae reta pe, jare iru vae reta umeeta mbaembae peve. Jae reta umeeta peve jeta ete iru vae reta pe peme vae güi. Echa'ã icavi vae piyapo yave iru vae reta pe, iru vae reta uyapota icavi vae peve. Ërei icavi mbae vae piyapo yave iru vae reta pe, iru vae reta uyapota icavi mbae vae peve — jei—.

³⁹ Jayave Jesús jei chupe reta umijaanga reve:

—Penti jesa mbae vae ipuere'ã etei uechaca tape iru jesa mbae vae pe. Jucuarã uyapo yave, mocui reve uasavita ivicua pe — jei—. ⁴⁰ Penti uyemboe oĩ vae uicuaa ete'ã oporomboe vae uicuaa vae rami. Ërei opaete re uyemboe yave, uicuaata oporomboe vae uicuaa rami — jei—.

⁴¹ Agüiye emae iti michi vae neĩru jesa pe oĩ vae re, ime yave nenoĩ iti tuicha vae nderesa pe — jei—. ⁴² Ndarau ndepuere ndere neĩru pe: 'Cherivĩ, taequi nderesa güi jocua iti michi vae.' Echa'ã nde nenoĩ iti tuicha vae nderesa pe. Nde co jae upurumbitavi vae. Eequi rani iti tuicha vae nderesa güi. Jayave nemaie cavita ndepuere vaerã ndeequi iti michi vae neĩru jesa güi — jei—.

Ía icavi vae jare ía icavi mbae vae

(Mt 7.17-20; 12.33-35)

⁴³ Penti temiti icavi vae umee'ã ía icavi mbae vae. Jae ramiño vi penti temiti icavi mbae vae umee'ã ía icavi vae — jei—. ⁴⁴ Echa'ã yaicuaa penti temiti icavi co, ía icavi yave. Yaequi'ã iva penti yai jãti vae güi. Jae ramiño vi yaequi'ã uva penti yai jãti vae güi — jei—. ⁴⁵ Quía nunga jecocavi vae güinoĩ icavi vae ipia pe. Jáeramo jei icavi vae. Jae ramiño vi quía nunga jecopochi vae güinoĩ icavi mbae vae ipia pe. Jáeramo jei icavi mbae vae. Echa'ã penti penti uyemingueta ipia pe güinoĩ vae rupi — jei—.

Tenta iguapica

(Mt 7.24-27)

⁴⁶ ¿Maera pa pere cheve: 'OreYa, oreYa'? Echa'ã piyapo'ã che jae peve piyapo vaerã vae — jei—. ⁴⁷ Ime yave quía ou cheve uyapisaca vaerã cheré vae, jae uyapo yave che jae chupe uyapo vaerã vae, tamijaanga peve mbae rami co jae — jei—. ⁴⁸ Jae co penti cuimbae jentarã uyapo vae rami. Oyoo quipe oñono vaerã tenta iguapicarã itape re. Jare tenta uyeyapo ma yave, tuicha oqui jare jeta ete i usiri tenta iyipi rupi. Ërei tenta omi'ã etei. Echa'ã iyapoa oñono itape re — jei—. ⁴⁹ Ërei ime yave quía uyapisaca cheré vae, uyapo'ã yave che jae chupe uyapo vaerã vae, jae co iru cuimbae jentarã uyapo vae rami. Ërei jae oyoo'ã oñono vaerã tenta iguapicarã itape re. Oñono jentarã ivi iaramboño. Jayave tuicha oqui jare jeta ete i usiri tenta iyipi rupi jare opa umbiyapara. Opa uyembai jocua tenta — jei—.

7

Jesús umbigüera sundaro reta juvicha jembiocui

(Mt 8.5-13)

¹ Jare opa ma imiari yave uyapisaca jese vae reta pe, Jesús oo Capernaum pe. ² Jare jocua tenta guasu pe ico penti sundaro reta juvicha jembiocui. Cua cuimbae imbaerasi. Umano pota echa. Jare sundaro reta juvicha uau cua jembiocui. ³ Jare sundaro reta juvicha uyandu Jesús regua. Jáeramo omondo Jesús oĩ vae pe amocue judío reta itenondegua reta, jae reta uyerure vaerã Jesús pe oo vaerã umbigüera sundaro reta juvicha jembiocui. ⁴ Jare yugüeru uvãe yave Jesús oĩ vae pe, uyerure chupe cua re. Jei reta chupe:

—Cua mburuvicha ipiacavi co. Jáeramo icavi co nde ndiyapo vaerã cua chupe. ⁵ Echa'ã jae yanderau jare uyapo yandevé penti tupao — jei reta. ⁶⁻⁷ Jayave Jesús oo jae reta jupíe. Jare yugüiraa ma uvãe yave coiño mburuvicha jenta güi, mburuvicha ombou amocue iru reta ñeovãiti vaerã Jesús ndive. Jae reta jei chupe:

—Mburuvicha jei: 'Agüiye iyemambeco, cheYa, ndeyu vaerã cherenta pe. Echa'ã mbae'ã co che. Jáeramo aa'ã noováiti. Ndepuere ndere joco güiño cherembicoci ucuera vaerã, jare ucuerata co' —jei, jei reta chupe—. ⁸ 'Echa'ã ime mburuvicha mbaepuere güinoi cheré vae. Jae ramiño vi che anoi mbaepuere sundaro reta re. Che jae penti sundaro pe: Ecuá, jare jae oo. Jae ramiño vi che jae ñru sundaro pe: Eyu, jare jae ou. Jae ramiño vi che jae cherembicoci pe: Iyapo cua, jare jae uyapo' —jei, jei reta.

⁹ Jare Jesús cua uyandu yave, ipiacañi sundaro reta juvicha re. Jayave uyerova jare jei jeta vae yugüiraa jaicue vae pe:

—Che jae peve, avãe'ã cua nunga mburugüirovia tuicha vae Israel pegua reta ipite pe.

¹⁰ Jayave sundaro reta juvicha ombou vae reta yugüiraa ye sundaro reta juvicha jenta pe, jare uecha ucuera ma co uyeyocui vae imbaerasi ico vae.

Jesús umbijecove ye cuña ime umano vae imembi cuimbae

¹¹ Jayave piareve pe Jesús oo tenta guasu Naín pe. Jare jeta jemimboe reta jare ñru vae reta yugüiraa jae jupíe. ¹² Jare oo ma uvãe yave coiño tenta guasu jonque güi, umano vae güeru vae reta yugüeru tenta guasu güi. Umáno vae penti cuimbae co jare ichi penti cuña ime umano vae co. Umáno vae jocua cuña imembi jae vaẽño co. Jare jeta tenta guasu pegua reta yugüeru jocua cuña jupíe. ¹³ Jare yandeYa uecha yave cuña, uiparareco jare jei chupe:

—Agüiye iyao.

¹⁴ Jayave Jesús oo uyaviqui umano vae jiru. Jare ovoi güeru vae reta uyemboi. Jayave Jesús jei tairusu vae pe:

—Che jae ndeve: Epã.

¹⁵ Jayave umano vae uguapi jare umbipi uyemingueta. Jayave Jesús umee ye ichi pe.

¹⁶ Jayave opaete vae uquiye. Umbiadora reta Tumpa. Jei reta:

—Penti Tumpa ñnee umimbeu vae ipuere ete vae ou ma yandepite pe. Tumpa ombou yandevanderau ramo. Echa'ã yande co jae imbae reta —jei reta.

¹⁷ Jare Jesús uyapo vae jerãcua opaete Judea rupi jare opaete Judea iyipi rupigua rupi.

Juan ombou jemimboe reta Jesús oĩ vae pe

(Mt 11.2-19)

¹⁸ Jare Juan jemimboe reta umimbeu Juan pe opaete cua regua. ¹⁹ Jayave Juan ueni mocui jemimboe reta jare ombou yandeYa oĩ vae pe jei vaerã chupe:

—¿Nde pa co jae Cristo outa vae? ani ¿nuãrota pa ñru vae ou vaerã?

²⁰ Jayave jocua cuimbae reta yugüeru uvãe Jesús oĩ vae pe jare jei chupe:

—Juan upurumbibautizase vae orembou ndeve. Jae jei: '¿Nde pa co jae Cristo outa vae? ani ¿nuãrota pa ñru vae ou vaerã?' —jei, jei reta.

²¹ Jayave jocua ora pe etei Jesús umbigüera jeta imbaerasi vae reta jare umbisiri añã reta oya jese vae reta güi. Jae ramiño vi umbigüera jeta jesa mbae vae reta, jae reta umae vaerã. ²² Jayave Jesús jei Juan ombou chupe vae reta pe:

—Pecua ye pemimbeu Juan pe peecha jare piyandu vae. Jesa mbae vae reta umae ma. Ipuere mbae uguata vae reta uguata ma. Ipire ocui vae reta ucuera ma. Iyapisa mbae vae reta uyandu ma. Umáno vae reta icove ye ma. Iparavete vae reta uyapisaca ñee icavi vae re —jei—. ²³ Jare Tumpa umivendiseta jecuae güirovia cheré vae reta —jei chupe reta.

²⁴ Jare yugüiraa ye jave Juan ombou vae reta, Jesús umbipi umingueta joco pe ñugüinoi vae reta Juan re. Jei chupe reta:

—¿Quía re pa co peo ñãna pe pemae? Jae ipirãta mbae vaerã co tacuarãsi omi ivitu uipeyu yave vae rami —jei—. ²⁵ ¿Quía re pa co peo pemae? Jae omonde'ã temimonde ipõra vae. Mase, temimonde ipõra vae omonde vae reta yugüireco mburuvicha guasu reta jenta pe jare icavi ete yugüireco —jei—. ²⁶ ¿Peo ra pemae vaerã penti Tumpa ñnee umimbeu vae re? Añete che jae peve, Tumpa umee chupe uyapo vaerã jeta ete ñru Tumpa ñnee umimbeu vae reta uyapo vae güi —jei—. ²⁷ Tumpa ñnee pe uyecuatía oĩ jese cuarã: 'Mase' —jei Tumpa—, 'che amondota chiñee güiraata vae nderenonde, uyapicatu vaerã nderaperã.'

Jucuarãi uyecuatía oĩ —jei chupe reta—. ²⁸ Che jae peve, Tumpa umee Juan upurumbibautizase vae pe uyapo vaerã jeta ete ñru Tumpa ñnee umimbeu vae reta uyapo vae güi. Èrei taicuegua vae Tumpa iporoyocua pegua uyembutuichaca eteta Juan güi

—jei—. ²⁹ Jare mburuvicha peguarã ocovara vae reta jare opaete uyapisaca Juan re vae reta uicuaaca Tumpa jupi co. Echa'ã Juan umbibautiza reta —jei—. ³⁰ Ërei fariseo reta jare mboroyocui re oporomboe vae reta uyapo'ã Tumpa jei uyapo vaerã vae. Echa'ã uyembibautizaca'ã Juan pe —jei.

³¹ Jayave Jesús jei chupe reta:

—Tamimbeu peve mbae ndive amboyovaque añave yugüireco vae reta. Tamimbeu peve mbae rami co jae reta —jei—. ³² Jae reta co sambiai plaza pe uguapi ñugüinoi vae reta rami. Jae reta jei uyupe cuarãi: 'Nduyemimbí ma peve, ãrei pe reta pepirã'ã. Orepiatiti perovaque, ãrei pe reta piyao'ã.' Jucuarãi jei —jei—. ³³ Echa'ã Juan upurumbibautizase vae ou, jare jae uyecuacu tembú jare vino güi. Jáeramo pe reta pere añã oya co Juan re —jei—. ³⁴ Che cuimbaerã ayeyapo vae ayu, jare che ayecuacu'ã tembú jare vino güi. Jáeramo pe reta pere: 'Mase, jae jou jeta tembú jare vino. Jae co mburuvicha peguarã ocovara vae reta jare teco icavi mbae vae uyapo vae reta iamigo' —pere, jei—. ³⁵ Ërei opaete iyaracuaa vae reta uicuaaca aracuaa icavi co —jei.

Jesús Simón jenta pe

³⁶ Jare penti fariseo uparea Jesús pe oo vaerã ucaru jae ndive. Jayave Jesús oo fariseo jenta pe jare uguapi ucaru vaerã. ³⁷ Jare penti cuña aguasa rupi ico vae jocua tenta guasu pegua uicuaa Jesús ucaru co oí fariseo jenta pe, jare güeru mbae ipiche cavi vae jiru ita alabastro jee vae pegua pe. ³⁸ Jayave cuña uyemboi Jesús icupe coti jare uyao. Jare umbipi umãqui Jesús ipi jesai pe. Jayave cuña umitini Jesús ipi ía pe jare uyurupite vi ipi. Jayave uipichi mbae ipiche cavi vae ipi re. ³⁹ Jare fariseo Jesús pe uparea vae cua uecha yave, jei iyupe ipia pe: "Cua cuimbae penti Tumpa iñee umimbeu vae yave, uicuaata tãí quã co cua cuña jare mbae nunga cuña co jae. Echa'ã iyoa vae co" —jei.

⁴⁰ Jayave Jesús jei fariseo pe:

—Simón, aipota mbae jae ndeve.

—Ere cheve, oporomboe vae —jei Jesús pe.

⁴¹ Jayave Jesús jei chupe:

—Mocui cuimbae ipía ñru cuimbae pe. Penti cuimbae ipía chupe quinientos ara mbaraviqui jepi pegua, jare ñru cuimbae ipía chupe cincuenta ara mbaraviqui jepi pegua —jei—. ⁴² Ërei mocui reve mbaeti güireco corepoti ipía umbiepi vaerã. Jayave upurumbipía vae opa umicañi mocui reve pe ipía —jei—. Emimbeu cheve, upurumbipía vae cua uyapo ramo, cua mocui vae güi ¿quã nunga pa uau eteta upurumbipía vae? —jei.

⁴³ Jayave Simón jei Jesús pe:

—Che chepia pe ayemingueta jocua cuimbae jeta ipía opa umicañi chupe vae.

Jayave Jesús jei chupe:

—Jaecavi ndere.

⁴⁴ Jayave Jesús uyerova cuña coti jare jei Simón pe:

—Mase, emae cua cuña re. Che aique nerenta pe yave, neme'eã cheve i ayoe vaerã chepi. Ërei jae umãqui ma chepi jesai pe jare umitini ía pe —jei—. ⁴⁵ Nde cheyurupite'ã. Ërei cua cuña aique güive uyurupite chepi —jei—. ⁴⁶ Nde niñono'ã aceite cheãca re. Ërei cua cuña uipichi mbae ipiche cavi vae chepi re —jei—. ⁴⁷ Jáeramo che jae ndeve, yepe tãí jeta cua cuña imbaeyoa reta, ãrei ambiasa chupe. Echa'ã jae cherau ete. Ërei ime yave quã michiño ñru vae umbiasa chupe vae, jae michiño vi uau jocua ñru vae —jei.

⁴⁸ Jayave Jesús jei cuña pe:

—Ambiasa ma ndeve nembraeyoa reta.

⁴⁹ Jayave Jesús ndive ucaru ñugüinoi vae reta jei iyupe ipia pe: "¿Quã ra co cua? ¿Quirãita ra ipuere umbiasa quã pe imbaeyoa reta?"

⁵⁰ Ërei Jesús jei cuña pe:

—Ndiyembiasaca ma nderovia cheré ramo. Ecuã ndepiacatu reve —jei.

8

Cuña ombori Jesús vae reta

¹ Jare cua jaicue rupi Jesús oo opaete tenta guasu reta jare tenta guasu-rai reta rupi, jare umimbeu ñee icavi vae Tumpa iporoyocuia regua. Jare jocua doce vae yugüiraa jae jupíe. ²⁻³ Jare jeta cuña reta yugüiraa vi jae jupíe jare ombori Jesús jare jemimboe

reta. Mbaembae uata Jesús jare jemimboe reta pe yave, jocua cuña reta ogua chupe reta. Tenonde yave amocue jocua cuña reta imbaerasi jare añia reta oya amocue vae re. Ērei Jesús umbigüera. Penti cuña jee co María Magdalena. Jesús umbisiri siete añia reta chugüi. Īru jee co Juana. Jae co Chuza jembireco. Chuza co jae mburuvicha guasu Herodes jembiocui. Īru jee co Sasana.

Jesús umijaanga umaeti vae

(Mt 13.1-9; Mr 4.1-9)

⁴ Jare jeta vae yugüeru opaete tenta guasu reta güi uyembati Jesús oĩ vae pe. Jayave Jesús jei chupe reta umijaanga reve:

⁵ —Penti cuimbae oo umaeti vaerã. Umaeti yave, umiai temiti, jare amocue oa tape rupi. Jayave ĩru vae reta upĩro temiti re jare güira reta jou vi —jei—. ⁶ Īru temiti oa mboviño ivi itape iárambo oĩ vae pe. Ērei oē rupive, ipiru, jocua ivi ñāqui ngatu'ã ramo —jei—. ⁷ Īru temiti oa ñanapite pe. Ñana ucuacuaa yave, opa uyuca temiti —jei—. ⁸ Īru temiti oa ivicavi pe. Cua oē jare ucuacuaa jare jeta ete ía —jei.

Jare cua jei ma chupe reta yave, iñeeãta reve jei:

—Uipota uyandu vae tuyapisaca cua ñee re.

Maera Jesús oporomboe umijaanga reve

(Mt 13.10-17; Mr 4.10-12)

⁹ Jayave Jesús jemimboe reta upirandu Jesús pe:

—¿Mbae pa uipota jei cua nemijaanga reve ndere vae?

¹⁰ Jayave Jesús jei chupe reta:

—Amimbeu ma peve Tumpa iporoyocua regua. Cua uyecuaa'ã ĩru vae reta pe. Jáeramo amboe ĩru vae reta amijaanga reve. Cua ayapo agüiye vaerã uicuaa cavi, yepe tēi uecha, jare agüiye vaerã uicuaa, yepe tēi uyandu —jei—.

Umaeti vae uyemijaanga jese vae

(Mt 13.18-23; Mr 4.13-20)

¹¹ Cua amijaanga reve che jae peve vae uipota jei cua: Temiti uyemijaanga Tumpa iñee re —jei—. ¹² Jocua temiti tape rupi oa vae uyemijaanga amocue Tumpa iñee uyandu vae re. Jayave ou añia guasu chupe reta jare umiacañi Tumpa iñee güi, agüiye vaerã güirovia Tumpa uyembiasaca vaerã —jei—. ¹³ Jae ramiño vi jocua temiti uñeñoti mboviño ivi itape iárambo oĩ vae pe vae uyemijaanga ĩru vae reta Tumpa iñee uyandu vae re. Jae reta uyandu rupive, güirovia uyerovia reve. Ērei cua reta jocua temiti japo quipe'ã vae rami co. Echa'ã michi pegaño güirovia ñee. Ērei mbaesusere uyeyapo chupe yave, uipota'ã ma yapisaca reta Tumpa iñee re —jei—. ¹⁴ Jae ramiño vi jocua temiti uñeñoti ñanapite pe vae uyemijaanga ĩru vae reta Tumpa iñee uyandu vae re. Ērei umbipi uyemipia'ã ivi pe mbaembae uyeyapo vae re jare corepoti uipota güinoi vaerã vae re jare yerovia ivi pegua re. Jáeramo jae reta jocua temiti ia'ã vae rami co —jei—. ¹⁵ Ērei jocua temiti uñeñoti ivicavi pe vae uyemijaanga ĩru vae reta Tumpa iñee uyandu vae re. Cua reta uyapisaca cavi Tumpa iñee re ipiacavi reve, jare uyapo Tumpa iñee jei uyapo vaerã vae. Jáeramo jae reta jocua temiti ía cavi vae rami co. Jae reta uyapo icavi vae ipiaguasu reve —jei Jesús—.

Uñeñomi vae uyeechacañotai co

(Mr 4.21-25)

¹⁶ Mechero yamiendi yave, ndarau ñañono yapepo uyembovapo oĩ vae igüi pe, ani güirapembi igüi pe. Ñañono co mechero jenda pe, o pe uique vae reta güinoi vaerã tembipe —jei—. ¹⁷ Ime yave mbae uñeñomi vae, uyeechacañotai co. Jae ramiño vi ime yave mbae uyeyasoí vae, uyecuaañotai co —jei—. ¹⁸ Pepia pe piyemingueta cavi piyandu vae re. Echa'ã güinoi vae pe uñemiruta, jare mbaeti güinoi vae güi mbovi ete güinoi echa vae uyeequita —jei.

Jesús ichi jare tivi reta

(Mt 12.46-50; Mr 3.31-35)

¹⁹ Jayave Jesús ichi jare tivi reta yugüeru uvã Jesús oĩ vae pe. Ērei ipuere'ã oya Jesús re jeta joco pe ñugüinoi vae reta jeco pegua. ²⁰ Jayave amocue vae jei Jesús pe:

—Ndesi jare nderivi reta oca pe ñugüinoi. Ndereca ñugüinoi —jei reta chupe.

²¹ Jayave Jesús jei chupe reta:

—Cua reta uyapisaca Tumpa ifínee re jare uyapo jei vae. Cua nunga reta co jae chesi jare cherivi reta —jei.

Jesús umiquíi i guasu
(Mt 8.23-27; Mr 4.35-41)

²² Jare penti ara Jesús uyupi chalana pe jemimboe reta ndive. Jayave Jesús jei chupe reta:

—Yaa i guasu jovaicho pe.

Jayave umbipi uasa i guasu. ²³ Ērei uasa ñugüinoi rambueve, Jesús oque oí. Jare ou ivitu tanta uyepeyu, jare i uyembiaparoaroa uique chalana pe, jare umitínee seri ma. Jae reta ipia pe uyemingueta umanota co. ²⁴ Jayave omomba reta Jesús, jare jei chupe:

—¡Oporomboe vae, oporomboe vae! Ñamanota ma.

Jayave Jesús upüa, jare uñeengata ivitu jare i guasu pe. Jare Jupivoiño upita ivitu, jare opaete quíi ngatu. ²⁵ Jayave Jesús jei chupe reta:

—¿Maera pa pepurugüirovia'á?

Jare jae reta uquiye jare ipiacañi, jare jei uyupe:

—¿Mbae nunga cuimbae pa cua? Echa'á jae oyocui ivitu jare i guasu, jare jae reta uyapo oyocui vae —jei reta.

Cuimbae Gadara pegua aña reta oya jese vae
(Mt 8.28-34; Mr 5.1-20)

²⁶ Jayave yugüüraa Galilea güi uvãe i guasu jovaicho pe, gadareno reta iivi pe. ²⁷ Jesús ugüeyi ma chalana güi yave, ou oovãiti penti cuimbae jocua tenta guasu pegua. Ima ma aña reta oya jese. Nani ico. Ico'á etei tenta rupi. Teögüerirurenda rupiño ma ico. ²⁸ Cua cuimbae uecha Jesús yave, usapícai jare uyeatica Jesús jovai. Jayave ifíneeãta reve jei:

—¿Maera pa ndeyu chemambeco, Jesús? Nde co jae Tumpa ara pe oí vae Tai. Ayerure ndeve agüiye iporaraca cheve —jei.

²⁹ Echa'á Jesús oyocui ma aña usiri vaerã cuimbae güi. Ima ma uyembiiya jese. Jare ñru vae reta uipocua tēi ipo jare ipi cadena pe. Ērei jae opa omondoo cadena reta. Jare jecuaño oo ñana coti aña omondo ramo. ³⁰ Jare Jesús upirandu chupe:

—¿Mbae pa nderee?

—Cheree co jae jeta vae —jei.

Echa'á jeta aña reta oya jese. ³¹ Jayave aña reta uyerure Jesús pe agüiye vaerã oyocui reta yugüüraa vaerã umanocue vae reta ipi. ³² Jare joco pe jeta cuchi reta ucaru ñugüinoi ivitu guasu re. Jayave aña reta uyerure Jesús pe umaño vaerã jese reta oya vaerã cuchi reta re. Jayave Jesús umaño jese reta. ³³ Jayave aña reta usiri cuimbae güi, jare oya cuchi reta re. Jayave cuchi reta tanta osi ivia rupi oa i guasu pe, jare joco pe opa ipitupa reta.

³⁴ Jare cuchi iyandarecoa reta cua uecha yave, osi yugüüraa tenta guasu pe umimbeu joco pegua reta jare icoti'á rupigua reta pe cua uyeyapo vae regua. ³⁵ Jayave uyandu vae reta yugüeru, uecha vaerã mbae uyeyapo vae. Jare yugüeru uvãe yave Jesús oí vae pe, uecha cuimbae aña reta oyase jese vae uguapi oí Jesús jovai. Uecha uyemonde ma jare iyaracuaño ma oí. Jare opaete yugüeru vae reta uquiye. ³⁶ Jare jocua tenonde yave uecha vae reta umimbeu ñru reta pe quirãi uyeyapo cuimbae aña reta oyase jese vae pe jae ucuera vaerã. ³⁷ Jayave opaete gadareno reta umiñera Jesús oo ye vaerã jae reta iivi güi. Echa'á uquiye ete reta. Jayave Jesús uyupi ye chalana pe yugüüraa ye vaerã chugüi reta. ³⁸ Jare cuimbae aña reta oyase jese vae uyerure Jesús pe umaño vaerã jese oo vaerã jae Jupíe. Ērei Jesús umaño'á jese. Jei chupe:

³⁹ —Ecua nerenta pe emimbeu ñru vae reta pe mbae icavi vae Tumpa uyapo ndeve vae.

Jayave cuimbae oo, jare umimbeu ñru vae reta pe opaete tenta guasu rupi mbae icavi vae Jesús uyapo chupe vae.

Jairo tayi jare cuña Jesús jemimonde uyaviqui vae
(Mt 9.18-26; Mr 5.21-43)

⁴⁰ Jare Jesús oo uvãe yave i guasu jovaicho pe, joco pe ñugüinoi vae reta umae jese uyerovia reve. Echa'á uãro ñugüinoi. ⁴¹ Jayave ou penti cuimbae Jairo jee vae. Jae co judío reta itupao re uyandareco vae. Jae uyeatica Jesús jovai, jare uyerure chupe oo vaerã jae jenta pe. ⁴² Echa'á jae güinoi pentiño tayi doce año rupi güinoi vae. Umano pota echa ma. Jayave Jesús oo jae Jupíe. Jare jeta yugüüraa Jesús Jupíe, jare oyopi reta. ⁴³ Jare jae reta

ipite pe oo penti cuña doce año ma uiporara tugüiguasu vae. Cuña opaete ma icorepoti umee iyugüi upurupiano vae reta pe. Ërei penti ave ipuere'ã umbigüera. ⁴⁴ Jayave cuña oya Jesús re icupe coti, jare uyaviqui jemimonde jembei. Jare jupivoi jugüiguasu upita chugüi. ⁴⁵ Jayave Jesús jei:

—¿Quía pa cheremimonde uyaviqui?

Opaete vae jei uyaviqui'ã co jemimonde. Jare Pedro jei Jesús pe:

—Oporomböe vae, jeta ete ñugüinoi cua pe jare ndeopi reta co. ¿Maera pa ndere: 'Quía pa cheremimonde uyaviqui?' —jei.

⁴⁶ Ërei Jesús jei:

—Quía nunga vae uyaviqui co cheremimonde. Echa'ã aicuaa ambigüera ma co chembaepuere pe quía —jei.

⁴⁷ Jayave cuña uicuaa ipuere'ã ma uñemi Jesús güi. Jayave ou icoti uriri reve jare uyeatica Jesús jovai. Jayave umimbeu chupe opaete vae jovaque maera uyaviqui jemimonde jare quirái jupivoi ucuera. ⁴⁸ Jayave Jesús jei chupe:

—Ndecuera ma, cherindi, nderovia cheré ramo. Ecuá ndepiacatu reve —jei.

⁴⁹ Jare Jesús uyemingueta oï rambueve, penti vae ou uvãe tupao re uyandareco vae jenta güi.

—Umano ma nderayi —jei—. Agüiye ma emambeco oporomböe vae —jei.

⁵⁰ Ërei Jesús cua uyandu yave, jei tupao re uyandareco vae pe:

—Agüiye ndepiatiti. Epurugüiroviaño. Ucuerata co —jei.

⁵¹ Jare oo uvãe yave tenta pe, Jesús umaño'ã ñru reta re uique vaerã jae ndive, jaño Pedro, Jacobo jare Juan, jare cuñatai tu jare ichi. ⁵² Jare opaete joco pe ñugüinoi vae reta uyao jare jãse ñugüinoi. Jayave Jesús jei chupe reta:

—Agüiye piyao. Umano'ã co. Oqueño co oï —jei.

⁵³ Ërei jae reta oyoyai. Echa'ã uicuaa reta umano co. ⁵⁴ Jayave Jesús uipisi cuñatai ipo pe.

—¡Cuñatai, epüa! —jei.

⁵⁵ Jayave cuñatai icove ye, jare jupivoi upüa. Jayave Jesús oyocui umingaru vaerã cuñatai. ⁵⁶ Jare cuñatai tu jare ichi ipiacañi. Ërei Jesús oyocui reta agüiye vaerã umimbeu quía pe ave mbae uyeyapo vae.

9

Jesús omondo jocua doce jemimboe reta

(Mt 10.5-15; Mr 6.7-13)

¹ Penti ara Jesús opa umbati jocua doce jemimboe reta, jare umee chupe reta mbaepuere umbisiri vaerã año reta oya jese vae reta güi jare umbigüera vaerã imbaerasi vae reta. ² Jayave omondo reta umimbeu vaerã Tumpa iporoyocuiã jare umbigüera vaerã imbaerasi vae reta. ³ Jare jei chupe reta:

—Agüiye mbae peraa. Agüiye peraa pepopoca. Agüiye peraa peurupucu, perembiurã jare corepoti. Jare agüiye peraa mocui camisa —jei—. ⁴ Peo pevãe yave penti tenta pe, joco pe peñ jocua tenta guasu güi peo ye regua —jei—. ⁵ Jare ime yave penti tenta guasu pegua reta uipota'ã pepita vaerã joco pe vae, peo joco güi yave, pemitimo ivicuii pepi güi, uicuaa vaerã jae reta co teco güinoi —jei.

⁶ Jayave jae reta yugüiraa tenta guasu-rai reta rupi. Umimbeu reta ñru vae reta pe ñee icavi vae jare opaete uguata vae rupi umbigüera imbaerasi vae reta.

Juan imano

(Mt 14.1-12; Mr 6.14-29)

⁷ Jare mburuvicha guasu Herodes uyandu opaete Jesús uyapo vae regua. Jayave ipiacañi. Echa'ã amocue vae jei:

—Juan icove ye ma ou umanocue vae reta ipite güi.

⁸ Jare ñru vae reta jei:

—Jae co Elías ou ye vae.

Jare ñru vae reta jei:

—Jae co penti Tumpa ñnee aracae umimbeu vae icove ye ma ou umanocue vae reta ipite güi vae. ⁹ Ërei Herodes jei:

—Añãcasiaca co Juan. Ērei ¿quía ra co cua? Echa'ã ayandu ma jeta jesequa —jei.
Jáeramo Herodes uipota uecha Jesús.

Jesús umingarú cinco mil cuimbae reta
(Mt 14.13-21; Mr 6.30-44; Jn 6.1-14)

¹⁰Jare Jesús jemimondo reta yugüeru ye Jesús oĩ vae pe, jare umimbeu Jesús pe opaete uyapo vae regua. Jayave Jesús güiraa reta quii ngatu vae pe coiño tenta guasu Betsaida güi. ¹¹Ērei jeta vae uicuaa yave, yugüiraa jaicue. Jare Jesús umbiresive cavi jare imiari chupe reta Tumpa iporoyocua re jare umbigüera imbaerasi vae reta.

¹²Caaru ma yave, jocua doce vae yugüeru Jesús oĩ vae pe jare jei chupe:

—Emondo cua jeta vae tenta tenta rupi, joco pe ucaru vaerã jare oque vaerã. Echa'ã mbaeti tenta cua rupi —jei reta.

¹³Ērei Jesús jei chupe reta:

—Pe reta pemee tucaru.

—Jaeño ime nonoi pandepo mbiyape jare mocui pira —jei reta—. ¿Ndoota pa ndogua opaete cua reta jemiurã?

¹⁴Echa'ã cuimbae retaño uyepapa cinco mil rupi.

Jayave Jesús jei jemimboe reta pe:

—Tuyembatimbati cincuenta rupi tuguapi.

¹⁵Jayave jucuarã uyapo reta. Jei reta opaete joco pe ñugüinoi vae reta pe uguapi vaerã.

¹⁶Jayave Jesús uipisi jocua pandepo mbiyape jare mocui pira, jare umae ara coti, jare umee yasurupai Tumpa pe. Jayave upisãa mbiyape jare pira, jare umee jemimboe reta pe, jae reta umee vaerã opaete joco pe uguapi ñugüinoi vae reta pe. ¹⁷Opareve ucaru, jare iyangapii reta. Jayave Jesús jemimboe reta umbati tembü uñepisãacue jembire vae, jare umitinee doce canasta.

Pedro jei Jesús co jae Cristo, Tumpa ombou vae
(Mt 16.13-20; Mr 8.27-30)

¹⁸Penti ara Jesús oo jeta vae ipite güi uyerure vaerã Tumpa pe. Jare jemimboe reta joco pe ñugüinoi jae ndive. Jayave Jesús upirandu chupe reta:

—¿Quía pa co che ñru vae reta pe? —jei.

¹⁹Jae reta jei chupe:

—Amocue vae jei nde co jae Juan upurumbibautizase vae, jare ñru vae reta jei nde co jae Elías, jare ñru vae reta jei nde co jae penti Tumpa iñee aracae umimbeu vae icove ye ma ou umanocue vae reta ipite güi vae —jei reta.

²⁰Jayave Jesús upirandu chupe reta:

—Jare ¿quía pa co che peve? —jei.

Jayave Pedro jei chupe:

—Nde co jae Cristo, Tumpa ombou vae —jei.

Jesús umimbeu umanota co
(Mt 16.20-28; Mr 8.30-9.1)

²¹Jayave Jesús oyocui ete reta agüiye vaerã umimbeu quía pe. ²²Jayave Jesús jei chupe reta:

—Che cuimbaerã ayeyapo vae aiporara eteta. Jare judío reta itenondegua reta jare sacerdote reta itenondegua reta jare mboroyocui re oporombocue vae reta ndarau uipota aico vaerã juvicha guasurã, jare cheyucacata. Ērei mbapi ara rupi aicove yeta ayu umanocue vae reta ipite güi —jei.

²³Jayave Jesús jei opaete vae pe:

—Ime yave quía uipota oo cherupíe vae, tiñacañi iyugüi, tovoi icurusu opa ara, jare too cherupíe —jei—. ²⁴Uipota uñuvatu jecove vae ndarau ipuere. Ērei jocua umeeta jecove chereco pegua vae uñuvatuta co —jei—. ²⁵¿Mbae ra uminganata quía, umingana yave opaete ivi pegua, ěrei ipuere'ã yave uñuvatu jecove? —jei—. ²⁶Ime yave quía imara cheré jare chíñee re vae, che cuimbaerã ayeyapo vae chemarata vi jese, ayu ye yave ayembutuichaca vaerã chembaepuere reve, cheRu imbaepuere reve, jare ángel uñeño tee Tumpa peguarã vae reta imbaepuere reve —jei—. ²⁷Ērei añete che jae peve, ndei amocue cua pe ñugüinoi vae umano mbove, uechata reta Tumpa iporoyocua —jei Jesús.

Jesús uyembiambie

(Mt 17.1-8; Mr 9.2-8)

²⁸ Jare ocho ara rupi cua jei rendave pe, Jesús güüraa Pedro, Juan jare Jacobo ñru vae reta ipite güi, jare uyupi penti ivitu guasu re uyerure vaerã Tumpa pe. ²⁹ Jare Jesús uyerure Tumpa pe rambueve, jova uyembiambie jare jemimonde ti asi jare uvera. ³⁰ Jare mocui cuimbae uyemingueta ñugüinoi Jesús ndive. Jae reta co Moisés jare Elías. ³¹ Mocui reve uyecuaa tembipe ipõra ete vae re jare uyemingueta reta Jesús imano re, quirãi umanota co Jerusalén pe. ³² Ërei Pedro jare jae ndive ñugüinoi vae jopei jare oque. Ërei usareco ye, jare uecha Jesús ipõra ete, jare uecha vi jocua mocui cuimbae Jesús ndive ñugüinoi vae reta. ³³ Jare Moisés jare Elías yugüüraa yeta ma yave, Pedro jei Jesús pe:

—Oporomboe vae, icavi co ñai vaerã cua pe. Turuyapo mbapi guarasã ñanaroqui pegua, penti nembraerã, penti Moisés peguarã jare penti Elías peguarã —jei.

Echa'ã Pedro uicuaa'ã mbae jei vae.

³⁴ Jare Pedro cua jei rambueve, ou amapïtu umiguarasã reta. Jare jae reta uquiye amapïtu umiguarasã yave. ³⁵ Jayave uyendu ñee amapïtu güi jei:

—Cua co jae cheRai aau ete vae. Piyapisaca jese —jei.

³⁶ Jare ñee opa ma yave, jae reta uecha'ã quía joco pe, jaeño Jesús. Jare jocua ara reta pe jae reta umimbeu'ã quía pe ave mbaembae uecha vae.

Jesús umbigüera cunumi aña oya jese vae

(Mt 17.14-21; Mr 9.14-29)

³⁷ Jare piareve pe ivitu guasu güi ugüeyi reta yave, jeta vae yugüeru ñueovãiti jae reta ndive. ³⁸ Jayave penti cuimbae yati vae reta ipite pe oï vae jei Jesús pe:

—Oporomboe vae, ayerure ndeve neme vaerã cherai re. Jae co cherai jae vaeño.

³⁹ Aramoño penti aña oya jese jare umbisapicai. Jayave umbiriri ete jare cunumi iyuru tiriyai. Jayave uyembipere. Jecuaeño uyapo jucuarãi chupe —jei—. ⁴⁰ Ayerure tõi ma nderemimboe reta pe umbisiri vaerã aña chugüi, Ërei ipuere'ã reta —jei.

⁴¹ Jayave Jesús jei joco pe ñugüinoi vae reta pe:

—Yavai ete pe reta cua ivi pe pico vae pepurugüirovia vaerã. ¿Quirãi regua ra apitata pe reta ndive? ¿Quirãi regua ra arupiata peve? —jei.

Jayave jei cunumi tu pe:

—Eru nderai cua pe.

⁴² Jare cunumi ou rambueve, aña uipiaca jare umbiriri ete. Jayave Jesús ñueengata aña pe. Jayave umbigüera cunumi jare umee ye tu pe. ⁴³ Jare opaete joco pe ñugüinoi vae reta ipiacañi Tumpa imbaepuere tuicha vae re. Ërei ipiacañi rambueve opaete Jesús uyapo vae re, Jesús jei jemimboe reta pe:

Jesús umimbeu ye umanota co

(Mt 17.22-23; Mr 9.30-32)

⁴⁴ —Piyapisaca cavi cua jae peve vae re. Echa'ã che cuimbaerã ayeyapo vae penti vae chemeeta cherovaicho reta pe —jei.

⁴⁵ Ërei jae reta uicuaa cavi'ã mbae Jesús jei chupe reta vae. Yavai chupe reta uicuaa vaerã, jare uipiu reta upirandu vaerã chupe jese.

Tenondegua vae

(Mt 18.1-5; Mr 9.33-37)

⁴⁶ Jayave jae reta umbipi uyemingueta quía ra tenondegua ñru reta güi vae. ⁴⁷ Jare Jesús uicuaa chugüi reta ipiyemingueta. Jayave ueni penti sambiai jare oñoño iyipi pe.

⁴⁸ Jayave jei jemimboe reta pe:

—Ime yave quía uyapo icavi vae cua nunga sambiai pe cheree pe vae, cheve co uyapo icavi vae. Jare jocua cheve uyapo icavi vae, uyapo vi icavi vae chembou vae pe. Echa'ã pepite pe oï vae ñnemimichi vae icota tenondeguarã —jei.

Oyovaicho'ã yande ndive vae yanembori co

(Mr 9.38-40)

⁴⁹ Jayave Juan jei Jesús pe:

—Oporomboe vae, nduecha penti cuimbae nderee pe umbisiri aña reta oya jese vae reta güi, jare ndoe chupe agüiye ma uyapo vaerã. Echa'ã jae ñaneiru'ã co —jei.

⁵⁰—Agüiye pere chupe jucuaräi —jei Jesús chupe—. Echa'ã oyovaicho'ã yande ndive vae yanembori co —jei.

Jesús uñeengata Jacobo jare Juan pe

⁵¹Jare outa ma uvãe Jesús oo ye vaerã ara pe. Jáeramo iquirëi ete oo Jerusalén pe. ⁵²Jayave omondo amocue jemimboe reta jenonde. Jae reta yugüiraa penti tenta guasu-rai ivi Samaria pegua pe uyapícatu vaerã Jesús peguarã. ⁵³Ërei joco pegua reta uipota'ã Jesús upita vaerã joco pe. Echa'ã uicuaa reta jae oo Jerusalén coti. ⁵⁴Jare Jesús jemimboe reta Jacobo jare Juan cea uicuaa yave, jei reta Jesús pe:

—OreYa, ¿ndipota pa ore ndoyocui tata ou vaerã ara güi opa vaerã uapi cua tenta guasu-rai pegua reta Elías uyapo rami?

⁵⁵Ërei Jesús uyerova icoti jare uñeengata chupe reta. Jei chupe reta:

—Agüiye pere jucuaräi. ⁵⁶Echa'ã che cuimbaerã ayeyapo vae ayu apurumbiasa vaerã. Ayu'ã apurumicañitei vaerã —jei.

Jayave yugüiraa ñru tenta guasu-rai coti.

Uipota oo Jesús jupíe vae

(Mt 8.19-22)

⁵⁷Jare tape rupi uguata reta rambueve, penti cuimbae jei Jesús pe:

—Taa nderupíe opaete que rupi ndeo vae rupi.

⁵⁸Jayave Jesús jei chupe:

—Aguara reta güinoi icua reta, jare güira reta güinoi jaiti reta. Ërei che cuimbaerã ayeyapo vae mbaeti cherenta —jei.

⁵⁹Jare Jesús jei ñru cuimbae pe:

—Eyu cherupíe.

Ërei cuimbae jei:

—Emaeño rani cheré aa vaerã aico cheru re umano regua.

⁶⁰Jayave Jesús jei chupe:

—Tecove opa mbae vae güinoi mbae vae reta toñoti umano vae reta. Ërei nde ecua emimbeu Tumpa iporoyocua —jei.

⁶¹Jayave ñru cuimbae jei Jesús pe:

—Taa nderupíe, cheYa. Ërei emaeño rani cheré aa vaerã cherenta pe amimbeu vaerã chupe reta jáema co aa —jei.

⁶²Ërei Jesús jei chupe:

—Tamijaanga umbiara vae. Umbiara vae umae yave jaicue coti, ndarau simi oo. Jae ramiño vi che amimbaraviqui yave quía, uyapo cavi'ã yave iparaviqui, ndarau icavi ico vaerã Tumpa iporoyocua pe —jei.

10

Jesús omondo setenta vae reta

¹Cua jaicue rupi yandeYa uiparavo ñru setenta cuimbae reta jare omondo jenonde mocui mocui rupi opaete tenta guasu reta jae oota joco pe vae pe. ²Jare jei chupe reta:

—Jeta ete co yaaviro vaerã. Ërei mbovi ete co umbaeviro vae reta. Jáeramo pe reta puyerue yandeYa pe omondo vaerã uparaviqui vae reta umbaeviro reta vaerã —jei—.

³Pecua. Mase, pomondo icavi mbae vae uyapo vae reta ipite rupi. Pe reta ovecha-rai reta rami co. Jae reta yaguapíta reta rami co —jei Jesús chupe reta—. ⁴Agüiye peraa corepoti, jare urupucu, jare pepipasa. Jare agüiye pemiariño quía perovãiti yave tape rupi —jei—.

⁵Jare pique yave penti tenta pe, pere rani: 'Tipiacatu cua tenta pegua reta' —pere, jei—.

⁶Jare ime yave quía jocua tenta pe mbiacatu uipota vae, jae ipiacatuta co. Uipota'ã yave, ndarau ipiacatu —jei—. ⁷Jare pepita jocua tenta pe etei. Peu ipotave umee peu vaerã vae. Echa'ã icavi co ñru vae reta umbiepi vaerã uparaviqui vae pe. Agüiye coti cotiño pepita —jei—.

⁸Jare penti tenta guasu pe peo pevãe yave, joco pegua reta pembiresive cavi yave, peu ipotave umee peu vaerã vae —jei chupe reta—.

⁹Pembigüera imbaerasi vae joco pe ñugüinoi vae reta. Jare pere chupe reta: 'Tumpa iporoyocua coiño ma peve' —pere, jei—.

¹⁰Ërei peo yave penti tenta guasu pe, joco pegua reta uipota'ã yave pepita vaerã joco pe, peguata calle rupi jare pere joco pegua reta pe: ¹¹'Numitimo orepi güi ivicui, cua tenta guasu pegua reta picuaa vaerã pe reta co teco penoi. Ërei turumimbeu peve cua:

Tumpa iporoyocua coñño ma peve' —pere, jei—. ¹² Ērei che jae peve, Tumpa uãa yave ivi pegua reta, jocua tenta guasu pegua reta tanta uiporarata Sodoma pegua reta güi —jei—.

Tenta guasu pegua uiporarata vae reta
(Mt 11.20-24)

¹³ Corazín pegua reta uiporarata co. Betsaida pegua reta uiporarata co. Echa'ã jeta miacañi reta ayapo ipite pe chembaepuere pe. Jucuarãi mona ayapo yave Tiro jare Sidón pe, joco pegua reta ueyata tẽi aracae ma iyemingueta icavi mbae vae ipia pe oĩ vae. Omondeta tẽi temimonde jaimbe vae jare oñonota tẽi tanimbu inãca re uicuaaca vaerã ipiatiti co —jei—. ¹⁴ Ērei Tumpa upuruãa yave, Corazín jare Betsaida pegua reta tanta uiporarata Tiro jare Sidón pegua reta güi —jei—. ¹⁵ Jare Capernaum pegua reta ipia pe uyemingueta tẽi icavi co yugüireco vaerã Tumpa ndive. Ērei Tumpa omondota reta yugüireco vaerã cañitei pe —jei—. ¹⁶ Uyapisaca peré vae uyapisaca co cheré. Ērei pereriro vae chereriro co. Jare chereriro vae güiriro chembou vae —jei.

Setenta vae reta yugüeru ye

¹⁷ Jare jocua setenta vae reta yugüeru ye yave Jesús oĩ vae pe, uyerovia jare jei Jesús pe:

—OreYa, nderee re nonoi mbaepuere aña reta re.

¹⁸ Jayave Jesús jei chupe reta:

—Che aecha Satanás oa ara güi ama uvera vae rami. ¹⁹ Mase, amee ma peve mbaepuere pepuere vaerã pepĩro mboi re jare chumicarape re, jare penoi vaerã mbaepuere tovaicho re, yepe tẽi jae güinoi vi mbaepuere. Ipuereta'ã mbae uyapo peve —jei—. ²⁰ Ērei agüiye piyerovia mbaepuere aña reta re penoi vae re. Ērei piyerovia peree uyecuatía ma oĩ ara pe vae re —jei.

Jesús uyerovia

(Mt 11.25-27; 13.16-17)

²¹ Jocua ora pe etei Jesús uyerovia jare jei:

—Amee yasurupai ndeve, cheRu, quirãi nde nemaño'ã cua ivi pegua iyaracuaa vae reta re uicuaa vaerã cua mbaembae, ěrei ndicuaaca sambiai rami vae reta pe. Icavi co, cheRu. Echa'ã icavi co ndeve ndiyapo vaerã jucuarãi. Nde co jae ara pegua reta jare ivi pegua reta iYa —jei.

²² Jayave jei vi:

—CheRu umee ma cheve opaete. Mbaeti quía uicuaa cavi cheregua, jaeño cheRu. Jae ramiño vi mbaeti quía uicuaa cavi cheRu regua, jaeño che jare che aicuaaca chupe vae reta —jei.

²³ Jayave uyerova umae jemimboe reta re jare jei chupe retaño:

—Tumpa pemivendise ma. Echa'ã umaño peré peecha vaerã jeta mbaembae —jei—.

²⁴ Che jae peve, jeta Tumpa inee aracae umimbeu vae reta jare mburuvicha guasu reta uipota tẽi uecha pe reta peecha ma vae, ěrei uecha'ã. Jae ramiño vi jae reta uipota tẽi uyandu pe reta piyandu ma vae, ěrei uyandu'ã —jei.

Samaria pegua ipiacavi vae

²⁵ Penti ara penti mboroyocui re oporomboe vae uyemboi Jesús jovai jare jei chupe:

—Oporomboe vae, ¿mbae pa ayapota anoi vaerã tecove opa mbae vae?

Uipota tẽi uyavica Jesús pe.

²⁶ Jayave Jesús jei chupe:

—¿Mbae pa uyecuatía oĩ mboroyocui pe? ¿Mbae pa nemingueta joco pe? —jei.

²⁷ Jayave jei Jesús pe:

—Uyecuatía oĩ cuarãi: 'Eau ndeYa Tumpa opaete ndepia reve, jare opaete nderecove reve, jare opaete nepirãta reve jare opaete ndepiyemingueta reve. Jae ramiño vi eau nderapicha nde ndiyerau rami.' Jucuarãi uyecuatía oĩ —jei.

²⁸ Jayave Jesús jei chupe:

—Icavi co ndere. Cuarãi iyapo jare nenoita tecove opa mbae vae —jei.

²⁹ Mboroyocui re oporomboe vae uipota uicuaaca jupi co jae. Jáeramo upirandu Jesús pe:

—¿Quía pa co jae cherapicha?

³⁰ Jayave Jesús jei chupe:

—Penti cuimbae oo Jerusalén güi tenta guasu Jericó coti. Jare aramoño imonda vae reta uipisi. Jae reta omboi jemimonde chugüi jare umbipere. Uyuca rai rai ueya reta tape rupi —jei—. ³¹ Jare aramoño ou penti sacerdote jocua tape rupi. Jare uecha yave cuimbae ipere vae, uipota'ã etei oya jese. Mbiri rupiño uasa chugüi —jei—. ³² Jae ramiño vi ou penti levita jocua tape rupi. Jare uecha yave cuimbae ipere vae, uipota'ã etei oya jese. Mbiri rupiño vi uasa chugüi —jei—. ³³ Ērei penti Samaria pegua ou jocua tape rupi, jare ou uvãe cuimbae ipere vae oĩ vae pe. Jare Samaria pegua uecha yave, uiparareco —jei—. ³⁴ Jayave oya jese jare uequi moa uipiano vaerã chugüi ipere vae jare umbiyasoi ipere. Jayave uupi imburica re jare güiraa penti tenta pe, jare joco pe uyandareco jese —jei—. ³⁵ Jare piareve pe Samaria pegua oota ma joco güi yave, uequi corepoti mocui ara mbaraviqui jepi pegua jare umee tenta iya pe. Jei chupe: 'Iyandareco mi jese. Jare jeta ete cua güi ndiyemingasta yave, ambiepita ndeve ayu ye yave' —jei, jei—.

³⁶ Añave tapirandu ndeve: ¿Quía nunga pa co jae jocua imonda vae reta uipisi vae japicha añetete vae? Echa'ã mbapi cuimbae uasa jorocopi —jei.

³⁷ Jare mboroyocui re oporomboe vae jei Jesús pe:

—Jocua uiparareco vae.

Jayave Jesús jei chupe:

—Ecuá iyapo jae uyapo vae rami.

Jesús opou Marta jare María ipi

³⁸ Jesús jare jemimboe reta jecuae yugüiraa Jerusalén coti. Jayave yugüiraa uvãe penti tenta guasu-rai pe. Joco pe penti cuña Marta jee vae umbiresive cavi jenta pe Jesús. ³⁹ Jare Marta ipiqui co jee María. Jare María uguapi yandeYa iyipi pe uyapisaca vaerã jese. ⁴⁰ Ērei Marta uyempia'ã tembiurã uyapo oĩ vae re. Jayave ou Jesús oĩ vae pe jare jei chupe:

—CheYa, chepiqui chembori'ã. Jáeramo cheño ayapo aĩ tembiurã. ¿Icavi ra ndeve uyapo vaerã cuarã? Iyocui chembori vaerã —jei.

⁴¹ Jayave yandeYa jei chupe:

—Marta, Marta, ndiyempia'ã jeta mbaembae re. ⁴² Ērei yaipota'ã jeta mbaembae. Cua María uiparavo icavi vae ndegüi. Ndarau quía ipuere uequi chugüi —jei.

11

Jesús oporomboe yerure re

(Mt 6.9-15; 7.7-11)

¹ Jare penti ara Jesús uyerure oĩ Tumpa pe. Jare opa ma yave, penti jemimboe jei chupe:

—CheYa, oremboe nduyerure vaerã Tumpa pe Juan vi omboe jemimboe reta rami.

² Jayave Jesús jei chupe reta:

—Piyerure Tumpa pe yave, pere cuarã:

‘OreRu ara pe neĩ vae, tuyembiaadoraca nderee.

Tou ndeporoyocua.

Tuyeyapo nde ndere vae cua ivi pe ara pe uyeyapo oĩ rami.

³ Emeé oreve opa ara orerembiurã.

⁴ Embiasa oreve orembaeyoa reta, ore numbiasa ipotave iyoa orecoti vae pe rami.

Jare agüiye emañe añã guasu re uyapoca vaerã oreve mbaeyoa.

Orerepi añã guasu güi’ —pere, jei.

⁵ Jayave jei vi chupe reta:

—Yamijaanga penti cuimbae jare iamigo. Cuimbae oo yave iamigo jenta pe piare mbite rupi uyerure vaerã chupe mbae re, aramoí jeita chupe: ‘Cheamigo, iporuca cheve mbapi mbiyape. ⁶ Echa'ã penti cheamigo ou uvãe chepi, jare mbaeti mbae anoi amee jou vaerã.’ Aramoí jucuarãita jei —jei—. ⁷ Jare aramoí iamigo ombouta chupe ifnee japipe güi: ‘Agüiye chemambeco. Echa'ã uyeyuquenda ma oĩ cheronque, jare che jare opaete chesambiai reta nduyapacua ma noĩ ndoque vaerã. Chepuere'ã ma apüa amee vaerã ndeve.’ Aramoí jucuarãita jei —jei—. ⁸ Che jae peve, yepe tẽi uipota'ã upüa, jocua cuimbae co jae iamigo ramo, ěrei jocua cuimbae jecuaeño ueni oĩ yave, upüata co umee vaerã chupe opaete uipota vae —jei—. ⁹ Jare che jae peve, piyerure Tumpa pe mbae re, jare Tumpa umeeta

peve. Peeca, jare pevãeta. Pembopu onque, jare uyepæata peve —jei—. ¹⁰ Echa'ã uyerure yave quía Tumpa pe mbae re, Tumpa umeeta chupe. Jare ueca yave quía mbae, uvãeta. Jare ombopu yave quía onque, uyepæata chupe —jei—. ¹¹ Nde nenoi yave penti nderai, nderai uyerure yave ndeve mbiyape re, ndarau nemee chupe penti ita mbiyape ipepica pe. Jae ramiño vi nderai uyerure yave ndeve pira re, ndarau nemee chupe penti mboi pira ipepica pe —jei—. ¹² Jae ramiño vi nderai uyerure yave ndeve ururupía re, ndarau nemee chupe penti chumicarape ururupía ipepica pe —jei—. ¹³ Yepe tõi pe reta jecuaño piyapo icavi mbae vae, ãrei pemee co mbaembae icavi vae pesambiai reta pe. Jáeramo peRu ara pe õi vae iquirõi ete umee Espiritu Santo uyerure chupe jese vae reta pe —jei.

Jei reta icavi mbae vae Espiritu Santo coti
(Mt 12.22-30; Mr 3.20-27)

¹⁴ Penti ara Jesús umbisiri añã penti cuimbae iupa vae güi. Jare añã usiri ma chugüi yave, cuimbae uyemingueta. Jare jeta vae joco pe ñugüinoi vae ipiacañi. ¹⁵ Ërei amocue vae jei:

—Añã guasu Beelzebú imbaepuere pe umbisiri añã reta oya jese vae reta güi.

¹⁶ Jare ñru vae reta uipota uicuaa mbae ra Jesús ipuere uyapo. Jáeramo jei reta Jesús pe uyeyapo vaerã mbae ara re jae reta uicuaa vaerã quía co jae. ¹⁷ Ërei Jesús uicuaa ipiyemingueta, jare jei chupe reta:

—Penti tenta guasu pegua reta oyovaicho uyupii yave, opata co jocua tenta guasu. Jae ramiño vi penti tenta pegua reta oyovaicho uyupii yave, opata co jocua tenta —jei—. ¹⁸ Jae ramiño vi Satanás pochi iyupe yave, opata co iporoyocua. Echa'ã pe reta pere che ambisiri añã reta oya jese vae reta güi añã guasu Beelzebú imbaepuere pe —jei Jesús chupe reta—. ¹⁹ Ërei che ambisiri yave añã reta oya jese vae reta güi Beelzebú imbaepuere pe, ¿quía imbaepuere pe ra umbisiri añã reta oya jese vae reta güi perentarã reta? Pepuere pepirandu chupe reta jese —jei—. ²⁰ Ërei che ambisiri añã reta oya jese vae reta güi Tumpa imbaepuere pe. Jáeramo pepuere picuaa ou ma co uvãe peve Tumpa iporoyocua —jei—.

²¹ Penti cuimbae ipirãta vae mboca güinoi vae uyandareco yave jenta re, ipuere'ã quía upiro chugüi imbaembae —jei—. ²² Ërei ou yave ñru cuimbae ipirãta ete chugüi vae uñerãro vaerã jae ndive, uiamirita co jare upirota chugüi imboca güirovia catu tõi uyerepi vaerã pipe vae. Jae ramiño vi upirota chugüi imbaembae umbiyao vaerã umee ñru reta pe —jei—.

²³ Ime yave quía uipotã'ã ico cheñrurã vae, oyovaicho co che ndive. Jae ramiño vi ime yave quía chembori'ã vae, uyapo co icavi mbae vae checoti —jei chupe reta—.

Añã usiri jare ou ye vae
(Mt 12.43-45)

²⁴ Penti añã usiri ma yave oya jese vae güi, uguata ñana rupi ueca quiupe ico vaerã. Ërei ipuere'ã yave uvãe quiupe ico vaerã, jei iyupe: "Taa ye jocua chero ayu chugüi vae pe' —jei, jei—. ²⁵ Echa'ã yandepuere yamijaanga penti o jocua cuimbae añã usiri ma chugüi vae re. Añã ou ye uvãe yave jocua o pe, uecha o iya utupei ma jare opa oñono cavi —jei—. ²⁶ Jayave oo ye añã güeru siete añã icavi mbae ete chugüi vae reta jocua o pe. Jayave ocho reve uique o pe, joco pe yugüireco vaerã. Tenonde yave, penti añã oya jese yave, jocua cuimbae uiporara. Ërei taicue rupi ocho ma añã reta oya jese. Jáeramo tanta uiporara —jei.

Tumpa umivendiseta vae reta

²⁷ Jare Jesús cua mbaembae re imiari yave, penti cuña joco pe ñugüinoi vae reta ipite pe oĩ vae iñeeãta reve jei:

—Tumpa tumivendise ndesi. Echa'ã nde ndea co chugüi jare jae nemicambu —jei.

²⁸ Ërei Jesús jei:

—Añete co. Ërei Tumpa umivendiseta opaete uyapisaca iñee re vae reta, uyapo yave jae jei vae —jei.

Uipota reta uecha miacañi
(Mt 12.38-42; Mr 8.12)

²⁹ Jare jeta vae yugüeru Jesús õi vae pe. Jayave Jesús jei chupe reta:

—Añave yugüireco vae reta icavi mbae vae uyapo vae reta co. Jae reta uipota ayapo vaerã mbae aicuaaca vaerã chupe reta quía co che. Ërei jaëño uyeyapota mbae Jonás pe uyeyapo vae rami, jae reta uicuaa vaerã quía co che —jei—. ³⁰ Echa'ã Jonás pe uyeyapo vae uicuaaca Nínive pegua reta pe Jonás jei chupe reta vae añete vae co. Jae ramiño vi uyeyapota cheve vae uicuaacata añave yugüireco vae reta pe quía co che. Che co jae cuimbaerã uyeyapo vae —jei—. ³¹ Tumpa upuruãa yave, jocua cuña mburuvicha guasu ico sur coti vae upũata umbijeco vaerã añave yugüireco vae reta. Echa'ã jae ou mbiri ete güi uyapisaca vaerã Salomón iyaracuaa catu vae re. Ërei che chearacuaa catu ete Salomón güi —jei—. ³² Tumpa upuruãa yave, Nínive pegua reta upũata umbijeco vaerã añave yugüireco vae reta. Echa'ã jae reta ueya iyemingueta icavi mbae vae ipia pe oĩ vae, Jonás umimbeu chupe reta yave Tumpa iñee. Ërei chembaepuere tuicha ete co Jonás imbaepuere güi —jei—.

Mechero yamiendi yave

(Mt 5.14-16; 6.22-23)

³³ Mechero yamiendi yave, ndarau ñañomi. Ndarau ñañono yapepo uyembovapo oĩ vae igüi pe. Ñañono co mechero jenda pe, o pe uique vae reta güinoi vaerã tembipe —jei—. ³⁴ Tembipe uique yanderete pe yanderesa rupi. Icavi yave nderesa, nderete tineeta tembipe pe. Ërei icavi'ã yave nderesa, nderete tineeta pĩtumimbi pe —jei—. ³⁵ Jáeramo iñemoa ngatu agüiye vaerã nderete tinee pĩtumimbi pe. Echa'ã tineeta tẽi tembipe pe —jei—. ³⁶ Nderete tinee yave tembipe pe, ndarau ico joco pe pĩtumimbi. Opaete tineeta tembipe pe, penti tembipe tuicha vae nembiesape vae rami —jei—.

Jesús umbijeco fariseo reta jare boroyocui re oporomboc vae reta

(Mt 23.1-36; Mr 12.28-40; Lc 20.45-47)

³⁷ Jare jucuarãi imiari ma yave Jesús, penti fariseo uparea chupe ucaru vaerã jae ndive. Jayave Jesús oo fariseo jenta pe jare uguapĩ ucaru vaerã. ³⁸ Jare fariseo cua uecha yave, ipiacañi jese. Echa'ã Jesús uyepoe'ã ndei ucaru mbove. ³⁹ Jayave yandeYa jei:

—Pe reta co jae fariseo reta. Pe reta co jae taza jare plato icupe rupiño uyeyoe vae rami. Ërei pepia iquía co. Echa'ã pipota ñru vae reta imbaembae jare piyapo icavi mbae vae —jei—. ⁴⁰ Pe reta co jae iyaracuaa mbae vae reta. Echa'ã Tumpa uyapo opaete yandepuere yaecha vae. Ërei uyapo vi opaete yandepuere mbae yaecha vae —jei—. ⁴¹ Pemee pequirẽi reve mbaembae iparavete vae reta pe. Cua piyapo yave, picuaacata ñru vae reta pe iquía mbae co pepia —jei—.

⁴² Pe reta co jae fariseo reta. Piporarata co. Echa'ã pemee Tumpa pe diezmo temiti reta penoi vae güi. Ërei piyapo'ã jupi piyapo vaerã vae, jare peau'ã Tumpa. Icavi co pemee vaerã Tumpa pe jocua nunga diezmo. Ërei piyapota tẽi jupi co piyapo vaerã vae, jare peauta tẽi Tumpa —jei—. ⁴³ Pe reta co jae fariseo reta. Piporarata co. Echa'ã pipota peguapĩ tenda tenondegua vae reta pe tupao pe, jare pipota ñru vae reta pe piyembisaludaca vaerã calle reta rupi —jei—. ⁴⁴ Pe reta co jae mboroyocui re oporomboc vae reta jare fariseo reta. Piporarata co. Echa'ã pepurumbitaviñoi. Pe reta co jae teögüeriru reta quía uecha'ã vae rami. Yepe tẽi ñru vae reta upĩro jese reta, uicuaa'ã joco pe ñugüinoi vae —jei—.

⁴⁵ Jayave penti mboroyocui re oporomboc vae jei Jesús pe:

—Cua añave ndere vae rupi ndere vi icavi mbae vae oreve.

⁴⁶ Jayave Jesús jei:

—Pe reta co jae mboroyocui re oporomboc vae reta. Pe reta vi piporarata co. Echa'ã pe reta pere ñru vae reta pe uyapo vaerã yavai uyapo vaerã vae. Yamijaanga penti tivita. Pe reta pere ñru vae reta pe ovoi vaerã penti tivita poi ete vae. Ërei pe reta pembori'ã etei ovoi vaerã. Pe reta piyaviqui'ã etei tivita —jei—. ⁴⁷ Piporarata co. Echa'ã pe reta piyapo Tumpa iñee aracae umimbeu vae reta iteögüeriru reta. Jare petenondegua reta uyuca reta —jei—. ⁴⁸ Jucuarãi picuaaca petenondegua reta uyapo vae icaviño co peve. Echa'ã jae reta uyuca reta, jare pe reta piyapo iteögüeriru reta —jei chupe reta—. ⁴⁹ Jucuarãiño vi Tumpa iyaracuaa catu vae jei: 'Amondota peve chiñee umimbeu vae reta jare cheremimondo reta, jare pe reta piyucata amocue vae jare piyapota icavi mbae vae ñru reta pe' —jei, jei—. ⁵⁰ Jare pe reta añave pico vae penoita teco opaete Tumpa iñee umimbeu vae reta ivi uyeyapo güive uyeyucaca vae imano re —jei—. ⁵¹ Tenonde voi

Abel uyeyucaca, jare taicue rupi Zacarías uyeyucaca. Echa'ã Zacarías umano maemimba uyeyucacue uñemeearenda jare Tumpa jo ipãu pe. Añete che jae peve, cua reta jare opaete ñru vae reta imano re pe reta añave pico vae piyembijecota —jei—.

⁵² Pe reta co jae mboroyocui re oporomboe vae reta. Piporarata co. Echa'ã pemboe'ã ñru vae reta uicuaa vaerã Tumpa. Pe reta etei picuaa'ã Tumpa. ñru vae reta uipota tẽi uicuaa Tumpa, ãrei pe reta piyopia agũiyi vaerã uicuaa —jei.

⁵³ Jare jucuarãi jei ma yave chupe reta, mboroyocui re oporomboe vae reta jare fariseo reta pochĩ ete chupe, jare umbipi upirandu chupe jeta mbaembae re. ⁵⁴ Jecuaẽño jae reta uyapisaca cavi jese. Echa'ã uipota tẽi uyandu jei mbae ipuere umbijeco jese vae.

12

Piñemoa ngatu fariseo reta gũi

¹ Jare jeta ete uyembati Jesús oĩ vae pe, jare uñemiañamiaña. Jayave Jesús jei jemimboe reta pe rani:

—Piñemoa ngatu fariseo reta gũi. Echa'ã jae reta upurumbitavi vae reta co. Jare tavi ipuere uñemiai levadura rami —jei—. ² Ime yave mbae uyeyasoi vae, uyechacañotai co. Jae ramiño vi ime yave mbae uñeñomi vae, uyecuaañotai co —jei—. ³ Jáeramo pĩtumimbi pe pere vae uyenduta tembipe pe, jare perenta japipe pe pere viari vae jerãcuata opaete vae uyandu vaerã —jei—.

Pequiye Tumpa gũi

(Mt 10.26-31)

⁴ Jare che jae peve, cherivi reta, agũiyi pequiye upuruyuca vae reta gũi. Echa'ã upuruyuca yave, mbaeti ye mbae icavi mbae vae ipuere uyapo peve —jei—. ⁵ Ërei tamimbeu peve quía gũi pequiye vaerã. Icavi co pequiye vaerã Tumpa gũi. Echa'ã jae gũinoi mbaepuere upuruyuca vaerã jare oporomondo vaerã cañitei pe. Añete che jae peve, pequiye chugũi —jei—.

⁶ Picuaa co quirãĩ umaemee vae reta umee pandepo gũira-rai mbovi ete corepoti re. Ërei Tumpa ñacañi'ã penti yepe gũira-rai gũi —jei—. ⁷ Tumpa uicuaa mbovi pea penoi peãca re vae. Jáeramo agũiyi pequiye. Echa'ã Tumpa perau ete jeta gũira-rai reta gũi —jei—.

Ñru vae reta jovaque uyecuaaca vae

(Mt 10.32-33; 12.32; 10.19-20)

⁸ Jae ramiño vi che jae peve cua: Ime yave quía ñru vae reta jovaque jei yave: 'Che co jae Jesús jemimboe', che cuimbaerã ayeyapo vae jaeta ángel Tumpa pe uyeyocui vae reta jovaque: 'Cua co jae cheremimboe' —jaeta, jei Jesús—. ⁹ Ërei ime yave quía ñru vae reta jovaque checuacu vae, che vi aicuacuta ángel Tumpa pe uyeyocui vae reta jovaque —jei—.

¹⁰ Jare ime yave quía jei icavi mbae vae che cuimbaerã ayeyapo vae coti vae, Tumpa umbiasata chupe. Ërei ime yave quía jei icavi mbae vae Espíritu Santo coti vae, Tumpa ndarau etei umbiasa chupe —jei Jesús chupe reta—.

¹¹ Jare ñru vae reta pereraa yave pemee vaerã tupao reta pe jare mburuvicha reta pe jare ñru vae reta mbaepuere gũinoi vae pe, agũiyi piyemipia'ã mbae pereta chupe reta vae re —jei—. ¹² Echa'ã Espíritu Santo uicuaacata peve jocua ora pe etei mbae pere vaerã —jei.

Cuimbae icocatu vae iyaracuaa mbae vae

¹³ Jayave penti cuimbae jeta vae ipite pe oĩ vae jei Jesús pe:

—Oporomboe vae, ere cheriquei pe umbiyao vaerã cheve oreru ueya vae.

¹⁴ Jayave Jesús jei chupe:

—Cuimbae, che chepuere'ã co ayapicatu jocua nunga. Ndarau ambiyao peve nderu ueya vae —jei.

¹⁵ Jayave Jesús jei opaete vae pe:

—Piñemoa ngatu agũiyi vaerã pipota ñru vae reta imbaembae. Echa'ã ndarau yaico cavi jeta mbaembae ñanoi vae ramoño —jei.

¹⁶ Jayave jei chupe reta umijaanga reve:

—Penti cuimbae icocatu vae iavati yagüiye cavi. ¹⁷ Jare cuimbae jei iyupe ipia pe: ‘¿Mbae ra ayapota? Mbaeti ma cheavati jendarā’ —jei, jei—. ¹⁸ Jayave jei iyupe ipia pe: ‘Aicuaa ma. Ambaita cheavatio reta jare ambutuicha eteta cheavatio reta, jare joco pe añuvatuta opaete cheavati jare opaete uyeaviro vae’ —jei, jei—. ¹⁹ Jayave che jaeta cherecove pe cuarāi: ‘Cherecove, jeta ete ma mbaeviro niñuvatu. Uepitita jeta año pegua. Eputuu, ecaru, ecau jare iyerovia.’ Cuarāi jaeta —jei, jei—. ²⁰ Ērei Tumpa jei jocua cuimbae pe: ‘Nde co jae iyaracuaa mbae vae. Echa’ā cua pītu aequita nderecove ndegüi. Jare jayave ¿quía ra güinoita opaete jocua mbaembae niñuvatu ndiyupegarā vae?’ —jei, jei.

²¹ Jayave Jesús jei chupe reta:

—Ime yave quía jeta mbaembae uñuvatu iyupeguarā vae, ěrei icocatu’ā yave Tumpa coti, uyeypota chupe jocua cuimbae icocatu vae pe uyeypato rami —jei.

Agüiye piyemipia’ā mbaembae re

(Mt 6.25-34)

²² Jayave Jesús jei jemimboe reta pe:

—Jáeramo che jae peve, agüiye piyemipia’ā perembiurā vae re. Jae ramiño vi agüiye piyemipia’ā peremimonderā vae re —jei—. ²³ Ndarau pepuere pico cavi jecuaño piyemipia’ā yave perembiurā vae re, jare peremimonderā vae re —jei—. ²⁴ Pemae güira reta re. Echa’ā jae reta umaeti’ā jare umbaeviro’ā vi. Mbaeti vi güinoi avatio uñuvatu vaerā iavati. Ērei Tumpa umingarū reta. Jare Tumpa perau ete güira reta güi —jei—. ²⁵ Aramoi piyemipia’ā pipota tēi pepucu ramo. Ērei ndarau ete pepuere piyembicuacuaa pepucu ete vaerā —jei Jesús chupe reta—. ²⁶ Mbaeti etei mbae pepuere piyapo cua re. Ērei cua yavai’ā co Tumpa pe. Jáeramo agüiye piyemipia’ā ĩru mbaembae re —jei—. ²⁷ Pemae mbaepoti reta re, quirāi ucuacuaa reta. Uparaviqui’ā reta. Umaepova’ā reta vi. Ērei che jae peve, mbaepoti reta ipōra ete Salomón jemimonde ipōra vae güi. ²⁸ Tumpa omopōra ñana, yepe tēi penti ara ñana oĩ co pe jare piareve pe ocai. Jáeramo Tumpa umeeta co peve peremimonderā. Michi ete co pepurugüirovia —jei—. ²⁹ Agüiye piyemipia’ā perembiurā vae re, jare agüiye piyemipia’ā ĩru mbaembae re —jei—. ³⁰ Echa’ā opaete ivi pegua reta uyemipia’ā cua mbaembae re. Ērei peRu uicuaa icavi co penoi vaerā cua mbaembae —jei—. ³¹ Ērei icavi co pipota ete vaerā Tumpa iporoyocua, jare Tumpa umeeta peve opaete cua mbaembae —jei—.

Mbaembae ara pegua

(Mt 6.19-21)

³² Agüiye pequiye, yepe tēi pe reta mbovi ete co. Echa’ā Tumpa umeeta co pe reta pico vaerā iporoyocua pe —jei—. ³³ Pemee corepoti re pembaembae, jare pemee corepoti uata chupe vae reta pe. Cuarāi piyapo yave, penoita mbaembae ara pegua. Jae co peurupucu ara pe penoita vae rami. Jocua nunga urupucu ndarau etei indechi jare jocua mbaembae icavi vae peurupucu ara pegua pe penoi vae ndarau ucañi. Echa’ā imonda vae ndarau oya jese jare cupii ndarau urucumegua —jei—. ³⁴ Echa’ā piñuvatu yave mbaembae icavi vae piyupeguarā ivi pe, jecuaño pepia pe piyeminguetata ivi pegua re. Ērei piñuvatu yave mbaembae icavi vae piyupeguarā ara pe, jecuaño pepia pe piyeminguetata ara pegua re —jei—.

Uyeyocui vae jecuaño uāro vae

³⁵⁻³⁶ Yamijaanga peré uyeyocui vae reta. Uyeyocui vae reta ipatrón oo umenda vaerā yave, uyeyocui vae reta uāro ñugüinoi ipatrón ou ye regua. Uāro reta jare jecuaño jendi imechero reta. Jare ipatrón ou ye uvāe yave ombopu onque, jupivoi jembiocui reta uipea onque ipatrón ipuere vaerā uique jenta pe —jei—. ³⁷ Uyeyocui vae reta jecuaño uāro ñugüinoi yave ipatrón ou ye uvāe yave, uyeroviata reta. Añete che jae peve, ipatrón uyembicuata toalla pe, jare jeita jembiocui reta pe uguapi vaerā mesa pe, jare ipatrón etei umingaruta jembiocui reta —jei Jesús—. ³⁸ Aramoi ipatrón ou yeta uvāe pītu ma yave ani piare mbite rupi. Ērei jae uecha yave jembiocui reta uāro ñugüinoi, jae reta uyeroviata co —jei—. ³⁹ Aipota picuaa vaerā cua: Penti tenta iya uicuaa yave mbae ora pe outa uvāe imonda vae oñomi vaerā imbaembae, uñemicuatĩrota tēi jare ndarau tēi umaño imonda vae re güiraa vaerā imbaembae chugüi —jei—. ⁴⁰ Jae ramiño vi pe reta

peãro, agüiye vaerã che cuimbaerã ayeyapo vae ayu ye avãe piyandareco'a peĩ yave —jei chupe reta.

Uyeyocui vae uyapo'a ipatrón jei vae
(Mt 24.45-51)

⁴¹ Jayave Pedro jei Jesús pe:

—CheYa, cua ndere ma nemijaanga reve. ¿Oreve peguarãño pa co cua? ani ¿opaete vae peguarã pa? —jei.

⁴² Jayave yandeYa jei:

—Penti uyeyocui vae iyaracuaa vae uyapo ipatrón jei chupe uyapo vaerã vae. Jare ipatrón umee chupe ico vaerã ñru jembiocui reta juvicharã, jare umee vaerã chupe reta jembiurã opa ara —jei—. ⁴³ Ipatrón ou ye uvãe yave jenta pe, uecha yave jocua jembiocui uyapo oĩ iparaviqui, jocua jembiocui uyeroviata co —jei chupe reta—. ⁴⁴ Añete che jae peve, ipatrón umeeta chupe uyandareco vaerã opaete imbaembra re —jei Jesús—. ⁴⁵ Ërei aramoi uyeyocui vae jei iyupe ipia pe: 'Chepatrón ndarau ou ye imambae.' Jare umbipi uinupa ñru uyeyocui vae reta - cuimbae reta jare cuñatai reta - jare ucaru jare ucau jare usavipo —jei—. ⁴⁶ Jayave penti ara ipatrón ou yeta uvãe jembiocui uyandareco'a oĩ yave. Jocua ora pe etei ipatrón uipocouta. Jayave ipatrón uiporaraca eteta chupe jare omondota ico vaerã ipatrón iporoyocui uyapo mbae vae reta ndive —jei—. ⁴⁷ Ipatrón uiporaraca eteta. Echa'a uyeyocui vae uicuaa tẽi ipatrón iporoyocui, ãrei uyapo'a —jei chupe reta—. ⁴⁸ Ërei ime yave uyeyocui vae uicuaa'a ipatrón iporoyocui vae, yepe tẽi uiporarata co uyapo'a ipatrón iporoyocui ramo, ãrei ipatrón ndarau uiporaraca ete chupe. Echa'a ipatrón uicuaaca yave jembiocui pe iporoyocui, icavi co jembiocui uyapo vaerã uicuaa vae rupi —jei—.

Ayu uyembiyao vaerã uyugüi ivi pegua reta
(Mt 10.34-36)

⁴⁹ Che ayu cua ivi pe tata ambiyepota vaerã, jare chequirẽi ete opa cheparaviqui ayapo —jei—. ⁵⁰ Che aiporara eteta co jare yavai eteta cheve opa uyeyapo regua —jei—. ⁵¹ ¿Pepia pe piyemingueta pa che ayu amee vaerã mbiacatu ivi pegua reta pe? Che jae peve, jucuarãi'a co. Che ayu uyembiyao vaerã uyugüi ivi pegua reta —jei chupe reta—. ⁵² Echa'a añave güiye yugüireco yave pandepo penti tenta pe, uyembiyaota co uyugüi reta. Mbapi oyovaichota mocui ndive, jare mocui oyovaichota mbapi ndive —jei—. ⁵³ Tu oyovaichota tai ndive, jare tai oyovaichota tu ndive. Ichi oyovaichota imembi cuña ndive, jare imembi cuña oyovaichota ichi ndive. Imesi oyovaichota imembi-tati ndive, jare imembi-tati oyovaichota imesi ndive —jei—.

Picuaa'a etei mbae añave uyeyapo oĩ vae
(Mt 16.1-4; Mr 8.11-13)

⁵⁴ Jare Jesús jei yati vae reta pe:

—Peecha yave amapĩtu uyeyapo oĩ guarasi uique vae coti, jupivoi pere: 'Oquita co.' Jare jucuarãi uyeyapo —jei—. ⁵⁵ Jae ramiño vi tanta ivitu yave, pere: 'Aracuta co.' Jare jucuarãi uyeyapo —jei—. ⁵⁶ Pe reta co jae upurumbitavi vae reta. Echa'a ara jare ivi re pemae yave, picuaa mbae uyeyapota vae. Ërei picuaa'a etei mbae añave uyeyapo oĩ vae —jei chupe reta—.

Iyeyapicatu nderovaicho ndive
(Mt 5.25-26)

⁵⁷ ¿Maera pa peatẽi picuaa mbae jupi piyapo vaerã vae? —jei—. ⁵⁸ Ndeo yave uipota uñeapo nderé mbae re vae ndive mburuvicha pe, tape rupi peo rambueve iyeyapicatu jae ndive, agüiye vaerã jae uñeapo nderé mburuvicha pe. Echa'a mburuvicha nemondota peresoriru iyandarecoa pe, jare peresoriru iyandarecoa neñonota peresoriru pe —jei—. ⁵⁹ Che jae ndeve, ndarau etei neẽ peresoriru güi ndei opaete ndepía nembiepi mbove —jei—.

¹ Jare amocue joco pe ñugüinoi vae reta umimbeu Jesús pe quirái Pilato uyucaca amocue Galilea pegua reta, jae reta maemimba uyeyucacue reta umee Tumpa pe ñugüinoi rambueve. ² Jayave Jesús jei chupe reta:

—Aramoi pe reta pepia pe piyemingueta jucuarái uyeyapo jocua Galilea pegua reta pe, jae reta iyoa ete opaete ñru Galilea pegua reta güi ramo. ³ Che jae peve, jucuarái'á co. Jare peeya'á yave piyemingueta icavi mbae vae pepia pe oí vae, pe reta pecañiteita vi —jei—. ⁴ Jare jocua torre Siloé pe oíse vae usururu jocua dieciocho vae re jare uyuca reta. Aramoi pe reta pepia pe piyemingueta jocua dieciocho vae iyoa ete opaete ñru Jerusalén pegua reta güi —jei—. ⁵ Che jae peve, jucuarái'á co. Jare peeya'á yave piyemingueta icavi mbae vae pepia pe oí vae, pe reta pecañiteita vi —jei.

Iva ía mbae vae

⁶ Jayave Jesús jei chupe reta umijaanga reve:

—Penti cuimbae güinoi ico pe penti íva. Oo tēi ueca íva ía. Uvāe'á chupe —jei—.

⁷ Jayave jei ico pe uparaviqui chupe vae pe: 'Mase, mbapi año ma ayu tēi aeca cua íva ía jare avāe'á chupe. Iyasia. Ñañotita tēi ñru temiti jendacue pe' —jei, jei—.

⁸ Jayave co pe uparaviqui vae jei co iya pe: 'Patrón, emañeño tupita ye penti año pegua. Tayoo rani iyipi rupi jare tañoño vacarepoti iyipi rupi' —jei, jei—. ⁹ Jayave ía yave, icavita co. Ērei ía'á yave, ndepuereta ndiyasiaca' —jei, jei.

Jesús umbigüera cuña mbutuu ara pe

¹⁰ Jare Jesús oporomboe oí penti judío reta itupao pe mbutuu ara pe. ¹¹ Jare uecha joco pe penti cuña dieciocho año ma imbaerasi vae. Jecuaeño ipe ete. Ipuere'á etei uyemboi cavi. ¹² Jare Jesús uecha ma yave, jei chupe:

—Eyu checoti, cuña. Ndecuera ma co nembraerasi güi —jei.

¹³ Jayave Jesús oñoño ipo cuña iñāca re. Jare jupivoi cuña ipuere uyemboi cavi jare umbipi umbiadora Tumpa.

¹⁴ Jayave tupao re uyandareco vae pochi cua re. Echa'á Jesús umbigüera cuña mbutuu ara pe. Jáeramo tupao re uyandareco vae jei joco pe ñugüinoi vae reta pe:

—Ícavi co uparaviqui vaerā seis ara. Peyu jocua seis ara pecuera vaerā. Agüiye peyu pecuera vaerā mbutuu ara pe —jei.

¹⁵ Ērei yandeYa jei chupe:

—Pe reta co jae upurumbitavi vae reta. Pe reta piyora pegüeye jare pembrica jenda güi mbutuu ara pe peraa vaerā pembiu —jei—. ¹⁶ Mase, cua cuña Abraham iñemoñaá reta pegua co. Ērei Satanás dieciocho año ma umimbaerasi. ¿Ícavi'á pa che ambigüera vaerā cua mbaerasi güi mbutuu ara pe? —jei.

¹⁷ Jare cua Jesús jei ma yave, opaete Jesús jovaicho reta imara. Echa'á opaete joco pe ñugüinoi vae reta uyerovia opaete icavi ete vae Jesús uyapo vae re.

Mostaza jāicue

(Mt 13.31-32; Mr 4.30-32)

¹⁸ Jayave Jesús jei:

—¿Mbae ra ipuere uyemijaanga Tumpa iporoyocua re? ¿Mbae ra amijaangata jese?

¹⁹ Yandepuere yamijaanga jese penti mostaza jāicue —jei—. Uñeñoti yave, ucuacuaa jare uyeyapo ivira tuicha vae. Jare güira reta yugüeru uyapo jaitirá jese —jei.

Levadura

(Mt 13.33)

²⁰ Jayave jei chupe reta:

—¿Mbae ra amijaangata Tumpa iporoyocua re? ²¹ Yandepuere yamijaanga jese levadura —jei—. Cuña umbiyea levadura jeta catu harina ndive, levadura uñemíai vaerā opaete masa rupi —jei.

Onque ipi-rai vae

(Mt 7.13-14, 21-23)

²² Jare Jesús uguata opaete tenta guasu reta jare tenta guasu-rai reta rupi, jare oporomboe joco pe. Jare jecuaeño oo Jerusalén coti. ²³ Jayave penti vae upirandu Jesús pe:

—CheYa, ¿ime pa mbovi catu uyembiasacata vae?

Jayave Jesús jei joco pe ñugüinoi vae reta pe:

²⁴ —Piñemimiräta pique vaerä onque ipi-rai vae rupi. Echa'ã che jae peve, jeta vae uipota tēita uique, ěrei ndarau ipuere —jei—. ²⁵ Echa'ã tenta iya uyequenda ma yave onque, pe reta pepitata oca pe. Jayave pemboputa tēi onque jare pereta tēi: 'OreYa, ipea onque oreve.' ěrei jae jeita peve: 'Che pucuaa'ã —jeita, jei—. ²⁶ Jayave pereta: 'Nducaru nderovaque, jare nde ndeporomboe orecaleta reta rupi' —pereta, jei—. ²⁷ ěrei jae jeita peve: 'Che jae peve, che pucuaa'ã. Pe reta co jae icavi mbae vae uyapo vae reta. Pesiri chegüi' —jeita peve, jei—. ²⁸ Jayave piyaota jare peräi pembiquiririuta. Echa'ã peechata Abraham jare Isaac jare Jacob jare opaete Tumpa iñee aracae umimbeu vae reta Tumpa iporoyocua pe ñugüinoi. ěrei pe reta oca pe pēita —jei—. ²⁹ Yugüeruta reta opaete que rupi rupi güi, jare uguapita reta Tumpa iporoyocua pe —jei—. ³⁰ ěrei pemandúa cua re: Amocue añave uñemimichi vae uyembitenondecata co, jare amocue añave uyembutuicha vae uyembitaicuecata co —jei.

*Jesús ipiatiti Jerusalén pegua reta re
(Mt 23.37-39)*

³¹ Jocua ara yugüeru Jesús oĩ vae pe amocue fariseo reta. Jae reta jei Jesús pe:
—Ecuca cua güi. Echa'ã Herodes uipota ndeyucaca.

³² Jayave Jesús jei chupe reta:

—Herodes co jae penti aguara rami. Pecua ipi jare pemimbeu chupe quiräi jecuae ambisirita añä reta oya jese vae reta güi jare ambigüerata imbaerasi vae reta añave jare curiye. Jare cōeramo opata co cheparaviqui —jei—. ³³ Añete co, icavi co jecuaño aa Jerusalén coti añave jare curiye jare cōeramo. Echa'ã Jerusalén peño judío reta uyucu Tumpa iñee umimbeu vae reta —jei—.

³⁴ Jerusalén pegua reta, pe reta piyuca Tumpa iñee aracae umimbeu vae reta. Pe reta piyapi ita pe piyuca Tumpa ombou peve vae reta. Jeta vese ma chequirēi tēi pumbati, uru umbati imembi reta ipepo igüi pe rami, ěrei pe reta pipota'ã —jei—. ³⁵ Mase, Tumpa usirita ma pegüi. Che jae peve, ndarau ma cherecha pere regua: 'Tuyembiadoraca yandeYa jee re ou vae' —jei.

14

Cuimbae opaete jete iruru vae

¹ Jare penti mbutuu ara pe Jesús oo uique penti fariseo reta itenondegua jenta pe ucaru vaerä jae ndive. Jare fariseo reta umae ñugüinoi Jesús re. ² Jare Jesús uecha joco pe penti cuimbae opaete jete iruru vae. ³ Jayave Jesús upirandu mboroyocui re oporomboe vae reta jare fariseo reta pe:

—¿Jei pa mboroyocui yandepuere yambigüera vaerä quía mbutuu ara pe?

⁴ ěrei jae reta quüiño. Jayave Jesús oñono ipo cuimbae imbaerasi vae re jare umbigüera. Jayave jei chupe oo vaerä. ⁵ Jayave Jesús jei joco pe ñugüinoi vae reta pe:

—Pemburica ani pegüeye uasavi yave penti ivicua pe mbutuu ara pe, jupivoi peo penoẽ joco güi —jei.

⁶ Jare joco pe ñugüinoi vae reta ipuere'ã mbae jei Jesús pe cua regua.

Agüiye eguapi tenda tenondegua vae pe

⁷ Jayave Jesús uecha quiräi opaete tenta iya uparea chupe vae reta uiparavo tenda icavi vae. Jayave jei chupe reta umijaanga reve:

⁸ —Penti cuimbae uparea ndeve yave menda vae pe, agüiye eguapi tenda tenondegua vae pe. Echa'ã aramoi tenta iya uparea vi ĩru uipiu ete ndegüi vae pe —jei—. ⁹ Jayave tenta iya güeruta jocua ĩru vae ndeguapi vae pe jare jeita ndeve: 'Emee cua cuimbae pe nerenda.' Jayave nde nemarata co ndeo ndeguapi tenda taicuegua vae pe —jei—. ¹⁰ ěrei tenta iya uparea ndeve yave, ecua eguapi tenda taicuegua vae pe. Echa'ã ou yave tenta iya, aramoi jeita ndeve: 'Cheamigo, ecua eguapi penti tenda tenondegua vae pe.' Jucuaräi ndiyepiucata opaete yugüeru ucaru vaerä vae reta jovaque —jei—. ¹¹ Echa'ã ime yave quía uyembutuicha vae, uñemimichicata co. Jare ime yave quía uñemimichi vae, uyembutuichacata co —jei.

¹² Jayave Jesús jei tenta iya pe:

—Ndipota yave ndepurumingu, agüiye eparea neamigo reta jare nerentarã reta jare nerentaigua icocatu vae reta pe. Echa'ã chupe reta ndeparea yave, jae reta upareata ndeve nde ndeparea chupe reta ramo —jei—. ¹³ Èrei ndipota yave ndepurumingu, eparea iparavete vae reta jare ipo chutu vae reta jare icõcho vae reta jare jesa mbae vae reta pe —jei—. ¹⁴ Jucuarã ndiyapo yave, Tumpa nemivendiseta. Echa'ã jae reta ndarau ipuere nemingu. Èrei Tumpa umbijecoviata ndeve jupi vae reta icove ye yave yugüeru umanocue vae reta ipite güi —jei.

Cuimbae jeta vae pe uparea ucaru vaerã vae
(Mt 22.1-10)

¹⁵ Jare penti jae ndive uguapi õi mesa pe vae cua uyandu yave, jei Jesús pe:

—Tumpa iporoyocua pe ucaruta vae uyemivendiseta co.

¹⁶ Jayave Jesús jei chupe:

—Penti cuimbae uyapoca jeta tembiu jare uparea jeta vae pe ucaru vaerã. ¹⁷ Tembiu oyi ma yave, omondo jembiocui jei vaerã uparea chupe vae reta pe: 'Peyu. Echa'ã opaete uñeño ma mesa pe' —jei, jei—. ¹⁸ Èrei penti penti jei uyeyocui vae pe ipuere'ã oo ucaru vaerã. Penti vae jei chupe: 'Agua ma checorã jare icavi co aa vaerã amae jese. Jáeramo chepuere'ã aa. Ere ndepatrón pe chembiase vaerã' —jei, jei—. ¹⁹ Jare ñru vae jei chupe: 'Agua ma diez güeye. Aata amboporova reta. Jáeramo chepuere'ã aa. Ere ndepatrón pe chembiase vaerã' —jei, jei—. ²⁰ Jare ñru vae jei chupe: 'Amenda ramo ete. Jáeramo chepuere'ã aa' —jei, jei—. ²¹ Jayave uyeyocui vae ou ye ipatrón pe jare umimbeu chupe opaete cua regua. Jayave ipatrón pochi reve jei jembiocui pe: 'Ecuá voi opaete calle rupi jare eru cua pe iparavete vae reta jare ipo chutu vae reta jare icõcho vae reta jare jesa mbae vae reta' —jei, jei—. ²² Uyapo ma yave jucuarã, uyeyocui vae jei ipatrón pe: 'Patrón, ayapo ma ndeporoyocui, jare imeño ñru vae reta jendarã' —jei, jei—. ²³ Jayave ipatrón jei jembiocui pe: 'Ecuá ye opaete tape rupi jare ere nevãe chupe vae reta pe yugüeru vaerã, tinee vaerã cherenta' —jei, jei—. ²⁴ 'Echa'ã che jae peve, mbaeti penti ave jocua tenonde voi apareá chupe vae ucaruta cherenta pe' —jei, jei.

Yavai co õi oo vaerã Cristo jupé
(Mt 10.37-38)

²⁵ Jare jeta vae uyembati Jesús õi vae pe. Jayave Jesús umaee jese reta jare jei chupe reta:

²⁶ —Ime yave quía uipota oo cherupíe vae, cherau ete'ã yave tu jare ichi jare jembireco jare isambiai reta jare jentarã reta güi, jare uyerau ete yave chegiüi, ndarau ipuere ico cheremimboerã —jei—. ²⁷ Jare ime yave quía ovoí'ã icurusu oo vaerã cherupíe vae, ndarau ipuere ico cheremimboerã —jei—. ²⁸ Penti cuimbae iquirëi yave uyapo torre, uguapita rani uipapa vaerã mbovi ra jepita, uicuaa vaerã icorepoti uepitita ra opa uyapo vaerã —jei chupe reta—. ²⁹ Echa'ã uyapo'ã yave jucuarã, aramoi õñonota torre iguapicarã, èrei ndarau uepiti icorepoti opa uyapo vaerã. Jáeramo opaete uecha vae reta oyoyaita jocua cuimbae —jei—. ³⁰ Echa'ã jeita reta: 'Jocua cuimbae umbipi tõi uyapo torre, èrei ipuere'ã opa uyapo' —jeita, jei—. ³¹ Jae ramiño vi penti mburuvicha guasu iquirëi yave oo uñerãro ñru mburuvicha guasu ndive, uguapita rani ipia pe uyemingueta cavi vaerã jese, uicuaa vaerã jocua diez mil isundaro reta ipuereta ra umiamiri jocua veinte mil sundaro reta jovaicho güinoi vae —jei—. ³² Echa'ã ipia pe uyemingueta yave isundaro reta ndarau umiamiri jovaicho isundaro reta, mbiri jovaicho güi õi rambueve, omondota amocue vae reta uyerure vaerã chupe agüiye vaerã uñerãro jae ndive —jei—. ³³ Jae ramiño vi ime yave quía pepite pe opaete imbaembae ueya'ã vae, ndarau ipuere ico cheremimboerã —jei chupe reta—.

Yuqui jembochi mbae vae
(Mt 5.13; Mr 9.50)

³⁴ Yuqui icavi co yau vaerã. Èrei jembochi'ã ma yave, ¿quirãita ra jembochi ye? —jei—. ³⁵ Icavi'ã ma mbaerã. Icavi'ã yepe ivi peguardã. Yamomboño. Uipota uyandu vae tuyapisaca cua re —jei.

15

Ovecha ucañi vae
(Mt 18.10-14)

¹ Jayave uyembati Jesús oĩ vae pe jeta mburuvicha peguarã ocovara vae reta jare teco icavi mbae vae uyapo vae reta. ² Jayave fariseo reta jare mboroyocui re oporombocoe vae reta ñeenguru jese. Jae reta jei:

—Cua cuimbae uñemiñu teco icavi mbae vae uyapo vae reta ndive, jare ucaru jae reta ndive.

³ Jayave Jesús jei chupe reta umijaanga reve:

⁴ —Penti cuimbae güinoi yave cien ovecha, umicañi yave penti, ueya ñru noventa y nueve ñana pe jare oo ueca ucañi vae uvãe chupe regua —jei—. ⁵ Jare uvãe ma chupe yave, ovoi güeru ye iyatii re uyerovia reve —jei—. ⁶ Jare ou ye uvãe yave jenta pe, umbati opaete iamigo reta jare jentaigua reta, jare jei chupe reta: ‘Piyerovia che ndive. Avãe ye ma cheovecha ucañi vae’ —jei, jei—. ⁷ Che jae peve, jae ramiño vi ara pegua reta uyerovia eteta iyoa vae ueya yave iyemingueta icavi mbae vae ipia pe oĩ vae. Jucuarãita’ã uyerovia noventa y nueve ‘jupi co che’ jei vae reta re. Echa’ã jae reta jei tẽi: ‘Mbaeti anoi yemingueta icavi mbae vae chepia pe’ —jei reta, jei—.

Corepoti ucañi vae

⁸ Jae ramiño vi penti cuña güinoi yave diez corepoti, umicañi yave penti, umiendi mechero jare utupei opaete tenta rupi. Ueca cavi uvãe chupe regua —jei—. ⁹ Jare uvãe ma chupe yave, umbati opaete iamiga reta jare jentaigua reta, jare jei chupe reta: ‘Piyerovia che ndive. Avãe ye ma corepoti amicañi vae’ —jei, jei—. ¹⁰ Che jae peve, jae ramiño vi ángel Tumpa pe uyeyocui vae reta uyerovia ete iyoa vae ueya yave iyemingueta icavi mbae vae ipia pe oĩ vae —jei.

Tai ucañi vae

¹¹ Jayave Jesús jei chupe reta:

—Penti cuimbae güinoi mocui tai. ¹² Jare tai taicuegua vae jei tu pe: ‘Cheru, emee cheve añave voi mbaembae nde nemano ma yave anoita vae’ —jei, jei—. Jayave tu umbiyao imbaembae umee tai reta pe —jei—. ¹³ Jayave mbovi ara rupi tai taicuegua vae umbati umee opaete imbaembae jare oo mbiri ambie ivi pe. Joco pe uyapo jeta parea jare jucuarãi opa umingasta iyugüi opaete icorepoti —jei—. ¹⁴ Jare opa icorepoti umingasta yave, ou caruai tuicha vae jocua ivi pe, jare cuimbae mbaeti ma mbae güinoi jou vaerã —jei—. ¹⁵ Jayave oo uyerure penti patrón pe umee vaerã chupe mbaraviqui. Jayave jocua patrón omondo jenta pe umingaru vaerã cuchi reta —jei—. ¹⁶ Jare cuimbae uipota tẽi uyemingapii ivope cuchi reta jou vae pipe. Jare mbaeti quía umee chupe jou vaerã —jei—. ¹⁷ Jare cuimbae uicuaa ma quirãi uyapo iyaracuaa mbae vae uyapo vae rami. Jayave jei iyupe ipia pe: ‘Cheru umimbaraviqui vae reta jeta güinoi jou vaerã. Ërei che amanota ma aĩ yembaĩ pipe’ —jei, jei—. ¹⁸ Taa ye cua güi cheru pe jare tae chupe: ‘Cheru, cheyoa ma Tumpa coti jare ndecoti vi. ¹⁹ Jupi’ã ma aico vaerã nderairã. Emee cheve mbaraviqui ñru nemimbaraviqui vae reta pe neme rami’ —jaeta, jei, jei—. ²⁰ Jayave uñatima ye tu jenta coti.

Ërei mbiri catu oĩ rambueve, tu uecha jare uiparareco. Jayave tu osi oovãiti tai, jare uicuãva jare uyurupite —jei—. ²¹ Jayave tai jei tu pe: ‘Cheru, cheyoa ma Tumpa coti jare ndecoti vi. Jupi’ã ma aico vaerã nderairã’ —jei, jei—. ²² Ërei tu jei jembiocui reta pe: ‘Peru voi temimonde icavi vae pemondeca chupe. Jae ramiño vi piñono moãcaregua ipoãca re jare mbiapasa ipi re’ —jei, jei—. ²³ Jare peru cua pe vaca tairusu vae amingüira vae piyuca. Yacaru jare yayerovia’ —jei, jei—. ²⁴ Echa’ã tenonde yave cua cheraĩ penti umanocue vae rami co cheve, Ërei añave icove ye ma cheve. Tenonde yave ucañi chегüi, Ërei añave avãe ye ma chupe’ —jei, jei—. Jare umbipi reta uyembiyerovia —jei—.

²⁵ Jare tai tenondegua vae uparaviqui oĩ co pe. Jare ou ye oĩ yave coiño ma tenta güi, uyandu uyemimbi ñugüinoi tenta pe —jei—. ²⁶ Jayave ueni penti tu jembiocui jare upirandu chupe mbae ra co jocua uyandu vae —jei—. ²⁷ Jayave uyeyocui vae jei chupe: ‘Nderivi ou ye ma, jare nderu uyucaca vaca tairusu vae umingüira vae, tai ou ye icavi uvãe ramo’ —jei, jei—. ²⁸ Jayave tai tenondegua vae pochi jare uique’ã tenta pe. Jayave tu oẽ tenta güi jare jei tai pe uique vaerã —jei—. ²⁹ Jayave tai tenondegua vae jei tu

pe: 'Mase, jeta año ma ayeyocui ndeve. Jecuaño ayapo ndeporoyocui. Ērei neme'e'ā etei cheve capura-rai yepe, aparea vaerā cheamigo reta pe nducaru vaerā' —jei, jei—. ³⁰Jare cua nderai ico cuña aguasa rupi ico vae reta ndive jare jucarāi umingasta opaete nde neme cheupe vae. Ērei jae ou ye uvāe rupive, ndiyucaca chupe vaca tairusa vae nemingura vae' —jei, jei—. ³¹Jayave tu jei tai tenondegua vae pe: 'Cherai, jecuaño nde ndico che ndive, jare opaete chembae nembae co' —jei, jei—. ³²'Icavi co yayerovia vaerā. Echa'a tenonde yave cua nderivi penti umanocue vae rami co cheve, ērei añave icove ye ma cheve. Tenonde yave ucañi chegüi, ērei añave avāe ye ma chupe' —jei, jei.

16

Uyeyocui vae ipatrón imbaembae opa umingasta vae

¹Jare Jesús jei jemimboe reta pe: —Ico penti patrón icocatu vae jare ime güireco jembiocui. Jerācua patrón pe quirāi jembiocui opa umingasta imbaembae —jei—. ²Jayave jocua patrón ueni jembiocui jare jei chupe: '¿Mbae pa co cua nererācua cheve vae? Emimbeu cheve mbae ndiyapo opaete chembaembae ndive vae. Echa'a nomoēta co' —jei, jei—. ³Jayave uyeyocui vae jei iyupe ipia pe: '¿Mbae ra ayapota? Echa'a chepatrón chemoēta. Chepuere'a ayoo ivi corepoti amingana vaerā. Chepuere'a vi ayerue ĩru vae reta pe mbaembae re. Echa'a chemarata co' —jei, jei—. ⁴'Aicuaa ma mbae ayapota vae. Cuarāi ayapo yave, chepatrón chemoē ma yave, ĩru vae reta uyandarecota cheré' —jei, jei—. ⁵Jayave omondo umimbeu vaerā opaete ipatrón pe mbae re ipia vae reta yugüeru vaerā ipi. Jayave upirandu tenonde ou vae pe: '¿Mbovi pa ndepía chepatrón pe?' —jei, jei—. ⁶'Cien lata aceite' —jei, jei—. Jayave uyeyocui vae jei chupe: 'Co oĩ ndetupapire. Eguapi voi jare icuatía cincuenta lata' —jei, jei—. ⁷Jayave upirandu ĩru vae pe: '¿Mbovi pa ndepía chepatrón pe?' —jei, jei—. 'Cien arropa trigo' —jei, jei—. Jayave uyeyocui vae jei chupe: 'Co oĩ ndetupapire. Icuatía ochenta arropa' —jei, jei—. ⁸Jare patrón icocatu vae jei jembiocui jupi mbae vae uyapo vae pe: 'Icavi ete ndiyapo ndiyupe. Ndearacuaa co' —jei, jei—. Echa'a cua ivi pegua reta iyaracuaa ete corepoti re Tumpa pe uyeyocui vae reta güi —jei—.

⁹Che pumbiaracuaa piporu vaerā pecorepoti pembori vaerā ĩru vae reta. Jayave jae reta uyeyapota peamigo retarā. Echa'a pemaño yave, opata peeya pecorepoti. Ērei ara pe peamigo reta pembiresiveta jare joco pe picota jaeño mai pegua —jei Jesús chupe reta—. ¹⁰Ime yave quía yandepuere yarovia catu mbae michi vae re vae, yandepuere vi yarovia catu mbae tuicha vae re. Jae ramiño vi ime yave quía upurumbitavi mbae michi vae re vae, upurumbitavita vi mbae tuicha vae re —jei—. ¹¹Jáeramo Tumpa ipuere'a yave pererovia catu corepoti re, ndarau vi pererovia catu mbaembae icavi vae ara pegua re —jei—. ¹²Jare ime yave quía yandepuere'a yarovia catu ĩru vae icorepoti re vae, ndarau ñamee chupe corepoti güinoi vaerā iyupeguarā —jei—.

¹³Penti uyeyocui vae uipota yave uyeyocui mocui patrón pe, umitarēita penti patrón jare uauta ĩru vae, ani uparaviqui cavita penti patrón pe jare güirōta ĩru vae. Pepuere'a piyeyocui Tumpa pe corepoti peau reve —jei.

¹⁴Jare fariseo reta cua uyandu yave, oyoyai Jesús. Echa'a jae reta uipota ete corepoti. ¹⁵Jayave Jesús jei chupe reta:
—Pe reta piyembujupi ĩru vae reta jovaque. Ērei Tumpa uicuaa pepia pe oĩ vae. Jare yepe tēi ĩru vae reta pepiu, ērei Tumpa uicuaa piyapo vae icavi mbae co —jei—.

Mboroyocui jare Tumpa iporoyocua

¹⁶Ndei Juan ou mbove, Tumpa umimbeu yandeve yayapo vaerā mboroyocui jare Tumpa ñee aracae umimbeu vae reta jei vae. Ērei Juan umbipi umimbeu ñee icavi vae Tumpa iporoyocua regua, jare opaete vae uipota uique Tumpa iporoyocua pe —jei—. ¹⁷Ara jare ivi opata. Ērei yandepuere'a etei yambai mboroyocui —jei—.

Omombo jembireco vae
(Mt 19.1-10; Mr 10.1-12)

¹⁸Ime yave quía omombo jembireco vae, güireco yave ĩru vae jembirecorā, uyuvanga menda re. Jare ime yave quía uyemombo ma vae güireco vae, jae vi uyuvanga menda re —jei—.

Cuimbae icocatu vae jare Lázaro

¹⁹ Ico penti cuimbae icocatu vae. Jecuaeño uyemonde icavi ete jare opa ara rupi uyapoca tembíu icavi vae —jei—. ²⁰ Jare ico vi írú cuimbae Lázaro jee vae. Jae co iparavete vae. Lázaro ituyu yepai ico. Opa ara rupi uguapi cuimbae icocatu vae jonque jovai —jei—. ²¹ Lázaro uipota jou tembíu usururucue cuimbae icocatu vae imesa güi oa vae. Jare yimba reta yugüeru uere Lázaro ituyu —jei—. ²² Jare penti ara jocua cuimbae iparavete vae umano, jare ángel reta güiraa ara pe Abraham oí vae pe. Jae ramiño vi cuimbae icocatu vae umano jare uñeñotica —jei—. ²³ Jare cañitei pe cuimbae icocatuse vae uiporara ete oí. Jayave jovaiva jare uecha Abraham mbiri oí chugüi. Uecha vi Lázaro Abraham ndive —jei—. ²⁴ Jayave ineeäta reve jei: ‘Cheru Abraham, cheparareco. Embou Lázaro oñono vaerã ipoäca i pe umãqui vaerã checú. Echa'ã aiporara ete aí cua tata pe’ —jei, jei—. ²⁵ Ërei Abraham jei chupe: ‘Cheraí, nemandúa quirãí nde ndico ivi pe yave, nde nenoise mbaembae icavi vae. Jae ramiño vi Lázaro ico ivi pe yave, mbaembae icavi mbae vae uyeyapo chupe. Ërei añave jae ipiacatu oí jare nde ndiporara nei’ —jei, jei—. ²⁶ ‘Jae ramiño vi ime oí mbae ñanepãu pe yandepuere'ã yaasa vae. Jáeramo nduiporta yave ndoo pepi, ndarau orepuere. Jae ramiño vi pipota yave peyu orepi, ndarau pepuere’ —jei, jei—. ²⁷ Jayave cuimbae icocatuse vae jei Abraham pe: ‘Cua jeco pegua ayerure ndeve, cheru, nemondo vaerã Lázaro cheru jenta pe’ —jei, jei—. ²⁸ ‘Echa'ã che ime anoi pandepo cherivi reta. Emondo umimbeu vaerã chupe reta, agüiye vaerã jae reta vi yugüeru cua jasi catu noí vae pe’ —jei, jei—. ²⁹ Jayave Abraham jei chupe: ‘Ime güinoi Moisés iporoyocui jare Tumpa inee aracae umimbeu vae reta uicuatía vae. Tumingüeta reta jocua’ —jei, jei—. ³⁰ Jayave cuimbae icocatuse vae jei Abraham pe: ‘Ndarau umingueta reta, cheru Abraham. Ërei uyecuaa yave chupe reta umanocue vae, ueyata reta iyemingueta icavi mbae vae ipia pe oí vae’ —jei, jei—. ³¹ Jayave Abraham jei chupe: ‘Uipota'ã yave uyapisa Moisés iporoyocui jare Tumpa inee aracae umimbeu vae reta uicuatía vae re, ndarau uyapo Tumpa jei uyapo vaerã vae yepe tēi quía icove ye oo chupe reta umanocue vae reta ipite güi’ —jei, jei.

17

*Mbaeyoa uyapoca vae**(Mt 18.6-7, 21-22; Mr 9.42)*

¹ Jayave Jesús jei jemimboe reta pe: —Jecuaeño yugüirecota upurumbiavai vae reta. Ërei upurumbiavai vae reta uiporarata co —jei—. ² Icacvita tēi co írú vae reta uñapíti vaerã iyayu re penti ita tuicha vae umbaes pipe vae, jare omombo vaerã i guasu pe, agüiye vaerã uyapoca tēi mbaeyoa penti cheré güirovia vae pe —jei—. ³ Piñemoa ngatu. Nderivi uyapo yave icavi mbae vae ndeve, embiaracuaa. Jare jae ipiatiti yave jeco re, embiasa chupe —jei—. ⁴ Jare uyapo yave icavi mbae vae ndeve siete vese penti ara pe, jare jei yave ndeve siete vese jocua ara pe: ‘Ndarau ma ayavi ndecotí’, embiasa chupe —jei.

Mburugüirovia re

⁵ Jayave yandeYa jemimondo reta jei chupe: —Emimbeu oreve quirãí orepurugüirovia ipuere uñemíru.

⁶ Jayave yandeYa jei chupe reta:

—Aramoi pepurugüirovia michi ete penti mostaza jáicue michi-rai vae rami. Ërei jocua nunga mburugüirovia penoi yave, pepuereta pere cua ivira sicómoro jee vae pe: ‘Ecuá cua güi epita i guasu pe’, jare ivira uyapota pere vae —jei—.

Uyeyocui vae uyapo vae

⁷ Aramoi penti uyeyocui vae oo co pe umbiara vaerã ani umingarú vaerã maemimba reta. Iparaviqui opa ma uyapo yave, ou ye ipatrón jenta pe. Ërei ipatrón jei'ã etei chupe: ‘Eyu eguapi cua mesa pe ecaru.’ Jucuarãí'ã jei chupe —jei—. ⁸ Echa'ã ipatrón jei chupe: ‘Ecuá rani emboyi mbae jau vaerã. Jayave javoi pegua eru cheve cherembiurã. Jare che opa ma acaru yave, ndepuereta ndecaru’ —jei, jei—. ⁹ Jare ipatrón umee'ã etei yasurupai jembiocui pe jembiocui uyapo jei vae ramo —jei—. ¹⁰ Jae ramiño vi pe reta piyapoma vae opaete Tumpa jei peve piyapo vaerã vae, pere piyupe: ‘Ayapo'ã mbae ayembutuichaca vaerã cheYa pe. Echa'ã jaeno ayapo jupi ayapo vaerã vae.’ Jucuarãí pere —jei.

Diez cuimbae ipire ocui vae reta

¹¹ Jare Jesús ooñoi Jerusalén coti. Jayave oo uvãe Samaria jare Galilea ipãu pe. ¹² Jare oo penti tenta guasu-rai pe uvãe, jare joco pe yugüeru Jesús coti diez cuimbae ipire ocui vae reta. Ērei jae reta upita mbiri catu Jesús güi. ¹³ Jayave jae reta ifneeãta reve jei Jesús pe:

—Jesús, oporomboe vae, orepáreco.

¹⁴ Jare Jesús uecha reta yave, jei chupe reta:

—Pecua sacerdote reta pe, jae reta umae vaerã peré —jei.

Jare yugüiraa rambueve, aramoño ocui'ã ma ipire. ¹⁵ Jare penti cuimbae ou ye ñru cuimbae reta ipite güi jare ifneeãta reve jei:

—Tumpa tuyembiadoraca.

Echa'ã uicuaa ucuera ma co imbaerasi güi. ¹⁶ Jayave uyeatica Jesús jovai jare umee yasurupai chupe. Jae co Samaria pegua. ¹⁷ Jayave Jesús jei:

—Ambigüera diez cuimbae reta. Ērei nueve yugüeru'ã ye —jei—. ¹⁸ Cua pentiño ou ye umbiadora vaerã Tumpa. Jare cua judio'ã co —jei.

¹⁹ Jayave jei cuimbae pe:

—Epüa iyemboi jare ecua nerenta pe. Ndecuera ma, nderovia cheré ramo —jei.

Tumpa iporoyocua outa co

(Mt 24.23-28, 36-41)

²⁰ Jare fariseo reta upirandu Jesús pe quirãi yave ra uyecuaata Tumpa iporoyocua. Jayave Jesús jei chupe reta:

—Tumpa iporoyocua ndarau uyecuaa pe reta pesareco jese vae rupi —jei—. ²¹ Jae ramiño vi ndarau quía jei: 'Mase, co oï', ani: 'Mase, pee oï.' Echa'ã Tumpa iporoyocua ime ma pepite pe oï —jei.

²² Jayave Jesús jei jemimboe reta pe:

—Outa ara reta pipota vaerã tēi cherecha - che cuimbaerã ayeyapo vae - penti ara yepe, ěrei ndarau cherecha —jei—. ²³ Jayave ñru vae reta jeita peve: 'Mase, co oï', ani: 'Mase, pee oï.' Ērei agüiye pecua jae reta ndive —jei—. ²⁴ Tamijaanga ama uvera vae. Ama uvera vae uyecuaa opaete ara re. Jae ramiño vi che cuimbaerã ayeyapo vae ayecuaata opaete vae pe ayu ye yave —jei—. ²⁵ Ērei aiporara eteta rani jare añave yugüireco vae reta ndarau uipota aico vaerã juvicha guasurã —jei—. ²⁶ Picuaa co quirãi ivi pegua reta uyapo icavi mbae vae Noé ico rambueve. Jae ramiño vi uyapota reta icavi mbae vae che cuimbaerã ayeyapo vae ayu ye yave —jei—. ²⁷ Echa'ã Noé ico rambueve, ivi pegua reta ucaruñoi jare ucauñoi yugüireco, jecuaeño cuimbae reta umenda cuñatai reta ndive jare tu reta umee tayi reta cuimbae reta pe umenda jae ndive vaerã. Ērei penti ara Noé uique jocua chalana guasu pe. Jayave ou iporu guasu jare opa uyucuaa reta —jei—. ²⁸ Jae ramiño vi Lot ico rambueve, Sodoma pegua reta ucaruñoi jare ucauñoi jare jecuaeño ogua mbaembae jare umee mbaembae, jare jecuaeño umaeti jare uyapo jenta retarã —jei—. ²⁹ Ērei jocua ara Lot oẽ Sodoma güi yave, Tumpa ombou tata jare azufre jare opa uyucuaa Sodoma pegua reta —jei—. ³⁰ Jucuarãita vi uyeyapo che cuimbaerã ayeyapo vae ayecuaa yave —jei—.

³¹ Jocua ara ime yave penti cuimbae o cupe re oï vae, o cupe güi ugüeyi yave, agüiye tuique jo pe güiraa vaerã imbaembae. Jae ramiño vi ime yave penti cuimbae co pe oï vae, agüiye tou ye jenta pe —jei Jesús chupe reta—. ³² Pemandúa Lot jembireco pe uyeyapo vae re —jei—. ³³ Uipota uñuvatu jecove vae ndarau ipuere uñuvatu. Ērei jocua umeeta jecove vae uñuvatuta co —jei—. ³⁴ Che jae peve, jocua pïtu mocui vae uyapacuaata ñugüinoi jupa pe. Tumpa güiracata penti vae jare ñru vae upitata jupa pe —jei—. ³⁵ Jae ramiño vi mocui cuña umbaesota ñugüinoi. Tumpa güiracata penti cuña jare ñru cuña upitata —jei—. ³⁶ Jae ramiño vi mocui cuimbae ñugüinoita co pe. Tumpa güiracata penti cuimbae jare ñru cuimbae upitata co pe —jei.

³⁷ Jayave Jesús jemimboe reta upirandu chupe:

—OreYa, ¿quiape pa uyeyapota cua?

Jayave Jesús jei chupe reta:

—Umano vae jetecue oï vae pe uyembatita uruvi reta.

¹ Jare penti ara Jesús imiari ye jemimboe reta pe umijaanga reve. Uipota uicuaaca chupe reta quirāi icavi co jecuaeño uyerure vaerā Tumpa pe jare agüiye vaerā icueri chugüi. ² Jáeramo jei chupe reta:

—Ico penti tenta guasu pe penti mburuvicha upuruāa vae. Uquiye'ā Tumpa güi jare güirō iru vae reta —jei—. ³ Jae ramiño vi ico jocua tenta guasu pe penti cuña ime umano vae. Penti ara cuña ime umano vae oo mburuvicha upuruāa vae pe jare jei chupe: 'Cherepi cherovaicho güi' —jei, jei—. ⁴ Mburuvicha upuruāa vae uyapo'ā mbae uepi vaerā cuña. Ērei mbovi ara rupi jei iyupe ipia pe: 'Yepe tēi aquiyē'ā Tumpa güi jare arō iru vae reta, ⁵ Ērei cua cuña ime umano vae chemambeco ramo, aepita co. Echa'ā aepi'ā yave, jecuaeño outa chepi jare ndarau umaeño aputuu' —jei, jei.

⁶ Jayave yandeYa jei:

—Jucuarāi co jei jocua mburuvicha upuruāa vae jupi mbae vae uyapo vae. ⁷ Ērei Tumpa jupi co. Jáeramo uepita co uiparavo vae ara rupi jare pītu rupi uyerure chupe vae reta, yepe tēi aramoi ndarau uepi voi —jei—. ⁸ Che jae peve, imambae Tumpa uepita reta. Ērei che cuimbaerā ayeyapo vae ayu ye yave ivi pe, ¿imeta ra ñugüinoi upurugüirovia vae reta? —jei.

Fariseo jare mburuvicha peguarā ocovara vae

⁹ Jare Jesús oī vae pe ñugüinoi amocue uyembujupi ipiyemingueta pe vae. Jae reta güirō iru vae reta. Jare Jesús jei chupe reta umijaanga reve:

¹⁰ —Mocui cuimbae yugüiraa Tumpa jo pe uyerure vaerā Tumpa pe. Penti co fariseo jare iru vae mburuvicha peguarā ocovara vae co —jei—. ¹¹ Fariseo uyemboi jare uyerure iyupe ipia pe cuarāi: 'Tumpa, amee yasurupai ndeve. Echa'ā che aico'ā iru cuimbae reta yugüireco rami. Che apurumbitavi'ā apīro vaerā quía güi imbaembae. Ayapo'ā jupi mbae vae. Ayuvanga'ā menda re. Ayapo'ā vi jocua mburuvicha peguarā ocovara vae uyapo rami' —jei, jei—. ¹² 'Che ayecuacu tembüi güi mocui vese semana pe, jare amee ndeve diezmo opaete anoi vae güi' —jei, jei—. ¹³ Jare mburuvicha peguarā ocovara vae uyemboi oī mbiri catu fariseo güi, jare uipota'ā jovaiva. Jaeño ocua iyee ipitía re jare jei: 'Tumpa, cheparareco. Echa'ā che cheyoa vae co' —jei, jei—. ¹⁴ Che jae peve, Tumpa umbiasa mburuvicha peguarā ocovara vae pe imbaeyoa reta, jare jae oo ye jenta pe. Ērei umbiasa'ā fariseo pe imbaeyoa reta. Echa'ā ime yave quía uyembutuicha vae, uñemimichicata co. Jare ime yave quía uñemimichi vae, uyembutuichacata co —jei.

Jesús uyerure Tumpa pe sambiai reta re

(Mt 19.13-15; Mr 10.13-16)

¹⁵ Jare amocue vae güeru Jesús oī vae pe sambiai reta, Jesús oñono vaerā ipo jese reta. Ērei Jesús jemimboe reta uecha reta yave, uñeengata güeru vae reta pe. ¹⁶ Ērei Jesús ueni sambiai reta jare jei:

—Pemaño sambiai reta re yugüeru vaerā checoti. Agüiye piyopia. Echa'ā cua nunga uyeyocui Tumpa pe iporoyocua pe —jei—. ¹⁷ Añete che jae peve, pipota'ā yave Tumpa pe piyeyocui vaerā penti sambiai uipota rami, ndarau pico Tumpa iporoyocua pe —jei.

Mburuvicha icocatu vae

(Mt 19.16-30; Mr 10.17-31)

¹⁸ Jare penti mburuvicha jei Jesús pe:

—Oporomboc vae, nde ndepiacavi co. ¿Mbae pa ayapota anoi vaerā tecove opa mbae vae? —jei.

¹⁹ Jayave Jesús jei chupe:

—¿Maera pa ndere cheve chepiacavi vae co? Mbaeti quía ipiacavi, jaeño co Tumpa —jei—. ²⁰ Nde ndicuaa co mboroyocui reta: 'Agüiye iyuvanga menda re. Agüiye epuruyuca. Agüiye nemonda. Agüiye ndapu iru vae re. Ipiu nderu jare ndes!' —jei Jesús chupe.

²¹ —Ayavi'ā penti ave cua mboroyocui reta chemichi güiye —jei.

²² Jare Jesús cua uyandu yave, jei chupe:

—Ime mbae uata ndiyapo vaerā. Emee opaete mbaembae neno vae corepoti re, jare emee ndecorepoti iparavete vae reta pe, jare ndicocatuta ara pe. Jayave eyu cherupie —jei.

²³ Ērei mburuvicha cua uyandu yave, tuicha ipiatiti. Echa'ā icocatu ete co.

²⁴ Jare Jesús uecha yave mburuvicha ipiatiti upita, jei:

—Yavai ete co icocatu vae reta uique vaerā Tumpa iporoyocuia pe. ²⁵ Yavai ete icocatu vae uique vaerā Tumpa iporoyocuia pe, maemimba camello jee vae yuu jesacua rupi uasa vaerā güi —jei.

²⁶ Jayave cua uyandu vae reta jei:

—Jucuarāi yave, ¿quía pa ipuere uyembiasaca?

²⁷ Jayave Jesús jei chupe reta:

—Ivi pegua reta ipuere!ā uyembiasa. Ērei Tumpa ipuere umbiasa reta —jei.

²⁸ Jayave Pedro jei Jesús pe:

—Mase, ore opaete mbaembae ndueya, ndoyu vaerā nderupíe.

²⁹ —Añete che jae peve —jei Jesús—, ime yave quía ueya jenta, ani tu, ani ichi, ani tiquei reta, ani tivi reta, ani jembireco, ani isambiai reta Tumpa iporoyocuia jeco pegua vae, ³⁰ jeta ete jecoviata co chupe ivi pe ico rambueve, jare taicue rupi Tumpa umeeta chupe tecove opa mbae vae —jei.

Jesús umimbeu ye umanota co

(Mt 20.17-19; Mr 10.32-34)

³¹ Jayave Jesús ueni jocua doce jemimboe reta, jare jei chupe reta:

—Mase, yaa co ñai Jerusalén pe, jare opaete Tumpa iñee aracae umimbeu vae reta uicuatiacue cuimbaerā uyeyapo vae regua uyeyapota co cheve —jei—. ³² Echa!ā ĩru vae reta chemeeta judío mbae vae reta pe. Jare jae reta cheyoyaita, uyapota icavi mbae vae cheve, jare undivita cheré —jei—. ³³ Jayave chenupata chicote pe jare cheyucata. Ērei mbapi ara rupi aicove yeta ayu umanocue vae reta ipite güi —jei.

³⁴ Ērei Jesús jemimboe reta uicuaa!ā mbae ra uipota jei cua Jesús jei chupe reta vae. Yavai ete chupe reta uicuaa vaerā mbae jei vae.

Cuimbae jesa mbae vae

(Mt 20.29-34; Mr 10.46-52)

³⁵ Jare Jesús coiño ma ou Jericó güi yave, penti cuimbae jesa mbae vae uguapi uyerure oĩ mbae re tape jembei pe. ³⁶ Jae uyandu jeta vae uasa ñugüinoi jacoropi, jare upirandu mbae ra uyeyapo oĩ. ³⁷ Jayave uasa vae reta umimbeu chupe Jesús Nazaret pegua uasa oĩ.

³⁸ Jayave jesa mbae vae iñeeäta reve jei:

—Cheparareco, Jesús. Nde co jae David iñemoñaeta reta pegua —jei.

³⁹ Jeta joco pe ñugüinoi vae reta uñeengata chupe. Uipota tēi umiqui. Ērei jesa mbae vae jeiete iñeeäta reve jei:

—Nde co jae David iñemoñaeta reta pegua. Cheparareco —jei.

⁴⁰ Jayave Jesús uyemboi, jare jei joco pe ñugüinoi vae reta pe güeru vaerā jesa mbae vae. Jare jesa mbae vae ou yave Jesús oĩ vae pe, Jesús upirandu chupe:

⁴¹ —¿Mbae pa ndipota ayapo vaerā ndeve?

—Tamae, cheYa —jei.

⁴² Jayave Jesús jei chupe:

—Emae. Ndecuera ma, nderovia cheré ramo —jei.

⁴³ Jare jupivoi ipuere umae, jare oo Jesús jaicue umbiadora reve Tumpa. Jare opaete joco pe ñugüinoi vae reta vi cua uecha yave, umbiadora Tumpa.

19

Jesús jare Zaqueo

¹ Jare Jesús uique Jericó pe jare oo ye joco güi. ² Jare ico joco pe penti cuimbae Zaqueo jee vae. Jae co mburuvicha peguarā ocovara vae reta itenondegua jare jae co icocatu vae. ³ Jare Zaqueo uipota tēi uecha Jesús. Ērei ipuere!ā uecha. Echa!ā jeta vae ñugüinoi Jesús uasa vae rupi, jare Zaqueo ipucu!ā co. ⁴ Jáeramo Zaqueo osi oo penti ivira sicómoro jee vae tape jembei pe oĩ vae pe, jare uyupi jese uecha vaerā Jesús. Echa!ā Jesús uasata oĩ jacoropi. ⁵ Jare Jesús oo uvāe yave ivira oĩ vae pe, jovaiva umae jare uecha Zaqueo. Jayave jei chupe:

—Egüeyi, Zaqueo. Echa!ā añave aipota apou ndepi —jei.

⁶ Jayave Zaqueo ugüeyi voi, jare güiraa Jesús jenta pe uyerovia reve. ⁷ Jare opaete ĩru vae reta cua uecha yave, iñeenguru reve jei reta:

—Jae oo opou penti cuimbae iyoa vae pe.

⁸ Ērei Zaqueo uyemboi yandeYa jovai jare jei chupe:

—Mase, cheYa, ameeta chembaembae mbite rupi iparavete vae reta pe. Jare ime yave guá güi apĩro mbae chugüi vae, irundi ye ambijecoviata chupe —jei.

⁹ Jayave Jesús jei chupe:

—Cua ara yembiasa ou cua tenta pegua reta pe. Echa'ã nde vi co jae Abraham inemoñaeta reta pegua —jei—. ¹⁰ Echa'ã che cuimbaerã ayeyapo vae ayu aeca vaerã jare ambiasa vaerã ucañi Tumpa güi vae reta —jei.

Diez corepoti jare uyeyocui vae reta

(Mt 25.14-30)

¹¹ Jare Jesús ndive ñugüinoi vae reta cua uyandu ma yave, Jesús imiari ye chupe reta umijaanga reve. Echa'ã oo ma uvãe coiño Jerusalén güi, jare jae ndive ñugüinoi vae reta ipia pe uyemingueta tēi imambae ete co uyecuata Tumpa iporoyocua. ¹² Jáeramo Jesús jei chupe reta:

—Penti mburuvicha oota iivi güi ambie ivi mbiri oĩ vae pe uyeyapo vaerã iivi pegua reta juvicha guasurã. Jare taicue rupi ou yeta —jei—. ¹³ Jare ndei oo mbove, ueni diez jembiocui reta jare umee penti penti pe corepoti jepi ete vae, jare jei chupe reta: 'Piporu cua corepoti ayu ye regua' —jei, jei—. ¹⁴ Ērei mburuvicha jentaigua reta umitarēi mburuvicha, jare mburuvicha oo ma yave ambie ivi pe, jae reta omondo jei vaerã: 'Nduipota'ã jocua cuimbae ico vaerã oreruvicha guasurã' —jei reta, jei—.

¹⁵ Ērei mburuvicha uyeyapo jentaigua reta juvicha guasurã. Jayave ou ye uvãe iivi pe jare ueni jembiocui corepoti umee chupe vae reta uyembati vaerã, jae uicuaa vaerã mbovi ra penti penti umingana —jei—. ¹⁶ Penti jembiocui jei chupe: 'Patrón, amimbaraviqui corepoti neme cheve vae, jare añave anoi diez corepoti' —jei, jei—. ¹⁷ Jayave ipatrón jei jocua jembiocui pe: 'Icavi ndiyapo. Nde co jae cherembiocui icavi vae. Cua amee ndeve vae mboviño. Ērei nemimbaraviqui cavi. Jáeramo che toroñoño diez tenta guasu pegua reta juvicharã' —jei, jei—. ¹⁸ Jayave ĩru jembiocui jei chupe: 'Patrón, amimbaraviqui corepoti neme cheve vae, jare añave anoi pandepo corepoti' —jei, jei—. ¹⁹ Jayave ipatrón jei jocua jembiocui pe: 'Icavi ndiyapo. Che toroñoño pandepo tenta guasu pegua reta juvicharã' —jei, jei—. ²⁰ Jayave ĩru jembiocui jei chupe: 'Mase, patrón, co oĩ corepoti neme cheve vae. Ayapicua añuvatu ndeve' —jei, jei—. ²¹ 'Echa'ã aquiye ndegüi ndepiapochi ramo. Nde nepĩro mbaembae ĩru vae reta güi jare ndeviro ĩru vae reta oñoti vae' —jei, jei—. ²² Jayave ipatrón jei jocua jembiocui pe: 'Nde ndere vae rupi etei che nuãata co. Nde co jae cherembiocui icavi mbae vae. Ndicuaa chepiapochi co jare quirã apĩro mbaembae ĩru vae reta güi jare quirã avairo ĩru vae reta oñoti vae' —jei, jei—. ²³ '¿Maera pa nderaa'ã checorepoti banco pe? Echa'ã jucuarã ndiyapo yave, ayu ye yave nemeeta tēi co cheve corepoti amee ndeve vae jare mbovi ye banco pegua reta umĩruta tēi jae ndive vae' —jei, jei—. ²⁴ Jayave ipatrón jei ĩru jembiocui joco pe ñugüinoi vae reta pe: 'Pepĩro chugüi jocua corepoti jare pemee jocua diez corepoti güinoi vae pe' —jei, jei—. ²⁵ Ērei jae reta jei ipatrón pe: 'Patrón, jae güinoi ma diez corepoti.' ²⁶ 'Añete co' —jei ipatrón chupe reta, jei—. 'Ērei che jae peve, güinoi vae pe uñemĩruta, jare mbaeti güinoi vae güi mbovi ete güinoi vae uyeequita' —jei, jei—. ²⁷ 'Ērei peru cua pe jocua cherovaicho reta. Jae reta uipotã che aico vaerã juvicha guasurã. Piyuca cherovaque' —jei, jei.

Jesús oo Jerusalén pe

(Mt 21.1-11; Mr 11.1-11; Jn 12.12-19)

²⁸ Jare Jesús cua jei ma chupe reta yave, uguata ye ĩru vae reta jenonde oo Jerusalén coti. ²⁹ Jare yugüiraa uvãe coiño tenta guasu-rai reta Betfagé jare Betania güi. Joco pe oĩ ivitu guasu Olivos. Jayave Jesús oyocui mocui jemimboe reta.

³⁰ —Pecua pea tenta guasu-rai yanderovai oĩ vae pe —jei chupe reta—. Peo pevãe rupive, pevãeta penti mburica tairusu vae uñeñapiti oĩ. Ndei ave etei quãa opo jese. Piyora jare peru —jei—. ³¹ Jare ime yave quãa jei peve vae: '¿Maera pa piyora?' pere chupe cuarã: 'YandeYa uipota uiporu' —pere, jei.

³² Jayave Jesús omondo vae reta yugüiraa, jare uvãe mburica tairusu vae Jesús umimbeu chupe reta rami. ³³ Jare oyora ñugüinoi yave, mburica iya reta upirandu chupe reta:

—¿Maera pa piyora peĩ mburica?

³⁴—YandeYa uipota uiporu —jei reta.

³⁵Jayave güeru reta mburica tairusu vae Jesús oĩ vae pe. Jayave Jesús jemimboe reta oñoño iyasoya mburica icupe re, jare Jesús opo jese. ³⁶Jare Jesús oo rambueve Jerusalén coti, joco pe ñugüinoi vae reta uipiso iyasoya tape rupi mburica jenonde.

³⁷Jare umbipi reta ugüeyi ivitu guasu Olivos güi. Coiño ma yugüeru Jerusalén güi. Jayave opaete Jesús jemimboe reta umbipi uyerovia. Umbiadora reta Tumpa iñeeäta reve opaete miacañi uecha Jesús uyapo vae reta re. ³⁸Jare jei reta:

—Tuyembiadoraca yandeRuvicha Guasurã yandeYa jee re ou vae. Mbiacatu toĩ ara pe. Ara pegua reta tumbiadora Tumpa —jei reta.

³⁹Jare amocue fariseo reta jeta vae ipite pe ñugüinoi vae jei Jesús pe:

—Oporomboe vae, iñeengata nderemimboe reta pe.

⁴⁰Èrei Jesús jei chupe reta:

—Che jae peve, cua reta quĩ yave, jupivoiño ita reta uyeminguetata iñeeäta reve —jei.

⁴¹Jare Jesús coiño ma Jerusalén güi ou uvã yave, umae Jerusalén re jare umbipi uyao. ⁴²Jare jei:

—Ndicuaa'ã quirã ra ndepuere neni mbiacatu. Cua ara reta pe ndicuaata tẽi co. Èrei añave ndarau ndicuaa —jei—. ⁴³Outa ma uvã nderovaicho reta nequẽse vaerã jare ndarau umaẽño ndepite pe yugüireco vae reta re oẽ vaerã ndegüi —jei—. ⁴⁴Jare jae reta opata nembusururu jare uyucata opaete ndepite pe yugüireco vae reta. Ndarau ueya reta penti ita ñru ita iárambo, ndicuaa'ã Tumpa umeeta tẽi mbiacatu ndeve ramo —jei.

Jesús Tumpa jo pe uyapo vae

(Mt 21.12-17; Mr 11.15-19; Jn 2.13-22)

⁴⁵Jayave Jesús uique Tumpa jo pe, jare umbipi omõẽ joco güi umaemee vae reta jare mbae ogua vae reta. ⁴⁶Jare jei chupe reta:

—Tumpa iñee pe uyecuatía oĩ cuarãi: 'Chero co jae piyerure cheve pipe vae.' Jucuarãi uyecuatía oĩ. Èrei pe reta piyapo ma imonda vae reta iñemia rami —jei.

⁴⁷Jayave Jesús oporomboe Tumpa jo pe opa ara rupi. Èrei sacerdote reta itenondegua reta jare mboroyocui re oporomboe vae reta jare tenta guasu pegua reta itenondegua reta ueca quirã ipuere uyucaca vaerã Jesús. ⁴⁸Èrei uicuaa'ã reta quirãita ra uyucaca. Echa'ã opaete tenta guasu pegua reta uipota ete uyapisaca Jesús re.

20

Jesús imbaepuere

(Mt 21.23-27; Mr 11.27-33)

¹Jare penti ara Jesús oporomboe oĩ Tumpa jo pe, jare umimbeu joco pe ñugüinoi vae reta pe ñee icavi vae. Jayave yugüeru vi joco pe sacerdote reta itenondegua reta jare mboroyocui re oporomboe vae reta jare tenta guasu pegua reta itenondegua reta.

²Jayave jae reta jei Jesús pe:

—Emimbeu oreve, ¿mbae nunga mbaepuere pa neni cua mbaembae ndiyapo vaerã? ¿Quía pa umee ndeve mbaepuere cua ndiyapo vaerã? —jei reta.

³Jayave Jesús jei chupe reta:

—Che vi tapirandu peve mbae re. Yaecha pepuere pemimbeu cheve —jei—. ⁴¿Quía pa ombou Juan upurumbibautiza vaerã? ¿Tumpa pa ombou? ani ¿ivi pegua reta pa ombou? —jei.

⁵Jayave jae reta jei uyupe:

—Yae yave: 'Tumpa co ombou', jae jeita yandev: 'Jucuarãi yave, ¿maera pa perovia'ã?'

⁶Èrei yae yave: 'Ivi pegua reta co ombou', opaete tenta guasu pegua reta yandepita ita pe yandeyuca. Echa'ã jae reta güirovia Juan co jae penti Tumpa iñee umimbeu vae —jei reta.

⁷Jáeramo jei reta Jesús pe:

—Nduicuaa'ã quía ra ombou Juan.

⁸Jayave Jesús jei chupe reta:

—Che vi ndarau amimbeu peve mbae nunga mbaepuere anoi cua mbaembae ayapo vaerã —jei.

*Co iporúa icavi mbae vae reta
(Mt 21.33-44; Mr 12.1-11)*

⁹Jayave Jesús umbipi imiari joco pe ñugüinoi vae reta pe umijaanga reve.

—Penti cuimbae oñoti jeta uva ico pe. Jayave uiporuca ico ñru vae reta pe, jae reta uyandareco vaerã jese. Jayave co iya oo mbiri ambie ivi pe upita vaerã ima pegua —jei—.

¹⁰Jare uva yagüiye ma yave, co iya ombou penti jembiocui co iporúa reta pe, jae reta umbiyao vaerã tẽi uva chupe reta, iya güinoi vaerã imbaerã. Ërei co iporúa reta uinupa co iya jembiocui, jare omondo ye. Umee'ã etei chupe güiraa vaerã —jei—. ¹¹Jayave co iya ombou ye tẽi ñru jembiocui. Ërei co iporúa reta uinupa jare uyapo icavi mbae vae chupe, jare omondo ye. Umee'ã etei chupe güiraa vaerã —jei—. ¹²Jayave co iya ombou ye tẽi ñru jembiocui. Ërei co iporúa reta umbipere, jare omondo ye —jei—. ¹³Jayave co iya jei iyupe: '¿Mbae ra ayapota? Amondota cherai aau ete vae. Aramoï jae reta uipiuta cherai' —jei, jei—. ¹⁴Ërei co iporúa reta uecha yave co iya tai, jei reta uyupe: 'Cua co jae iyarã vae. Yaa yauca, jare yande yaicota co iyarã' —jei reta, jei—. ¹⁵Jayave jae reta omombo co güi, jare uyuca.

Jáeramo ¿mbae ra uyapota co iya jocua co iporúa reta pe? —jei—. ¹⁶Outa, opa uyuca vaerã jocua co iporúa reta, jare uiporucata ico ambie vae reta pe —jei.

Jayave cua uyandu vae reta jei:

—Tumpa mona jei agüiye uyeyapo.

¹⁷Jayave Jesús umae jese reta jare jei:

—¿Mbae ra uipota jei cua Tumpa iñee pe uyecuatía oï vae?

'Ita tenta iyapota reta omombo vae uyeyapo ma ita tenondegua vae.'

¹⁸Ime yave quía jocua ita re uyepiaca vae, uñemopëta co. Jare ime yave quía jocua ita oa jese vae, opata umbiperasoraso —jei.

¹⁹Jayave jupivoi sacerdote reta itenondegua reta jare mboroyocui re oporombocoe vae reta uipota tẽi uipisi Jesús. Echa'ã uicuaa cua Jesús umijaanga reve jei vae uicuaaca quirãï jae reta teco güinoi. Ërei uquiye tenta guasu pegua reta güi.

*¿Jupi pa yambiepi vaerã César pe?
(Mt 22.15-22; Mr 12.13-17)*

²⁰Jare jecuaño jae reta umae Jesús re. Jare omondo vi ñru vae reta uipiãro vaerã Jesús. Cua reta uipota tẽi umbitavi Jesús, Jesús ipia pe uyemingueta vaerã tẽi jae reta jupi co. Ërei jae reta uipota tẽi umbijeco mbae jei vae re, uñeapo vaerã jese mburuvicha pe. ²¹Jayave jae reta jei Jesús pe:

—Oporombocoe vae, nduicuaa nde ndere vae jare ndeporombocoe jese vae añete co. Nde nembutuicha'ã penti ave ñru vae güi. Nde ndeporombocoe cavi quirãï Tumpa uipota yaico vaerã vae re —jei reta—. ²²César yandecocui yambiepi vaerã chupe corepoti pe. ¿Jupi pa yambiepi vaerã chupe? ani ¿jupi'ã pa? —jei reta.

²³Ërei Jesús uicuaa jae reta uipota tẽi co umbitavi, jare jei chupe reta:

—¿Maera pa pipota piyavica cheve? ²⁴Peru cheve penti corepoti taecha —jei—. ¿Quía jova ña pa cua? ¿Quía jee pa cua uyecuatía oï vae? —jei.

—Cua César imbae co —jei reta.

²⁵Jayave Jesús jei chupe reta:

—Pemeé César pe César pegua, jare pemee Tumpa pe Tumpa pegua —jei.

²⁶Jare jae reta ipuere'ã umbijeco Jesús mbae jei vae re tenta guasu pegua reta jovaque. Ipiacañi cua jei vae re, jare jei'ã ye mbae ave chupe.

*¿Icove yeta pa umanocue vae reta?
(Mt 22.23-33; Mr 12.18-27)*

²⁷Jayave yugüeru Jesús oï vae pe amocue saduceo reta. Opaete saduceo reta jei umanocue vae reta icove ye'ã co. Saduceo yugüeru vae reta jei Jesús pe:

²⁸—Oporombocoe vae, Moisés uicuatía ueya yandeve cuarãï: 'Penti tiquei vae umano yave, jembirecocue mbaeti imembi chupe yave, cuimbae amiri tiví tumenda jocua cuña ndive. Jayave cuña imembi yave, cuimbae tumbijee sambiai tiquei amiri jee pe.' Jucuarãï uicuatía Moisés —jei reta—. ²⁹Ico penti cuimbae seis tiví reta güinoi vae. Cua cuimbae umenda, jare umano umimembi mbae reve. ³⁰Cuimbae amiri jaicue rupigua umenda jembirecocue ndive, Ërei umano vi umimembi mbae reve. ³¹Jayave jaicue rupigua ye

umenda cuña ndive, jare umano vi umimembi mbae reve. Opaete siete reve umenda jocua cuña ndive, jare opaete siete reve umano umimembi mbae reve —jei reta—. ³² Taicove rupi cuña umano vi. ³³ Jayave umanocue vae reta icove ye yave, ¿quía nunga vae jembirecorã pa icota jocua cuña? Echa'ã opaete siete reve umenda jae ndive —jei reta.

³⁴ Jayave Jesús jei chupe reta:

—Cua ivi pe yugüireco rambueveño cuimbae reta umenda cuña reta ndive jare cuña reta umenda cuimbae reta ndive. ³⁵ Èrei icavita co Tumpa pe umbijecove ye vaerã amocue vae güeru umanocue vae reta ipite güi. Jae reta yugüireco yeta co, èrei cuimbae reta ndarau umenda cuña reta ndive jare cuña reta ndarau umenda cuimbae reta ndive icove reta ye yave —jei—. ³⁶ Jae ramiño vi ndarau umano ye. Echa'ã yugüirecota ángel reta yugüireco rami. Yugüirecota Tumpa tai retarã. Echa'ã Tumpa umbijecove yeta güeru umanocue vae reta ipite güi —jei—. ³⁷ Tamimbeu peve umanocue vae reta regua. Icove yeta co. Moisés uicuaaca cua uicuatía yave jocua yai jendi vae regua. Echa'ã Moisés umimbeu quirã yandeYa Tumpa jei: 'Che co jae Abraham, Isaac jare Jacob iTumpa.' Cua umimbeu Moisés —jei—. ³⁸ Echa'ã Tumpa mbaeti co umanocue vae reta iTumpa. Jae co tecove güinoi vae reta iTumpa. Yepe tẽi ñamano, yanderecove imeño oĩ —jei.

³⁹ Jayave amocue mboroyocui re oporomboe vae reta jei Jesús pe:

—Oporomboe vae, icavi ndere.

⁴⁰ Jare jocua güive quiyiye reta upirandu vaerã chupe mbae re.

¿Quía inemoñaeta reta pegua pa co Cristo?

(Mt 22.41-46; Mr 12.35-37)

⁴¹ Jayave Jesús upirandu joco pe ñugüinoi vae reta pe:

—¿Maera pa jei mboroyocui re oporomboe vae reta Cristo co jae David inemoñaeta reta pegua? ⁴² Echa'ã David etei jei Salmo reta pe cuarã:

'YandeYa Tumpa jei cheYa pe:

Eguapi cheyipí pe cheacata coti,

⁴³ nderovaicho reta opa amiamiri regua' —jei Tumpa.

Jucuarã jei David —jei—. ⁴⁴ ¿Maera pa jei reta Cristo co jae David inemoñaeta reta pegua? Echa'ã David etei jei chupe: 'CheYa' —jei.

Jesús umbijeco mboroyocui re oporomboe vae reta

(Mt 23.1-36; Mr 12.38-40; Lc 11.37-54)

⁴⁵ Jayave Jesús jei jemimboe reta pe opaete joco pe ñugüinoi vae reta jovaque:

⁴⁶ —Piñemoa ngatu mboroyocui re oporomboe vae reta güi. Jae reta jecuaeño uipota uguata jemimonde pucu vae reve, jare uipota ñru vae reta pe uyembisaludaca vaerã calle reta rupi. Jare yugüiraa vae tupao pe jare para pe, jecuaeño uipota uguapí tenda tenondegua vae reta pe —jei—. ⁴⁷ Jae reta upiro cuña ime umano vae reta güi opaete imbaembae, jare pucu uyerure Tumpa pe upurumbitavi vaerã. Jae reta uiporara eteta co —jei.

21

Cuña ime umano vae umee corepoti Tumpa pe

(Mr 12.41-44)

¹ Jare Jesús Tumpa jo pe oĩ yave, uecha icocatu vae reta oñono icorepoti corepoti jiru pe. ² Jare uecha vi penti cuña ime umano vae iparavete vae oñono mocui riare corepoti jiru pe. ³ Jayave Jesús jei:

—Añete che jae peve, cua cuña ime umano vae iparavete vae uyapo jeta ete opaete ñru oñono vae reta güi. ⁴ Echa'ã opaete ñru reta güeru oñono mbovi jeta güinoi vae güi. Èrei cua cuña, yepe tẽi iparavete, oñono opaete güinoi vae. Jocua co jembú jepirã tẽi vae —jei chupe reta.

Tumpa jo uyeitita

(Mt 24.1-2; Mr 13.1-2)

⁵ Jare amocue vae uyemingueta ñugüinoi Tumpa jo re. Jei reta icavi ete co ita reta jare mbaembae tenta guasu pegua reta güeru omopõra vaerã vae. Jayave Jesús jei:

6 —Outa co uvãe ara cua o reta añave peecha vae uyeiti vaerã. Ndarau upita penti ave ita ñru ita iárambo —jei.

*Mbaesusere reta uyeyapota vae
(Mt 24.3-28; Mr 13.3-23)*

7 Jayave Jesús jemimboe reta upirandu chupe:

—Oporomboe vae, ¿quirãï yave pa cua uyeyapota? Jare opaete cua uyeyapota ma yave, ¿quirãita pa nduicuaa? —jei reta.

8 Jayave Jesús jei chupe reta:

—Piñemoa ngatu agüiye vaerã petavi. Echa'ã yugüeruta jeta cheree pe uyembijeeta vae reta. Jare reta jeita: 'Che co jae Cristo. Outa co uvãe jocua ara reta' —jeita, jei—. Ërei agüiye piñemiñru jae reta ndive —jei—. 9 Imeta co ñerãro reta jare tecorai reta. Ërei piyandu yave cua reta regua, agüiye pequiye. Cua susere reta uyeyapoñotai co. Ërei cua susere reta ndei ave co opa vaerã —jei—.

10 Penti ivi pegua reta uñerãrota ambie ivi pegua reta ndive, jare mburuvicha reta uñerãrota ñru mburuvicha reta ndive. 11 Jare ivi tanta ucãtata jeta que rupi. Jare imeta caruai reta jare mbaerasi reta jeta vae uyucata vae. Jare mbaembae ara re uyecuaata vae upuruminguïyeta co —jei—. 12 Ërei ndei cua uyeyapo mbove, ñru vae reta pepisita jare uyapota icavi mbae vae peve. Jare reta pereraata itupao reta pe jare peñonota peresoriru pe, jare pereraata mburuvicha guasu reta jovai chereco pegua —jei—. 13 Ërei jucuarãï uyapo reta peve yave, pepuereta pemimbeu cheregua —jei—. 14 Agüiye piyemipia'ã cua re jare agüiye pepia pe piyemingueta mbae ra pereta vae —jei—. 15 Echa'ã che aicuaacata peve mbae pere vaerã, jare che pumbiaracuata agüiye vaerã perovaicho reta uicuaa mbae ra ipuere jei peve —jei—. 16 Jare peru jare pesi, jare periquei reta jare perivi reta, jare perentarã reta jare peamigo reta pemeeta perovaicho reta pe, jare amocue pe reta piyeyucacata co —jei—. 17 Jare piñemitarëicata opaete vae pe chereco pegua. 18 Ërei ndarau penti ave pea ucañi —jei—. 19 Jare perõsa peo pevãe iyapi pe yave, piyembiasacata co —jei—.

20 Jare peecha jeta sundaro reta Jerusalén oñova yave, picuaata ou ma co uvãe Jerusalén uyembai vaerã —jei—. 21 Jayave Judea pe ñugüinoi vae reta tosi ivitu guasu coti. Jare Jerusalén pe ñugüinoi vae reta toë tosi joco güi. Jare jocua coiño Jerusalén güi ñugüinoi vae reta agüiye tuyugüiraa Jerusalén pe —jei—. 22 Echa'ã jocua ara reta pe ivi pegua reta uiporara eteta, jare opaete Tumpa iñee pe uyecuatía oï vae uyeyapota co —jei chupe reta—. 23 Jare ipurúa vae reta jare umicambu vae reta uiporara eteta jocua ara reta pe. Echa'ã cua ivi pegua reta uiporara eteta. Echa'ã Tumpa uiporacata co chupe reta —jei—. 24 Jare jei cua ivi pegua reta uyeyucacata quisepucu pe. Jare jovaicho reta güiraata jeta cua ivi pegua reta ambie ivi reta pe. Jare judío mbae vae reta yugüirecota Jerusalén pe judío mbae vae reta iara reta opa regua —jei Jesús chupe reta—.

*Cuimbaerã uyeyapo vae ou yeta
(Mt 24.29-44; Mr 13.24-37)*

25 Jayave ivi pegua reta uechata mbae uyecuaa oï guarasi jare yasi jare yasitata reta re. Jare opaete ivi pegua reta uiporarata jare ndarau uicuaa mbae uyapo vaerã. Jare i guasu reta jiapu eteta —jei—. 26 Jare ivi pegua reta uquiye eteta. Uquiye eteta mbae ivi pe uyeyapo oï vae güi. Jare ara re mbaepuere güinoi vae reta ucãtata —jei—. 27 Jayave ivi pegua reta cherechata ayu amapitu reve. Che cuimbaerã ayeyapo vae anoita mbaepuere tuicha vae, jare ayembidoracata opaete vae pe —jei—. 28 Jare opaete cua mbaembae umbipi uyeyapo yave, piñemiatangãtu. Echa'ã imambae Tumpa perezepita —jei chupe reta.

29 Jayave Jesús jei chupe reta umijaanga reve:

—Tamijaanga iva jare opaete ivira reta. 30 Uyembipi joqui yave, picuaa uyaro ma co ama oqui vaerã —jei—. 31 Jae ramiño vi pe reta peecha yave cua mbaembae uyeyapo ñugüinoi vae, picuaata coiño ma co ou Tumpa iporoyocua —jei Jesús chupe reta—.

32 Añete che jae peve, cua ivi pe añave yugüireco vae reta ndarau opa umano ndei opaete cua mbaembae uyeyapo mbove —jei—. 33 Ara jare ivi opata, Ërei chiñee ndarau opa —jei—.

³⁴ Piñemoa ngatu, agüiye vaerã pecau jare pesavipo, jare agüiye vaerã piyemipia'ã mbaembae ivi pegua re. Echa'ã jucuarã piyapo yave, outa uvãe jocua ara peãro mbae peĩ reve —jei chupe reta—. ³⁵ Echa'ã jocua ara uipocouta opaete ivi pegua reta ñuai oporomboa rami —jei—. ³⁶ Jáeramo piñemoa ngatu, jare jecuaeño piyerure Tumpa pe icavi vaerã chupe perepi vaerã opaete cua uyeyapota vae güi jare piyemboi vaerã cherovai. Che co jae cuimbaerã uyeyapo vae —jei.

³⁷ Jare opa ara rupi Jesús oporomboe oĩ Tumpa jo pe. Ērei caaru ma yave oo joco güi upita ivitu guasu Olivos re. ³⁸ Jare opaete tenta guasu pegua reta yugüeru neimbove asi Tumpa jo pe uyapisaca vaerã Jesús re.

22

Uipota reta uyucaca Jesús

(Mt 26.1-5, 14-16; Mr 14.1-2, 10-11; Jn 11.45-53)

¹ Jare pascua uyaro ma oĩ. Jocua ara pe judío reta jou mbiyape ovu mbae vae. ² Jayave sacerdote reta itenondegua reta jare mboroyocui re oporomboe vae reta ueca ñugüinoi quirã ipuere uyucaca Jesús. Ērei uquiye tenta guasu pegua reta güi.

³ Jayave Satanãs etei oya Judas Iscariote re - Judas co jae jocua doce vae güi penti. ⁴ Jayave Judas oo sacerdote reta itenondegua reta jare Tumpa jo re uyandareco vae reta ñugüinoi vae pe uyemingueta vaerã jae reta ndive quirã ra ipuere umee Jesús chupe reta. ⁵ Jayave jae reta uyerovia, jare jei Judas pe umeeta co chupe corepoti. ⁶ Jayave Judas jei chupe reta umeeta co Jesús chupe reta. Jayave umbipi ueca quirã ipuere umee Jesús chupe reta tenta guasu pegua reta mbaeti Jesús ndive ñugüinoi yave.

Jesús ucaru jemimboe reta ndive

(Mt 26.17-29; Mr 14.12-25; Jn 13.21-30; 1 Cor 11.23-26)

⁷ Jare ou uvãe pascua. Jocua ara judío reta jecuaeño uyuca ovecha jare umbipi jou mbiyape ovu mbae vae. ⁸ Jayave Jesús jei Pedro jare Juan pe:

—Pecua piyapicatu yau vaerã tembú pascua pegua.

⁹ Jayave jei reta chupe:

—¿Quiape pa ndipota nduyapicatu vaerã?

¹⁰ —Mase, peo pevãe yave tenta guasu pe, peovãitita penti cuimbae i güiraa iru pe vae —jei—. Pecua jaicue. Jae uiqueta penti tenta pe. Pique vi pe reta —jei—. ¹¹ Jayave pere tenta iya pe: 'Oporomboe vae jei: ¿Quiape pa ime oĩ o, joco pe jau vaerã tembú pascua pegua cheremimboe reta ndive' —jei, pere chupe, jei Jesús—. ¹² Jayave tenta iya uechacata peve penti o tuicha vae jo ivate pe, opaete mbaembae yaiporuta vae reve. Joco pe piyapicatu yandev —jei.

¹³ Jayave Pedro jare Juan yugüiraa jare uvãe Jesús jei chupe reta rami. Jare uyapo reta tembiu pascua pegua Jesús jare jemimboe reta jou vaerã. ¹⁴ Jare ora ou ma uvãe yave, Jesús uguapi mesa pe jocua doce jemimondo reta ndive. ¹⁵ Jayave jei chupe reta:

—Chequirẽi ete jau cua tembú pascua pegua pe reta ndive, ndei amano mbove. ¹⁶ Che jae peve, ndarau ye jau, opaete cua uyemijaanga jese vae Tumpa iporoyocua pe uyeyapo regua —jei.

¹⁷ Jayave Jesús uipisi copa, jare umee yasurupai Tumpa pe. Jayave jei:

—Opaete pe reta peu cua vino. ¹⁸ Che jae peve, ndarau ye jau vino, Tumpa iporoyocua ou regua —jei.

¹⁹ Jayave Jesús uipisi mbiyape, jare umee yasurupai Tumpa pe. Jayave upisãa mbiyape jare umee chupe reta.

—Cua co jae cherete —jei—. Añemeeta amano vaerã peré. Peu cua cheré pemandúa vaerã —jei.

²⁰ Jae ramiño vi uipisi copa, opa ma ucaru reta yave, jare jei:

—Cua vino co jae Tumpa jei piãu ye vae cherugüi pe ayapota vae. Cherugüi uyepiyereta peré —jei—.

²¹ Ērei yandepite pe uguapi oĩ cheroaicho reta pe chemeeta vae —jei—. ²² Añete co, che cuimbaerã ayeyapo vae amanota. Cua Tumpa jei vae co. Ērei jocua cuimbae chemeeta vae uiporarata co —jei.

²³ Jayave jemimboe reta umbipi upirandu uyupe quã ra uyapota chupe jucuarã.

¿Quía pa icota tenondeguarã vae?

²⁴ Jare Jesús jemimboe reta umbipi uyemingueta uyupe quía ra icota tenondeguarã vae. ²⁵ Jayave Jesús jei chupe reta:

—Ivi pegua reta juvicha guasu reta oyocui reta. Jare jae reta uipota ñru vae reta jei icavi vae jesegua —jei—. ²⁶ Ērei pepite pe icavi'ã jucuarã piyapo vaerã. Ime yave quía pepite pe uipota ico vaerã tenondeguarã vae, tuyeyapo penti tairusu vae ñru vae reta pe uyeyocui vae rami —jei—. ²⁷ Mesa pe uguapi ucaru vaerã vae co tenondegua tembiu güeru vae güi. Ērei che aico pepite pe ayeyocui peve vaerã —jei—.

²⁸ Pe reta jecuaeño pepita che ndive opaete cua aiporara rambueve —jei—. ²⁹ Jare che puparavo ma pico vaerã Tumpa iporoyocui pe, cheRu cheparavo rami —jei chupe reta—. ³⁰ Jáeramo pecaruta chemesa pe cheporoyocua pe. Jae ramiño vi penoita mbaepuere peã vaerã jocua doce ati Israel pegua reta —jei—.

Pedro uicuacuta Jesús

(Mt 26.31-35; Mr 14.27-31; Jn 13.36-38)

³¹ Simón, Simón, mase, Satanás uipota tēi güinoi mbaepuere peré, trigo yambiveve vae rami —jei—. ³² Ērei che ayerure Tumpa pe nderé jecuaeño neno vaerã mburugüirovia. Jare ndiyerova ye yave Tumpa coti, embori nderivi reta ipirãta vaerã ipurugüirovia re —jei—.

³³ Jayave Pedro jei Jesús pe:

—CheYa, apitata co nde ndive, peresoriru pe neñoeta reta yave. Ndarau ndueya, yepe tēi aramoi ñru vae reta cheyuca —jei—.

³⁴ —Che jae ndeve, Pedro —jei Jesús—, ndei uru cuimbae ñee mbove, mbapi vese ma checuacuta —jei—.

Añave peraa mbaembae

³⁵ Jayave Jesús jei jemimboe reta pe:

—Che pomondo yave chiñee peraa vaerã, amimbeu peve agüiye vaerã peraa corepoti, jare peurupucu, jare pepipasa. ¿Uata pa mbae peve? —jei—.

—Uata'ã —jei reta.

³⁶ Jayave jei chupe reta:

—Ērei añave tamimbeu peve cua: Corepoti penoi yave, peraa. Jae ramiño vi peurupucu penoi yave, peraa. Jare mbaeti yave penoi quisepecu, pemee peremimonde pegua vaerã quisepecu —jei—. ³⁷ Echa'ã che jae peve, uyeyapota co cheve Tumpa ñee pe uyecuatía oĩ vae. Echa'ã uyecuatía oĩ cuarã: 'Ñru vae reta jei tēi vi co penti icavi mbae vae.' Jucuarã uyecuatía oĩ. Jare opaete cheré uyecuatía oĩ vae uyeyapota co cheve —jei—.

³⁸ Jayave jae reta jei chupe:

—Mase, oreYa, ime nonoi mocui quisepecu.

—Icaviño ma co —jei chupe reta.

Jesús uyerure Getsemaní pe

(Mt 26.36-46; Mr 14.32-42)

³⁹ Jayave Jesús oē o güi oo vaerã ivitu guasu Olivos pe jae jecoño mai rami. Jare jemimboe reta vi yugüiraa jae ndive. ⁴⁰ Jare oo uvãe yave upita vae pe, Jesús jei jemimboe reta pe:

—Piyerure Tumpa pe agüiye vaerã peyoa.

⁴¹ Jayave Jesús usiri catu chugüi reta, jare uyeatica uyerure Tumpa pe.

⁴² —CheRu —jei—, nde ndipota yave, embiãsa chegüi cua aiporarata vae. Ērei tuyeyapo cheve nde ndere vae. Agüiye tuyeyapo che jae vae —jei—.

⁴³ Jayave uyecuaa Jesús pe penti ángel ara güi ou vae umimirãta vaerã. ⁴⁴ Jesús uiporara ete oĩ, jare jeiete uyerure Tumpa pe. Jeta ipireipo oĩ. Tugüi rami utiqui ivi pe.

⁴⁵ Jare Tumpa pe uyerure ma yave, upña ye jare ou ye jemimboe reta ñugüinoi vae pe. Uecha oque ñugüinoi ipiatiti güi. ⁴⁶ Jayave Jesús jei chupe reta:

—¿Maera pa peque pei? Pepña piyerure Tumpa pe, agüiye vaerã peyoa —jei—.

Uipisi reta Jesús

(Mt 26.47-56; Mr 14.43-50; Jn 18.2-11)

⁴⁷ Jare uyemingueta oĩ rambueve, uyecuaa jeta vae. Jare Judas - jae co jocua doce vae güi penti - ou jocua jeta vae jenonde. Jayave ou uvãe Jesús oĩ vae pe, jare uyurupite.

⁴⁸ Jayave Jesús jei chupe:

—Judas, ¿penti yurupite rupi pa chemee cua reta pe?

⁴⁹ Jare Jesús jemimboe reta uyemboi ñugüinoi Jesús iyipi pe. Jare uicuaa mbae uyeyapota vae ramo, jei Jesús pe:

—OreYa, ¿nduiporuta pa quisepecu jese reta? ⁵⁰ Jayave penti Jesús jemimboe uiporu iquisepecu sacerdote tenondegua jembiocui inambi re, jare uyasia inambi chugüi.

⁵¹ Jayave Jesús jei:

—Pemaño cheré ayapo vaerã cua.

Jayave uyaviqui cuimbae inambi jendacue, jare cuimbae ucuera.

⁵² Yugüeru vi joco pe sacerdote reta itenondegua reta jare Tumpa jo re uyandareco vae reta jare tenta guasu pegua reta itenondegua reta. Jare Jesús jei chupe reta:

—¿Maera pa peru quisepecu reta jare ivira reta chepisi vaerã, imonda vae pipisi vae rami? ⁵³ Opa ara aico pe reta ndive Tumpa jo pe, ãrei chepisi'ã. Ërei ora uvãe ma chepisi vaerã. Cuarãi piyapo peĩ Satanás imbaepuere pe —jei.

Pedro uicuacu Jesús

(Mt 26.57-58, 69-75; Mr 14.53-54, 66-72; Jn 18.12-18, 25-27)

⁵⁴ Jayave uipisi reta Jesús jare güiraa sacerdote tenondegua jenta pe. Jare Pedro oo jare reta jaicue, ãrei mbiriño oo chugüi. ⁵⁵ Jayave joco pe ñugüinoi vae reta uyapo tata sacerdote tenondegua joca pe jare uguapi joco pe. Jare Pedro vi uguapi joco pe jae reta ipite pe. ⁵⁶ Ërei penti cuñatai uecha Pedro uguapi oĩ tataipi pe. Umae ngatu jese. Jayave jei:

—Cua cuimbae vi icose jocua ñru cuimbae ndive.

⁵⁷ Jayave Pedro uicuacu Jesús.

—Aicuaa'ã jocua cuimbae —jei Pedro cuñatai pe.

⁵⁸ Ndei ima mbove penti cuimbae vi uecha Pedro jare jei chupe:

—Nde co jae iiru vi.

—Che'ã co —jei Pedro cuimbae pe.

⁵⁹ Jare penti ora rupi ma uasa yave, ñru cuimbae jeiete jei:

—Añete co, cua cuimbae icose jocua ñru cuimbae ndive. Echa'ã Galilea pegua co —jei.

⁶⁰ —Aicuaa'ã mbae ndere vae —jei Pedro cuimbae pe.

Jare uyemingueta rupive, uru cuimbae uñee. ⁶¹ Jayave yandeYa uyerova jare umae Pedro re. Jayave Pedro imandúa yandeYa jei chupe vae re: 'Ndei uru cuimbae uñee mbove, mbapi vese ma checuacuta.' ⁶² Jayave Pedro oẽ joco güi, jare tanta ipiatiti reve uyao.

Uyapo reta icavi mbae vae Jesús pe

(Mt 26.67-68; Mr 14.65)

⁶³ Jare cuimbae uyandareco ñugüinoi Jesús re vae reta oyoyai jare uinupa. ⁶⁴ Jayave jare reta uesañoa Jesús jare ocua jova re. Jayave jei reta chupe:

—Emimbeu oreve quía ra ocua nderé.

⁶⁵ Jare jeta icavi mbae vae jei reta chupe.

Jesús mburuvicha reta jovai

(Mt 26.59-66; Mr 14.55-64; Jn 18.19-24)

⁶⁶ Jare cõe ma yave, tenta guasu pegua reta itenondegua reta jare sacerdote reta itenondegua reta jare mboroyocui re oporombocue vae reta uyembati. Jayave güeruruca reta Jesús. Jayave jei reta chupe:

⁶⁷ —¿Nde pa co jae Cristo, Tumpa ombou vae? Emimbeu oreve.

—Che amimbeu yave peve, ndarau chererovia —jei Jesús—. ⁶⁸ Jare che apirandu yave peve mbae re, ndarau pemimbeu cheve, jare ndarau cheyora —jei—. ⁶⁹ Ërei che cuimbarã ayeyapo vae aguapita curi Tumpa mbaepuere güinoi vae iyipi pe iyacata coti —jei.

⁷⁰ Jayave opaete jae reta upirandu chupe:

—¿Nde pa co jae Tumpa Tai?

—Pe reta pere rami jae co che —jei Jesús chupe reta.

⁷¹ Jayave jae reta jei:

—¿Maera pa yaeca ye ñru vae reta uñeapo vaerã jese? Echa'ã yande etei yayandu mbae jei vae —jei reta.

23

Jesús Pilato jovai

(Mt 27.1-2, 11-14; Mr 15.1-5; Jn 18.28-38)

¹ Jayave opaete jae reta upúa jare güiraa Jesús Pilato pe. ² Jare umbipi reta uñeapo Jesús re. Jei reta:

—Cua cuimbae umimbeu tenta guasu pegua reta pe uyapo vaerã icavi mbae vae. Echa'ã jei chupe reta agüiye vaerã umbiepi corepoti César peguarã. Jare jei jae co mburuvicha guasu Cristo jee vae —jei reta.

³ Jayave Pilato upirandu Jesús pe:

—¿Nde pa co jae judío reta juvicha guasu?

—Nde ndere rami jae co che —jei Jesús chupe.

⁴ Jayave Pilato jei sacerdote reta itenondegua reta jare tenta guasu pegua reta pe:

—Avã'e'ã teco cua cuimbae re. ⁵ Jayave jae reta jeiete jei:

—Omboepochi tenta guasu pegua reta. Oporomboc opaete Judea rupi. Umbipi Galilea pe jare añave ou uvãe cua pe oporomboc oĩ —jei reta.

Jesús Herodes jovai

⁶ Pilato uyandu yave jei reta vae, upirandu penti Galilea pegua ra jocua cuimbae.

⁷ Jayave umimbeu reta Pilato pe Galilea pegua co Jesús. Jayave Pilato güiraaca Jesús Herodes pe. Echa'ã Herodes co jae Galilea pegua reta juvicha guasu. Jare jocua ara reta pe Herodes opou oĩ Jerusalén pe. ⁸ Jare Herodes uecha Jesús yave, uyerovia ete, ima ma uipota uecha ramo. Echa'ã uyandu ma jeta Jesús regua, jare uipota uecha Jesús uyapo penti miacañi. ⁹ Jayave Herodes upirandu Jesús pe jeta mbaembae re, ñrei Jesús jei'ã mbae ave chupe. ¹⁰ Jare sacerdote reta itenondegua reta jare mboroyocui re oporomboc vae reta uyemboi Herodes jovai jare iñeeãta reve uñeapo Jesús re. ¹¹ Jare Herodes jare isundaro reta güirãro jare oyoyai Jesús. Jayave omondeca chupe temimonde ipõra vae. Jayave Herodes güiraaca ye Pilato pe. ¹² Jare jocua ara etei Pilato jare Herodes uyeyapicatu ye. Echa'ã tenonde yave uñemitarëi.

Pilato jei Jesús umanota co

(Mt 27.15-26; Mr 15.6-15; Jn 18.39-19.6)

¹³ Jayave Pilato umbatica sacerdote reta itenondegua reta jare tenta guasu pegua reta itenondegua reta ndive. ¹⁴ Jare jei chupe reta:

—Pe reta peru cua cuimbae cheve jare pere cheve omboepochi co tenta guasu pegua reta. Mase, che apirandu chupe jocua re perovaque, jare avã'e'ã etei teco jocua pe reta piñeapo cheve jese vae re —jei—. ¹⁵ Jae ramiño vi Herodes uvãe'ã teco cua cuimbae re. Echa'ã che pomondo Herodes pe. Mase, mbaeti mbae teco uyapo umano vaerã —jei Pilato chupe reta—. ¹⁶ Jáeramo ainupacañota jare ayoraca yeta —jei.

¹⁷ Echa'ã opa año tenta guasu pegua reta uyerure chupe oyoraca vaerã penti pereso pascua ara rupi, jare Pilato oyoracañoi penti pereso. ¹⁸ Jayave opaete vae iñeeãta reve jei:

—Iyucaca cua cuimbae. Iyoraca oreve Barrabás —jei reta.

¹⁹ (Tenonde yave Barrabás upuruyuca Jerusalén pe, mburuvicha reta ndive uñerãro yave. Jáeramo umiingue peresoriru pe.)

²⁰ Ñrei Pilato uipota tõi oyoraca Jesús. Jáeramo jei ye chupe reta. ²¹ Ñrei iñeeãta reve jei reta:

—Icutuca curusu re. Icutuca curusu re.

²² Jayave Pilato upirandu ye chupe reta:

—¿Mbae pa uyapo? Avã'e'ã mbae icavi mbae vae jese umano vaerã. Jáeramo ainupacañota jare ayoraca yeta —jei.

²³ Ñrei jeiete iñeeãta reve jei reta uicutuca vaerã Jesús curusu re. Jare sacerdote reta itenondegua reta jare ñru joco pe ñngüinoi vae reta iñee umiquirëi Pilato. ²⁴ Jayave Pilato jei uyeyapo vaerã Jesús pe jae reta uipota vae. ²⁵ Jayave oyoraca chupe reta tenonde yave

mburuvicha reta ndive uñerāro yave upuruyuca ramo peresoriru pe umiingue vae, jae reta uipota rami. Ērei umee Jesús chupe reta uyeyapo vaerā chupe jae reta uipota vae.

Jesús uyecutuca curusu re

(Mt 27.32-44; Mr 15.21-32; Jn 19.17-27)

²⁶ Jayave güiraa reta Jesús joco güi. Jare penti cuimbae Simón jee vae tenta guasu Cirene pegua, ou uvāe tenta guasu coti. Jocoropi uasa oī yave, sundaro reta uipisi Simón jare güiraa chupe Jesús icurusu. Jayave Simón güiraa curusu Jesús jaicue. ²⁷ Jare yugüiraa vi Jesús jaicue jeta vae. Jare jae reta ipite pe yugüiraa cuña reta. Jae reta uapiro yugüiraa Jesús. ²⁸ Ērei Jesús uyerova umae jese reta jare jei chupe reta:

—Jerusalén pegua cuña reta, agüiye piyao cheré. Piyao piyee jare pemembi reta re — jei—. ²⁹ Mase, outa uvāe ara reta jei reta vaerā: ‘Uyerovia co imembi mbae vae. Uyerovia co umicambu mbae etei vae’ —jeita, jei—. ³⁰ Jayave umbipita tēi jei ivitu guasu pe: ‘Piyapara oreárambo. Oreaso!’ —jeita, jei—. ³¹ Uyapo reta icavi mbae vae cheve yave, ¿mbae ra uyapota peve? —jei.

³² Jare sundaro reta güiraa vi Jesús ndive mocui cuimbae icavi mbae vae uyapo vae uyua vaerā. ³³ Jare yugüiraa uvāe Ācacüerenda jee vae pe. Jayave joco pe sundaro reta uicutu curusu re Jesús jare cuimbae reta icavi mbae vae uyapo vae. Oñono reta penti Jesús iyacata coti jare ĩru iyaso coti. ³⁴ Jayave Jesús jei:

—CheRu, embiasa chupe reta. Uicuaa'ā mbae uyapo ñugüinoi vae —jei.

Jayave sundaro reta uyuguari Jesús jemimonde re, uicuaa vaerā mbae nunga penti penti güiraa iyupe vaerā. ³⁵ Jare tenta guasu pegua reta uyemboi ñugüinoi jocoropi umae Jesús re. Jare tenta guasu pegua reta itenondegua joco pe ñugüinoi vae reta oyoyai Jesús. Jei reta:

—Jae uepi ĩru vae reta. Añave tuyerepi, jae co Cristo yave, jae co Tumpa uiparavo vae yave —jei reta.

³⁶ Jare sundaro reta vi oyoyai Jesús. Oya reta jese jare umee vinagre chupe. ³⁷ Jare jei reta:

—Nde co jae judío reta juvicha guasu yave, iyerepi.

³⁸ Jare oñono reta curusu re Jesús iñāca írambo uyecuatía jeseagua vae: “Cua co jae judío reta juvicha guasu.” Uyecuatía oī griego iñee pe jare latín pe jare hebreo iñee pe.

³⁹ Jare penti cuimbae icavi mbae vae uyapo vae uyecutuca vae uñeengata Jesús pe.

—Nde co jae Cristo, Tumpa ombou vae yave, iyerepi jare orerepi vi —jei.

⁴⁰ Ērei ĩru cuimbae uñeengata chupe.

—¿Ndequiyē'ā pa Tumpa güi? Echa'ā nde vi nemanonei'ā ĩru vae rami —jei—. ⁴¹ Jare jupi co yande ñamano vaerā. Echa'ā yande ñamanota ñāi icavi mbae vae yayapo vae jeco pegua. Ērei cua cuimbae uyapo'ā mbae icavi mbae vae —jei.

⁴² Jayave jei Jesús pe:

—Jesús, nemandúa cheré ndeporoyocua pe neī yave.

⁴³ Jayave Jesús jei chupe:

—Añete che jae ndeve, cua ara neīta che ndive ara pe —jei.

Jesús umano

(Mt 27.45-56; Mr 15.33-41; Jn 19.18-30)

⁴⁴ Jare guarasi ara mbite güiive mbapi ora rupi uñemipitumimbi opaete ivi pe. ⁴⁵ Guarasi jembipe'ā etei. Jayave Tumpa jo umbiyao vae osoro mbite rupi. ⁴⁶ Jayave Jesús tanta usapicai. Jayave jei:

—CheRu, amee ndeve cherecove.

Jare cua jei ma yave, umano.

⁴⁷ Jare cien sundaro vae juvicha joco pe oī vae uecha mbae uyeyapo vae. Jayave umbiadora Tumpa jare jei:

—Añetete co, cua cuimbae co jae jupi vae.

⁴⁸ Jare opaete joco pe yati vae reta vi uecha mbae uyeyapo vae jare ocua iyee ipitía re. Jayave opaete vae yugüiraa ye jenta jenta pe. ⁴⁹ Jare opaete Jesús uicuaa vae reta jare cuña Jesús ndive Galilea güi yugüeru vae reta uyemboi ñugüinoi mbiri curusu güi. Umae ñugüinoi mbae uyeyapo vae re.

José oñono Jesús jetecue teögüeriru pe
(Mt 27.57-61; Mr 15.42-47; Jn 19.38-42)

⁵⁰ Jare joco pe oĩ vi penti cuimbae José jee vae. Jae co penti mburuvicha. Ipiacavi jare jupi. ⁵¹ (Jae uipota'ã tēi ĩru mburuvicha reta uyapo vaerã icavi mbae vae Jesús pe.) Jae co tenta guasu Arimatea pegua. (Arimatea Judea pegua co.) José vi uáro ico Tumpa iporoyocua. ⁵² Cua cuimbae oo Pilato pe, jare uyerure chupe Jesús jetecue re. ⁵³ Jayave umbigüeyi Jesús jetecue, jare oñoma nieso pe. Jayave oñono penti teögüeriru itape uyeyoo vae pe, ndei quía uñeñono pipe vae pe. ⁵⁴ Jocua ara opaete judío reta uyeyapicatu ñugüinoi piareve peguardã. Echa'ã piareve pe co mbutuu ara.

⁵⁵ Jare cuña Jesús ndive Galilea güi yugüeru vae reta, yugüiraa José jaicue jare uecha teögüeriru jare quirãi José oñono pipe Jesús jetecue vae. ⁵⁶ Jayave yugüiraa ye jenta jenta pe jare uyapicatu mbaembae ipiche cavi vae. Jayave uputuu reta mbutuu ara pe. Echa'ã jucuarãi uyecuatía oĩ mboroyocui pe.

24

Jesús icove ye
(Mt 28.1-10; Mr 16.1-8; Jn 20.1-10)

¹ Jare neimbove asi domingo ara pe cuña reta yugüiraa ye teögüeriru coti. Güiraa reta mbaembae ipiche cavi vae uyapicatu ma vae. ² Jare uecha ita tuicha vae uyembisiri ma teögüeriru jonque güi. ³ Jayave uique reta teögüeriru pe, ěrei uvãe'ã yandeYa Jesús jetecue joco pe. ⁴ Ipiacãni ete reta cua re, ěrei aramoioño uyecuaa uyemboi ñugüinoi iyipi pe mocui cuimbae. Jocua mocui cuimbae jemimonde uvera oĩ. ⁵ Jáeramo cuña reta uquiye jare ipe cuimbae reta jovai. Jayave cuimbae reta jei chupe reta:

—¿Maera pa peeça peĩ icove ye vae umanocue vae reta ipite pe? ⁶ Mbaeti ma cua pe oĩ. Jae icove ye ou umanocue vae reta ipite güi. Pemandúa jae icose pe ndive Galilea pe yave jei peve vae re —jei reta—. ⁷ Echa'ã jae jei peve: 'Chemeeta cuimbae icavi mbae vae uyapo vae reta pe. Jae reta checututa curusu re. ěrei che cuimbaerã ayeypa vae aicove yeta ayu umanocue vae reta ipite güi mbapi ara rupi' —jei, jei reta.

⁸ Jayave jae reta imandúa Jesús jei chupe reta vae re. ⁹ Jayave yugüeru ye teögüeriru güi jare umimbeu opaete uyeyapo vae jocua once vae jare opaete ĩru vae reta pe. ¹⁰ Jocua cuña reta co jae María Magdalena, jare Juana, jare Jacobo ichi María jee vae, jare ĩru cuña jae reta jupie yugüiraa vae reta. Cua reta umimbeu Jesús jemimondo reta pe mbae uyeyapo vae. ¹¹ ěrei iyapu echa reta Jesús jemimondo reta pe. Güirovia'ã reta. ¹² Jayave Pedro osi oo teögüeriru coti. Jare joco pe oo uvãe yave, ipe umae vaerã teögüeriru japipe pe, jare uecha nieso reta joco pe oĩ. Jayave ou ye joco güi. Ipiacãni uyeyapo vae re.

Jesús jare mocui jemimboe reta
(Mr 16.12-13)

¹³ Jare jocua ara etei mocui Jesús jemimboe reta yugüiraa tape rupi Jerusalén güi tenta guasu-rai Emaús coti. Emaús oĩ mocui legua Jerusalén güi. ¹⁴ Jare tape rupi yugüiraa rambueve, imiari uyupe opaete uyeyapo vae re. ¹⁵ Jare aramoioño uyemingueta ñugüinoi rambueve, Jesús uyecuaa chupe reta jare oo jae reta jupie. ¹⁶ ěrei jae reta uicuaa'ã Jesús. Echa'ã Jesús ndei uipota uyecuaaca chupe reta. ¹⁷ Jayave Jesús upirandu chupe reta:

—¿Mbae re pa pemiari piyupe peguata rambueve? ¿Maera pa pepiatiti? —jei.

¹⁸ Jare penti Cleofas jee vae upirandu Jesús pe:

—¿Ndico'ã pa Jerusalén pe? ¿Ndicuaa'ã pa cua ara reta pe opaete uyeyapo vae? —jei.

¹⁹ —¿Mbae pa? —jei chupe reta.

—Jesús Nazaret pegua pe uyeyapo vae —jei reta chupe—. Jae co penti Tumpa iñee umimbeu vae. Uyapo jeta mbae icavi vae mbaepuere reve, jare icavi oporomboe. Uyeyocui cavi Tumpa pe jare opaete tenta guasu pegua reta umbiadora —jei reta Jesús pe—. ²⁰ ěrei sacerdote reta itenondegua reta jare oretenondegua reta umee mburuvicha guasu pe, jae uyucaca vaerã. Jare uicutuca reta curusu re —jei reta—. ²¹ ěrei ore ndugüirovia tēi jae uepita Israel pegua reta. Jare cua ara mbapi ara ma opaete cua uyeyapo vae güi —jei reta—. ²² ěrei amocue cuña ore ndive uyeyocuisse Jesús pe vae reta iyei neimbove yugüiraa teögüeriru pe, jare yugüeru ye yave, oremipiacañi ete. ²³ Echa'ã jae reta uvãe'ã Jesús jetecue, jare yugüeru ye yave, jei oreve quirãi uecha ángel reta joco

pe jare quirāi ángel reta jei Jesús icove ye ma oī —jei reta—. ²⁴ Jayave amocue ore ndive ñugüinoi vae yugüiraa vi teögüeriru pe, jare yugüeru ye yave, umimbeu oreve mbaeti joco pe oī Jesús jetecue cuña reta jei oreve rami —jei reta.

²⁵ Jayave Jesús jei chupe reta:

—Pe reta co jae iyaracuaa mbae vae reta rami. Yavai co oī peve perovia vaerā opaete Tumpa iñee aracae umimbeu vae reta uicuatiaque vae —jei—. ²⁶ Picuaata tēi ma jae reta uicuatía co quirāi Cristo, Tumpa ombou vae, uiporarañotai rani co jare quirāi jocua jaicue rupi uyembiadoracata co —jei.

²⁷ Jayave Jesús umimbeu chupe reta jeta Moisés jare Tumpa iñee aracae umimbeu vae reta uicuatiaque vae güi, jare umimbeu cavi chupe reta quirāi opaete jocua uyecuatía oī vae imiari Cristo re.

²⁸ Jare yugüiraa ma uvāe coñño Emaús güi. Echa'ā jocua mocui vae upitata joco pe. Jare Jesús uasata tēi oo cuti. ²⁹ Ērei jae reta jei chupe:

—Epita ore ndive. Echa'ā caaru ma. Pītuta co ndeve —jei reta.

Jayave Jesús upita jae reta jenta pe. ³⁰ Jare uguapi rambueve mesa pe ucaru vaerā, Jesús uipisi mbiyape jare umee yasurupai Tumpa pe. Jayave upisāa umee chupe reta. ³¹ Jayave ramo uicuaa reta Jesús. Echa'ā Jesús umaño ma jese reta uicuaa vaerā. Jayave jupivoiño Jesús ucañi chugüi reta. ³² Jayave jei reta uyupe:

—Añete co, jae yanembiyerovia ete, tape rupi imiari yandev rambueve. Echa'ā uicuaaca yandev Tumpa iñee uyecuatía oī vae —jei reta. ³³ Jayave jocua ora pe etei jae reta upāa mesa güi jare yugüiraa ye Jerusalén pe. Joco pe uvāe jocua once vae yati ĩru vae reta ndive.

³⁴ —Añete co, yandeYa icove ye ma ou umanocue vae reta ipite güi —jei yati vae reta—. Echa'ā uyecuaa co Simón pe.

³⁵ Jayave jocua mocui vae vi umimbeu yati vae reta pe mbae tape rupi uyeyapo vae jare quirāi Jesús uyecuaaca chupe reta mbiyape upisāa yave.

Jesús uyecuaa jemimboe reta pe

(Mt 28.16-20; Mr 16.14-18; Jn 20.19-23)

³⁶ Jare uyemingueta ñugüinoi rambueve, Jesús etei uyecuaa uyemboi oī ipite pe, jare jei chupe reta:

—Mbiacatu toī pe ndive.

³⁷ Ērei jae reta uquiy e. Ipiā pe uyemingueta tēi jocua co Jesús iācue. ³⁸ Ērei Jesús jei chupe reta:

—¿Maera pa pequiye? ¿Maera pa pepia pe piyemingueta jucuarāi? —jei—. ³⁹ Pemaē chepo jare chepi re. Che co jae. Pepuere cheaviqui picuaa vaerā jae co che. Echa'ā penti vae iācue güinoi'ā soo jare maecāgüe. Ērei pepuere peecha che ime co anoi soo jare maecāgüe —jei.

⁴⁰ Jare cua jei ma yave, uechaca chupe reta ipo jare ipi. ⁴¹ Jare reta ipiacañi, jare uyerovia ete ramo ndei ipuere güirovia ete. Jayave Jesús upirandu chupe reta:

—¿Ime pa penoi cua pe mbae jau vaerā?

⁴² Jayave umee reta chupe pira oyicue iperaso jare mbovi ei. ⁴³ Jare Jesús uipisi jou jae reta jovaque. ⁴⁴ Jayave jei chupe reta:

—¿Pemandua'ā pa pe reta ndive aico rambueve che jae peve vae re? Echa'ā Moisés iporoyocui jare Tumpa iñee aracae umimbeu vae reta uicuatiaque vae jare Salmo reta chemimbeu. Jare amimbeu peve quirāi opaete cua chemimbeu vae uyeyapota co —jei.

⁴⁵ Jayave umee chupe reta uicuaa cavi vaerā Tumpa iñee uyecuatía oī vae. ⁴⁶ Jayave jei chupe reta:

—Cuarāi uyecuatía oī quirāi Cristo, Tumpa ombou vae, uiporarañotai co jare icove yeta co ou umanocue vae reta ipite güi mbapi rupi, ⁴⁷ jare quirāi jerācuata ĩru vae reta pe Cristo jee re ueya vaerā iyemingueta icavi mbae vae ipia pe oī vae Tumpa umbiasa vaerā chupe reta imbaeyoa reta. Jerācuata rani Jerusalén pe. Jayave joco güi jerācuata opaete ivi pegua reta pe —jei—. ⁴⁸ Jare pe reta pemimbeuta opaete cua regua —jei—. ⁴⁹ Mase, abouta peve cheRu jei umeeta co peve vae. Ērei pepita tenta guasu Jerusalén pe mbaepuere güinoi vae ara güi ou peve regua —jei.

*Jesús oo ara pe
(Mr 16.19-20)*

⁵⁰ Jayave Jesús güüraa reta Betania pe. Jayave uupi ipo ara coti jare umivendise reta. ⁵¹ Jare umivendise oĩ rambueve, oo chugüii reta ara coti. ⁵² Jayave jae reta umbiadora. Jayave yugüüraa ye Jerusalén pe uyerovia reve. ⁵³ Jare jecuaño yugüüraa Tumpa jo pe umbiadora reve Tumpa. Amén.

EL SANTO EVANGELIO SEGUN SAN JUAN

Ñee uyeyapo cuimbaerã

¹ Ndei mbae uyeyapo mbove, ico Ñee. Jare Ñee ico Tumpa ndive. Jae co Tumpa etei.
² Ñee ico Tumpa ndive ndei mbae uyeyapo mbove. ³ Jae uyapo opaete. Opaete uyeyapo vae jae etei uyapo. ⁴ Jae umee tecove opaete pe, jare cua tecove rupi jae uyecuaa ivi pegua reta pe mbaembae uyecuaa tembipe rupi rami. ⁵ Jae co tembipe rami. Tembipe jecuaño jembipe pítumimbi pe, jare pítumimbi ipuere'ã etei ombove. ⁶⁻⁷ Ico penti cuimbae Juan jee vae. Tumpa ombou cua cuimbae umimbeu vaerã tembipe regua, ñru vae reta upurugüirovia vaerã uyandu yave. ⁸ Jae jae'ã co jocua tembipe. Jaeño ou umimbeu vaerã jocua tembipe re.

⁹ Tembipe etei ou ma cua ivi pe. Jae uyecuaa opaete vae pe. ¹⁰ Jae ico cua ivi pe, jare jae uyapo cua ivi. Ërei ivi pegua reta uicuaa'ã. ¹¹ Ou ivi pe, ãrei ivi pegua reta umbiresive'ã. ¹² Ërei amocue vae umbiresive. Güirovia jese. Jáeramo jae umee cua reta pe Tumpa tai retarã jare tayi retarã yugüireco vaerã. ¹³ Tumpa etei umee cua reta pe tecove. Cua tecove ou'ã co ichi rupi. Güinoi'ã cua tecove tu jei vae rupi.

¹⁴ Jocua Ñee uyeyapo cuimbaerã. Ou cua ivi pe ico vaerã yande ndive. Jare ore nduecha yembutuicha ara pegua co jae. Jaeño Tumpa Tai jae vaño cua yembutuicha güinoi vae. Jae ipiacavi ete jare opaete jei vae añete co. ¹⁵ Echa'ã Juan umimbeu ñru vae reta pe:

—Cua co jae chemiari jese vae —jei chupe reta—. Che jae ma peve: 'Cheraicue rupi outa vae ipuere ete chegüi. Echa'ã jae ico ndei aico mbove' —jei.

¹⁶ Jocua Ñee ipiacavi ete. Jáeramo jecuaño uyapo icavi vae yandeve. ¹⁷ Tumpa umimbeu mboroyocui Moisés rupi. Ërei Jesucristo rupi Tumpa umimbeu ipiacavi co jare yanemboe añete vae re. ¹⁸ Mbaeti etei quía uecha Tumpa. Ërei Tumpa Tai jae vaño uicuaaca yandeve. Tumpa uau Tai.

Juan upurumbibautiza vae umimbeu vae

(Mt 3.1-12; Mr 1.1-8; Lc 3.1-20)

¹⁹ Penti ara yugüiraa uvãe Juan oï vae pe sacerdote reta jare levita reta. Judío reta Jerusalén pegua omondo cua reta chupe. Jae reta jei Juan pe:

—¿Quía pa co nde?

²⁰ Juan umimbeu cavi. Iyapu'ã chupe reta.

—Che jae'ã co Cristo jee vae —jei chupe reta.

²¹ Jayave upirandu reta ye chupe:

—Nde jae'ã yave, ¿nde pa co jae Elías jee vae?

Juan jei:

—Che'ã co jae.

Jei reta chupe:

—¿Nde pa co jocua Tumpa ñnee umimbeu vae?

—Che'ã co jae —jei Juan chupe reta.

²² Jayave upirandu reta ye chupe:

—¿Quía pa co nde? Echa'ã nduipota numimbeu orembou vae reta pe. ¿Mbae pa ndere ndiyupe? —jei reta Juan pe.

²³ Jayave Juan jei:

—Che co jae penti ñee umimbeu vae. Chiñeeãta ñana pe: 'Piyapicatu yandeYa japerã.' Jucuarãi che jae —jei Juan—. Echa'ã jucuarãi jei Isaías araca Tumpa ñnee umimbeu vae —jei. ²⁴ Cua Juan oï vae pe yugüiraa vae reta fariseo reta co. ²⁵ Upirandu reta Juan pe:

—Nde jae'ã yave Cristo ani Elías ani jocua Tumpa ñnee umimbeu vae, ¿maera pa ndepurumbibautiza? ²⁶⁻²⁷ —Che apurumbibautiza i pe —jei Juan—. Ërei picuaa'ã, ime pepite pe jocua cheraicue rupi outa vae. Jupi'ã co che amboi vaerã ipipasa —jei chupe reta.

²⁸ Opaete cua uyeyapo Betábara pe iãca Jordán jee vae jovaicho pe. Echa'ã joco pe upurumbibautiza Juan.

Tumpa ombou vae

²⁹ Piareve pe Juan uecha Jesús ou icoti jare jei:

—Mase, pee oĩ Tumpa ombou vae. Jae co ovecha rami. Ou güiraa vaerã opaete ivi pegua reta imbaeyoa —jei—. ³⁰ Cua co jae chemiari jese vae. Che jae ma peve: ‘Cheraicue rupi outa vae ipuere ete chegüi. Echa’ã jae ico ndei aico mbove.’ Cua co jae —jei Juan—. ³¹ Che aicuaa’ã. Ërei ayu apurumbibautiza i pe jae uyecuaa vaerã Israel pegua reta pe —jei chupe reta.

³² Juan unimbeu vi chupe reta:

—Aecha Espiritu Santo ugüeyi ara güi picasu rami jare ou upita jese —jei—. ³³ Che aicuaa’ã. Ërei chembou apurumbibautiza vaerã i pe vae jei cheve: ‘Ndeechata Espiritu Santo ugüeyi ou upita penti cuimbae re. Jocua cuimbae upurumbibautizata Espiritu Santo pe’ —jei, jei Juan—. ³⁴ Jocua aecha ma jare amimbeu peve cua co jae Tumpa Tai —jei.

Jesús jemimboe tenondegua vae reta

³⁵ Piareve pe Juan uyemboi ye oĩ joco pe mocui jemimboe ndive. ³⁶ Jayave ou Jesús uasa jcoropi. Juan umae ngatu jese.

—Mase, pee oĩ Tumpa ombou vae. Jae co ovecha rami —jei.

³⁷ Jocua mocui jemimboe uyandu jare yugüiraa Jesús jaicue. ³⁸ Jesús uyerova yave, uecha yugüeru icoti.

—¿Mbae pa peeca? —jei chupe reta.

—¿Quíape pa ndico, Rabí? —jei reta. (Rabí uipota jei: “Oporomboe vae”).

³⁹ —Peyu peecha —jei Jesús.

Jayave yugüiraa Jesús ico vae pe uecha, jare upita jocua ara jae ndive. Echa’ã caaru catu ma. ⁴⁰ Mocui cuimbae co jocua Jesús jaicue yugüiraa vae. Echa’ã yugüiraa jaicue uyandu yave Juan jei chupe reta vae. Penti cuimbae jee co Andrés. Jae co Simón Pedro tivi. ⁴¹ Andrés oo rani uvãe tiquei Simón pe jare jei chupe:

—Nuvãe ma Mesías. (Cua uipota jei hebreo iñee pe: “Cristo, Tumpa ombou vae”).

⁴² Jayave Andrés güeru Simón Jesús oĩ vae pe. Jesús umae ngatu Simón re jare jei:

—Nde co jae Simón. Nde co jae Jonás tai. Turumbijee Cefas. (Cua uipota jei: “Pedro”).

Jesús ueni Felipe jare Natanael

⁴³⁻⁴⁴ Piareve pe Jesús uipota oo Galilea pe. Jare uvãe Felipe Betsaida pegua. Andrés jare Pedro Betsaida pegua vi. Jesús jei Felipe pe:

—Eyu cherupíe.

⁴⁵ Jayave Felipe oo uvãe Natanael pe jare jei chupe:

—Nuvãe ma Moisés mboroyocui pe imiari jese vae. Araca Tumpa iñee umimbeu vae reta vi imiari jese —jei—. Jae co Jesús Nazaret pegua. Jae co José tai —jei chupe.

⁴⁶ —¿Ime pa mbae icavi vae Nazaret pegua? —jei Natanael.

—Yaa eecha —jei Felipe.

⁴⁷ Jesús uecha Natanael ou icoti jare jei:

—Mase, co ou penti Israel pegua añetete vae. Jecuaeño uyapo añete vae rupi —jei.

⁴⁸ Natanael upirandu Jesús pe:

—¿Quirãi pa checuaa?

Jesús jei chupe:

—Nde Felipe nereni mbove, che nduecha iva igüi pe.

⁴⁹ —Nde co jae Tumpa Tai, Oporomboe vae —jei Natanael—. Nde co jae Israel pegua reta juvicha guasu —jei.

⁵⁰ Jesús jei chupe:

—Amimbeu ndeve che nduecha iva igüi pe. ¿Cua jeco pegua ra ndepurugüirovia ma? —jei—. Ndeechata mbaembae ndepurugüirovia ete vaerã —jei—. ⁵¹ Añete che jae ndeve, ndeechata ara uyepea oĩ, jare ndeechata vi ángel Tumpa pe uyeyocui vae reta uyupi ñugüinoi jare ugüeyi ñugüinoi che aĩ vae pe. Che co jae cuimbaerã uyeyapo vae —jei Jesús.

¹ Mbapi ara rupi penti cuimbae umenda cuñatai ndive Caná Galilea pegua pe, jare Jesús ichi joco pe oĩ. ² Jare uparea reta vi Jesús jare jemimboe reta pe. ³ Vino opa ma yave, Jesús ichi jei Jesús pe:

—Opa ma vino.

⁴ —Cuña, ¿maera pa ndere cheve cua? —jei Jesús—. Ndei uvã cheparaviqui ayapo vaerã —jei.

⁵ Jayave Jesús ichi jei joco pe uyeyocui vae reta pe:

—Piyapo umimbeuta peve vae.

⁶ Joco pe ñugüinoi seis iru guasu ita pegua. Judío reta uiporu jocua nunga iru guasu mbaembae oyoe vaerã Tumpa coti jecoño mai uyapo rami. Penti penti iru guasu ipuere tinee pandepo iru i pe. ⁷ Jesús jei tembocui reta pe:

—Pemitinee cavi iru guasu reta i pe.

Jayave jae reta umitinee cavi. ⁸ Jesús jei chupe reta:

—Añave piñoë peraa peruvicha pe.

Jayave jucuarã uyapo reta. ⁹ Uyeyocui vae reta juvicha jou jocua i vinorã uyeyapo vae. Jae uicuaa'ã quía güi ra ou jocua jou vae, ãrei jembiocui reta uicuaa catu quía güi co oñoë. Jayave mburuvicha ueni cuimbae umenda vae.

¹⁰ —Opaete ñru vae reta umee vino icavi vae mboupa reta pe. Jayave jeta vino jou yave ramo umee chupe reta vino icavi nunga mbae vae —jei chupe—. Ërei nde añave ramo neme vino icavi ete vae —jei.

¹¹ Jesús cua uyapo Caná Galilea pegua pe. Cuarã Jesús umbipi uicuaaca jemimboe reta pe jae imbaepuere tuicha ete co. Jare cua uyapo vae jeco pegua jemimboe reta güirovia jese.

¹² Cua jaicue rupi Jesús oo Capernaúm pe. Yugüiraa vi jae jupíe ichi jare tiví reta jare jemimboe reta. Jare upita reta joco pe mbovi ara.

Jesús Tumpa jo pe uyapo vae

(Mt 21.12-13; Mr 11.15-18; Lc 19.45-46)

¹³ Jare coiño ma ou judío reta pascua iara. Jayave Jesús oo Jerusalén pe. ¹⁴ Jare Tumpa jo pe uecha umaemee vae reta. Umee ñugüinoi güeye reta jare ovecha reta jare picasu reta. Uecha vi corepoti uipepica vae reta uguapi ñugüinoi joco pe. ¹⁵ Jayave Jesús uyapo chicote jare omoë umaemee vae reta jare ovecha reta jare güeye reta Tumpa jo güi. Jayave upiyere corepoti uipepica vae reta icorepoti jare umbiyapara imesa reta. ¹⁶ Jare jei picasu umee vae reta pe:

—Peraa cua güi cua reta. Agüiye pemee mbaembae cheRu jo pe —jei.

¹⁷ Jayave jemimboe reta imandúa quirã ime Tumpa ñínee pe uyecuatía oĩ cuarã: “Aipota ete Tumpa jo uyepiua vaerã. Cheragüiro jese. Jáeramo cua jeco pegua ñru vae reta uyapota icavi mbae vae cheve.” Jucuarã uyecuatía oĩ.

¹⁸ Jayave judío reta upirandu Jesús pe:

—¿Mbae nunga miacañi pa ndeechacata oreve nduicuaa vaerã ime ra nenoí mbaepuere cua mbaraviqui ndiyapo vae ndiyapo vaerã?

¹⁹ Jesús jei chupe reta:

—Pembusururu yave cua Tumpa jo, che amupúa yeta co mbapi ara pe.

²⁰ —Uparaviqui reta cuarenta y seis año uyapo vaerã cua Tumpa jo —jei judío reta—. ¿Nemupúa yeta ra nde mbapi ara pe? —jei.

²¹ Ërei Jesús uyemingueta chupe reta jete re. Echa'ã jete co jae Tumpa jo. ²² Jáeramo Jesús icove ye yave ou umanocue vae reta ipite güi, jemimboe reta imandúa cua jei vae re. Jayave güirovia aracae Tumpa ñínee pe uyecuatía oĩ vae jare jocua Jesús jei chupe reta vae.

Jesús uicuaa opaete vae

²³ Jesús upita Jerusalén pe pascua iara pe. Joco pe oĩ rambueve, jeta vae güirovia jese uecha yave jocua miacañi reta uyapo vae. ²⁴ Ërei Jesús güirovia'ã añetete cua reta ipurugüirovia. Echa'ã uicuaa cavi opaete ivi pegua reta. ²⁵ Jae ueca'ã quía umimbeu vaerã chupe ivi pegua reta regua. Echa'ã jae uicuaa cavi ivi pegua reta ipia pe oĩ vae.

3

Jesús jare Nicodemo

¹ Ico penti fariseo Nicodemo jee vae. Jae co judío reta juvicha. ² Cua cuimbae ou Jesús oĩ vae pe pĩtu yave jare jei chupe:

—Oporomboe vae, nduicuaa co Tumpa nembou ndeporomboe vaerã. Echa'ã mbaeti quía ipuere uyapo jocua nunga miacañi ndiyapo vae Tumpa oĩ'ã yave jae ndive —jei.

³ —Añete che jae ndeve —jei Jesús Nicodemo pe—, ime yave quía uipota ico Tumpa iporoyocua pe vae, güinoita rani co tecove ipiau vae —jei.

⁴ —¿Quirãita pa co yandepuere tecove ipiau vae ñanoi yanendechi ma yave? —jei Nicodemo—. Yandepuere'ã etei yaique ye yandesí jie pe yaa ye vaerã —jei.

⁵ Jesús jei chupe:

—Añete che jae ndeve, ime yave quía uipota ico Tumpa iporoyocua pe vae, güinoita rani co tecove ipiau vae i jare Espíritu Santo rupi —jei—. ⁶ Yaa yave yandesí güi, ñanoi tecove ivi peguarãño. Ërei Espíritu Santo umee yandeve tecove Espíritu pegua —jei—.

⁷ Amimbeu ma ndeve quirãi penoita rani co tecove ipiau vae. Agüiye nepiacañi cua re —jei chupe—. ⁸ Ivitu uyepeyu ipotave rupi güi jare ndiyandu jiapu. Ërei ndicuaa'ã queti güi ra ou jare queti ra oo. Jucuarãi co oĩ Espíritu Santo umee tecove chupe vae —jei Jesús.

⁹ Nicodemo upirandu Jesús pe:
—¿Quirãita pa co uyeyapo cua?

¹⁰ Jesús upirandu Nicodemo pe:

—¿Ndicuaa'ã pa cua? Echa'ã nde co jae Israel pegua reta ombae vae —jei—. ¹¹ Añete che jae ndeve, nduyemingueta nduicuaa vae re jare numimbeu nduecha vae. Ërei perovia'ã numimbeu peve vae —jei—. ¹² Amimbeu ma peve mbaembae uyeyapo ivi pe vae, ërei chererovia'ã. ¿Quirãita pa pepuere chererovia mbaembae uyeyapo ara pe vae amimbeu peve yave? —jei Jesús Nicodemo pe—. ¹³⁻¹⁴ Mbaeti quía ye uyupi oo ara pe, jaño che ara güi agüeyi ayu vae. Che co jae cuimbaerã uyeyapo vae ara pe oĩ vae —jei chupe—. Moisés aracaе uupi jocua mboi ivira re, ñana pe ico yave. Jucuarãi vi ñru vae reta chereupita co, ¹⁵ ipotave güirovia cheré vae güinoi vaerã tecove opa mbae vae. Ndarau oo cañitei pe —jei.

Tumpa uau ete ivi pegua reta

¹⁶ Echa'ã Tumpa uau ete ivi pegua reta. Jáeramo umee Tai jae vaño, ipotave güirovia jese vae güinoi vaerã tecove opa mbae vae. Ndarau oo cañitei pe. ¹⁷ Tumpa ombou Tai ivi pe, ivi pegua reta uyembiasaca vaerã jae jeco pegua. Tai ou'ã uã vaerã ivi pegua reta.

¹⁸ Güirovia Tumpa Tai re vae reta ndarau ma uñeãaca. Ërei ñru vae reta uñeãaca ma co. Echa'ã Tumpa Tai jae vaño umimbeu ma quía co jae. Ërei jae reta güirovia'ã. ¹⁹ Tembipe ou ma ivi pe, ërei ivi pegua reta uipota ete ico pĩtumimbi pe. Uipota'ã ico tembipe pe. Echa'ã uyapo reta icavi mbae vae. Jáeramo uñeãaca reta ma co. ²⁰ Ipotave icavi mbae vae uyapo vae umitarëi tembipe. Ou'ã tembipe oĩ vae pe agüiye vaerã ñru vae reta uicuaa mbae uyapo vae. ²¹ Ërei añete pegua rupi ico vae ou tembipe oĩ vae pe, ñru vae reta uicuaa vaerã mbaraviqui uyapo vae uyapo co Tumpa jei vae rupi.

Umendata vae iamigo

²² Cua jaicue rupi Jesús jare jemimboe reta yugüiraa ivi Judea jee vae pe. Joco pe upita Jesús jae reta ndive jare upurumbibautizaca oĩ. ²³ Juan vi upurumbibautiza oĩ Enón pe. Enón coiño oĩ Salim güi. Echa'ã joco pe jeta i oĩ. Jare amocue vae yugüeru jare Juan umbibautiza reta. ²⁴ Echa'ã Juan ndei uyereraaca peresoriru pe.

²⁵ Jayave Juan jemimboe reta uyeaca ñugüinoi judío reta ndive quirãi ipuere uyeyoe cavi Tumpa peguarã vae re. ²⁶ Jayave yugüeru Juan oĩ vae pe jare jei chupe:

—Oporomboe vae, nde nemimbeu ma oreve Jordán jovaicho pe nde ndive icose vae regua. Mase, jae upurumbibautiza oĩ, jare opaete vae yugüiraa ñugüinoi jae oĩ vae pe —jei reta Juan pe.

²⁷ Jayave Juan jei chupe reta:

—Tumpa umee yandeve vaño yandepuere ñanoi. ²⁸ Che jae ma peve: 'Che jae'ã co Cristo. Jaño Tumpa che rani chembou chugüi.' Pe reta etei picuaa cuarãi co che jae peve —jei chupe reta—. ²⁹ Jae co penti cuimbae umendata vae rami. Che co umendata vae iamigo rami. Echa'ã umendata vae iamigo upita umendata vae ndive jare uyapisaca

jese jare uyerovia iñee uyandu yave. Jucuarãino vi co che ayerovia ete —jei—. ³⁰ Echa'ã jeta vae yugüiraata jae oĩ vae pe, ãrei mbovño ma co yugüeruta che aĩ vae pe —jei Juan chupe reta.

Ara güi ou vae

³¹ Ara güi ou vae ipuere opaete ĩru vae reta güi. ĩvi pegua reta ĩvi peguaño co jare uyemingueta mbaembae ĩvi pe oĩ vae re. Ara güi ou vae ipuere opaete ĩru vae reta güi. ³² Jae umimbeu uecha jare uyandu vae, ãrei mbaeti quía güirovia jae umimbeu vae. ³³ Jae umimbeu vae güirovia vae uicuaaca ĩru vae reta pe güirovia co Tumpa iñee añete co. ³⁴ Echa'ã jocua Tumpa ombou vae umimbeu Tumpa iñee, jare Tumpa umee chupe Espĩritu Santo opaete imbaepuere reve. ³⁵ Tu uau Tai jare oñono opaete mbaembae ipo pe. ³⁶ Tumpa Tai re güirovia vae güinoi ma tecove opa mbae vae. Tumpa Tai re güirovia mbae vae ndarau güinoi tecove. Tumpa uiporacata chupe.

4

Jesús jare cuña Samaria pegua

¹ YandeYa Jesús uyandu jerãcua ma co fariseo reta pe cuarã: “Jesús uyapo oĩ jare umbibautiza oĩ jeta jemimboe retarã Juan güi.” Jucuarã jerãcua. ² ãrei Jesús etei upurumbibautiza'ã. Jemimboe retaño upurumbibautiza ñugüinoi. ³ Jayave cua uicuaa yave, Jesús oẽ Judea güi oo ye Galilea pe. ⁴ Jare oo Samaria rupi. Echa'ã tape uasa jocoropi. ⁵ Jayave oo uvãe tenta guasu Sicar jee vae pe. Jocua tenta guasu Samaria pegua co, jare coĩno oĩ ĩvi Jacob aracae umee tai José pe vae güi. ⁶ Jocua ĩvi pe oĩ penti ĩcua. Jocua ĩcua jee Jacob ĩcua. Jayave Jesús uguapi ĩcua ĩyipi pe. Echa'ã mbiri ma uguata, jare icandi. Jare doce pota rupi ma. ⁷ Jayave ou uvãe penti cuña Samaria pegua i güinoẽ vaerã. Jare Jesús jei chupe:

—Emee tau i.

⁸ Echa'ã Jesús jemimboe reta yugüiraa tenta guasu pe jembiurã ogua vaerã. ⁹ Jayave cuña Samaria pegua jei Jesús pe:

—Nde co jae penti judío jare che co jae penti Samaria pegua. ¿Maera pa nde ndere cheve: ‘Emee tau i?’ —jei.

(Echa'ã judío reta uyemingueta'ã Samaria pegua reta ndive.) ¹⁰ Jayave Jesús jei cuña pe:

—Che jae ma ndeve: ‘Emee tau i.’ Ndicuaa yave Tumpa uipota umee ndeve vae jare ndicuaa yave quía co che, ndiyerureta tẽi co cheve jare che ameeta tẽi co ndeve i tecove güinoi vae —jei Jesús.

¹¹ —Carai —jei cuña Jesús pe—, nde mbaeti mbae neno i nenoẽ pipe vaerã, jare cua i quipe oĩ. ¿Quía güi pa nderuta jocua i tecove güinoi vae? —jei—. ¹² ¿Tuicha ete pa nembraepuere yandetenondegua Jacob imbaepuere güi? Echa'ã Jacob umee yandevae cua i. Jae etei jare tai reta jare jimba reta jou cua güi —jei cuña.

¹³ Jesús jei chupe:

—Ipotave cua i jou vae iúe yeta co. ¹⁴ ãrei ipotave i che ameeta jou vae ndarau ye iúe —jei—. Echa'ã jocua i che ameeta chupe vae uyeyapota ĩpia pe penti ĩcua i oẽ vae rami. Jecuaño umeeta chupe tecove opa mbae vae —jei.

¹⁵ —Carai —jei cuña—, emee cheve cua i, agüiye ye vaerã cheúe jare agüiye ye vaerã ayu cua pe i anoẽ vaerã —jei.

¹⁶ Jayave Jesús jei chupe:

—Ecu eeni neme peyu cua pe.

¹⁷ —Mbaeti cheme —jei cuña.

—Añete co ndere: ‘Mbaeti cheme’ —jei Jesús cuña pe—. ¹⁸ Echa'ã neno ma pandepo neme, jare jocua cuimbae añave neno vae jae'ã co neme. Añete co ndere —jei.

¹⁹ —Carai —jei cuña—, añave aicuaa nde co jae penti Tumpa iñee umimbeu vae —jei—. ²⁰ Yandetenondegua reta umbiadora Tumpa cua ĩvitu guasu re. ãrei pe reta pere Jerusalén pe oĩ Tumpa jo, jare joco peño ĩru vae reta vi umbiadorata tẽi Tumpa —jei cuña.

²¹ —Chererovia, cuña —jei Jesús—. Outa ma ara agüiye vaerã pemiadora cheRu cua ĩvitu guasu reño ani Jerusalén peño —jei—. ²² Pe reta pemaambiadora yave, picuaa cavi'ã mbae pemiadora vae. Ore numaambiadora yave, nducuaa cavi co mbae numbiadora

vae. Echa'a ĩru vae reta uyembiasacata judío reta rupi —jei—. ²³ Ĕrei outa ma ara - ou ma co - añete Tumpa umbiadora vae umbiadora vaerã Espĩritu Santo rupi. Umbiadorata añete vae rupi —jei—. Echa'a cheRu ueca cua nunga jae reta umbiadora vaerã —jei—. ²⁴ Tumpa co jae Espĩritu. Umbiadora vae reta tumbiadora Espĩritu Santo rupi jare añete vae rupi —jei Jesús.

²⁵ Jayave cuña jei Jesús pe:

—Aicuaa Tumpa ombou vae outa co - jae co Cristo jee vae - jare jae ou yave, umimbeuta yandeve opaete mbaembae regua —jei.

²⁶ —Jae co che ayemingueta añ nde ndive vae —jei Jesús.

²⁷ Cua jei oĩ yave, Jesús jemimboe reta yugũeru uvãe. Ipiacañi Jesús uyemingueta oĩ cuña ndive vae re. Ĕrei penti ave jei'a chupe: “¿Mbae pa ndipota?” añi “¿Maera pa ndiyemingueta jae ndive?” ²⁸ Jayave cuña ueya ĩru joco pe jare oo uvãe tenta guasu pe. Jei cuimbae tenta guasu pegua reta pe:

²⁹ —Pecua peeche cuimbae opaete ayapocue umimbeu cheve vae. ¿Jae'a ra co Cristo, Tumpa ombou vae? —jei.

³⁰ Jayave cuimbae reta oẽ tenta guasu gũĩ yugũeru Jesús coti.

³¹ Cuña oo ma yave, Jesús jemimboe reta jei chupe:

—Oporomboe vae, ecaru.

³² —Ime anoi cherembiurã pe reta picuaa mbae vae —jei Jesús chupe reta.

³³ Jayave jemimboe reta jei uyupe:

—¿Gũeru ma ra quĩa mbae jou vaerã?

³⁴ —Che ayapo chembou vae uipota ayapo vaerã vae, jare opaete iparaviqui ayapo — jei Jesús—. Cua co jae cherembiurã rami —jei—. ³⁵ Pe reta pere: ‘Īrundi yasi rupi oĩta ma co mbaeviro.’ Ĕrei che jae peve: Mase, pemae co reta re. Joco pe oĩ vae yagũiye ma co. Uvãe ma mbaeviro —jei Jesús—. ³⁶ Jare tecove opa mbae vae uñemee chupe vae uyeaviro vae rami co. Jare temiti iya umbiepi umbaeviro vae pe, umaeti vae jare umbaeviro vae uyerovia pãve vaerã —jei—. ³⁷ Jucuarã añete co cua: ‘Penti vae umaeti jare ĩru vae umbaeviro’ —jei—. ³⁸ Che pomondo peaviro vaerã peparaviqui'a jese vae. Īru vae reta uparaviqui jese, jare pe reta peaviro jae reta iparaviqui vae —jei Jesús chupe reta.

³⁹ Jare jeta jocua tenta guasu pegua reta - Samaria pegua reta co - gũirovia Jesús re cuña umimbeu chupe reta vae jeco pegua. Echa'a cuña jei ma chupe reta: “Opaete ayapocue umimbeu cheve.” ⁴⁰ Jayave Samaria pegua reta yugũeru uvãe yave Jesús oĩ vae pe, jei chupe:

—Ecuia orerenta pe epita ore ndive.

Jayave Jesús oo upita joco pe mocui ara. ⁴¹ Jare jeta ĩru vae reta upurugũirovia Jesús etei jei chupe reta vae jeco pegua. ⁴² Jayave jei reta cuña pe:

—Tenonde yave ndepurugũirovia nde ndere oreve vae jeco pegua. Ĕrei añave ndupurugũirovia ore etei nduyandu ramo, jare añave nduicuaa cua co jae ivi pegua reta umbiasa vae Cristo jee vae —jei reta.

Jesús umbigũera mburuvicha tai

⁴³ Mocui ara rupi Jesús oo joco gũĩ Galilea coti. ⁴⁴ Echa'a Jesús etei jei penti Tumpa ñnee umimbeu vae jentaigua reta uipiu'a. ⁴⁵ Jayave Jesús oo uvãe yave Galilea pe, joco pegua reta umbiresive cavi. Echa'a uecha reta ma opaete Jesús uyapo Jerusalén pe pascua pe vae. Echa'a jae reta yugũiraa vi joco pe. ⁴⁶ Jayave Jesús oo uvãe Caná Galilea pegua pe. Joco pe tenonde yave uyapo i vinorã. Jare ico Capernaum pe penti mburuvicha. Cua cuimbae tai imbaerasi oĩ. ⁴⁷ Jare uicuaa yave Jesús ou ma co Judea gũĩ uvãe Galilea pe, ou uvãe Jesús oĩ vae pe jare uyerure chupe tai re.

—Ecuia cherenta pe embigũera cherai —jei—. Echa'a umanota ma oĩ.

⁴⁸ —Aechaca'a peve yave miacañi reta, ndarau perovia cheré —jei Jesús chupe.

⁴⁹ —Carai —jei mburuvicha—, ecua cherenta pe agũiye vaerã cherai umano.

⁵⁰ —Ecuia yeño —jei Jesús chupe—. Nderai icove catu ye ma oĩ —jei.

Jayave mburuvicha gũirovia Jesús jei chupe vae jare oo ye jenta coti. ⁵¹ Jare oo rambueve jenta coti, jembicui reta yugũeru oovãiti jare jei chupe:

—Icove catu ye ma oĩ nderai.

⁵² Jayave mburuvicha upirandu chupe reta:

—¿Mbae ora pe pa umbipi ucuera?

—Caarumo una rupi jacu upita chugüi —jei reta chupe.

⁵³ Jare cunumi tu uicuaa jocua ora pe etei co Jesús jei chupe: “Nderai icove catu ye ma oĩ.” Jayave upurugüirovia jae jare opaete jenta pegua reta.

⁵⁴ Cua miacañi uyapo Jesús uicuaaca vaerã quía co jae, ou yave Judea güi Galilea pe. Mocui ma co cua miacañi.

5

Cuimbae ipuere mbae uguata vae

¹ Cua jaicue rupi jedu reta uyapo ñugüinoi fiesta, jare Jesús oo Jerusalén pe. ² Jare ime Jerusalén pe ovecha reta uñemeea jonque iyipi pe penti estanque tipi vae hebreo iñee pe Betesda jee vae. Ime cua i iyipi rupi pandepo o-rai. ³ O-rai japipe pe uyapacua ñugüinoi jeta imbaerasi vae reta. Joco pe ñugüinoi jesa mbae vae reta, ipuere mbae uguata vae reta, jare ipuere mbae omi vae reta. Opaete cua reta uãro ñugüinoi i omi vaerã. ⁴ Echa'ã amo amo pe ugüeyi penti ángel omomi vaerã i. Jare i omi ma yave, jocua imbaerasi vae tenonde voi uique i pe vae ucuera ipotave imbaerasi güi. ⁵ Jare imbaerasi vae reta ipite pe oĩ penti cuimbae treinta y ocho año ma ipuere mbae uguata vae. ⁶ Jesús uecha cuimbae uyapacua oĩ joco pe, jare uicuaa ima ete ma imbaerasi. Jayave upirandu chupe:

—¿Ndipota pa ndecuera?

⁷ —Carai —jei cuimbae—, mbaeti quía cheñoño vaerã i pe i omi yave. Che aa rambueve, ñru vae uique i pe tenonde chegüi —jei.

⁸ Jayave Jesús jei chupe:

—Epüa evoi nderupa jare eguata.

⁹ Jayave cuimbae ucuera voi, jare ovoi jupa uguata. Jare jocua ara mbutuu ara co.

¹⁰ Jayave judío reta jei cuimbae ucuera ma vae pe:

—Cua ara mbutuu ara co. Jupi'ã ndevoi vaerã nderupa mbutuu ara pe —jei reta.

¹¹ Cuimbae jei chupe reta:

—Cuimbae chembigüera vae jei cheve: ‘Evoi nderupa jare eguata’ —jei cheve, jei.

¹² Jayave upirandu reta chupe:

—¿Quía pa jae ‘Evoi nderupa jare eguata’ jei ndeve vae?

¹³ Ërei ucuera vae - tenonde yave ipuere mbae uguata vae - uicuaa'ã. Echa'ã jeta vae joco pe ñugüinoi jare Jesús oo ma joco güi. ¹⁴ Ndei ima mbove Jesús oovãiti cuimbae Tumpa jo pe.

—Ndecuera ma co. Jáeramo agüiye ye iyapo icavi mbae vae. Echa'ã ndiyapo ye yave, mbae icavi mbae ete vae uyeyapota ndeve —jei.

¹⁵ Jayave cuimbae oo umimbeu judío reta pe Jesús co jae umbigüera ma vae. ¹⁶ Jare Jesús uyapo ma amocue cua nunga miacañi mbutuu ara pe. Cua jeco pegua judío reta uipota uyapo icavi mbae vae chupe. Uipota vi uyuca. ¹⁷ Ërei Jesús jei chupe reta:

—CheRu jecuaeño uparaviqui, jare che vi aparaviqui.

¹⁸ Cua jeco pegua judío reta uipota uyuca Jesús. Echa'ã Jesús uyapo mbutuu ara pe jae reta jei jupi'ã uyeyapo vaerã vae, jare Jesús uyemingueta yave, jei: “Tumpa etei co cheRu”, jare cua uipota jei jae co Tumpa etei.

Tumpa Tai imbaepuere

¹⁹ Jayave Jesús jei chupe reta:

—Añete che jae peve, che co jae Tumpa Tai. Cheiño chepuere'ã mbae ayapo. Ayapo jocua aecha cheRu uyapo oĩ vaño. CheRu uyapo oĩ vae che ayapo vi —jei—. ²⁰ Echa'ã cheRu cherau jare uicuaaca ma cheve opaete iparaviqui. Jare uicuaacata vi cheve mbaraviqui tuicha ete cua reta güi vae, pepiacañi ete vaerã jese —jei Jesús chupe reta—.

²¹ CheRu umee tecove umanocue vae reta pe. Jae ramiño vi che amee tecove amocue vae reta pe. Amee aipota vae pe —jei—. ²² CheRu ndarau uãa ivi pegua reta. Echa'ã umañota cheré aãa vaerã —jei—. ²³ Jucuarãi opaete vae chepiuta uipiu cheRu rami. Chepiu'ã vae uipiu'ã vi cheRu. Echa'ã jae co chembou —jei—.

²⁴ Añete che jae peve, chiñee piyandu yave jare chembou vae perovia yave, penoi ma tecove opa mbae vae. Ndarau ma piñeãaca. Peasa ma co mano güi tecove opa mbae vae

pe. ²⁵ Añete che jae peve, outa ma ara - jáema ou - umanocue vae reta uyandu vaerã chiñee - che co jae Tumpa Tai - jare uyandu vae reta icove yeta co —jei Jesús chupe reta—. ²⁶ Echa'ã cheRu ipuere umee tecove. Jae ramiño vi umaño cheré amee vaerã tecove —jei—. ²⁷ Jare cheRu umee cheve mbaepuere aã vaerã ivi pegua reta che ayeyapo cuimbaerã ramo —jei—. ²⁸ Agüiye pepiacañi cua re. Echa'ã outa ma ara opaete umanocue uñeñoti oĩ vae reta uyandu vaerã chiñee —jei—. ²⁹ Icavi vae uyapo vae reta icove yeta ou tecove opa mbae vae güinoi vaerã, jare icavi mbae vae uyapo vae reta icove yeta ou uñeãaca vaerã —jei Jesús chupe reta—.

Cristo regua umimbeu vae reta

³⁰ Cheiño chepuere'ã mbae ayapo. Che apuruãa cheRu umimbeu cheve vae rupi. Jáeramo apuruãa jupi vae rupi. Echa'ã ayapo'ã jae vae rupiño. Ayapo chembou vae jei vae rupi —jei—. ³¹ Cheiño chemiari peve chiye yave, pe reta peroviata'ã jocua jae vae. ³² Ime ñru chemimbeu vae, jare aicuaa jae jei peve cheré vae añete co —jei—. ³³ Echa'ã pe reta pemondo cuimbea reta Juan re uyapisaca vaerã, jare jae jei cheré vae añete co —jei—. ³⁴ Che aeca'ã quía chemimbeu vaerã, ñrei cua che jae peve piyembiasaca vaerã —jei Jesús—. ³⁵ Juan co jae penti mechero rami. Echa'ã mechero jendi jare umee yandevetembipe. Ñma ngatu rupi icavi echa peve piyerovia vaerã tembipe Juan umee peve vae re —jei—. ³⁶ Cua mbaraviqui ayapo vae reta chemimbeu ete Juan chemimbeu vae güi. CheRu uipota opa ayapo vaerã cua mbaraviqui reta, jare cua ayapo vae rupi aicuaaca ñru vae reta pe cheRu co chembou vae —jei—. ³⁷ CheRu chembou jare jae etei chemimbeu. Piyandu'ãi cheRu ñnee jare peecha'ãi —jei—. ³⁸ Piyapo'ã cheRu jei peve piyapo vaerã vae. Echa'ã jae chembou, ñrei chererovia'ã —jei—. ³⁹ Jecuaño pemingueta Tumpa ñnee pe uyecuatía oĩ vae. Echa'ã pepia pe piyemingueta joco pe pevãe quirã pepuere penoi tecove opa mbae vae. Jare Tumpa ñnee pe uyecuatía oĩ vae che co chemimbeu —jei Jesús chupe reta—. ⁴⁰ Ñrei pipota'ã perovia cheré tecove opa mbae vae amee vaerã peve —jei—.

⁴¹ Che ayeco'ã yembutuicha ivi pegua reta umee vae re. ⁴² Echa'ã aicuaa pe reta peau'ã Tumpa pepia pe —jei—. ⁴³ Che ayu cheRu chembou ramo, ñrei pe reta chembiresive'ã. Ñru vae ou yave jei vae rupi, pembiresiveta co —jei—. ⁴⁴ Pepuere'ã etei pepurugüirovia. Echa'ã jecuaño peeca ñru vae reta yembutuicha vaerã, ñrei peeca'ã yembutuicha Tumpa uipota tõi penoi vaerã vae. Tumpa co jae pentiño —jei Jesús—. ⁴⁵ Agüiye pepia pe piyemingueta che ayu pumbijeco vaerã cheRu jovai. Echa'ã Moisés uicuatía vae co pembijeco, yepetõi pe reta pere: 'Ore nduyapo Moisés uicuatía vae rupi. Jáeramo icavita oreve.' Jucuarã pere tõi —jei—. ⁴⁶ Echa'ã Moisés uicuatía vae perovia yave, chereroviata tõi co. Echa'ã Moisés uicuatía vae che co chemimbeu —jei—. ⁴⁷ Ñrei perovia'ã Moisés uicuatía vae ramo, ndarau vi perovia chiñee —jei Jesús chupe reta.

6

Jesús umingaru cinco mil cuimbea reta
(Mt 14.13-21; Mr 6.30-44; Lc 9.10-17)

¹ Cua jaicue rupi Jesús oo uvãe i guasu Galilea jovaicho pe. Jocua i guasu jee vi Tiberias. ² Jare tenonde yave Jesús umbigüera amocue imbaerasi vae reta, jare jeta vae uecha ma miacañi Jesús uyapo vae reta. Jáeramo añave cua reta yugüiraa Jesús jaicue. ³ Jayave Jesús oo uyupi ivitu guasu re jare uguapi joco pe jemimboe reta ndive. ⁴ Jare coiño ma ou judío reta ifiesta pascua jee vae. ⁵ Jare Jesús uma yave, uecha jeta vae yugüeru icoti. Jayave upirandu Felipe pe:

—¿Quiapa pe yandepuereta yagua mbiyape cua reta jou vaerã —jei.

⁶ Jare cua Jesús jei uicuaa vaerã mbae ra jeita Felipe. Echa'ã Jesús uicuaa ma mbae uyapota vae. ⁷ Felipe jei chupe:

—Doscientos ara mbaraviqui jepi pegua mbiyape ndarau uepiti cua reta jou vaerã, penti penti mboviño jou yave.

⁸ Penti Jesús jemimboe Andrés jee vae - jae co Simón Pedro tiví - jei Jesús pe:

⁹ —Ime cua pe oĩ penti cunumi pandepo mbiyape jare mocui pira güinoi vae. Ñrei jocua mbovi co cua jeta vae reta jou vaerã —jei.

¹⁰ —Pemimbeu chupe reta uguapi vaerã —jei Jesús.

Jare jeta capiichape oĩ joco pe. Jayave uguapĩ reta. Jare cuimbae reta cinco mil rupi ñugüinoi. ¹¹ Jayave Jesús uipisĩ jocua mbiyape jare umee yasurupai Tumpa pe. Jayave umee mbiyape jemimboe reta pe, jare jemimboe reta umee uguapĩ vae reta pe. Jae ramiño vi umee pira chupe reta. Jare opaete vae jou jare iyangapĩ. ¹² Jayave iyangapĩi reta ma yave, Jesús jei jemimboe reta pe:

—Pembati tembú uñepisãacue jembire vae, agüiye vaerã mbae uyemombo —jei.

¹³ Echa'ã jocua pandepo mbiyape güi jembire mbiyape uñepisãacue jare uyeeya joco pe, opa ma ucaru reta yave. Jayave Jesús jemimboe reta umbati jare umitinee doce canasta. ¹⁴ Jare joco pe ñugüinoi vae reta uecha ma yave cua miacañi Jesús uyapo vae, jei reta:

—Cua cuimbae jocua Tumpa iñee umimbeu vae etei co. Echa'ã Tumpa iñee pe uyecuatía oĩ outa co ivi pe —jei reta.

¹⁵ Jare Jesús uicuaa yugüeruta uipisi uyapo vaerã juvicha guasurã, yepe tẽi jae uipotã'ã. Jayave oo chugüi reta ivitu guasu re. Jaeño oo.

Jesús uguata i iárambo
(Mt 14.22-27; Mr 6.45-52)

¹⁶ Jare pĩtu ave ma yave, Jesús jemimboe reta ugüeyi yugüiraa i guasu pe. ¹⁷ Joco pe uyupĩ chalana pe jare umbipĩ uasa i guasu rupi Capernaum coti. Pĩtumimbi ma oĩ, jare Jesús ndei ou ye jae reta ñugüinoi vae pe. ¹⁸ Jayave tanta uyepeyu ivitu jare i uyembiaparoaroa. ¹⁹ Uruguata reta ma yave chalana penti legua rupi ndipo, uecha Jesús uguata ou i iárambo jare ou coiño ma chalana güi. Jayave uquiye reta. ²⁰ Ërei Jesús jei chupe reta:

—Che co. Agüiye pequiye —jei.

²¹ Jayave uyerovia reve jae reta umbuyupi Jesús chalana pe, jare jupivoiño chalana oo uvãe ivi pe uipotã yugüiraa uvãe vae pe.

Ueca reta Jesús

²² Piareve pe jeta vae reta jecuaeño upita i guasu jovaicho pe. Uecha pentiño chalana joco pe oĩ ndei Jesús jemimboe reta yugüiraa pipe mbove. Jare uicuaa Jesús oo'ã chalana pe jemimboe reta ndive. ²³ Ërei ñru chalana reta tenta guasu Tiberias güi yugüeru vae upite coiño tenonde yave ucaru reta vae güi. Echa'ã joco pe jae reta jou mbiyape yande yave umee yave yasurupai Tumpa pe. ²⁴ Uicuaa reta ma Jesús jare jemimboe reta mbaeti joco pe ñugüinoi. Jayave uyupĩ reta jocua chalana reta pe jare yugüiraa Capernaum coti, Jesús ueca vaerã.

Mbiyape tecove umeeta vae

²⁵ I guasu uasa reta ma yave, uvãe Jesús jare jei reta chupe:

—Oporomboe vae, ¿quirã i yave pa ndeyu cua pe?

²⁶ Jayave Jesús jei chupe reta:

—Añete che jae peve, pe reta chereca jocua mbiyape pemiangapĩi ramoño, chereca'ã jocua miacañi pe aipota aicuaaca peve ramo —jei—. ²⁷ Agüiye peparaviqui perembiurã imata'ã ico peve vae reño. Ërei peparaviqui perembiurã ameta peve vae re. Che ayeyapo cuimbaerã vae ameta peve perembiurã opata'ã vae. Echa'ã penoita tecove opa mbae vae. Echa'ã cheRu Tumpa uicuaaca ma peve chepuere ayapo jucuarã i —jei Jesús chupe reta.

²⁸ Jayave upirandu reta Jesús pe:

—¿Mbae pa nduyapota? ¿Quirã i pa orepuere nduyapo mbaraviqui Tumpa uipotã nduyapo vaerã vae? —jei reta.

²⁹ Jayave Jesús jei:

—Perovia cheré. Cua co mbaraviqui Tumpa uipotã piyapo vaerã vae. Echa'ã jae chembou —jei.

³⁰ Jayave jei reta chupe:

—¿Mbae nunga miacañi pa ndiyapota, nduecha vaerã jare ndugüirovia vaerã nderé? ¿Mbae nunga mbaraviqui pa ndiyapota nde? —jei reta—. ³¹ Yandetenondegua reta jou manã ñana pe. Echa'ã Tumpa iñee pe uyecuatía oĩ: 'Umee chupe reta jemiurã ara güi jou reta vaerã' —jei reta chupe.

³²—Añete che jae peve —jei Jesús—, Moisés umee'ã co jemiurã ara güi ou vae. Añave cheRu umeeta peve peremiurã añetete vae ara güi ou vae —jei—. ³³ Echa'ã tembfu Tumpa añave umeeta vae jocua co jae ara güi ou vae. Jae umeeta tecove ivi pegua reta pe —jei.

³⁴—Carai —jei reta—, jecuaeño emee oreve cua nunga oreremiurã.

³⁵—Che co jae jocua tembfu tecove umeeta vae —jei Jesús—. Ipotave cheré güirovia vae ndarau iyembai, jare ipotave cheré güirovia vae ndarau iúe —jei—. ³⁶ Èrei che jae ma peve cuarã: Perovia'a, yepe tēi cherecha ma. ³⁷ Opaete cheRu umee cheve vae reta güiroviata co cheré —jei—, jare ipotave cheré güirovia vae ndarau amombo. ³⁸ Echa'ã agüeyi ayu ara güi ayapo vaerã chembou vae jei vae. Ayu'a che jae vaëño ayapo vaerã —jei Jesús—. ³⁹ Ndarau amicañi penti ave opaete cheRu umee ma cheve vae reta güi. Echa'ã ambijecove yeta aru umanocue vae reta ipite güi ara taicuegua vae pe. Cua uipota chembou vae —jei—. ⁴⁰ Ipotave cherecha vae güinoita tecove opa mbae vae cheré güirovia yave, jare che ambijecove yeta aru umanocue vae reta ipite güi ara taicuegua vae pe. Cua uipota cheRu —jei Jesús.

⁴¹ Jayave judío reta iñeenguru Jesús re. Echa'ã Jesús jei ma: “Che co jae tembfu ara güi ou vae.” ⁴² Jare judío reta jei:

—Cua co jae Jesús. Jae co José tai. Yaicuaa catu co tu jare ichi. ¿Quirã pa ipuere jei: 'Agüeyi ayu ara güi?' —jei reta.

⁴³ Jayave Jesús jei chupe reta:

—Agüye piñeenguru checoti. ⁴⁴ CheRu chembou —jei—. CheRu güiroviaca cheré vaëño ipuere güirovia cheré. Jare che ambijecove yeta aru umanocue vae reta ipite güi ara taicuegua vae pe —jei chupe reta—. ⁴⁵ Tumpa iñee araca umimbeu vae uicuatía cuarã: ‘Jare Tumpa omboeta opaete vae.’ Jucuarã uicuatía —jei—. Ipotave uyapisaca Tumpa re jare uyemboe Tumpa jei chupe vae re vae outa checoti —jei—.

⁴⁶ Mbaeti quía uecha cheRu, jaeño che ayu Tumpa güi vae. Che aecha ma co cheRu —jei Jesús—. ⁴⁷ Añete che jae peve, cheré güirovia vae güinoi tecove opa mbae vae. ⁴⁸ Che co jae jocua tembfu tecove umee vae —jei—. ⁴⁹ Petenondegua reta jou jocua maná ñana pe jare umano reta. ⁵⁰ Che co jae tembfu ara güi ou vae. Cua tembfu jou vae ndarau umano —jei—. ⁵¹ Che co jae tembfu tecove umee vae. Che agüeyi ayu ara güi. Ipotave cua tembfu jou vae güinoita tecove opa mbae vae —jei Jesús chupe reta—. Jare jocua tembfu ameeta vae cherete co. Ameeta cherete ivi pegua reta güinoi vaerã tecove —jei.

⁵² Jayave judío reta uyeaca uyupii.

—¿Quirãita ra ipuere cua cuimbae umee yandeve jete yau vaerã? —jei reta.

⁵³—Añete che jae peve —jei Jesús chupe reta—, peu'a yave cherete jare cherugüi, ndarau tecove opa mbae vae penoi. Che co jae cuimbaerã uyeyapo vae —jei—. ⁵⁴ Cherete jare cherugüi jou vae güinoi tecove opa mbae vae, jare ambijecove yeta aru umanocue vae reta ipite güi ara taicuegua vae pe —jei—. ⁵⁵ Echa'ã cherete jare cherugüi tembfu añetete vae co —jei Jesús—. ⁵⁶ Cherete jare cherugüi jou vae ico che ndive jare che aico jae ndive —jei—. ⁵⁷ CheRu güinoi tecove opa mbae vae jare jae chembou, jare che anoi tecove opa mbae vae cheRu güi. Jae ramiño vi jocua cherete jou vae güinoita tecove opa mbae vae chegüi —jei chupe reta—. ⁵⁸ Che co jae tembfu ara güi ou vae. Cua tembfu jae'ã co jocua tembfu petenondegua reta jou vae rami. Echa'ã jae reta umano. Èrei ipotave cua tembfu jou vae güinoita tecove opa mbae vae —jei.

⁵⁹ Jucuarã jei Jesús judío reta itupao pe, Capernaum pe oporomboc oi yave.

Ñee reta tecove opa mbae vae pegua

⁶⁰ Cua uyandu reta yave, jeta Jesús jemimboe reta jei uyupe:

—Icavi'ã co cua jei vae. Agüye yayapisaca cua nunga ñee re —jei reta.

⁶¹ Jesús uicuaa jemimboe reta iñeenguru co icoti. Jayave jei chupe reta:

—¿Maera pa piñeenguru checoti cua re? ⁶² ¿Mbae pa piyapota cherecha yave ayupi aa tenonde aico vae pe? Che co jae cuimbaerã uyeyapo vae —jei—. ⁶³ Jaeño Espíritu Santo ipuere umee tecove opa mbae vae. Yanderete ipuere'ã umee yandeve cua nunga tecove. Cua amimbeu ma peve vae ivi pegua'ã co. Jae co tecove opa mbae vae pegua —jei Jesús—. ⁶⁴ Èrei amocue pe reta perovia'ã cheré —jei.

Echa'ā Jesús uicuaa iyipi güive quía reta güirovia'ā jese jare quía umeeta jovaicho reta pe. ⁶⁵ Jayave jei chupe reta:

—Jáeramo amimbeu ma peve quirāi cheRu güiroviaca cheré vaeño ipuere güirovia cheré —jei.

⁶⁶ Cua jaicue rupi jeta jemimboe reta uñatima ye Jesús güi, jare uguata'ā ma jae ndive.

⁶⁷ Jayave Jesús upirandu jocua doce vae reta pe:

—¿Peota pa chegüi pe reta vi?

⁶⁸ —¿Quía re pa ndoota, oreYa? —jei Simón Pedro chupe—. Nde co nemimbeu oreve tecove opa mbae vae regua. ⁶⁹ Jare ndugüirovia ma nderé jare nduicuaa ma nde co jae Tumpa oñono tee iyupeguarā vae —jei.

⁷⁰ Jayave Jesús jei:

—Che puparavo. Pe co jae doce vae reta. Ērei ime penti pepite pe oī vae uyeyocui aña guasu pe —jei.

⁷¹ Cuarāi uyemingueta Judas re. Judas co jae Simón Iscariote tai. Echa'ā Jesús uiparavo doce jare jae reta güi penti co jae Judas. Judas umeeta Jesús jovaicho reta pe.

7

Jesús tivi reta güirovia'ā jese

¹ Cua jaicue rupi Jesús oo tenta guasu Galilea pegua reta pe. Oo'ā Judea pe. Echa'ā judío reta uipota uyuca. ² Jare outa ma uvāe judío reta ifiesta Tabernáculos jee vae iara reta. ³ Jayave Jesús tivi reta jei chupe:

—Ecuca cua güi Judea pe, nderemimboe reta uecha vaerā mbaraviqui ndiyapo vae.

⁴ Echa'ā ime yave quía uipota iru vae reta uicuaa cavi vaerā jesegua vae, uyapo viari'ā iparaviqui. Ndiyapo co cua mbaraviqui. Jáeramo iyapo opaete vae jovaque —jei reta chupe.

⁵ Echa'ā tivi reta vi güirovia'ā jese. ⁶ Jayave Jesús jei chupe reta:

—Ndei uvāe jucuarāi ayapo vaerā, ěrei pe reta pepuere peo pequirēi vae rupi —jei—.

⁷ Ivi pegua reta ipuere'ā pemitarēi, ěrei ivi pegua reta chemitarēi. Echa'ā che amimbeu chupe reta icavi mbae vae co jae uyapo reta vae —jei Jesús—. ⁸ Pe reta pecua fiesta pe. Che ndei rani aa cua fiesta pe. Echa'ā ndei uvāe che aa joco pe vaerā —jei.

⁹ Jucuarāi jei chupe reta Jesús, jare upita Galilea pe.

Fiesta Tabernáculos jee vae

¹⁰ Cua jaicue rupi tivi reta yugüiraa ma yave fiesta pe, Jesús oo vi. Oo'ā jeta vae jupíe agüiye vaerā uecha reta. ¹¹ Jare judío reta ueca ñugüinoi Jesús fiesta pe.

—¿Quíape pa ime oī? —jei reta.

¹² Jare joco pe ñugüinoi vae reta uyeaca uyupii Jesús re. Amocue vae jei:

—Cuimbae jecocavi vae co jae.

Īru vae reta jei:

—Jecocavi'ā co. Upurumbitavi vae co.

¹³ Ērei opaete vae quíye judío reta güi. Jáeramo uyemingueta viariño reta.

¹⁴ Fiesta mbite ma yave, Jesús oo Tumpa jo pe umbipi oporomboe. ¹⁵ Jare judío reta ipiacañi.

—¿Quirāi ra cua cuimbae jeta uicuaa mbaembae re uyemboe mbae reve? —jei reta.

¹⁶ Jayave Jesús jei chupe reta:

—Cheporomboe chembaeño'ā co. Jae co chembou vae iporomboe —jei—. ¹⁷ Ipotave

Tumpa jei vae uipota uyapo vae uicuaata cheporomboe Tumpa iporomboe co. Uicuaata chiñeeño'ā co —jei—. ¹⁸ Ipotave vae jae iñee reño oporomboe yave, jae uipota ĩru vae reta pe uyembutuichaca vaerāño. Ērei quía ueca umbutuicha vaerā ombou vae, jae oporomboe añete vae re. Iyapu'ā co —jei Jesús—.

¹⁹ Moisés umee peve mboroyocui. Ērei mbaeti penti ave pe reta piyapo mboroyocui pe uyecuatía oī vae rupi —jei—. ¿Maera pa pipota cheyuca? —jei chupe reta.

²⁰ Jayave judío reta jei:

—Aña oya ma nderé. ¿Quía pa uipota ndeyuca? —jei reta.

²¹ —Ayapo ma penti mbaraviqui —jei Jesús —, jare opaete pe reta pepiacañi jese. ²² Moisés umimbeu peve piñemicircuncidaca vaerā. Ērei uyembipi'ā Moisés

umimbeu yave. Echa'ā Moisés itenondegua reta uyapo jucuarāi. Jare pe reta pepurumicircuncidaca mbutuu ara pe —jei—. ²³ Che ambigüera ma penti cuimbae mbutuu ara pe. Opaete jete ucuera cavi ma. ¿Maera pa pepochi cheve cua jeco pegua? Echa'ā pe reta pepurumicircuncidaca mbutuu ara pe mboroyocui Moisés umimbeu peve vae pipota'ā piyavi ramo —jei Jesús—. ²⁴ Agüiye pepuruāa peecha vae rupiño. Pepuruāa cavi jupi vae rupi —jei.

¿Jae pa co Cristo?

²⁵ Jáeramo amocue Jerusalén pegua reta jei:

—¿Jae'ā ra cua judío reta uipota uyuca vae? ²⁶ Mase, co oī cua pe, jare uyemingueta oī opaete vae pe. Ērei mbaeti quía mbae jei chupe. Aramoi yanderuvicha reta uicuaa ma jae co Cristo, Tumpa ombou vae —jei reta—. ²⁷ Ērei yaicuaa queti güi ou cua cuimbae. Echa'ā Cristo uyecuaa yave, ndarau quía uicuaa queti güi ou —jei reta.

²⁸ Jáeramo Jesús oporomboe oī rambueve Tumpa jo pe, iñeeāta reve jei:

—Pe reta checuaa co, jare picuaa co queti güi ayu vae. Ērei ayu'ā che aipota ayu rupiño. Echa'ā chembou vae imiari añete vae re, jare pe reta picuaa'ā chembou vae —jei—. ²⁹ Ērei che aicuaa. Echa'ā ayu jae oī vae güi. Jae chembou —jei.

³⁰ Jáeramo judío reta uipota tēi uipisi. Ērei uipisi'ā quía. Echa'ā ndei uvāe uyepisi vaerā. ³¹ Jare jeta joco pe ñugüinoi vae güirovia jese. Echa'ā jei reta:

—Cristo ou yave, ¿uyapota ra jeta ete miacañi cua cuimbae uyapo vae güi?

Fariseo reta ombou jembiocui reta uipisi vaerā Jesús

³² Jare fariseo reta uyandu jeta vae iñeenguru ñugüinoi Jesús re. Jayave sacerdote reta itenondegua reta jare fariseo reta ombou jembiocui reta uipisi vaerā Jesús. ³³ Jayave Jesús jei:

—Aita pe reta ndive michi peguaño. Jayave aata chembou vae pe. ³⁴ Cherecata co, ěrei ndarau chevāe. Ndarau peo che aita vae pe —jei.

³⁵ Jayave judío reta jei uyupe:

—¿Queti ra oota cua cuimbae agüiye vaerā ñavāe chupe? Oota ndipo judío reta judío mbae vae reta ipite rupi uñemai vae pe. Omboeta ndipo judío mbae vae reta. ³⁶ ¿Mbae ra uipota jei, jei yave cuarāi: 'Cherecata co, ěrei ndarau chevāe. Ndarau peo che aita vae pe?' —jei reta.

I tecove umee vae

³⁷ Jocua ara fiesta opata ma yave icavi ete opaete ĩru fiesta iara güi. Jayave Jesús uyemboi jare iñeeāta reve jei:

—Ime yave quía iúe vae, tou checoti i tou —jei—. ³⁸ Cheré güirovia vae güi usirita jeta i tecove umee vae. Jucuarāi Tumpa iñee pe uyecuatía oī —jei.

³⁹ Jucuarāi uyemingueta Jesús Espiritu Santo re. Uipota jei umeeta Espiritu Santo güirovia jese vae reta pe. Echa'ā ndei umee Espiritu Santo. Echa'ā Jesús ndei oo ye ara pe.

Yati vae reta uyeaca uyupii

⁴⁰ Cua uyandu yave, amocue joco pe ñugüinoi vae jei:

—Cua cuimbae jocua Tumpa iñee umimbeu vae etei co.

⁴¹ ĩru vae reta jei:

—Cua cuimbae Cristo, Tumpa ombou vae co.

Ērei amocue vae jei:

—¿Galilea pegua ra Cristo? ⁴² Echa'ā Tumpa iñee pe uyecuatía oī Cristo co jae David iñemoñaeta reta pegua jare Belén pegua co. Echa'ā David joco pegua vi co —jei reta.

⁴³ Jesús jei chupe reta vae jeco pegua, joco pe ñugüinoi vae reta uyeaca uyupii. ⁴⁴ Jare amocue vae uipota tēi uipisi Jesús, ěrei uipisi'ā quía.

Mbaeti etei quía uyemingueta jucuarāi

⁴⁵ Jayave uyeyocui vae sacerdote reta itenondegua reta jare fariseo reta ombou vae reta yugüirra ye jucuarāiño chupe reta. Jayave sacerdote reta itenondegua reta jare fariseo reta jei jembiocui reta pe:

—¿Maera pa peru'ā?

⁴⁶ Jembiocui reta jei:

—Echa'ā mbaeti etei quía uyemingueta jocua cuimbae uyemingueta rami.

⁴⁷ Jayave fariseo reta jei:

—¿Piyembitavica ma pa pe reta vi? ⁴⁸ ¿Güirovia ma ra jese mburuvicha reta jare fariseo reta? Güirovia'ā penti ave —jei reta—. ⁴⁹ Ērei cua jeta vae uicuaa'ā mboroyocui pe uyecuatía oī vae. Tumpa uiporacata co chupe reta —jei reta.

⁵⁰ Jayave penti jae reta ipite pe oī vae jei ĩru reta pe - jae co Nicodemo jee vae - tenonde yave jae oo opou Jesús pe pĩtu yave:

⁵¹ —Mboroyocui pe uyecuatía oī vae rupi yandepuere'ā ñaāa ipotave vae ndei yayapisaca jese mbove. Echa'ā yayapisaca jese yave, yaicuaa mbae uyapo vae —jei.

⁵² ĩru reta jei chupe:

—¿Nde vi ra Galilea pegua? Ndeeca yave, ndicuaata mbaeti co penti ave Tumpa iñee umimbeu vae Galilea pegua —jei reta.

Cuña menda re uyuvanga vae

⁵³ Jayave opaete vae yugüiraa ye jenta jenta pe.

8

¹ Ērei Jesús oo ivitu guasu Olivos jee vae pe.

² Piareve pe neimbove asi Jesús oo ye Tumpa jo pe. Jayave jeta vae yugüeru jae oī vae pe, jare jae uguapi omboe reta oī. ³ Jayave mboroyocui re oporomboe vae reta jare fariseo reta güeru penti cuña. Uipocou reta cuña menda re uyuvanga oī yave. Jayave oñono reta joco pe ñugüinoi vae reta ipite pe.

⁴ —Oporomboe vae —jei reta Jesús pe—, cua cuña nduipocou menda re uyuvanga oī yave. ⁵ Mboroyocui pe Moisés yandecui yayuca vaerā cua nunga cuña reta ita pe. ¿Mbae pa ndere nde cua re? —jei reta.

⁶ Cua jei reta uicuaa vaerā mbae ra jeita Jesús. Echa'ā uipota umbijeco. Jayave Jesús ipe jare uicuatía mbae ivi re ipoāca pe. ⁷ Jecuaecuae upirandu reta chupe cua re. Jayave Jesús uyemboi jare jei chupe reta:

—Mbaeti mbaeyoa güinoi pepite pe vae rani tuyapi ita pe.

⁸ Jayave ipe ye jare uicuatía ye mbae ivi re ipoāca pe. ⁹ Ērei cua uyandu reta yave, ipia umbijeco jeco re jare yugüiraa joco güi penti penti rupi. Tenonde yugüiraa indechi vae reta. Jayave opaete vae yugüiraa. Jaeño Jesús upita joco pe cuña jae jovai uyemboi oī vae ndive. ¹⁰ Jayave Jesús uyemboi ye umaee jese, jare jei:

—¿Jama pa jocua cuimbae reta, cuña? ¿Mbaeti ma pa quía nembijeco?

¹¹ —Mbaeti quía, carai —jei cuña chupe.

Jayave Jesús jei:

—Che numbijeco'ā vi. Ecu, agüiye ye iyapo jocua mbaeyoa —jei.

Jesús co penti tembipe rami

¹² Cua jaicue rupi Jesús jei yati vae reta pe:

—Che co jae penti tembipe rami. Ayu co ivi pegua reta uecha cavi vaerā. Ico che ndive vae ndarau uguata pĩtumimbi pe. Echa'ā güinoita tecove ipuere vaerā uecha cavi —jei.

¹³ Jayave fariseo reta jei Jesús pe:

—Nemimbeu oreve vae ndarau ndugüirovia. Echa'ā nde nemiari ndiyee —jei reta.

¹⁴ —Amimbeu ma peve vae pepuere perovia, yepe tēi chemiari peve chiyee —jei Jesús—. Echa'ā che aicuaa co queti güi ayu jare queti aa vae. Ērei pe reta picuaa'ā queti güi ayu jare queti aa vae. ¹⁵ Pe reta pepuruāa opaete ivi pegua reta upuruāa rami. Che aāa'ā quía —jei—. ¹⁶ Ērei apuruāa yave, apuruāa añete vae rupi. Echa'ā cheRu chembou. Jare che jare cheRu nupuruāa - cheiño'ā co —jei—. ¹⁷ Peporoyocui pe uyecuatía oī cuarāi: 'Mocui jei vae oyovaque yave, peroviata co.' Jucuarāi uyecuatía oī —jei—. ¹⁸ Chemiari peve chiyee jare cheRu chemimbeu peve - jae co chembou —jei.

¹⁹ Jayave judío reta jei:

—¿Quiape pa oī ndeRu?

—Pe reta checuaa'ā jare picuaa'ā cheRu —jei Jesús chupe reta—. Checuaa yave mona, cheRu picuaata tēi co vi —jei.

²⁰ Cua jei Jesús Tumpa jo pe corepoti Tumpa pegua jiru reta ñugüinoi vae pe. Echa'ā joco pe oporomboe. Ērei uipisi'ā quía. Echa'ā ndei uvāe uyepisi vaerā.

Pe reta ndarau pepuere peo che aata vae pe

²¹ Jare Jesús jei ye chupe reta:

—Aata ma cua güi. Pe reta cherecata co, ñrei pamanota pemaeyoa uyembai mbae reve. Pe reta ndarau pepuere peo che aata vae pe —jei.

²² —¿Uyeyucata ra? —jei judío reta—. Echa'ã jei ma: 'Pe reta ndarau pepuere peo che aata vae pe.'

²³ Jayave Jesús jei:

—Pe reta ivi pegua co, ñrei che ara pegua co. Pe reta ivi pegua co, ñrei che ivi pegua'ã co. ²⁴ Amimbeu ma peve pamanota pemaeyoa uyembai mbae reve. Echa'ã pamanota co pemaeyoa uyembai mbae reve, perovia'ã yave che co jae vae —jei.

²⁵ Jayave jei reta Jesús pe:

—¿Quía pa co nde?

—Jocua tenonde güive amimbeu ma peve vae —jei Jesús—. ²⁶ Jeta mbaembae re chepuere chemiari peré jare jeta mbae re chepuere puãa. Ñrei chembou vae imiari añete vae re, jare amimbeu ivi pegua reta pe chembou vae umimbeu cheve vae —jei.

²⁷ Jae reta uicuaa'ã Jesús imiari chupe reta Tu ara pe oí vae regua. ²⁸ Jayave Jesús jei:

—Pe reta chereupi ma curusu re yave - che ayeyapo cuimbaerã vae - picuaata che co jae. Ayapo'ã mbae che aipota ayapo rupiño. CheRu umimbeu cheve vae rupiño chemiari —jei—. ²⁹ Jare chembou vae ico che ndive. Chereya'ã cheiño aico vaerã. Echa'ã jecuaño ayapo jae uipota vae rupi —jei.

³⁰ Jare Jesús imiari yave, jeta vae güirovia jese.

Añete vae peyorata co

³¹ Jayave Jesús jei jocua judío güirovia jese vae reta pe:

—Jecuaño piyapo yave che jae peve piyapo vaerã vae, picota co cheremimboe retarã añetete vae. ³² Jare picuaata añete vae, jare añete vae peyorata co —jei.

³³ Judío reta jei chupe:

—Abraham inñemoña reta co ore. Mbaeti etei nduyeyocui quía pe. ¿Maera pa ndere nduyeyorata co? —jei reta.

³⁴ —Añete che jae peve —jei Jesús—, iyoa vae uyeyocui oí mbaeyoa pe. ³⁵ Uyeyocui vae ipuere'ã ico ete tenta pe. Ñrei tenta iya tai jecuaño ico tenta pe —jei—. ³⁶ Che co jae Tumpa Tai. Che poyora yave mbaeyoa güi, añetete piyeyora ma co —jei—. ³⁷ Che aicuaa Abraham inñemoña reta co pe reta. Ñrei pipota cheyuca, pipota'ã piyapo che jae peve piyapo vaerã vae ramo —jei—. ³⁸ Chemiari peve cheRu ndive aico yave aecha vae re, jare pe reta piyapo peru umimbeu peve piyapo vaerã vae rupi —jei Jesús.

Aña guasu co jae peru

³⁹ —Abraham co jae oreru —jei reta.

—Pe reta Abraham tai reta añetete vae yave mona —jei Jesús—, piyapota tõi co Abraham uyapo vae rami. ⁴⁰ Ñrei añave pipota cheyuca, yepe tõi amimbeu ma peve añete vae. Jae co Tumpa umimbeu cheve vae. Cuarã'ã uyapo Abraham —jei—. ⁴¹ Pe reta piyapo peí peru iparaviqui —jei Jesús chupe reta.

—Oremiñemoña'ã co aguasa pe oreru reta —jei reta—. Tumpaño co jae oreRu.

⁴² Jayave Jesús jei chupe reta:

—Tumpa co jae peRu yave mona, pe reta cherauta tõi co. Echa'ã che ayu Tumpa güi. Che Tumpa pegua co. Che aipota ramoño'ã co ayu. Jae co chembou —jei—. ⁴³ ¿Maera pa picuaa'ã amimbeu peve vae? Pipota'ã piyapisaca chiñee re. Jáeramo picuaa'ã —jei Jesús—. ⁴⁴ Aña guasu co jae peru, jare pe reta pipota piyapo peru uipota vae rupi. Peru jecuaño upuruyuca ico, jare uyapo'ã etei añete vae rupi. Echa'ã añetete vae pegua'ã co. Jae co aña guasu. Jáeramo jecuaño iyapu. Echa'ã jae co iyapu vae jare omboe ivi pegua reta iyapu vaerã —jei—. ⁴⁵ Ñrei pe reta chererovia'ã, añete vae amimbeu peve ramo —jei—. ⁴⁶ Mbaeti penti yepe pepuere pere cheve: 'Ndeyoa co.' Echa'ã che amimbeu peve añete vae. ¿Maera pa chererovia'ã? —jei—. ⁴⁷ Tumpa tai reta uyapisaca Tumpa inñee re. Pe reta Tumpa tai reta'ã co. Jáeramo piyapisaca'ã jese —jei.

Cristo icoño mai

⁴⁸ Jayave judío reta jei:

—Ndoe ma nde co jae penti Samaria pegua, jare aña oya ma nderé. Añete co cua ndoe vae —jei reta.

⁴⁹—Oya'ã co cheré aña —jei Jesús—. Che aipiu aī cheRu, ěrei pe reta chererĩro. ⁵⁰Ĕrei aipota'ã ivi pegua reta chembutuicha vaerã. Ime co quía uipota chembutuichaca vae. Jae upuruãata co —jei Jesús—. ⁵¹Añete che jae peve, uyapo che jae chupe uyapo vaerã vae ndarau umano —jei.

⁵²Jayave judío reta jei Jesús pe:

—Añave nduicuaa ma aña oya co nderé. Abraham jare Tumpa iñee araca umimbeu vae reta umano. Ĕrei nde ndere: 'Uyapo che jae chupe uyapo vaerã vae ndarau umano.' ⁵³¿Tuicha ete pa nembraepuere yandetenondegua Abraham imbaepuere güi? Echa'ã Abraham umano. Jae ramiño vi Tumpa iñee araca umimbeu vae reta umano. ¿Quía pa co nde? ¿Mbae pa ndere ndiyee? —jei reta Jesús pe.

⁵⁴—Ayembutuicha'ã co —jei Jesús—. Echa'ã jucuarã ayapo yave, jocua nunga yembutuicha mbae'ã co. Ĕrei cheRu chembutuichaca, jare pe reta pere Tumpa co jae peRu —jei—. ⁵⁵Ĕrei pe reta picuaa'ã Tumpa. Che aicuaa co. Che jae yave: 'Aicuaa'ã', cheaputa tēi co pe reta peapu rami. Ĕrei aicuaa co, jare ayapo jei cheve ayapo vaerã vae —jei—. ⁵⁶Petenondegua Abraham uyerovia cherechata ramo. Cherecha co jare uyerovia —jei.

⁵⁷Jayave judío reta jei chupe:

—Nde ndei nenoī cincuenta año. ¿Quirã pa ndepuere ndere ndeecha co Abraham? —jei reta.

⁵⁸—Añete che jae peve —jei Jesús—, ndei Abraham ico mbove, che imeño mai aico —jei.

⁵⁹Jayave judío reta omonoo ita reta uyapi vaerã tēi Jesús. Ĕrei Jesús uasa jae reta ipite rupi oē Tumpa jo güi, jare jae reta uecha'ã ma.

9

Jesús umbigüera jesa mbae vae

¹Jare Jesús uasa oo yave, uecha penti cuimbae jesa mbae vae. Cua cuimbae jucuarã ico ichi güi oa güive. ²Jayave Jesús jemimboe reta upirandu Jesús pe:

—Oporomboe vae, ¿quía pa iyoa, ichi güi oa yave jesa mbae vaerã? ¿Iyoa pa jae etei? ¿Iyoa pa tu jare ichi? —jei reta.

³—Jae imbaeyoa jeco pegua'ã co jare tu jare ichi imbaeyoa jeco pegua'ã co cuarã oī —jei Jesús—. Cuarã oī Tumpa imbaepuere uyecuaa vaerã ucuera yave —jei—. ⁴Icavi co ayapo vaerã ara rupi chembou vae iparaviqui. Echa'ã ara rupi ñanoi tembipe. Ĕrei outa pītu, jare pītu yave mbaeti quía ipuere uparaviqui —jei—. ⁵Cua ivi pe aico rambueve, che co jae penti tembipe rami. Ayu co ivi pegua reta uecha cavi vaerã —jei.

⁶Cua jei ma yave, undivī ivi re jare jocua güi uyapo tuñuu. Jayave oñono tuñuu cuimbae jesa re. ⁷Jayave jei chupe:

—Ecuā iyoe nderesa i Siloé pe.

(Cua Siloé uipota jei: "Uyemondo"). Jayave cuimbae oo oyoe jesa jare ou ye yave, umae ma. ⁸Jayave cuimbae jenta iyipi rupigua reta jare ĩru vae reta tenonde uecha uyerure oī corepoti re vae jei:

—¿Jae'ã ra cua uguapi uyerure corepoti re vae?

⁹Amocue vae jei:

—Jae co.

Ĩru vae reta jei:

—Jae'ã co. Ĕrei jae echa ete vae co.

Ĕrei cuimbae jei:

—Che co jae.

¹⁰Jayave jei reta chupe:

—¿Quirã pa añave ndepuere netae?

¹¹—Jocua cuimbae Jesús jee vae uyapo tuñuu oñono cheresa re —jei cuimbae chupe reta—. Jayave jei cheve: 'Ecuā Siloé pe iyoe nderesa' —jei cheve, jei—. Jáeramo aa ayoe cheresa, jare amae ma —jei.

¹²—¿Quiape pa ime oī? —jei reta.

—Aicuaa'ā —jei cuimbae chupe reta.

Fariseo reta upirandu cuimbae ucuera vae pe

¹³ Jayave jae reta güiraa fariseo ñugüinoi vae pe cuimbae tenonde yave jesa mbae ico vae. ¹⁴ Jare jocua ara mbutuu ara co. Echa'ā jocua ara Jesús uyapo tuñuu umimae vaerā cuimbae. ¹⁵ Jayave fariseo reta vi upirandu cuimbae pe quirāi ra ipuere umae.

—Oñono tuñuu cheresa re —jei cuimbae—. Jayave ayoe cheresa, jare amae voi —jei.

¹⁶ Amocue fariseo reta jei:

—Tumpa pegua'ā co cua cuimbae. Echa'ā uyapo mbutuu ara pe mboroyocui pe jei agüiye yayapo vaerā vae.

Ērei ĩru fariseo reta jei:

—¿Quirāi ra ipuere cuimbae iyoa vae uyapo cua nunga miacañi?

Jare uyeaca reta uyupii. ¹⁷ Jayave jei reta ye cuimbae tenonde yave jesa mbae ico vae pe:

—¿Mbae pa ndere nde jocua nemimae vae re?

—Jae co penti Tumpa ĩñee umimbeu vae —jei chupe reta.

¹⁸ Judío reta güirovia'ā cua cuimbae tenonde yave jesa mbae ico vae co. Güirovia'ā vi jaeramo co umae. Jáeramo uenica cuimbae umae ma vae tu jare ichi. ¹⁹ Jayave upirandu reta tu jare ichi pe:

—¿Jae pa co cua nderai jesa mbae co oa pere chupe vae? ¿Quirāi pa añave umae?

²⁰ —Aicuaa jae co cherai jesa mbae oa ichi güi vae —jei chupe reta—. ²¹ Ērei nduicuaa'ā quirāi ra añave umae. Nduicuaa'ā vi quía ra umimae. Pepirandu chupe. Echa'ā ucuacuaa ma co jae. Jae etei ipuere umimbeu peve —jei.

²² Jucuarāi jei cuimbae tu jare ichi, uquiye judío reta güi ramo. Echa'ā judío reta jei ma uyupe: “Jocua Jesús co jae Cristo jei vae tuyemombo yandetupao güi.” ²³ Jáeramo tu jare ichi jei: “Ucuacuaa ma co jae. Pepirandu chupe.”

²⁴ Jayave judío reta ueni ye cuimbae tenonde yave jesa mbae ico vae.

—Emimbeu cavi oreve Tumpa jovaque —jei reta chupe—. Echa'ā nduicuaa cua cuimbae iyoa vae co.

²⁵ —Aicuaa'ā iyoa vae ra jae —jei cuimbae—. Ērei cua co aicuaa: Tenonde yave cheresa mbae aico vae co, añave amae.

²⁶ Jayave upirandu reta ye chupe:

—¿Mbae pa uyapo ndeve? ¿Quirāi pa nemimae?

²⁷ —Amimbeu ma peve —jei cuimbae—, Ērei pipota'ā piyapisaca cheré. ¿Maera pa pipota piyandu ye? ¿Pipota pa pe reta vi piyeyapo jemimboe retarā? —jei.

²⁸ Jayave judío reta uñeengata cuimbae pe.

—Nde co jae jemimboe —jei reta—. Ore co jae Moisés jemimboe reta. ²⁹ Ore nduicuaa Tumpa umingueta co Moisés. Ērei nduicuaa'ā quía pegua ra cua cuimbae —jei reta.

³⁰ —Cua co penti miacañi —jei cuimbae—. Pe reta picuaa'ā quía pegua ra. Ērei jae chemimae. ³¹ Yaicuaa Tumpa uyapisaca'ā iyoa vae reta re. Ērei ime yave quía umbiadora Tumpa jare uyapo Tumpa jei vae, Tumpa uyapisaca jese —jei—. ³² İvi uyeyapo güiye mbaeti etei quía ipuere umimae jesa mbae oa ichi güi vae —jei—. ³³ Tumpa pegua'ā yave cua cuimbae, ipuereta'ā tēi mbae uyapo —jei.

³⁴ Jayave judío reta jei chupe:

—Nde ndea ndesi güi ndeyoa reve. Mbaeti mbae re ndepuere oremboe —jei reta.

Jayave omombo reta cuimbae.

Tumpa coti jesa mbae vae reta

³⁵ Jare Jesús uicuaa yave judío reta omombo ma cuimbae, oo ueca. Jare oovāiti yave, jei chupe:

—¿Nderovia pa cuimbaerā uyeyapo vae re?

³⁶ —¿Quía pa co jae, carai? —jei Jesús pe—. Emimbeu cheve, arovia vaerā jese.

³⁷ —Ndeecha ma —jei Jesús chupe—. Che ayemingueta aī nde ndive vae co jae.

³⁸ —CheYa, arovia ma —jei cuimbae.

Jayave cuimbae uyeatica Jesús jovai jare umbiadora. ³⁹ Jayave Jesús jei:

—Ayu İvi pe ambiyao vaerā uyugüi İvi pegua reta. Ayu ipuere mbae umae vae reta umae vaerā, jare ipuere umae vae reta agüiye vaerā umae —jei.

⁴⁰ Amocue fariseo reta joco pe ñugüinoi vae uyandu cua, jare upirandu chupe:

—¿Ore vi pa co jae umae mbae vae reta?

⁴¹ —Pemae'ã yave, mbaetita tõi teco penoi —jei Jesús—. Ërei pere ma: 'Numae.' Jáeramo teco imeño penoi —jei.

10

Jesús umijaanga ovecha-rocai

¹ —Añete che jae peve —jei Jesús—, imonda vae uique'ã onque rupi ovecha-rocai pe. Uique icoti'ã rupi. Echa'ã uipota oñomi güiraa ambie vae iovecha reta —jei—. ² Ërei ovecha iyandarecoa uique onque rupi —jei—. ³ Jare ovecha iyandarecoa uipota uique yave, onque jãroa uipea chupe. Jare ovecha reta uyandu iyandarecoa iñee. Echa'ã iyandarecoa ueni ovecha reta jee rupi jare güiraa ovecha-rocai güi —jei—. ⁴ Jare güiraa yave opaete imbae reta ovecha-rocai güi, jae oo tenonde jare ovecha reta yugüiraa jaicue. Echa'ã uicuaa iñee —jei—. ⁵ Ndarau yugüiraa cuimbae uicuaa mbae vae jaicue. Osita chugüi. Echa'ã uicuaa'ã iñee —jei.

⁶ Cua ñee umijaanga vae pe Jesús omboe reta tõi, Ërei jae reta uicuaa'ã mbae re ra umijaanga cua jei chupe reta vae.

Jesús co jae ovecha reta iyandarecoa icavi vae rami

⁷ Jayave Jesús jei:

—Añete che jae peve, che co jae ovecha-rocai jonque rami. ⁸ Amocue vae yugüeru ndei ayu mbove. Ërei ovecha reta uyapo'ã jocua reta jei vae. Echa'ã jocua reta imonda vae reta co. Jae reta uipota güiraa ambie vae iovecha reta —jei—. ⁹ Che co jae onque rami. Che rupi ovecha-rocai pe uique vae uyembiasacata co. Uiqueta jare oëta jare uvãeta mbae jou vaerã —jei Jesús—. ¹⁰ Imonda vae ou güiraa vaerã ambie vae iovecha reta. Ou uyuca vaerã ovecha reta. Che ayu ivi pegua reta güinoi vaerã tecove opa mbae vae, jare jocua tecove güinoi yave tuicha uyeroviata —jei—. ¹¹ Che co jae ovecha reta iyandarecoa icavi vae rami. Echa'ã ovecha reta iyandarecoa icavi vae umano ovecha reta uepi vaerã —jei—. ¹² Jepi re ovecha reta re uyandareco vae uecha yave yaguapãta ou, ueya ovecha reta jare osi. Echa'ã jae'a co ovecha reta iyandarecoa añetete vae, jare ovecha reta imbae'ã. Jayave yaguapãta ou uipisi amocue ovecha reta, jare ñru ovecha reta opa uñemai. ¹³ Jocua cuimbae osi jepi reño uyandareco ovecha reta re ramo. Echa'ã ipiatiti'ã ovecha reta uiporara yave —jei—.

¹⁴ Che co jae ovecha reta iyandarecoa icavi vae rami. Aicuaa cheovecha reta jare cheovecha reta checuaa —jei Jesús—. ¹⁵ Jucuarãi cheRu checuaa jare che aicuaa cheRu. Jare che amanota ovecha reta aepi vaerã —jei—. ¹⁶ Jare ime anoi ñru ovecha reta. Jae reta cua pegua'ã co. Jae reta aruta vi. Jae reta uyapisacata chiñee re. Jayave imeta penti ati jare penti ovecha reta iyandarecoa —jei—.

¹⁷ CheRu cherau amanota ramo. Amanota co, cherecove anoi ye vaerã —jei—. ¹⁸ Mbaeti quã ipuere uequi chegüi cherecove. Amanota aipota ramo. Chepuere amee cherecove amano vaerã, jare chepuere anoi ye. Cuarãi cheocui cheRu —jei.

¹⁹ Jesús cua jei ramo, judío reta uyeaca ye uyupii. ²⁰ Jeta jae reta jei:

—Aña oya ma jese. Uicuaa'ã ma mbae jei. ¿Maera pa piyapisaca jese?

²¹ Ñru vae reta jei:

—Mbaeti quã aña oya jese vae ipuere uyemingueta jucuarãi. Ipuere'ã etei aña umimae jesa mbae vae reta —jei reta.

Judío reta güirãro Jesús

²² Roi ma Jerusalén pe, jare judío reta uyapo ñugüinoi fiesta imandúa vaerã Tumpa jo uyepiu ye yave. ²³ Jare Jesús uguata Tumpa jo pe oca Salomón jee vae rupi. ²⁴ Jayave judío reta uyembati Jesús iyipi rupi jare jei:

—¿Quirãi yave pa nemimbeu cavita oreve, agüiye vaerã orembopa? Nde co jae Cristo yave, emimbeu cavi oreve —jei reta.

²⁵ —Amimbeu ma peve —jei Jesús—, Ërei perovia'ã chiñee. CheRu chembou cua mbaraviqui ayapo vaerã, jare cua mbaraviqui uicuaaca quã co che —jei—. ²⁶ Amimbeu ma peve pe reta cheovecha'ã co. Jáeramo perovia'ã cheré. ²⁷ Cheovecha reta uyapisaca chiñee re. Aicuaa cheovecha reta, jare jae reta yugüiraa cheraicue rupi —jei—. ²⁸ Jare amee

chupe reta tecove opa mbae vae, jare ndarau etei oo cañitei pe. Mbaeti quía ipuere upĩro chegüi —jei—. ²⁹ CheRu umee ma cheve cua reta, jare cheRu imbaepuere tuicha ete opaete vae imbaepuere güi. Jare mbaeti quía ipuere upĩro cheRu güi —jei—. ³⁰ Che jare cheRu pentiño co —jei.

³¹ Jayave judío reta omonoo ye ita reta uyapi vaerã tēi Jesús. ³² Jayave Jesús jei chupe reta:

—Aechaca ma peve jeta mbaraviqui icavi vae. Cua ayapo cheRu imbaepuere rupi. ¿Mbae nunga mbaraviqui jeco pegua pa pipota cheapi ita pe? —jei.

³³ —Penti mbaraviqui icavi vae jeco pegua'ã —jei judío reta chupe—. Nde ndere icavi mbae vae Tumpa coti. Jocua jeco pegua nduyapita ita pe. Echa'ã nde co jae penti cuimbaeño, ãrei ndere ndiyupe nde co jae Tumpa vae —jei reta.

³⁴ Jayave Jesús jei chupe reta:

—Mboroyocui penoi vae pe uyecuatía oĩ quirãi Tumpa jei cuarãi: 'Pe reta co jae tumpa reta.' Jucuarãi jei. ³⁵ Echa'ã Tumpa iñee ou chupe reta vae pe, jae etei umbijee tumpa reta. Jare Tumpa iñee pe uyecuatía oĩ vae jecuaeño co añete. ³⁶ Jáeramo ¿maera pa pere cheve: 'Nde ndere icavi mbae vae Tumpa coti', che jae vae jeco pegua? Echa'ã che jae: 'Che co jae Tumpa Tai.' Echa'ã Tumpa cheñono tee cua mbaraviqui ayapo vaerã, jare jae chembou cua ivi pe —jei—. ³⁷ Ayapo'ã yave mona cheRu iparaviqui, agüiyeta tēi chererovia. ³⁸ Ërei ayapo co cheRu iparaviqui. Jáeramo yepe tēi chererovia'ã, perovia mbaraviqui ayapo vae cheRu pegua co, picuaa vaerã cheRu ico che ndive jare che aico cheRu ndive —jei.

³⁹ Jayave judío reta uipota ye tēi uipisi Jesús, ãrei jae oo chugüi reta.

⁴⁰ Jare Jesús oo ye i Jordán jovaicho pe tenonde yave Juan upurumbibautiza oĩ vae pe, jare joco pe upita. ⁴¹ Jare jeta vae reta yugüeru jae oĩ vae pe jare jei:

—Juan uyapo'ã penti ave miacañi. Ërei opaete Juan jei cua cuimbae re vae añete co —jei reta.

⁴² Jare jeta vae güirovia Jesús re joco pe.

11

Lázaro imano

¹ Penti cuimbae Lázaro jee vae imbaerasi oĩ. Jae jare María jare Marta - jae co María tique - Betania pegua reta co. ² Jocua María upiyere mbae ipiche cavi vae yandeYa re jare umitini ipi ía pipe. Jocua Lázaro imbaerasi oĩ vae María iquivi co. ³ Jare Lázaro jindi reta omondo umimbeu vaerã Jesús pe:

—OreYa, imbaerasi oĩ cua ndeau vae.

⁴ Jesús cua uicuaa yave, jei:

—Cua imbaerasi ou chupe írú vae reta umbiadora vaerã Tumpa. Ou'ã jae umano vaerã. Echa'ã che co jae Tumpa Tai, jare írú vae reta chembiadorata cua mbaerasi jeco pegua —jei.

⁵ Jesús uau Marta jare ipiqui jare Lázaro. ⁶ Ërei uicuaa ma yave Lázaro imbaerasi oĩ, upitaño mocui ara joco pe. ⁷ Cua jaicue rupi jei jemimboe reta pe:

—Yaa ye ma Judea pe.

⁸ —Oporomoe vae —jei reta—, ndei co ima judío reta uipota tēi ndeapi ita pe joco pe. Jáeramo ¿maera pa ndeo yeta?

⁹ —Ime doce ora güinoi ara —jei Jesús—. Ara rupi uguata vae ndarau ipi güirocua. Echa'ã güinoi tembipe cua ivi pegua —jei—. ¹⁰ Ërei pítu yave uguata vae ipi güirocua. Echa'ã güinoi'ã tembipe.

¹¹ Jucuarãi jei Jesús. Jayave jei:

—Ñaneamigo Lázaro oque ma oĩ. Ërei che aata amomba —jei.

¹² Jemimboe reta jei:

—OreYa, oque oĩ yave, ucuera yeta co.

¹³ Ërei Jesús jucuarãi jei yave, uipota jei umano ma. Jae reta ipia pe uyemingueta tēi uipota jei uputuño oque oĩ. ¹⁴ Jayave Jesús umimbeu cavi chupe reta:

—Lázaro umano ma. ¹⁵ Jare ayerovia joco pe aĩ'ã vae re. Cua icavita co peve. Echa'ã peroviata co. Yaa ma icoti —jei.

¹⁶ Jayave Tomás - jae co Choguaquiri pe uyembijee vae - jei írú Jesús jemimboe reta pe:

—Yaa vi yande, ñamano vaerã jae ndive.

Jesús co jae tecove umee vae

¹⁷ Jare Jesús ou uvãe yave, amocue vae umimbeu chupe irundi ara ma co Lázaro oĩ teõgüeriru pe. ¹⁸ Betania coiño oĩ Jerusalén güi. Uepiti penti legua seri rupi. ¹⁹ Jare jeta judío reta yugüeru ma Marta jare María ipi umbipiacatu vaerã iquivi amiri re. ²⁰ Jare Marta uicuaa yave Jesús ou co uvãe, oo oovãiti. Ërei María upita tenta pe. ²¹ Jayave Marta jei Jesús pe:

—CheYa, nde mona cua pe neĩ yave, umanota'ã tẽi chequivi. ²² Jare añave aicuaa ipotave mbae ndiyerure Tumpa pe jese vae Tumpa umeeta co ndeve —jei.

²³ —Ndequivi icove yeta co ou umanocue vae reta ipite güi —jei Jesús chupe.

²⁴ —Aicuaa icove yeta co ou umanocue vae reta ipite güi ara taicuegua vae pe —jei Marta—. Echa'ã jocua ara ñru vae reta vi icove yeta yugüeru umanocue vae reta ipite güi —jei.

²⁵ —Che co amee tecove umanocue vae reta pe jare aru ye ñru umanocue vae reta ipite güi —jei Jesús—. Cheré güirovia vae, yepe tẽi umano oĩ, icove yeta co. ²⁶ Jare opaete icove oĩ vae cheré güirovia vae ndarau etei umano. ¿Nderovia pa cua? —jei.

²⁷ —Arovia, cheYa —jei Marta—. Añave arovia nde co jae Cristo. Nde co jae Tumpa Tai. Echa'ã Tumpa ñnee pe uyecuatía oĩ outa co Tumpa Tai ivi pe —jei.

Jesús uyao

²⁸ Marta cua jei ma yave, oo ueni María - jae co Marta ipiquii. Jayave güiraa ñru vae reta ipite güi jare jei chupe:

—Oporomboe vae cua pe oĩ jare uipota ndeo vaerã jae oĩ vae pe.

²⁹ María cua uyandu yave, imambae upúa oo Jesús oĩ vae pe. ³⁰ Marta oovãiti vae peño upita Jesús. Echa'ã ndei uique tenta guasu-rai pe. ³¹ Tenta pe judío uyemingueta ñugüinoi María ndive umbipiacatu vaerã vae reta uecha María imambae upúa oo tenta güi. Jayave yugüiraa María jaicue. Echa'ã ipia pe uyemingueta tẽi jae oo teõgüeriru oĩ vae pe uyao vaerã joco pe.

³² Jayave María oo uvãe Jesús oĩ vae pe. Uecha rupive oo uyeatica jae jovai jare jei:

—CheYa, nde mona cua pe neĩ yave, umanota'ã tẽi chequivi.

³³ Jesús uecha yave María jare judío María ndive yugüeru vae reta uyao ñugüinoi, iañeequi jare tuicha ipiatiti. ³⁴ Jayave upirandu:

—¿Quíape pa piñoño?

—Eyu eecha, carai —jei reta chupe.

³⁵ Jayave Jesús uyao. ³⁶ Jare judío reta jei:

—Mase, uau ete co.

³⁷ Ërei amocue vae jei:

—¿Ipuere'ã ra uyapo mbae cua cuimbae agüiye vaerã umano tẽi Lázaro? Echa'ã umimae cuimbae jesa mbae vae.

Lázaro icove ye

³⁸ Jesús iañeequi ye. Jayave oo teõgüeriru oĩ vae pe. Jocua teõgüeriru penti itape uyeyoo vae co jare ita tuicha vae oĩ teõgüeriru jonque re. ³⁹ Jayave Jesús jei:

—Pembisiri ita joco güi.

Marta - jae co cuimbae amiri jindi - jei chupe:

—CheYa, ine ma co. Echa'ã irundi ara ma oĩ umano güiive —jei.

⁴⁰ Jesús jei chupe:

—Amimbeu ma ndeve nderovia yave ndeechata mbae ayapota ñru vae reta umbiadora vaerã Tumpa.

⁴¹ Jayave umbisiri reta ita teõgüeriru jonque güi. Jayave Jesús umae ara coti jare jei:

—CheRu, amee yasurupai ndeve nde ndiyandu cheve vae re. ⁴² Aicuaa jecuaeño ndiyandu cheve, Ërei jae cuarãi cua cheyipí rupi ñugüinoi vae reta jeco pegua, jae reta güirovia vaerã nde co chembou vae —jei.

⁴³ Jayave ñneeãta.

—Lázaro, eẽ joco güi —jei.

⁴⁴ Jare cuimbae amiri oẽ. Ipo jare ipi uyeyocua tarapo pe, jare jova uñenoma nieso pe. Jayave Jesús jei:

—Piyora iyocuaa. Pemaño tuguata —jei.

Uyemboemboe reta uyucaca vaerã Jesús

(Mt 26.1-5; Mr 14.1-2; Lc 22.1-2)

⁴⁵Jare jeta judío yugüeru opou María ipi vae reta uecha Jesús uyapo vae jare güirovia jese. ⁴⁶Èrei amocue vae yugüiraa fariseo reta pe umimbeu Jesús uyapo vae. ⁴⁷Jayave sacerdote reta itenondegua reta jare fariseo reta umbati opaete mburuvicha reta.

—¿Mbae pa yayapota? —jei reta—. Cua cuimbae jecuaño uyapo jeta miacañi reta.

⁴⁸Ñamaño yave cuarãi uyapo vaerã, opaete vae reta güiroviata jese. Jayave romano reta yugüeruta umbusururu Tumpa jo jare uyucata opaete ñanerentaigua reta —jei reta.

⁴⁹Èrei penti ipite pe oĩ vae - Caifás jee vae - jae co sacerdote tenondegua jocua año - jei:

—Picuaa'ã etei mbae. ⁵⁰Pepia pe piyemingueta cavi'ã. Echa'ã icavita co yandevé penti cuimbae umano vaerã opaete vae reta ipepica pe. Echa'ã jucuarã'ã yave, aramoĩ opaete vae reta umanota —jei.

⁵¹Jare cua umimbeu chupe reta ndei uyeyapo mbove. Umimbeu'ã jaeiño. Echa'ã jae sacerdote tenondegua co jocua año. Umimbeu Jesús umanota opaete judío reta ipepica pe. ⁵²Umanota umbati vaerã opaete Tumpa tai uñemai vae reta - umanota'ã judío reta reño. ⁵³Jáeramo jocua ara güive uyemboemboe quirãĩ uyucaca vaerã Jesús.

⁵⁴Jáeramo Jesús upita'ã ma Judea pe, agüive vaerã judío reta uecha. Oo joco güi penti tenta guasu Efraín jee vae pe. Jocua tenta guasu coiño oĩ ñana güi. Jare joco pe Jesús upita jemimboe reta ndive.

⁵⁵Jare coiño ma ou judío reta ifiesta pascua jee vae, jare jeta judío reta yugüiraa Jerusalén pe joco güi ndei pascua iara ou uvãe mbove. Echa'ã uipota uyeyoe Tumpa coti fiesta peguarã. ⁵⁶Jayave ueca ñugüinoi Jesús, jare Tumpa jo pe ñugüinoi rambueve jei uyupe:

—¿Mbae pa pepia pe piyemingueta? ¿Ndarau ra ou cua fiesta pe? —jei reta.

⁵⁷Echa'ã sacerdote reta itenondegua reta jare fariseo reta oyocui ma opaete vae cuarãi: “Ime yave quía uicuaa quiapé Jesús ime oĩ vae, tumimbeu oreve orepuere nduipisi vaerã.”

12

María upiyere mbae ipiche cavi vae Jesús ipi re

(Mt 26.6-13; Mr 14.3-9)

¹Seis araño ma uata pascua uvãe vaerã. Jayave Jesús oo ye Betania pe. Echa'ã joco pe ico Lázaro tenonde yave umano vae Jesús umbijecove ye güeru umanocue vae reta ipite güi vae. ²Pĩtu ma yave Lázaro jenta pegua reta uyapo Jesús jou vaerã. Marta güeru tembú, jare Lázaro uguapĩ ucaru mesa pe Jesús ndive. ³Jayave María güeru penti libra mbae ipiche cavi vae nardo jee vae jepi ete vae jare upiyere Jesús ipi re. Jayave umitini ipi ía pipe. Jare opaete o ipiche cavi. ⁴Jayave penti Jesús jemimboe Judas Iscariote jee vae - jae co Simón tai - jae co umeeta Jesús jovaicho reta pe vae - jei:

⁵—¿Maera pa umee'ã cua mbae ipiche cavi vae trescientos ara mbaraviqui jepi pegua pe? Echa'ã ipuereta tẽi co umee corepoti iparavete vae reta pe —jei.

⁶Èrei jae ipiatiti'ã iparavete vae reta re. Echa'ã jucuarãĩ jei imonda ramo. Echa'ã jae güinoi corepoti ñru vae reta umee chupe reta vae jĩru, jare jecuaño uequi viari chugüi corepoti iyupeguarã. ⁷Jayave Jesús jei:

—Emaño jese. Pentĩ ara añeñoticata co. Jocua ara peguarã unuvatu cua mbae ipiche cavi vae —jei—. ⁸Iparavete vae reta yugüirecoñotai co pe reta ndive. ⁸Èrei che ndarau aicoño pe reta ndive —jei.

Uyemingueta reta uyucaca vaerã Lázaro

⁹Jare jeta judío reta uicuaa Jesús joco pe oĩ. Jáeramo yugüeru. Jare yugüeru'ã Jesús joco pe oĩ ramoño. Èrei yugüeru vi umae vaerã Lázaro re. Echa'ã Jesús umbijecove ye Lázaro güeru umanocue vae reta ipite güi. ¹⁰Jayave sacerdote reta itenondegua reta uyemingueta vi quirãĩ uyucaca vaerã Lázaro. ¹¹Echa'ã Lázaro jeco pegua jeta judío reta yugüiraa chugüi reta. Echa'ã güirovia ma Jesús re.

Jesús uique Jerusalén pe

(Mt 21.1-11; Mr 11.1-11; Lc 19.28-40)

¹² Piareve pe jeta ete pascua pe yugüeru ma vae uicuaa Jesús outa ma co Jerusalén pe.
¹³ Jayave uequi reta carandai joqui yugüiraa oovãiti vaerã Jesús.
 —¡cavi co! —jei reta—. Tuyembioraca yandeYa jee re ou vae. Tuyembioraca Israel pegua reta juvicha guasu —jei reta.

¹⁴ Jare Jesús uvãe penti mburica tairusu vae, jare opo jese. Echa'ã Tumpa ñee pe uyecuatía oĩ cuarãi:

¹⁵ Agüiye pequiye, Jerusalén pegua reta.

Mase, co ou ma peruvicha guasu.

Opo ou mburica tairusu vae re. Jucuarãi uyecuatía oĩ.

¹⁶ Jocua ara Jesús jemimboe reta uicuaa cavi'ã cua regua. Ërei Jesús oo ye ma ara pe yave, imandúa reta cua re. Echa'ã jucuarãi Tumpa ñee pe uyecuatía oĩ jese, jare jucuarãi uyeyapo chupe.

¹⁷ Jare amocue joco pe ñugüinoi vae jei:

—Ore noĩ Jesús ndive, jae umbijecove ye yave Lázaro güeru umanocue vae reta ipite güi jare oyocui oẽ vaerã teögüeriru güi —jei reta.

¹⁸ Jáeramo jeta vae yugüiraa oovãiti Jesús. Echa'ã uicuaa ma uyapo cua miacañi.

¹⁹ Jayave fariseo reta jei uyupe:

—Mase, mbaeti mbae yandepuere yayapo. Echa'ã opaete que rupi rupigua reta yugüiraa umae vaerã jese.

Griego reta ueca Jesús

²⁰ Jare amocue griego reta yugüeru ma pascua pe ñru vae reta ndive umbiadora vaerã Tumpa. ²¹ Jae reta yugüeru Felipe Betsaida pegua pe - jocua Betsaida Galilea pegua co - jare jei chupe:

—Carai, nduipota nduecha Jesús.

²² Jayave Felipe oo umimbeu Andrés pe. Jayave mocui reve yugüiraa umimbeu Jesús pe. ²³ Jayave Jesús jei:

—Ara uvãe ma che ayeyapo cuimbaerã vae ayembioraca vaerã. ²⁴ Añete che jae peve, penti trigo jáicue uñeñoti'ã yave, jaeño upita. Ërei uñeñoti yave, jeta uñemoña —jei—. ²⁵ Uyerau vae ndarau uyembiasaca. Ërei uyerau'ã cua ivi pe vae uyembiasacata co. Güinoita tecove opa mbae vae —jei—. ²⁶ Uyeyocui cheve vae too cherupíe. Cherembicui oita che aita vae pe. Jare cheRu umbutuichacata uyeyocui cheve vae —jei Jesús—.

Jesús umimbeu umanota co

²⁷ Tuicha chepiatiti aĩ. Ërei chepuere'ã jae: 'CheRu, cherepi cua ora pe uyeyapota cheve vae güi.' Echa'ã uvãe ma cua ora cua uyeyapo cheve vaerã —jei—. ²⁸ CheRu, iyapo cheve ivi pegua reta nembioraca vaerã —jei.

Jayave ñee uyendu ara güi:

—Ayapo ma mbaembae nde rupi ivi pegua reta chembiadora vaerã, jare cuarãi ayapo yeta co.

²⁹ Jeta joco pe ñugüinoi vae reta uyandu ñee jare jei ara co jiapu. Ñru reta jei:

—Penti ángel ombou ñee chupe.

³⁰ Jayave Jesús jei:

—Cua ñee uyendu pereco pegua - chereco pegua'ã co. ³¹ Uñeãa ma ivi pegua reta, jare jae reta juvicha uyemombota co —jei—. ³² Jare ñru vae reta chereupi curusu re yave ivi güi, arurucata opaete ivi pegua reta checoti —jei.

³³ Cua jei Jesús uicuaaca vaerã chupe reta quirãita co umano. ³⁴ Jayave jae reta jei Jesús pe:

—Mboroyocui pe uyecuatía oĩ vae umimbeu oreve Cristo imeñoi ico. ¿Mbae pa uipota jei jocua nde ndere vae? Echa'ã nde ndere ñru vae reta uupita ivi güi cuimbaerã uyeyapo vae. ¿Quía pa co jae cuimbaerã uyeyapo vae? —jei reta.

³⁵ —Tembipe imeño ico pe reta ndive —jei Jesús—. Ërei ndarau ima upita pe reta ndive. Peguata tembipe ico pe reta ndive rambueve, agüiye vaerã pĩtu peve. Echa'ã pĩtumimbi pe uguata vae uicuaa'ã queti oo —jei—. ³⁶ Tembipe pe reta ndive ico rambueve, perovia tembipe re, pe reta pei vaerã tembipe rami —jei chupe reta.

Cua jei ma yave, Jesús oo chugüi reta, jare ipuere'ã ma uvãe chupe.

Judío reta güirovia'ã

³⁷ Ērei yepe tēi Jesús uyapo jeta miacañi reta jae reta jovaque uicuaaca vaerā tēi chupe reta quía co jae, ěrei jae reta güirovia'a jese, ³⁸ uyeyapo vaerā Isaiás uicuatía vae - Isaiás co jae Tumpa iñee aracae umimbeu vae. Echa'a Isaiás uicuatía cuarāi:

“CheYa, ¿quía pa güirovia numimbeu vae?”

¿Quía nunga vae pe pa ndicuaaca nembraepuere?”

Jucuarāi uicuatía Isaiás. ³⁹ Jáeramo jae reta ipuere'a güirovia. Echa'a Isaiás uicuatía vi cuarāi:

⁴⁰ “Tumpa uyapo reta jesa mbae vae reta rami jare umipiatanta,

agüiye vaerā uecha cavi reta,

jare agüiye vaerā uicuaa cavi reta,

jare agüiye vaerā uyerova icoti.

Echa'a uyerova yave Tumpa coti, Tumpa umbaita tēi imbaeyoa reta.”

Jucuarāi uicuatía Isaiás. ⁴¹ Isaiás cua jei, uecha yave yembutuicha ara pegua. Jáeramo imiari jucuarāi jese.

⁴² Ērei amocue mburuvicha reta güirovia Jesús re. Ērei uipota'a jei jae co Cristo fariseo reta jeco pegua. Echa'a jucuarāi jei yave, fariseo reta omombota tēi co judfo reta itupao güi. ⁴³ Echa'a jae reta uipota ete japicha reta pe uyembutuichaca vaerā Tumpa umbutuichaca vaerā tēi güi.

Jesús iñee reta uāata ivi pegua reta

⁴⁴ Jayave Jesús iñeeāta reve jei:

—Cheré güirovia vae chereño'a güirovia. Güirovia chembou vae re —jei—. ⁴⁵ Cherecha vae uecha vi chembou vae —jei—. ⁴⁶ Ayu ivi pe amee vaerā tembiipe ivi pegua reta pe, agüiye vaerā cheré güirovia vae upita pítumimbi pe —jei—. ⁴⁷ Chiñee re uyapisaca vae uyapo'a yave che jae vae rupi, che aāa'a. Echa'a che ayu ambiasa vaerā ivi pegua reta. Ayu'a aāa vaerā —jei Jesús—. ⁴⁸ Jocua güirovia'a cheré jare uyapo'a che jae chupe uyapo vaerā vae uñeāata co. Echa'a ara taicuegua vae pe cua che jae vae uāata —jei chupe reta—. ⁴⁹ Echa'a cheporomboe chembaeño'a co. Cheru chembou, jare jae cheocui mbae jae vaerā, jare quirāi chemiari vaerā —jei—. ⁵⁰ Jare aicuaa cheRu cheocui vae tecove opa mbae vae pegua co. Jáeramo che jae peve cheRu jei cheve vae —jei.

13

Jesús oyoe jemimboe reta ipi

¹ Uyaro ma pascua iara. Jare Jesús uicuaa ara uvāe ma ueya vaerā cua ivi oo ye vaerā Tu pe. Imeño uau imbae cua ivi pe ñugüinoi vae reta, jare añave uicuaacata quirāi uau ete. ²⁻⁴ Judas Iscariote - jae co Simón tai - ipia pe uyemingueta ma umee vaerā Jesús jovaicho reta pe. Echa'a jucuarāi uipota aña guasu Judas ipia pe uyemingueta vaerā. Jare Jesús uicuaa cavi ma Tu oñono opaete mbaembae ipo pe. Uicuaa vi ou co Tumpa güi jare oo yeta co Tumpa pe. Jare pítu yave Jesús jare jemimboe reta ucara ñugüinoi yave, Jesús upāa mesa güi, omboi iyasoya iarambogua, jare oñoma icúa penti toalla pe. ⁵ Jayave oñono i penti ia pe jare umbipi oyoe jemimboe reta ipi, jare oyoe ma yave, umitini toalla icúa re oī vae pipe. ⁶ Jare oo uvāe yave Simón Pedro oī vae pe, Pedro jei chupe:

—CheYa, ¿nequirēi pa ndiyoe chepi?”

⁷ —Cua ayapo aī vae ndicuaa cavi'a añave —jei Jesús—, ěrei ndicuaa cavita co taicue rupi.

⁸ —Ndarau etei ndiyoe chepi —jei Pedro.

—Jucuarāi yave, nde cheñu'a co —jei Jesús chupe.

⁹ Jayave Simón Pedro jei:

—CheYa, iyoe chepo jare cheāca vi - agüiye iyoe chepiño.

¹⁰ —Uyau ma vae uyau yeta'a ma —jei Jesús—. Ipiño ma oyoeta. Echa'a opaete jete iquia mbae ma. Jare pe reta pequia mbae ma. Ērei opaete'a co pe reta —jei.

¹¹ Echa'a Jesús uicuaa quía umeeta jovaicho reta pe. Jáeramo jei: “Ērei opaete'a co pe reta.”

¹² Jayave opa yave ipi reta oyoe, uyemonde ye Jesús jare oo uguapi jenda pe. Jayave upirandu chupe reta:

—¿Picuaa cavi pa ayapo ma peve vae? ¹³ Pe reta pere cheve: ‘Oporombœ vae’, jare pere vi: ‘OreYa.’ Añete co cua pere vae. Echa'a aporombœ jare che co jae peYa —jei chupe reta—. ¹⁴ Èrei yepe tēi che pomboe jare che co jae peYa, ãrei ayoe ma pepi reta. Jáeramo icavi co pe reta piyoe vaerã pepi piyugüi —jei—. ¹⁵ Echa'a che cua ayapo aicuaa vaerã peve, pe reta vi piyapo vaerã che ayapo peve vae rami —jei—. ¹⁶ Añete che jae peve, penti uyeyocui vae imbaepuere tuicha'a ete ipatrón imbaepuere rami. Jae ramiño vi penti temimondo imbaepuere tuicha'a ete omondo vae imbaepuere rami —jei—. ¹⁷ Cua picuaa cavi. Piyapo yave, Tumpa uyapota icavi vae peve —jei Jesús chupe reta—.

¹⁸ Opaete pe reta re'a ayemingueta aĩ. Che aicuaa quía aiparavo vae reta. Èrei Tumpa ñive pe uyecuatía oĩ vae uyeyapota co. Echa'a uyecuatía oĩ cuarã: ‘Jocua ucaru che ndive vae chemeeta.’ Jucuarãi uyecuatía oĩ —jei—. ¹⁹ Cua amimbeu peve añave ndei uyeyapo mbove, cua uyeyapo yave perovia vaerã quía co che —jei—. ²⁰ Añete che jae peve, cheremimondo pe uyapo icavi vae, cheve co uyapo icavi vae. Jare jocua cheve uyapo icavi vae, uyapo vi icavi vae chembou vae pe —jei—.

Jesús umimbeu Judas umeeta

(Mt 26.20-25; Mr 14.17-21; Lc 22.21-23)

²¹ Cua jei ma yave, Jesús tuicha ipiatiti jare jei:

—Añete che jae peve, penti pepite pe oĩ vae chemeeta cherovaicho reta pe.

²² Jayave Jesús jemimboe reta umaie iyee reta. Uicuaa'a quía re ra uyemingueta.

²³ Panti jemimboe - jae co Jesús uau vae - ucaru oĩ Jesús iyipi pe. ²⁴ Jayave Simón Pedro omomi ñña jocua iru temimboe uecha vaerã, jare jae upirandu vaerã Jesús pe quía regua ra uyemingueta. ²⁵ Jayave jocua temimboe Jesús iyipi pe ucaru oĩ vae upirandu Jesús pe: —¿Quía pa co jae, cheYa?

²⁶ —Ameeta chupe mbiyape —jei Jesús—, tembú pe amãqui ma yave. Jocua co jae —jei. Jayave tembú pe umãqui ma yave, uequi umee Judas Iscariote pe - jae co Simón tai.

²⁷ Jayave Judas jou ma yave, Satanás oya jese. Jayave Jesús jei Judas pe:

—Iyapo voi jocua ndiyapota vae.

²⁸ Èrei mbaeti quía mesa pe oĩ vae uicuaa maera Jesús jei jucuarãi Judas pe. ²⁹ Amocue vae ipia pe uyemingueta tēi Jesús jei chupe vae uipota jei: “Ecu egua yaipota fiesta peguarã vae”, ani: “Ecu emee mbae iparavete vae reta pe.” Echa'a Judas güinoi corepoti jiru. ³⁰ Jayave opa yave jou mbiyape, Judas oẽ oo. Jare pĩtu ma co.

Mboroyocui ipiau vae

³¹ Jayave oẽ ma yave Judas, Jesús jei:

—Che ayeyapo cuimbaerã. Añave ivi pegua reta chembiadorata. Jare umbiadorata vi Tumpa chereco pegua —jei—. ³² Ivi pegua reta umbiadorata Tumpa chereco pegua. Jáeramo Tumpa etei chembiadoracata ivi pegua reta pe. Añave voi chembiadoracata —jei—. ³³ Cherivi reta, michi peguaño ma apitata pe reta ndive. Jayave chereca tēita, ãrei pe reta ndarau pepuere peo che aata vae pe. Echa'a cuarã amimbeu judío reta pe, jare añave amimbeu vi peve —jei—. ³⁴ Amee peve penti mboroyocui ipiau vae. Piyerau. Piyerau che puau rami —jei Jesús chupe reta—. ³⁵ Piyerau yave, opaete ivi pegua reta uicuaata pe reta cheremimboe reta co —jei—.

Jesús umimbeu Pedro uicuaata co

(Mt 26.30-35; Mr 14.26-31; Lc 22.31-34)

³⁶ Simón Pedro jei Jesús pe:

—CheYa, ¿queti pa ndeota?

—Ndarau añave ndepuere ndeo che aata vae pe —jei Jesús—. Èrei taicue rupi ndeota co —jei—.

³⁷ Pedro jei:

—CheYa, ¿maera pa chepuere'a aa nde ndive añave? Che tamano ndepipica pe —jei—.

³⁸ —Nde ndere nemanota chepepica pe —jei Jesús—. Añete che jae ndeve, ndei uru cuimbae uñee mbove, mbapi vese ma checuacuta —jei—.

¹ Agüiye pepiatiti. Perovia Tumpa re. Perovia vi cheré —jei—. ² CheRu jenta pe ime jeta o. Jucuarā'ā yave, amimbeuta tēi co peve. Aata ayapicatu perendarā —jei Jesús chupe reta—. ³ Jare aa ma yave ayapicatu perendarā, ayu yeta puraa vaerā, pe reta vi pico vaerā che aicota vae pe —jei—. ⁴ Jare pe reta picuaa tape que rupi aata —jei.

⁵ Jayave Tomás jei:

—OreYa, ore nduicuaa'ā queti ndeota vae. ¿Quirāita ra nduicuaa tape?

⁶ —Che co jae tape —jei Jesús—. Che co jae añetete uyemingueta vae. Che co jae tecove opa mbae vae umee vae. Mbaeti quía ipuere uñemiiru cheRu ndive jaño che rupi —jei—. ⁷ Checuaa cavi yave mona, picuaata tēi co cheRu vi. Ērei añave güiive picuaa co. Echa'ā pecha ma —jei.

⁸ Felipe jei chupe:

—OreYa, eechaca oreve ndeRu. Jocuño nduipota.

⁹ —Ima ma aico pe reta ndive, Felipe —jei Jesús—. ¿Ndei pa co checuaa cavi? Cherecha vae uecha ma co cheRu. ¿Maera pa ndere: 'Eechaca oreve ndeRu'? —jei—. ¹⁰ ¿Perovia'ā pa che aico cheRu ndive jare cheRu ico che ndive vae? Nee amimbeu peve vae chembaeño'ā co. Echa'ā cheRu ico che ndive, jare jae uyapo mbaraviqui reta —jei Jesús—. ¹¹ Perovia cua che jae peve vae: Che aico cheRu ndive, jare cheRu ico che ndive. Cua perovia'ā yave, cherovia mbaraviqui ayapo vae reta jeco pegua —jei—. ¹² Añete che jae peve, cheré güirovia vae uyapota mbaraviqui reta che ayapo ma vae reta rami. Jare iparaviqui reta tuicha eteta cheparaviqui reta güi, che aata cheRu pe ramo —jei—. ¹³ Pepuereta piyerure ipotave mbae re cheree re, jare che ayapota peve, cheRu uyembadoraca vaerā che ayapota vae rupi —jei—. ¹⁴ Piyerure yave ipotave mbae re cheree re, ayapota co peve —jei Jesús chupe reta—.

Espíritu Santo outa

¹⁵ Cherau yave, piyapo cheporoyocui reta —jei—. ¹⁶ Jare che ayerureta cheRu pe jae ombou vaerā peve iru vae. Jae jecuaeño icota pe reta ndive pembipiacatu vaerā. Jae co Espíritu Santo —jei—. ¹⁷ Jae imiarita añete vae re. Upurugüirovia mbae vae reta ndarau ipuere umbiresive Espíritu Santo. Echa'ā upurugüirovia mbae vae reta uecha'ā jare uicuaa'ā. Ērei pe reta picuaa. Echa'ā jae ico pe reta ndive jare icota pepia pe —jei—. ¹⁸ Che aa ma yave, ndarau pueya jentarā mbae vae reta rami. Echa'ā che ayu yeta co —jei—. ¹⁹ Michi peguaño ma ivi pegua reta cherechata. Ndarau ma cherecha ye. Ērei pe reta cherecha yeta. Che jecuaeño aico ramo, pe reta picota vi —jei chupe reta—. ²⁰ Jocua ara picuaata co che aico cheRu ndive, jare pe reta pico che ndive vae, jare che aico pepia pe —jei—. ²¹ Ime yave quía uyapisaca cheporoyocui reta re uyapo vaerā vae, jae co cherau. Jare cheRu uauta cherau vae, jare che aauta, jare aicuaacata chupe quía co che —jei.

²² Jayave Judas - jae'ā co Judas Iscariote - jei chupe:

—OreYa, ¿quirāita pa ndicuaaca oreve quía co nde, ndicuaaca'ā yave upurugüirovia mbae vae reta pe?

²³ —Cherau vae uyapota che jae chupe uyapo vaerā vae —jei Jesús—. Jare cheRu uauta. Jare ndoyuta nduico vaerā jae ndive —jei—. ²⁴ Cherau'ā vae uyapo'ā che jae chupe uyapo vaerā vae. Jare chiñee piyandu vae chembaeño'ā co. Echa'ā cua ñee cheRu ñee co. Jae co chembou —jei—. ²⁵ Cua mbaembae re chemiari ma peve, aico pe ndive rambueve. ²⁶ Ērei jocua pembipiacatuta vae pemboeta opaete mbae re. CheRu ombouta peve cheree re. Jae co Espíritu Santo. Jae pemimanduata opaete che jae peve vae re —jei—. ²⁷ Mbiacatu aeya pe ndive. Mbiacatu che anoi vae amee peve. Ivi pegua reta ipuere'ā umee peve che amee peve vae nunga mbiacatu. Agüiye pepiatiti. Agüiye pequiye —jei—. ²⁸ Piyandu ma quirāi che jae: 'Aata ma jare ayu yeta peve.' Cherau yave mona, piyeroviata tēi. Echa'ā aata cheRu pe, jare cheRu imbaepuere tuicha ete chembaepuere güi —jei—. ²⁹ Amimbeu ma peve ndei uyeyapo mbove, perovia vaerā uyeyapo yave —jei—. ³⁰ Ndarau ma ima chemiari peve. Echa'ā ivi pegua reta juvicha imambae outa uväe cheve. Ērei ndarau ipuere cheré —jei—. ³¹ Ērei ayapota cheRu iporoyocui, ivi pegua reta uicuaa vaerā che au cheRu. Pepüa, yaa ma cua güi —jei chupe reta—.

¹ Che co jae uva iyipi añetete vae rami, jare cheRu co jae uva iyipi iyandarecoa rami —jei—. ² Opaete jāca ía mbae vae reta cheRu uyasiata. Jare opaete jāca ía vae reta jae uitiota, jeta ía vaerā —jei—. ³ Pe reta piyeyoea ma ñee amimbeu peve vae pe —jei—. ⁴ Pico cheré perovia reve, jare che aicota pepia pe. Penti jāca uyeasia yave uva iyipi güi, ndarau ipuere ía. Echa'á jāca jaëño ipuere'á ía. Jae ramiño vi pe reta pico'á yave cheré perovia reve, ndarau pepuere piyapo icavi vae Tumpa peguarā —jei—. ⁵ Che co jae uva iyipi rami, jare pe reta co jae jāca reta rami. Jocuá ico cheré güirovia reve vae uyapota jeta icavi vae Tumpa peguarā. Echa'á che aico ípia pe. Èrei che aico'á yave pepia pe, pepuereta'á mbae piyapo Tumpa peguarā —jei—. ⁶ Jocuá ico'á cheré güirovia reve vae uyemombota penti jāca uyeasia vae uyemombo yipi vaerā vae rami. Jare jāca yipi vae reta uyembatica jare uyemondoca tata pe ocái vaerā —jei—. ⁷ Pico yave cheré perovia reve, jare piyapo yave che jae peve piyapo vaerā vae, pepuereta piyerure pipota vae re jare penoita co —jei—. ⁸ Piyapo yave jeta icavi vae cheRu peguarā, ivi pegua reta umbiadorata cheRu. Jare cuarāi picuacata pe reta co cheremimboe reta —jei—. ⁹ CheRu cherau. Jae ramiño vi che puau. Jecuaëño piyeyocui cheve, che puau ramo —jei—. ¹⁰ Piyapo yave cheporoyocui reta, che jecuaëño puauta. Echa'á cuarāi che ayapo cheRu iporoyocui reta, jare jecuaëño jae cherau —jei Jesús chupe reta—. ¹¹ Cuarāi chemiari ma peve piyerovia vaerā che ayerovia rami. Cuarāi ayapo tuicha ete piyerovia vaerā —jei—. ¹² Cua co jae cheporoyocui: Piyerau che puau rami. ¹³ Ime yave quía iquirēi umano uepi vaerā iamigo reta vae, ipuruau tuicha ete co írú mburuau güi —jei—. ¹⁴ Pe reta co jae cheamigo reta, piyapo yave che jae peve piyapo vaerā vae —jei—. ¹⁵ Che jae'á ma peve pe reta co cherembiocui reta. Echa'á uyeyocui vae uicuaa'á mbae ra uyapo ipatrón. Èrei che jae ma peve pe reta co jae cheamigo reta. Echa'á opaete cheRu umimbeu cheve vae aicuaaca ma co peve —jei chupe reta—. ¹⁶ Pe reta cheparavo'á. Che co puparavo. Jare amee ma peve mbaepuere peo vaerā piyapo icavi vae Tumpa peguarā, jare jecuaë jucuarāi piyapo vaerā. Cua ayapo cheRu umee vaerā peve ipotave piyerureta chupe jese cheree re vae —jei—. ¹⁷ Cua co poyocui: Piyerau —jei—.

Upurugüirovia mbae vae reta umitarēi Jesús jare imbae reta

¹⁸ Piñemitarēica upurugüirovia mbae vae reta pe yave, pemandúa quirāi jae reta che rani co chemitarēi —jei—. ¹⁹ Pico yave mona upurugüirovia mbae vae reta yugüireco rami, upurugüirovia mbae vae reta perauta tēi. Èrei che puparavo ma upurugüirovia mbae vae reta ipite güi. Jáeramo pico'á ma upurugüirovia mbae vae reta yugüireco rami. Jáeramo piñemitarēica upurugüirovia mbae vae reta pe —jei—. ²⁰ Pemandúa cua che jae peve vae re: 'Penti uyeyocui vae imbaepuere tuicha'á ete ipatrón imbaepuere rami.' Echa'á upurugüirovia mbae vae reta uyapo yave icavi mbae vae cheve, uyapota vi icavi mbae vae peve. Uyapo reta yave che jae chupe uyapo vaerā vae, uyapota vi pe reta pere chupe uyapo vaerā vae —jei—. ²¹ Èrei upurugüirovia mbae vae reta uyapota peve opaete cua mbaembae cheré perovia ramo. Echa'á jae reta uicuaa'á chembou vae —jei—.

²² Ayu'á yave mona chemiari vaerā chupe reta, ndarau tēi teco güinoi. Èrei añave opaete vae ipuere uicuaa jae reta co teco güinoi —jei—. ²³ Chemitarēi vae umitarēi vi cheRu —jei—. ²⁴ Ayapo'á yave mona ipite pe mbaraviqui mbaeti quía ye uyapo vae reta, ndarau tēi teco güinoi. Èrei jae reta cherecha ma - jae co cheRu uecha rami - jare oremitarēi —jei—. ²⁵ Cua uyapo reta uyeyapo vaerā mboroyocui pe uyecuatía oí vae. Echa'á uyequatía oí cuarāi: 'Jae reta chemitarēi mbaeti mbae icavi mbae vae ayapo chupe reta reve.' Jucuarāi uyecuatía oí —jei—. ²⁶ Èrei ambouta peve cheRu ico vae güi pembipiacatuta vae - jae co Espíritu Santo añete vae re imiarita vae. Jae ou yave, chemimbeuta co —jei—. ²⁷ Jare pe reta vi chemimbeuta. Echa'á tenonde güive pico che ndive —jei—.

16

¹ Opaete cua che jae ma peve agüiye vaerā piyerova Tumpa güi —jei—. ² Piyemombocata co judío reta itupao reta güi. Añete co, outa ma ara piyeyucaca vaerā. Jare jocua reta peyucata vae ípia pe uyemingueta tēita uyeyocui co oí Tumpa pe —jei—. ³ Jae reta uicuaa'á cheRu jare checuaa'á vi. Jáeramo jucuarāi uyapota —jei chupe reta—. ⁴ Èrei cua che jae ma peve, pemandúa vaerā cuarāi amimbeu peve vae re jucuarāi uyapo reta yave —jei—.

Espíritu Santo uyapo vae

Amimbeu'ā peve cua tenonde güive. Echa'ā che aico pe ndive. ⁵Ērei aata chembou vae pe. Jare penti ave añave pepirandu'ā cheve: '¿Queti pa ndeota?' —jei—. ⁶Ērei cua che jae peve vae jeco pegua pepiatiti. ⁷Ērei amimbeu peve añete vae. Icavita co peve che aa vaerā. Echa'ā che aa'ā yave, ndarau ou peve pembipiaccatuta vae. Ērei aa yave, ambouta peve. ⁸⁻¹¹Jare jae ou yave, uicuaacata ivi pegua reta pe jae reta uyapo co mbaeyoa. Echa'ā güirovia'ā cheré. Uicuaacata jupi vae. Echa'ā aata cheRu oī vae pe jare pe reta ndarau ye ma cherecha. Uicuaacata Tumpa uāata ivi pegua reta. Echa'ā uāa ma ivi pegua reta juvicha —jei—.

¹²Ime jeta aipota tēi jae peve vae, ērei ndeiño pepuere picuaa cavi —jei—. ¹³Ērei Espiritu Santo añete vae re imiarita vae ou ma yave, umimbeuta peve añete vae. Echa'ā ñee umimbeuta peve vae ndarau imbaeño. Imiarita Tumpa umimbeu chupe vae re, jare umimbeuta peve uyeyapota vae —jei—. ¹⁴Jae chembiadoracata co. Echa'ā jae pemboeta che pomboe rami —jei Jesús chupe reta—. ¹⁵Opaete cheRu imbae chembae vi co. Jáeramo che jae cuarāi: 'Jae pemboeta che pomboe rami' —jei—.

Ipiatiti vae uyeroviata co

¹⁶Michi peguaño ma pe reta cherechata. Ērei imambae cherecha yeta. Echa'ā aata cheRu pe —jei chupe reta.

¹⁷Amocue jemimboe reta jei uyupe:

—¿Mbae pa uipota jei cua jei yandeve vae? Echa'ā jei: 'Michi peguaño ma pe reta cherechata. Ērei imambae cherecha yeta.' Jare jei vi: 'Echa'ā aata cheRu pe.' ¹⁸¿Mbae pa uipota jei: 'Michi peguaño ma'? Yaicuaa'ā mbae ra uipota jei —jei reta.

¹⁹Jesús uicuaa jae reta uipota tēi upirandu chupe cua re. Jáeramo jei chupe reta:

—Che jae peve cuarāi: 'Michi peguaño ma pe reta cherechata. Ērei imambae cherecha yeta.' Jare pepirandu peī piyupe mbae ra uipota jei cua che jae peve vae —jei—. ²⁰Añete che jae peve, piyaota jare pepiatitita, ērei upurugüirovia mbae vae reta uyeroviata. Pepiatitita co, ērei jaicue rupi piyeroviata co —jei—. ²¹Penti cuña imembi oata ma oī yave, cuña ipiatiti jasi chupe ramo. Ērei imembi oa ma yave, imandua'ā ma jasi chupe vae re. Echa'ā uyerovia imembi oa ma ramo —jei—. ²²Jae ramiño vi pe reta pepiatiti añave, ērei puecha yeta, jare piyeroviata, jare ndarau quía ipuere pembipiatiiti ye —jei—.

²³Jocua ara ndarau pepirandu cheve mbae re. Añete che jae peve, ipotave piyerureta cheRu pe jese vae cheRu umeeta peve cheree re —jei—. ²⁴Ndeiño peeca mbae cheree re. Piyure Tumpa pe mbaembae re, jare cheRu umeeta co peve tuicha ete piyerovia vaerā —jei—.

Che chepuere ete ivi pegua reta güi

²⁵Cua amimbeu ma peve amijaanga reve. Ērei outa ma ara reta amimbeu cavi vaerā peve cheRu regua. Ndarau ye ma amimbeu peve amijaanga reve —jei—. ²⁶Jocua ara reta pe piyerureta mbaembae re cheree re. Jare che jae'ā peve ayerureta cheRu pe jae uyapo vaerā piyerure jese vae —jei—. ²⁷Echa'ā cheRu etei perau, pe reta cherau jare perovia che ayu cheRu güi ramo —jei—. ²⁸Ayu co cheRu güi cua ivi pe. Aa yeta ma cua ivi güi cheRu pe —jei chupe reta.

²⁹Jesús jemimboe reta jei chupe:

—Añave nemimbeu cavi ma oreve nemijaanga mbae reve. ³⁰Añave nduicuaa nde ndicuaa co opaete vae, jare ndeeca'ā quía umimbeu vaerā ndeve mbae re. Cua jeco pegua ndugüirovia nde ndeyu co Tumpa güi —jei reta.

³¹Jesús jei chupe reta:

—Pe reta pere perovia ma. ³²Ērei outa ma ara - ou ma co - pe reta piñemiai vaerā. Cheryata jare penti penti peota perenta pe. Cheño apitata. Ērei ndarau cheño aico. Echa'ā cheRu ico che ndive —jei—. ³³Cua che jae ma peve pepiacatu vaerā cheré perovia ramo. Cua ivi pe pico rambueve, piporarata co. Ērei agüiye pepiatiti. Echa'ā che chepuere ete ivi pegua reta güi —jei.

—CheRu, ara uvāe ma. Che co jae ndeRai. Chembiadoraca, chepuere vaerā numbiadoraca vi —jei—. ² Echa'ā nde cheapo ma opaete vae iYarā, amee vaerā tecove opa mbae vae opaete nde neme cheve vae reta pe —jei—. ³ Ime yave quía yandecuaa vae, jae güinoi tecove opa mbae vae. Nde co jae pentiño Tumpa añetete vae. Che co jae Jesucristo. Nde chembou —jei—.

⁴ Che numbiadoraca cua ivi pe. Echa'ā opa ma ayapo mbaraviqui nde neme cheve ayapo vaerā vae —jei—. ⁵ Ndei ivi uyeyapo mbove aico nde ndive yave ayembadoraca co. Jae ramiño vi añave chembiadoraca ye nderovai —jei—. ⁶ Nde neme ma cheve cua cuimbae reta upurugüirovia mbae vae reta ipite güi. Che amimbeu ma nderegua cua reta pe. Jae reta nembae co jare nde neme ma cheve. Jae reta uyapo nde ndere chupe reta uyapo vaerā vae —jei—. ⁷ Jae reta uicuaa opaete nde neme cheve vae ou co ndegüi. ⁸ Echa'ā che amee ma chupe reta ñee nde neme cheve vae, jare jae reta güirovia niñee. Uicuaa cavi che ayu co ndegüi. Güirovia ma nde co chembou —jei—.

⁹ Ayerure ndeve jese reta. Ayerure'ā upurugüirovia mbae vae reta re. Ayerure ndeve nde neme cheve vae reta re. Echa'ā jae reta nembae co —jei—. ¹⁰ Opaete chembae nembae co, jare nembae chembae co. Jare che ayembadoraca ma jae reta jeco pegua —jei—. ¹¹ Jare ndarau ma aico cua ivi pe. Ērei jae reta upitañota cua ivi pe. Che aata ma ndepi. CheRu, nde co jae jupi vae. Cua reta neme ma cheve. Embori nembraepuere pe, agüiye vaerā uyerova ndegüi, jare yugüireco vaerā penti ramiño. Echa'ā jucuarāi yande yaico penti ramiño —jei—. ¹² Che aico jae reta ndive rambueve, che ambori nembraepuere pe cua neme cheve vae reta, agüiye vaerā uyerova ndegüi. Pentiño oota cañitei pe, niñee pe uyecuatía oī vae uyeyapo vaerā. Ērei ambori ĩru reta, agüiye vaerā yugüiraa cañitei pe —jei—.

¹³ Ērei aata ma ndepi. Cuarāi chemiari chupe reta ivi pe aico rambueve, jae reta uyerovia ete vaerā che ayerovia rami —jei—. ¹⁴ Amee ma chupe reta niñee, jare uñemitarēica upurugüirovia mbae vae reta pe. Che aico'ā upurugüirovia mbae vae reta yugüireco rami. Jae ramiño vi jae reta yugüireco'ā upurugüirovia mbae vae reta yugüireco rami —jei—. ¹⁵ Ayerure'ā ndeve nde nderaa vaerā cua ivi güi. Ayerure ndeve nembori vaerā, agüiye vaerā icavi mbae vae iya umiamiri —jei—. ¹⁶ Che aico'ā upurugüirovia mbae vae reta yugüireco rami. Jae ramiño vi jae reta yugüireco'ā upurugüirovia mbae vae reta yugüireco rami. ¹⁷ Iñono tee reta ndiyupeguarā añete vae rupi. Niñee co jae añete vae —jei Jesús—. ¹⁸ Nde chembou ivi pe. Jae ramiño vi che amondo cua reta opaete ivi rupi —jei—. ¹⁹ Cua reta jeco pegua añeñono tee ma ndeve peguarā, jae reta vi uñeñono tee vaerā ndeve peguarā añete vae rupi —jei—.

²⁰ Jare ayerure ndeve cheré güiroviata vae re. Echa'ā güiroviata cua reta iñee rupi. Cua reta reño'ā ayerure ndeve —jei—. ²¹ Ayerure ndeve opaete jae reta yugüireco vaerā penti ramiño. Nde ndico che ndive, cheRu, jare che aico nde ndive. Jae ramiño vi ayerure ndeve cua reta yugüireco vaerā yanderé güirovia reve, ivi pegua reta güirovia vaerā nde co chembou vae —jei—. ²² Nde ndepiacavi ndeechaca cheve vae, che vi aechaca chupe reta, jae reta yugüireco vaerā penti ramiño. Echa'ā jucuarāi yande yaico penti ramiño —jei Jesús—. ²³ Nde ndicota che ndive jare che aicota ipia pe, añetete yugüireco vaerā penti ramiño, ivi pegua reta uicuaa vaerā nde co chembou jare nde ndeau co cua reta nde cherau rami —jei—.

²⁴ CheRu, aipota cua neme cheve vae reta vi yugüireco vaerā che aicota vae pe, uecha vaerā ndepiacavi cheve vae. Echa'ā ndei ivi uyeyapo mbove nde cherauño mai —jei—. ²⁵ CheRu, nde co jae jupi vae. Upurugüirovia mbae vae reta ndecuaa'ā. Ērei che co nducuaa, jare cua reta uicuaa nde co chembou vae —jei—. ²⁶ Che numimbeu ma chupe reta jare numimbeu yeta, jae reta tuau ĩru vae reta nde cherau rami, jare che aico vaerā ipia pe —jei—.

18

Uipisi reta Jesús

(Mt 26.47-56; Mr 14.43-50; Lc 22.47-53)

¹ Jesús cua jei ma yave, uasa jemimboe reta ndive iāca Cedrón jee vae jovaicho pe oo uvāe temiti reta ñugüinoi vae pe. Joco pe uique Jesús jare jemimboe reta. ² Jare Judas - jae co umee jovaicho reta pe vae - uicuaa jocua temiti reta jenda. Echa'ā joco pe uyembatiñoi

yepi Jesús jemimboe reta ndive. ³ Jayave Judas oo sacerdote reta itenondegua reta jare fariseo reta ñugüinoi vae pe, jare jae reta omondo amocue sundaro reta jare jembiocui reta temiti reta ñugüinoi vae coti Judas jupíe. Güiraa reta mechero jare ivira jare quisepucu reta. ⁴ Jayave Jesús oo jae reta ñugüinoi vae coti jare jei:

—¿Quía pa peeca?

Echa'ã jae uicuaa ma mbae uyeyapota chupe vae.

⁵—Jesús Nazaret pegua —jei reta.

—Che co jae —jei Jesús.

Jare Judas - jae co umee jovaicho reta pe vae - uyemboi oĩ joco pe jae reta ndive. ⁶ Jesús jei yave chupe reta: “Che co jae”, jae reta opa usiri jaicue coti jare oa reta ivi re. ⁷ Jayave Jesús upirandu ye chupe reta:

—¿Quía pa peeca?

Jei reta ye:

—Jesús Nazaret pegua.

⁸—Amimbeu ma peve che co jae —jei Jesús—. Pe reta che chereca. Jáeramo pemaño cua che ndive ñugüinoi vae reta re yugüiraa ye vaerã —jei.

⁹ Cua jei uyeyapo vaerã tenonde yave jei vae: “Amicañi'ã penti ave nde neme cheve vae reta güi.” Jucuarãi jei ma. ¹⁰ Jare Simón Pedro güinoi penti quisepucu. Jayave uequi jiru güi jare uiporu sacerdote tenondegua jembiocui inambi iyacata cotigua re, jare uyasia inambi chugüi. (Jocua uyeyocui vae jee co Malco.) ¹¹ Jayave Jesús jei Pedro pe:

—Ñõono ye nde quisepucu jiru pe. Aiporarañotai co. Echa'ã cheRu uipota aiporara vaerã —jei.

Jesús Anás jova

(Mt 26.57-58; Mr 14.53-54; Lc 22.54)

¹² Jayave sundaro reta juvicha ndive jare judío reta itenondegua reta jembiocui reta uipisi Jesús uñapiti. ¹³ Jayave güiraa Jesús Anás pe rani - jae co Caifás jembireco tu - Caifás co jae sacerdote tenondegua jocua año. ¹⁴ Tenonde yave cua Caifás umimbeu judío reta pe icavita co chupe reta penti cuimbae umano vaerã opaete vae reta ipepica pe.

Pedro Anás joca pe

(Mt 26.69-70; Mr 14.66-68; Lc 22.55-57)

¹⁵ Jare Simón Pedro jare ñru temimboe yugüiraa Jesús jaicue. Jare cua ñru temimboe uique sacerdote tenondegua joca pe Jesús uique yave. Echa'ã sacerdote tenondegua uicuaa cua temimboe. ¹⁶ Ërei Pedro uique'ã japípe pe. Upita uyemboi oĩ onque tuicha vae iyipi pe. Jayave ñru temimboe sacerdote tenondegua uicuaa vae oẽ umingueta cuñatai onque uãro vae pe jare uruique Pedro. ¹⁷ Jayave cuñatai onque uãro vae jei Pedro pe:

—¿Jae'ã pa co nde penti jocua cuimbae jemimboe?

—Jae'ã co che —jei Pedro.

¹⁸ Jare sacerdote tenondegua jembiocui reta jare judío reta itenondegua reta jembiocui reta uyapo ma tata jare uyemboi reta tata iyipi rupi uyepée vaerã. Echa'ã roi co. Pedro vi upita joco pe uyemboi oĩ jae reta ndive uyepée vaerã.

Anás upirandu Jesús pe

(Mt 26.59-66; Mr 14.55-64; Lc 22.66-71)

¹⁹ Jayave sacerdote tenondegua upirandu Jesús pe jemimboe reta re jare iporombocue. ²⁰ Jayave Jesús jei chupe:

—Che ayemingueta co opaete vae jovaque. Jecuaeño aporombocue judío reta itupao reta pe jare Tumpa jo pe. Echa'ã joco pe jecuaeño uyembati judío reta. Ayemingueta viari'ã etei —jei—. ²¹ ¿Maera pa ndepirandu cheve? Epirandu uyapisaca cheré vae reta pe che jae chupe reta vae re. Jae reta uicuaa che jae vae —jei.

²² Cua jei ma yave Jesús, penti judío reta itenondegua reta jembiocui joco pe oĩ vae ocua Jesús jova re.

—¿Maera pa jucuarãi ndiyemingueta sacerdote tenondegua pe? —jei.

²³ —Icavi'ã ayemingueta yave, emimbeu mbae ra icavi'ã —jei Jesús—. Ërei icavi ayemingueta. ¿Maera pa ndecua cheré? —jei.

²⁴ Jayave Anás omondo Jesús iyocuaa reve Caifás pe - jae vi co sacerdote tenondegua.

Pedro uicuacu Jesús

(Mt 26.71-75; Mr 14.69-72; Lc 22.58-62)

²⁵ Jare Simón Pedro uyemboi uyepee oĩ. Īru vae reta jei chupe:

—¿Jae'ã pa co nde penti jemimboe?

Pedro uicuacu. Jei:

—Jae'ã co che.

²⁶ Penti sacerdote tenondegua jembiocui - jae co jocua cuimbae Pedro uyasia inambi chugüi vae jentarã - jei Pedro pe:

—Che nduecha co temiti reta ñugüinoi vae pe jae ndive.

²⁷ Pedro jei ye:

—Jae'ã co che.

Jare cua jei ma yave, uru cuimbae uñee.

Jesús Pilato jovai

(Mt 27.1-2, 11-14; Mr 15.1-5; Lc 23.1-5)

²⁸ Jayave güiraa reta Jesús Caifás jenta güi palacio pe. Neimbove asi. Jae reta uique'ã palacio japipe pe. Echa'ã uique yave joco pe jocua ara, iporomboe umimbeu chupe reta uyeminguiaata tēi co, jare ndarau tēi ipuere jou tembiu pascua pegua. ²⁹ Jayave Pilato oē chupe reta.

—¿Mbae re pa pembijeco cua cuimbae? —jei chupe reta.

³⁰ —Cua cuimbae jecocavi yave mona, ndarau tēi numee ndeve —jei reta.

³¹ —Pe reta etei peraa peãa vaerã peporoyocui rupi —jei Pilato.

—Romano reta umaño'ã oreré nduyuca vaerã quía —jei reta.

³² Jucuarãi jei reta, uyeyapo vaerã Jesús jei ma uyeyapota chupe vae. Echa'ã Jesús umimbeu ma quirãita co umano. ³³ Jayave Pilato uique ye palacio pe jare ueni Jesús.

—¿Nde pa co jae judío reta juvicha guasu? —jei.

³⁴ —¿Ndeño pa ndiyemingueta jucuarãi, ani ĩru vae reta pa umimbeu ndeve cheregua? —jei Jesús.

³⁵ —Che penti judio'ã co —jei Pilato—. Nerentaigua reta jare sacerdote reta itenondegua reta nemee cheve. ¿Mbae pa ndiyapo? —jei.

³⁶ —Che co jae penti mburuvicha guasu —jei Jesús—, ěrei che jae'ã co mburuvicha guasu ivi pegua reta rami. Che jocua reta rami yave mona, cherembiocui reta uñerãrota tēi co, agüiye vaerã añemee judío reta pe. ěrei che jae'ã co mburuvicha guasu ivi pegua reta rami —jei Jesús.

³⁷ Jayave Pilato jei chupe:

—¿Nde pa co jae penti mburuvicha guasu?

—Nde ndere rami che co jae penti mburuvicha guasu —jei Jesús—. Cuarã ayeyapo cuimbaerã. Cuarã ayu ivi pe. Ayu amimbeu vaerã añete vae. Opaete añete vae güirovia vae reta uyapisaca chiñee re —jei.

³⁸ Jayave Pilato upirandu chupe:

—¿Mbae pa jocua añete vae?

Pilato jei Jesús umanota co

(Mt 27.15-31; Mr 15.6-20; Lc 23.13-25)

Jare cua jei ma yave, Pilato oē ye judío reta jovai jare jei chupe reta:

—Avãe'ã etei teco jese. ³⁹ ěrei pe reta jecuaño pipota ayora vaerã peve penti pereso pascua pe. ¿Pipota pa ayora vaerã peve cua judío reta juvicha guasu? —jei chupe reta.

⁴⁰ Jae reta iñeeãta reve jei:

—Agüiye iyora jocua cuimbae. Iyora oreve Barrabás —jei reta.

Jocua Barrabás co jae imonda vae.

19

¹ Jayave Pilato güiraaca Jesús uinupaca chicote pe. ² Jare sundaro reta oñope yurãti catuii vae jare umbapia oñono Jesús iñãca re. Jare omondeca reta Jesús pe temimonde pĩta vae. ³ Jayave jei reta chupe:

—¡Viva, judío reta juvicha guasu!

Jayave ocua reta jese ipo pe.

⁴ Jayave Pilato oẽ ye, jare jei judío reta pe:

—Mase, aruta peve picuaa vaerã avãe'ã co teco jese.

⁵ Jayave Jesús oẽ. Güinoi jocua yurãti catuii vae iñãca re jare omonde temimonde pĩta vae. Jayave Pilato jei chupe reta:

—Mase, co oĩ cua cuimbae.

⁶ Sacerdote reta itenondegua reta jare jembiocui reta uecha yave Jesús, iñeeãta reve jei:

—¡Icutuca curusu re, icutuca curusu re!

Jayave Pilato jei chupe reta:

—Pe reta etei peraa picutuca curusu re. Echa'ã che avãe'ã etei teco jese —jei.

⁷ Judío reta jei Pilato pe:

—Ore nonoi penti mboroyocui, jare jocua mboroyocui rupi umanota co. Echa'ã jei jae co Tumpa Tai —jei reta.

⁸ Cua uyandu yave, Pilato uquiye ete. ⁹ Jayave uique ye palacio pe jare upirandu Jesús pe:

—¿Quía pegua pa nde?

Èrei Jesús jei'ã mbae ave chupe. ¹⁰ Jayave Pilato jei chupe:

—¿Maera pa niñee nemoẽ'ã cheve? Che anoi mbaepuere nducutuca vaerã curusu re. Anoi vi mbaepuere ndoyora vaerã. ¿Ndicuaa'ã pa cua? —jei.

¹¹ —Tumpa umaẽño'ã nderé yave, ndarau tẽi ndepuere cheré —jei Jesús—. Jáeramo chemee ndeve vae iyoa ete ma co.

¹² Cua uyandu ma yave, Pilato uipota tẽi oyora Jesús. Èrei judío reta iñeeãta reve jei:

—Cua cuimbae ndiyora yave, nde ndiyeyocui'ã ma co César pe. Echa'ã ipotave jei jae co mburuvicha guasu vae oyovaicho ma César ndive —jei reta.

¹³ Pilato cua uyandu yave, güinoẽ Jesús jare uguapi Empedrado jee vae pe. (Cua co jee Gabata hebreo iñee pe.) Echa'ã joco pe jecuaẽño uãa teco güinoi vae reta. ¹⁴ Jare jocua ara judío reta uyeyapicatu ñugüinoi pascua peguarã, jare ara mbite seri ma. Jayave Pilato jei judío reta pe:

—Co oĩ peruvicha guasu.

¹⁵ Jayave jae reta iñeeãta reve jei:

—¡Eraaca cua güi, eraaca cua güi, icutuca curusu re!

Pilato upirandu chupe reta:

—¿Aicutucata pa peruvicha guasu?

Jayave sacerdote reta itenondegua reta jei:

—Jaeño César oreruvicha guasu.

¹⁶ Jayave Pilato umee Jesús chupe reta uicutuca vaerã curusu re. Jayave jae reta uipisi Jesús güiraa.

Jesús uyecutuca curusu re jare umano

(Mt 27.32-44; Mr 15.21-32; Lc 23.26-43)

¹⁷ Jayave Jesús oẽ jare ovoi güiraa icurusu. Jayave sundaro reta güiraa Jesús Ñacauerenda jee vae pe. (Cua co jee Gólgota hebreo iñee pe.) ¹⁸ Joco pe uicutu reta Jesús curusu re. Uicutu reta vi ñru mocui cuimbae reta jare oñono penti Jesús iyacata coti jare ñru iyaso coti. Jesús oĩ mbite pe. ¹⁹ Jare Pilato uicutafá curusu re oñonoca vaerã. Cuarã uyecuatía oĩ: “Jesús Nazaret pegua, judío reta juvicha guasu.” ²⁰ Jare jeta judío reta umingueta cua uyecuatía oĩ vae. Echa'ã Jesús uyecutuca vae coiño oĩ tenta guasu güi. Jare uyecuatía oĩ hebreo iñee pe jare griego iñee pe jare latín pe. ²¹ Jayave judío reta isacerdote reta itenondegua reta jei Pilato pe:

—Agüiyeta tẽi co ndicutafía: ‘Judío reta juvicha guasu.’ Ndicuatiata tẽi co: ‘Cua cuimbae jei: Che co jae judío reta juvicha guasu’ —jei reta.

²² —Cua aicutafía vae aicutafía ma co —jei Pilato.

²³ Jare sundaro reta uicutu ma yave Jesús, irundi reve uyembiiya Jesús jemimonde re umbiyao ma yave. Èrei jemimonde pucu vae uyembiviví'ã. Uyeyapo penti güiño. Cua vi sundaro reta uequi chugüi. ²⁴ Jayave sundaro reta jei uyupe:

—Agüiye yamondoro. Yayuguari jese, yaicuaa vaerã quía güiraa vae —jei reta.

Cuarāi uyeyapo Tumpa iñee pe uyecuatía oī vae. Echa'a uyecuatía oī cuarāi: “Uyuguari reta cheremimonde re, uicuaa vaerā mbae nunga penti penti güiraa iyupe vaerā.” Jucuarāi uyecuatía oī, jare jucuarāi uyapo sundaro reta.

²⁵ Jare uyemboi ñugüinoi Jesús icurusu iyipi pe Jesús ichi, jare ichi ipiquii, jare María - jae co Cleofas jembireco - jare María Magdalena. ²⁶ Jesús uecha ichi jare jemimboe jae uau vae uyemboi ñugüinoi coiño chugüi. Jare jei ichi pe:

—Chesi, joco oī nemembirā.

²⁷ Cua jaicue rupi jei jemimboe pe:

—Joco oī ndesirā.

Jáeramo jocua ora güive jocua jemimboe güiraa jenta pe Jesús ichi.

Jesús umano

(Mt 27.45-56; Mr 15.33-41; Lc 23.44-49)

²⁸ Cua jaicue rupi Jesús jei:

—Cheúe.

Cuarāi uyeyapo ma Tumpa iñee pe uyecuatía oī vae. Echa'a Jesús uicuaa opaete iparaviquí opa ma. ²⁹ Jare joco pe oī vinagre penti yapepo pe. Jayave umāqui reta esponja vinagre pe. Jayave oñono reta ivira re jare omondo Jesús iyuru pe. ³⁰ Jare Jesús jou ma yave vinagre, jei:

—Opa ma ayapo Tumpa jei vae.

Jayave iñācatindi jare umano.

Jesús iyique uyecutu

³¹ Jare jocua ara judío reta uyeyapicatu ñugüinoi pascua peguarā. Jáeramo uyerure reta Pilato pe omopēca vaerā curusu re ñugüinoi vae reta itimaca jare güiraaca vaerā joco güi. Echa'a uipota'a jetecue reta upita vaerā curusu reta re jocua mbutuu ara pe. Echa'a jocua mbutuu ara uyepiu reta. ³² Jáeramo sundaro reta yugüiraa omopē penti cuimbae Jesús ndive curusu re uyecutu oī vae itimaca. Jayave omopē iru cuimbae itimaca. ³³ Ērei yugüiraa yave Jesús pe, uecha umano ma. Jáeramo omopē'a itimaca. ³⁴ Ērei penti sundaro uicutu Jesús iyique pe, jare oē voi tugüi jare i. ³⁵ Jare uecha vae umimbeu cua, pe reta vi perovia vaerā. Jare cua umimbeu vae añete co. Echa'a jae uicuaa cavi umimbeu vae añete co. ³⁶ Echa'a opaete cua uyeyapo Tumpa iñee pe uyecuatía oī vae uyeyapo vaerā. Echa'a uyecuatía oī cuarāi: “Ndarau icāgüe ave opē.” ³⁷ Jare: “Umaeta reta jocua uicutu vae re.” Jucuarāi uyecuatía oī.

Oñoti reta Jesús jetecue

(Mt 27.57-61; Mr 15.42-47; Lc 23.50-56)

³⁸ Cua jaicue rupi José Arimatea pegua uyerure Pilato pe güiraa vaerā Jesús jetecue. Cua José co jae penti Jesús jemimboe, ěrei uyecuaaca'a. Echa'a uquiye judío reta güi. Jayave Pilato jei chupe ipuere güiraa Jesús jetecue. ³⁹ Nicodemo ou vi - jae co tenonde yave oo pītu yave Jesús pe vae. Jae güeru mirra jare áloes uyeacue vae. Uepiti treinta kilo rupi. ⁴⁰ Jayave umbigüeyi reta Jesús jetecue, jare oñoma mbae ipiche cavi vae reta reve nieso pe. Echa'a jucuarāiño mai uyapo judío reta, jetecue oñoti yave. ⁴¹ Jare Jesús uyecutua vae pe oī penti temiti reta ñugüinoi vae, jare jocua ipite pe oī penti teögüeriru ipiau vae - ndei quía uñeñoño pipe vae pe. ⁴² Jocua ara judío reta uyeyapicatu ñugüinoi pascua peguarā. Jáeramo oñono reta Jesús jetecue jocua teögüeriru pe. Echa'a coiño oī.

20

Jesús icove ye

(Mt 28.1-10; Mr 16.1-8; Lc 24.1-12)

¹ Jare ndei cōe cavi mbove domingo ara pe María Magdalena ou teögüeriru pe, jare uecha ita uyembisiri ma teögüeriru güi. ² Jayave osi oo Simón Pedro jare iru temimboe Jesús uau vae ñugüinoi vae pe, jare jei chupe reta:

—Güiraa reta ma yandeYa teögüeriru güi, jare nduicuaa'a quiape ra oñono reta.

³ Jayave Pedro jare iru temimboe oē pāve jare yugüiraa teögüeriru coti. ⁴ Mocui reve osi pāve yugüiraa, ěrei iru temimboe iñacua ete Pedro güi, jare oo uvāe teögüeriru pe Pedro jenonde. ⁵ Jayave ipe umae vaerā japipe coti, jare uecha nieso reta joco pe oī, ěrei uique'a. ⁶ Jayave Simón Pedro oo uvāe jaicue rupi, jare uique teögüeriru pe. Jare

uecha nieso reta joco pe oī. ⁷ Uecha vi nieso Jesús iñāca re tenonde yave uñeñono vae uñeñomañoma oī tee ĩru nieso reta güi. ⁸ Jayave jocua ĩru temimboe vi - jae Pedro jononde oo uvāe vae - uique teōgüerĩru pe, jare uecha yave, upurugüirovia. ⁹ Echa'ā ndei uicuaa cavi reta Tumpa iñee pe uyecuatía oī vae quirāi Jesús icove yeta ou umanocue vae reta ipite güi. ¹⁰ Jayave temimboe reta yugüiraa ye jenta pe.

Jesús uyecuaa María Magdalena pe

(Mr 16.9-11)

¹¹ Ĕrei María uyemboi oī teōgüerĩru iyipi pe. Uyao oī. Jare uyao oī rambueve, ipe umae vaerā teōgüerĩru japipe coti. ¹² Jare uecha mocui ángel reta uguapi ñugüinoi Jesús jetecue uñeñono vae pe. Jemimonde tĩ asi co. Penti uguapi oī Jesús iñāca jendacue coti jare ĩru uguapi oī Jesús ipita jendacue coti. ¹³ Ángel reta jei María pe:

—¿Maera pa ndiyao?

—Güiraa reta ma cheYa, jare aicuaa'ā quiape ra oñono reta —jei María.

¹⁴ Cua jei ma yave, María uyerova jare uecha Jesús uyemboi oī joco pe. Ĕrei uicuaa'ā jae co Jesús vae. ¹⁵ Jayave Jesús jei chupe:

—Cuña, ¿maera pa ndiyao? ¿Quía pa ndeeca?

María ipia pe uyemingueta tēi jae co temiti reta iyandarecoa. Jáeramo jei chupe:

—Carai, nde nderaa yave, emimbeu cheve quiape niñono, jare che araata.

¹⁶ —¡María! —jei Jesús chupe.

María uyerova ye icoti jare jei chupe:

—Raboni. (Cua uipota jei: “Oporomboe vae”).

¹⁷ Jayave Jesús jei chupe:

—Agüiye chepisi. Echa'ā ndei ayupi cheRu pe. Ĕrei ecua emimbeu cherivi reta pe che jae cuarāi: ‘Aata ma cheRu pe - jae co peRu vi. Jae co cheTumpa - jae co peTumpa vi’ —jei.

¹⁸ Jayave María Magdalena oo umimbeu Jesús jemimboe reta pe.

—Aecha ma yandeYa —jei.

Jayave umimbeu chupe reta Jesús jei chupe vae.

Jesús uyecuaa jemimboe reta pe

(Mt 28.16-20; Mr 16.14-18; Lc 24.36-49)

¹⁹ Jare jocua pĩtu - domingo ara pe - Jesús jemimboe reta uyembati jare uyuquenda jonque reta. Echa'ā jae reta uquiye judío reta güi. Jayave ou Jesús uyemboi ipite pe jare jei chupe reta:

—Pepiacatu.

²⁰ Cua jei ma yave, Jesús uechaca chupe reta ipo jare iyique. Jayave Jesús jemimboe reta uyerovia. Echa'ā uecha ma iYa. ²¹ Jayave Jesús jei ye chupe reta:

—Pepiacatu. CheRu chembou. Jae ramiño vi che pomondo —jei.

²² Jare cua jei ma yave, iputúe omoē icoti reta jare jei:

—Amee ma peve Espĩritu Santo. ²³ Pembroa yave ipotave vae pe imbaeyoa, imbaeyoa uyembaita co. Jare pembroa'ā yave ipotave vae pe imbaeyoa, imbaeyoa ndarau uyembai —jei.

Tomás güirovia'ā Jesús regua

²⁴ Jare jocua doce jemimboe reta güi penti Tomás jee vae - jae co Choguaquiri pe uyembijee vae - oī'ā joco pe ĩru reta ndive Jesús ou yave. ²⁵ Jare ĩru Jesús jemimboe reta jei Tomás pe:

—Nduecha ma yandeYa.

Ĕrei Tomás jei:

—Aecha'ā yave uyecuturendacue ipo re jare añoño'ā yave chepoāca uyecuturendacue pe jare añoño'ā yave chepo iyique pe, ndarau arovia.

²⁶ Ocho ara uasa ma yave, temimboe reta ñugüinoi ye jocua o pe. Tomás joco pe oī vi. Yepe tēi onque reta uyeyuquenda ñugüinoi, Ĕrei Jesús ou uyemboi ipite pe jare jei:

—Pepiacatu.

²⁷ Jayave jei Tomás pe:

—Emae chepo re. Iñono cua pe nepoāca. Eupi ndepo iñono cheyique pe. Agüiye ma ico ndepurugüirovia mbae reve. Mburugüirovia reve ma ico —jei.

²⁸ —Nde co jae cheYa jare cheTumpa —jei Tomás.

²⁹ Jayave Jesús jei:

—Ndepurugüirovia ma cherecha ramo. Tuicha uyeroviata jocua cherecha mbae reve upurugüiroviata vae reta —jei.

Maera uyecuatía oĩ cua ñee reta

³⁰ Jare Jesús uyapo jemimboe reta jovaque jeta ñru miacañi reta uicuaaca vaerã quía co jae, yepe tēi uyecuatía'ã oĩ cua pe. ³¹ Ërei aicuatía cua pe uyecuatía oĩ vae, perovia vaerã Jesús co jae Cristo - jae co Tumpa Tai - jare penoi vaerã tecove opa mbae vae cua perovia yave.

21

Jesús uyecuaa siete jemimboe reta pe

¹ Cua jaicue rupi Jesús uyecuaa ye jemimboe reta pe i Tiberias jee vae iyipi pe. Uyecuaa chupe reta cuarãi: ² Simón Pedro jare Tomás - jae co Choguaquiri pe uyembijee vae - jare Natanael Caná pegua - jocua Caná Galilea pegua co - jare Zebedeo tai reta jare mocui ñru temimboe reta uyembati. ³ Jayave Simón Pedro jei ñru reta pe:

—Aata pira aipisi vaerã.

—Ore ndoota vi nde ndive —jei reta.

Jayave yugüiraa uyupi chalana pe. Ërei jocua pĩtu uipisi'ã mbae ave. ⁴ Jare cõeta ma yave Jesús uyemboi oĩ i jembei pe. Ërei temimboe reta uicuaa'ã jae co Jesús. ⁵ Jayave Jesús jei chupe reta:

—Cherivi reta, ¿pipisi ma pa mbae?

—Nduipisi'ã mbae ave —jei reta chupe.

⁶ —Pemombo pepisa chalana iyacata coti jare pipisita pira reta —jei Jesús.

Jayave jucuarãi uyapo reta, jare ipuere'ã ma umiãta pisa i güi jeta ete pira omboa ramo. ⁷ Jayave jocua temimboe Jesús uau vae jei Pedro pe:

—Jae co yandeYa.

Simón Pedro uyandu yave jocua cuimbae co jae iYa, uyemonde jare ugüeyi voi i pe. Echa'ã omboi jemimonde uparaviqui cavi vaerã. ⁸ Jare ñru reta yugüeru chalana pe. Jae reta umiãta pisa pira reve. Echa'ã coiño ñugüinoi i jembei güi - cien metro rupi. ⁹ Jare yugüeru oē i güi yave, uecha tata tatãpi reve joco pe. Uecha vi pira tatãpi iárambo jare mbiyape vi. ¹⁰ Jayave Jesús jei chupe reta:

—Peru mbovi pira pipisi vae.

¹¹ Jayave Simón Pedro uyupi ye chalana pe jare umiãta pisa i güi. Pisa tinee pira tuichacue vae pe - güinoi ciento cincuenta y tres. Ërei yepe tēi jeta ete, ãrei omondoro'ã pisa. ¹² Jayave Jesús jei chupe reta:

—Peyu rani pecaru.

Jare penti ave jemimboe iquirēi'ã upirandu chupe: “¿Quía pa co nde?” Echa'ã uicuaa jae co iYa. ¹³ Jayave Jesús oo uipisi mbiyape umee chupe reta. Jae ramiño vi umee chupe reta pira. ¹⁴ Jare mbapi vese ma cua re Jesús uyecuaa jemimboe reta pe icove ye güive ou umanocue vae reta ipite güi.

Emingararu cheovecha reta

¹⁵ Ucaru reta ma yave, Jesús jei Simón Pedro pe:

—Simón, Jonás tai, ¿cherau ete pa cua reta güi?

—Nduau, cheYa —jei Pedro—. Ndicuaa che nduau co.

—Emingararu cheovecha-rai reta —jei Jesús chupe.

¹⁶ Jesús jei ye chupe:

—Simón, Jonás tai, ¿cherau pa?

—Nduau, cheYa —jei ye Pedro—. Ndicuaa che nduau co.

—Iyandareco cheovecha reta re —jei Jesús.

¹⁷ Jesús jei ye chupe mbapi veca re:

—Simón, Jonás tai, ¿cherau pa?

Pedro ipiatiti. Echa'ã mbapi vese ma Jesús jei chupe: “¿Cherau pa?” Jayave jei ye:

—CheYa, nde ndicuaa opaete. Nde ndicuaa che nduau co.

—Emingarú cheovecha reta —jei Jesús chupe—. ¹⁸ Añete che jae ndeve, nde ndetairusu yave, ndiyemonde jare ndeguata ndipota ndeo vae rupi. Ërei nendechi ma yave, ndeupita ndeyiva jare ïru vae omondecata ndeve jare ndereraata ndipota'ã ndeo vae pe —jei.

¹⁹ Cua jei Jesús umimbeu vaerã quirãita co umano Pedro. Jare Pedro umano yave, Tumpa uyembiadoracata imano rupi. Jayave Jesús jei Pedro pe:

—Eyu che ndive.

Temimboe Jesús uau vae

²⁰ Pedro uyerova yave, uecha jocua temimboe Jesús uau vae ou jaïcúe. Jocua temimboe co jae tenonde yave ucaru ñugüinoi yave ucaru oï Jesús iyipi pe jare: “¿Quía pa nemeeta, CheYa?” jei chupe vae. ²¹ Jare Pedro uecha yave jocua temimboe, upirandu Jesús pe:

—¿Mbae pa uyeyapota chupe, cheYa?

²² Jesús jei chupe:

—Che aipota yave jae ico vaerã che ayu ye regua, jocua mbae'ã co ndeve. Nde eyu che ndive —jei.

²³ Jare opaete upurugüirovia vae reta uicuaa cua Jesús jei vae, jare ipia pe uyemingueta tēi cua uipota jei jocua jemimboe ndarau umano. Ërei Jesús jei'ã ndarau umano. Jaeño jei: “Che aipota yave jae ico vaerã che ayu ye regua, jocua mbae'ã co ndeve.”

²⁴ Che co jae jocua Jesús jemimboe, jare che amimbeu añete co cua pe uyecuatía oï vae. Echa'ã che aicuatía cua. Jare opaete nduicuaa cua amimbeu vae añete co.

²⁵ Jare ime ye jeta mbaembae Jesús uyapo vae. Opaete cua mbaembae regua uyecuatía oï yave penti penti rupi, uatata opaete tupapire jendarã cua ivi pe. Amén.

LOS HECHOS DE LOS APÓSTOLES

Espíritu Santo outa

¹ Teófilo, tenonde acuatía ndeve vae pe amimbeu ndeve opaete Jesús uyapo vae jare jocua oporombocue jese vae. ² Ndeí oo ye ara pe mbove, umee mboroyocui reta Espíritu Santo rupi jemimondo uiparavo vae reta pe. ³ Jesús imano rendave pe, uyecuaa chupe reta. Jae reta uicuaa catu jae icove ye co jeta mbaembae uyapo jovaque vae jeco pegua. Jesús uyecuaa chupe reta cuarenta ara, jare umingueta reta Tumpa iporoyocua re.

⁴ Jae reta uyembati yave, Jesús oyocui agüiye vaerã yugüiraa tenta guasu Jerusalén güi. Oyocui uãro vaerã yandeRu umeeta chupe reta vae. Jesús jei chupe reta:

—Jocua re chemiari ma peve. ⁵ Juan upurumbibautiza i pe, ñrei pe reta piyembibautizacata Espíritu Santo pe mbovi ara rupi —jei.

Jesús oo ye ara pe

⁶ Jayave yati vae reta upirandu Jesús pe: —OreYa, ¿nemañota pa Israel pegua reta re ueyeyapo vaerã mburuvicha retarã cua ara reta rupi?

⁷ —Ndarau picuaa jocua ara regua —jei Jesús—. Jaeño cheRu jeita jocua re —jei—. ⁸ Ñrei pe reta penoita Espíritu Santo imbaepuere, ou yave peve, jare pe reta chemimbeuta Jerusalén pe, opaete Judea rupi, Samaria rupi jare opaete ivi rupi —jei chupe reta.

⁹ Jare Jesús opa imiari chupe reta yave, oo ivate, jae reta umae jese rambueve. Jayave amañtu umbiyasoi Jesús, jare uecha'ã ma reta. ¹⁰ Jare umae ngatu ñugüinoi rambueve ara coti, Jesús oo rambueve, mocui cuimbae uyecuaa jae reta iyipi pe. Cua cuimbae reta jemimonde tĩ asi. ¹¹ Cua reta jei chupe reta:

—Cuimbae Galilea pegua reta, ¿maera pa piyemboi pema peĩ ara coti? Jesús oo ma pegüi ara pe. Ñrei jae etei ou yeta jucuarãi ete, peecha oo rami —jei reta.

Uiparavo reta ñru vae Judas ipepica pe

¹² Jayave temimondo reta yugüeru ye Jerusalén pe ivitu guasu Olivos jee vae güi. Jocua ivitu guasu coiño oĩ Jerusalén güi. Judío reta iporoyocui umaño uguata vaerã joco pe Jerusalén güi mbutuu ara pe. ¹³ Yugüeru uvãe yave, uique reta penti tenta pe, jare uyupi o ivate vae pe. Joco pe yugüireco Pedro, Jacobo, Juan, Andrés, Felipe, Tomás, Bartolomé, Mateo, Alfeo tai Jacobo jee vae, Simón Zelote jare Jacobo tivi Judas jee vae. ¹⁴ Opaete cua reta, jare Jesús ichi María jare ñru cuña reta, jare Jesús tivi reta jecuae uyerure penti ramíño.

¹⁵ Upurugüirovia vae joco pe ñugüinoi vae reta ciento veinte rupi. Jare penti ara Pedro uyemboi ipite pe jare jei:

¹⁶ —Cherivi reta, jupi co ueyeyapo vaerã David aracae uicuatía Judas re vae. Espíritu Santo etei cua umimbeu yandave David rupi. Judas güiraa cuimbae reta Jesús oĩ vae pe uipisica vaerã —jei—. ¹⁷ Jae icose yande ndive, jare uyparavo co uyapo vaerã cua mbaraviqui —jei—. ¹⁸ Jae uipisi corepoti icavi mbae vae uyapo vae re. Jayave corepoti pe ogua penti ivi. Joco pe oa ivate güi, jare jie osoro, jare opaete ichuri uyecuavo —jei Pedro—. ¹⁹ Cua jerãcua opaete Jerusalén pegua reta pe. Jáeramo jocua ivi jee Acéldama jae reta ñnee pe —jei—. (Acéldama uipota jei: “Ivi tugüi jepicue”.) ²⁰ Echa'ã uyecuatía oĩ Tumpa ñnee pe Salmo reta pe cuarã:

‘Tuyeyapo ivi ipo mbae ico vae, jare agüiye quía tuico pipe.’

Jare:

‘Ñru vae tuyapo chugüi iparaviqui.’

Jucuarãi uyecuatía oĩ —jei chupe reta—. ²¹⁻²² Ime cua pe ñugüinoi cua cuimbae reta. Jae reta yugüireco yande ndive, yandeYa Jesús ico yande ndive rambueve. Echa'ã yugüireco yande ndive Juan umbibautiza Jesús güiye Jesús yandepite güi oo regua —jei Pedro—. Jáeramo icavi co cua cuimbae reta güi penti yaiparavo vaerã. Jae umimbeuta ñru vae reta pe yande ndive Jesús icove ye co ou umanocue vae reta ipite güi —jei chupe reta. ²³ Jayave

uiparavo reta mocui cuimbae. Penti jee co José Barsabás - jae co uyembijee Justo pe vae. Īru cuimbae jee co Matías. ²⁴ Jayave uyerure reta Tumpa pe cuarāi:

—OreYa, nde ndicuaa opaete vae ipia. Eechaca oreve quía nunga ra ndiparavo ma cua mocui cuimbae güi, ²⁵ jae ombori vaerā cua mbaraviqui pe, jare ico vaerā nderemimondorā. Judas opia cua mbaraviqui güi, icavi mbae vae uyapo ramo, jare oo ma jendarā jae uiparavo vae pe —jei reta Tumpa pe.

²⁶ Jayave uyuguari reta jee re, uicuaa vaerā quía nunga ra Tumpa uiparavo ma. Jare uiparavo Matías, jare jae uyeyapo Jesús jemimondorā ĩru once reta ndive.

2

Espíritu Santo ou

¹ Pentecostés ara pe opaete upurugüirovia vae reta penti ramiño uyembati. ² Jare aramoño ou ara güi jiapu vae penti ivitu tanta uyepeyu vae rami. Tanta jiapu uguapi ñugüinoi vae pe. ³ Jayave uyecuaa chupe reta tataendi rami. Cua uyecuaa penti penti iyapite re. ⁴ Jayave opaete joco pe ñugüinoi vae reta tinee Espiritu Santo pe, jare umbipi uyemingueta reta ambie vae iñee Espiritu Santo umee chupe reta uyemingueta vaerā vae pe.

⁵ Jare jocua ara reta pe yugüireco Jerusalén pe jeta judío ambiembie ivi güi yugüeru vae reta. Cua reta umbiadora Tumpa. ⁶ Jare cua jiapu vae uyendu yave, uyembati jeta vae, jare opaete vae ipiacañi. Echa'á upurugüirovia vae reta uyemingueta ñugüinoi, jare penti penti yati vae reta uyandu iñeei pe jei vae. ⁷ Ipiacañi reve jei reta:

—ĪMase, Galilea pegua reta co opaete cua uyemingueta vae reta! ⁸ ¿Quirāi ra yayandu uyemingueta ñaniñee ñanemichi güi ve yayemingueta pipe vae pe? —jei reta—. ⁹ Yande co jae Parto pegua, Medo, Elam, Mesopotamia, Judea, Capadocia, Ponto, Asia, ¹⁰⁻¹¹ Frigia, Panfilia jare Egipto pegua, jare Africa pegua Cirene iyipi pe yaico vae, jare romano reta cua pe yaico vae, Creta jare Arabia pegua. Yande co jae judío reta jare judiorā yayeyapo vae reta. Opaete yayandu ñaniñee pe uyemingueta ñugüinoi miacañi Tumpa uyapo vae re —jei reta.

¹² Jare opaete yati vae reta ipiacañi jare jei uyupe:

—¿Mbae ra co cua?

¹³ Īru vae reta oyoyai.

—Usavipo ñugüinoi —jei reta.

Pedro umimbeu yati vae reta pe

¹⁴ Jayave Pedro uyamboi jocua ĩru once Jesús jemimondo reta ndive, jare jei yati vae reta pe iñeeāta reve:

—Cuimbae Judea pegua reta, jare opaete pico Jerusalén pe vae. Cua regua pipota picuaa yave, piyapisaca chiñee re —jei—. ¹⁵ Pe reta pepia pe piyemingueta tēi cua reta usavipo ñugüinoi. Ērei jucuarāi'ā co. Echa'ā neimboveño co —jei—. ¹⁶ Tumpa iñee aracaе umimbeu vae Joel imiari cua re. Jae jei cuarāi:

¹⁷ 'Jare ara taicuegua reta pe' —jei Tumpa— 'ameeta cheEspiritu opaete vae pe.

Jare perai reta jare perayi reta umimbeuta chiñee.

Jare cunumi reta jare indechi vae reta upauta.

¹⁸ Jare jocua ara reta pe ameeta cheEspiritu cuimbae reta jare cuña reta uyeyocui cheve vae pe,

jare umimbeuta reta chiñee.

¹⁹ Jare tambou miacañi reta ara re jare ivi pe.

Imeta tugüi, tata jare tatāti.

²⁰ Guarasi uñemipitumimbita, jare yasi uyeyapota tugüi rami, ndei peYa ivāe ara ou mbove.

Jocua ara opaete vae ipiacañita co.

²¹ Jare opaete uyerureta peYa pe ombori vaerā vae reta uyembiasacata co' —jei.

Jucuarāi jei Joel —jei Pedro chupe reta.

²² Pedro jei vi chupe reta:

—Cuimbae Israel pegua reta, piyapisaca cua re. Tumpa uyapoca pepite pe miacañi reta Jesús Nazaret pegua pe. Jucuarāi Tumpa uechaca peve Jesús añete vae co. Cua

picuaa catu co pe reta —jei—. ²³ Cua Jesús uñemee umano vaerã, Tumpa jei vae uyeyapo vaerã. Tumpa uicuaa opaete ndei uyeyapo mbove. Ërei pe reta pipisi picutuca curusu re cuimbae jeco pochi vae reta pe piyucaca —jei—. ²⁴ Ërei Tumpa oyora mano yandepisi pipe vae güi, jare umbijecove ye güeru umanocue vae reta ipite güi. Echa'ã mano ipuere'ã etei oyopia Jesús —jei Pedro—. ²⁵ Echa'ã David jei Jesús re cuarãi:

‘Aecha cheYa jecuaeño cherovai.

Cheacata pe oĩ ramo, ndarau aquiye.

²⁶ Jáeramo ayerovia chepia pe,

jare chemiari ayecou reve.

Aicota co aãro reve.

²⁷ Echa'ã ndeeyata'ã cherecove umanocue vae reta ñugüinoi vae pe.

Che co jae jupi vae.

Nemaeñota'ã cheretecue re icumegua vaerã.

²⁸ Ndicuaaca cheve quirãi aico vaerã ayerovia reve,

jare ayerovia eteta vi nde ndive aĩ yave.’

Jucuarãi jei David —jei chupe reta—.

²⁹ Cherivi reta, chepuere chemiari peve yandetenondegua David re. Jae umano jare uñeñotica, jare iñeñoticarenda imeño oĩ yande ndive —jei Pedro—. ³⁰ Ërei Tumpa jei jee re David pe umbiguapita co David iguapia pe David iñemoñaa reta güi penti oporoyocui vaerã. Jocua co jae Cristo, Tumpa ombou vae. Opaete cua David uicuaa. Echa'ã David Tumpa iñee aracae umimbeu vae ico ramo, ³¹ uicuaa ndei uyeyapo mbove, jare imiari Cristo icove yeta ou umanocue vae reta ipite güi vae re. Echa'ã jei Cristo re uyeeyata'ã co jecove umanocue vae reta ñugüinoi vae pe, jare icumeguata'ã co jetecue —jei—.

³² Tumpa umbijecove ye cua Jesús güeru umanocue vae reta ipite güi, jare ore opareve cua numimbeu ñru vae reta pe —jei—. ³³ Tumpa güiraa ma ara pe imbaepuere pe, jare umee chupe jocua jei umeeta chupe Espíritu Santo vae. Jáeramo Jesús etei ombou cua peecha jare piyandu vae —jei Pedro chupe reta—. ³⁴ Echa'ã David uyupi'ã ara pe. Ërei jae etei jei cuarãi:

‘YandeYa jei cheYa pe:

Eguapi cheyipi pe cheacata coti,

³⁵ nderovaicho reta opa amiamiri regua’ —jei.

Jucuarãi jei David —jei Pedro chupe reta—.

³⁶ Pe reta co jae Israel pegua reta. Jáeramo picuaa catu cua. Pe reta picutuca Jesús, ãrei Tumpa uyapo ma yandeYarã - jae co Cristo —jei Pedro.

³⁷ Cua uyandu reta yave, tuicha rupi ipiatiti reta, jare upirandu Pedro jare ñru Jesús jemimondo reta pe:

—Oreriquei reta, ¿mbae pa nduyapota?

³⁸ Jayave Pedro jei chupe reta:

—Peeya piyemingueta icavi mbae vae pepia pe oĩ vae, jare piyembibautizaca Jesucristo jee re, Tumpa umbiasa vaerã peve pemaeyoa reta. Jare jae umeeta peve Espíritu Santo —jei—. ³⁹ Echa'ã cua Tumpa jei umeeta vae co jae pemaerã, perai reta peguarã, opaete mbiri ñugüinoi vae reta peguarã jare opaete yandeYa Tumpa uenita vae reta peguarã —jei.

⁴⁰ Jare Pedro umbiaracuaa jeta ye ye. Jei chupe reta:

—Añave yugüireco vae reta icavi mbae vae uyapo. Piyembiasaca pe reta cua reta güi —jei.

⁴¹ Jayave Pedro jei vae güirovia vae reta uyembibautizaca, jare jocua ara tres mil rupi uñemñru upurugüirovia vae reta ndive. ⁴² Jare jecuae upurugüirovia vae reta uyemboe Jesús jemimondo reta iporomoe re, jare opaete penti ramiño ñugüinoi. Jecuae uyembati, umbiyao tembú uyupe, jare uyerure Tumpa pe.

Upurugüirovia vae reta uyapo vae

⁴³ Jare opaete tenta guasu pegua reta ipiacañi, jare Jesús jemimondo reta uyapo jeta miacañi reta. ⁴⁴ Jare opaete upurugüirovia vae reta uyembati, jare opaete imbaembae reta penti ramiño co. ⁴⁵ Jare umee imbaembae reta, jare umbiyao jepicue mbaeti mbae güinoi vae reta pe. ⁴⁶ Jare opa ara yugüiraa päve uyembati Tumpa jo pe. Jare tenta tenta

rupi umbiyao tembú uyupe jare ucaru pāve reta uyerovia jare ipiacatu reve. ⁴⁷ Jae reta umbiadora Tumpa, jare opaete tenta guasu pegua reta umae cavi jese reta. Jare opa ara yandeYa umiiru jae reta ndive uyembiasaca vae reta.

3

Uguata mbae vae ucuera

¹ Pedro jare Juan yugüiraa pāve Tumpa jo pe, Tumpa pe uyerure vaerā, mbapi ora ma caaru yave. ² Jare iru vae reta güeru opa ara rupi penti cuimbae ipuere mbae uguata vae oñono Tumpa jo jonque pe. Cua onque jee co ipōra vae. Cuimbae ichi güi oa güive ipuere'ā etei uguata. Jocua onque pe cuimbae uyerure corepoti re Tumpa jo pe uique vae reta pe. ³ Cuimbae uecha Pedro jare Juan ndei uique Tumpa jo pe mbove, jare uyerure corepoti re chupe reta. ⁴ Jayave Pedro jare Juan umae ngatu jese, jare Pedro jei:

—Emae oreré.

⁵ Jayave cuimbae umae ngatu jese reta, umeeta echa mbae chupe ramo. ⁶ Ērei Pedro jei:

—Mbaeti anoi corepoti jare oro. Ērei anoi vae tamee ndeve. Jesucristo Nazaret pegua jee re epüa jare eguata —jei chupe.

⁷ Jayave Pedro uipisi cuimbae ipo iyacata pe umupüa. Jare jupivoiño ipirāta cuimbae ipi jare ipiñúa. ⁸ Jare cuimbae uyemboi voi. Jayave uguata jare uique jae reta ndive Tumpa jo pe. Uguata jare upiriquiriqui oo, jare umbiadora Tumpa. ⁹ Jare opaete tenta guasu pegua reta uecha uguata jare umbiadora Tumpa. ¹⁰ Uicuaa reta jae co uguapise Tumpa jo jonque ipōra vae pe uyerure corepoti re vae. Jare ipiacañi reta. Uquiye reta vi cua uyeyapo cuimbae pe vae re.

Pedro umimbeu yati vae reta pe oca Salomón jee vae pe

¹¹ Cuimbae ucuera ma vae uyepisi Pedro jare Juan re. Jare opaete tenta guasu pegua reta osi uyembati ipiacañi reve jae reta ñugüinoi vae pe oca Salomón jee vae pe. ¹² Jayave Pedro uecha yave, jei tenta guasu pegua reta pe:

—Cuimbae Israel pegua reta, ¿maera pa pepiacañi cua re? ¿Maera pa pemae ngatu oreré? ¿Pepia pe piyemingueta pa oreiño nduyapo uguata vaerā cua cuimbae orembaepuere rupi ani jupi vae nduyapo ramo? Jucuarāi'ā co —jei—. ¹³ Abraham, Isaac, Jacob jare yandetenondegua reta iTumpa umbiadoraca ma Jesús - jae co Tumpa Tai. Cua Jesús pe reta pemee, jare perñiro Pilato jovai. Echa'ā Pilato jei tēi oyoraca vaerā —jei—. ¹⁴ Ērei pe reta perñiro cua Jesús - jae co iyoa mbae vae jare jupi vae - jare piyerure Pilato pe oyoraca vaerā peve penti upuryuca vae —jei Pedro—. ¹⁵ Jare piyucaca jocua tecove umee yandeve vae. Jae co Tumpa umbijecove ye güeru umanocue vae reta ipite güi. Jocua co ore numimbeu nduico —jei—. ¹⁶ Mburugüirovia Jesús jee re vae jeco pegua, jae jee umbigüera cua cuimbae pe reta peecha jare picuaa vae. Añete co, jocua mburugüirovia Jesús umee vae umbigüera cavi ete cua cuimbae opaete pe reta perovaque —jei chupe reta—.

¹⁷ Añave, cherivi reta, aicuaa peruvicha reta jare pe reta vi piyapo cua icavi mbae vae, picuaa'ā ramo —jei—. ¹⁸ Ērei jucuarāi uyapo Tumpa, opaete iñee aracae umimbeu vae reta jei rami. Echa'ā jei reta Cristo uiporarañotai co —jei—. ¹⁹ Jayave peeya piyemingueta icavi mbae vae pepia pe oñ vae jare piyerova Tumpa coti, pembaeyoa reta uyembai vaerā, jare ou vaerā yandeYa güi ara mbiacatu pegua reta, ²⁰ jare Tumpa ombou ye vaerā Jesucristo tenonde yave jerācua peve vae —jei—. ²¹ Jae upitata ara pe opaete mbaembae uyeyapicatu cavi regua. Jocua mbaembae re Tumpa imiari oñono tee iñee umimbeu vaerā vae reta rupi aracae güive —jei Pedro chupe reta—. ²² Echa'ā Moisés jei yandetenondegua reta pe: 'YandeYa Tumpa ombouta peve iñee umimbeuta vae perivi reta ipite güi, chembou rami. Piyapisacata jese opaete jeita peve vae re. ²³ Jare ime yave quía uyapisacata'ā jocua Tumpa iñee umimbeuta vae re vae, Tumpa omombota co iru vae reta ipite güi' —jei, jei Pedro—.

²⁴ Jare jucuarāi vi jei opaete Tumpa iñee aracae umimbeu vae reta Samuel güive. Opaete penti rami umierācua cua ara reta —jei—. ²⁵ Pe reta co jae Tumpa iñee aracae umimbeu vae reta iñemoñaa reta, jare petenondegua reta pe Tumpa jei vae uyeyapota peve. Echa'ā Tumpa jei Abraham pe: 'Niñemoñaa rupi ayapota co icavi vae opaete ivi

pegua reta pe' —jei, jei Pedro—. ²⁶ Tumpa umbijecove ye Tai güeru umanocue vae reta ipite güi, jare ombou ma peve tenonde ete, uyapo vaerã icavi vae peve, penti penti piyero vaerã Tumpa coti pereco icavi mbae vae güi —jei Pedro chupe reta.

4

Pedro jare Juan mburuvicha reta jovai

¹ Pedro jare Juan imiari ñugüinoi rambueve tenta guasu pegua reta pe, yugüeru sacerdote reta, Tumpa jo iyandarecoa reta juvicha jare saduceo reta. ² Jae reta pochi Jesús jemimondo reta pe. Echa'ã Jesús jemimondo reta omboe tenta guasu pegua reta, jare umimbeu chupe reta Jesús icove ye co ou umanocue vae reta ipite güi. ³ Jayave jare reta uipisi Pedro jare Juan, jare oñono peresoriru pe piareve regua. Echa'ã caaru ma co. ⁴ Ërei jeta ete Tumpa ifñee uyandu vae reta güirovia. Cuimbae reta güirovia vae cinco mil rupi.

⁵ Piareve pe uyembati Jerusalén pe mburuvicha reta, tenta guasu pegua reta itenondegua reta, mboroyocui re oporomboe vae reta, ⁶ Anás - jae co sacerdote tenondegua - Caifás, Juan, Alejandro jare opaete sacerdote tenondegua jentarã reta. ⁷ Jayave güeruruca Pedro jare Juan jae reta ipite pe, jare upirandu chupe reta:

—¿Mbae nunga mbaepuere pe pa piyapo cua? Jare ¿quía jee re pa piyapo?

⁸ Jayave Pedro tinee Espiritu Santo pe, jare jei chupe reta:

—Mburuvicha tenta guasu pegua reta jare tenondegua Israel pegua reta, ⁹ añave pepirandu pei oreve cua icavi vae uyeyapo vae re. Pipota picuaa quirã ra cua cuimbae ucuera ma imbaerasi güi —jei Pedro—. ¹⁰ Picuaa catu opaete pe reta, jare tuicuaa opaete Israel pegua reta, Jesucristo Nazaret pegua jee re ucuera ma cua cuimbae perovaque oĩ vae. Pe reta picutuca curusu re cua Jesucristo, ñrei Tumpa umbijecove ye güeru manocue vae reta ipite güi —jei—. ¹¹ Cua Jesús pe reta perĩro, tenta ita pegua iyapoa reta penti ita güirĩro rami. Ërei jae uyeyapo ma ita uñeñoño tenonde tentarã vae rami —jei—. ¹² Jare mbaeti ye quía re yandepuere yayembiasaca. Echa'ã uñemee'ã ivi pegua reta pe ĩru tee, jese uyembiasaca vaerã —jei chupe reta.

¹³ Jayave yati vae reta uecha quirã Pedro jare Juan uquiye mbae reve imiari, yepe tēi mocui reve jeta'ã uyemboe. Jáeramo ipiacañi reta jese. Jare uicuaa Jesús ndive yugüirecose vae. ¹⁴ Ërei uecha reta yave cuimbae ucuera vae uyemboi oĩ jae reta ndive, ipuere'ã jei mbae Jesús jemimondo reta coti. ¹⁵ Jayave oyocui Pedro jare Juan oē rani vaerã ipite güi. Jayave uyemingueta reta.

¹⁶ —¿Mbae ra yayapota cua cuimbae reta pe? Echa'ã opaete Jerusalén pegua reta uicuaa penti miacañi tuicha vae uyapo reta co, jare yande yandepuere'ã yaicuacu —jei reta—. ¹⁷ Jayave yayocui cua reta agüiye vaerã añave güiye imiari quía pe cua cuimbae jee re, agüiye vaerã ĩru vae reta uicuaa —jei reta.

¹⁸ Jayave ueni Pedro jare Juan, jare oyocui:

—Agüiye ye pemiari ani peporomboe Jesús jee re.

¹⁹ Ërei Pedro jare Juan jei chupe reta:

—¿Mbae ra Tumpa uipota nduyapo vaerã? Nduyapo yave peporoyocui, ndarau nduyapo Tumpa iporoyocui. ¿Mbae nunga mboroyocui ra nduyapota? Pe reta pemimbeu oreve. ²⁰ Echa'ã ore numimbeuñotai co nduecha jare nduyandu vae —jei reta.

²¹ Jayave yati vae reta uminguíye tēi omondo Pedro jare Juan. Uinupaca'ã, tenta guasu pegua reta güi uquiye ramo. Echa'ã opaete tenta guasu pegua reta umbiadora Tumpa joca uyeyapo vae jeco pegua. ²² Echa'ã cuimbae miacañi pe ucuera vae cuarenta año uasa ma güiinoi.

Upurugüirovia vae reta uyerure Tumpa pe umiatangātu vaerã

²³ Jare Pedro jare Juan omoē ma yave, yugüiraa ĩru reta pe, jare umimbeu chupe reta opaete sacerdote reta itenondegua reta jare tenta guasu pegua reta itenondegua reta jei chupe reta vae. ²⁴ Jae reta cua uyandu yave, uyerure Tumpa pe:

—OreYa Tumpa, nde co jae ara, ivi, i guasu jare opaete mbaembae ñugüinoi pipe vae iyapoa —jei reta—. ²⁵ Nde ndere nderembicui David jee vae rupi cuarã:

‘¿Maera pa pochi judío mbae vae reta?

¿Maera pa ivi pegua reta ipia pe uyemingueta uyapo vaerã icavi mbae vae?

²⁶ Mburuvicha guasu ivi pegua reta jare ivi pegua reta itenondegua reta uyembati penti rami yandeYa jare Cristo jovaicho retarã.’ Jucuarãi nde ndere David rupi —jei reta—.

²⁷ Añete co, Herodes, Poncio Pilato, judío mbae vae reta jare Israel pegua reta uyembati cua tenta guasu pe Jesús jovaicho retarã. Jesús co jae ndeRai. Jae co jupi vae nde ndiparavo vae —jei reta—. ²⁸ Uyembati reta uyapo vaerã nde ndiyapoca vae. Aracae güive nde ndipota uyapo reta vaerã —jei reta Tumpa pe—. ²⁹ Añave, oreYa, ndicuaa oreminguiye tēi vae reta jei vae. Jáeramó orembori numimbeu vaerã niñee nduquiyee mbae reve. Echa'a ore co nderembiocui. ³⁰ Jare eechaca nembraepuere ndepurumbigüera vaerã, jare iyapo vi miacañi reta Jesús jee re. Jae co ndeRai jupi vae —jei reta.

³¹ Jare opa uyerure yave, yati ñugüinoi vae pe ivicãta vae echa. Jare opaete jae reta tinee Espiritu Santo pe, jare imiari Tumpa iñee re uquiyee mbae reve.

Upurugüirovia vae reta uyembati

³² Jare opaete upurugüirovia vae reta penti ramiño ñugüinoi. Mbaeti penti ave jei imbaembae re: “Jocua co chembae.” Echa'a opaete imbaembae reta penti ramiño. ³³ Jare mbaepuere tuicha vae reve Jesús jemimondo reta umimbeu yandeYa Jesús icove ye co ou umanocue vae reta ipite güi. Jare opaete jae reta ipiacavi etc. ³⁴ Mbaeti penti ave mbae uata chupe vae jae reta ipite pe. Echa'a opaete ivi reta jare tenta reta güinoi vae reta umee, jare güeru jepicue, ³⁵ jare oñono Jesús jemimondo reta jovai. Jayave umbiyao reta uata chupe vae reta pe. ³⁶⁻³⁷ Jare penti levita ivi Chipre pegua José jee vae güinoi vi penti ivi. Jesús jemimondo reta umbijee cua cuimbae Bernabé. (Cua tee uipota jei: “Upurumbipiacatu vae”). Jae umee iivi jare güeru jepicue oñono Jesús jemimondo reta jovai.

5

Ananías jare Safira

¹ Ërei ñru cuimbae Ananías jee vae jembireco Safira jee vae ndive umee penti iivi. ² Jayave Ananías uñuvatu iyupe mbovi ivi jepicue güi jembireco uicuaa reve, jare güeru mboviño oñono Jesús jemimondo reta jovai. ³ Jayave Pedro jei chupe:

—Ananías, ¿maera pa nemaño Satanás re umitinee vaerã ndepia icavi mbae vae pe? Niñuvatu ndiyupe mbovi ndeivi jepicue güi. Ndapu ma co Espiritu Santo pe —jei—. ⁴ Ndeí neme ndeivi mbove, nembrae co. Jare neme ma yave, jepicue vi nembrae co. ¿Maera pa ndepia pe ndiyemingueta icavi mbae vae ndiyapo vaerã? Ndapu'a co cuimbae reta peño. Ndapu Tumpa pe etei —jei Pedro Ananías pe.

⁵ Cua uyandu yave, Ananías oa ivi re, jare umano. Jare opaete cua regua uicuaa vae reta uquiyee etc. ⁶ Jayave upüa cuimbae tairusu vae reta, jare oñoma umanocue, jare güiraa oñoti.

⁷ Mbapi ora ma uasa yave, uique jembireco. Jae uicuaa'a mbae uyeyapo vae. ⁸ Jayave Pedro upirandu chupe:

—Emimbeu cheve, ¿pemea pa peivi cuarã pe?

Cuñã jei chupe:

—Añete, jucuarã pe co —jei.

⁹ —¿Maera pa pe reta piyemboemboe pemiavai vaerã yandeYa iEspiritu? —jei Pedro chupe—. Co onque pe ma yugüeru neme iñotia reta. Jae reta ndereraata vi —jei.

¹⁰ Jare jupivoiño Safira oa Pedro jovai, jare umano. Uique ma yave cuimbae tairusu vae reta, uecha umano ma. Jayave güiraa oñoti imecuae iyipi pe. ¹¹ Jare upurugüirovia vae reta jare opaete cua mbaembae regua uicuaa vae reta uquiyee etc.

Jeta miacañi reta

¹² Jare uyeyapo jeta miacañi reta tenta guasu pegua reta ipite pe Jesús jemimondo reta rupi. Jare opaete upurugüirovia vae reta uyembati oca Salomón jee vae pe. ¹³ Jare opaete ñru vae reta uquiyee uyembati vaerã jae reta ndive. Ërei tenta guasu pegua reta uipi. ¹⁴ Jare jecuaño jeta ñru cuimbae reta jare cuña reta güirovia yandeYa re. ¹⁵ Jare tenta guasu pegua reta güiraa imbaerasi vae reta oñono calle reta rupi jupa reve. Cua uyapo reta Pedro iguarasía yepe oí vaerã amocue vae re, jae uasa oo oí yave. ¹⁶ Jare jeta

vae yugüeru Jerusalén pe ĩru tenta guasu coiño Jerusalén güi ñugüinoi vae reta güi, jare güeru imbaerasi vae reta jare aña oya jese vae reta. Jare opareve ucuera.

Mburuvicha reta uyapo icavi mbae vae Pedro jare Juan pe

¹⁷ Jayave sacerdote tenondegua jare opaete saduceo jae ndive ñugüinoi vae reta ñacatãa Jesús jemimondo reta re. ¹⁸ Jáeramo uipisi reta, jare oñono peresoriruru tenta guasu pegua pe. ¹⁹ Ērei pĩtu yave penti ángel yandeYa pe uyeyocui vae uipea peresoriruru jonque reta. Jayave güiraa Pedro jare Juan oca pe, jare jei chupe reta:

²⁰ —Pecua piyemboi Tumpa jo pe pemimbeu tenta guasu pegua reta pe cua tecove ipiaú vae regua.

²¹ Cua uyandu yave, Pedro jare Juan uique Tumpa jo pe neimbove asi jare oporomböe.

Cua uyeyapo rambueve, sacerdote tenondegua jare jae ndive ñugüinoi vae reta ueni opaete mburuvicha reta jare tenondegua Israel pegua reta. Jayave jae reta omondo sacerdote tenondegua jembiocui reta peresoriruru pe, jae reta güeru vaerã tēi Jesús jemimondo reta. ²² Ērei uyeyocui vae reta yugüiraa uvãe yave, uvãe'ã Jesús jemimondo reta peresoriruru pe. Jayave yugüeru ye yave, jei reta yati vae reta pe:

²³ —Nduecha peresoriruru jonque reta uyeyuquenda cavi oĩ, jare jãroa reta uyemboi ñugüinoi onque reta rupi. Ērei nduipea yave, nuvãe'ã quía japipe pe —jei reta.

²⁴ Cua uyandu yave, sacerdote tenondegua, Tumpa jo iyandarecoa reta juvicha jare sacerdote reta itenondegua reta ipiacañi. Jare uicuaa'ã mbae ra uyeyapota. ²⁵ Jayave ou penti vae, jare jei chupe reta:

—Cuimbae piñono peresoriruru pe vae reta ime Tumpa jo pe ñugüinoi, jare omböe ñugüinoi tenta guasu pegua reta —jei.

²⁶ Jayave Tumpa jo iyandarecoa reta juvicha oo sacerdote tenondegua jembiocui reta ndive, jare güeru cavi Jesús jemimondo reta uinupa mbae reve. Echa'ã uquiye reta tenta guasu pegua reta güi. Ipiã pe uyemingueta aramoi uyapita reta ita pe. ²⁷ Jare güeru yave, oñono mburuvicha reta jovai. Jayave sacerdote tenondegua jei Jesús jemimondo reta pe:

²⁸ —Poyocui tēi ma agüiye ye vaerã peporomböe jocua cuimbae jee re. Echa'ã pemimbeu ma opaete Jerusalén pegua reta pe cua moromböe. Jare pipota pemboya jocua cuimbae imano oreré —jei reta.

²⁹ Jayave Pedro jare ĩru Jesús jemimondo reta jei chupe reta:

—Icavi ete co nduyapo vaerã Tumpa iporoyocui, cuimbae reta iporoyocui güi.

³⁰ Yandetenondegua reta iTumpa umbijecove ye Jesús güeru umanocue vae reta ipite güi. Pe reta picutuca curusu re cua Jesús piyucaca —jei—. ³¹ Imbaepuere pe Tumpa uyapo ma cua Jesús tenondegua vae jare upurumbiasa vae, Israel pegua reta ueya vaerã iyemingueta icavi mbae vae ipia pe oĩ vae, jare Tumpa umbiasa vaerã chupe reta imbaeyoa reta. ³² Jare ore numimbeu ĩru vae reta pe cua, jare Espĩritu Santo vi umimbeu. Echa'ã Tumpa umee Espĩritu Santo jei vae uyapo vae reta pe —jei reta.

³³ Cua uyandu yave, yati vae reta pochĩ chupe reta, jare uipota tēi uyuca. ³⁴ Ērei upũa penti fariseo Gamaliel jee vae yati vae reta ipite pe. Jae co penti mboroyocui re oporomböe vae, jare opaete tenta guasu pegua reta uipiu. Jae oyocui omondo reta rani vaerã michi pegua Jesús jemimondo reta oca pe. ³⁵ Jayave jae jei yati vae reta pe:

—Cuimbae Israel pegua reta, pepia pe piyemingueta cavi mbae piyapota cua cuimbae reta pe vae re. ³⁶ Echa'ã caramböe yave uyecuaa Teudas jee vae, jare uyereroviaca ĩru vae reta pe. Jare jeta cuimbae reta, aramoi cuatrocientos, uyembati jae ndive. Ērei jae uyeyucaca, jare opaete jae ndive ñugüinoi vae reta opa uñemiai, jare ipuere'ã ma mbae uyapo. ³⁷ Jaicue rupi, mburuvicha reta upurupapa ñugüinoi yave, uyecuaa Galilea pegua Judas jee vae. Jae umbati jeta tenta guasu pegua reta. Ērei jae vi umano, jare opaete jae ndive ñugüinoi vae reta opa uñemiai —jei Gamaliel chupe reta—. ³⁸ Jáeramo añave che jae peve cua: Agüiye ma piyapo mbae cua cuimbae reta pe, jare pemaño ma jese reta. Echa'ã imbaepuere peño yave jucuarãi imiari reta jare cua mbaembae uyapo reta, ndarau mbae uyapo reta —jei—. ³⁹ Ērei cua Tumpa güi ou yave, ndarau pepuere pembai. Echa'ã aramoi piyovaichota Tumpa ndive —jei chupe reta.

⁴⁰ Jare cua Gamaliel jei vae icavi chupe reta. Jayave ueni reta Jesús jemimondo reta, jare uinupa. Jayave oyocui reta agüiye vaerã ma imiari ye Jesús jee re, jare omondo. ⁴¹ Jayave Jesús jemimondo reta oē yati vae reta ñugüinoi vae güi. Uyerovia reta, Jesús

umaño uiporara reta ramo. Echa'ã uñereriroca reta, Jesús re güirovia ramo. ⁴²Jare opa ara jecuae oporomboe reta Tumpa jo pe jare tenta reta rupi. Umimbeu ñru vae reta pe Jesucristo regua.

6

Siete cuimbae reta uyeparavoca

¹Jocua ara reta pe ñru vae reta upurugüirovia jare uñemiñru ñugüinoi upurugüirovia vae reta ndive yave, griego pe uyemingueta vae reta iñeenguru hebreo pe uyemingueta vae reta coti. Echa'ã uyandareco'ã reta ime umano vae reta griego iñee pe uyemingueta vae re, opa ara rupi mbae uñemee yave. ²Jayave jocua doce Jesús jemimondo reta umbati upurugüirovia vae reta, jare jei chupe reta:

—Icavi ore ndoo numimbeu vaerã Tumpa iñee, cua reta numingararu vaerãve. ³Jáeramo piparavo pepite güi, orerivi reta, siete cuimbae jerãcua cavi jese vae reta, tinee Espiritu Santo pe jare iyaracuaa catu vae reta. Jae reta uyapota yandave cua mbaraviqui —jei reta—. ⁴Ñrei ore jecuae nduyurureta Tumpa pe jare numimbeuta Tumpa iñee —jei reta.

⁵Cua jei vae icavi opareve pe, jare uiparavo reta Esteban - jae co penti cuimbae upurugüirovia cavi jare tinee Espiritu Santo pe vae - Felipe, Prócoro, Nicanor, Timón, Parmenas jare Nicolás - jae co tenta guasu Antioquia pegua judiorã uyeyapo vae. ⁶Jayave güeru reta cua uiparavo vae reta Jesús jemimondo reta jovai. Jayave Jesús jemimondo reta uyerure Tumpa pe, jare oñono ipo jese reta.

⁷Jare Tumpa iñee jecuae uñemiai. Jeta vae upurugüirovia Jerusalén pe jare uñemiñru upurugüirovia vae reta ndive, jare jeta sacerdote reta vi upurugüirovia.

Uipisi reta Esteban

⁸Jare Esteban ipiacavi ete, jare mbaepuere reve uyapo miacañi tuicha vae reta tenta guasu pegua reta ipite pe. ⁹Jare yugüeru amocue cuimbae judío reta itupao pegua reta uyeaca Esteban ndive. Jocua judío reta itupao jee Esclavos Libertados. Cua tupao pegua reta yugüeru tenta guasu reta Cirene jare Alejandría, jare ivi reta Cilicia jare Asia güi. ¹⁰Ñrei jae reta ipuere'ã umiamiri Esteban. Echa'ã Esteban imiari iyaracuaa catu reve Espiritu Santo rupi. ¹¹Jayave jae reta omboemboe ñru cuimbae reta iyapu vaerã Esteban re.

—Nduyandu jei ñee icavi mbae vae Moisés jare Tumpa coti —jei reta.

¹²Jucuarãi jae reta umbiarasica tenta guasu pegua reta, tenta guasu pegua reta itenondegua reta, jare mboroyocui re oporomboe vae reta. Jayave cua reta yugüeru uipisi Esteban, jare güiraa mburuvicha reta uyembati vae pe. ¹³Joco pe jae reta güeru iyapu reve uñeapo jese vae reta. Cua reta jei:

—Cua cuimbae jecuaeñoi jei ñee icavi mbae vae Tumpa jo re jare mboroyocui re.

¹⁴Echa'ã nduyandu jei jocua Jesús Nazaret pegua umbaita cua Tumpa jo, jare ueyacata yandave moromboe Moisés umee yandave vae reta —jei reta.

¹⁵Jayave opaete joco pe uguapí ñugüinoi vae reta umae ngatu Esteban re, jare jova penti ángel jova echa chupe reta.

7

Esteban imiari

¹Jayave sacerdote tenondegua upirandu Esteban pe:

—¿Añiete pa jucuarãi?

²Jayave Esteban jei joco pe ñugüinoi vae reta pe:

—Cheriquei reta, tenta guasu pegua reta itenondegua reta, piyapisaca cheré. Tumpa yemiadora pegua uyecuaa yandetenondegua Abraham nde, Mesopotamia pe ico yave, ndei oo ico Harán pe —jei—. ³Jare jei chupe: 'Ecu ndeivi güi jare eeya nerentarã reta, jare ecua jocua ivi aechacata ndeve vae pe' —jei, jei—. ⁴Jayave Abraham oo Caldeo reta iivi güi, jare ico Harán pe. Jare tu umano yave, Tumpa ombou joco güi cua ivi añave pico pipe vae pe —jei—. ⁵Ñrei Tumpa umee'ã Abraham pe iivirã cua pe, umee'ã ipi jendarã yepe. Ñrei jei umeeta co chupe jare iñemoñaã reta pe iivirã, yepe tẽi Abraham ndei tai —jei chupe reta—. ⁶Jare Tumpa umimbeu chupe: 'Niñemoñaã reta yugüirecota ñru vae reta iivi pe, jare jocua ivi pegua reta uyapota jembiocui retarã, jare uyapota icavi

mbae vae chupe reta cuatrocientos año pegua. ⁷ Ērei che aiporaracata jocua ivi pegua uyapota jembiocui retarā vae reta pe, jare taicue rupi niñemoñaa reta oēta joco güi, jare uyeyocuita cheve cua ivi pe' —jei, jei Esteban—. ⁸ Jare Tumpa jei Abraham pe jae jare opaete iñemoñaa cuimbae reta uñemicircuncidaca vaerā, imandúa reta vaerā Tumpa jei vae uyapota co. Jáeramo Abraham tai Isaac oa ma yave, Abraham umircuncidaca, Isaac ocho ara ma güinoi yave. Jae ramiño vi Isaac umircuncidaca tai Jacob, jare Jacob umircuncidaca jocua doce tai yandetenondegua reta —jei—.

⁹ Jocua yandetenondegua reta umitarēi José, jare umee corepoti re, José Egipto pe uyeyocui vaerā. Ērei Tumpa ico José ndive, ¹⁰ jare uepi opaete susere reta güi. Jare mburuvicha guasu Egipto pegua Faraón uicuaa Tumpa umee José pe ipiacavi jare iyaracuaa catu vaerā. Jáeramo Faraón uyapo mburuvicharā, jare José oyocui opaete Egipto pegua reta jare Faraón jentarā reta —jei—.

¹¹ Ērei caruai ou opaete Egipto jare Canaán pe, jare opaete vae uiporara. Jare jocua yandetenondegua reta uvāe'a mbae ave jou vaerā —jei—. ¹² Ērei Jacob uicuaa ime tembiu Egipto pe yave, omondo jocua yandetenondegua reta joco pe. Jaeramo etei jae reta yugüiraa Egipto pe. ¹³ Jare Jacob omondo reta ye yave, José uyecuaaca tiquei reta pe, jare Faraón uicuaa José jentarā reta —jei—. ¹⁴ Jayave José ombou umimbeu tu pe yugüiraa vaerā ipi jae jare opaete jentarā reta. Opaete rupi ñugüinoi setenta y cinco —jei—. ¹⁵ Jáeramo Jacob oo Egipto pe. Jare joco pe jae jare jocua yandetenondegua reta umano. ¹⁶ Taicue rupi iñemoñaa reta güeru jetecue reta Siquem pe, jare joco pe oñoti reta teögüerenda Abraham oguacue pe. Echa'a Abraham umbiepi Hamor tai reta pe corepoti pe, Siquem pe oī yave —jei Esteban—.

¹⁷ Ērei coiño ma ou yave Tumpa uyapo vaerā Abraham pe jei vae, yandetenondegua reta jeta uñemoña Egipto pe. ¹⁸ Jayave ĩru cuimbae uyeyapo Egipto pegua reta juvicha guasarā. Ērei uicuaa'a José —jei—. ¹⁹ Cua mburuvicha guasu iyaracuaa catu uyapo vaerā icavi mbae vae yandetenondegua reta pe. Jei chupe reta uicuaaca vaerā tai reta oa yave, uyucaca vaerā chugüi —jei—. ²⁰ Jocua ara reta pe oa Moisés. Tumpa uau Moisés. Jare mbapi yasi Moisés ico tu jenta pe. ²¹ Jare uyecuaa yave, Faraón tayi uepi, jare umbicuacuaa imembi rami —jei—. ²² Jare Moisés uyemboe opaete aracuaa Egipto pegua re, jare uyemingueta cavi jare jatangātu —jei Esteban chupe reta—.

²³ Jare Moisés cuarenta año güinoi yave, uipota uecha quirāi ra yugüireco Israel pegua reta - jae reta co jae jentaigua reta. ²⁴ Jare uecha penti Egipto pegua icavi mbae vae uyapo oī penti Israel pegua pe. Jayave uinupa uyuca Egipto pegua, jare jucuarāi uepi uiporara vae —jei—. ²⁵ Moisés ipia pe uyemingueta tēi jentaigua reta uicuaata co Tumpa uepita jae rupi, ěrei uicuaa'a reta —jei Esteban—. ²⁶ Piareve pe uecha mocui jentaigua reta uñerāro ñugüinoi, jare uipota tēi uyapicatu cavi reta. Jáeramo jei chupe reta: 'Cuimbae reta, pe reta penti tentaigua vae co. ¿Maera pa icavi mbae vae piyapo piyupe?' —jei, jei Esteban—. ²⁷ Ērei jocua cuimbae icavi mbae vae uyapo ĩru pe vae umiaña Moisés, jare jei chupe: '¿Quía pa neñoño oreruvicharā, orerāa vaerā?' ²⁸ ¿Ndipota pa cheyuca Egipto pegua caarumo ndiyuca rami?' —jei, jei Esteban—. ²⁹ Cua uyandu yave, Moisés osi, jare ico ivi ambie Madián jee vae pe. Joco pe uñemoña mocui tai —jei—.

³⁰ Cuarenta año ma uasa yave, ñana pe coiño ivitu guasu Sináí jee vae güi oī yave, penti ángel uyecuaa Moisés pe penti yai jendi oī vae pe —jei—. ³¹ Moisés uecha yave, ipiacañi. Ērei oya jese yave, umae vaerā jese coi güi, uyandu yandeYa iñee jei: ³² 'Che co jae ndetenondegua reta - jae co Abraham, Isaac jare Jacob - iTumpa' —jei, jei—. Jayave Moisés uriri uquiye ramo, jare uipiu umae vaerā jese. ³³ Jayave yandeYa jei chupe: 'Emboi ndepipasa. Echa'a ndiyemboi co neñ Tumpa jupi vae jovai. ³⁴ Che añetete aecha quirāi uiporara reta aiparavo vae reta Egipto pe, jare ayandu iyao. Jáeramo agüeyi aepi vaerā. Añave eyu toromondo Egipto pe' —jei, jei Esteban—.

³⁵ Cua Moisés co jae Israel pegua reta güiriro vae. Echa'a jae reta jei chupe: '¿Quía pa neñoño oreruvicharā, orerāa vaerā?' —jei reta, jei—. Tumpa omondoca cua Moisés ángel yai jendi vae pe uyecuaa chupe vae pe. Omondoca ico vaerā jae reta juvicharā jare uepi reta vaerā. ³⁶ Moisés güinoē reta güeru, jare uyapo miacañi reta Egipto pe, I Guasu Pita jee vae pe, jare cuarenta año ñana rupi yugüireco rambueve —jei—. ³⁷ Moisés jei Israel pegua reta pe: 'YandeYa Tumpa ombouta peve iñee umimbeuta vae perivi reta ipite güi, chembou rami. Piyapisacata jese' —jei, jei Esteban—. ³⁸ Ángel umingueta Moisés ivitu

guasu Sinaí pe, ñana pe uyembati yave Moisés jare yandetenondegua reta. Tumpa umee Moisés pe ñínee tecove pegua, jae umimbeu vaerã yandeve —jei—.

³⁹ Ërei yandetenondegua reta uipota'ã uyapo Moisés jei vae, jare güüröo reta. Jae reta ipia pe uyemingueta tēi yugüüraa ye vaerã Egipto pe. ⁴⁰ Jare jei reta Aarón pe: 'Iyapo ñanetumpa retarã yugüüraa vaerã yanderenonde. Echa'ã yaicuaa'ã mbae ra uveyapöo cua Moisés Egipto güi yandereru vae pe' —jei reta, jei—. ⁴¹ Jayave uyapo reta penti vaca tairusu vae-raanga, jare uyuca reta maemimba umee vaerã jocua itumpa-raanga pe. Uyerovia reta jocua ipo pe uyapo vae re. ⁴² Jáeramo Tumpa uyerova chugüi reta, jare umaño umbiadora reta vaerã opaete ara regua reta. Echa'ã Tumpa ñínee aracae umimbeu vae reta itupapire pe uyecuatía oĩ cuarãi:

¿Cheve ra pemee maemimba piyuca vae cuarenta año ñana pe pico rambueve, Israel pegua reta?

⁴³ Jucuarãi'ã co. Pevoí peraa tumpa-raanga Moloc jee vae ico pipe vae,

jare petumpa-raanga Renfán jee vae iyasitata-raanga.

Jae reta jaanga piyapo pmbiadora vaerã.

Jáeramo che pomondota Babilonia cuti.'

Jucuarãi uyecuatía oĩ —jei Esteban chupe reta—.

⁴⁴ Yandetenondegua reta güirecose o Tumpa uyemingueta chupe reta pipe vae ñana pe. Echa'ã Tumpa oyocui Moisés jocua tupao uyapo vaerã jae uehaca chupe rami etei.

⁴⁵ Jocua tupao uñemee yandetenondegua reta pe, jare jae reta Josué ndive güeru, cua ivi judío mbae vae reta güi upiro yave. Echa'ã Tumpa omombo reta yandetenondegua reta güi. Jare David ico mburuvicha guasurã yave, imeño cua pe oĩ jocua tupao —jei—.

⁴⁶ Tumpa umae cavi David re, jare David uyerure Tumpa pe umaño vaerã uyapo Tumpa jo. Echa'ã itenondegua Jacob umbiadora co Tumpa. ⁴⁷ Ërei Salomón uyapo Tumpa jo,

⁴⁸ yepe tei Tumpa ara pe ico vae ico'ã yambidorarenda yande yayapöo vae reta pe. Echa'ã Tumpa ñínee aracae umimbeu vae jei cuarãi:

⁴⁹ Ara co jae cheguapirenda,

jare ivi co jae chepi jenda' —jei Tumpa—.

¿Mbae nunga o ra piyapota cheve?

¿Quiape ra aputuuta?

⁵⁰ Chepo pe co ayapo opaete cua mbaembae' —jei.

Jucuarãi jei Tumpa ñínee aracae umimbeu vae —jei Esteban chupe reta—.

⁵¹ Pe reta pepiatanta. Pipota'ã piyeyocui Tumpa pe, jare pipota'ã ave piyapisaca jese. Jecuae piyovaicho Espíritu Santo ndive. Petenondegua reta uyapo rami, jucuarãi vi piyapöo pe reta —jei—. ⁵² Petenondegua reta uyapo icavi mbae vae opaete Tumpa ñínee aracae umimbeu vae reta pe. Amocue Tumpa ñínee aracae umimbeu vae reta jei jocua jupi vae outa co. Petenondegua reta uyuca reta. Jare añave pe reta vi pemee piyucaca jocua jupi vae —jei—. ⁵³ Echa'ã Tumpa umeeca peve iporoyocui ángel reta pe, Ërei piyapö'ã —jei Esteban.

Esteban imano

⁵⁴ Jare yati vae reta cua uyandu ma yave, pochi, jare umbiquiririü jái Esteban jei vae jeco pegua. ⁵⁵ Ërei Esteban tinee Espíritu Santo pe, jare umaie ngatu ara coti, jare uecha Tumpa iyembidorarenda jare Jesús Tumpa iyacata coti. ⁵⁶ Jayave Esteban jei:

—¡Mase! Aecha ara uyepea oĩ, jare aecha vi cuimbaerã uveyapöo vae uyemboi oĩ Tumpa iyacata coti.

⁵⁷ Jayave jae reta usapicai tanta, jare iyapisa oyopia. Jayave penti rami uepeña reta Esteban uipisi. ⁵⁸ Jare güüraa ma yave tenta guasu güi ñana coti, uyapi reta ita pe. Jare jocua iyapu reve uñeapo jese vae reta omboi iyasoya, jare oñono penti cuimbae tairusu Saulo jee vae jovai. ⁵⁹ Jare uyapi reta rambueve, Esteban uyerure:

—CheYa Jesús, eraa cherecove.

⁶⁰ Jayave uyeatica, jare ñíneeäta reve jei:

—CheYa, agüiye tuiporara reta cua mbaeyoa jeco pegua.

Jare cua jei yave, umano.

8

Saulo uyapo icavi mbae vae upurugüirovia vae reta pe

¹ Jare Esteban imano icavi Saulo pe. Jare jocua ara upurugüirovia vae Jerusalén pe ñugüinoi vae reta jovaicho reta umbipi uiporaraca chupe reta. Jare Jesús jemimondo retaño upita Jerusalén pe. Opaete ñru upurugüirovia vae reta uñemiai ivi reta Judea jare Samaria rupi. ² Jare amocue cuimbae umbiadora Tumpa vae reta oñoti Esteban, jare ipiatiti reta jese. ³ Ërei Saulo uiporaraca upurugüirovia vae reta pe. Echa'ã oo tenta tenta rupi, jare umbitiriri güüraa cuimbae reta jare cuña reta oñono peresoriru pe.

Felipe umimbeu ñee icavi vae Samaria pe

⁴ Jayave jocua upurugüirovia vae uñemiai vae reta umimbeu ñee icavi vae yugüüraa vae rupi. ⁵ Felipe oo tenta guasu Samaria pe, jare umimbeu tenta guasu pegua reta pe Cristo regua. ⁶ Jare tenta guasu pegua reta uyandu yave, penti rami uyapisaca cavi Felipe umimbeu chupe reta vae re. Uecha vi miacañi uyapo vae reta. ⁷ Echa'ã añã reta usiri usapicai reve oya jese vae reta güi. Jare jeta ipuere mbae omi vae reta jare jeta uguata mbae vae reta ucuera. ⁸ Jare jocua tenta guasu pegua reta uyerovia.

⁹ Jare joco pe ico penti cuimbae Simón jee vae. Cua cuimbae ipaye vae co, jare umipiacañi umbitavi Samaria pegua reta mbaembae uyapo vae pe. Jáeramo uyereroviaca catu. ¹⁰ Jare opaete sambiai reta jare ucucuaa vae reta uyapisaca cavi jese, jare jei reta: —Cua cuimbae güinoi Tumpa imbaepuere tuicha vae.

¹¹ Jáeramo opaete vae uyapisaca cavi jese. Echa'ã jae ipaye vae ramo, ima ma uyapo mbaembae umipiacañi reta vaerã. ¹² Ërei Felipe umimbeu tenta guasu pegua reta pe ñee icavi vae. Imiari chupe reta Tumpa iporoyocüa re jare Jesucristo re. Jayave cuimbae reta jare cuña reta güirovia jare uyembibautizaca. ¹³ Jare Simón vi güirovia, jare uyembibautizaca güiive upita Felipe ndive. Jare uecha yave miacañi tuicha vae uyeyapo vae reta, ipiacañi.

¹⁴ Jare Jesús jemimondo Jerusalén pe ñugüinoi vae reta uicuaa yave quirai Samaria pegua reta güirovia ma Tumpa ñnee, omondo reta Pedro jare Juan. ¹⁵ Jare jae reta yugüüraa uvãe yave Samaria pe, uyerure upurugüirovia vae reta re, Espiritu Santo ou vaerã chupe reta. ¹⁶ Echa'ã ndeiño ou Espiritu Santo chupe reta. Jaeño uyembibautizaca Jesús jee re. ¹⁷ Jayave Pedro jare Juan oñono ipo jese reta, jare Espiritu Santo ou chupe reta.

¹⁸ Jare Simón uecha Espiritu Santo ou, Jesús jemimondo reta ipo oñono jese reta yave. Jayave uipota tãi umee corepoti chupe reta ¹⁹ jare jei:

—Cheve vi pemeo cua mbaepuere, ou vaerã ipotave vae pe Espiritu Santo, che añono chepo jese yave.

²⁰ Ërei Pedro jei chupe:

—Nde necañiteita co ndecorepoti reve. Echa'ã ndepia pe ndiyemingueta tãi ndepuere ndegua corepoti pe mbae Tumpa umee vae —jei—. ²¹ Nde ndepuere'ã nenoí cua nunga mbaepuere. Echa'ã ndepia jupi'ã Tumpa coti. ²² Eeya cua icavi mbae vae, jare iyerure Tumpa pe. Aramoi umbiasata ndeve cua ndepia pe ndiyemingueta vae re. ²³ Echa'ã aicuaa nde niñemiro, jare mbaeyoa jeco pegua ndepuere'ã ndiyapo icavi vae —jei.

²⁴ Jayave Simón jei chupe reta:

—Piyerure cheré yandeYa pe, agüiye vaerã cua pere cheve vae uyeyapo cheve.

²⁵ Jayave Pedro jare Juan umimbeu yave Tumpa ñnee ñru vae reta pe, yugüüraa ye Jerusalén pe. Jare yugüüraa rambueve, umimbeu ñee icavi vae jeta ñru Samaria pegua tenta guasu-rai reta rupi.

Felipe jare Etiopía pegua

²⁶ Jayave penti ángel yandeYa pe uyeyocui vae jei Felipe pe:

—Epüa ecua sur coti tape Jerusalén güi oo Gaza coti vae rupi.

Cua tape uasa ñana rupi. ²⁷ Jayave Felipe upüa oo. Jare penti eunuco ivi Etiopía pegua oo ye jenta coti Jerusalén güi. Echa'ã ou Jerusalén pe umbiadora vaerã Tumpa. Cua eunuco co jae penti mburuvicha. Jae uyandareco ico Candace icorepoti jare ñru imbaembae icavi vae re. Candace co jae Etiopía pegua reta juvicha guasu. ²⁸ Jare eunuco oo ye yave jenta coti, uguapi icarro pe umingueta oo Isaías uicuatiaque vae. Isaías co jae penti Tumpa ñnee araca umimbeu vae. ²⁹ Jare Espiritu Santo jei Felipe pe:

—Ecu a inēmiiru pea carro pe oo oī vae ndive.

³⁰Jayave Felipe osi oo carro coti, jare uyandu cuimbae umingueta Tumpa inēe Isaías uicuatiacue vae. Jayave upirandu chupe:

—¿Ndicuaa pa nemingueta neī vae?

³¹Jare eunuco jei Felipe pe:

—¿Quirāita pa aicuaa, mbaeti yave quía umimbeu cheve?

Jare umiñera Felipe uyupi vaerā icarro pe uguapi jae ndive.

³²Jare Tumpa inēe umingueta vae pe uyecuatía oī cuarāi:

“Penti ovecha rami uyereraaca umano vaerā.

Jare jae quīiño, penti ovecha-rai jocua uñapi vae jovai oī vae quīiño oī rami.

³³Uñereriroca yave, uāa vae reta uyapo'ā jupi vae chupe.

¿Quía ra ipuere umierācua jentaigua reta regua?

Echa'ā jecove ucañi ivi güi.”

Jucuarāi uyecuatía oī.

³⁴Jare eunuco jei Felipe pe:

—Aipota nemimbeu vaerā cheve quía re ra jei cua Tumpa inēe umimbeu vae. ¿Jei pa iyee ani iru vae re? —jei.

³⁵Jayave Felipe umbipi cua Tumpa inēe uyecuatía oī vae güi umimbeu chupe ñee icavi vae Jesús regua. ³⁶Jare tape rupi yugüiraa rambueve, yugüiraa uvāe i jenda pe, jare eunuco jei:

—Co oī i. ¿Ime pa mbae ayapo vaerā ndei ayembibautizaca mbove?

³⁷—Ndepurugüirovia yave opaete ndepia pe, ndepuere ndiyembibautizaca —jei Felipe chupe.

—Arovia Jesucristo co jae Tumpa Tai —jei eunuco Felipe pe.

³⁸Jayave eunuco umbiyemboica carro, jare mocui reve ugüeyi i pe. Jayave Felipe umbibautiza eunuco. ³⁹Jare oē reta i güi yave, yandeYa iEspíritu güiraa joco güi Felipe. Jare eunuco uecha'ā ye ma. Jayave uyerovia reve oo ye jenta coti. ⁴⁰Jare Felipe uyecuaa tenta guasu Azoto pe. Jare joco güi oo tenta guasu Cesarea pe. Jare oo rambueve, umimbeu ñee icavi vae opaete tenta guasu reta rupi.

9

Saulo güirovia Jesús re

(Hch 22.6-16; 26.12-18)

¹Jare Saulo umumburu uyuca vaerā yandeYa re güirovia vae reta, jare oo sacerdote tenondegua pe. ²Jare uyerure sacerdote tenondegua pe umee vaerā chupe tupapire, ipuere vaerā oo judío reta itupao tenta guasu Damasco pegua reta pe, jare uvāe yave joco pe cuimbae reta jare cuña reta Jesús re güirovia vae, ipuere vaerā uipisi güeru Jerusalén pe. ³Jare coiño ma Damasco güi oo yave, aramoiño jembipe Saulo re penti tembipe tuicha vae ara güi. ⁴Jayave Saulo oa ivi re, jare uyandu ñee jei chupe:

—Saulo, Saulo, ¿maera pa ndiyapo icavi mbae vae cheve?

⁵Jayave Saulo upirandu:

—¿Quía pa co nde, cheYa?

Jayave ñee jei chupe:

—Che co jae Jesús. Nde ndiyapo icavi mbae vae cheve. Nde co jae penti güeye ivira jacuarovi vae re upatara vae rami. Jáeramo ndiporara neī.

⁶Saulo uriri uquiye ramo.

—CheYa, ¿mbae pa ndipota ayapo vaerā? —jei.

—Epūa ecua tenta guasu pe, jare amimbeucata ndeve mbae ndiyapota vae —jei yandeYa Saulo pe.

⁷Jare cuimbae Saulo jupíe yugüiraa vae reta uyemboi quīiño ñugüinoi ipiacañi güi. Echa'ā uyandu ñee, ērei uecha'ā quiave. ⁸Jayave Saulo upūa ivi güi, jare umae tēi, ērei ipuere'ā uecha quía. Jare jae jupíe yugüiraa vae reta uipoco, jare güiraa Damasco pe.

⁹Jare Saulo joco pe oī mbapi ara umae mbae reve, jare ucaru'ā jare i jou'ā.

¹⁰Jare ico Damasco pe penti upurugüirovia vae Ananías jee vae. YandeYa jei chupe ique pe:

—Ananías.

Jare jae jei:

—CheYa, co aĩ.

¹¹ Jayave yandeYa jei chupe:

—Epüa ecua calle Simi jee vae pe, jare eeca Judas jenta pe penti Tarso pegua. Jae jee co Saulo. Echa'a jae uyerure oi —jei—. ¹² Jare jae uecha ma ique pe penti cuimbae Ananías jee vae uique jare oñono ipo jese, umae ye vaerã —jei Tumpa chupe.

¹³ Ërei Ananías jei:

—CheYa, jeta vae umimbeu cheve cua cuimbae regua, quirã jeta icavi mbae vae uyapu Jerusalén pe nderé güirovia vae reta pe. ¹⁴ Jare cua pe jae ime güinoi mbaepuere sacerdote reta itenondegua reta güi, uipisi vaerã opaete nderé güirovia vae reta —jei.

¹⁵ —Ecuañõ —jei yandeYa chupe—. Echa'a che aiparavo ma cherembiporurã, oo vaerã umimbeu cheregua judío mbae vae reta pe, mburuvicha reta pe jare Israel pegua reta pe. ¹⁶ Echa'a che aicuaacata chupe quirã uiporara eteta chereco pegua —jei.

¹⁷ Jayave Ananías oo uique tenta pe. Jare oñono ipo Saulo re jare jei chupe:

—Cherivi Saulo, yandeYa Jesús uyecuaa ndeve, ndeyu tape rupi rambueve. Jae chembou netae ye vaerã, jare netinee vaerã Espiritu Santo pe —jei.

¹⁸ Jare jupivoiño mbae uyeequi Saulo jesa güi yanderesapira uyeequi rami, jare Saulo umae cavi. Jayave upüa uyembibautizaca. ¹⁹ Jayave ucaru jare ipirãta ye ma. Jare upita mbovi ara upurugüirovia vae Damasco pe yugüireco vae reta ndive.

Saulo uñemiñee Damasco pe

²⁰ Jayave Saulo umbipi umimbeu Jesús regua judío reta itupao reta pe. Jei chupe reta Jesús co jae Tumpa Tai. ²¹ Jare opaete uyandu vae reta ipiacañi, jare jei:

—Jae'a ra cua Jerusalén pe cua Jesús re güirovia vae reta uiporaraca vae? Jare ou vi cua pe uipisi vaerã cua nunga reta güiraa sacerdote reta itenondegua reta pe —jei reta.

²² Ërei Saulo uñemiatangãtu, jare umiamiri judío Damasco pegua reta. Echa'a uicuaaca chupe reta Jesús co jae Cristo.

Judío reta uipota tẽi uipisi Saulo

²³ Jare ima ma uasa yave, judío reta uyemboemboe uyuca vaerã Saulo. ²⁴ Ërei cua jerãcua Saulo pe. Jae reta uãro tenta guasu jonque pe ara rupi jare pĩtu rupi, uyuca vaerã tẽi. ²⁵ Ërei upurugüirovia vae reta güiraa Saulo pĩtu yave umbiasa tenta guasu iquesemba ita pegua vae iárambo rupi umbigüeyi canasta guasu pe.

Saulo Jerusalén pe

²⁶ Jare Saulo oo uvãe yave Jerusalén pe, uipota tẽi uñemiñru upurugüirovia vae reta ndive. Ërei opaete jae reta uyepiu chugüi. Echa'a güirovia'a reta jae Jesús re güirovia ma co. ²⁷ Ërei Bernabé güiraa Saulo Jesús jemimondo reta pe, jare umimbeu chupe reta quirã Saulo uecha yandeYa tape rupi, jare quirã yandeYa umingueta vae. Jei vi chupe reta quirã Saulo umimbeu uquiye mbae reve Damasco pe Jesús regua. ²⁸ Jayave Saulo uñemiñru upurugüirovia vae reta ndive Jerusalén pe. Jecuaeño oẽ Jerusalén güi jare uique ye. ²⁹ Jare umimbeu uquiye mbae reve yandeYa regua. Jare uyeaca vi griego pe uyemingueta vae reta ndive. Jáeramo jae reta uipota uyuca. ³⁰ Jare upurugüirovia vae reta cua uicuaa yave, güiraa reta Saulo Cesarea pe, jare joco güi omondo tenta guasu Tarso coti.

³¹ Jayave umambeco'a ma quía upurugüirovia vae reta, jare jae reta uñemimirãta opaete Judea rupi, Galilea rupi jare Samaria rupi. Jare yugüireco reta uipiu cavi reve yandeYa, jare Espiritu Santo umbipiaccatu. Jare jecuaeño ñru vae reta uñemiñru jae reta ndive.

Eneas ucuera

³² Jare Pedro oo opou yave opaete upurugüirovia vae reta ñugüinoi vae rupi, oo uvãe tenta guasu Lida pegua reta pe. ³³ Joco pe uvãe penti cuimbae Eneas jee vae ocho año ma ico jupa pe vae. Echa'a ipuere mbae omi vae. ³⁴ Jare Pedro jei chupe:

—Eneas, Jesucristo nembigüera ma. Epüa ipiso nderupa —jei.

Jare jupivoiño jae upüa. ³⁵ Jare opaete Lida pegua reta jare tenta tenta ñuu Sarón pegua reta uecha cua cuimbae, jare uyerova reta yandeYa coti.

Dorcias umano jare icove ye

³⁶ Jare ico tenta guasu Jope pe penti cuña upurugüirovia vae Tabita jee vae. (Cua tee uipota jei ambie ñee pe: Dorcas.) Cua cuña uyapo jeta icavi vae, jare umeei jeta mbae iparavete vae reta pe. ³⁷ Jayave imbaerasi, jare umano. Jare ñru vae reta opa umbiyau yave, oñoño penti o ivate vae pe. ³⁸ Jare Lida coño oĩ Jope güi. Jare upurugüirovia vae Jope pegua reta uicuaa ma yave Pedro oĩ Lida pe, omondo icoti mocui cuimbae reta jei vaerã chupe:

—Ecuá Jope pe imambae.

³⁹ Jayave Pedro upúa ou jae reta jupíe. Jare ou uvãe yave, ñru vae reta güiraa o ivate vae pe. Joco pe opaete ime umano vae reta yati uyao ñugüinoi, jare uechaca Pedro pe temimonde Dorcas jae reta ndive ico yave uyapocue vae reta. ⁴⁰ Jayave Pedro omoõ opaete joco pe ñugüinoi vae reta. Jayave uyeatíca jare uyerure Tumpa pe. Jayave uyerova umae teõgüe re jare jei:

—Tabita, epúa.

Jayave cuña umae, jare uecha Pedro yave, upúa uguapi. ⁴¹ Jayave Pedro uipisi ipo pe, jare umupúa. Jayave ueni upurugüirovia vae reta jare ime umano vae reta, jare uechaca chupe reta icove ye ma co. ⁴² Jare cua jerãcua opaete Jope pegua reta pe. Jare jeta vae güirovia yandeYa re. ⁴³ Jare Pedro upita ima Jope pe. Ico penti guacapi umipíta vae Simón jee vae jenta pe.

10

Pedro jare Cornelio

¹ Ico Cesarea pe penti cuimbae Cornelio jee vae. Jae co sundaro reta juvicha penti ati Italiana jee vae pegua. ² Jae jare opaete jenta pegua reta umbiadora Tumpa, jare jae umeei jeta mbae iparavete vae reta pe, jare jecuaeñoi uyerure Tumpa pe. ³ Cua cuimbae uecha cavi ique pe penti ángel Tumpa pe uyeyocui vae uique jae oĩ vae pe mbapi ora ma caaru yave. Ángel jei chupe:

—Cornelio.

⁴ Cornelio uquiye reve umae ngatu ángel re jare upirandu:

—¿Mbae pa, cheYa?

Jare ángel jei chupe:

—Tumpa imandúa ndiyerure reta jare mbae nemei vae reta re. ⁵ Añave emondo cuimbae reta Jope pe, güeru vaerã penti cuimbae Simón jee vae. Jae uyembíjee Pedro pe —jei—. ⁶ Jae ico penti guacapi umipíta vae Simón ipi. Simón jenta oĩ i guasu jembei pe —jei.

⁷ Ángel uyemingueta jae ndive vae oo ma yave, Cornelio ueni mocui jembiocui reta jare penti sundaro umbiadora Tumpa vae. Cua sundaro vi uyeyocui Cornelio pe. ⁸ Jare opa umimbeu cavi chupe reta yave, omondo Jope coti.

⁹ Piareve pe guarasi ara mbiteta ma yave, jae reta yugüiraa tape rupi coño ma Jope güi rambueve, Pedro uyupi tenta iárambo, uyerure vaerã Tumpa pe. ¹⁰ Jare iyembai, jare uipota ucaru. Ërei ñru vae reta omboyi ñugüinoi rambueve jembiurã, Pedro oque. ¹¹ Jare ique pe uecha ara uyepea jare penti nieso tuicha vae rami vae ugüeyi ou icoti. Cua uyembígüeyi uyepisi reve irundi jembei reta pe. ¹² Cua nieso japípe pe ñugüinoi ipotave maemimba uguata vae reta jare opoñi vae reta, jare ipotave güira reta. ¹³ Jare ou Pedro pe penti ñee:

—Pedro, epúa iyuca jeu.

¹⁴ Ërei Pedro jei:

—Ndarau, cheYa. Jau'ã etei co mboroyocui jei agüiye vaerã jau vae. Icavi'ã co —jei.

¹⁵ Jayave ñee jei chupe:

—Tumpa umee ndeu vaerã vae, agüiye ërío.

¹⁶ Cua mbapi vese ma uyeyapo yave, nieso rami vae uyereraa ye ara pe. ¹⁷ Jare Pedro ipiacañi reve ipia pe uyemingueta oĩ rambueve mbae re ra uyemijaanga cua ique pe uecha vae, cuimbae Cornelio ombou vae reta upirandu yugüeru Simón jenta re, jare yugüeru ma uvãe onque pe. ¹⁸ Jare jae reta ueni upirandu joco pe ra ico Simón uyembíjee Pedro pe vae. ¹⁹ Jare Pedro ipia pe uyemingueta oĩ rambueve jocua ique pe uecha vae re, Espíritu Santo jei chupe:

—Mase, mbapi cuimbae reta ndereca. ²⁰ Epüa egüeyi ecua jae reta jupíe neatēi mbae reve. Echa'ã che co ambou —jei.

²¹ Jayave Pedro ugüeyi cuimbae Cornelio ombou vae reta ñugüinoi vae pe, jare jei chupe reta:

—Che co jae pe reta peeca vae. ¿Maera pa peyu chereca?

²² Jayave cuimbae reta jei Pedro pe:

—Ime penti cuimbae Cornelio jee vae. Jae co cuimbae jupi vae. Umbiadora co Tumpa. Jae co sundaro reta juvicha opaete judío reta uyemingueta cavi jese vae. Penti ángel Tumpa pe uyeyocui vae jei chupe ndereruca vaerã jenta pe, jae uyapisaca vaerã nemimbeuta chupe vae re —jei reta.

²³ Jayave Pedro uruique cuimbae reta, jare umimbita joco pe. Jayave piareve pe Pedro upüa oo jae reta jupíe. Jare amocue upurugüirovia vae Jope pegua reta yugüiraa jae jupíe.

²⁴ Jare piareve pe yugüiraa uvãe Cesarea pe. Jare Cornelio umbati ma jentarã reta jare iiru reta, jare uãro oí Pedro. ²⁵ Jare Pedro uiqueta ma yave tenta pe, Cornelio oo oovãiti jare uyeatica Pedro jovai umbiadora vaerã. ²⁶ Èrei Pedro jei chupe:

—Epüa. Che cuimbaeño vi co.

Jare umupüa. ²⁷ Jare uyemingueta jae ndive rambueve, Pedro uique tenta pe, jare uecha jeta vae yati ñugüinoi joco pe. ²⁸ Jayave Pedro jei chupe reta:

—Pe reta picuaa cavi co quirãí penti judío ipuere'ã uñemüru penti judío mbae vae ndive, jare quirãí ipuere'ã opou ipi. Èrei Tumpa uechaca cheve quirãí icavi'ã aeni vaerã penti vae yepe iquia vae, yepe tēi uyapo'ã mboroyocui. ²⁹ Jáeramo pe reta cherenica yave, ayu cheatēi mbae reve. Añave tapirandu peve, ¿maera pa cherenica? —jei Pedro.

³⁰ Jayave Cornelio jei chupe:

—Irundí ara ma uasa cuarãí yave ayerure añ ayecuacu reve tembú güi cua cherenta pe. Jare aramoño mbapi ora ma caaru yave aecha penti cuimbae uyemboi oí cherovai. Jemimonde jembipe —jei—. ³¹ Jae jei cheve: Cornelio, ndiyeruve uyendu ma, jare Tumpa imandúa ma mbae nemei vae reta re. ³² Emondo quía Jope pe, jare erurucu Simón uyembijee Pedro pe vae. Jae ico penti guacapi umipíta vae Simón ipi. Simón jenta oí i guasu jembei pe. Ou yave, jae neminguetata —jei cheve, jei—. ³³ Jáeramo jupivoiño amondo ndecotí, jare yasurupai ndeyu vae re. Añave ore co noí opaete cua pe Tumpa jovaque, nduyandu vaerã opaete Tumpa ndeocui vae re —jei.

³⁴ Jayave Pedro jei chupe reta:

—Añetete aicuaa ma quirãí Tumpa uau'ã penti vaenõ ñru vae güi. ³⁵ Echa'ã jocua umbiadora jare jupi vae uyapo vae ipotave ivi pegua icavi co Tumpa pe —jei—. ³⁶ Tumpa ombou ñee icavi vae Israel pegua reta pe. Jae umimbeu chupe reta ime mbiacatu Jesucristo re. Jesucristo co jae opaete vae iYa —jei Pedro—. ³⁷⁻³⁸ Juan umimbeu uyapisaca jese vae reta pe uyembibautizaca vaerã. Cua jaicue rupi Jesús Nazaret pegua jerãcua Galilea pe jare opaete Judea rupi. Jerãcua quirãí Tumpa umee chupe Espíritu Santo jare mbaepuere, jare quirãí jae oo opaete que rupi uyapo icavi vae, jare quirãí umbigüera opaete añ guasu uiporaraca chupe vae reta. Echa'ã Tumpa ico jae ndive. Opaete cua pe reta picuaa co —jei—. ³⁹ Jare ore numimbeu ñru vae reta pe opaete Jesús uyapo Judea rupi jare Jerusalén pe vae. Jayave judío reta uicutuca curusu re uyucaca —jei Pedro chupe reta—. ⁴⁰ Èrei Tumpa umbijecove ye güeru umanocue vae reta ipite güi mbapi ara umano rendave pe, jare umbiyecuaa. ⁴¹ Umbiyecuaa'ã opaete vae pe, jaenõ oreve. Echa'ã tenonde ma Tumpa oreparavo numimbeu vaerã ñru vae reta pe. Ore nducaru jare i ndou jae ndive, icove ye yave oo umanocue vae reta ipite güi —jei—. ⁴² Jare jae oreocui numimbeu vaerã ñru vae reta pe quirãí Tumpa uiparavo uãa vaerã icove vae reta jare umanocue vae reta —jei Pedro—. ⁴³ Cua regua co umimbeu opaete Tumpa ñnee aracae umimbeu vae reta. Echa'ã jae reta jei Tumpa umbiasata opaete jese güirovia vae reta pe imbaeyoa reta jae jeco pegua —jei.

Espíritu Santo ou judío mbae vae reta pe

⁴⁴ Jare Pedro imiari oí rambueve, Espíritu Santo ou opaete cua ñee uyandu vae reta pe. ⁴⁵ Jare judío upurugüirovia vae Pedro jupíe yugüeru vae reta ipiacañi quirãí judío mbae vae reta pe vi uñeme Espíritu Santo vae re. ⁴⁶ Echa'ã jae reta uyandu uyemingueta reta ambie vae ñnee pe. Jare uyandu vi umbiadora Tumpa. ⁴⁷ Jayave Pedro jei:

—¿Quía pa umbiavaita agüiye vaerã uyembibautizaca cua reta? Echa'ã Espíritu Santo ou ma chupe reta, yandeve ou rami —jei.

⁴Jayave Pedro oyocui uyembibautizaca vaerã yandeYa Jesús jee re. Jayave joco pegua reta umiñera Pedro upita vaerã jae reta ndive mbovi ara pegua.

11

Pedro umimbeu upurugüirovia vae Jerusalén pegua reta pe

¹Jayave Jesús jemimondo reta jare iru upurugüirovia vae Judea rupi ñugüinoi vae reta ucuaa quirãí judío mbae vae reta vi güirovia Tumpa iñee. ²Jayave Pedro oo ye uvãe yave Jerusalén pe, judío upurugüirovia vae reta uñeengata chupe. ³Jae reta jei:

—¿Maera pa ndique judío mbae vae reta jenta pe? ¿Maera pa ndecaru jae reta ndive? —jei reta.

⁴Jayave Pedro iyipi güiue umbipi umimbeu cavi chupe reta opaete uyeyapo vae. Jae jei chupe reta:

⁵—Che ayerure aï yave tenta guasu Jope pe, cheque pe aecha penti nieso tuicha vae rami vae ugüeyi ou checoti. Cua uyembigüeyi ara güi uyepisi reve irundi jembei reta pe ou uvãe cheve —jei—. ⁶Amae ngatu jese yave, aecha maemimba uguata vae reta, amocue pochi vae jare amocue pochi mbae vae, jare maemimba opoñi vae reta, jare güira reta. ⁷Jare ayandu vi penti ñee jei cheve: 'Pedro, epüa iyuca jeu' —jei, jei Pedro—. ⁸Èrei che jae: 'Ndarau, cheYa. Jau'ã etei co mboroyocui jei agüiye vaerã jau vae. Icavi'ã co' —jæ chupe, jei—. ⁹Èrei ñee ou ara güi vae jei cheve: 'Tumpa umee ndeu vaerã vae, agüiye eriõ' —jei cheve, jei—. ¹⁰Jare cua mbapi vese ma uyeyapo yave, opaete uyereraa ye ara pe. ¹¹Jare jupivoiño yugüeru uvãe che aico vae pe mbapi cuimbae Cesarea güi Cornelio ombou vae reta —jei Pedro—. ¹²Jare Espíritu Santo jei cheve aa vaerã jae reta jupie cheatëi mbae reve. Jare cua seis upurugüirovia vae reta vi yugüiraa cherupie, jare ndiique jocua cuimbae jenta pe —jei. ¹³Jare jocua cuimbae umimbeu oreve quirãí uecha penti ángel uyemboi oi jae jo pe, jare quirãí ángel jei chupe: 'Emondo cuimbae reta Jope pe erurua penti cuimbae Simón jee vae. Jae uyembijee Pedro pe' —jei chupe, jei—. ¹⁴Jae umimbeuta ndive ñee, nde jare opaete nerenta pegua reta piyembiasaca vaerã —jei chupe, jei—. ¹⁵Jayave che ambipi amingueta reta yave, Espíritu Santo ou chupe reta, yandeve tenonde yave ou rami. ¹⁶Jayave chemandúa yandeYa jei yandeve vae re. Echa'ã jei: 'Juan upurumbibautiza i pe. Èrei pe reta piyembibautizacata Espíritu Santo pe' —jei yandeYa, jei—. ¹⁷Tumpa umee chupe reta Espíritu Santo yande yarovia yandeYa Jesucristo re vae pe umee vae. Jáeramo che chepue're'ã etei ambiavai Tumpa uyapo vae —jei.

¹⁸Jayave cua Pedro jei chupe reta vae uyandu yave, jae reta ipuere'ã ma mbae jei. Umbiadoraño Tumpa, jare jei reta:

—Tumpa umaño vi judío mbae vae reta re ueya vaerã iyemingueta icavi mbae vae ipia pe oi vae, güiinoi vaerã tecove opa mbae vae.

Upurugüirovia vae reta Antioquía pe

¹⁹Jare Esteban uyuca yave, jovaicho reta uiporaraca upurugüirovia vae reta pe. Jare upurugüirovia vae reta opa uñemiai, jare yugüiraa uvãe ivi Fenicia, Chipre jare Antioquía pe. Jare jae reta umimbeu judío reta peño Tumpa iñee. ²⁰Èrei jae reta ipite pe ñugüinoi amocue cuimbae Chipre jare Cirene pegua. Cua reta yugüiraa uvãe yave Antioquía pe, umingueta judío mbae vae reta pe vi, jare umimbeu chupe reta ñee icavi vae yandeYa Jesús regua. ²¹Jare yandeYa ombori, jare jeta vae güirovia jare uyerova yandeYa coti.

²²Jare cua jerãcua upurugüirovia vae Jerusalén pe ñugüinoi vae reta pe. Jayave jae reta omondo Bernabé Antioquía pe. ²³Jare jae oo uvãe yave, uecha jocua uyeyapo Tumpa ipiacavi jeco pegua vae, jare uyerovia. Jayave jei chupe reta jecuaño uguata cavi vaerã yandeYa ndive ipirãta reve ipia pe. ²⁴Echa'ã Bernabé co jae cuimbae ipiacavi vae. Jae upurugüirovia cavi, jare tinee Espíritu Santo pe. Jare jeta vae güirovia yandeYa re jare uñemiru upurugüirovia vae reta ndive.

²⁵Cua jaicue rupi Bernabé oo Tarso pe, ueca vaerã Saulo. Jare uvãe chupe yave, güeru Antioquía pe. ²⁶Jare joco pe uñemiru reta penti año upurugüirovia vae reta ndive, jare

omboe jeta vae. Jare Antioquía pe jaeramo etei írú vae reta umbipi jei upurugüirovia vae reta re:

—Cua reta co jae cristiano reta.

²⁷ Jare jocua ara reta pe amocue Tumpa iñee umimbeu vae reta yugüeru Jerusalén güi Antioquía pe. ²⁸ Penti jee co Agabo. Jae upúa uyemboi, jare jei Espíritu Santo rupi imeta co caruai tuicha vae opaete ivi rupi. Cua ueyepo Claudio mburuvicha guasurã ico yave. ²⁹ Jayave penti penti upurugüirovia vae reta iquirëi omondo ime güinoi vae güi, ombori vaerã upurugüirovia vae Judea rupi ñugüinoi vae reta. ³⁰ Jare jucuarãi uyapo reta. Jare jae reta omondo upurugüirovia vae reta itenondegua reta pe Bernabé jare Saulo ndive.

12

Herodes uyucaca Jacobo, jare oñonoca Pedro peresoriru pe

¹ Jocua ara reta pe mburuvicha guasu Herodes uipisica amocue upurugüirovia vae reta, uyapo vaerã icavi mbae vae chupe reta. ² Jare uyucaca quise pe Jacobo - jae co Juan tiquei. ³ Jare Herodes uicuaa yave cua uyapo vae icavi judío reta pe, uipisica Pedro vi. Jocua ara reta pe judío reta jou ñugüinoi mbiyape ovu mbae vae. ⁴ Jare uipisica ma yave, oñonoca peresoriru pe. Umee irundi ati sundaro reta pe uyandareco jese vaerã. Penti penti ati güinoi irundi sundaro. Herodes uipota tõi güinoëca Pedro tenta guasu pegua reta jovai pascua uasa ma yave. ⁵ Jayave sundaro reta uyandareco Pedro re peresoriru pe. Ërei upurugüirovia vae reta icuери mbae reve uyerure Tumpa pe jese.

Pedro oë peresoriru güi

⁶ Piareve pe ma Herodes güinoëcata tõi yave, jocua pítu etei Pedro oque oï mocui sundaro ipãu pe, jare uñeapíti oï mocui cadena pe. Jare sundaro reta peresoriru jonque uãro ñugüinoi. ⁷ Jare aramoiño penti ángel yandeYa pe uyeyocui vae uyecuaa, jare penti tembipe uesape peresoriru pe. Jayave ángel uñatai Pedro iyique pe umbisareco vaerã, jare jei chupe:

—Epúa voi.

Jare cadena reta uyera ipapi güi. ⁸ Jayave ángel jei chupe:

—Iyemonde jare emonde vi ndepipasa.

Jare Pedro jucuarãi uyapo. Jayave ángel jei chupe:

—Iñeñoma ndeasoya pe, jare eyu cheraicue. ⁹ Jayave Pedro oë oo ángel jaicue rupi.

Jae uicuaa'ã añete ra ángel uyapo vae. Ipia pe uyemingueta tõi opaete cua uecha oï ique pe vae. ¹⁰ Uasa ma yave mocui sundaro peresoriru uãro vae, yugüiraa uvãe onque fierro calle coti oo vae pe. Cua onque jaei uyepea chupe reta. Jare oë reta ma yave, uguata reta penti calle rupi. Jayave aramoiño ángel oo Pedro güi ueya. ¹¹ Jayave ramo Pedro uicuaa cua ueyepo vae añete co, jare jei iyupe:

—Añave aicuaa cheYa co ombou ángel jare cherepica Herodes güi jare opaete judío reta uipota uyapo cheve vae güi.

¹² Cua re ipia pe uyemingueta rambueve, oo uvãe María jenta pe. María co jae Juan Marcos ichi. Joco pe jeta vae yati uyerure ñugüinoi Tumpa pe. ¹³ Pedro ombopu onque, jare oë tenta güi penti cuñatai Rode jee vae uypisaca vaerã. ¹⁴ Cua cuñatai uicuaa Pedro iñee, Ërei uyerovia güi uipea'ã onque. Osi uique tenta pe, jare umimbeu írú reta pe Pedro co oï onque pe. ¹⁵ Ërei jae reta jei chupe:

—Nembiquere co.

Ërei jae jeiete jei añete co. Jayave jae reta jei:

—Ángel uyandarecose jese vae co.

¹⁶ Ërei Pedro jecuaa ombopu onque. Jare jae reta uipea yave, uecha jae co, jare ipiacañi.

¹⁷ Ërei Pedro umupúa ipo umiquíu reta vaerã, jare umimbeu chupe reta quirã yandeYa güinoë peresoriru güi. Jare jei chupe reta:

—Pícuaca cua Jacobo jare írú upurugüirovia vae reta pe.

Jayave oë oo joco güi icoti'ã.

¹⁸ Jare cõe rupive sundaro reta uyemipia'ã ete. Echa'ã uicuaa'ã mbae ra ueyepo Pedro pe. ¹⁹ Jare Herodes uecaca tõi yave, Pedro uñevãe'ã. Jayave Herodes upirandu sundaro reta pe jese. Jayave oyocui sundaro reta uyeucaca vaerã. Jayave Herodes oo Judea güi Cesarea pe, jare upita joco pe.

Herodes umano

²⁰ Jare Herodes pochi ico Tiro pegua reta jare Sidón pegua reta coti. Jayave jae reta penti rami yugüeru ipi, jare uñemiiru reta penti mburuvicha guasu jembociui tenondegua vae Blasto jee vae ndive. Jae reta jei chupe agüiye vaerã mburuvicha guasu pochi chupe reta. Echa'ã jae reta güeru jemiurã mburuvicha guasu Herodes iivi güi. ²¹ Jare Herodes uiparavo penti ara imiari vaerã chupe reta. Jayave jocua ara Herodes uyemonde cavi, jare uguapi mburuvicha upuruãa vae pe, jare imiari chupe reta. ²² Jare jae reta iñeeãta reve jei:

—Tumpa iñee co, cuimbae iñee'ã co.

²³ Jare jupivoiño penti ángel yandeYa pe uyeyocui vae umimbaerasi Herodes taso pe. Echa'ã Herodes umbiadora'ã Tumpa. Jáeramo umano.

²⁴ Ërei Tumpa iñee uñemiai, jare jeta vae upurugüirovia.

²⁵ Jare Bernabé jare Saulo yugüeru ye Jerusalén güi, iparaviqui joco pe uyapo ma yave. Jare güeru jae reta jupíe Juan Marcos.

13

Bernabé jare Saulo yugüiraa umimbeu ñee icavi vae

¹ Jare yugüireco upurugüirovia vae Antioquía pe ñugüinoi vae reta ipite pe amocue Tumpa iñee umimbeu vae reta jare Tumpa iñee re oporomboe vae reta. Jae reta co Bernabé, Simón Níger, Lucio Cirene pegua, mburuvicha guasu Herodes jentarã Manaén jee vae jare Saulo. ² Cua reta uyeyocui yandeYa pe jare uyecuacu tembú güi rambueve, Espíritu Santo jei chupe reta:

—Pemondo Bernabé jare Saulo uyapo vaerã mbaraviqui che aiparavo ma chupeguarã vae.

³ Jare uyecuacu reta tembú güi, jare uyerure reta Tumpa pe. Jayave ñru reta oñono ipo jese reta jare omondo.

Umimbeu reta ñee icavi vae Chipre pegua reta pe

⁴ Jayave Saulo jare Bernabé uyemondoca Espíritu Santo pe, jare yugüiraa tenta guasu Seleucia pe, jare joco güi uasa i guasu rupi ivi Chipre pe. ⁵ Jare yugüiraa uvãe yave tenta guasu Salamina pe, umimbeu reta Tumpa iñee judío reta itupao reta pe. Jare Juan oo jae reta ndive ombori vaerã. ⁶ Jare opaete Chipre umbapi yave, yugüiraa uvãe tenta guasu Pafos pe, jare joco pe uñevãe penti judío Barjesús jee vae ndive. Jae co penti ipaye vae, jare jei jae co penti Tumpa iñee umimbeu vae. Cua jei upurumbitavi vaerã. ⁷ Cua cuimbae oĩ mburuvicha Sergio Paulo jee vae ndive. Cua mburuvicha iyaracuaa catu co. Jae ueni Bernabé jare Saulo, jare uipota uyapisaca Tumpa iñee re. ⁸ Ërei Elimas (cua tee uipota jei: “Ipaye vae”) umbiavai, agüiye vaerã tẽi mburuvicha upurugüirovia. ⁹ Ërei Saulo (uyembijee vi Pablo pe vae) tinee Espíritu Santo pe, jare uinae ngatu Elimas re ¹⁰ jare jei chupe:

—Nde co jae aña guasu tai upurumbitavi vae. Nde ndiyapo icavi mbae vae, jare ndipota'ã ñru vae reta uyapo vaerã jupi vae. Jecuaeño ndeporoyopia yandeYa jape icavi vae güi. ¹¹ Mase, añave yandeYa tombou ipo nderé, nderesa mbae ndico vaerã. Ndarau ndeecha guarasi mbovi ara pegua —jei.

Jare jupivoiño Elimas ipuere'ã mbae uecha, pñtumimbi oĩ yave rami, jare coti coti uyerova ueca tẽi quía uipoco güiraa vaerã. ¹² Jayave mburuvicha cua uyeyapo vae uecha yave, güirovia Tumpa iñee. Echa'ã ipiacañi yandeYa iporomboe re.

Pablo jare Bernabé Antioquía Pisidia pegua pe

¹³ Jayave Pablo jare jae ndive ñugüinoi vae reta yugüiraa Pafos güi, jare uasa i guasu rupi tenta guasu Perge ivi Panfilia pegua pe. Ërei Juan ueya reta oo ye Jerusalén coti. ¹⁴ Jayave jae reta yugüiraa Perge güi tenta guasu Antioquía Pisidia pegua coti. Jare joco pe yugüiraa uvãe yave, uique reta judío reta itupao pe mbutuu ara pe, jare uguapi reta. ¹⁵ Jare ñru vae reta opa umingueta yave mboroyocui güi jare Tumpa iñee aracaë umimbeu vae reta uicuatiaque güi, tupao pegua reta itenondegua reta omondo jei chupe reta:

—Orerivi reta, ime yave ñee penoi orembiaracuaa vaerã, pepuere piyemingueta.

¹⁶ Jayave Pablo upña, jare umupña ipo uníquii reta vaerã. Jayave jei chupe reta:

—Cuimbae Israel pegua reta jare opaete pe reta Tumpa re pipiu vae, piyapisaca cheré.
¹⁷ Israel pegua reta i Tumpa uiparavo yandetenondegua reta, jare umbutuichaca Egipto pe yugüireco rambueve. Ērei Egipto jae reta iiv'á co. Jare Tumpa imbaepuere tuicha vae pe güinoë joco güi —jei—. ¹⁸ Jare cuarenta año urupia chupe reta ñana rupi. ¹⁹ Jare opa umbai yave Canaán güi siete ivi ambiembie vae pegua reta, umee cua reta iivcuae Israel pegua reta pe iivirá —jei—. ²⁰ Cua jaicue rupi cuatrocientos cincuenta año rupi Tumpa umee chupe reta mburuvicha reta uãa vaerã Samuel oĩ regua. Samuel co jae Tumpa iñee aracae umimbeu vae —jei—. ²¹ Jayave jae reta uyerure mburuvicha guasu re. Jayave Tumpa umee chupe reta Cis tai Saúl jee vae cuarenta año pegua. Jae co penti cuimbae Benjamín iñemoña pegua. ²² Jare Tumpa cua cuimbae omombo yave, umee chupe reta David juvicha guasurã. Jare Tumpa jei David re: 'Che aicuaa Isai tai David. Jae co penti cuimbae chembiyerovia vae. Jae uyapota opaete che aipota vae' —jei, jei Pablo—. ²³ Cua David iñemoña reta güi Tumpa umee Jesús. Jae co Israel pegua reta umbiasa vae. Jucuarãi Tumpa uyapo ma aracae jei vae —jei—. ²⁴ Ndei Jesús ou mbove, Juan umimbeu opaete Israel pegua reta pe ueya vaerã iyemingueta icavi mbae vae ipia pe oĩ vae, jare uyembibautizaca vaerã. ²⁵ Jare Juan opata ma umimbeu chupe reta yave, jei: 'Pe reta pepia pe piyemingueta tēi che co jae. Ērei jucuarãi'á. Co ou cheraicue ĩru vae. Jupi'á co che amboi vaerã ipipasa' —jei, jei—.

²⁶ Cheriquei reta, pe reta co jae Abraham iñemoña reta jare ĩru vae reta pe reta Tumpa re pipiu vae co. Tumpa ombou peve cua ñee piyembiasaca vaerã. ²⁷ Echa'ã Jerusalén pegua reta jare juvicha reta uicuaa'ã quía ra co jae Jesús. Uicuaa'ã vi Tumpa iñee aracae umimbeu vae reta uicuatiaque opa mbutuu ara pe jae reta umingueta tēi vae. Jáeramo jae reta jei Jesús uyeyucaca vaerã, jare jucuarãi uyeyapo uyecuatía oĩ jese vae —jei Pablo—. ²⁸ Jare yepe tēi uvã'e'ã teco Jesús re uyucaca reta vaerã, ěrei uyerure Pilato pe uyucaca vaerã. ²⁹ Jare jae reta opa ma uyapo chupe yave opaete jese uyecuatía oĩ vae, umbigüeyica reta curusu güi, jare oñonoca teögüeriru pe —jei—. ³⁰ Ērei Tumpa umbijecove ye güeru umanocue vae reta ipite güi. ³¹ Jare jeta ara uyecuaa jae jupíe yugüiraa Galilea güi Jerusalén pe vae reta pe. Jae reta añave umimbeu ĩru vae reta pe —jei Pablo chupe reta—. ³²⁻³³ Jare ore vi numimbeu peve ñee icavi vae, quirãi Tumpa jei yandetenondegua reta pe vae Tumpa etei uyapo ma yandev. Echa'ã umbijecove ye Jesús güeru umanocue vae reta ipite güi. Uyecuatía oĩ Salmo mocui pe cuarãi: 'Nde co jae che Rai. Cua ara che co jae nde Ru.' Jucuarãi uyecuatía oĩ. ³⁴ Tumpa umbijecove ye güeru umanocue vae reta ipite güi, agüiye vaerã etei jetecue icumegua. Jare cua re jei: 'Tamee ndeve bendición reta David pe jae ameeta chupe vae' —jei Tumpa, jei—. ³⁵ Jáeramo jei ĩru Salmo pe: 'Che co jae jupi vae. Nemañota'ã cheretecue re icumegua vaerã' —jei, jei—. ³⁶ Echa'ã David opa uyeyocui yave opaete jentaigua reta pe Tumpa uipota vae rupi, umano, jare uñeñotica itenondegua reta ñugüinoi vae pe, jare jetecue icumegua —jei—. ³⁷ Ērei jocua Tumpa umbijecove ye güeru umanocue vae reta ipite güi vae jetecue icumegua'ã etei —jei—. ³⁸ Jáeramo, cheriquei reta, picuaa cavi cua ore numimbeu ĩru vae reta pe vae. Tumpa umbiasata peve pemaeyoa reta cua Jesús rupi. ³⁹ Jare opaete güirovia jese vae reta uyembujupica ma. Echa'ã yandepuere'ã yayembujupica Moisés iporoyocui re —jei—. ⁴⁰ Jáeramo piñemoa ngatu, agüiye vaerã uyeyapo peve Tumpa iñee aracae umimbeu vae reta jei vae. Echa'ã jei reta cuarãi:

⁴¹ 'Mase, upurugüirũ vae reta, pepiacañi jare pecañitei' —jei Tumpa—.

'Echa'ã che ayapota penti mbaraviqui pico rambueve.

Pe reta ndarau perovia, yepe tēi quía umimbeuta peve' —jei.

Jucuarãi jei reta —jei.

⁴² Jare oē reta yave judío reta itupao güi, judío mbae vae reta umiñera umimbeu vaerã chupe reta cua ñee mbutuu ara outa vae pe. ⁴³ Jare tupao pe yati vae reta opa yugüiraa yave, jeta judío reta jare judiorã uyeyapo vae umbiadora Tumpa vae reta yugüiraa Pablo jare Bernabé ndive. Cua mocui reve imiari chupe reta, jare oyocui jecuaeño uyeco reta vaerã Tumpa ipiacavi re.

⁴⁴ Jare mbutuu ara ou vae pe opaete seri tenta guasu pegua reta uyembati, uyapisaca vaerã Tumpa iñee re. ⁴⁵ Ērei judío reta uecha yave jeta vae yati, uñemiagüiro, jare jei añete'ã co Pablo jei vae, jare jei icavi mbae vae Pablo coti. ⁴⁶ Jayave Pablo jare Bernabé imiari uquiye mbae reve chupe reta. Jei reta:

—Añete icavi co ore numimbeu vaerã peve rani Tumpa iñee. Ërei perĩro ma. Pipota'ã ma. Jucuarãi picuaaca oreve penoita'ã co tecove opa mbae vae. Jáeramo añave numimbeuta judío mbae vae reta pe. ⁴⁷ Echa'ã yandeYa oreocui cuarãi:

'Pomondo judío mbae vae reta pe, peraa vaerã tembipe chupe reta, jare pemimbeu vaerã opaete ivi pegua reta pe Tumpa umbiasata co.'

Jocuarãi oreocui —jei reta.

⁴⁸ Jare judío mbae vae reta uyandu yave cua ñee, tuicha uyerovia reta, jare umbutuicha Tumpa iñee. Jare güirovia opaete jocua Tumpa uiparavo tecove opa mbae vae güinoi vaerã vae reta. ⁴⁹ Jare Tumpa iñee uñemai opaete jocua ivi rupi. ⁵⁰ Ërei judío reta omboemboe cuña tenta guasu pegua reta itenondegua uipiü Tumpa vae reta jare cuimbae tenta guasu pegua reta itenondegua reta, jare umbipi uiporaraca Pablo jare Bernabé pe, jare omombo reta iivi güi. ⁵¹ Jayave Pablo jare Bernabé umitimo ivicui ipi güi, uechaca vaerã tenta guasu pegua reta co teco güinoi, jare yugüiraa tenta guasu Iconio coti. ⁵² Ërei upurugüirovia vae reta uyerovia ete, jare tinee Espiritu Santo pe.

14

Pablo jare Bernabé Iconio pe

¹ Jare Iconio pe Pablo jare Bernabé uique pãve judío reta itupao pe, jare imiari reta joco pe ñugüinoi vae reta pe. Jáeramo jeta judío reta jare judío mbae vae reta upurugüirovia. ² Ërei judío upurugüirovia mbae vae reta omboemboe judío mbae vae reta, jare umitarëica chupe reta upurugüirovia vae reta. ³ Jáeramo Pablo jare Bernabé upita joco pe ima pegua, jare imiari iru vae reta pe uquiye mbae reve yandeYa re. Jare yandeYa uechaca añete co iñee mbiacavi regua miacañi Pablo jare Bernabé uyapo vae reta rupi. ⁴ Ërei tenta guasu pegua reta uyembiyao uyugüi. Amocue uñemiiru judío reta ndive, jare amocue uñemiiru Jesús jemimondo reta ndive. ⁵ Jare judío reta jare judío mbae vae reta juvicha reta ndive uipota upurupeña Jesús jemimondo reta re, uyapo vaerã tēi icavi mbae vae chupe reta jare uyapi vaerã tēi ita pe. ⁶ Ërei Pablo jare Bernabé cua uicuaa yave, osi yugüiraa tenta guasu reta Listra jare Derbe pe jare cua mocui tenta guasu iyipi rupi. Cua tenta guasu reta co ivi Licaonia pegua. ⁷ Jare joco pe vi jae reta umimbeu ñee icavi vae.

Listra pegua reta uyapi Pablo ita pe

⁸ Jare Listra pe uguapi oĩ penti cuimbae ipuere mbae uguata vae. Ichi jie güi oa güiue ipuere'ã etei uguata. ⁹ Cua cuimbae uyandu Pablo imiari oĩ. Jare Pablo umae ngatu jese, jare uecha güinoi mburugüirovia ucuera vaerã. ¹⁰ Jayave Pablo iñeeãta reve jei chupe:

—Epüa iyemboi.

Jare jae upüa voi uyemboi jare umbipi uguata. ¹¹ Jayave yati vae reta uecha yave Pablo uyapo vae, jei reta Licaonia pegua reta iñee pe iñeeãta reve:

—Tumpa cuimbae reta rami vae reta ugüeyi yandeve.

¹² Jare jae reta umbijee Bernabé Júpiter, jare umbijee Pablo Mercurio. Echa'ã Pablo icatu imiari vaerã. ¹³ Jare jocua tumpa-raanga Júpiter jee vae itupao oĩ tenta guasu jovai. Jare Júpiter isacerdote güeru güeye reta jare mbaepoti reta tenta guasu jonque pe, jare jae jare yati vae reta uipota tēi uyuca güeye reta umbiadora vaerã Pablo jare Bernabé. ¹⁴ Ërei Jesús jemimondo reta cua uicuaa yave, omondoro reta jemimondei, jare osi yati vae reta ipite pe, jare iñeeãta reve jei chupe reta:

¹⁵ —Cuimbae reta, ¿maera pa piyapo cua? Ore perapicha retaño co. Jare numimbeu peve piyero vaerã cua icavi mbae vae piyapo vae güi Tumpa icove vae coti. Echa'ã jae uyapo ara, ivi, i guasu jare opaete mbaembae ime ñugüinoi pipe vae reta —jei reta —. ¹⁶ Tumpa umaño araca pegua reta re uyapo vaerã jae reta uipota vae. ¹⁷ Ërei jae jecuaño uyecuaa chupe reta mbaembae icavi vae jae uyapo vae rupi. Echa'ã jae ombou yandeve ama jare umbicuacuaa cavi temiti reta yanderemiurã ime vaerã. Jare jucuarãi uyapo, yayerovia vaerã —jei reta.

¹⁸ Cua jei reta yave, añapea umbiavai tenta guasu pegua reta agüiye vaerã uyuca güeye reta umbiadora vaerã.

¹⁹ Jayave amocue judío reta yugüeru Antioquía jare Iconio güi. Jae reta omboemboe tenta guasu pegua reta uyapi vaerã Pablo ita pe. Jare uyapi ma yave, umbitiriri güiraa

tenta guasu güi ñana coti. Umano echa chupe reta. ²⁰ Ërei upurugüirovia vae reta yugüeru uyembati yave Pablo iyipi rupi, Pablo upüa oo ye tenta guasu pe. Jayave piareve pe oo Bernabé ndive Derbe coti.

²¹ Jare umimbeu reta ñee icavi vae Derbe pe, jare jeta Derbe pegua reta güirovia Jesús re. Jayave Pablo jare Bernabé yugüeru ye Listra, Iconio jare Antioquía pe. ²² Jare cua tenta guasu reta pe jae reta umiatangātu upurugüirovia vae reta, jare umbiaracuaa jecuaño güinoi vaerā mburugüirovia Tumpa coti. Jare jei vi chupe reta:

—Jetañotai co yaiporara yaique vaerā Tumpa iporoyocua pe.

²³ Jare upurugüirovia vae reta uyembatimbati vae pe Pablo jare Bernabé uiparavo upurugüirovia vae reta itenondegua retarā. Jare uyerure reta uyecuacu reve tembü güi. Uyerure yandeYa pe jae uyandareco vaerā cua itenondegua reta re. Echa'ā güirovia reta ma yandeYa re.

Yugüiraa ye Antioquía Siria pegua pe

²⁴ Jayave Pablo jare Bernabé uasa Pisidia rupi, jare yugüiraa uvāe Panfilia pe. ²⁵ Jayave umimbeu ma yave Tumpa ñee Perge pe, yugüiraa tenta guasu Atalia pe. ²⁶ Jare joco güi uasa i guasu rupi Antioquía coti. Echa'ā upurugüirovia vae reta Antioquía pegua tenonde yave uyerure Tumpa pe ipiacavi oī vaerā jae reta ndive cua mbaraviqui opa ma uyapo vae re. ²⁷ Jare yugüiraa uvāe yave, Pablo jare Bernabé uyembati upurugüirovia vae reta ndive, jare umimbeu chupe reta opaete Tumpa uyapo chupe reta vae, jare quirāi Tumpa umaño judío mbae vae reta re upurugüirovia vaerā. ²⁸ Jare upita reta joco pe ima pegua upurugüirovia vae reta ndive.

15

Jerusalén pe uyeyapo vae

¹ Jare yugüeru Judea güi amocue cuimbae reta, jare jei upurugüirovia vae reta pe:

—Piñemicircuncidaca'ā yave Moisés iporoyocui pe jei rami, ndarau pepuere piyembiasaca.

² Jare Pablo jare Bernabé jeta uyeaca jae reta ndive cua re. Jayave upurugüirovia vae reta uiparavo Pablo jare Bernabé jare iru vae reta jae reta ipite güi, yugüiraa vaerā Jerusalén pe yemingüeta cua re Jesús jemimondo reta jare upurugüirovia vae reta itenondegua reta ndive.

³ Jayave iru upurugüirovia vae reta omondo ma yave, jae reta uasa Fenicia jare Samaria rupi jare umimbeu joco pegua reta quirāi judío mbae vae reta uyerova Tumpa coti. Jare umbiyerovia ete upurugüirovia vae reta.

⁴ Jare yugüiraa uvāe yave Jerusalén pe, Jesús jemimondo reta jare opaete upurugüirovia vae reta itenondegua reta ndive umbiresive cavi reta. Jare Pablo jare Bernabé umimbeu chupe reta opaete Tumpa uyapo chupe reta vae. ⁵ Ërei amocue fariseo pegua upurugüirovia vae reta upüa jare jei:

—Icavi co ñamicircuncidaca vaerā, jare yayocui uyapo vaerā Moisés iporoyocui.

⁶ Jayave Jesús jemimondo reta jare upurugüirovia vae reta itenondegua reta uyembati, uyemingüeta vaerā cua re. ⁷ Jare uyeaca ma uyupii yave, Pedro upüa jare jei chupe reta:

—Cherivi reta, picuaa catu co quirāi caramboe yave Tumpa cheparavo amimbeu vaerā judío mbae vae reta pe ñee icavi vae, jae reta güirovia vaerā. ⁸ Tumpa uicuaa opaete vae ipia pe oī vae, jare jae uechaca jae reta güirovia co. Echa'ā umee chupe reta Espíritu Santo, yandeve umee rami —jei Pedro—. ⁹ Jare Tumpa umbiyuavi'ā etei yandegüi. Echa'ā oyoe ma ipia, jae reta güirovia yave —jei—. ¹⁰ Jayave ¿maera pa pipota pemiaviat Tumpa? Echa'ā mboroyocui penti tivita rami. Pe reta pipota pemiavita jocua upurugüirovia vae reta. Ërei yandetenondegua reta jare yande vi yandepuere'ā yavoī —jei—. ¹¹ Yande yarovia yayembiasaca ma co yandeYa Jesús ipiacavi re, jae reta rami —jei.

¹² Jayave opaete yati vae reta iquiiño, jare uyapisaca Bernabé jare Pablo jei vae re. Jare reta umimbeu chupe reta opaete miacañi reta Tumpa uyapo jae reta rupi judío mbae vae reta ipite pe vae. ¹³ Jare jae reta opa imiari yave, Jacobo jei:

—Cherivi reta, piyapisaca cheré. ¹⁴ Simón umimbeu ma yandeve quirāi Tumpa jaeramo etei uparaviqui judío mbae vae reta ipite pe, uiparavo vaerā chugüi reta amocue

jae jee umbiadora vaerā —jei—. ¹⁵ Cua re co jei vi Tumpa iñee aracae umimbeu vae reta. Uyecuatía oī cuarāi:

¹⁶ ‘Cua jaicue rupi ayu yeta,

jare ayapo yeta David jenta opa usururu vae’ —jei yandeYa—.

‘Amupūa yeta usururucue, jare ambipiauta,

¹⁷ opaete ĩru ivi pegua reta chereca vaerā,

jare opaete judío mbae vae reta.

Che co jae reta iYa.

¹⁸ Che aciuaca cua aracae güive’ —jei yandeYa.

Jucuarāi uyecuatía oī —jei chupe reta—. ¹⁹ Jáeramo che jae agüiye yamambeco jocua judío mbae vae uyerova Tumpa coti vae reta. ²⁰ Ĕrei yaicutía chupe reta agüiye vaerā jou soo tumpa-raanga pe uñemee vae, jare maemimba ueyuví vae isoo, jare soo jugüi reve, jare agüiye vaerā uyapo aguasa —jei Jacobo—. ²¹ Echa’ā aracae güive yugüireco tenta guasu guasu pe Moisés iporoyocui umimbeu vae reta. Opa mbutuu ara jae reta umingueta Moisés iporoyocui itupao reta pe —jei.

²² Jayave Jesús jemimondo reta jare opaete upurugüirovia vae reta itenondegua reta ndive jei icavi co uyeparavo vaerā amocue cuimbae reta jae reta ipite güi, omondo vaerā Antioquía pe Pablo jare Bernabé ndive. Jayave uiparavo Judas Barsabás jare Silas. Jae reta co upurugüirovia vae reta itenondegua reta. ²³ Jae jae reta güiiraa tupapire. Cua tupapire pe jei cuarāi: “Ore co jae Jesús jemimondo reta jare opaete upurugüirovia vae reta itenondegua reta ndive. Nomondo numbisaluda opaete judío mbae vae upurugüirovia vae Antioquía, Siria jare Cilicia pegua reta. ²⁴ Jerācua oreve quirāi amocue orepite güi yugüiiraa pemambeco. Jucuarāi uyapo reta, yepe tēi ore ndoyocui’ā. Jáeramo pe reta picuaa’ā mbae piyapo vaerā. Echa’ā jei reta piñemicircuncidaca vaerā jare piyapo vaerā mboroyocui pe uyecuatía oī vae. ²⁵ Nduyemingueta ma cua re, jare ore opaete ndoe icavi co uyeparavo vaerā amocue orepite güi, nomondo vaerā pecoti Bernabé jare Pablo ndive. Nduau co Bernabé jare Pablo. ²⁶ Jae reta iquirēi umee jecove yandeYa Jesucristo pe uyeyocui vaerā. ²⁷ Jáeramo nomondo pepi Judas jare Silas. Jae reta iñee pe etei umimbeuta vi peve cua. ²⁸ Ore ndarau pumbiavai. Cua mboviño numimbeuta peve. Cua icavi Espiritu Santo pe jare oreve vi. ²⁹ Agüiye peu soo tumpa-raanga pe uñemee vae, jare maemimba ueyuví vae isoo, jare soo jugüi reve. Jare agüiye piyapo aguasa. Cua ore ndoe peve vae piyapo yave, icavita pico. Tumpa ndiveño.” Jucuarāi uyecuatía oī tupapire pe.

³⁰ Jayave uyemondoca vae reta yugüiiraa uvāe Antioquía pe. Jare umbati yave upurugüirovia vae reta, umee chupe reta tupapire. ³¹ Jae opa umingueta yave, opareve uyerovia cua ñee umbipiacatu vae re. ³² Jae Judas jare Silas Tumpa iñee umimbeu vae reta co, jare jeta uyemingueta upurugüirovia vae reta pe, umbipiacatu jare umimiráta vaerā. ³³ Jae ima ma joco pe ñugüinoi yave, upurugüirovia vae reta omondo cavi ye ombou vae reta coti. ³⁴ Ĕrei icavi echa Silas pe upita vaerā joco pe. ³⁵ Jae Pablo jare Bernabé upita Antioquía pe oporomoe Tumpa iñee re, jare umimbeu ñee icavi vae jeta ĩru vae reta ndive.

Pablo ueya Bernabé, jare oo ye umimbeu ñee icavi vae

³⁶ Mbovi ara rupi Pablo jei Bernabé pe:

—Yaa ye yapou upurugüirovia vae reta pe opaete tenta guasu yamimbeu ma yandeYa iñee vae reta rupi, yaecha vaerā quirāi ra ñugüinoi.

³⁷ Jae Bernabé uipota tēi güiiraa jae reta jupíe Juan Marcos. ³⁸ Ĕrei Pablo jei icavi’ā güiiraa vaerā jae reta jupíe. Echa’ā Juan Marcos ou ye Panfilia güi chugüi reta, jare oo’ā jae reta jupíe Tumpa iparaviqui uyapo vaerā. ³⁹ Jae uyeaca reta uyupii cua re. Jáeramo uyembiyao reta uyugüi. Marcos oo Bernabé jupíe, jare jae reta uasa i guasu rupi Chipre pe. ⁴⁰ Ĕrei Pablo uiparavo Silas iguataĩrurā, jare upurugüirovia vae reta uyerure yandeYa pe ipiacavi oī vaerā jae reta ndive. Jayave jae reta yugüiiraa. ⁴¹ Jae uasa reta ivi Siria jare Cilicia rupi umiatangātu reve upurugüirovia vae reta uyematimbatí vae rupi.

¹ Jayave yugüüraa uväe Derbe pe, jare joco güi yugüüraa Listra pe. Jare joco pe ico penti upurugüürovia vae Timoteo jee vae. Ichi co jae penti judía upurugüürovia vae, jare tu co jae penti griego. ² Upurugüürovia vae Listra jare Iconio pe ñugüünoi vae reta uyemingueta cavi Timoteo re. ³ Pablo uipota güüraa Timoteo jae reta Jupíe. Jáeramo umircuncidaca, jocoropi judío ñugüünoi vae reta jeco pegua. Echa'a opaete vae uicuaa jae tu griego co. ⁴ Jare yugüüraa rambueve tenta guasu reta rupi, umimbeu upurugüürovia vae reta pe Jesús jemimondo reta jare upurugüürovia vae reta itenondegua Jerusalén pe ñugüünoi vae reta uicuatía chupe reta vae, jae reta uyapo vaerä. ⁵ Jayave upurugüürovia vae reta uyembatimbati vae rupi uñemiatangātu Tumpa coti, jare opa ara rupi ñru vae reta güürovia Jesús re jare uñemiiru jae reta ndive.

Cuimbae Macedonia pegua

⁶ Jare Pablo jare jae ndive ñugüünoi vae reta uasa ivi Frigia jare Galacia rupi. Jare Espiritu Santo oyopia reta, agüiye vaerä umimbeu Tumpa iñee Asia pe. ⁷ Jare ivi Misia pe yugüüraa uväe yave, uipota tēi yugüüraa ivi Bitinia pe. Ērei Espiritu Santo umaño'a yugüüraa vaerä. ⁸ Jayave uasa reta coiño Misia güi, jare yugüüraa uväe tenta guasu Troas pe. ⁹ Jare pítu yave Pablo uecha ique pe penti cuimbae ivi Macedonia pegua uyemboi oí joco pe. Jare cuimbae uyerure Pablo pe:

—Ecu Macedonia pe orembori.

¹⁰ Jare cua uecha ma yave, Jupivoiño nduipota ndoo Macedonia coti. Echa'a nduicuaa ma Tumpa orereni numimbeu vaerä Macedonia pegua reta pe ñee icavi vae.

Peresoriru pe Filipos pe

¹¹ Jayave ndoo nduasa simi i guasu rupi Troas güi ivi Samotracia pe. Jayave piareve pe ndoo nuväe tenta guasu Neápolis pe. ¹² Jayave joco güi ndoo tenta guasu Filipos pe. Cua co tenta guasu tenondegua ivi Macedonia pegua, jare cua pe yugüeru yugüüreco vaerä Roma pegua reta. Cua tenta guasu pe ndupita mbovi ara. ¹³ Jare mbutuu ara pe ndoo tenta guasu jonque rupi iäca jembei pe. Joco pe oí penti yerurerenda. Jare joco pe nduguapi ma yave, oremiari cuña joco pe yati vae reta pe. ¹⁴ Jare penti cuña Lidia jee vae tenta guasu Tiatira pegua uyapisaca oí. Cua cuña umbiadora Tumpa. Jae co temimonde pita vae umee vae. Jare yandeYa uparaviqui ipia pe, jae uyapisaca cavi vaerä Pablo jei vae re. ¹⁵ Jare jae jare jentarä reta uyembibautizaca ma yave, jae jei oreve:

—Perovia yave che arovia cavi yandeYa re, peyu pepita cherenta pe.

Jare oremiñera ndupita vaerä joco pe.

¹⁶ Jare ndoo yave yerurearenda pe, orerováiti penti cuñatai aña oya jese vae. Cua cuñatai iya reta umingana jeta corepoti jese. Echa'a cuñatai umimbeu ñru vae reta pe aña imbaepuere rupi mbae uyeyapota vae. ¹⁷ Cua cuñatai oo oreraicue, jare iñeeäta reve jei:

—Cua cuimbae reta Tumpa ivate pegua jembiocui reta co. Jae reta umimbeu yandevera quiräi yandepuere yayembiasaca —jei.

¹⁸ Jare jeta ara jucuarä uyapo cuñatai. Jayave cua umambeco Pablo, jare jae uyerova jei aña pe:

—Jesucristo jee re ndoyocui: ¡Esiri chugüi!

Jare Jupivoiño aña usiri chugüi.

¹⁹ Jare cuñatai iya reta uicuaa yave uminganata'a ma co jese, uipisi reta Pablo jare Silas, jare güüraa reta plaza pe mburuvicha reta pe. ²⁰ Jare mburuvicha reta pe güüraa ma yave, jei reta:

—Cua cuimbae reta judío reta co, jare umambeco ete ñanerenta guasu pegua reta.

²¹ Jupí'a yambiresive vaerä ani yayapo vaerä cua moromboe umimbeu yandevera vae. Echa'a yande Roma pegua reta co —jei reta mburuvicha reta pe.

²² Jayave yati vae reta penti rami uepeña reta. Jare mburuvicha reta omondo Pablo jare Silas jemimonde reta, jare uinupaca ivira pe. ²³ Jare jeta ma uinupaca reta yave, umiingueca reta peresoriru pe. Jare oyocui reta peresoriru iyandarecoa uäro cavi vaerä, agüiye vaerä osi. ²⁴ Cua uyandu yave, peresoriru iyandarecoa umiingueca reta peresoriru japipe coti ete oí vae pe, jare oñono ipi iviracua pe.

²⁵ Ērei piare mbite ma yave Pablo jare Silas uyerure Tumpa pe, jare ucanta ñugüünoi umbiadora Tumpa. Jare ñru pereso reta uyapisaca ñugüünoi jese reta. ²⁶ Jare aramoño

tanta ucāta ivi, jare uñemicāta peresoriru iguapica. Jare jupivoiño uyepea opaete onque reta, jare uyera opaete cadena pereso reta uñeap̄iti pipe vae reta. ²⁷ Jayave peresoriru iyandarecoa usareco, jare uecha uyepea ñugüinoi peresoriru jonque reta. Jayave uequi iquisepucu jiru güi, uyeyuca vaerā. Echa'ā jae jei tēi pereso reta opa ma co osi. ²⁸ Ērei Pablo ñineēata reve jei:

—Agüiye iyeyuca. Echa'ā opareveño noī cua pe —jei.

²⁹ Jayave peresoriru iyandarecoa ueni quía güeru vaerā chupe tembiipe. Jayave osi peresoriru japipe pe, jare uyeatica Pablo jare Silas jovai. Uriri oī uquiye ramo. ³⁰ Jayave güinoē reta oca pe jare jei chupe reta:

—Carai reta, ¿mbae pa ayapota ayembiasaca vaerā?

³¹ Jayave jae reta jei chupe:

—Erovia yandeYa Jesucristo re, jare ndiyembiasacata co, jare nerenta pegua reta vi.

³² Jayave jae reta umimbeu Tumpa ñínee chupe jare opaete jenta pegua reta pe. ³³ Jare jocua ora voi peresoriru iyandarecoa güiraa Pablo jare Silas oyoe ipere. Jayave jae jare opaete jenta pegua reta uyembibautizaca. ³⁴ Jayave peresoriru iyandarecoa güiraa jenta pe umingarū Pablo jare Silas. Jare jae jare opaete jenta pegua reta uyerovia ete. Echa'ā güirovia reta ma Tumpa re.

³⁵ Jare cōe ma yave, mburuvicha reta ombou amocue sundaro reta jei vaerā:

—Iyora jocua cuimbae reta.

³⁶ Jare peresoriru iyandarecoa umimbeu cua ñee Pablo pe. Jei chupe:

—Mburuvicha reta ombou cheocui poyora vaerā. Jáeramo añave pepuere peē jare peo cavi.

³⁷ Ērei Pablo jei sundaro reta pe:

—Mburuvicha reta orenupaca opaete vae jovaque orereco mbae reve, jare oremiingueca peresoriru pe, yepe tēi ore co jae romano reta. Jare añave uipota oreyoraca viari. Ndarau uyapo jucuarāi. Tuyugüeru jae reta etei oreyora vaerā —jei.

³⁸ Jayave sundaro reta yugüiraa umimbeu cua ñee mburuvicha reta pe. Jayave mburuvicha reta uquiye, uicuaa yave jae reta romano reta co. ³⁹ Jayave yugüeru peresoriru pe ueca vaerā ñee cavi Pablo jare Silas pe. Jayave güinoē oca pe, jare umiñera yugüiraa vaerā tenta guasu güi. ⁴⁰ Jayave Pablo jare Silas yugüiraa peresoriru güi Lidia jenta pe. Jare uecha upurugüirovia vae reta, jare umbiaracuaa. Jayave yugüiraa joco güi.

17

Tecorai Tesalónica pe

¹ Pablo jare Silas uasa yave tenta guasu Anfópolis jare Apolonia rupi, yugüiraa uvāe tenta guasu Tesalónica pe. Joco pe oī penti judío reta itupao. ² Jare Pablo oo tupao pe. Echa'ā jucuarāi uyapo opaete tenta guasu reta rupi. Jare mbapi mbutuu ara uyeaca judío reta ndive. ³ Uechaca chupe reta Tumpa ñínee uyecuatía oī vae, jare uicuaaca quirāi Cristo uiporarañotai co jare icove yeñotai co ou umanocue vae reta ipite güi. Jare jei chupe reta:

—Cua Jesús che amimbeu peve vae co jae Cristo.

⁴ Jayave amocue güirovia Pablo jei vae, jare jae reta, jare jeta griego umbiadora Tumpa vae reta, jare jeta cuña tenta guasu pegua reta itenondegua reta uñemiñeru Pablo jare Silas ndive. ⁵ Ērei judío güirovia mbae vae reta ñacatāa Pablo jare Silas re, jare güeru amocue cuimbae iyaquī vae reta. Jeco pochi co cua cuimbae reta. Jayave umbati jeta ñru vae reta, jare uyapo tecorai. Jayave upurupeña reta Jasón jenta re ueca tēi Pablo jare Silas. Uipota tēi güiraa tenta guasu pegua reta jovai. ⁶ Ērei uvāe'ā chupe reta. Jayave uipisi güiraa Jasón jare amocue upurugüirovia vae reta mburuvicha tenta guasu pegua reta pe, jare ñineēata reve jei reta:

—Jocua cuimbae umambeco opaete ivi pegua reta vae reta yugüeru vi cua pe. ⁷ Jare Jasón güinoi jenta pe. Jare opaete jae reta oyovaicho César iporoyocui ndive. Echa'ā jei reta ime ñru mburuvicha guasu Jesús jee vae —jei reta.

⁸ Jayave tenta guasu pegua reta jare juvicha reta cua uyandu yave, uyemipi'a'ā. ⁹ Jare Jasón jare ñru vae reta umbiepi chupe reta yave, jae reta umaño yugüiraa ye vaerā.

Pablo jare Silas Berea pe

¹⁰Jare Jupivoiño upurugüirovia vae reta omondo Pablo jare Silas pïtu yave tenta guasu Berea jee vae coti. Jare jae reta yugüiraa uväe yave joco pe, yugüiraa judío reta itupao pe. ¹¹Jare joco pegua judío reta iyaracuaa catu Tesalónica pegua reta güi. Iquirëi uyapisaca Tumpa iñee re, jare opa ara umingueta cavi Tumpa iñee uyecuatía oï vae, uicuaa vaerã añete ra Pablo jei vae. ¹²Jare jeta joco pegua reta güirovia. Jare güirovia vi jeta griega reta itenondegua reta, jare jeta griego reta. ¹³Ërei judío Tesalónica pegua reta uicuaa yave Pablo umimbeu Berea pegua reta pe vi Tumpa iñee, yugüiraa joco pe omboemboe umambeco vaerã joco pegua reta. ¹⁴Jayave upurugüirovia vae reta omondo Pablo i guasu coti. Ërei Silas jare Timoteo upita Berea pe. ¹⁵Jare Pablo Jupíe yugüiraa vae reta güiraa tenta guasu Atenas pe. Jayave Pablo oyocui jae reta umimbeu vaerã Silas jare Timoteo pe yugüeru vaerã icoti imambae, ipuere yave. Jayave jae reta yugüeru ye Berea coti.

Pablo Atenas pe

¹⁶Jare Pablo uãro oï rambueve Atenas pe, uecha yave jeta tumpa-raanga reta ñugüinoi tenta guasu rupi, uyemipia'ã. ¹⁷Jayave uyeaca judío reta itupao pe judío reta jare ïru umbiadora Tumpa vae reta ndive. Jare uyeaca vi opa ara plaza pe joco pe ñugüinoi vae reta ndive. ¹⁸Jare amocue iyaracuaa vae reta uyeaca Pablo ndive. Jae reta co Epicúreo jare Estoico jee vae reta. Amocue jei:

—¿Mbae ra uipota jei cua iyeminguetase vae?

Jare ïru vae reta jei:

—Aramoi jae umimbeu ïru tumpa yaicuaa mbae vae reta regua.

Echa'ã Pablo umimbeu chupe reta ñee icavi vae Jesús regua, jare quirã jae icove ye ou umanocue vae reta ipite güi. ¹⁹Jare jae reta güiraa Pablo ivitu Areópago jee vae pe. Jare jei reta chupe:

—Emimbeu oreve mbae nunga moromboe ipiau vae ra cua nemiari jese vae. ²⁰Echa'ã cua nemimbeu ma oreve vae jaeramo nduyandu. Jáeramo nduipota nduicuaa mbae ra uipota jei cua —jei reta.

²¹Echa'ã opaete Atenas pegua reta jare queti güi yugüeru yugüireco joco pe vae reta jaeño ma yugüireco imiari vaerã jare uyapisaca mbae ipiau vae re.

²²Jayave Pablo uyemboi Areópago pe jeta vae reta ipite pe, jare jei chupe reta:

—Cuimbae Atenas pegua reta, aecha ma pe reta pemiadora co tumpa reta. ²³Echa'ã aguata rambueve tenta guasu rupi, amae jocua pemiadora vae reta re, jare aecha penti yemiadorarenda, jare jese uyecuatía oï cuarã: 'Tumpa yaicuaa mbae vae'. Jucuarã uyecuatía oï. Jáeramo tamimbeu peve pe reta picuaa'ã reve pemiadora vae —jei—.

²⁴Tumpa uyapo ivi jare opaete oï pipe vae. Jae co ara jare ivi iYa. Jae ico'ã yemiadorarenda vae rupi yande yayapo vae reta pe. ²⁵Tumpa ueca'ã etei ivi pegua reta umee vaerã mbae chupe. Echa'ã jae etei co umee yandevera tecove, jare ñaneputüé, jare opaete mbaembae —jei chupe reta—.

²⁶Jare Tumpa uyapo penti cuimbae, jare opaete ivi pegua reta iñemoñaeta reta co. Jucuarã Tumpa uyapo, jae reta yugüireco vaerã opaete ivi iáramo. Tumpa etei co umee quirã yave ivi pegua reta yugüireco vaerã, jare umbiyaoyao ivi chupe reta yugüireco tee tee vaerã —jei Pablo—. ²⁷Opaete cua Tumpa uyapo, ivi pegua reta ueca vaerã Tumpa, jare aramoi uväe vaerã iyupe. Echa'ã añetete jae mbiri'ã oï penti penti güi. ²⁸Jese yaicove jare ñami, yaico vaerã. Jare jucuarã vi amocue pepite pe oï vae jei uicuatía vae pe: 'Echa'ã jese yaico' —jei, jei—. ²⁹Jare Tumpa umee yandevera tecove ramo, icavi'ã yae vaerã Tumpa co jae oro pegua, ani corepoti pegua, ani ita pegua. Echa'ã cuimbae reta uyapo cua nunga iyaracuaa rupiño. ³⁰Aracae ivi pegua reta uicuaa'ã ramo, Tumpa umaeño jese reta. Ërei añave jae oyocui opaete ivi pegua reta ueya vaerã iyemingueta icavi mbae vae ipia pe oï vae —jei chupe reta—. ³¹Echa'ã Tumpa uiparavo ma penti ara uãaca vaerã jupi rupi ivi pegua reta jocua cuimbae jae uiparavo vae pe. Jare cua uicuaaca opaete ivi pegua reta pe. Echa'ã Tumpa umbijecove ye jocua uiparavo vae güeru umanocue vae reta ipite güi —jei.

³²Jare uyandu reta yave icove ye ou umanocue vae reta ipite güi vae regua, amocue vae oyoyai. Ërei ïru vae reta jei Pablo pe:

—Nduyapisaca yeta nderé ïru ara pe cua re.

³³ Jayave Pablo oo chugüi reta. ³⁴ Ērei amocue vae güirovia Tumpa iñee, jare uñemüru Pablo ndive. Cua reta ipite pe ñugüinoi penti Areópago pegua Dionisio jee vae, penti cuña Dámaris jee vae, jare ñru vae reta.

18

Pablo Corinto pe

¹ Cua jaicue rupi Pablo oo Atenas güi tenta guasu Corinto pe. ² Jare uñeväe joco pe penti judío Aquila jee vae ndive. Jae co Ponto pegua. Cua judío ou ramo uväe Italia güi jembireco Priscila jee vae ndive. Echa'ä mburuvicha guasu Claudio jee vae oyocui opaete judío reta yugüiraa vaerä Roma güi. Jayave Pablo opou ipi. ³ Jare Pablo icatu uyapo Aquila iparaviqui. Jáeramo Pablo upita jae reta ndive, jare uparaviqui päve reta. Jae reta co o reta guacapi pegua iyapoa. ⁴ Jare opa mbutuu ara Pablo uyeaca judío reta itupao pe. Cua uyapo, judío reta jare judío mbae vae reta güirovia vaerä.

⁵ Jare Silas jare Timoteo yugüeru uväe yave Macedonia güi, Pablo uñemiatangätu umimbeu vaerä Tumpa iñee. Umimbeu judío reta pe Jesús co jae Cristo, Tumpa ombou vae. ⁶ Ērei judío reta oyovaicho jae ndive, jare jei reta icavi mbae vae icoti. Jáeramo Pablo umitimo jemimonde, jare jei chupe reta:

—Pecañiteita co, jare pe retaño penoita teco. Che anoi'ä ma teco. Añave güive aata amimbeu judío mbae vae reta pe —jei.

⁷ Jayave oo joco güi cuimbae Justo jee vae jenta pe. Cua cuimbae umbiadora Tumpa, jare jae jenta oï judío reta itupao iyipi pe. ⁸ Jare judío reta itupao pegua reta itenondegua Crispo jee vae jare opaete jenta pegua reta güirovia yandeYa re. Jare jeta Corinto pegua reta uyandu Pablo umimbeu vae yave, güirovia jare uyembibautizaca. ⁹ Jare yandeYa jei Pablo pe pïtu yave ique pe:

—Agiüye equiye. Nemiari jare agüiye nequüi. ¹⁰ Echa'ä che ai nde ndive, jare ndarau quía ipuere nderé, uyapo vaerä icavi mbae vae ndeve. Echa'ä ime jeta chere güirovia vae reta cua tenta guasu pe —jei.

¹¹ Jare Pablo upita joco pe penti año jare seis yasi, jare umimbeu Tumpa iñee tenta guasu pegua reta pe.

¹² Ērei Galión jee vae ico mburuvicha ivi Acaya pe yave, judío reta oyovaicho penti rami Pablo ndive, jare güiraa mburuvicha upuruäa vae pe ¹³ jare jei reta:

—Cua cuimbae omboe yave tenta guasu pegua reta umbiadora vaerä Tumpa, omboe'ä mboroyocui pe uyecuatía oï vae rupi.

¹⁴ Jare Pablo omoëta ma yave iñee, Galión jei judío reta pe:

—Judío reta, cua cuimbae uyapo yave icavi mbae vae pecoti, ani jeco pochí yave, icavita tēi ayapisaca vaerä peré. ¹⁵ Ērei pipota yave aäa vaerä ñee reta re, tee reta re jare peporoyocui re, ndarau ayapisaca peré. Pe reta etei pepuere peäa. Echa'ä che aipota'ä aäa cua nunga re —jei chupe reta.

¹⁶ Jayave Galión omondo reta upuruäa vae güi. ¹⁷ Jayave griego reta uipisi judío reta itupao pegua itenondegua Sóstenes jee vae, jare ocua jese mburuvicha upuruäa vae jovai. Ērei Galión uyemambeco'ä etei jese.

¹⁸ Jare cua rendave pe Pablo upita ye jeta ara joco pe. Jayave oo upurugüirovia vae reta güi, jare uasa i guasu rupi Siria coti Priscila jare Aquila jupíe. Jare tenta guasu Cencrea pe Pablo uipépica iñäca. Echa'ä tenonde yave jei Tumpa pe uyapota mbae chupe ndei uipépica iñäca mbove. ¹⁹ Jare yugüiraa uväe yave tenta guasu Efeso pe, Pablo ueya Priscila jare Aquila. Jayave uique judío reta itupao pe, jare uyeaca judío reta ndive. ²⁰ Jare judío reta umiñera yave upita vaerä joco pe, uipota'ä. ²¹ Jare oota ma yave chugüi reta, jei:

—Aata co Jerusalén pe, ayapo vaerä pascua uyaro ma oï vae. Ērei Tumpa uipota yave, tayu ye pepi curi —jei.

Jayave oo i guasu rupi Efeso güi.

Pablo oo ye Antioquía güi umimbeu ñee icavi vae

²² Jare oo uväe yave Cesarea pe, oo umbisaluda vaerä upurugüirovia vae reta Jerusalén pe. Jayave oo joco güi Antioquía pe. ²³ Jare mbovi ara joco pe oï yave, oo umbapi opaete tenta tenta Galacia jare Frigia rupi umiatangätu vaerä opaete upurugüirovia vae reta.

Apolos uñemiñee Efeso pe

²⁴ Jare ou Efeso pe penti judío Alejandría pegua Apolos jee vae. Cua cuimbae ipuere imiari cavi, jare uicuaa cavi Tumpa iñee uyecuatía oĩ vae. ²⁵ Cua cuimbae uyemboe ma yandeYa iporomboe re. Jatangātu, jare imiari jare oporomboe jaecavi yandeYa re. Ērei uicuaa moromboe Juan upurumbibautizase jese vaño. ²⁶ Jae umbipi imiari uquiye mbae reve judío reta itupao pe. Ērei Priscila jare Aquila uyandu yave jei vae, güiraa jenta pe, jare omboe cavi quirāi yaico vaerā Tumpa coti vae re. ²⁷ Jare Apolos uipota oo yave Acaya pe, upurugüirovia vae reta umiatangātu jese, jare uicuatía reta penti tupapire upurugüirovia vae reta pe, umbiresive cavi reta vaerā Apolos. Jare jae oo uvāe yave joco pe, ombori jocua Tumpa ipiacavi jeco pegua upurugüirovia vae reta. ²⁸ Jae imiari mbaepuere reve, jare umiamiri judío reta tenta guasu pegua reta jovaque. Echa'ā uechaca chupe reta Tumpa iñee uyecuatía oĩ vae pe Jesús co jae Cristo.

19

Pablo Efeso pe

¹ Apolos Corinto pe oĩ rambueve, Pablo ou uvāe Efeso pe, opa yave umbapi opaete tenta guasu-rai-rai guarasi oē vae coti ñugüinoi vae reta rupi. Jare Efeso pe uñevāe amocue upurugüirovia vae reta ndive. ² Jare Pablo upirandu chupe reta:

—¿Ou pa Espíritu Santo peve pepurugüirovia yave?

Jae reta jei chupe:

—Nduicuaa'ā etei Espíritu Santo ou vae regua.

³ Jayave Pablo upirandu chupe reta:

—¿Mbae nunga moromboe re pa piyembibautizaca?

Jare jae reta jei chupe:

—Juan iporomboe re nduyembibautizaca.

⁴ Jayave Pablo jei chupe reta:

—Juan umbibautiza jocua reta ueya iyemingueta icavi mbae vae ipia pe oĩ vae. Jare jei chupe reta güirovia vaerā outa jaicue rupi vae re. Cua uipota jei Jesús re. Jesús co jae Cristo —jei—. ⁵ Jare cua uyandu yave, uyembibautizaca yandeYa Jesús jee re —jei chupe reta.

⁶ Jayave Pablo oñono ipo jese reta, jare ou chupe reta Espíritu Santo, jare jae reta uyemingueta ambie vae iñee pe, jare umimbeu reta Tumpa iñee. ⁷ Jare cua cuimbae reta uepiti doce rupi.

⁸ Jayave Pablo oo judío reta itupao pe, jare imiari uquiye mbae reve. Jare mbapi yasi uyeaca judío reta ndive Tumpa iporoyocuia re. ⁹ Ērei amocue ipiatanta jare uipota'ā güirovia, jare jei reta ñee icavi mbae vae tenta guasu pegua reta jovaque upurugüirovia vae reta ipurugüirovia coti. Jayave Pablo oo chugüi reta, jare güiraa jae ndive upurugüirovia vae reta, jare uyeaca opa ara rupi Tiranno jo tuicha vae pe. ¹⁰ Jare jucuarāi uyapo mocui año. Jáeramo opaete judío jare judío mbae vae Asia pegua reta uyandu ñee yandeYa Jesús regua. ¹¹ Jare Tumpa uyapo miacañi tuicha vae reta Pablo rupi. ¹² Echa'ā iru vae reta güiraa yave mbaembae Pablo omonde vae imbaerasi vae reta pe, imbaerasi vae reta ucuera, jare aña reta usiri oya jese vae reta güi.

¹³ Jayave amocue judío reta umbipi tēi ueni yandeYa Jesús jee aña reta oya jese vae reta re. Cua nunga judío reta uguata opaete que rupi umbisiri aña reta oya jese vae reta güi. Jae reta jei:

—Poyocui Jesús Pablo umimbeu vae jee re. ¹⁴ Jare penti judío Esceva jee vae güinoi siete tai reta. Esceva co jae penti sacerdote reta itenondegua. Jare cua cuimbae tai reta vi jucuarāi jei aña pe. ¹⁵ Ērei aña jei chupe reta:

—Che aicuaa co Jesús, jare aicuaa catu quía co jae Pablo. Ērei ¿quía pa co pe reta?

¹⁶ Jare jocua cuimbae aña oya jese vae upurupeña jese reta, jare umiamiri. Jare jae reta opa osi jocua tenta güi nani jare ipere reve. ¹⁷ Jare cua jerācua opaete judío jare judío mbae vae Efeso pegua reta pe. Jáeramo opareve uquiye, jare umbiadora yandeYa Jesús jee.

¹⁸ Jare jeta upurugüirovia vae reta yugüeru umimbeu jeco icavi mbae vae ueya ma vae regua. ¹⁹ Jare jeta ipaye vae reta güeru itupapire reta, jare uapi opaete vae jovaque. Jare

cua tupapire reta jepi uyepapa yave, uepiti cincuenta mil corepoti tī vae. ²⁰ Echa'ā Tumpa iñee mbiri rupi ma uñemiai, jare mbaepuere tuicha vae güinoi.

²¹ Cua jaicue rupi Pablo jei oo vaerā Macedonia jare Acaya rupi Jerusalén pe. Jare jae jei:

—Joco güi aata vi co Roma pe.

²² Jayave omondo Macedonia coti mocui imboria reta Timoteo jare Erasto jee vae. Ērei jae upita ye mbovi ara Asia pe.

Tecorai Efeso pe

²³ Jare jocua ara reta pe oī tecorai upurugüirovia vae reta ipurugüirovia re. ²⁴ Echa'ā penti cuimbae Demetrio jee vae umindicui corepoti, jare uyapo tupao-raanga michi vae corepoti pegua reta. Efeso pegua reta umbiadora itumpa-raanga Diana jee vae cua nunga tupao-raanga michi vae pe. Jare Demetrio umbiepi cavi ombori uyapo vae reta pe. ²⁵ Cua cuimbae umbati ombori uyapo vae reta jare ĩru cua nunga mbaraviqui uyapo vae reta, jare jei chupe reta:

—Cuimbae reta, picuaa catu co cua mbaraviqui güi ñamingana yaicocatu vaerā. ²⁶ Jare peecha jare piyandu ma quirāi cua Pablo umbiyerova jeta vae Efeso pe jare opaete seri Asia rupi jae iporomoe pe. Echa'ā jae jei tumpa-raanga cuimbae reta uyapo vae tumpa'ā co reta —jei—. ²⁷ Jare aramoi tenta guasu pegua reta güirōta cua yandeparaviqui. Jare aramoi güirōta vi tumpa cuña uyembiadora vae Diana itupao, jare ndarau ma quía umbiadora. Echa'ā añave opaete Asia pegua reta jare opaete ivi pegua reta umbiadora —jei chupe reta.

²⁸ Cua uyandu reta yave, pochi ete, jare iñeeāta reve jei:

—Uyembiadora co Diana Efeso pegua.

²⁹ Jare tecorai uñemiai opaete tenta guasu rupi. Jare jeta vae penti rami osi tenta guasu pegua reta uyuvanga vae pe. Jare uipisi güiraa joco pe Pablo iguataĩru reta Gayo jare Aristarco. Cua reta co Macedonia pegua. ³⁰ Jayave Pablo uipota tēi uique tenta guasu pegua reta yati ñugüinoi vae pe. Ērei upurugüirovia vae reta umaño'ā jese. ³¹ Jare amocue Asia pegua mburuvicha Pablo ndive uyepocuaa vae reta omondo umimbeu Pablo pe agüiye vaerā oo tenta guasu pegua reta uyuvanga vae pe. ³² Jare opaete yati vae reta iñeeāta, ěrei oyovaque'ā iñee reta. Tecorai tuicha vaeño uyapo reta. Echa'ā jeta joco pe ñugüinoi vae reta uicuaa'ā maera ra uyembati joco pe. ³³ Jayave judío reta umiaña jenonde Alejandro jee vae yati vae reta ipite güi, iñee omōē vaerā. Jayave Alejandro umupūa ipo umiquiĩ vaerā tēi. Echa'ā uipota tēi imiari tenta guasu pegua reta pe, agüiye vaerā jae reta umbijeco judío reta. ³⁴ Ērei yati vae reta uicuaa yave jae co judío, opaete penti rami mocui ora seri iñeeāta reve jei:

—Uyembiadora co Diana Efeso pegua.

³⁵ Jayave tenta guasu pegua reta juvicha umiquiĩ yati vae reta, jare jei chupe reta:

—Cuimbae Efeso pegua reta. Diana co jae tumpa cuña uyembiadora vae. Cua tenta guasu pegua reta uyandareco Diana itupao re. Jare uyandareco vi ita Diana echa vae Júpiter güi ou vae re. Opaete vae uicuaa cua —jei—. ³⁶ Jayave ipuere'ā quía cua uicuaa ramo, icavi co pequĩ vaerā, agüiye vaerā mbae piyapo güirave ndei pepia pe piyemingueta mbove. ³⁷ Echa'ā peru cua cuimbae reta cua pe, yepe tēi oñomi'ā mbae yandetupao güi, jare jei'ā vi mbae icavi mbae vae ñanetumpa cuña coti —jei chupe reta—. ³⁸ Demetrio jare imboria reta uipota yave uñeapo quía re, ime mburuvicha reta ñugüinoi uyapisaca vaerā jese reta. ³⁹ Ērei pipota yave piñeapo ĩru mbae re, mburuvicha reta uyapicatuta, uyembati yave —jei chupe reta—. ⁴⁰ Echa'ā aramoi mburuvicha reta yanembijecota yayapo vae re. Jei tēita yaipota ñañerāro jae reta ndive. Echa'ā yaicuaata'ā mbae ra yaeta chupe reta, jae reta upirandu yandeve yave maera ra yayapo cua tecorai —jei.

⁴¹ Jare tenta guasu pegua reta juvicha cua jei yave, opa omondo yati vae reta.

Pablo oo Macedonia jare Grecia pe

¹ Opa ma tecorai yave, Pablo ueni upurugüirovia vae reta. Jayave opa umbiaracuaa reta yave, uicuāva jare oo chugüi reta Macedonia coti. ² Jare umbapi opaete jocua tenta

guasu reta rupi umbiaracuaa cavi reve upurugüirovia vae reta. Jayave oo uvãe ivi Grecia pe. ³ Jare upita joco pe mbapi yasi. Jare i guasu rupi oota yave joco güi Siria coti, judío reta uyemboemboe uyapo vaerã icavi mbae vae chupe. Jáeramo Pablo jei oota Macedonia rupi. ⁴ Jare yugüiraa jae jupíe Sópater Berea pegua, Aristarco jare Segundo Tesalónica pegua reta, Gayo Derbe pegua, Timoteo, jare Tíquico jare Trófimo Asia pegua reta. ⁵ Cua reta yugüiraa orerenonde, jare oreraãro Troas pe. ⁶ Èrei ara reta mbiyape ovu mbae vae pegua uasa yave, ore ndoo i guasu rupi Filipos güi, jare pandepo ara pe ndoo nuvãe Troas pe. Joco pe nuñvãe iru reta ndive, jare ndupita joco pe siete ara.

Pablo opou Troas pe

⁷ Jare domingo ara pe upurugüirovia vae reta uyembati tembú umbiyao vaerã uyupe. Jayave Pablo piareve pe oota ramo, ipiare mbite rupi omboe reta. ⁸ Jare jeta tembipe ñugüinoi jocua o ivate vae pe yati ñugüinoi vae pe. ⁹ Jare jocua tenta co mbapi o ivate vae. Jare penti cunumi Eutico jee vae uguapi oï ventana pe, jare tanta oque oï. Jare Pablo jecuae omboe oï rambueve, cunumi oque oï ramo, oa joco güi oca coti ivi pe. Jare iru vae reta yugüiraa uupi yave, uecha umano ma. ¹⁰ Jayave Pablo ugüeyi jare ipe cunumi iárambo. Jayave uicuãva jare jei:

—Agüiye pepiatiti. Jecoveño oï.

¹¹ Jayave Pablo uyupi ye, jare joco pe ñugüinoi vae reta umbiyao uyupe tembú, jare ucaru reta. Jayave Pablo icõe omboe. Jayave oo chugüi reta. ¹² Jare joco pe yati vae reta güiraa cunumi icove ye vae, jare ipiacatu reta.

Troas güi Mileto pe

¹³ Jare ore rani ndoo nduasa i guasu rupi tenta guasu Asón pe. Nduipota nuñvãe Pablo ndive joco pe, jae jei rami. Echa'ã jae uipota oo ivi rupi. ¹⁴ Jare nuñvãe yave jae ndive Asón pe, Pablo uyupi chalana guasu pe, jare ndoo pãve ivi Mitilene pe. ¹⁵ Jare joco güi ndoo ye i guasu rupi, jare piareve pe ndoo nuvãe ivi Quío jovai. Piareve pe ndoo nuvãe ivi Samos pe. Jayave ndupita ivi Trogilio pe, jare piareve pe ndoo nuvãe tenta guasu Mileto pe. ¹⁶ Pablo iquirëi uasa güirave Efeso güi, agüiye vaerã uyembiavai Asia pe. Echa'ã jae uipota uvãe vaerã Jerusalén pe Pentecostés ara pe, ipuere yave.

Pablo imiari Mileto pe

¹⁷ Jayave Mileto güi Pablo omondo Efeso pe uenica upurugüirovia vae reta itenondegua reta. ¹⁸ Jare jae reta yugüeru uvãe yave Pablo oï vae pe, jae jei chupe reta:

—Pe reta picuaa catu co quirãi aico pe reta ndive tenonde ete Asia pe ayu güiive.

¹⁹ Ayeyocui yandeYa pe añemimichi reve jare ayao reve. Judío reta chembiavai etc. Echa'ã jecuaeño iquirëi reta uyapo icavi mbae vae cheve —jei—. ²⁰ Aipiu'ã amimbeu vaerã peve opaete icavi peve peguarã vae. Jare pomboe jeta vae ipite pe jare perenta rupi vi. ²¹ Jare amimbeu judío reta jare judío mbae vae reta pe ueya vaerã iyemingueta icavi mbae vae ipia pe oï vae jare uyerova vaerã Tumpa coti, jare güirovia vaerã yandeYa Jesucristo re —jei chupe reta—. ²² Jare añave aa Jerusalén coti, Espiritu Santo chemondo ramo. Jare aicuaa'ã mbae ra uyeypota cheve joco pe —jei—. ²³ Èrei opaete tenta guasu reta rupi Espiritu Santo umimbeu cheve iru vae reta cheñonota co peresoriru pe jare aiporarata. ²⁴ Èrei aquiye'ã. Chepia pe ayemingueta'ã etei ayerepi vaerã. Jaenõ aipota ambapi cheguata Tumpa coti vae ayerovia reve. Aipota ayapo mbaraviqui yandeYa Jesús umee cheve vae. Echa'ã jecuaeño aipota amimbeu iru vae reta pe ñee icavi vae Tumpa ipiacavi regua —jei Pablo chupe reta—. ²⁵ Amimbeu ma pepite rupi Tumpa iporoyocui regua, jare añave aicuaa catu co pe reta ndarau ma cherecha ye. ²⁶ Jáeramo añave amimbeu peve che anoi'ã etei co teco pecoti —jei—. ²⁷ Echa'ã aipiu'ã etei amimbeu vaerã peve opaete Tumpa jei vae. ²⁸ Jáeramo piñemoa ngatu, jare piyandareco opaete upurugüirovia vae reta re, penti ovecha iyandarecoa ovecha reta re uyandareco rami. Echa'ã Espiritu Santo co peparavo piyandareco vaerã jese reta. Jare pemimbeu Tumpa iñee yandeYa re güirovia vae reta pe, penti ovecha reta iyandarecoa ovecha reta umingararu rami. Echa'ã yandeYa uepi reta jae jugüi pe —jei—. ²⁹ Che aicuaa catu co che aa ma yave, yugüeruta pepite pe iru vae reta. Cua reta uyapota icavi mbae vae upurugüirovia vae reta pe, yaguapita ou jou ovecha reta rami —jei—. ³⁰ Jare pepite güi etei imeta cuimbae moromboe pichii vae re oporomboeta vae reta. Cua reta ombopata upurugüirovia vae

reta. ³¹ Jáeramo piñemoa ngatu, jare pemandúa quirāi chiyao reve pumbiaracuaa vae re. Mbapi año ma jucuarāi ayapo, ara rupi jare pītu rupi —jei—.

³² Añave ayerure Tumpa pe uyandareco vaerā peré, jare aeya pe reta ndive iñee ipiacavi regua. Echa'ā cua ñee ipuere pemimirāta jare umee peve pemaerā opaete jocua ĩru uñeño tee Tumpa peguarā vae reta ndive —jei Pablo—. ³³ Aipota'ā anoi ĩru vae icorepoti, ioro jare jemimonde. ³⁴ Pe reta picuaa catu co quirāi chepo pe etei aparaviqui, mbaembae uata cheve vae anoi vaerā, jare amee vaerā cheĩru reta pe —jei—. ³⁵ Opaete rupi aicuaaca ma peve quirāi icavi co yaparaviqui vaerā, yambori vaerā mbae uata chupe vae reta. Yanemandúa yandeYa Jesús etei jei vae re. Echa'ā jae jei: 'Tumpa umbiyerovia eteta mbae umeeiño vae mbae umbiresive vae güi' —jei, jei Pablo.

³⁶ Jare cua opa ma jei yave, Pablo uyeatica jare uyerure Tumpa pe opaete jae reta ndive. ³⁷ Jayave opaete joco pe ñugüinoi vae reta uyao, jare uicuaava reta Pablo jare uyurupite reta. ³⁸ Jare jae reta tuicha ipiatiti, Pablo jei chupe reta ndarau ma uecha ye ramo. Jayave jae reta yugüiraa jae jupíe chalana guasu oĩ vae pe.

21

Pablo oo Jerusalén pe

¹ Jare ndoo ma yave chugüi reta, nduasa simi i guasu rupi tenta guasu Cos pe. Jare piareve pe nduasa tenta guasu Rodas pe. Jayave joco güi nduasa tenta guasu Pátara pe. ² Jare nuvāe joco pe chalana guasu oota Fenicia pe vae. Jayave nduyupi pipe, jare ndoo. ³ Jare Chipre nduecha oreaso coti, jare nduasa. Jare jecuae ndoo Siria coti, jare ndoo nuvāe tenta guasu Tiro pe. Echa'ā joco pe chalana guasu ueyata jivita. ⁴ Jare nuñevāe upurugüirovia vae joco pegua reta ndive, jare ndupita joco pe siete ara. Jare jae reta Espíritu Santo rupi jei Pablo pe agüiye vaerā oo Jerusalén pe. ⁵ Jocua ara reta uasa yave, ndoo tenta guasu güi, jare opaete upurugüirovia vae reta jembireco reta jare isambiai reta ndive oremĩru. Jayave nduyeatica i guasu jembei pe nduyerure Tumpa pe. ⁶ Jayave nuñecuāva yave jae reta ndive, nduyupi chalana guasu pe, jare jae reta yugüiraa ye jenta pe.

⁷ Jayave Tiro güi ndoo nuvāe tenta guasu Tolemaida pe. Jare joco pe numbisaluda upurugüirovia vae reta, jare ndupita jae reta ipi penti ara. ⁸ Piareve pe ndoo chugüi reta Pablo jupíe Cesarea pe, jare joco pe nduique ndupita Felipe ñee icavi vae umimbeu vae jenta pe. Jae co jocua siete vae güi penti. ⁹ Cua cuimbae güinoi irundi tayi Tumpa iñee umimbeu vae. Cua irundi reve ndei umenda. ¹⁰ Jare ndupita joco pe mbovi ara. Jare Tumpa iñee umimbeu vae Agabo jee vae ou Judea güi. ¹¹ Jare jae ou ore noĩ vae pe, jare uequi Pablo jumbicuaa. Jayave uñeapiti ipi rupi jare ipo rupi jae jei:

—Cua jei Espíritu Santo: 'Cuarāi Jerusalén pe judío reta uñapitita cua tumbicuaa iya, jare umeeta reta judío mbae vae reta pe' —jei, jei Agabo.

¹² Cua nduyandu yave, ore jare joco pegua reta numiñera tēi Pablo agüiye vaerā oo Jerusalén pe. ¹³ Ĕrei Pablo jei:

—¿Maera pa piyao jare chembiatiti? Echa'ā aipiu'ā añeapiti vaerā Jerusalén pe. Aipiu'ā vi amano vaerā joco pe yandeYa Jesús jeco pegua —jei.

¹⁴ Jayave ndoe'ā ye ma mbae chupe cua re, orepuere'ā jese ramo. Jayave ndoe:

—Tuyeyapo yandeYa jei vae.

¹⁵ Jare jocua ara reta uasa yave, nduyeyapicatu ndoo Jerusalén coti. ¹⁶ Jare yugüiraa vi orerupíe Cesarea güi amocue upurugüirovia vae joco pegua reta. Oo vi jae reta jupíe Chipre pegua Mnasón jee vae. Echa'ā ndupitata Mnasón jenta pe. Cua Mnasón tenonde voi güirovia Jesús re.

Uipisi reta Pablo Tumpa jo pe

¹⁷ Jare ndoo nuvāe yave Jerusalén pe, upurugüirovia vae reta orembiresive uyerovia reve. ¹⁸ Jayave piareve pe Pablo oo ore ndive opou Jacobo pe. Jare opaete upurugüirovia vae reta itenondegua reta uyembati joco pe. ¹⁹ Jare opa ma umbisaluda yave, Pablo umimbeu chupe reta quirāi jae uparaviqui judío mbae vae reta ipite rupi, jare quirāi Tumpa jeta mbaembae uyapo chupe reta. ²⁰ Jae reta uyandu yave, umbiadora Tumpa. Jayave jei reta Pablo pe:

—Orerivi, ndicuaa ma quirāi jeta ete judío reta güirovia ma co Jesús re, jare opaete jae reta uñemiatangātu mboroyocui re. ²¹ Ērei jerācua chupe reta quirāi nde nemboe opaete judío judío mbae vae reta ipite rupi ñugüinoi vae reta agüiye vaerā uyapo Moisés iporoyocui. Echa'ā jerācua quirāi nde ndere chupe reta agüiye vaerā umircuncidaca tai reta, jare agüiye vaerā uyapo yande yayapoñoi vae —jei reta Pablo pe—. ²² ¿Mbae pa yayapota? Uyembatita co jeta vae. Echa'ā jae reta uicuaata nde ndeyu ma co cua pe. ²³ Jáeramo iyapo cua ndoeta ndeve vae. Ime cua pe ñugüinoi irundi cuimbae tenonde yave jei mbae uyapota Tumpa pe vae. ²⁴ Eraa cua cuimbae reta jare iyeyoe Tumpa coti mboroyocui jei rami jae reta ndive, jare embiepi iñāca uñeapīca reta vaerā. Jayave opaete vae uicuaata añetete'ā nererācua chupe reta vae. Echa'ā jae reta uicuaata nde vi co ndiyapo ndico mboroyocui —jei reta—. ²⁵ Ērei yaicuatía ma judío mbae vae upurugüirovia vae reta pe agüiye vaerā uyapo mboroyocui. Jaeño agüiye tou reta soo tumpa-raanga pe uñemee vae, jare soo jugüi reve, jare maemimba uyeyuvi vae isoo, jare agüiye tuyapo aguasa —jei reta.

²⁶ Jayave Pablo oo jocua cuimbae reta jupíe, jare piareve pe uyeyoe Tumpa coti mboroyocui jei rami jae reta ndive, jare uique Tumpa jo pe umimbeu mbae ara pe opata uyeyoe vae. Echa'ā jocua ara penti penti umeeta iofrenda.

²⁷ Jare cua rendave pe siete ara opata ma yave, judío Asia pegua reta uecha Pablo Tumpa jo pe, jare uyapo reta tecoraí jeta vae ndive. Jayave uípisi reta Pablo, ²⁸ jare iñeeāta reve jei:

—Cuimbae Israel pegua reta, orembori. Cua cuimbae oporombos opaete que rupi opaete iru vae reta oyovaicho vaerā yande ndive, mboroyocui ndive jare cua Tumpa jo ndive. Jare jae güeru griego reta uruique Tumpa jo pe, jare jucuarāi uminguíaca cua o Tumpa oí pipe vae —jei reta.

²⁹ Echa'ā tenonde yave uecha reta tenta guasu pe Efeso pegua Trófimo jee vae Pablo ndive. Jare ipia pe uyemingueta tēi Pablo uruique jocua cuimbae Tumpa jo pe.

³⁰ Jare opaete tenta guasu pegua reta pochi. Jáeramo uyembati reta, jare uípisi reta Pablo umbitiriri Tumpa jo güi oca pe. Jare jupivoiño Tumpa jo iyandarecoa reta uyuquenda onque reta. ³¹ Jayave yati vae reta uipota tēi uyuca Pablo. Ērei jerācua sundaro reta juvicha pe opaete Jerusalén pegua reta uyapo ñugüinoi tecoraí. ³² Jare jupivoiño jae osi ou yati vae reta coti sundaro reta jare sundaro reta juvicha reta ndive. Jare tenta guasu pegua reta uecha yave sundaro reta jare juvicha, oca'ā ma Pablo re. ³³ Jayave sundaro reta juvicha oo Pablo coti jare uípisi. Oyocui sundaro reta uñapīti vaerā mocui cadena pe. Jayave upirandu quía ra co jae jare mbae ra co uyapo. ³⁴ Amocue tenta guasu pegua reta iñeeāta, ērei oyovaque'ā iñee reta. Jare tecoraí jeco pegua sundaro reta juvicha ipuere'ā uicuaa mbae ra añete vae. Jáeramo oyocui sundaro reta güiraa vaerā Pablo jae reta yugüireco vae pe. ³⁵ Jare uyupi ñugüinoi yave sundaro reta yugüireco vae pe, sundaro reta ovoí güiraa Pablo, yati vae reta uipota uípisi ramo. ³⁶ Echa'ā opaete yati vae reta yugüiraa sundaro reta jaicue, jare iñeeāta reve jei:

—Tumano jocua cuimbae.

Pablo imiari tenta guasu pegua reta pe

³⁷ Jare sundaro reta uruiqueta ma yave yugüireco vae pe, Pablo jei sundaro reta juvicha pe:

—¿Nemañota pa mbae jae ndeve?

Jae jei Pablo pe:

—¿Ndicuaa pa griego iñee? ³⁸ Caramboe yave penti Egipto pegua omboemboe cuatro mil upuruyuca vae reta uñerāro vaerā mburuvicha reta ndive, jare güiraa ñana pe. ¿Nde pa co jae jocua Egipto pegua? —jei.

³⁹ Jayave Pablo jei chupe:

—Che co jae penti judío Tarso pegua. Jocua tenta guasu oí Cilicia pe, jare tuicha co. Emañeño tacheimiari tenta guasu pegua reta pe —jei.

⁴⁰ Jayave sundaro reta juvicha jei Pablo pe imiari vaerā. Jayave Pablo uyemboi ivate oí vae pe, jare umupūa ipo tenta guasu pegua reta coti. Jare opaete vae quíi yave, Pablo imiari chupe reta hebreo iñee pe. Jei chupe reta:

22

¹—Cherivi reta jare cheriquei reta, piyapisaca che jaeta peve chiyee vae re.

²Jare tenta guasu pegua reta uyandu yave jae imiari chupe reta hebreo iñee pe, opareve quii ngatu. Jayave Pablo jei chupe reta:

³—Che co jae penti judío. Aa Tarso Cilicia pegua pe, ěrei acuacuaa cua tenta guasu pe. Gamaliel chemboe cavi yandetenondegua reta iporoyocui re. Che aipota ayapo Tumpa jei vae, opaete pe reta añave pipota rami —jei—. ⁴ Che ayapo icavi mbae vae opaete Jesús re güirovia reve yugüireco vae reta pe. Jare aipisi amiingueca peresorirru pe cuimbae reta jare cuña reta. Ayucaca vi amocue vae —jei Pablo—. ⁵ Sacerdote tenondegua jare opaete tenta guasu pegua reta itenondegua reta ipuere umimbeu peve cheregua. Jae reta uicuatía umee cheve tupapire araa vaerã iru judío reta pe. Jayave aa Damasco coti, aipisi vaerã tēi Jesús re güirovia vae joco pe ñugüinoi vae reta, jare aru vaerã tēi Jerusalén pe, aiporaraca vaerã tēi chupe reta —jei—.

*Pablo jei quirãi güirovia Jesús re
(Hch 9.1-19; 26.12-18)*

⁶ ěrei che coiño ma Damasco güi aa yave, guarasi ara mbite rupi yave, aramoño penti tembipe tuicha vae ara güi jembipe cheré. ⁷ Jare aa ivi re, jare ayandu penti ñee jei cheve: ‘Saulo, Saulo, ¿maera pa ndiyapo icavi mbae vae cheve?’ ⁸ Jayave che jae: ‘¿Quía pa co nde, cheYa?’ Jayave jae jei cheve: ‘Che co jae Jesús Nazaret pegua. Nde ndiyapo icavi mbae vae cheve’ —jei, jei Pablo—. ⁹ Jare che ndive ñugüinoi vae reta uecha co tembipe, jare uquiye reta. ěrei uicuaa'ã mbae jei jocua uyemingueta cheve vae. ¹⁰ Jayave che apirandu: ‘¿Mbae pa ayapota, cheYa?’ Jare yandeYa jei cheve: ‘Epüa ecua Damasco pe, jare joco pe amimbeucata ndeve opaete mbae ndoyocuita jese vae’ —jei, jei—. ¹¹ Jayave che ndive ñugüinoi vae reta chepoco chereraa chereruvãe Damasco pe. Echa'ã chepuere'ã etei amae, jocua tembipe jembipe cheré vae jeco pegua —jei—. ¹² Jare ico joco pe penti cuimbae Ananías jee vae. Jae uipiu Tumpa mboroyocui uyapo reve, jare opaete judío joco pe yugüireco vae reta uyemingueta cavi jese. ¹³ Jae ou chepi. Uyemboi cheyipí pe jare jei: ‘Saulo, nde co jae cherivi. Emae ye.’ Jare jupivoiño chepuere amae, jare aecha Ananías joco pe oí —jei Pablo—. ¹⁴ Jayave jae jei cheve: ‘Yandetenondegua reta iTumpa ndeparavo, ndicuaa vaerã jae jei vae, jare ndeecha vaerã jocua jupi vae, jare ndiyandu vaerã iñee. ¹⁵ Echa'ã nemimbeuta co jesejua opaete ivi pegua reta pe. Nemimbeuta chupe reta ndeecha jare ndiyandu vae’ —jei, jei—. ¹⁶ ‘¿Maera pa añave neãro nei? Epüa iyembibautizaca ndiyerure reve chupe, nembraeyoa reta uyembai vaerã’ —jei, jei Pablo—.

Jesús omondo Pablo judío mbae vae reta pe

¹⁷ Jayave ayu ye Jerusalén pe, jare ayerure aĩ rambueve Tumpa jo pe, cheque pe aecha. ¹⁸ Jare aecha Jesús, jare jae jei cheve: ‘Ecuá imambae Jerusalén güi. Echa'ã ndarau uipota güirovia nde nemimbeuta cheregua chupe reta vae’ —jei cheve, jei—. ¹⁹ Jayave che jae chupe: ‘CheYa, jae reta uicuaa catu co quirãi che aase opaete judío reta itupao reta rupi añonoca vaerã peresorirru pe jare ainupaca vaerã nderé güirovia vae reta. ²⁰ Jare uyuaa reta yave Esteban nderegua umimbeu vae, che vi aĩ joco pe, jare icavi cheve imano. Jare che ayandareco upuruyuca vae reta jemimonde re’ —jae chupe, jei—. ²¹ Jayave jae jei cheve: ‘Ecuá. Echa'ã che nomondota mbiri judío mbae vae reta coti’ —jei cheve, jei.

Sundaro reta uipisi Pablo

²² Jare Pablo cua jei yave, tenta guasu pegua reta uipota'ã ma uyapisaca jese. Iñeeãta reve jei reta:

—Tumano jocua cuimbae. Echa'ã icavi'ã ico vaerã —jei reta.

²³ Jare iñeeãta reta rambueve, umbivava jemimonde, jare ivicui omombo ivate.

²⁴ Jayave sundaro reta juvicha oyocui sundaro reta uruique vaerã Pablo jae reta yugüireco vae pe. Jare oyocui vi uinupa reta vaerã chicote pe upirandu chupe reve, uicuaa cavi vaerã maera ra tenta guasu pegua reta iñeeãta jucuarãi icoti. ²⁵ ěrei sundaro reta uñapiti yave timasa pe, Pablo jei sundaro reta juvicha joco pe oí vae pe:

—¿Jupi pa pinupa vaerã penti romano peãa mbae reve?

²⁶ Cua uyandu yave, sundaro reta juvicha oo itenondegua pe jare jei chupe:

—¿Mbae pa ndiyapota? Echa'ã jocua cuimbae penti romano co.

²⁷ Jayave sundaro reta juvicha itenondegua ou Pablo oĩ vae pe jare jei chupe:

—Emimbeu cheve, ¿romano pa co nde?

Jayave Pablo jei chupe:

—Jae co che.

²⁸ Jayave sundaro reta juvicha itenondegua jei chupe:

—Che jeta ambiapi ayeyapo vaerã romanorã. Jayave Pablo jei chupe:

—Èrei che pipe voi aa.

²⁹ Jayave yugüiraa Pablo güi upiranduta tõi chupe vae reta. Jare sundaro reta juvicha itenondegua uquiye, uicuaa yave jae romano co, uñapĩtica ramo.

Pablo mburuvicha reta jovai

³⁰ Jare piareve pe sundaro reta juvicha itenondegua uipota uicuaa cavi mbae re ra judío reta umbijeco Pablo. Jáeramo oyora Pablo, jare oyocui sacerdote reta itenondegua reta jare opaete ñru mburuvicha reta uyembati vaerã. Jayave güiraa Pablo oñono jae reta jovai.

23

¹ Jayave Pablo umae ngatu mburuvicha reta re jare jei:

—Cheriquei reta, che jecuaeño aico cavi, chepia icavi anoi vaerã Tumpa coti.

² Jayave sacerdote tenondegua Ananías jee vae oyocui Pablo iyipi pe ñugüinoi vae reta ocua vaerã iyuru re. ³ Jayave Pablo jei chupe:

—Tumpa tocua nderé. Echa'ã nde co jae iguambi tĩ asi vae rami. Nde ndeguapi co neĩ cherãa vaerã mboroyocui jei vae rupi. Èrei ndiyavi mboroyocui. Echa'ã ndiyocui reta ocua vaerã cheré —jei.

⁴ Jayave joco pe ñugüinoi vae reta jei chupe:

—¿Maera pa nde ndere ñee icavi mbae vae Tumpa isacerdote tenondegua pe?

⁵ Jayave Pablo jei:

—Cheriquei reta, aicuaa'ã jae co sacerdote tenondegua. Echa'ã uyecuatía oĩ: 'Ndereta'ã ñee icavi mbae vae nderuvicha coti' —jei.

⁶ Jare Pablo uecha yave amocue jae reta saduceo reta jare amocue fariseo reta, iñeeãta reve jei mburuvicha reta ipite pe:

—Cheriquei reta, che co jae penti fariseo, jare cheru vi co jae penti fariseo. Che arovia amanocue vae reta icove yeta co. Cua jeco pegua pe reta cherãa peĩ —jei.

⁷ Jare cua jei yave, uyembiyao uyugüi yati vae reta, jare fariseo reta uyeaca saduceo reta ndive. ⁸ Echa'ã saduceo reta jei amanocue vae reta ndarau ma icove ye. Jei vi mbaeti co oĩ ángel jare espíritu. Èrei fariseo reta güirovia ime co. ⁹ Jare uyeaca reta uyupii. Jare upüa amocue fariseo pegua mboroyocui re oporomboe vae reta jare jei:

—Ore nuvãe'ã etei teco cua cuimbae re. Aramoi penti espíritu ani ángel imiari chupe. Agüiye yayovaicho Tumpa ndive —jei reta.

¹⁰ Jare jeiete uyeaca reta uyupii yave, sundaro reta juvicha itenondegua ipia pe uyemingueta aramoi uyucata reta Pablo, jare oyocui sundaro reta yugüeru vaerã güiraa Pablo jae reta ipite güi sundaro reta yugüireco vae pe.

¹¹ Jare piareve pe pĩtu yave yandeYa uyecuaa Pablo pe jare jei chupe:

—Iñemiatangãtu, Pablo. Chemimbeu ma Jerusalén pe. Chemimbeuta vi co Roma pe.

Judío reta uipota tõi uyuca Pablo

¹² Jayave piareve pe amocue judío reta uyemboemboe, jare uyepipeyu reve iyee jei ucayuta'ã jare jouta'ã i, uyuca regua Pablo. ¹³ Jare cuimbae cua jei uyepipeyu reve iyee vae reta cuarenta uasa. ¹⁴ Jayave jae reta yugüiraa sacerdote reta itenondegua reta jare tenta guasü pegua reta itenondegua reta pe jare jei chupe reta:

—Ore ndoe ma nduyepipeyu reve oriye nducaruta'ã, nduyuca regua Pablo. ¹⁵ Jáeramo pe reta ñru mburuvicha reta ndive pemimbeu sundaro reta juvicha itenondegua pe tugüeru Pablo peve piareve. Jae ipia pe uyemingueta tẽita pe reta pipota pepirandu cavi ete chupe mbae uyapo vae re. Jayave ore nucuatĩrota noĩ jese nduyuca vaerã, ndei ou uvãe mbove —jei reta.

¹⁶ Èrei Pablo jindi imembi cuimbae vae uicuaa yave jae reta ucuatĩrota Pablo re vae, oo uique sundaro reta yugüireco vae pe, jare umimbeu Pablo pe.

¹⁷ Jayave Pablo ueni sundaro reta juvicha jare jei chupe:

—Eraa cua cunumi nderuvicha pe. Echa'ã uipota mbae umimbeu chupe —jei.

¹⁸ Jayave sundaro reta juvicha güiraa cunumi juvicha tenondegua vae pe, jare jei chupe:

—Pablo uyepisi õi vae chereni, jare chemiñera aru vaerã ndepi cua cunumi. Echa'ã uipota mbae umimbeu ndeve —jei.

¹⁹ Jayave sundaro reta juvicha itenondegua uipisi cunumi ipo pe, jare güiraa ñru vae reta ñugüinoi vae güi. Jayave upirandu chupe:

—¿Mbae pa nemimbeuta cheve?

²⁰ Jayave cunumi jei chupe:

—Judío reta uyemboeboe ma, jare nemiñerata Pablo nderaaca vaerã curiye mburuvicha reta pe. Uipota nde ndepia pe ndiyemingueta tõi vaerã jae reta upirandu cavi eteta chupe mbae uyapo vae re —jei—. ²¹ Èrei agüiye erovia. Echa'ã judío reta ucuatírota jese. Jae reta cuarenta uasa. Jei reta uyepipeyu reve iyee ucaruta'ã jare jouta'ã i, uyuca regua Pablo. Jare añave uãro ñugüinoi, aramoi nderaaca pegua —jei chupe.

²² Jayave sundaro reta juvicha itenondegua jei cunumi pe:

—Agüiye emimbeu quía pe cua nemimbeu cheve vae.

Jayave omondo cunumi.

Omondo reta Pablo mburuvicha guasu Félix jee vae pe

²³ Jayave sundaro reta juvicha itenondegua ueni mocui sundaro reta juvicha jare jei chupe reta:

—Piyapicatu cavi doscientos sundaro reta, jare setenta sundaro cavayu re opo vae reta, jare doscientos sundaro güiraa ui vae reta, yugüiraa vaerã Cesarea pe nueve ora ma pïtu yave. ²⁴ Jare peeca Pablo opo vaerã, peraa cavi vaerã mburuvicha guasu Félix pe —jei chupe reta.

²⁵ Jayave jae uicuatía penti tupapire pe cuarãi: ²⁶ “Félix. Nde co jae mburuvicha guasu uyembutuichaca vae. Che co jae Claudio Lisias. Numbisaluda. ²⁷ Judío reta uipisi cua cuimbae, jare uyucata tõi. Jayave che aa sundaro reta ndive aepi chugüi reta. Echa'ã jerãcua cheve jae romano co. ²⁸ Jare aipota aicuaa maera ra jae reta umbijeco. Jáeramo araa judío reta juvicha reta upuruãa vae pe. ²⁹ Joco pe aicuaa jae reta umbijeco iporoyocui re. Èrei jae uyapo'ã teco umano vaerã ani õi vaerã peresorirru pe. ³⁰ Èrei jerãcua cheve judío reta ucuatírota jese. Jáeramo jupivoiño amondo ndecoti. Jare ayocui umbijeco vae reta uñeapo vaerã jese ndeve teco uyapo chupe reta vae re. Jaeño ma.” Jucuarãi uicuatía.

³¹ Jayave pïtu yave sundaro reta güiraa Pablo tenta guasu Antípatris pe, juvicha oyocui rami. ³² Jayave piareve pe sundaro cavayu re opo vae reta güiraa Pablo, jare ñru sundaro reta yugüeru ye yugüireco vae pe. ³³ Jare yugüiraa uvãe yave Cesarea pe, sundaro reta umee Pablo tupapire reve mburuvicha guasu pe. ³⁴ Jare opa umingueta yave tupapire, mburuvicha guasu upirandu Pablo pe quía tenta guasu pegua ra co jae. Jare uicuaa yave Cilicia pegua co, ³⁵ jei Pablo pe:

—Tayapisaca nderé, yugüeru yave nembijeco vae reta.

Jayave oyocui sundaro reta uyandareco vaerã jese mburuvicha Herodes jenta pe.

24

Pablo imiari Félix pe

¹ Pandepo ara ma uasa yave, yugüeru sacerdote tenondegua Ananías, amocue tenta guasu pegua reta itenondegua reta jare penti cuimbae Tértulo jee vae. Cua cuimbae iyaracuaa catu uyemingueta vaerã. Jae reta uñeapo Pablo re mburuvicha pe. ² Jare Pablo uñerani ma yave, Tértulo umbipi umbijeco Pablo. Jae jei Félix pe:

—Ndereco pegua orepiacatu nduico. Ndearacuaa jeco pegua ndeporoyocui cavi jeta mbaembae re oreivi pe. ³ Nde co jae oreruvicha numbutuicha vae. Opaete que rupi jecuaeño nduyapo yasurupai ndeve opaete cua re —jei—. ⁴ Ndepiacavi ramo, numñera ndiyapisaca vaerã oriñee re michi peguaño, agüiye vaerã numambeco mbatee —jei—. ⁵ Echa'ã nduicuaa ma cua cuimbae upurumbiavaï penti mbaerasi rami. Jae omboemboe judío opaete ivi rupi ñugüinoi vae reta. Jare jae co penti nazareno pegua reta itenondegua —jei Tértulo Félix pe—. ⁶ Jae uipota vi uyapo jupi mbae vae Tumpa jo

pe. Ērei ore nduipisi, jare nuāata tēi oreporoyocui pe uyecuatía oī vae rupi. ⁷Ērei sundaro reta juvicha itenondegua Lisias ou umiāta oregüi jare upiŕo güiraa oregüi. ⁸Jare oyocui umbijeco vae reta yugüeru vaerā ndepi. Nde etei neāa yave, ndicuaata opaete numbijeco vae —jei.

⁹Judío reta vi jei añete co opaete cua mbaembae. ¹⁰Jayave mburuvicha guasu upuvēe Pablo re uyemingueta vaerā. Jayave Pablo jei:

—Che aicuaa catu co nde ima ete ma neāa cua ivi pegua reta. Jáeramo ayerovia reve chemiarita ayerepi vaerā —jei—. ¹¹Nde ndepuere ndicuaa rami, doce ara ramo aa güive Jerusalen pe, ambiadora vaerā Tumpa. ¹²Jare cua reta cherecha'ā ayeaca quía ndive, ani amboembeo tenta guasu pegua reta Tumpa jo pe, ani itupao reta pe, ani tenta guasu rupi —jei—. ¹³Añete chembijeco ma cua mbaembae re. Ērei mbaeti mbae añete vae ipuere umimbeu ndeve cua mbaembae re —jei Pablo—. ¹⁴Ērei cua amimbeu ndeve. Che aico Jesús re arovia reve, jare jucarāi ayeyocui chetenondegua reta iTumpa pe, yepe tēi judío reta jei aico penti moromboe añete mbae vae re. Echa'ā che arovia opaete mboroyocui pe uyecuatía oī vae, jare Tumpa iñee aracae umimbeu vae reta uicuatiaue —jei—. ¹⁵Che arovia Tumpa umbijecove yeta co umanocue vae reta. Jae umbijecoveta jupi vae reta jare jupi mbae vae reta. Jucarāi cua reta güirovia vi. ¹⁶Jáeramo che jecuaño aipota chepia icavi anoi vaerā Tumpa coti jare ivi pegua reta coti —jei—.

¹⁷Che mbovi año ma aico'ā cheivi pe. Jaeramo ayu ye, corepoti aru vaerā iparavete vae reta peguarā jare Tumpa peguarā. ¹⁸Jare cua ayapo añ rambueve, amocue Asia pegua judío reta cherecha Tumpa jo pe. Joco pe ayeyoe añ Tumpa coti mboroyocui jei rami. Ayembati'ā co jeta vae ndive. Ayapo'ā vi teorai —jei—. ¹⁹icavi tēi co jocua judío reta yugüeru vaerā cua pe uñeapo cheré ndeve, ime yave mbae chembijeco jese vae —jei Pablo Félix pe—. ²⁰Cua reta etei tumimbeu ndeve mbae nunga teco uvāe cheré, mburuvicha reta jovai ayemboi yave. ²¹Aramoi jaeño penti mbae re ipuere chembijeco. Mburuvicha reta ipite pe añ rambueve, chiñeeāta reve jae: 'Umanocue vae reta icove yeta vae re pe reta cherāa pei cua ara.' Jucarāi jae —jei.

²²Jare Félix cua uyandu yave, oyopia judío reta. Echa'ā jae uicuaa catu Jesús re güirovia vae reta ipurugüirovia regua. Jáeramo jei judío reta pe:

—Sundaro reta juvicha itenondegua Lisias ou yave, añata cua pemimbeu cheve vae re.

²³Jayave Félix oyocui sundaro reta juvicha uyandareco vaerā Pablo re. Ērei oyocui vi umaño vaerā icoiño, jare agüiye vaerā oyopia jentarā reta, ou yave ipi uyeyocui chupe vaerā.

²⁴Mbovi ara rupi Félix ou jembireco Drusila jee vae ndive. Drusila co jae penti judía. Jayave Félix ueni Pablo, jare uyapisaca quirāi yaroviata co Jesucristo re vae re. ²⁵Jare Pablo jei chupe quirāi icavi yayapo vaerā jupi vae, jare yayopia vaerā yanderete uipota vae güi, jare quirāi Tumpa uāata ivi pegua reta. Jayave Félix uquiye jare jei Pablo pe:

—Ecuano rani. Chepuere yave, turueni ye curi.

²⁶Ērei Félix uipota tēi vi Pablo umee vaerā corepoti chupe, oyoraca vaerā. Jáeramo güeruruca aveiño, uyemingueta vaerā jae ndive. ²⁷Ērei mocui año ma uasa yave, Porcio Festo ou uipepica Félix. Jare Félix uipota umbiyerovia judío reta ramo, ueya Pablo peresoriru pe.

25

Pablo uipota oo mburuvicha guasu César jee vae pe

¹Festo ou uvāe yave jocua ivi pe, mbapi ara ma uasa yave, oo Cesarea güi Jerusalén pe. ²Jayave sacerdote reta itenondegua reta jare judío reta itenondegua reta imiari chupe Pablo jeco re, jare umiñera ³uyapo vaerā icavi vae chupe reta, güeruruca vaerā Pablo Jerusalén pe. Jare jae reta ucuatírota jese tape rupi, uyuca vaerā tēi. ⁴Ērei Festo jei chupe reta:

—Ore nduyandareco noī Pablo re Cesarea pe, jare che aata joco pe curi. ⁵Pepuere yave, pecua cherupíe. Jare uyapo yave teco icavi mbae vae jocua cuimbae, piñeapo jese —jei chupe reta.

⁶Jayave Festo upita yave joco pe aramoi ocho ani diez ara, ou ye Cesarea pe. Jayave piareve pe uguapi upuruāa vae pe, jare güeruruca Pablo. ⁷Jare Pablo ou ma yave, judío Jerusalén güi yugüeru vae reta uyemboi Pablo iyipi rupi jare umbijeco jeta icavi mbae

vae re. Ērei ipuere'ā uicuaaca cua teco uipota omboya jese vae añete co. ⁸ Jayave Pablo jei uyerepi vaerā:

—Ayovaicho'ā etei judío reta iporoyocui ndive, ani Tumpa jo ndive, ani César ndive.

⁹ Ērei Festo uipota umbiyerovia judío reta. Jáeramo upirandu Pablo pe:

—¿Ndipota pa ndeo Jerusalén pe, che nuāa vaerā joco pe cua teco reta re?

¹⁰ Ērei Pablo jei chupe:

—César ndeocui nepuruāa vaerā, jare icavi co nde cherāa vaerā cua pe. Ayapo'ā etei teco judío reta coti. Nde etei ndicuaa cua —jei—. ¹¹ Ime yave teco ayapo icoti, ani ime yave mbae ayapo amano vaerā, ndarau ayerure ndeve ayerepi vaerā mano güi. Ērei cua teco uipota omboya cheré vae ayapo'ā yave, ndarau quía ipuere chemee chupe reta. Aipota César cherāa vaerā —jei chupe.

¹² Jayave Festo uyemingueta ĩru mburuvicha reta ndive. Jayave jei Pablo pe:

—Ndipota César nerāa vaerā. César pe ndeota —jei.

Pablo Agripa jare Berenice jovai

¹³ Jare mbovi ara ma uasa yave, mburuvicha guasu Agripa jare jindi Berenice yugüeru Cesarea pe, umbisaluda vaerā Festo. ¹⁴ Jare mbovi ara ma joco pe ñugüinoi yave, Festo umimbeu mburuvicha guasu pe Pablo regua. Jei chupe:

—Ime cua pe oĩ penti cuimbae Félix ueya peresoriruru pe vae. ¹⁵ Jerusalén pe aa yave, judío pegua sacerdote reta itenondegua reta jare tenta guasu pegua reta itenondegua reta umimbeu cheve cua cuimbae regua. Jae reta chemiñera che jae vaerā icavi co uyeyucaca vaerā —jei—. ¹⁶ Ērei che jae chupe reta: 'Romano reta uyepocua'ā umee vaerā quía, ndei umbijeco vae reta yugüeru uñeapo jese mbove jare ndei uyerepi umbijeco vae reta güi mbove' —jare chupe reta, jei—. ¹⁷ Jáeramo jae reta yugüeru uvāe yave, aāro'ā. Piareve pe aguapi apuruāa vae pe, jare aruruca jocua cuimbae —jei—. ¹⁸ Jare umbijeco vae reta joco pe ñugüinoi, ērei umimbeu'ā cheve jocua nunga teco che chepia pe ayemingueta tēi omboyata jese vae. ¹⁹ Jaeño umbijeco reta jae ipurugüirovia re, jare penti cuimbae Jesús jee vae re. Jocua Jesús umano ma. Ērei Pablo jei icove ye co —jei—. ²⁰ Che aicuaa'ā mbae ra ayapota cua re. Jáeramo apirandu Pablo pe uipota ra oo Jerusalén pe, joco pe che aāa vaerā cua mbaembae re. ²¹ Ērei Pablo uipota nduyandareco vaerā jese, Augusto uāa vaerā. Jáeramo ayocui sundaro reta uyandareco vaerā jese, César pe chepuere amondo regua —jei.

²² Jayave Agripa jei Festo pe:

—Che vi aipota ayapisaca jocua cuimbae re.

Jayave Festo jei chupe:

—Curiye ndiyapisacata jese.

²³ Jayave piareve pe Agripa jare Berenice yugüeru jemimonde ipōra vae ndive, jare uique reta Festo upuruāa vae pe sundaro reta juvicha itenondegua reta jare tenta guasu pegua reta itenondegua reta ndive. Jayave Festo oyocui güeru vaerā Pablo. ²⁴ Jayave Festo jei:

—Mburuvicha guasu Agripa, jare opaete pe reta cua pe peĩ vae, co oĩ cua cuimbae. Opaete judío Jerusalén pegua reta jare cua pegua reta chemiñera ineeāta reve jae umano vaerā —jei—. ²⁵ Ērei che avāe'ā teco jese umano vaerā. Jare jae etei uipota mburuvicha guasu Augusto uāa vaerā. Jáeramo chepia pe ayemingueta ma amondo vaerā icoti —jei—. ²⁶ Ērei aicuaa'ā mbae ra aicuatiata cheruvicha pe. Jáeramo aruruca perovai, jare nderovai etei, mburuvicha guasu Agripa, aicuaa vaerā mbae ra aicuatiata, opa yapirandu chupe yave —jei chupe reta—. ²⁷ Echa'ā icavi'ā co yamondo vaerā penti pereso yamimbeu mbae reve mbae pereso re uñeapo vae reta umbijeco jese vae —jei.

26

Pablo imiari Agripa pe

¹ Jayave Agripa jei Pablo pe: —Ndepuere nemiari ndiyee.

Jayave Pablo umupūa ipo, jare cuarāi imiari iyee:

² —Mburuvicha guasu Agripa, ayerovia quirāi añave chemiarita chiye nderovai opaete judío reta chembijeco vae re. ³ Echa'ā nde ndicuaa catu opaete judío reta iyemboe jare iyeca. Jáeramo numiñera ndiyapisaca vaerā cheré ndepiaquirēi reve —jei—.

Quirāi Pablo uyapo ndei güirovia Jesús re mbove

⁴ Chetairusu güive aico cherentarā reta ndive Jerusalén pe, jare judío reta uicuaa catu quirāi aico. ⁵ Jae reta uicuaa catu vi quirāi iyipi güive che aico moromboe fariseo pegua re. Cua moromboe pegua reta uipota yayapo cavi ete vaerā iporomboe jei vae. Jae reta ipuere chemimbeu ndeve, uipota yave —jei—. ⁶ Jare añave che arovia Tumpa uyapota co yandetenondegua reta pe jei chupe vae. Jáeramo judío reta uñeapo cheré —jei Pablo—. ⁷ Jare jocua doce yandetenondegua reta inemoñaeta vi güirovia Tumpa uyapota co jei chupe vae. Jáeramo uyeyocui reta Tumpa pe iquirēi reve ara rupi jare p̄itu rupi. Mburuvicha guasu Agripa, cua che arovia ramo, judío reta chembijeco —jei—. ⁸ ¿Maera pa perovia'ā Tumpa ipuere umbijecove ye umanocue vae reta? —jei chupe reta—.

Pablo uyapo icavi mbae vae upurugüirovia vae reta pe

⁹ Che chepia pe ayemingueta tēi icavi co ayapo vaerā jeta icavi mbae vae Jesús Nazaret pegua re güirovia vae reta coti. ¹⁰ Jare jucuarāi ayapo Jerusalén pe. Sacerdote reta itenondegua reta mbaepuere umee cheve yave, añoño peresoriru pe jeta upurugüirovia vae reta. Jare ndei uyeyucaca mbove, che jae vi umanota co reta —jei—. ¹¹ Jare jeta ainupaca opaete judío reta itupao reta rupi, jare aipota jae reta jei vaerā icavi mbae vae Jesús coti. Jare chepochi ete ma chupe reta ramo, ayapo icavi mbae vae chupe reta tenta guasu ambie vae reta rupi —jei—.

*Pablo jei quirāi güirovia Jesús re
(Hch 9.1-19; 22.6-16)*

¹² Cua ayapo aico rambueve, sacerdote reta itenondegua reta umee cheve mbaepuere chemondo Damasco coti. ¹³ Jare guarasi ara mbite ma oī yave tape rupi aa rambueve, mburuvicha guasu, aecha penti tembipe ara güi jembipe ete guarasi güi vae. Jembipe cheré jare cherupie yugüiraa vae reta re —jei—. ¹⁴ Jare opareve ndoa ivi re, jare che ayandu penti ñee hebreo ñee pe jei cheve: 'Saulo, Saulo, ¿maera pa ndiyapo icavi mbae vae cheve? Nde co jae penti güeye ivira jacuarovi vae re upatara vae rami. Jáeramo ndiporara neī —jei cheve, jei—. ¹⁵ Jayave che apirandu: '¿Quía pa co nde, cheYa?' Jare yandeYa jei: 'Che co jae Jesús. Nde ndiyapo icavi mbae vae cheve. ¹⁶ Ērei ep̄ia iyemboi. Che aipota ndiyeyocui vaerā cheve, jare nemimbeu vaerā aicuaaca ndeve jare aicuaacata ndeve vae. Echa'ā cua jeco pegua ayecuaa ndeve' —jei, jei Pablo—. ¹⁷ Jare che nduepita nerentaigua reta güi jare judío mbae vae reta güi. Echa'ā nomondota icoti, ¹⁸ nemimae reta vaerā, jare uyerova reta vaerā p̄itumimbi güi tembipe coti, jare Satanás güi Tumpa coti. Cua uyapo reta yave, Tumpa umbiasata chupe reta imbaeyoa reta cheré güirovia ramo, jare umeeta chupe reta imbaerā ĩru uñeñoño tee Tumpa peguarā vae reta ndive' —jei, jei—.

Pablo uyapo Jesús oyocui vae

¹⁹ Jáeramo, mburuvicha guasu Agripa, cheatēi'ā ayapo vaerā Tumpa uicuaaca cheve ayapo vaerā vae. ²⁰ Echa'ā tenonde amimbeu Damasco pegua reta pe. Jayave amimbeu vi Jerusalén pegua reta pe, opaete Judea pegua reta pe jare judío mbae vae reta pe. Amimbeu chupe reta ueya vaerā iyemingueta icavi mbae vae ipia pe oī vae, jare uyerova vaerā Tumpa coti. Amimbeu vi chupe reta uyapo vaerā icavi vae, ĩru vae reta uicuaa vaerā ueya ma co iyemingueta icavi mbae vae ipia pe oī vae —jei—. ²¹ Cua jeco pegua, amocue judío reta chepisi Tumpa jo pe, jare uipota tēi cheyuca. ²² Ērei Tumpa chembori ramo, imeño aico cua ara. Moisés jare ĩru Tumpa ñee aracae umimbeu vae reta jei uyeyapota vae re. Jocuaño che vi amimbeu sambiai reta jare ucuaacua vae reta pe —jei—. ²³ Echa'ā jae reta jei Cristo uiporarañotai co, jare jae tenonde icove yeta co ou umanocue vae reta ipite güi, uechaca vaerā tembipe judío reta jare judío mbae vae reta pe —jei Pablo chupe reta.

Pablo jei tēi Agripa pe upurugüirovia vaerā

²⁴ Jare Pablo jucuarāi imiari iyee yave, Festo ñeeēata reve jei:
—Pablo, nembiquere ma. Jeta mbaembae re ndiyemboe ramo, nembiquere ma —jei chupe.

²⁵ Ērei Pablo jei chupe:

—Chembiquere'a co, mburuvicha guasu Festo. Che jae ndeve vae añete vae jare aracuaa pegua co —jei—. ²⁶ Echa'a mburuvicha guasu Agripa uicuaa catu cua mbaembae regua, jare chepuere chemiari chupe aipiu mbae reve. Aicuaa jae uicuaa catu cua mbaembae regua. Echa'a cua uyeyapo viari'a —jei chupe—. ²⁷ Mburuvicha guasu Agripa, ¿nderovia pa Tumpa iñee aracae umimbeu vae reta uicuatiaque? Che aicuaa nderovia co —jei Agripa pe.

²⁸ Jayave Agripa jei Pablo pe:

—Ndipota tēi ndipo imambae cheapo cristianorā.

²⁹ Jayave Pablo jei chupe:

—Ayerure Tumpa pe, imambae ani ima pe, nde jare opaete ĩru añave uyapisaca cheré vae reta piyeyapo vaerā che rami, ěrei agüiye vaerā penoi cua nunga cadena —jei.

³⁰ Jare Pablo jucuarāi jei ma yave, uyemboi reta mburuvicha guasu Agripa, mburuvicha guasu Festo, Berenice jare jae reta ndive uguapi ñugüinoi vae reta. ³¹ Jare oē reta oca pe yave, jei uyupe:

—Cua cuimbae uyapo'a mbae umano vaerā ani oī vaerā peresoriru pe.

³² Jare Agripa jei Festo pe:

—Yayorata tēi cua cuimbae, uipota'a yave César uāa vaerā.

27

Omondo reta Pablo Roma pe

¹ Jare mburuvicha reta ipia pe uyemingueta ma yave icavi co ndoo vaerā ivi Italia pe, umee reta Pablo jare amocue ĩru pereso reta sundaro reta juvicha Julio jee vae pe. Jae co penti ati Augusto jee vae pegua. ² Jare ndoo joco güi penti chalana guasu tenta guasu Adramitio pegua pe. Cua oota Asia pegua tenta guasu i guasu jembei pe ñugüinoi vae reta pe. Jare oo orerupie Aristarco Tesalónica pegua. Tesalónica ivi Macedonia pegua co. ³ Piareve pe ndoo nuvāe tenta guasu Sidón pe. Jare Julio ipiacavi Pablo pe. Jáeramo umaño jese oo vaerā opou ĩru reta pe, jae reta uyandareco vaerā jese. ⁴ Jayave joco güi ndoo ye i guasu rupi, jare nduasa Chipre icupe rupi, agüiye vaerā ivitu orerovāiti. ⁵ Jayave nduasa i guasu Cilicia jare Panfilia jovai oī vae rupi, jare ndoo nuvāe tenta guasu Mira pe. Mira ivi Licia pegua co.

⁶ Jare joco pe sundaro reta juvicha uvāe penti chalana guasu Alejandría pegua oota Italia coti vae pe, jare pipe orembuyupi. ⁷ Jeta ara ndoo ndeve, jare yavai ete ndoo vaerā nuvāe tenta guasu Gnido jovai, ivitu orerovāiti ramo. Jare Gnido güi ndoo ivi Creta icupe rupi ivi Salmón jovai. ⁸ Jare ndoo ivi iyipi rupi, ěrei yavai ete ndoo vaerā nuvāe Buenos Puertos pe. Cua güi coño oī tenta guasu Lasea.

⁹ Jare ima ete ma nduguata ramo, icavi'a ma ndoo ye vaerā i guasu rupi. Echa'a uyaro ma roi vaerā, jare jocua yasi reta rupi uguata'a chalana guasu reta. Jayave Pablo umbiaracuaa jei:

¹⁰ —Cherivi reta, yaaño yave, che aicuaa ucañita co tivita reta jare chalana guasu, jare yande vi aramoi ñamanota —jei.

¹¹ Ęrei sundaro reta juvicha güirovia chalana guasu uruguata vae reta juvicha jare chalana guasu iya Pablo güi. ¹² Jare jocua chalana uñeapitiarenda i guasu jembei pe icavi'a ndupita vaerā opaete roi guasu iara reta uasa regua. Jáeramo jeta ore ndive ñugüinoi vae reta umbiaracuaa ndoo vaerā joco güi. Jei reta aramoi orepuereta ndoo nuvāe tenta guasu Fenice pe, ndupita vaerā joco pe roi guasu iara pegua. Fenice co jae penti chalana uñeapitiarenda Creta pegua. Joco güi i guasu uyecuaa guarasi oē vae coti.

Ivitu tanta vae i guasu pe

¹³ Jare ivitu umbipi uyepeyu ndeve catu sur coti güi yave, jae reta jei tēi icavita ndoo vaerā. Jayave chalana guasu uruguata vae reta uupi chalana iyepitasoca, jare ndoo Creta iyipi rupi coño ivi güi. ¹⁴ Ęrei ndei ima mbove uñeovāiti chalana guasu ndive tanta ivitu cusumirón ndive Euroclidón jee vae. ¹⁵ Jare ivitu uipota umbiyerova chalana guasu, jare orepuere'a ma numisimi ivitu coti. Jayave numaeño ivitu re orereraa vaerā. ¹⁶ Jayave ndoo yave ivi michi vae Claudia icupe rupi, añapea nduupi chalana-rai chalana guasu jaicue numbitiriri ndugüiraa vae. ¹⁷ Jare nduupi ma yave chalana guasu pe, chalana guasu uruguata vae reta oyocua chalana guasu piola pe. Jare ipia pe uyemingueta

aramoi oota upāa Sirte jee vae pe, jare uquiye reta. Echa'ā Sirte pe i tipi'ā co. Jáeramo umbigüeyi reta ivitu umiaña chalana guasu pipe vae tuicha vae ivate güi. Jare jucuarāi ivitu orereraa. ¹⁸Jare jecuaeño tanta ete ivitu oreve. Jáeramo piareve pe chalana guasu uruguata vae reta umbipi omombo tivita reta. ¹⁹Jare mbapi ara uasa ma yave orepo pe etei nomombe jocua ivitu umiaña chalana guasu pipe vae ivate güi umbigüeyi reta vae. ²⁰Uyecuaa'ā guarasi jare yasitata jeta ara ma, jare jecuaeño tanta ivitu oreve. Nduicuaa'ā ma quirāi nduyembiasa vaerā.

²¹Jare ima ma nducaru'ā yave, Pablo uyemboi orepite pe jare jei:

—Cuimbae reta, piyapisacata tēi co chiñee re, agüiye vaerā tēi yayu Creta güi pemicañi cua mbaembae. ²²Ērei añave che jae peve piñemiatangātu vaerā. Echa'ā ndarau quía umano pepite pe. Jaeño chalana guasu ucañita —jei—. ²³Echa'ā piare uyecuaa cheve penti ángel Tumpa pe uyeyocui vae. Che co jae Tumpa imbae, jare chupe ayeyocui —jei Pablo—. ²⁴Ángel jei cheve: 'Pablo, agüiye equiye. Ndeñoñotai co ndiyemboi César jovai. Jare Tumpa ipiacavi nde ndive ramo, uepita vi opaete cua nderupíe yugüiraa vae reta' —jei cheve, jei—. ²⁵Jáeramo, cuimbae reta, piñemiatangātu. Echa'ā che arovia Tumpa, jare jae jei cheve vae uyeyapota co. ²⁶Ērei yaañotai co ñavāe penti ivi oī vae pe —jei.

²⁷Jare catorce ara uasa ma yave, ivitu orereraa rambueve i guasu Adriático rupi, piare catu yave chalana guasu uruguata vae reta uicuaa coiño ma yugüiraa ivi güi. ²⁸Jayave umbigüeyi i tipi pe umiaanga vaerā, jare uicuaa i tipicue oī treinta y seis metro rupi. Jare ndoo catu ye ma yave, umiaanga ye, jare uicuaa i tipicue oī veintisiete metro rupi. ²⁹Jayave ipia pe uyemingueta aramoi upāata ita reta re, jare uquiye reta. Jayave umbigüeyi reta chalana guasu jaicue coti irundi chalana iyepitasoca reta. Jare uipota echa ma cōe vaerā tēi chupe reta. ³⁰Jare chalana guasu uruguata vae reta uipota tēi osi chalana guasu güi. Jáeramo umbigüeyi chalana-rai i pe. Uipota ĩru reta ipia pe uyemingueta vaerā jae reta umbigüeyita chalana guasu jenonde coti chalana iyepitasoca reta. ³¹Jayave Pablo jei sundaro reta juvicha jare sundaro reta pe:

—Cua reta upita'ā yave chalana guasu pe, ndarau pepuere piyembiasa.

³²Jayave sundaro reta uyasia chalana-rai ichā, jare umaeño oo ucañi.

³³Jare cōeta ma yave, Pablo umbiaracuaa opaete joco pe ñugüinoi vae reta ucaru vaerā. Jei chupe reta:

—Catorce ara ma piyemipia'ā, jare pecaru'ā. ³⁴Jáeramo che pumiñera pecaru, pepirāta vaerā. Echa'ā ndarau ucañi pea ave peāca güi —jei.

³⁵Jare cua jei yave, uipisi mbiyape, jare umee yasurupai Tumpa pe opaete vae jovaque. Jayave upisāa mbiyape jare jou. ³⁶Jayave opaete jae reta uñemiatangātu, jare ucaru reta vi. ³⁷Jare opaete nduico chalana guasu pe vae co doscientos setenta y seis. ³⁸Jare opareve iyangapii yave, omombo reta trigo i pe, jare jucuarāi umbivevi chalana guasu.

Chalana guasu icumegua

³⁹Jare cōe ma yave, uicuaa'ā reta jocua ivi. Ērei uecha reta penti i jugua jare ivi ipecavi joco pe. Jáeramo jocoti uipota reta omondo chalana guasu, ipuere yave. ⁴⁰Jayave jae reta omombo ueya i pe chalana iyepitasoca reta, jare umungúe timón ichā. Jayave uupi ivitu umiaña chalana guasu pipe vae michi vae, jare güiraa i jembei coti. ⁴¹Jayave chalana guasu oo uyererocua ivicüiti re upāa ndei oo uvāe i jugua pe mbove. Echa'ā joco pe i uyuaa oī. Jare chalana guasu ití uyeatica upita, jare omi'ā ye. Jayave i yacarachi ete ramo, oyoca chalana guasu jaicue coti. ⁴²Jare sundaro reta uipota tēi uyuca pereso reta, agüiye vaerā quía osi, uítai yave. ⁴³Ērei sundaro reta juvicha uipota uepi Pablo. Jáeramo jei sundaro reta pe agüiye vaerā uyuca reta. Oyocui ipuere uítai vae reta rani oa vaerā i pe, yugüiraa vaerā uvāe ivi pe. ⁴⁴Jare oyocui ĩru reta yugüiraa vaerā ivirape re ani ipotave chalana guasu pe oī vae re. Jare jucuarāi opareve yugüiraa cavi uvāe ivi pe.

Pablo Malta pe

¹Opareve noē ma ivi pe yave, nduicuaa jocua ivi jee Malta. ²Jare joco pegua reta ipiacavi oreve. Echa'ā orembiresive cavi, jare uyatapi, ama oqui jare roi ramo. ³Jare Pablo umbati yepea, jare oñono tata pe. Jayave penti mboi tata güi oē osi, jare uñemama

Pablo ipo re, uichuu yave. ⁴Jare joco pegua reta uecha yave mboi usagüügüi oī Pablo ipo re, jei reta uyupe:

—Añetete yepe cua cuimbae upuruyuca vae. Yepe tēi umano'ā i guasu pe, ěrei ndarau ipuere icoiño, jupi'ā ramo.

⁵Ĕrei Pablo umitimo ipo güi mboi tata pe, jare uyeyapo'ā mbae chupe. ⁶Jare joco pegua reta ipia pe uyemingueta tēi iruruta ani aramoi oata jare umanota. Ĕrei jae reta uāro tēi ma ima yave, uecha uyeyapo'ā mbae chupe. Jayave jae reta jei'ā ma tenonde rami. Jei reta ma:

—Cua cuimbae penti tumpa co.

⁷Jare jocua ivi pegua reta juvicha Publio jee vae güinoi jocoropi iivi reta. Jae orembiresive cavi, jare oremingaru mbapi ara. ⁸Jare Publio tu imbaerasi oī jupa pe. Jacu jare jepotiugüi. Pablo oo umae jese. Jare uyerure Tumpa pe yave, oñono ipo jese, jare umbigüera. ⁹Jare cua uyeyapo yave, ĩru imbaerasi vae jocua ivi pegua reta yugüeru, jare Pablo umbigüera vi. ¹⁰Jayave jae reta umeei oreve jeta mbaembae. Jare nduyupi ye yave chalana guasu pe, umbuyupi vi oreve mbaembae nduipota vae.

Pablo oo uvāe Roma pe

¹¹Jare mbapi yasi ma uasa yave, ndoo joco güi penti chalana guasu Alejandría pegua pe. Cua chalana guasu upita jocua ivi pe, roi iara umbiasa vaerā. Chalana guasu itī re ñugüinoi choguaquiri-raanga ivira pegua Cástor jare Pólux jee vae. ¹²Jayave ndoo nuvāe tenta guasu Siracusa pe, jare ndupita joco pe mbapi ara. ¹³Jayave joco güi nduyere jare ndoo nuvāe tenta guasu Regio pe. Jayave piareve pe ivitu uyepyu sur coti güi, jare piareve ye pe ndoo nuvāe tenta guasu Puteoli pe. ¹⁴Jare joco pe nuñevāe upurugüirovia vae reta ndive. Jare jae reta uparea oreve ndupita vaerā jae reta ndive siete ara pegua. Jare joco güi ndoo tenta guasu Roma coti. ¹⁵Jare orererācua upurugüirovia vae Roma pegua reta pe, jare amocue jae reta yugüeru orerovāiti Foro Apio pe, jare ĩru vae reta yugüeru orerovāiti Tres Tabernas pe. Jare Pablo uecha yave cua reta, umee yasurupai Tumpa pe, jare uñemiatangātu. ¹⁶Jare ndoo nuvāe yave Roma pe, sundaro reta juvicha umee pereso reta penti sundaro reta juvicha tenondegua vae pe. Ĕrei umaño Pablo re icoiño vaerā penti sundaro uyandareco jese vae ndive.

Pablo umimbeu ñee icavi vae Roma pe

¹⁷Jare mbapi ara ma uasa yave, Pablo uenica judío reta itenondegua reta. Jare uyembati reta yave, Pablo jei chupe reta:

—Cheriquei reta, yepe tēi ayapo'ā mbae nunga teco ñanerentaigua reta coti ani yandetenondegua reta iyemboe coti, ěrei Jerusalén pegua reta chemee romano reta pe, jare romano reta cheñoño peresoriru pe —jei—. ¹⁸Jare jae reta upirandu yave cheve, uipota tēi cheyora, ayapo'ā mbae nunga teco amano vaerā ramo. ¹⁹Ĕrei judío reta oyovaicho cheré ramo, ayapo'ā vaerā mbae, jaeño ayu vaerā cherāa César, yepe tēi mbaeti mbae ambijeco vaerā cherentaigua reta jese vae —jei chupe reta—. ²⁰Jáeramo che pueni puecha vaerā, jare ayemingueta vaerā pe reta ndive. Echa'ā Israel pegua reta güirovia vae jeco pegua añeapiti aī cua cadena pe —jei.

²¹Ĕrei jae reta jei chupe:

—Mbaeti quía ombou tupapire oreve Judea güi nemimbeu vaerā oreve. Jare ou'ā penti ave ñanerentaigua joco güi umimbeu vaerā oreve icavi mbae vae nderegua. ²²Ĕrei nduipota nduicuaa mbae ndepia pe ndiyemingueta vae. Echa'ā nduicuaa opaete que rupi jei reta icavi'ā co cua moromboe —jei reta.

²³Jayave jei reta Pablo pe ĩru ara rupi yugüeruta co. Jayave jocua ara jeta vae yugüeru Pablo jenta pe. Jare neimbove güive Pablo icaaru umimbeu chupe reta Tumpa iporoyocua regua. Jare Moisés iporoyocui rupi jare Tumpa iñee aracae umimbeu vae reta uicuatiaque vae rupi umimbeu vi chupe reta Jesús regua. Cua uyapo, jae reta güirovia vaerā. ²⁴Jare amocue güirovia Pablo jei vae. Ĕrei ĩru vae reta güirovia'ā. ²⁵Jáeramo uyembiyao reta uyugüi, jare yugüiraa Pablo jenta güi, Pablo opa yave jei chupe reta cua ñee:

—Jupi co jei Espiritu Santo Tumpa iñee aracae umimbeu vae Isafas rupi yandetenondegua reta pe. Echa'ā jei cuarāi:

²⁶Ecua tenta guasu pegua reta pe, jare ere chupe reta:

Piyandu tēita, ērei ndarau picuaa.
Peecha tēita, ērei ndarau picuaa cavi.

²⁷Echa'ā cua reta ipiatanta,
jare iyapisa pe uyandu tēi,
jare usapimiño,
agüiye vaerā uecha jesa pe,
jare agüiye vaerā uyandu iyapisa pe,
jare agüiye vaerā uicuaa ipia pe,
jare agüiye vaerā uyerova checoti' —jei Tumpa—.
'Echa'ā uyerova checoti yave, ambaita tēi imbaeyoa reta' —jei.
Jucuarāi jei —jei Pablo chupe reta—.

²⁸Picuaa cavi cua: Tumpa umimbeucata cua ñee judío mbae vae reta pe, jae reta uyembiasaca vaerā. Echa'ā jae reta uyapisacata jese —jei.

²⁹Jare cua Pablo opa ma jei yave, judío reta yugüiraa uyeaca reve uyupii.

³⁰Jare Pablo uiporu penti o umbiepi reve, jare ico joco pe mocui año. Jare umbiresive opaete yugüeru opou ipi vae reta. ³¹Jare jecuaeño umimbeu Tumpa iporoyocuiā regua, jare oporomboe yandeYa Jesucristo re uquiye mbae reve, jare mbaeti quía umbiavai.

LA CARTA DEL APOSTOL SAN PABLO A LOS ROMANOS

¹ Che co jae Pablo. Che ayeyocui Jesucristo pe. Jae cheparavo aico vaerā jemimondorā, jare cheñono tee amimbeu vaerā ñee icavi vae Tumpa regua.

² Echa'ā aracae Tumpa umee ñee icavi vae ñee umimbeu vae reta rupi uyecuatía oĩ vae pe. ³ Ñee icavi vae umimbeu yandev Tumpa Tai regua. Jae co yandeYa Jesucristo. Jae David iñemoñaeta reta pegua co. ⁴ Ërei Espiritu iyoo mbae vae rupi jae uyecuaa Tumpa Tai mbaepuere güinoi vae. Echa'ā cua uyecuaa, icove ye yave ou umanocue vae reta ipite güi. ⁵ Jesucristo rupi Tumpa umee oreve ipiacavi jare oremondo numimbeu vaerā opaete ivi pegua reta pe, Tumpa jei rami jae reta upurugüirovia vaerā. Cua nduyapo, Tumpa uyembadoraca vaerā. ⁶ Jare pe reta co cua nunga amocue. Echa'ā Tumpa preparavo, pico vaerā Jesucristo imbaerā.

⁷ Aicuatía cua tupapiere opaete Roma pe pico vae pe. Tumpa perau jare preparavo peñoño tee vaerā iyupegarā. YandeRu Tumpa jare yandeYa Jesucristo tumee peve ipiacavi jare ipiacatu.

Pablo uipota oo Roma pe

⁸ Tenonde voi amee yasurupai Tumpa pe Jesucristo rupi peré, quirāi pepurugüirovia jerācua opaete ivi rupi. ⁹ Che ayeyocui Tumpa pe opaete chequirēi reve. Echa'ā amimbeu ñru vae reta pe ñee icavi vae Tumpa Tai regua. Jare chepuere jae peve Tumpa jovaque quirāi jecuaño ayerure chupe peré. ¹⁰ Aipota ete apou pepi. Jáeramo ayerure Tumpa pe jese. Tumpa uipota yave, añotai co pepi. ¹¹ Echa'ā aipota puecha, pombori vaerā Espiritu pegua re, piñemimirāta vaerā. ¹² Jare cuarāi yayembipiacatuta yandepurugüirovia rupi. Echa'ā pe reta vi pepurugüirovia che apurugüirovia rami.

¹³ Ërei, cherivi reta, aipota picuaa vaerā quirāi jeta vese ma aata tēi pepi, ñrei jecuaño mbae chembiavai. Echa'ā aipota ayeyocui Cristo pe pepite pe, jae uyembadoraca vaerā pe reta rupi, jucuarāi uyeyapo ñru judío mbae vae reta ipite pe rami. ¹⁴ Echa'ā chepía co Cristo pe ayeyocui vaerā uyemboe vae reta jare uyemboe mbae vae reta pe, jare iyaracuaa vae reta jare iyaracuaa mbae vae reta pe. ¹⁵ Jáeramo chepuere yave, aipota ete amimbeu ñee icavi vae pe reta Roma pe pico vae pe.

Ñee icavi vae imbaepuere

¹⁶ Echa'ā chemara'ā ñee icavi vae re. Echa'ā ñee icavi vae rupi Tumpa umbiasa imbaepuere pe opaete güirovia vae reta. Umbiasa judío reta rani jare judío mbae vae reta vi. ¹⁷ Echa'ā ñee icavi vae umimbeu yandev quirāi Tumpa yanembujupi co yarovia yave. Jare jucuarāi umimbeu yandev, yarovia vaerā. Echa'ā Tumpa ñee pe uyecuatía oĩ cuarāi: “Tumpa umbujupi vae güinoita tecove upurugüirovia ramo.” Jucuarāi uyecuatía oĩ.

Ivi pegua reta imbaeyoa

¹⁸ Jare uyecuaa ara güi quirāi Tumpa uiporaraca ete opaete jae ndive oyovaicho vae reta jare icavi mbae vae uyapo vae reta pe. Echa'ā jae reta umbiavai añete vae icavi mbae vae uyapo vae rupi. ¹⁹ Opaete vae ipuere uicuaa Tumpa regua vae uyecuaa co chupe reta. Echa'ā Tumpa etei uicuaaca chupe reta. ²⁰ Añete co, mbaeti quía ipuere uecha Tumpa jare imbaepuere opa mbae vae. Ërei ivi uyeyapo güive, Tumpa uicuaaca cua imbaepuere jare quirāi jae co Tumpa. Echa'ā ivi pegua reta ipuere tēi uicuaa, opaete mbaembae Tumpa uyapo vae jeco pegua. Jáeramo mbaeti penti ave ipuere jei: “Che aicuaa'ā co.” ²¹ Yepe tēi jucuarāi uicuaa reta tēi Tumpa, umbiadora'ā co. Umee'ā vi yasurupai chupe. Ërei ipia pe uyemingueta reta iyaracuaa mbae vae reta rami, jare iyaracuaa mbae vae reta rami ipuere'ā ipia pe uyemingueta cavi mbae re. ²² Jae reta ipia pe uyemingueta tēi iyee iyaracuaa catu vae reta co. Ërei uyeyapo reta iyaracuaa mbae vae reta. ²³ Jae reta umbiadora'ā Tumpa umano mbae vae. Ërei umbiadora cuimbae-raanga reta, yepe tēi cuimbae reta umano vae co. Umbiadora reta vi güira-raanga reta, maemimba-raanga reta jare mboi-raanga reta.

²⁴ Jáeramo Tumpa umaño jese reta ipia pe uyemingueta vaerā icavi mbae vae re ipia jei vae rupi, jare jucuarāi uyapo reta uyupe imarata tēi jese vae. ²⁵ Güirovia'ā añete vae Tumpa regua. Ērei güirovia reta apu. Echa'ā umbiadora'ā reta Tumpa opaete mbaembae uyapo vae, jare uyeyocui'ā vi chupe. Ērei umbiadora mbaembae Tumpa uyapo vae jare uyeyocui chupe reta. Tumpa uyembiadoraca jaño mai pegua. Amén.

²⁶ Jáeramo Tumpa umaño jese reta uyapo vaerā pichíi vae imarata tēi jese vae. Echa'ā cuña reta opoco iyee. Tumpa uyapo'ā cuña reta jucuarāi uyapo vaerā. ²⁷ Jae ramiño vi cuimbae reta uyapo'ā cuña reta ndive Tumpa uipota uyapo vaerā vae. Ērei cuimbae reta uyupii uyepota, jare opoco iyee. Jáeramo Tumpa uiporaraca chupe reta. Echa'ā jae reta uyemimbaerasi icavi mbae vae uyapo vae jeco pegua.

²⁸ Jare uipota'ā reta uicuaa Tumpa ramo, Tumpa umaño jese reta ipia pe uyemingueta vaerā opaete mbae icavi mbae vae re, jae reta uyapo vaerā opaete mbae icavi mbae vae. ²⁹ Jae reta jecuaño uyapo jupi mbae vae. Uyapo aguasa. Uipota ĩru vae reta imbaembae. Uyapo icavi mbae vae. Nacatāa. Upuruyuca. Jovaichopota. Upurumbitavi. Ipia pe uyemingueta icavi mbae vae uyapo vaerā. Indayepota. ³⁰ Oporomboyovaichoca ĩru ndive. Umitarēi Tumpa. Jecopochi. Uyembicate. Uyembutuicha. Icatu ete uyapo vaerā icavi mbae vae. Uyapo'ā tu jare ichi jei vae. ³¹ Imbiquere. Uyapo'ā jei uyapota tēi vae. Mbaeti etei güinoi mburuau. Ipiatanta. Mbaeti güinoi mburuparareco. ³² Cua reta uicuaa Tumpa jei ma co quirāi cua mbaembae icavi mbae vae uyapo vae reta umanota co. Ērei yepe tēi cua uicuaa, ěrei jecuaño uyapo cua mbaembae icavi mbae vae, jare icavi chupe jucuarāi uyapo vae reta.

2

Tumpa upuruāa jupi vae rupi

¹ Nde vi ndarau ndepuere ndiyerepi. Echa'a ime yave quía ĩru vae umbijeco vae, uyembijeco vi co, ĩru vae umbijeco yave. Echa'a ĩru vae umbijeco vae uyapo vi jocua jeco icavi mbae vae reta. ² Ērei yaicuaa quirāi Tumpa uāa añete vae rupi jocua jeco icavi mbae vae reta uyapo vae reta. ³ Agüiye ndepia pe iyemingueta nde ndiyerepita vae re, agüiye vaerā Tumpa nerāa. Echa'ā penti vae umbijeco yave jocua jeco icavi mbae vae reta uyapo vae reta, ndarau uyerepi. Echa'ā jae etei vi jucuarāi uyapo. ⁴ Nde nerĩro ndico Tumpa ipiacavi jare quirāi Tumpa umiaguanta jare ipiaguasu ndeve. Ndicuaa co quirāi Tumpa ipiacavi ndeve, nde ndeeya vaerā icavi mbae vae ndepia pe oĭ vae. ⁵ Ērei ndepiatanta yave, jare ndeeya'ā yave icavi mbae vae ndepia pe oĭ vae, Tumpa uiporaracata ndeve jocua ara opaete ĩru vae reta pe uiporaraca yave. Echa'ā jocua ara uyecuaata co quirāi Tumpa upuruāa jupi vae rupi. ⁶ Tumpa umeeta opaete vae pe ipotave vae uyapo vae rupi. ⁷ Icavi vae jecuaño ipiaguasu reve uyapo vae reta pe Tumpa umeeta tecove opa mbae vae. Echa'ā jocua rupi jae reta uicuaaca quirāi jecuaño ueca mbaembae opa mbae vae yembiadora pegua. ⁸ Ērei Tumpa uiporaracata co mbaembae iyupeguaño uipota vae reta pe. Echa'ā uipota'ā uyapo añete vae rupi. Jaño uipota uyapo jupi mbae vae. Jáeramo Tumpa uiporaracata chupe reta. ⁹ Opaete ivi pegua icavi mbae vae uyapo vae reta uiporarata co jare ipiatitita co - judío reta rani jare judío mbae vae reta vi. ¹⁰ Ērei opaete icavi vae uyapo vae reta güinoita yepiu jare mbiacatu - judío reta jare judío mbae vae reta vi. ¹¹ Echa'ā Tumpa uau'ā penti vaño ĩru vae güi. ¹² Echa'ā opaete Moisés iporoyocui mbaeti güinoi vae iyoa vae reta yugüiraata cañitei pe, yepe tēi mbaeti güinoi Moisés iporoyocui. Jare opaete Moisés iporoyocui güinoi vae iyoa vae reta uñeācata Moisés iporoyocui re. ¹³ Echa'ā Tumpa umbujupi'ā mboroyocui uyandüño vae reta. Tumpa umbujupita mboroyocui jei vae uyapo vae reta. ¹⁴ Echa'ā judío mbae vae reta, yepe tēi mbaeti güinoi Moisés iporoyocui, ěrei amo pe uyapo reta mboroyocui jei vae mbaeti quía umimbeu chupe reta reve. Cua uicuaaca ime güinoi penti mboroyocui ipia pe, yepe tēi mbaeti güinoi Moisés iporoyocui. ¹⁵ Echa'ā uicuaaca ime güinoi penti mboroyocui ipia pe, mbaembae uyapo vae rupi. Jae reta uicuaa vi ipia pe mbae icavi uyapo vaerā vae. Jáeramo ipia pe uyemingueta rupiño uyembijeco ani uyerepi mbaembae uyapo vae re. ¹⁶ Jucuarāi co uñeācata reta, Tumpa uāa yave ivi pegua reta Jesucristo rupi. Echa'ā jocua ara uyecuaata co opaete vae uyapo vae tenonde yave uyecuaa mbae vae. Jare Tumpa upuruāata ñee icavi vae che amimbeu vae re.

Judío reta jare mboroyocui

¹⁷ Ērei nde ndere ndiyupe nde co jae judío. Nde ndiyeco mboroyocui re, jare ndiyembicate nde ndere ndicuaa co Tumpa ramo. ¹⁸ Nde ndicuaa Tumpa jei vae, jare mboroyocui jei vae rupi nde ndicuaa mbae icavi ete ndiyapo vaerā vae. ¹⁹ Nde nderovia ndepuere co nemimae jesa mbae Tumpa coti vae reta, jare ndepuere nemeē Tumpa jembipe pītumimbi pe ñugüinoi vae reta pe. ²⁰ Nde nderovia vi ndicuaa co quirāi ndepuere nemboe mbaeti mbae uicuaa vae reta jare sambiai reta. Echa'ā mboroyocui umimbeu ndeve aracuaa jare añete vae. ²¹ Nde nemboe ĩru vae. Jáeramo nde rani ndiyemboeta tēi. Nde nemimbeu ĩru vae reta pe agüiye vaerā imonda. Jáeramo agüiyeta tēi nemonda nde vi. ²² Nde ndere ĩru vae reta pe agüiye vaerā uyuvanga menda re. Jáeramo agüiyeta tēi ndiyuvanga menda re nde vi. Nde nemitarēi tumpa-raanga reta. Jáeramo agüiyeta tēi nde vi niñomi mbaembae icavi vae itupao reta güi. ²³ Nde ndiyembicate mboroyocui nenoī ramo. Ērei ĩru vae reta güirōro Tumpa nde ndiyapo'ā mboroyocui jei vae ramo. ²⁴ Echa'ā Tumpa ĩñee pe uyecuatía oī cuarāi: “Judío mbae vae reta jei mbaembae icavi mbae vae Tumpa coti pereco pegua.” Jucuarāi uyecuatía oī.

²⁵ Icavi co niñemicircuncidaca vaerā, Moisés iporoyocui jei vae ndiyapo yave. Ērei ndiyapo'ā yave mboroyocui jei vae, ndiyeyapo co penti uñemicircuncidaca mbae vae rami, yepe tēi niñemicircuncidaca. ²⁶ Jare uñemicircuncidaca'ā vae uyapo yave mboroyocui jei vae, jae uyeyapo co penti uñemicircuncidaca vae rami, yepe tēi uñemicircuncidaca'ā. ²⁷ Jare uñemicircuncidaca'ā jete pe vae, mboroyocui jei vae uyapo yave, nembijecota co. Echa'ā nde ndiyavi mboroyocui jei vae, yepe tēi ime nenoī mboroyocui uyecuatía oī vae, jare yepe tēi niñemicircuncidaca. ²⁸ Echa'ā penti judío mbaeti co judío añetete vae uyecuaa vae jeco peguaño. Jare ramiño vi penti uñemicircuncidaca vae añetete vae uyecuaa vae jeco peguaño. Echa'ā jete peño uñemicircuncidaca. ²⁹ Ērei penti judío ipia pe oī vae jeco pegua judío añetete vae co. Jare ramiño vi penti uñemicircuncidaca vae ipia pe oī vae jeco pegua uñemicircuncidaca vae añetete vae co. Echa'ā cua nunga uyapo Espíritu jei vae rupi, uyecuatía oī vae rupiño'ā. Tumpa jeita icavi cua nunga, yepe tēi ĩru vae reta jeita'ā jucuarāi.

3

¹ Jáeramo ¿mbae pe pa uyuavi judío reta judío mbae vae reta güi? ¿Mbae pe pa uyuavi uñemicircuncidaca vae reta uñemicircuncidaca mbae vae reta güi? ² Jeta co opaete quirāirāi rupi. Tenonde tae cua: Tumpa umee ĩñee chupe reta, jae reta uñuvatu vaerā. ³ Añete co, aramoi amocue vae güirovia'ā. Ērei yepe tēi jae reta güirovia'ā, ěrei cua uipota'ā jei Tumpa ndarau uyapo jei vae. ⁴ Jucuarāi'ā etei co. Echa'ā Tumpa uyapo opaete añete vae rupi, yepe tēi opaete ivi pegua reta iyapu vae reta co. Echa'ā Tumpa ĩñee pe uyecuatía oī cuarāi:

“Ndiyemingueta yave, uyecuaata añete vae co jocua nde ndere vae.

Jare ĩru vae reta nembijeco yave, ndicuaacata jupi vae co nde ndiyapo vae.”

Jucuarāi uyecuatía oī.

⁵ Upurugüirovia mbae vae reta jei cuarāi: “Jupi mbae vae yayapo vae uicuaaca quirāi Tumpa co jae jupi vae. Jáeramo Tumpa uiporaraca yandeve yave, jupi mbae vae co uyapo.” Jucuarāi jei reta. ⁶ Ērei yandepuere'ā yae jucuarāi. Echa'ā Tumpa uyapo yave mona jupi mbae vae, ndarau tēi ipuere uāa ivi pegua reta.

⁷ Jare jei reta vi cuarāi: “Cheapu yave, ĩru vae reta umbiadora eteta Tumpa. Echa'ā uicuaata añete vae Tumpa jei vae icavi ete co. Jáeramo Tumpa agüiyeta tēi chembijeco cheapu re.” ⁸ Añete co, yandepuere yae: “Yayapo icavi mbae vae, icavi vae uyeyapo vaerā.” Jucuarāi jei reta. Icavi co Tumpa umbijeco vaerā jucuarāi jei vae reta. Jare amocue vae jei ore jucuarāi ndoporomboe. Cuarāi jei icavi mbae oreré.

Mbaeti co jupi vae

⁹ Jáeramo yandepuere'ā etei yae judío reta icavi ete judío mbae vae reta güi. Echa'ā yaicuaaca ma quirāi judío reta jare judío mbae vae reta teco güinoi. Echa'ā opaete vae iyoa vae reta co. ¹⁰ Echa'ā Tumpa ĩñee pe uyecuatía oī cuarāi:

“Mbaeti co quía uyapo icavi vae, mbaeti penti ave.

¹¹ Mbaeti co quía uicuaa Tumpa vae.

Mbaeti co quía ueca Tumpa vae.

¹² Opaete vae uyerova Tumpa güi.

Opaete vae uyapo icavi mbae vae.

Mbaeti co quía uyapo icavi vae, mbaeti penti ave.

¹³ Iyuru co penti teögüeriru uyasoí mbae vae rami.

Uyemingueta yave, upurumbitaviñoi.

Opaete jei vae jasi ete, mboi imbayachi jasi ete rami.

¹⁴ Jecuaeño jei icavi mbae vae ñru vae reta coti, jare jecuaeño iarasi ñru vae reta pe.

¹⁵ Iquirēi ete upuruyuca.

¹⁶ Jecuaeño uyapo icavi mbae vae ñru vae reta pe umbipiatiti vaerā.

¹⁷ Jare iquirēi'ā etei umbipiacatu ñru vae reta.

¹⁸ Ipia pe uyemingueta'ā etei Tumpa re, yepe tēi uquiyeta tēi co chugüi."

Jucuarāi uyecuatía oí.

¹⁹ Jare yaicuaa quirāi mboroyocui jei vae imiari mboroyocui güinoi vae reta pe, agüiye vaerā penti ave ipuere uyerepi, jare opaete ivi pegua reta uyecuaa vaerā iyoa vae reta co Tumpa jovai. ²⁰ Jáeramo mbaeti quía ipuere uyembujupi Tumpa jovai mboroyocui jei vae re uyapo vae rupi. Echa'ā mboroyocui güinoi ramo, uicuaa reta iyoa vae reta co.

Añave Tumpa yanembujupi yandepurugüirovia rupi

²¹ Ērei añave uyecuaa ma quirāi Tumpa ipuere yanembujupi mboroyocui jei vae yayapo mbae reve. Jare mboroyocui pe uyecuatía oí vae jare Tumpa ñnee aracae umimbeu vae reta uicuatía vae umimbeu cua regua. ²² Echa'ā Tumpa umbujupita opaete Jesucristo re güirovia vae reta ipurugüirovia rupi. Penti vae uyuavi'ā ñru vae güi. ²³ Echa'ā opaete vae iyoa vae reta co. Tumpa ipuere'ā jei penti ave re: "Cua co jae jupi vae." ²⁴ Ērei Tumpa ipuere ma yanembujupi ipiacavi rupi. Jae co penti regalo Tumpa umee yandeve vae. Echa'ā Tumpa yanderepi ma Cristo Jesús rupi. ²⁵ Tumpa umee Cristo umano vaerā maemimba uyeyucacue sacerdote umee vae rami, agüiye vaerā ma uiporaraca yandeve, yarovia yave Cristo umano co yanderé. Jare jucuarāi uyecuaa quirāi Tumpa jupi co. Echa'ā aracae yave, ivi pegua reta iyoa yave, Tumpa ipiaguasu chupe reta. Uiporaraca'ā chupe reta imbaeyoa reta re. ²⁶ Jare añave uyecuaa ma quirāi Tumpa jupi co. Echa'ā jae uyapo jupi vae, umbujupi yave Jesús re güirovia vae.

²⁷ Jáeramo mbaeti etei ñanoi mbae yandepuere yayembicate jese vae. Echa'ā yayapo'ā mboroyocui jei vae - jaeño yapurugüirovia. ²⁸ Jáeramo yaicuaa ma quirāi Tumpa yanembujupi yandepurugüirovia rupi. Yanembujupi'ā mboroyocui jei vae yayapo vae rupi.

²⁹ Jare Tumpa co jae judío mbae vae reta iTumpa - judío reta peguaño'ā co. ³⁰ Echa'ā Tumpa pentiño co, jare umbujupita uñemicircuncidaca vae reta ipurugüirovia rupi. Jae ramiño vi umbujupita uñemicircuncidaca mbae vae reta ipurugüirovia rupi. ³¹ Jáeramo aramoi quía jeita: "Jucuarāi yave, mboroyocui mbaeti co mbaerā. Echa'ā Tumpa yanembujupi yandepurugüirovia rupi." Jucuarāi'ā co. Echa'ā cua jeco pegua yaicuaa ma maera Tumpa uicuaaca mboroyocui.

4

Abraham pe uyeyapo vae

¹ Jáeramo, ¿mbae ra güinoi yandetenondegua Abraham jae uyapo vae rupi? (Abraham co jae opaete judío reta itenondegua.) ² Echa'ā Abraham uyembujupi yave mona jae uyapo vae rupi, uyembicateta tēi. Ērei ipuere'ā uyembicate Tumpa jovai. ³ Echa'ā Tumpa ñnee pe uyecuatía oí cuarāi: "Abraham güirovia Tumpa, jare jocua jeco pegua Tumpa umbujupi." Jucuarāi uyecuatía oí. ⁴ Ērei ime yave quía uparaviqui vae, umimbaraviqui vae umbiepi uparaviqui vae pe ipía chupe ramo - ipiacavi ramo'ā. ⁵ Ērei ime yave quía güirovia Tumpa mbae uyapo mbae reve vae, Tumpa umbujupi ipurugüirovia rupi. Echa'ā Tumpa umbujupi iyoa vae. ⁶ Jae ramiño vi David jei quirāi uyerovia catu co mbae uyapo mbae reve uyembujupica Tumpa pe vae. ⁷ Echa'ā aracae jei cuarāi:

"Uyerovia catu co imbaeyoa reta Tumpa umbiasa chupe vae reta.

Uyerovia catu co imbaeyoa reta uyembai oí vae reta.

⁸ Uyerovia catu co Tumpa umbijeco'ā imbaeyoa re vae reta."

Jucuarāi jei.

⁹ ¿Umee ra Tumpa cua yerovia catu uñemicircuncidaca vae reta peño? Ani ¿umee ra uñemicircuncidaca mbae vae reta pe vi? Echa'ā yae ma quirāi Tumpa umbujupi Abraham ipurugüirovia rupi. ¹⁰ Ērei ¿quirāi yave ra umbujupi? ¿Uñemicircuncidaca ma yave ra? ani ¿ndeño uñemicircuncidaca mbove ra? Uñemicircuncidaca yave'ā co. Tumpa umbujupi ndeño uñemicircuncidaca mbove. ¹¹ Jayave Abraham uñemicircuncidaca uicuaaca vaerā ĩru vae reta pe Tumpa umbujupi co ipurugüirovia rupi ndei uñemicircuncidaca mbove. Jáeramo Abraham co opaete upurugüirovia vae uñemicircuncidaca mbae vae reta tu rami. Echa'ā jae reta vi uyembujupica ma Tumpa pe. ¹² Jae ramiño vi Abraham co opaete uñemicircuncidaca vae reta tu rami. Cua reta uñemicircuncidacaiño'ā co. Jae reta güinoi mburugüirovia yandetenondegua Abraham ndei uñemicircuncidaca mbove güinoi vae rami.

Tumpa jei uyapota Abraham pe vae

¹³ Echa'ā Tumpa jei Abraham jare iñemoñaeta reta pe umee vaerā chupe reta ivi. Ērei umee'ā chupe reta cua jei uyapota vae, Abraham uyapo mboroyocui jei vae ramo - jaeño umee chupe reta Abraham ipurugüirovia rupi umbujupi ramo. ¹⁴ Echa'ā Tumpa umee yave mona ivi mboroyocui jei vae uyapo vae reta pe mboroyocui jei vae uyapo reta ramo, jae reta mbaetita tēi mbaerā mburugüirovia güinoi vaerā, jae mbaetita tēi mbaerā vi co Tumpa jei uyapota vae. ¹⁵ Echa'ā mboroyocui uicuaaca quirāi Tumpa uiporaracata jei vae uyapo'ā vae reta pe. Ērei mbaeti yave mboroyocui, mbaetita tēi co quía uyavi mboroyocui.

¹⁶ Jáeramo jei uyapota vae mburugüirovia pegua co, Tumpa umee vaerā jei uyapota vae ipiacavi rupi, jae opaete Abraham iñemoñaeta reta añetete güinoi vaerā. Cua reta co opaete Abraham güinoi vae nunga mburugüirovia güinoi vae reta - mboroyocui jei vae uyapo vae retaño'ā co. Echa'ā Abraham co jae opaete yanderu rami Tumpa jovai. ¹⁷ Echa'ā jae vi güirovia Tumpa. Echa'ā Tumpa iñee pe uyecuatía oĩ cuarāi: “Che nduyapo jeta vae reta tu rami” —jei Tumpa. Jucuarāi uyecuatía oĩ. Echa'ā Tumpa umee tecove umanocue vae reta pe, jae uyeyapota co mbaembae ndeño uyeyapo vae.

¹⁸ Yepe tēi mbaeti echa mbaerā Abraham uāro vaerā, ěrei jecuaeño güirovia Tumpa jare uāro yerovia reve. Jáeramo uyeyapo jeta vae reta tu rami. Echa'ā Tumpa jei ma chupe cuarāi: “Ndiyeyapota jeta vae reta tu rami.” Jucuarāi jei. ¹⁹ Cien año seri ma güinoi yave, Abraham uicuaa ma jae jete pe umanota ma co. Uicuaa vi Sara ucuacuaa ete ma co jare jáeramo ndarau ma echa imembi. Ērei jecuaeño güinoi mburugüirovia Tumpa coti. ²⁰ Umicani'ā etei ipurugüirovia. Jecuaeño güirovia Tumpa uyapota co jei chupe vae. Jáeramo ipurugüirovia umimírāta, jae cua jeco pegua umbiadora Tumpa. ²¹ Echa'ā jae uicuaa catu Tumpa ipuere co uyapo opaete jei vae. ²² Jáeramo Tumpa umbujupi ipurugüirovia rupi. ²³ Jare cua Tumpa umbujupi ipurugüirovia rupi vae uyecuatía'ā Abraham reño. ²⁴ Echa'ā uyecuatía vi yanderé. Echa'ā Tumpa yanembujupi yandepurugüirovia rupi, yande yarovia yave jese - umbijecove ye yandeYa Jesús güeru umanocue vae reta ipite güi vae re. ²⁵ YandeYa Jesús uñemee umano vaerā yanembaeyota reta re, jae icove ye ou umanocue vae reta ipite güi uicuaaca vaerā yayembujupica ma co.

5

Yembujupi rupi ñanoi vae

¹ Tumpa yanembujupi ma yandepurugüirovia rupi. Jáeramo ñanoi ma mbiacatu Tumpa ndive yandeYa Jesucristo rupi. ² Jae ramiño vi yaya ma Tumpa re Jesucristo rupi yandepurugüirovia rupi, Tumpa ipiacavi vaerā yandeve. Ñañemimírāta ma Tumpa ipiacavi re, jare ñaāro ñañi yayerovia reve Tumpa ndive yaico vaerā jae uyembidoraca yave. ³ Jare cuaño'ā co. Jae ramiño vi yayerovia yaiporara yave. Echa'ā yaicuaa quirāi yaiporara yave, Tumpa umee yandeve yandepiaguasu vaerā. ⁴ Jare yandepiaguasu yave, yaicuaa ñañepirāta ma co. Jare yaicuaa yave ñañepirāta ma co, ñaāro yayerovia reve. ⁵ Jare ñaāro yave yayerovia reve, ndarau yandetavi. Echa'ā Tumpa uicuaaca ma yandeve yandepia pe ipuruau Espřritu Santo jae umee yandeve vae rupi.

⁶ Echa'ā yande yandepuere'ā etei yayembiasa. Ērei Cristo umano iyoa vae reta re ara ou ma uvāe yave umano vaerā. ⁷ Añete co, ndarau ndipo quía uipota umano penti jupi vae ipepica pe. Ērei aramo quía iquirēita umano penti ipiacavi vae ipepica pe. ⁸ Ērei Tumpa uicuaaca ma ipuruau yandecoti. Echa'ā yepe tēi yande co jae iyoa vae reta, ērei Cristo umano vaeré. ⁹ Jare Tumpa jeta eteta uyapo yandeve. Echa'ā Tumpa yanembujupi ma Cristo imano rupi. Jáeramo Cristo uyapo vae rupi Tumpa ndarau uiporaraca yandeve. ¹⁰ Echa'ā yepe tēi yande yayovaichose Tumpa ndive, ērei añave yayembipiacatuca ma Tumpa ndive Tai imano rupi. Jare Tumpa jeta eteta uyapo yandeve. Echa'ā yayembipiacatuca ma Tumpa ndive ramo, yaicuaa catu yayembiasacata co Tai icove ye ramo. ¹¹ Jare cuaño'ā co. Jae ramiño vi yayerovia Tumpa re yandeYa Jesucristo rupi. Echa'ā Cristo rupi yayembipiacatuca ma Tumpa ndive.

Adán jare Cristo

¹² Jare mbaeyoa uique cua ivi pe penti cuimbae rupi. Jare mano uique mbaeyoa rupi. Jáeramo mano ou opaete vae pe. Echa'ā opaete vae iyoa. ¹³ Jare ndei Tumpa uicuaaca Moisés iporoyocui mbove, imeño mai mbaeyoa ivi pe. Ērei mbaeti mboroyocui yave, yandepuere'ā etei quía yambijeco uyavi ramo. ¹⁴ Ērei opaete vae umano Adán güiive Moisés ico regua, yepe tēi ĩru vae reta iyoa'ā Adán iyoa rami. Jare Adán uyemijaanga Cristo re, jae co outa vae.

¹⁵ Ērei yandepuere'ā yamboyoaque Adán imbaeyoa Tumpa umee yandeve vae ndive. Echa'ā penti cuimbae iyoa ramo, jeta vae umano. Ērei Tumpa umee yandeve ipiacavi rupi vae tuicha ete co cua güi. Echa'ā Tumpa umee ma ipiacavi jeta vae pe penti cuimbae rupi - jae co Jesucristo. ¹⁶ Yandepuere'ā yamboyoaque jocua penti cuimbae imbaeyoa Tumpa umee yandeve vae ndive. Echa'ā jocua penti mbaeyoa jeco pegua Tumpa uā jare umbijeco opaete vae. Ērei Tumpa umee yandeve vae rupi yayembujupica ma, yepe tēi jeta mbaeyoa reta yayapo. ¹⁷ Echa'ā mano güinoi mbaepuere opaete vae re jocua penti cuimbae imbaeyoa jeco pegua. Ērei Tumpa imbaepuere tuicha ete co cua güi. Echa'ā umee ma yandeve ipiacavi yayembujupica vaerā, tecove imbaepuere ñanoi vaerā penti cuimbae rupi - jae co Jesucristo.

¹⁸ Jáeramo penti cuimbae imbaeyoa jeco pegua Tumpa umbijeco opaete vae. Jae ramiño vi penti cuimbae jupi vae uyapo vae jeco pegua Tumpa ipuere umbujupi opaete vae tecove opa mbae vae güinoi reta vaerā. ¹⁹ Penti cuimbae Tumpa jei vae uyapo'ā ramo, jeta vae ueyepo iyoa vae retarā. Jae ramiño vi penti cuimbae Tumpa jei vae uyapo ramo, Tumpa umbujupita jeta vae.

²⁰ Jare Tumpa uicuaaca mboroyocui, mbaeyoa uyecuaa cavi vaerā. Ērei uyecuaa yave jeta co mbaeyoa reta, uyecuaa vi tuicha ete co Tumpa ipiacavi. ²¹ Echa'ā mbaeyoa jecuaeño güinoi mbaepuere opaete vae re. Echa'ā opaete vae umano. Jae ramiño vi Tumpa ipiacavi güinoi mbaepuere yanembujupi vaerā, jare jucuarāi umee vaerā yandeve tecove opa mbae vae yandeYa Jesucristo rupi.

6

Ñamano ma mbaeyoa güi

¹⁻² Jáeramo icavi'ā etei yandepia pe

yayemingueta vaerā cuarāi: "Icavi co yayapo vaerā mbaeyoa uyecuaa vaerā tuicha ete co Tumpa ipiacavi." Yande ñamano ma co mbaeyoa güi. Jáeramo icavi'ā etei jecuaeño mbaeyoa yayapo vaerā. ³ Picuaa co quirāi opaete yande yayembibautizaca pentiño Cristo Jesús ndive ñaī vaerā vae ñamano jae ndive yayembibautizaca yave. ⁴ Jáeramo yayembibautizaca yave, ñañeñotica Cristo ndive ñamano ramo. Ērei Tumpa umbijecove ye Cristo güeru umanocue vae reta ipite güi imbaepuere rupi. Jae ramiño vi Tumpa umee ma yandeve tecove ipiau vae.

⁵ Echa'ā Tumpa yandeapo pentiño Cristo ndive Cristo imano re. Jae ramiño vi Tumpa yanembijecove yeta yandereru umanocue vae reta ipite güi, umbijecove ye Cristo güeru umanocue vae reta ipite güi rami. ⁶ Yaicuaa quirāi yanderecove indechicue umano curusu re Cristo ndive, agüiye vaerā mbaeyoa yanderete pe oī vae mbaepuere güinoi yanderé, agüiye vaerā jecuaeño yayapo mbaeyoa. ⁷ Echa'ā umanocue vae ipuere'ā ma uyapo mbaeyoa. ⁸ Yande ñamano Cristo ndive ramo, yarovia yaicoveta vi co jae ndive.

⁹ Echa'a yaicuaa quirāi Tumpa umbijecove ye Cristo güeru umanocue vae reta ipite güi. Jáeramo Cristo ndarau umano ye. Echa'a mano ipuere'a ma jese. ¹⁰ Echa'a Cristo umano yave, penti veseño umano mbaeyoa jeco pegua. Ērei añave icono mai. Jecuaeño ico penitiño Tumpa ndive. ¹¹ Jae ramiño vi pe reta perovia quirāi pemano ma co mbaeyoa güi, jare pico Tumpa pe piyeyocui vaerā yandeYa Cristo Jesús rupi.

¹² Jáeramo agüiye pemaño mbaeyoa re güinoi vaerā mbaepuere perete re. Agüiye piyapo mbaeyoa perete uipota uyapo vae. ¹³ Agüiye vi pemee perete mbaeyoa uyapo vaerā. Echa'a jucuarāi yave, perete uyapota icavi mbae vae. Ērei piñemee Tumpa pe. Echa'a pe reta co jae umanocue vae tecove ipiau vae güinoi vae reta rami. Jáeramo pemee perete Tumpa pe. Echa'a jucuarāi yave, perete uyapota icavi vae. ¹⁴ Echa'a mbaeyoa ndarau güinoi mbaepuere peré. Echa'a pico'a mboroyocui jei vae re. Pico ma ñee mbiacavi pegua re.

Yaico jupi vae rupi

¹⁵ Jáeramo icavi'a etei yandepia pe yayemingueta vaerā cuarāi: "Yayapo mbaeyoa, yaico'a mboroyocui jei vae re ramo jare yaico ñee mbiacavi pegua re ramo." ¹⁶ Piñemee yave quía pe piyeyocui chupe vaerā, pe reta co jae jembiocui reta. Jecuaeño mbaeyoa piyapo yave, pemañota co. Ērei piyapo yave Tumpa jei vae, picota jupi vae rupi. ¿Picuaa'a pa cua? ¹⁷ Jecuaeño piyapose mbaeyoa. Ērei amee yasurupai Tumpa pe piyapo ma Tumpa jei vae perovia reve jocua moromoe uñemee peve vae. ¹⁸ Jáeramo piyero va ma mbaeyoa güi, jare piyeyocui ma Tumpa pe pico vaerā jupi vae rupi. ¹⁹ (Chemiarī aī peve cuarāi amijaanga reve, pepuere'a picuaa cavi cua mbaembae ramo.) Tenonde yave pemee perete piyapo vaerā mbaeyoa, piyapo vaerā pichii vae jare jupi mbae vae. Ērei añave pemee perete Tumpa pe pico vaerā jupi vae rupi, perete uñeño tee vaerā Tumpa peguarā.

²⁰ Echa'a jecuaeño mbaeyoa piyapose yave, piyeyocui'a Tumpa pe pico vaerā jupi vae rupi. ²¹ Mbaeti etei mbae icavi vae piyapo jocua ara reta pe. Echa'a añave pemara jocua mbaembae piyapose vae re. Echa'a jocua mbaembae mano pegua co. ²² Ērei añave piyapo'a ma mbaeyoa. Piyeyocui ma Tumpa pe. Jáeramo añave piyapo icavi vae. Echa'a perete uñeño tee oī Tumpa peguarā. Jare perecove opa yave cua ivi pe, penoita tecove opa mbae vae. ²³ Echa'a mbaeyoa uyapo vae umano co. Ērei regalo Tumpa umee yandeve yandeYa Cristo Jesús rupi vae tecove opa mbae vae co.

7

Menda re umijaanga vae

¹ Cherivi reta, pe reta picuaa co mboroyocui jei vae. Jare picuaa co quirāi mboroyocui güinoi mbaepuere penti vae re jae ico rambueveño. ² Echa'a mboroyocui jei cuña umenda vae penti ramiño co ime ndive, ime ico rambueve. Ērei ime umano chugüi yave, cuña uyeyora ma jocua mboroyocui ime regua güi. ³ Jáeramo cuña imegua yave ime tenondegua vae ico rambueve, cuña uyuvanga menda re. Ērei ime umano ma yave, cuña uyeyora ma jocua mboroyocui ime regua güi. Jayave umenda yave ĩru cuimbae ndive, uyuvanga'a menda re.

⁴ Jae ramiño vi, cherivi reta, pe reta piyeyora mboroyocui güi Cristo imano rupi, pico vaerā Cristo re. Añete co, pico ma Tumpa umbijecove ye güeru umanocue vae reta ipite güi vae re, piyapo vaerā icavi vae, Tumpa uyembadoraca vaerā. ⁵ Echa'a yaico yave yande yae vae reño, yaipota yayapo mbaeyoa, mboroyocui jei agüiye vaerā yayapo ramo. Jare cua mbaeyoa uparaviqui yanderete pe ñamano vaerā. ⁶ Ērei añave yayeyora ma mboroyocui güi. Echa'a yayeyora ma yandeocui vae güi. Jáeramo yandepuere yayeyocui Tumpa pe tecove ipiau vae rupi Espíritu umee yandeve vae rupi. Yayeyocui'a ma chupe mboroyocui indechi vae jei vae re.

Mbaeyoa ico chepia pe vae

⁷ Yandepuere'a etei yae icavi mbae vae co mboroyocui. Mboroyocui umimbeu'a yave cheve mbaeyoa regua, ndarau tēi aicuaa jesegua. Echa'a ndarau tēi aicuaa aipota ĩru vae reta imbaembae yave cheyora co vae, mboroyocui jei'a yave: "Agüiye ipota ĩru vae reta imbaembae." ⁸ Ērei mboroyocui jei agüiye vaerā ayapo ramo, mbaeyoa jeiete uparaviqui chepia pe che aipota vaerā ĩru vae reta imbaembae. Echa'a mbaeti yave mboroyocui,

aicuaa'ã co cheyoa. ⁹Tenonde yave aicuaa'ã mboroyocui jei vae yave, che aico penti icove catu vae rami. Ërei aicuaa yave mboroyocui jei vae, aicuaa vi cheyoa co mboroyocui jei vae ayavi ramo, jare aicuaa vi amanota co. ¹⁰⁻¹¹Chepia pe ayemingueta tõi mboroyocui umeeta cheve tecove. Ërei chetavi. Echa'ã cheyoa yave, mboroyocui uicuaaca cheve amanota co.

¹²Ërei mboroyocui mbaeyoa pegua'ã co, jare mboroyocui jei vae iyoa mbae vae pegua jare jupi vae pegua jare icavi vae pegua co. ¹³Jocua icavi vae pegua uyeyapo'ã etei cheve mano peguarã. Mbaeyoa mano pegua co. Jare jucuarã uyecuaa mbaeyoa. Jocua icavi vae pegua uicuaaca cheve amanota co cheyoa ramo. Jare jucuarã mboroyocui uicuaaca mbaeyoa icavi mbae ete co.

¹⁴Echa'ã yaicuaa Espiritu Santo umee mboroyocui. Ërei che aico che jae vae reño. Añemee ayapo vaerã mbaeyoa. ¹⁵Aicuaa'ã maera ra ayapo cuarã. Echa'ã ayapo'ã chequirõi tõi ayapo vae. Ërei ayapo cheatõi tõi ayapo vae. ¹⁶Jáeramo aicuaa mboroyocui icavi vae pegua co. Echa'ã ayapo cheatõi tõi ayapo vae. ¹⁷Jáeramo icavi mbae vae uyapo vae che'ã co. Icavi mbae vae uyapo vae co jae mbaeyoa chepia pe ico vae. ¹⁸Che aico che jae vae reño. Jáeramo aicuaa mbaeti co mbae icavi vae anoi chiyee. Echa'ã chequirõi tõi ayapo icavi vae, Ërei chepuere'ã ayapo. ¹⁹Ayapo'ã icavi vae chequirõi tõi ayapo vae. Ërei jecuae ayapo icavi mbae vae cheatõi tõi ayapo vae. ²⁰Jáeramo icavi mbae vae uyapo vae che'ã co. Icavi mbae vae uyapo vae co jae mbaeyoa chepia pe ico vae. Echa'ã ayapo cheatõi tõi ayapo vae.

²¹Uyeyapo cheve cua: Icavi vae chequirõi tõi ayapo yave, jecuaeño ayapo icavi mbae vae. ²²Aicuaa chepia pe icavi co Tumpa iporoyocui. ²³Ërei che jae vae reño aico ramo, jecuaeño uyecuaa cheve chequirõi tõi chepia pe ayapo vae ndive oyovaicho vae. Jae co mbaeyoa ayapo vae. Cua mbaeyoa güinoi mbaepuere cheré.

²⁴Chepiatiti ete. ¿Quía ra umeeta cheve mbaepuere agüiye vaerã ayapo mbaeyoa? Echa'ã mbaeyoa mano pegua co. ²⁵Jaeño Tumpa, yandeYa Jesucristo rupi. Yasurupai amee Tumpa pe. Jayave chequirõi reve chepia pe ayemingueta ayapo vaerã Tumpa iporoyocui jei vae. Ërei che jae vae reño aico ramo, jecuaeño ayapo mbaeyoa.

8

Ñanoi tecove opa mbae vae Espiritu Santo rupi

¹Jáeramo Tumpa ndarau etei umbijeco Cristo Jesús re güirovia vae reta. ²Echa'ã Espiritu Santo uparaviqui ma, anoi vaerã tecove opa mbae vae Cristo Jesús re arovia ramo. Jáeramo ayeyora ma mbaeyoa imbaepuere güi. Echa'ã mbaeyoa ayapo ramo amanota tõi. ³Moisés iporoyocui ipuere'ã yanembori, yandepuere'ã yayapo mboroyocui jei vae ramo. Jáeramo Tumpa yanembori. Echa'ã ombou Tai etei cua ivi pe. Tai uyeyapo penti cuimbaerã. Yepe tõi opaete ivi pegua reta iyoa, jae iyoa'ã co. Ou umano vaerã yanembaeyoa re. Umiamiri mbaeyoa, agüiye vaerã mbaeyoa güinoi mbaepuere yanderé. ⁴Cristo cua uyapo, Tumpa yanembujupi vaerã. Echa'ã mboroyocui jeise yayapo vaerã jupi vae. Echa'ã yaico'ã ma yande yae vae reño. Yaico ma co Espiritu Santo jei vae re.

⁵Jei vae reño yugüireco vae reta ipia pe uyemingueta mbaembae jete uipota vae reño. Ërei Espiritu Santo jei vae re yugüireco vae ipia pe uyemingueta Espiritu Santo uipota vae re. ⁶Echa'ã mbaembae jete uipota vae reño ipia pe uyemingueta vae reta umanota co. Ërei Espiritu Santo uipota vae re ipia pe uyemingueta vae reta güinoi tecove opa mbae vae jare mbiacatu. ⁷Echa'ã mbaembae jete uipota vae reño ipia pe uyemingueta vae reta oyovaicho Tumpa ndive. Echa'ã ñatõi reta uyapo Tumpa iporoyocui. Ipuere'ã etei uyapo Tumpa iporoyocui. ⁸Jáeramo jei vae reño yugüireco vae reta ipuere'ã uyapo Tumpa uipota uyapo vaerã vae.

⁹Ërei pe reta pico'ã ma pipota vae reño. Pico Espiritu Santo jei vae re. Echa'ã Tumpa iEspiritu ico pepia pe. Echa'ã Cristo iEspiritu mbaeti güinoi vae Cristo imbae'ã co. ¹⁰Ërei Cristo ico pepia pe. Jáeramo Espiritu Santo umee peve tecove opa mbae vae, yepe tõi perete umanota co mbaeyoa jeco pegua. Echa'ã Tumpa pembujupi ma. ¹¹Tumpa umbijecove ye Jesús güeru umanocue vae reta ipite güi. Jare Tumpa iEspiritu ico pepia pe. Jáeramo Tumpa umbijecove catuta co perete umanota vae iEspiritu ico pepia pe vae rupi. Echa'ã umbijecove ye Cristo Jesús güeru umanocue vae reta ipite güi.

¹²Jáeramo, cherivi reta, yandepuere'ã ma yayapo yanderete pe yayapose vae. ¹³Echa'ã ime yave quía jei vae reño ico vae, umanota co. Èrei Espíritu imbaepuere rupi pepuere peeya piyugüü perete uipota vae. Jare jucuarã yave, picoñotai co.

¹⁴Echa'ã opaete Espíritu Santo jei vae re yugüireco vae reta Tumpa tai reta co. ¹⁵Echa'ã Tumpa umee peve iEspíritu piyeyapo vaerã Tumpa tai retarã. Peapo'ã co uyeyocui vae uquiye ipatrón güü vae reta rami. Jáeramo Espíritu Santo yanembori yandepuere vaerã yae: “CheRu.” ¹⁶Jare Espíritu Santo etei uicuaaca yandevé yande co jae Tumpa tai reta. ¹⁷Jare yandé co jae Tumpa tai reta ramo, ñanoita vi yanembaerã Tumpa umeeta yandevé vae. Ñanoita co yanembaerã Cristo ndive. Echa'ã yaiporara ñaí Cristo uiporara rami. Jáeramo Tumpa yanembutuichacata Cristo ndive.

¹⁸Añave yaiporara ñaí. Èrei arovia cua yaiporara ñaí vae mbae'ã co. Echa'ã icavi eteta co yandevé jocua ndeño uyecuaa vae Tumpa umeeta yandevé vae. ¹⁹Echa'ã opaete Tumpa uyapo vae uãro oí iquirëi ete reve Tumpa umbutuichaca vaerã tai reta. ²⁰Tumpa uyapo opaete mbaembae icavi ete. Èrei opaete uyapo vae icumegua ma, yepe tã mbaembae etei uyapo'ã mbae icumegua vaerã. Echa'ã Tumpa umaño icumegua vaerã Adán iyoa ramo. Èrei ndarau jecuaño mbaembae icumegua. ²¹Echa'ã Tumpa uepita tai reta opaete mbae icavi mbae vae güü, umbutuichaca reta yave. Jare ramiño vi Tumpa uepita uyapo vae etei, agüiye vaerã jecuaño icumegua. ²²Echa'ã yaicuaa co quirã iyipi güiive jare jecuae añave opaete Tumpa uyapo vae uiporara oí penti cuña imembí oata vae uiporara oí rami. ²³Jae ramiño vi yandé yaiporara ñaí yandepia pe, yepe tã ñanoi ma Espíritu Santo - echa'ã Espíritu Santo rani Tumpa umee yandevé. Echa'ã ñaño ñaí Tumpa uicuaaca vaerã opaete pe yandé co jae Tumpa tai reta. Cua uyeyapo yave, Tumpa uipepicata yanderete añave ñanoi vae, yanderete ipiau vaerã. ²⁴Echa'ã yayembiasaca yave, yambipi ñaño yayerovia reve. Èrei Tumpa uepi yanderete yave, ndarau ma ñaño tã. Echa'ã ime yave quía mbae uãro vae, jocua güinoi ma yave, uãro'ã ma. ²⁵Èrei ñaño ñaí mbae ndeño ñanoi vae. Jáeramo ñaño ñaí yandepiaguasu reve.

²⁶Jae ramiño vi Espíritu Santo yanembori, ñanepirãta'ã ramo. Yayerureta tã co Tumpa pe mbae re. Èrei yaicuaa'ã mbae re yayerure vaerã chupe. Amo pe yaicuaa'ã mbae yae vaerã. Èrei jeseve Espíritu Santo etei uyerure Tumpa pe yanderé. ²⁷Tumpa uicuaa opaete vae ipia pe oí vae, jare uicuaa vi Espíritu Santo ipiyemingueta. Echa'ã Espíritu Santo uyerure Tumpa pe yanderé Tumpa jei vae rupi. Yandé co jae uñeño tave Tumpa peguarã vae reta.

Opaete mbaembae ñamiamirita

²⁸Jare yaicuaa co quirã opaete uyeyapo vae rupi Tumpa yanembori oí icavi vaerã yandevé, yandé yaau Tumpa ramo. Echa'ã Tumpa jei vae rupi yandeparavo. ²⁹Echa'ã iyipi güiive Tumpa yandecuaa. Jae ramiño vi iyipi güiive Tumpa yandeparavo yandé yayeyapo vaerã Tai rami, jare Tai ico vaerã tenondeguarã opaete Tumpa tai reta ndive. ³⁰Jae ramiño vi Tumpa ñanereni, iyipi güiive yandeparavo ramo. Jae ramiño vi Tumpa yanembujupi, ñanereni ramo. Jae ramiño vi yanembutuichacata co, yanembujupi ramo.

³¹Jare cua yaicuaa ramo, yaicuaa vi cua: Tumpa yanembori ramo, mbaeti quía ipuere ñanemiamirí. ³²Tumpa ñatëi'ã umee yandevé Tai. Echa'ã umee co, jae umano vaerã yanderé. Jáeramo Tumpa umeeta co yandevé opaete mbaembae. Echa'ã umee yandevé Tai. ³³Mbaeti quía ipuere yanembijeco mbae re. Echa'ã yandé co jae Tumpa uiparavo vae reta, jare Tumpa yanembujupi ma. ³⁴Mbaeti quía ipuere yanembijeco yanembaeyoa reta re. Echa'ã Cristo umano yanembaeyoa reta re, jare icove ye ou umanocue vae reta ipite güü, jare añave ime oí Tumpa iyacata coti. Jae etei uyerure Tumpa pe yanderé. ³⁵Cristo yanderau, jare ndarau quía ipuere yanembisiri Cristo güü. Aramoi yaiporara, ani yavaita co yandevé yaico vaerã, ani ñru vae reta uyapota icavi mbae vae yandevé, ani caruai outa yandevé. Aramoi ndarau ñanoi corepoti yanderemionderã yagua vaerã. Aramoi ñru vae reta iquirëita yandeyuca. Aramoi yepe yandeyucata. Èrei jecuaño Cristo yanderauta. ³⁶Echa'ã Tumpa ñee pe uyecuatía oí cuarã:

“Cristo re yarovia ramo, opa ara rupi ñru vae reta ñanemiatarëi ipia pe.

Umae yanderé ovecha reta uyeyucacata vae re umae vae rami.”

Jucuarã uyecuatía oí. ³⁷Èrei yepe tã opaete cua uyeyapo yandevé, èrei jecuae ñamiamirita opaete yayerovia reve Cristo imbaepuere rupi. Echa'ã jae yanderau. ³⁸Che

aicuaa catu Tumpa yanderau co, jare ndarau quía ipuere yanembisiri Tumpa güi. Aramoi ñamanota, ani aramoi jecuaeño yaicota. Èrei jeseve Tumpa yanderauta. Ángel reta jare mburuvicha ara pegua reta ndarau ipuere yanembisiri Tumpa güi. Opaete añave uyeyapo oĩ vae jare opaete uyeyapota vae ndarau ipuere yanembisiri Tumpa güi. ³⁹ Ipotave ivate oĩ vae, jare ipotave ivigüi pe oĩ vae, jare ipotave ñru mbae Tumpa uyapo vae yepe ndarau ipuere yanembisiri Tumpa güi. Jecuaeño Tumpa yanderau. Echa'ã uicuaaca yandave ipuruau yandeYa Cristo Jesús rupi.

9

Tumpa uiparavo Israel pegua reta

¹ Che co jae Cristo imbae. Cua che jae vae añete vae co. Cheapu'a co. Espíritu Santo ico chepia pe. Jáeramo aicuaa catu cua che jae vae añete vae co. ² Jecuaeño chepiatiti. ³ Echa'ã aipota tēi ayembisiri vaerã Cristo güi penti yepipeyu oa jese vae rami, jucuarãi yave chepuere ambori cherivi reta. Jae reta co cherentaigua reta. ⁴ Jae reta co Israel pegua reta. Uyeyapo reta Tumpa tai retarã. Tumpa uechaca imbaepuere jae reta jovaque. Tumpa umee chupe reta itrato reta, jare uicuaaca vi chupe reta Moisés iporoyocui. Jae reta uyeyocui Tumpa pe Tumpa jo pe. Tumpa umimbeu chupe reta uyapota chupe reta vae. ⁵ Jae reta co Israel pegua reta itenondegua reta ñnemoñaeta, jare chugüi reta Cristo ou uyeyapo cuimbaerã. Cristo co jae Tumpa etei. Jae co opaete mbaembae iYa. Tuyembiadoraca jaeño mai pegua. Amén.

⁶ Cua uipota'ã jei Tumpa uyapo'ã jae jei uyapota vae. Echa'ã mbaeti co opaete Israel ñnemoñaeta Israel pegua añetete vae reta. ⁷ Jae ramiño vi mbaeti co opaete Abraham ñnemoñaeta Abraham tai añetete vae reta. Echa'ã Tumpa jei Abraham pe cuarã: “Isaac ñnemoñaeta ñnemoñaeta co jae ñnemoñaeta añetete vae reta.” Jucuarãi jei. ⁸ Cua uipota jei jocua uñemoñaeta cuimbae jei vae jeco peguaño vae reta Tumpa tai reta'ã co. Jaeño Tumpa jei vae rupi uñemoñaeta vae reta co jae ñnemoñaeta añetete vae reta. ⁹ Echa'ã Tumpa jei Abraham pe. Jei chupe cuarã: “Ñru año re cuarãi yave ayu yeta, jare Sara imembita co.” Jucuarãi jei.

¹⁰ Jare cua mbaeti co opaete Tumpa jei vae. Echa'ã Tumpa imiari Rebeca pe jae imembita yave. Jocua imembi reta tu co jae yandetenondegua Isaac. ¹¹⁻¹² Jare Tumpa imiari Rebeca pe yave, ndeiño oa choguaquiri reta. Jáeramo ndeiño uyapo icavi vae jare icavi mbae vae. Èrei Tumpa jei Rebeca pe cuarã: “Tenondegua vae uyeyocuita co taicuegua vae pe.” Jucuarãi jei. Jare cua uicuaaca yandave quirãi Tumpa uiparavo jae jei vae rupi. Tumpa uiparavo'ã mbae ipotave vae uyapo vae jeco pegua. Tumpa uiparavo jae etei uipota ramo. ¹³ Echa'ã Tumpa ñnee pe uyecuatía oĩ cuarã: “Aiparavo Jacob. Aiparavo'ã Esaú” —jei Tumpa. Jucuarãi uyecuatía oĩ.

¹⁴ Jare Tumpa uyapo'ã etei jupi mbae vae jucuarãi jei ramo. ¹⁵ Echa'ã Tumpa jei Moisés pe cuarã: “Aipararecota co chequirēi aiparareco vae. Jare chepiacavita co chequirēi chepiacavi chupe vae pe.” Jucuarãi jei. ¹⁶ Jáeramo ñanoi mburuparareco Tumpa güi, Tumpa etei iquirēi yandeparareco ramo, yandeiño'ã ñnanequirēi ramo, jare mbaeti vi mbae yande yayapo vae jeco pegua. ¹⁷ Echa'ã Tumpa ñnee pe uyecuatía oĩ vae pe yamingueta quirãi Tumpa jei Egipto pegua reta juvicha guasu pe cuarã: “Cuarã etei che nduparavo mburuvicha guasurã, aicuaaca vaerã chembaepuere nderovaque, opaete ivi pegua reta pe chererãcua vaerã.” Jucuarãi jei. ¹⁸ Jáeramo Tumpa uiparareco iquirēi uiparareco vae. Jae ramiño vi umipiatanta iquirēi umipiatanta vae.

¹⁹ Jáeramo aramoi quía upiranduta cheve: “Jucuarãi yave, ¿maera pa Tumpa yanembijeco? Echa'ã mbaeti quía ipuere oyopia Tumpa jei vae.” ²⁰ Agüiye ere jucuarãi. Echa'ã nde co jae penti ivi peguaño. Icavi'ã etei ñneengata vaerã Tumpa pe. ñru ipuere'ã etei ñneengata iyapota pe. Ipuere'ã jei: “¿Maera pa nde cheapo cuarã?” ²¹ Ñaeu uyapo vae ipuere uyapo ñaeu güi jae uipota vae rupi. Iyapoaño ipuere uyapo penti mbae ipõra vae jare ñru mbae ipõra mbae vae.

²² Tumpa pochí co oĩ uyembaita oĩ vae reta pe. Èrei umiaguanta chupe reta ipiaguasu ete reve, yepe tēi iquirēi uicuaaca quirãi pochí chupe reta jare quirãi uicuaacata chupe reta imbaepuere. ²³ Cua Tumpa uyapo, uicuaaca vaerã quirãi umbutuichacata co uiparareco vae reta. Echa'ã iyipí güiue Tumpa uiparavo cua reta umbutuichaca vaerã.

²⁴ Cua reta co jae yande reta. Echa'ã Tumpa yandeparavo. Yande co jae judío reta jare judío mbae vae reta. ²⁵ Echa'ã Tumpa jei Oseas uicuatía vae pe cuarãi:

“Tenonde yave chembae'ã vae reta uyeyapota co chembae retarã, jare tenonde yave aau'ã vae reta añave aauta co.

²⁶ Tenonde yave che jae peve: ‘Pe reta chembae'ã co.’

Ërei jocua che jae vae pe etei che jaeta peve: Pe reta co jae cherai reta. Che co jae Tumpa icove vae.”

Jucuarãi jei. ²⁷ Jare Isaías jei ñneeãta reve Israel pegua reta re: “Yepe tõi jeta ete Israel ññemoñaã reta jeta ete ivicuĩti i guasu jembei pe oĩ vae rami, ãrei mboviño Tumpa umbiasata. ²⁸ Echa'ã yandeYa opa voita uyapo cua ivi pe jei uyapota vae.” Jucuarãi jei.

²⁹ Echa'ã tenonde yave Isaías jei cuarãi:

“YandeYa co jae opaete vae iYa. Jae umbiasa amocue ñanerentaigua reta.

Jucuarãi'ã yave uyapo, uyeyapota tõi yandeve Sodoma jare Gomorra pe uyeyapo vae rami.”

Jucuarãi jei.

Yembujupi Tumpa umee mburugüirovia re vae

³⁰ Jáeramo yandepuere yae cua: Judío mbae vae reta, yepe tõi ueca'ãse uyembujupica vaerã, añave uyembujupica ma co. Uyembujupica ma co, mburugüirovia güinoi ramo.

³¹ Ërei Israel pegua reta uipota tõi uyembujupica mboroyocui jei vae re uyapo vae rupi. Ërei ipuere'ã uyapo mboroyocui jei vae. ³² ¿Maera ra uyembujupica'ã? Uipota'ã uyembujupica mburugüirovia rupi ramo. Echa'ã uipota tõi uyembujupica mboroyocui jei vae re uyapo vae rupi. Jáeramo Cristo umbiavaí chupe reta penti ita re jae reta ipĩsayeyuca jese vae rami co. ³³ Echa'ã Tumpa ñnee pe uyecuatía oĩ cuarãi:

“Che añoño judío reta ipite pe penti vae” —jei Tumpa—.

“Jae co penti ita ipĩsayeyuca jese vae rami. Ipĩsapaa reta jocua ita re.

Ërei güirovia jese vae cuarãi jeita: ‘Icaviño arovia jese.’ ”

Jucuarãi uyecuatía oĩ.

10

¹ Cherivi reta, aipota ete Israel pegua reta uyembiasaca vaerã. Jáeramo ayerure Tumpa pe jese reta. ² Echa'ã chepuere amimbeu jesegua reta quirãi uipota ete uyeyocui Tumpa pe, ãrei uyeyocui tõi chupe uicuaa mbae reve. ³ Echa'ã uicuaa'ã quirãi Tumpa yanembujupi. Jáeramo jecuaeño uipota tõi uyembujupi. Umaeño'ã Tumpa re umbujupi vaerã. ⁴ Echa'ã Cristo opa ma umbai Moisés iporoyocui. Mbaeti ma quía ipuere uyembujupica mboroyocui jei vae re uyapo vae rupi. Opaete Cristo re güirovia vae reta uyembujupica co.

⁵ Echa'ã Moisés uicuatía jocua uipota uyembujupica mboroyocui jei vae re uyapo vae rupi vae re cuarãi: “Ime yave quía jocua mbaembae uyapo vae, güinoita tecove opa mbae vae uyapo ramo.” Jucuarãi uicuatía. ⁶ Ërei uyembujupica mburugüirovia rupi vae re Tumpa jei cuarãi: “Agüiye ndepia pe iyemingueta: ‘¿Quía ra oota ara pe güeru vaerã cua ivi pe Cristo?’ ⁷ Agüiye vi ere: ‘¿Quía ra ugüeyita güeru vaerã Cristo umanocue vae reta ipite güi?’ ” Jucuarãi jei. ⁸ Jare Tumpa jei vi cuarãi: “Chĩñee coĩño oĩ ndegüi. Ndepuere ndiyemingueta jese, jare ndepuere ndepia pe ndiyemingueta jese.” Jucuarãi jei. Jae co ñee numimbeu vae. Echa'ã numimbeu ñru vae reta pe jae reta güirovia vaerã. ⁹ Nde ndere yave: “Jesús co jae cheYa”, jare nderovia yave ndepia pe Tumpa umbijecove ye co Jesús güeru umanocue vae reta ipite güi, ndiyembiasacata co. ¹⁰ Echa'ã ndepia pe nderovia yave, ndiyembujupicata co, jare ndere yave: “Jesús co jae cheYa”, ndiyembiasacata co.

¹¹ Echa'ã Tumpa ñnee pe uyecuatía oĩ cuarãi: “Güirovia jese vae cuarãi jeita: ‘Icaviño arovia jese.’ ” Jucuarãi uyecuatía oĩ. ¹² Echa'ã judío jare judío mbae vae uyuavi'ã uyugüi. Echa'ã yandeYa co jae opaete vae iYa, jare tuicha ete uyecuaa yandeve imbaepuere yayerure chupe mbae re yave. ¹³ Echa'ã uyerure yandeYa pe umbiasa vaerã vae uyembiasacata co. ¹⁴ Ërei ndarau quía uyerure yandeYa pe umbiasa vaerã, güirovia'ã yave jese. Jare ndarau güirovia jese, uyandu'ã yave jesegua. Jare ndarau uyandu jesegua, mbaeti yave quía umimbeu chupe. ¹⁵ Jare ndarau quía umimbeu chupe, Tumpa omondo'ã quía yave. Echa'ã Tumpa ñnee pe uyecuatía oĩ cuarãi: “Yayerovia ete co. Echa'ã yugüeru

ma uvãe ñee mbíacatu pegua umimbeu vae reta. Yugüeru umimbeu vaerã yandevê ñee icavi vae, yandê yayerovia vaerã.” Jucuarãi uyecuatía oĩ.

¹⁶ Ërei opaete vae'ã güirovia ñee icavi vae. Echa'ã aracae Isafás jei cuarã: “CheYa, ¿quia ra güirovia numimbeu chupe vae?” Jucuarãi jei. ¹⁷ Jáeramo numimbeu Cristo regua, ñru vae reta uyandu vaerã. Jare uyandu yave, amocue vae güirovia.

¹⁸ Ërei tapirandu peve: ¿Uyandu'ã ra reta? Uyandu reta tẽi co. Echa'ã Tumpa ñnee pe uyecuatía oĩ cuarã:

“Tumpa jembiocui reta yugüiraa opaete ivi rupi, jare umimbeu opaete vae pe.”

Jucuarãi uyecuatía oĩ. ¹⁹ Ërei tapirandu ye peve: ¿Uicuaa'ã ra Israel pegua reta? Uicuaa reta tẽi co. Echa'ã tenonde voi aracae Moisés jei cuarã:

“Ayapota icavi vae chembae'ã vae reta pe, pe reta piñemiagiũro vaerã jese reta” —jei Tumpa—.

“Ayapota icavi vae iyaracuaa mbae vae pere chupe vae reta pe, pombopochica vaerã” —jei.

Jucuarãi jei. ²⁰ Jare Isafás jei vi uquiye mbae reve cuarã:

“Chereca'ã vae reta chevãe ma” —jei Tumpa—.

“Ayecuaa upirandu'ã cheré vae reta pe” —jei.

Jucuarãi jei. ²¹ Jare Isafás jei vi Israel pegua reta re cuarã: “Jecuaeño aeni tẽi yugüeru vaerã checoti” —jei Tumpa—. “Ërei uyapo'ã che jae chupe reta uyapo vaerã vae. Jecuaeño oyovaicho che ndive” —jei. Jucuarãi jei.

11

Tumpa uiparavo amocue Israel pegua reta

¹ Ërei yepe tẽi jucuarãi uyapo reta, ãrei Tumpa ueya'ã etei jae uiparavo vae reta. Echa'ã che vi co jae penti Israel pegua. Che co jae Abraham ññemoñaeta reta pegua jare Benjamín ññemoñaeta reta pegua. ² Tumpa ueya'ã co jae uiparavo vae reta. Echa'ã iyipi güive uicuaa reta. Picuaa co Tumpa ñnee pe Elías regua uyecuatía oĩ vae. Echa'ã Elías uyerure Tumpa pe yave, umbijeco Israel pegua reta. Echa'ã Tumpa pe cuarã: ³ “CheYa, uyuca reta ñínee umimbeu vae reta, jare umbai reta maemimba uyeyuca vae uñemearendeta. Cheño ayeyocui ndeve, jare jae reta uipota vi cheyuca.” Jucuarãi jei. ⁴ Ërei Tumpa jei chupe cuarã: “Imeño siete mil cuimbae che aiparavo uyeyocui cheve vaerã vae reta. Jare jae uyeatíca'ã tumpa-raanga Baal jovai umbiadora vaerã.” Jucuarãi jei. ⁵ Jare ramiño vi añave ime amocue vae Tumpa uiparavo ipiacavi rupi vae. ⁶ Tumpa uiparavo reta ipiacavi rupi. Uiparavo'ã mbae jae reta uyapo vae rupi. Echa'ã uiparavo yave mbae jae reta uyapo vae rupi, Tumpa ipiacavi mbíacavi'ã ma co.

⁷ Jáeramo Israel pegua reta güinoi'ã jocua uipota tẽi güinoi vae. Jareño Tumpa uiparavo vae reta güinoi. Jare ñru reta uyemípiatantaca. ⁸ Echa'ã Tumpa ñnee pe uyecuatía oĩ cuarã: “Tumpa uyapo chupe reta agüiye vaerã iyaracuaa. Jáeramo yepe tẽi umingueta Tumpa ñnee, ãrei uicuaa'ã, jare yepe tẽi uyandu Tumpa ñnee, ãrei güirovia'ã. Jare jecuaeño cuarã oĩ.” Jucuarãi uyecuatía oĩ. ⁹ Jare ramiño vi aracae David jei cuarã: “Opaete uyeco reta jese vae toĩ ñuai reta rami.

Toa reta ñuai pe. Tuiporara reta imbaeyoa jeco pegua.

¹⁰ Agüiye tuicuaa, Tumpa ñnee umingueta reta yave.

Tuiporara reta, tivita poi ete vae güiraa vae rami.”

Jucuarãi jei.

Tumpa umbiasata judío mbae vae reta

¹¹ Aramoi amocue vae jei tẽi Israel pegua reta uyemípiatantaca agüiye etei vaerã Tumpa uiparareco. Jucuarãi'ã co. Ërei iyoa reta ramo, Tumpa omondo ñee yembiasa pegua judío mbae vae reta pe. Jare judío mbae vae reta uyembiasaca yave, Israel pegua reta ñacatãata jese reta jare uipotata uyembiasaca vaerã vi. ¹² Jare Israel pegua reta uyavi ramo, icavi co judío mbae vae reta pe. Echa'ã Israel pegua reta iyoa ramo, Tumpa ipiacavi opaete ivi pegua reta pe. Ërei Israel pegua reta uyeyapo ye yave Tumpa imbaerã, icavi eteta co opaete ivi pegua reta pe.

¹³ Pe reta co jae judío mbae vae reta. Chemiari aĩ peve. Echa'ã che co jae Cristo jemimondo judío mbae vae reta pe. Ambutuicha ete co cua mbaraviqui Cristo umee cheve vae. ¹⁴ Jucuarã aipota amiagiũroca judío reta, amocue vae uyembiasaca vaerã. ¹⁵ Echa'ã Tumpa uyerova chugũĩ reta ramo, opaete ivi pegua reta ipuere uyembipacatu Tumpa ndive. Echa'ã uñatima Tumpa coti reta yave, icavi eteta co opaete ivi pegua reta pe - umanocue vae icove ye ou ĩru umanocue vae reta ipite gũĩ yave rami. ¹⁶ Yamijaanga. Mbiyape tenonde voi oyi vae uñeño tee yave Tumpa peguarã, opaete harina omonacue vae vi uñeño tee Tumpa peguarã. Yamijaanga vi. Penti temiti japo reta uñeño tee yave Tumpa peguarã, opaete jãca reve uñeño tee Tumpa peguarã.

¹⁷ Yandepuere yayasia amocue temiti olivo jee vae jãca reta, ñaño tee vaerã jendacue pe olivo ñana rupigua jãca reta. Jucuarãĩ yave, temiti olivo iyaisi uguata olivo ñana rupigua jãca reta re jare umee chupe reta tecove. Jae ramiño vi Tumpa uyerova judío reta gũĩ ipiacavi vaerã peve. Pe reta co jae judío mbae vae reta. ¹⁸ Ērei agũĩye pepia pe piyemingueta pe reta icavi ete co judío reta gũĩ. Echa'ã pe reta co jae olivo ñana rupigua jãca reta rami. Jáeramo agũĩye piyembicate. Echa'ã jãca reta umee'ã tecove japo reta pe. Japo reta umee tecove jãca reta pe.

¹⁹ Jayave aramoi pereta: “Tumpa omombo judío reta olivo jãca reta yayasia rami, ipiacavi vaerã judío mbae vae reta pe. Echa'ã judío mbae vae reta olivo ñana rupigua jãca temiti olivo reta jãca reta jendacue pe uñeño vae reta rami.” ²⁰ Añete co. Ērei Tumpa uyerova chugũĩ reta, jae reta gũĩrovia'ã ramo, jare judío mbae vae reta upitata joco pe, gũĩrovia yave. Jáeramo agũĩye piyembicate. Pequiyenõ. ²¹ Echa'ã Tumpa uyerova judío reta gũĩ, yepe tẽi jae reta co temiti olivo jãca reta etei rami. Jae ramiño vi Tumpa uyerovata pegũĩ, perovia'ã yave. ²² ¡Mase! Tumpa ipiacavi co. Ērei uiporaraca vi. Echa'ã uiporaraca jocua Israel pegua uyavi vae reta pe. Ērei ipiacavita co judío mbae vae reta pe, jare jecuaenõ ipiacavita chupe reta gũĩrovia reta yave. Ērei gũĩrovia'ã yave, Tumpa omombota vi temiti olivo jãca reta yayasia rami. ²³ Jare yayasia yaequi yave temiti olivo jãca reta, yandepuere ye ñaño reta. Jae ramiño vi Tumpa ipiacavita co Israel pegua reta pe, jae reta mbaeti yave jecuae ñatẽi gũĩrovia vaerã. Echa'ã Tumpa ipuere uyapo jucuarãĩ. ²⁴ Echa'ã yandepuere yave ñaño jãca yayasia olivo ñana rupigua gũĩ vae reta temiti olivo re, yavai'ã co oĩ ñaño vaerã temiti olivo jãcacue reta etei jese. Echa'ã olivo ñana rupigua uyuavi temiti olivo gũĩ. Jae ramiño vi Tumpa ipiacavi yave judío mbae vae reta pe, yavai'ã co oĩ ipiacavi vaerã Israel pegua reta pe.

Israel pegua reta uyembiasacata co

²⁵ Cherivi reta, aipota picuaa vaerã cua ndeiño uyecuaa vae regua, agũĩye vaerã piyembicate. Jae co cua: Jeta Israel pegua reta ipiatanta ma. Ērei ndarau jecuaenõ jucuarãĩ, jaeño opaete judío mbae vae reta uyembiasaca regua. ²⁶ Jare cua uyeyapo ma yave, Tumpa umbiasata opaete Israel pegua reta. Echa'ã Tumpa iñee pe uyecuatía oĩ cuarãĩ:

“Outa judío reta ipite gũĩ uepi vaerã.

Jae umbaita opaete Jacob iñemoña reta gũĩ imbaeyoa reta.

²⁷ YandeYa jei: ‘Echa'ã cuarãĩ ayapota jae chupe reta vae, ambai yave imbaeyoa reta.’ ”

Jucuarãĩ uyecuatía oĩ.

²⁸ Israel pegua reta oyovaicho Tumpa ndive. Echa'ã gũĩrovia'ã reta ñee icavi vae. Ērei cua jeco pegua pe reta pepuere perovia ñee icavi vae. Ērei Tumpa uiparavo Israel pegua reta. Jáeramo uau reta, itenondegua reta uiparavo vae rupi. ²⁹ Echa'ã Tumpa umeeta co chupe reta jei umeeta co chupe reta vae. Ndarau omombo uiparavo vae reta. ³⁰ Pe reta co jae judío mbae vae reta. Tenonde yave pe reta piyapo'ã Tumpa jei vae. Ērei añave Tumpa peparareco, Israel pegua reta uyapo'ã Tumpa jei vae ramo. ³¹ Jae ramiño vi añave Israel pegua reta uyapo'ã Tumpa jei vae, ěrei Tumpa uipararecota reta, peparareco rami. ³² Echa'ã Tumpa uicuaaca opaete vae oyovaqueño. Mbaeti co quía Tumpa jei vae uyapo vae. Cuarãĩ Tumpa uyapo, ipuere vaerã uiparareco opaete vae.

³³ Tumpa iyaracuaa catu ete co, jare uicuaa opaete. Yandepuere'ã etei yaicuaa Tumpa ipiyemingueta. Uepiti'ã yaicuaa jae uyapo vae. ³⁴ Echa'ã mbaeti quía uicuaa yandeYa ipiyemingueta. Mbaeti quía umbiaracuaa yandeYa mbae re. ³⁵ Mbaeti quía ipuere umee

rani mbae yandeYa pe, yandeYa umbijecovia chupe vaerã. ³⁶Echa'ã opaete mbaembae ou yandeYa güi. Jae uyapo opaete mbaembae iyupeguarã. YandeYa tuyembiaadoraca jaeño mai pegua. Amén.

12

Upurugüirovia vae reta mbae uyapo vaerã

¹Jáeramo, cherivi reta, pumiñera piñemee vaerã Tumpa pe. Echa'ã jae preparareco. Israel pegua reta umee Tumpa pe maemimba uyeyucacue. Jucuarãi vi pe reta pemee chupe perete icove vae. Perete tuñeño tee Tumpa peguarã. Cuarãi yave, Tumpa uyeroviata co. Echa'ã jupi co piyeyocui vaerã Tumpa pe cuarã. ²Jare agüiye pico jei vae reño yugüireco vae rami. Pemaño Tumpa re umee vaerã peve pepiyamingueta ipiau vae, pepia pe piyemingueta vaerã icavi vae re. Cuarãi yave, picuaata co Tumpa jei vae. Echa'ã icavi co peve piyapo vaerã Tumpa jei vae, pambiyerovia vaerã Tumpa. Echa'ã Tumpa jei vae icavi ete co.

³Tumpa ipiacavi cheve ayeyocui vaerã chupe. Jáeramo che jae peve cua: Agüiye quía ipia pe tuyemingueta ete iyee uyemitenonde vaerã ipia pe uyeminguetata tēi iyee vae güi. Penti penti ipia pe tuyemingueta cavi iyee. Echa'ã Tumpa umee penti penti pe mburugüirovia, ipuere vaerã mbae uyapo Tumpa peguarã. ⁴Echa'ã pentiño co yanderete. Èrei yanderete pe ñanoi yandepi jare yandepo jare yandeapisa jare yanderesa jare jeta ñru ñru vae. Jare opaete güinoi iparaviqui penti penti yanderete pe. ⁵Jae ramiño vi yande jeta ete co. Èrei yayeyapo ma Cristo ndive penti jete ramiño, jare yayemborimbori penti jete rami.

⁶Tumpa ipiacavi yandeve. Jáeramo umee yandeve mbaepuere uyuavi vae reta. Mbaepuere güinoi Tumpa iñee umimbeu vaerã vae tumimbeu mburugüirovia Tumpa umee chupe vae rupi. ⁷Mbaepuere güinoi ñru upurugüirovia vae reta pe uyeyocui vaerã vae tuyeyocui cavi chupe reta. Mbaepuere güinoi oporombocoe vaerã vae toporombocoe cavi. ⁸Mbaepuere güinoi upurumbiaracuaa vaerã vae tupurumbiaracuaa cavi. Mbae ipuere umee ñru vae pe vae tumee iquirēi reve. Mbaepuere güinoi ñru vae reta oyocui vaerã vae toporoyocui cavi. Mbaepuere güinoi ombori vaerã iparavete vae reta vae tombori uyerovia reve.

⁹Piyerau mburuau añetete vae pe. Pemitarēi icavi mbae vae. Jecuaño piyapo icavi vae. ¹⁰Piyerau penti cuimbae uau tivi rami. Pemaē cavi piyee piyepiu reve.

¹¹Piyapo mbaraviqui peaqui mbae reve. Peratangātu Espiritu Santo imbaepuere pe. Piyeyocui yandeYa pe.

¹²Peãro yandeYa piyerovia reve. Pepiaguasu piporara yave. Peratangātu piyerure vaerã Tumpa pe.

¹³Mbae uata yave ñru uñeño tee Tumpa peguarã vae reta pe, pemee mbae chupe reta. Pepiacavi mboupa reta pe.

¹⁴Piyerure Tumpa pe uyapo vaerã icavi vae chupe uiporaraca peve vae reta pe. Agüiye piyepipeyu jese reta.

¹⁵Piyerovia uyerovia vae reta ndive. Pematiti ipiatiti vae reta ndive.

¹⁶Penti ramiño pico uyupii. Agüiye piyembicate. Peau iparavete vae reta. Agüiye pepia pe piyemingueta piyee opaete aracuaa penoi co vae.

¹⁷Yepe tēi quía uyapo icavi mbae vae peve, agüiye pembijecovia icavi mbae vae pe. Jecuaño piyapo icavi vae opaete vae jovaque. ¹⁸Pepuere yave, ñru vae reta umaño yave peré, pico cavi pepiacatu reve ñru vae reta ndive. ¹⁹Cherivi reta, agüiye pembijecovia mbae icavi mbae vae uyapo peve vae icavi mbae vae pe. Pemaño Tumpa tuiporaraca chupe. Echa'ã Tumpa iñee pe uyecuatía oĩ cuarã: “Che taiporaraca chupe. Che tambijecovia” —jei yandeYa. Jucuarãi uyecuatía oĩ. ²⁰Jáeramo oyovaicho nde ndive vae iyembae yave, emingarú. Jare iúe yave, emee i tou. Echa'ã jucuarãi yave, imarata co icavi mbae vae uyapo ndeve vae re. ²¹Iyapo icavi vae mbae icavi mbae vae uyapo ndeve vae pe. Echa'ã jucuarãi nemiamirita icavi mbae vae. Icavi mbae vae ndarau nemiamiri.

13

¹Opaete vae tuyapo mburuvicha reta jei vae. Echa'ã Tumpa etei oño mburuvicha retarã. Tumpa uiparavo mbaepuere güinoi reta vaerã. ²Jáeramo uyapo'ã mburuvicha jei

vae oyovaicho co Tumpa iporoyocui ndive. Jare mburuvicha uiporacata oyovaicho jae ndive vae pe ³Echa'ã mburuvicha reta uminguiye'ã icavi vae uyapo vae. Uminguiye icavi mbae vae uyapo vae. Jáeramo iyapo icavi vae, agüiye vaerã ndequiye mburuvicha güi. Echa'ã mburuvicha uyemingueta cavita nderé. ⁴Mburuvicha reta uyeyocui ñugüinoi Tumpa pe. Echa'ã Tumpa uiparavo, nembori vaerã. Ërei icavi mbae vae ndiyapo yave, equiye chugüi reta. Echa'ã Tumpa umee chupe reta mbaepuere uiporacata vaerã. Jáeramo uyeyocui ñugüinoi Tumpa pe, uiporacata yave icavi mbae vae uyapo vae reta pe. ⁵Jáeramo piyapo mburuvicha reta jei vae, jupi co piyapo vaerã ramo, pequiye'ã uiporacata peve vae güi ramoño. ⁶Jare cua jeco pegua pembriepi mburuvicha reta ocovara peve vae. Echa'ã uyeyocui ñugüinoi Tumpa pe, jare jae reta iparaviqui co covara vaerã peve.

⁷Piyapo opaete vae pe jupi co piyapo vaerã vae. Echa'ã jupi co mburuvicha reta ocovara vaerã peve. Pequiye jupi co pequiye vaerã chugüi vae güi. Pipiu jupi co pipiu vaerã vae. ⁸Agüiye pepia quía pe mbae re. Ërei jecuaeño piyerau. Echa'ã japicha uau vae uyapo ma opaete mboroyocui. ⁹Echa'ã mboroyocui jei cuarã: "Agüiye iyuvanga menda re. Agüiye epuruyuca. Agüiye nemonda. Agüiye ndeapu ñru vae re. Agüiye ipota ñru vae reta imbaembae." Jucuarã jei. Jare ime vi ñru mboroyocui reta. Ërei opaete cua mboroyocui reta penti ramiño co. Jae co cua: "Eau nderapicha nde ndiyerau rami." ¹⁰Echa'ã japicha uau vae ndarau uyapo icavi mbae vae chupe. Jáeramo japicha uau vae uyapo ma opaete mboroyocui.

¹¹Coño ma oñ yanembiasa ete vaerã. Yapurugüirovia ramo yave, mbiri echa yandeve. Ërei añave coño ma oñ. Picuaa cavi cua. Jáeramo icavi co ñañemiatangãtu vaerã. ¹²Yamijaanga pítu mbaeyoa re. Cõe seri ma. Jáeramo agüiye ma yayapo pítumimbi pe uyeyapo vae. Yayapo tembipe oñ yave uyeyapo vae. Jucuarã yandepuereta ñañerãro mbaeyoa ndive. ¹³Yaico cavi tembipe pe yugüireco vae reta rami. Agüiye yacau. Agüiye yasavipo. Agüiye yandeporopotaño. Agüiye yayapo pichí vae. Agüiye yayovaicho ñru vae ndive. Agüiye ñaneacatã ñru vae re. ¹⁴Ërei pemaño yandeYa Jesucristo re pemimirãta vaerã, pepuere vaerã piñerãro mbaeyoa ndive. Agüiye pepia pe piyemingueta quirã pepuere piyapo pipota vaeño.

14

Upurugüirovia vae reta agüiye tiñera

¹Pemaño upurugüirovia vae uicuaa cavi'ã mburugüirovia regua vae re uñemñru vaerã pe ndive, Ërei agüiye piyeaca jae ndive mbae uicuaa cavi'ã vae re. ²Echa'ã penti vae güirovia opaete mbaembae ipuere co jou. Ërei ñru vae uicuaa cavi'ã mburugüirovia regua vae jou'ã soo. ³Opaete mbaembae ipuere jou vae agüiye tugüñro jou'ã soo vae. Jare soo jou'ã vae agüiye tiñera opaete mbaembae ipuere jou vae re. Echa'ã jae co Tumpa imbae. ⁴Soo jou'ã vae agüiyeta tẽi iñera Tumpa jembicocui re. Jaeño iYa ipuere jei icavi vae uyapo ani icavi mbae vae co uyapo. Jare Tumpa ipuere uparaviqui ipia pe, jae uyapo vaerã icavi vae.

⁵Penti vae ipia pe uyemingueta penti ara icavi ete ñru ara reta güi. ñru vae jei opaete ara reta oyovaque co. Penti penti tuicuaa cavi maera ipia pe uyemingueta cuarã. ⁶Ipia pe uyemingueta penti ara icavi ete ñru ara reta güi vae jei cuarã uipota umbiyerovia yandeYa ramo. Jae ramiño vi ipia pe uyemingueta opaete ara reta oyovaque co vae jei cuarã uipota umbiyerovia yandeYa ramo. Opaete mbaembae ipuere jou vae umbiyerovia Tumpa jou yave. Echa'ã umee yasurupai Tumpa pe. Jae ramiño vi soo jou'ã vae umbiyerovia Tumpa jou'ã yave. Echa'ã jae vi umee yasurupai Tumpa pe.

⁷Mbaeti penti ave yaico yayapo vaerã yande yaipota vaeño. Jae ramiño vi mbaeti penti ave ñamano yaipota ñamano ramo. ⁸Echa'ã yaico rambueve, yayeyocui yandeYa pe. Jare ñamanota, yandeYa uipota ñamano vaerã ramo. Jáeramo yaico rambueve jare ñamano yave, yande co jae yandeYa imbae reta. ⁹Echa'ã cuarã Cristo umano jare icove ye ou umanocue vae reta ipite güi, uyeyapo vaerã umanocue vae reta jare icove vae reta iYarã.

¹⁰Penti upurugüirovia vae agüiyeta tẽi iñera ñru upurugüirovia vae re. Jae ramiño vi penti upurugüirovia vae agüiyeta tẽi güñro ñru upurugüirovia vae. Echa'ã opaete yande yayemboita Tumpa jovai, jae uã vaerã yandeparaviqui. ¹¹Echa'ã Tumpa iñee pe uyecuafã oñ cuarã:

“Añetete co” —jei Tumpa—. “Opaete vae uyeaticata cherovai, jare opaete vae chembiadorata co.”

Jucuarāi uyecuatía oī. ¹² Jáeramo penti penti yamimbeuta Tumpa pe yayapocue vae regua.

¹³ Jáeramo agüiye ma ñaniñera. Ñañemoa ngatu quirāi yaico cavi vaerā, agüiye vaerā ĩru upurugüirovia vae iyoa yandereco pegua. ¹⁴ Che aicuaa yandepuere co yau opaete mbaembae. Echa'ā yandeYa Jesús uicuaaca cheve cua regua. Ērei ime yave quía ipia pe uyemingueta jupi'ā jou vaerā mbae nunga tembú vae, ndarau icavi chupe jou vaerā. ¹⁵ Ērei penti upurugüirovia vae umbipiatiti yave ĩru upurugüirovia vae jou vae jeco pegua, ico'ā co upuruau reve. Agüiye tou jocua nunga tembú. Echa'ā jou yave, aramoi ombopiacata ĩru upurugüirovia vae jou vae jeco pegua. Echa'ā Cristo umano vi jocua ĩru upurugüirovia vae re. ¹⁶ Jáeramo agüiye tou jocua nunga tembú, yepe tēi uicuaa ipuere co jou. Echa'ā jou yave, ĩru vae reta jeita uyapo icavi mbae vae. ¹⁷ Echa'ā Tumpa yandecui ramo, agüiye yayemipia'ā mbae yau vae re. Yayapo jupi vae, jare yaico mbiacatu reve uyupii, jare yayerovia. Echa'ā Espiritu Santo yanembori, cuarāi yaico vaerā. ¹⁸ Uyeyocui Cristo pe cuarāi vae umbiyerovia co Tumpa, jare ĩru vae reta uyemingueta cavi jese.

¹⁹ Jáeramo jecuaño yaico cavi, yandepiacatu vaerā uyupii, jare jecuaño yaipota ñañemimirāta vaerā. ²⁰ Agüiye yarucumegua Tumpa iparaviqui mbae yau vae jeco pegua. Añete co, yandepuere yau opaete mbaembae. Ērei ĩru vae reta iyoa yave mbae nunga tembú yau ramo, icavi'ā yau vaerā jocua nunga tembú. ²¹ Agüiye yau soo jare vino, jare agüiye yayapo ĩru mbaembae, yambiavai yave ĩru upurugüirovia vae jocua nunga mbaembae jeco pegua. Echa'ā aramoi ĩru upurugüirovia vae iyoata ani ipituta ipurugüirovia re. ²² Añete co, amocue upurugüirovia vae reta güirovia ipuere jou opaete mbaembae. Tumpaño tuicuaa jesegua. Jae reta jou yave uicuaa Tumpa uipota jou vaerā vae, uyeroviata co. ²³ Ērei ipia pe uyemingueta jupi'ā jou vaerā mbae nunga tembú vae, uyembijeco jocua tembú jou yave. Echa'ā güirovia'ā jupi jou vaerā. Echa'ā mbae yayapo yave, yarovia'ā yave jupi yayapo vaerā, yandeyoa co.

15

¹ Ime amocue yande ñanepirāta yandepurugüirovia re vae. Jáeramo icavi co yambori vaerā uicuaa cavi'ā mburugüirovia regua vae reta. Agüiye yayapo yande yaipota yayapo vaño. ² Penti penti yaico yambiyerovia vaerā ĩru vae, jucuarāi yandepuere yave yayapo icavi vae chupe, ipirāta vaerā ipurugüirovia re. ³ Echa'ā Cristo etei uyapo'ā jae uipota uyapo vaño. Jae uyapo Tumpa jei vae. Echa'ā Tumpa iñee pe uyecuatía oī cuarāi: “Jei icavi mbae vae ndeve vae jei vi icavi mbae vae checoti” —jei Cristo Tumpa pe. Jucuarāi uyecuatía oī. ⁴ Opaete tenonde yave Tumpa iñee pe uyecuatía oī vae uyecuatía co yande yayemboe vaerā. Echa'ā Tumpa iñee pe uyecuatía oī vae ipuere umee yandeve mbiaguasu jare mbiacatu, ñaño vaerā yayerovia reve. ⁵ Tumpa co jae mbiaguasu jare mbiacatu umee peve vae. Tumpa tuparaviqui pepia pe, pico cavi vaerā penti ramiño. Echa'ā cua co jae Cristo Jesús jei vae. ⁶ Pepia pe piyemingueta jare piyemingueta penti ramiño, pemiadora vaerā Tumpa. Jae co yandeYa Jesucristo Tu.

Umimbeu ñee icavi vae judío mbae vae reta pe

⁷ Jáeramo pemaie cavi piyee, Cristo umaie cavi yanderé rami, ĩru vae reta umbiadora vaerā Tumpa. ⁸ Echa'ā che jae peve cua: Cristo ou uyeyocui vaerā judío reta pe, uicuaaca vaerā chupe reta Tumpa iñee añete vae. Echa'ā jae ou uicuaaca vaerā judío reta pe Tumpa uyapota itenondegua reta pe jei vae. ⁹ Jare Cristo ou judío mbae vae reta vi umbiadora vaerā Tumpa, jae uiparareco reta ramo. Echa'ā aracae David jei Tumpa pe cuarāi: “Jáeramo che numbiadorata judío mbae vae reta ipite pe. Che numbiadorata canta pe.”

Jucuarāi jei. ¹⁰ Jare aracae Moisés vi jei cuarāi:

“Judío mbae vae reta tuyerovia Tumpa imbae vae reta ndive.”

Jucuarāi jei. ¹¹ Jare David jei vi cuarāi:

“Judío mbae vae opaete ivi pegua reta tumbiadora yandeYa, tuyemingueta imbaepuere re, opaete ivi pegua reta.”

Jucuarāi jei.

¹² Jare aracaē Isaiās jei cuarāi:

“Outa co Isai iñemoña.

Jae uyeyapota judío mbae vae reta juvicha guasurā.

Judío mbae vae reta güiroviata jese.”

Jucuarāi jei.

¹³ Tumpa uparaviqui yandepia pe ñaāro vaerā yayerovia reve. Jecuaēño tuparaviqui pepia pe, pembiyerovia ete vaerā jare pembipiacatu vaerā pepurugüirovia rupi. Jucuarāi yave, peārota co piyerovia ete reve Espiritu Santo imbaepuere rupi.

¹⁴ Che etei vi aicuaa catu, cherivi reta, quirāi pe reta pepiacavi ete co. Picuaa catu jeta mbaembae regua. Jáeramo pepuere piyembiaracuaa. ¹⁵ Ērei aicuatía ma peve, cherivi reta, aquíye mbae reve amocue mbaembae re, pumimandúa jese vaerā. Cuarāi ayapo, Tumpa ipiacavi umee cheve vae rupi. ¹⁶ Echa'ā Tumpa cheparavo ayeyocui vaerā Jesucristo pe judío mbae vae reta ipite pe. Jáeramo amimbeu chupe reta ñee icavi vae Tumpa regua. Jare judío mbae vae reta güirovia yave, Tumpa uyerovia co. Echa'ā Espiritu Santo oñoño tee jocua judío mbae vae reta Tumpa peguarā.

¹⁷ Jáeramo chepuere chemiari cavi cheparaviqui re. Ērei jucuarāi ambiadora Cristo Jesús. Echa'ā mbaraviqui co jae Tumpa iparaviqui. ¹⁸ Chemiarita Cristo uyapo che rupi vae reño. Jae uparaviqui judío mbae vae reta ipia pe che amimbeu vae jare ayapo vae rupi, jae reta upurugüirovia vaerā. ¹⁹ Jare Espiritu Santo umee cheve mbaepuere ayapo vaerā miacañi reta, judío mbae vae reta ipiacañi vaerā. Jare che ambapi opaete che rupi Jerusalén güi Ilríco pe amimbeu vaerā ñee icavi vae Cristo regua. ²⁰ Jare cuarāi aipota ayapo. Aipota ete amimbeu ñee icavi vae uyandu'ā etei Cristo regua vae pe, agüiye vaerā aparaviqui iru vae uparaviqui vae pe. ²¹ Jare jucuarāi uyeyapo Tumpa iñee pe uyecuatía oī vae. Echa'ā uyecuatía oī cuarāi:

“Ndeño quía umimbeu Cristo chupe vae reta uyanduta co.

Ndeño uyandu vae reta uicuaata co.”

Jucuarāi uyecuatía oī.

Pablo iquirēi oo Roma pe

²² Jare cua jeco pegua ayembiavai ete, yepe tēi aipota aa pepi. ²³ Jeta año ma aipota ete aa apou pepi, jare añave opa ma cheparaviqui cua pe. ²⁴ Jáeramo España pe aa yave, aipota aa apou pepi, ayerovia vaerā pe ndive mbovi ara pegua. Jayave joco güi aramoi pepuereta chembori aa ye vaerā España coti. ²⁵ Ērei aata rani Jerusalén pe araa vaerā corepoti uñeñoño tee Tumpa peguarā vae reta pe. ²⁶ Echa'ā Macedonia jare Acaya pegua reta jei icavi co omondo vaerā corepoti Jerusalén pegua uñeñoño tee Tumpa peguarā vae iparavete vae reta pe. ²⁷ Añete co, jae reta uvāe icavi cua uyapo vaerā. Jare ipia co judío reta pe. Echa'ā judío reta rani umimbeu judío mbae vae reta pe Tumpa iñee. Jáeramo icavi co judío mbae vae reta ombori vaerā judío reta mbaembae cua ivi pegua pe. ²⁸ Jáeramo araata rani chupe reta cua corepoti. Jayave cua mbaraviqui opa ma yave, aata pepi, jare joco güi aata España coti. ²⁹ Jare aicuaa che aa pepi yave, amimbeu cavita peve ñee icavi vae Cristo regua. Jáeramo piyerovia eteta co.

³⁰ Pe reta perovia yandeYa Jesucristo re, jare Espiritu Santo pemboe piyerau vaerā. Jáeramo che pumiñera, cherivi reta, piyerure Tumpa pe cheré. ³¹ Piyerure Tumpa pe jae cherepi vaerā upurugüirovia mbae vae Judea pegua reta güi. Piyerure vi Jerusalén pegua Tumpa peguarā uñeñoño tee vae reta uyerovia vaerā cua corepoti araata chupe reta vae re. ³² Jae ramiño vi piyerure aa vaerā pepi ayerovia reve Tumpa jei vae rupi, jare aputuu vaerā pe reta ndive. ³³ Tumpa toī opaete pe ndive. Echa'ā jae umee yandevē mbiacatu. Amén.

Saludo reta

¹ Amondota pepi yanderindi Febe. Jae uyeyocui iru upurugüirovia vae Cencrea pegua reta pe. ² Pembiresive cavi yandeYa jee pe. Echa'ā icavi co uñeñoño tee Tumpa peguarā vae reta jucuarāi uyapo vaerā uyupe. Jare pembori, mbae uata chupe yave. Echa'ā jae ombori jeta vae, jare chembori vi.

³ Tumpa ndiveño toĩ Priscila jare Aquila. Jae reta chembori Cristo Jesús iparaviqui pe. ⁴ Jae reta umano seri cherepi vaerã. Jáeramo amee yasurupai chupe reta. Jae ramiño vi opaete judío mbae vae uyembatimbati vae reta umee yasurupai chupe reta. ⁵ Jae ramiño vi Tumpa ndiveño toĩ opaete Priscila jare Aquila jenta pe uyembati vae reta. Jae ramiño vi Tumpa ndiveño toĩ yanderivi Epeneto. Jae rani güirovia Cristo re Acaya pe. ⁶ Jae ramiño vi Tumpa ndiveño toĩ María. Jae uparaviqui tanta pepite pe. ⁷ Jae ramiño vi Tumpa ndiveño toĩ Andrónico jare Junias. Jae reta co cherentaigua reta, jare yugüirecose peresoriru pe che ndive. Temimondo reta uyemingueta cavi ete jese reta. Jae reta güirovia Cristo re ndei che arovia jese mbove.

⁸ Jae ramiño vi Tumpa ndiveño toĩ Amplias. Jae güirovia yandeYa re jare che aau. ⁹ Jae ramiño vi Tumpa ndiveño toĩ Urbano. Jae orembori Cristo iparaviqui pe. Jae ramiño vi Tumpa ndiveño toĩ yanderivi Estaquis. ¹⁰ Jae ramiño vi Tumpa ndiveño toĩ Apeles. Uyecuaa co quirã uyeyocui cavi Cristo pe. Jae ramiño vi Tumpa ndiveño toĩ Aristóbulo jenta pegua reta. ¹¹ Jae ramiño vi Tumpa ndiveño toĩ Herodión. Jae co cherentaigua. Jae ramiño vi Tumpa ndiveño toĩ Narciso jenta pegua upurugüirovia vae reta. ¹² Jae ramiño vi Tumpa ndiveño toĩ Trifena jare Trifosa. Jae reta uparaviqui ñugüinoi yandeYa pe. Jae ramiño vi Tumpa ndiveño toĩ yanderindi Pérsida. Jae vi uparaviqui tanta yandeYa pe. ¹³ Jae ramiño vi Tumpa ndiveño toĩ Rufo jare ichi. Rufo uyeyocui cavi yandeYa pe. Jae ichi uyandareco cavi cheré chesi rami. ¹⁴ Jae ramiño vi Tumpa ndiveño toĩ Asíncrito, Flegonte, Hermas, Patrobas, Hermes jare opaete cherivi uyembati jae reta ndive vae reta. ¹⁵ Jae ramiño vi Tumpa ndiveño toĩ Filólogo, Julia, Nereo, Nereo jindi, Olimpás jare opaete uñeño tee Tumpa peguarã vae uyembati jae reta ndive vae reta.

¹⁶ Piyembisaluda yave, piñecuáva piyerau reve. Opaete upurugüirovia vae uyembatimbati vae jei peve Tumpa ndiveño peĩ.

¹⁷ Añave che pumiñera, cherivi reta, piñemoa ngatu vaerã yembiyao uyapo vae reta güi. Echa'ã jae reta umbiavai Tumpa iparaviqui. Jae reta iporombocoe uyuavi piyembocoe jese vae güi. Agüiye piyembati jae reta ndive. ¹⁸ Echa'ã jae reta uyeyocui'ã yandeYa Jesucristo pe. Jaeño uparaviqui reta iyupeguarã. Jae reta uiporu ñee icavi vae echa. Ërei jucuarã umbitavi yemboe añete vae uicuaa cavi'ã vae reta. ¹⁹ Opaete vae uicuaa quirã pe reta perovia yandeYa re. Jáeramo ayerovia peré. Jare aipota jecuaeño pequirëi vaerã piyapo icavi vae. Agüiye petavi piyapo vaerã icavi mbae vae. ²⁰ Tumpa jecuaeño umee yandave ipiacatu. Jae pemborita, imambae pemiamiri ete vaerã Satanás. YandeYa Jesucristo tumee peve ipiacavi.

²¹ Timoteo uparaviqui oĩ che ndive. Jae jare Lucio, Jasón jare Sosípater - jae reta co cherentaigua reta - jei peve Tumpa ndiveño peĩ.

²² Tercio uicuatía oĩ cua tupapire cheve peguarã. Jae vi jei peve Tumpa ndiveño peĩ yandeYa re perovia ramo.

²³ Gayo vi jei peve Tumpa ndiveño peĩ. Che aico jae jenta pe, jare opaete upurugüirovia vae reta vi uyembati cua pe. Erasto vi jei peve Tumpa ndiveño peĩ. Jae uñuvatu tenta guasu pegua reta icorepoti. Yanderivi Cuarto vi jei peve Tumpa ndiveño peĩ.

²⁴ YandeYa Jesucristo tumee opaete peve ipiacavi. Amén.

Tumpa tuyembiaadoraca

²⁵ Jare añave yambiadora Tumpa. Echa'ã jae ipuere pemimirãta. Cuarã amimbeu ma peve, ñee icavi vae Jesucristo regua amimbeu peve yave. Echa'ã jae umee cheve etei amimbeu vaerã. Cua ñee icavi vae uyecuaa'ã etei ivi uyeyapo güive. Jaeramo Tumpa uicuaa. ²⁶ Jáeramo añave uyecuaa. Jare Tumpa icono mai vae oyocui uyecuaa vaerã opaete ivi pegua reta pe Tumpa iñee umimbeu vae reta uicuatía vae rupi, opaete vae güirovia vaerã Tumpa jei chupe reta rami.

²⁷ Tumpaño co jae iyaracuaa catu vae. Tumpa tuyembiaadoraca Jesucristo rupi jaeño mai pegua. Amén.

PRIMERA CARTA DEL APOSTOL SAN PABLO A LOS CORINTIOS

¹ Che co jae Pablo. Tumpa cheparavo aico vaerã Jesucristo jemimondorã. Echa'ã cua co jae Tumpa jei vae. Cherivi Sóstenes ime cua pe oĩ che ndive. ² Aicuatía cua tupapire opaete pepurugüirovia vae Corinto pe piyembati vae reta pe. Pe reta co jae Tumpa imbae. Tumpa preparavo peñono tee vaerã iyupeguarã. Cuarãi Tumpa uyapo Cristo Jesús rupi. Jae ramiño vi Tumpa uiparavo opaete yondeYa Jesucristo re güirovia vae reta. Jae reta opaete que rupi ñugüinoi. Jae reta iYa co jae yandeYa Jesucristo. ³ YandeRu Tumpa jare yandeYa Jesucristo tumee peve ipiacavi jare ipiacatu.

Yasurupai umee Tumpa pe Corinto pegua reta re

⁴ Jecuaeño amee yasurupai Tumpa pe peré, Tumpa umee ipiacavi peve Cristo Jesús rupi ramo. ⁵ Echa'ã Tumpa pemivendise ete, pepuere vaerã pemimbeu ñru vae reta pe jare picuaa cavi vaerã. ⁶ Jare jucuarãi pe reta picuaaca ñru vae reta pe añetete vae co jocua amimbeu peve Cristo regua vae. ⁷ Jucuarãi uata'ã etei peve penti ave mbaepuere Espíritu Santo umee vae. Jare jecuaeño peãro piyerovia reve yandeYa Jesucristo ou ye vaerã. ⁸ YandeYa Jesucristo jecuaeño pemimirãtata jae ou ye regua, agüiye vaerã quía ipuere pembijeco mbae re jocua ara. ⁹ Tumpa jecuaeño uyapo jei uyapota vae. Echa'ã jae preparavo, pico vaerã Tai ndive. Jae co yandeYa Jesucristo.

Upurugüirovia vae reta uyembiyao uyugüi

¹⁰ Cherivi reta, che pumiñera, yandeYa Jesucristo jee re agüiye vaerã piyeaca uyupii, jare agüiye vaerã piyembiyao piyugüi. Pumiñera pico vaerã penti ramiño. Toyovaque pepia pe piyemingueta oĩ vae jare pearacuaa. ¹¹ Echa'ã Cloé jenta pegua reta umimbeu cheve peregua, cherivi reta, quirãi piyeaca pico uyupii. ¹² Amocue pe reta pere: “Che co jae Pablo regua.” Jare amocue pere: “Che co jae Apolos regua.” Jare ñru pe reta pere: “Che co jae Pedro regua.” Jare ñru pe reta pere: “Che co jae Cristo regua.” Jáeramo tae peve cua: ¹³ Cristo uyembiyao'ã etei. Che amano'ã co curusu re pembaeyoa reta jeco pegua. Piyembibautizaca'ã co cheree re. ¹⁴ Amee yasurupai Tumpa pe quirãi mboviño pumbibautiza. Jaeño ambibautiza Crispo jare Gayo. ¹⁵ Jáeramo pepuere'ã etei pere cheree re piyembibautizaca co. ¹⁶ Añete yepe, ambibautiza Estéfanos jenta pegua reta vi. Ërei chemandua'ã ambibautiza ra ñru vae. ¹⁷ Echa'ã Cristo chembou'ã apurumbibautiza vaerã. Jaeño chembou amimbeu vaerã ñee icavi vae. Ërei aiporu'ã ñee iyaracuaa catu vae pegua. Echa'ã jocua nunga ñee aiporu yave, aramo ñee Cristo icurusu regua ndarau tẽi mbaepuere güinoi.

Cristo co jae Tumpa iyaracuaa jare imbaepuere

¹⁸ Echa'ã yamimbeu yave ñee Cristo icurusu regua, cañitei pe yugüiraata vae reta ipia pe uyemingueta tẽi jae penti mbiquere co. Ërei cua ñee rupi Tumpa uicuaaca yandevae imbaepure. Echa'ã yande yayemiasaca co. ¹⁹ Echa'ã Tumpa ñee pe uyecuatía oĩ cuarãi: “Che aicuaacata quirãi iyaracuaa catu echa vae reta añetete iyaracuaa'ã etei co” —jei Tumpa—.

“Jae ramiño vi aicuaacata quirãi opaete mbaembae uicuaa cavi echa vae reta añetete uicuaa cavi'ã etei co” —jei.

Jucuarãi uyecuatía oĩ.

²⁰ ¿Quía ra co jae iyaracuaa catu vae? ¿Quía ra co jae mboroyocui re oporombocoe vae? ¿Quía ra co jae ipoqui cua ivi pe uyeaca vaerã vae? Echa'ã Tumpa uicuaaca quirãi aracuaa cua ivi pegua mbae'ã co. ²¹ Ivi pegua reta ipuere'ã uicuaa Tumpa jae reta iyaracuaa catu echa vae rupi. Ërei Tumpa umbiasa upurugüirovia vae ñee icavi vae yamimbeu va rupi, yepe tẽi penti mbiquere echa ñru vae reta pe.

²² Echa'ã judío reta uipota yayapo vaerã penti miacañi jae reta uecha vaerã. Jare judío mbae vae reta uipota yayemingueta vaerã iyaracuaa catu vae cua ivi pegua reta uyemingueta rami. ²³ Ërei yande yamimbeu chupe reta quirãi Cristo umano curusu re. Ërei cua yamimbeu vae penti yembiavai judío reta pe, jare judío mbae vae reta ipia pe uyemingueta tẽi penti mbiquere co. ²⁴ Ërei Tumpa uiparavo vae reta pe Tumpa uicuaaca

Cristo rupi quirāi tuicha ete co imbaepuere jare quirāi iyaracuaa catu ete co. Tumpa uiparavo vae reta co jae judío reta jare judío mbae vae reta. ²⁵ Ime amocue ivi pegua iyaracuaa catu vae. Ērei Tumpa iyaracuaa catu ete ye cua reta güi, yepe tēi jae reta ipia pe uyemingueta tēi penti mbiquere co Tumpa Cristo rupi uyapo vae. Jae ramiño vi ime amocue ivi pegua mbaepuere güinoi vae. Ērei Tumpa imbaepuere tuicha ete cua reta imbaepuere güi, yepe tēi jae reta ipia pe uyemingueta tēi Tumpa Cristo rupi uyapo vae jucuarāi uyapo mbaeti mbaepuere güinoi ramo. ²⁶ Cherivi reta, pemandúa Tumpa preparavo vae re, yepe tēi jeta'ā co iyaracuaa catu vae reta pepite pe - jucuarāi jei chupe reta ivi peguareta - jare jeta'ā co mbaepuere güinoi vae reta, jare jeta'ā co mburuvicha reta inemoñaeta. ²⁷ Echa'ā Tumpa uiparavo iyaracuaa mbae vae reta cua ivi pegua re vae reta, iyaracuaa catu vae reta uicuaa vaerā iyaracuaa mbae'ā co Tumpa pe. Jae ramiño vi Tumpa uiparavo mbaepuere güinoi mbae vae reta cua ivi pegua re vae reta, mbaepuere güinoi vae reta uicuaa vaerā imbaepuere mbae'ā co Tumpa pe. ²⁸ Jae ramiño vi Tumpa uiparavo iparavete vae reta jare uñerērīroca vae reta. Uiparavo vi mbaembae uyembutuichaca mbae vae, uicuaaca vaerā mbae'ā co mbaembae uyembutuichaca vae. ²⁹ Jae jucuarāi uyapo Tumpa, agüiye vaera quía uyembicate jae jovaque. ³⁰ Ērei Tumpa etei peapo penti ramiño Cristo Jesús ndive. Echa'ā Cristo Jesús rupi Tumpa umee yandeve aracuaa. Jae ramiño vi Cristo Jesús rupi Tumpa yanembujupi jare ñañeño tee iyupeguarā jare yanderepi mbaeyoa güi. ³¹ Jáeramo yayapo Tumpa inee pe uyecuatía oī vae rami. Echa'ā uyecuatía oī cuarāi: “Ime yave quía uipota uyembicate vae, tuyembicate yandeYa re.” Jucuarāi uyecuatía oī.

2

Umimbeu quirāi Cristo umano curusu re

¹ Jare aa pepi yave, cherivi reta, amimbeu peve añete vae Tumpa regua. Aipota'ā pepia pe piyemingueta vaerā aicatu co chemiari vaerā ani chearacuaa catu co. ² Echa'ā pepite pe añ rambueve, chequirēi amimbeu peve cuaño - Jesucristo jare quirāi jae umano curusu re. ³ Jare pepite pe añ rambueve, chepia pe ayemingueta aramoi ndarau piyapisaca cheré. Jáeramo ariri aquiye ramo. ⁴ Jare chemiari peve yave amimbeu vaerā peve ñee icavi vae, aiporu'ā ñee reta cuimbae iyaracuaa catu vae uiporu vae aicuaaca vaerā peve ñee icavi vae añete co. Echa'ā chemiari peve yave, aicuaaca peve ñee icavi vae añete co Espíritu Santo imbaepuere rupi. ⁵ Jare cua ayapo agüiye vaerā cuimbae iyaracuaa catu vae jei vae jeco pegua pepurugüirovia. Aipota pepurugüirovia vaerā Tumpa imbaepuere jeco pegua.

Tumpa uicuaaca yandeve Espíritu Santo rupi vae

⁶ Ērei ore nduiporu ñee aracuaa pegua ipirāta ipurugüirovia re vae reta ipite rupi. Ērei cua aracuaa ivi pegua'ā co jare jae'ā vi co ivi pegua reta juvicha reta iyaracuaa. Echa'ā cua juvicha reta imbae opata. ⁷ Ērei ore ndoe vae aracuaa Tumpa güi ou vae co. Cua aracuaa tenonde yave uyecuaa'ā. Echa'ā tenonde yave Tumpa uicuaaca'ā etei. Ērei iyipi güive Tumpa iquirēi uicuaaca yandeve cua aracuaa, yayembiasaca vaerā. ⁸ Ērei mbaeti penti ave ivi pegua reta juvicha uicuaa cua aracuaa. Echa'ā mburuvicha reta uicuaa yave mona, ndarau tēi uyuaa curusu re yandeYa yembidora pegua vae. ⁹ Ērei Tumpa inee pe uyecuatía oī cuarāi:

“Mbaeti quía uecha jare mbaeti quía uyandu jocua mbaembae Tumpa umicuatīro ma uau Tumpa vae reta pe vae.

Mbaeti vi quía ipia pe uyemingueta jese.”

Jucuarāi uyecuatía oī. ¹⁰ Ērei Tumpa uicuaaca yandeve Espíritu Santo rupi. Echa'ā Espíritu Santo uicuaa opaete. Uicuaa vi opaete Tumpa regua yavai ete yaicuaa vaerā vae.

¹¹ Pentu vae ipuere'ā uicuaa ĩru vae ipia pe uyemingueta vae. Jae eteño uicuaa. Jae ramiño vi mbaeti quiave uicuaa Tumpa ipiyemingueta. Jaeño Tumpa iEspíritu uicuaa. ¹² Jare Tumpa umee ma yandeve Espíritu Santo. Jáeramo yandepia pe yayemingueta'ā ma upurugüirovia mbae vae reta ipia pe uyemingueta rami. Echa'ā Espíritu Santo uicuaaca yandeve mbaembae Tumpa umee yandeve ipiacavi jeco pegua vae. ¹³ Jare ore numimbeu ĩru vae reta pe cua mbaembae. Ērei nduiporu'ā ñee iyaracuaa catu

vae oporombõe jese vae reta. Ore nduiporu ñee Espiritu Santo oremboe jese vae reta: Jáeramo nduicuaaca ñru vae reta pe mbaembae Espiritu Santo pegua ñee Espiritu Santo oremboe jese vae reta pe.

¹⁴ Ërei upurugüirovia mbae vae uipota'ã güirovia Tumpa iEspiritu oporombõe jese vae. Echa'ã mbae'ã echa chupe. Ipuere'ã uicuaa. Echa'ã jaëno Espiritu Santo ico ipia pe vae ipuere uicuaa. ¹⁵ Echa'ã Espiritu Santo ico ipia pe vae ipuere uicuaa cavi opaete cua mbaembae. Ërei upurugüirovia mbae vae ipuere'ã uicuaa cavi upurugüirovia vae regua. ¹⁶ Echa'ã mbaeti quía uicuaa cavi yandeYa ipiyemingueta, jare mbaeti quía ipuere ombõe yandeYa mbaembae re. Ërei yande yandepia pe yayemingueta Cristo ipia pe uyemingueta rami.

3

Uyeyocui reta Tumpa pe

¹ Cherivi reta, chepuere'ã pumingueta ipirãta ipurugüirovia re vae reta pe ayemingueta rami. Pumingueta jei vae rupiño yugüireco vae reta pe ayemingueta rami jare Cristo re güirovia ramo vae reta pe ayemingueta rami. ² Pe reta co jae sambiai necheño jou vae reta rami. Pe reta jae'ã co ucuaa vae tembu ipuere jou vae reta rami. Echa'ã che pomboe mbaembae yavai'ã etei yaicuaa vaerã vae re. Chepuere'ã pomboe mbaembae yavai yaicuaa vaerã vae re. Echa'ã jecuaëno pepuere'ã picuaa yavai vae. ³ Pe reta pepia pe piyemingueta jei vae rupiño yugüireco vae reta ipia pe uyemingueta rami. Echa'ã peacataã jare piyovaicho uyupii. Cua uicuaa quirãi pico upurugüirovia mbae vae reta yugüireco rami. Echa'ã jae reta yugüireco jei vae reño. ⁴ Echa'ã amocue pe reta pere: “Che co jae Pablo regua.” Jare ñru pe reta pere: “Che co jae Apolos regua.” Cua uicuaa quirãi pepia pe piyemingueta jei vae reño yugüireco vae reta ipia pe uyemingueta rami co.

⁵ Che mbae'ã co, jare Apolos mbae'ã co. Jaeño nduyeyocui yandeYa pe, pe reta perovia vaerã jese. Jare penti penti nduyapo mbaraviqui yandeYa umee oreve vae. ⁶ Che rani amimbeu peve ñee icavi vae perovia vaerã jare taicue rupi Apolos pembedi picuaa cavi vaerã. Ërei Tumpa co jae pemimirãta pepurugüirovia re vae. Yamijaanga penti temiti. Che co jae temiti oñoti vae rami, jare Apolos co jae temiti umbiu vae rami. Ërei Tumpa etei umbicuacuaa temiti. ⁷ Jáeramo che mbae'ã co, yepe tõi che co jae temiti oñoti vae rami. Jae ramiño vi Apolos mbae'ã co, yepe tõi jae co temiti umbiu vae rami. Mbaraviqui Tumpa iparaviqui co. Echa'ã jae umbicuacuaa temiti. ⁸ Jare temiti oñoti vae jare temiti umbiu vae uparaviqui penti ramiño. Jare Tumpa umbiepita penti penti pe iparaviqui rupi. ⁹ Echa'ã ore nduparaviqui nduico Tumpa ndive. Pe reta co jae temiti Tumpa ico pe ñugüinoi vae reta rami. Jae ramiño vi pe reta co jae penti tenta Tumpa uyapo oï vae rami. ¹⁰ Che co jae icatu tenta uyapo vae rami. Jare Tumpa umaëño cheré jae ipiacavi jeco pegua añoño vaerã tenta iguapicarã. Jare ñru vae co jae tenta oñono oï iguapica írambo vae rami. Ërei penti penti tuñemoa ngatu quirãi uparaviqui tenta iguapica írambo. ¹¹ Echa'ã Jesucristo co jae tenta iguapica rami. Tenta iguapica uñeñoño ma co. Mbaeti ye co ñru tenta iguapica. ¹² Tenta iyapoa reta ipuere oñono tenta iguapica írambo oro jare corepoti jare ita ipõra ete vae, ani ipuere oñono ivira reta jare capii jare atigüe. ¹³ Penti penti iparaviqui uyecuaata co jocua ara Tumpa uicuaa yave. Echa'ã jocua ara imeta co tata, jare tata uicuaacata mbae nunga mbaraviqui penti penti uyapo vae. ¹⁴ Mbaraviqui tenta iguapica írambo uyeyapo vae ocai'ã yave, Tumpa umbiepita jocua mbaraviqui uyapo vae pe. ¹⁵ Mbaraviqui ocai yave, Tumpa ndarau umbiepi jocua mbaraviqui uyapo vae pe. Ërei mbaraviqui uyapo vae etei uyembiasacata co, penti cuimbae oyepe tata güi vae rami.

¹⁶ Picuaa co quirãi pe reta co jae Tumpa jo jare quirãi Tumpa iEspiritu ico pepia pe. ¹⁷ Ime yave quía Tumpa jo urucumegua vae, jocua Tumpa umbaita. Echa'ã Tumpa jo uñeñoño tee Tumpa peguarã. Pe reta co jae Tumpa jo.

¹⁸ Agüye quía tuyembitavi. Ime yave quía ipia pe uyemingueta iyaracuaa catu co aracuaa ivi pegua re vae, tuicuaa uicuaa cavi'ã co mbae. Jucuarãi uicuaa yave, añetete iyaracuaa catuta co. ¹⁹ Echa'ã Tumpa uicuaa quirãi aracuaa cua ivi pegua mbae'ã co. Echa'ã Tumpa iñee pe uyecuatía oï cuarãi: “Tumpa umiamiri iyaracuaa catu vae reta aracuaa jae reta güinoi vae re.” ²⁰ Jare: “YandeYa uicuaa quirãi iyaracuaa catu vae reta

ipiyemingueta mbae'ã co." Jucuarãi uyecuatía oĩ. ²¹ Jáeramo agüiye quía tuyembicate cuimbae reta re. Echa'ã Tumpa uyapo opaete mbaembae pombori vaerã. ²² Echa'ã Tumpa umee peve Pablo jare Apolos jare Cefas pombori vaerã. Umee vi peve mbaembae ivi pegua piporu vaerã. Jae ramiño vi umee peve tecove pico cavi vaerã, jare pemoano yave icavita peve. Opaete añave uyeyapo vae jare opaete uyeyapota vae icavita peve. ²³ Jare pe reta co jae Cristo imbae, jare Cristo co jae Tumpa imbae.

4

Uyeyocui reta Tumpa pe Tumpa jei vae rupi

¹ Oreré pepia pe piyemingueta yave, pemandúa cua re: Ore co jae Cristo jembiocui reta. Tumpa uicuaaca oreve jocua tenonde yave uyecuaa mbae vae, ore nduicuaaca vaerã ñru vae reta pe. ² Jare penti upurumimbaraviqui vae jecuaeño uipota jembiocui uyapo vaerã jei vae. ³ Ërei pe reta cherãa yave ani ñru vae reta cherãa yave, mbae'ã co cheve. Che añeãa'ã vi. ⁴ Yepe tẽi aicuaa'ã co mbae ayembijeco jese vaerã, cua uipota'ã jei anoi'ã co teco. Echa'ã yandeYa co jae cherãa vae. ⁵ Jáeramo agüiye ñapuruãa añave. Peãro yandeYa ou ye regua. Echa'ã jae güeruta tembipe opaete mbaembae añave uñemi pítumimbi pe vae uyecuaa cavi vaerã. Echa'ã yandeYa uicuaacata opaete vae ipiyemingueta. Jayave Tumpa umbiyeroviata penti penti. ⁶ Cherivi reta, cua moromboe amimbeu ma peve chiyee jare Apolos re, piyemboe vaerã cua pemingueta oreré vae rupi quirãi icavi'ã pemptuicha vaerã cuimbae retaño. Pepia pe piyemingueta cuimbae reta re uyecuatía oĩ vae rupiño. Jare agüiye pemptuicha penti vae ñru vae güi. Echa'ã jucuarãi piyapo yave, periro jocua ñru vae. ⁷ ¿Quía ra co jei nde icavi ete ñru vae güi? ¿Mbae ra co nenoï Tumpa umee'ã ndeve vae? Tumpa co umee ndeve opaete nenoï vae. Jáeramo ¿maera pa ndiyembicate? ¿Ndepia pe ndiyemingueta ra Tumpa umee'ã co ndeve?

⁸ Pe reta piyerovia iyangapii vae reta uyerovia rami. Jare piyembicate icocatu vae reta uyembicate rami. Jae ramiño vi piyembicate mburuvicha reta uyembicate rami, jare pepia pe piyemingueta ndipo jucuarãi piyeyapo ore pombori mbae reve. Ërei tome piyeyapo mburuvicha añetete vae retarã, ore vi ndoporoyocui vaerã pe reta ndive. ⁹ Ore co jae Cristo jemimondo reta. Ërei chepia pe ayemingueta quirãi Tumpa oreñoño opaete vae jaicue. Ore co jae jocua cuimbae uyeparavo umano vaerã vae reta rami. Opaete vae umae oreré. Ángel reta umae oreré, jare ivi pegua reta umae oreré. ¹⁰ Ore nduyeyocui Cristo pe ramo, ñru vae reta orereni imbiquere vae reta. Ërei pe reta pepia pe piyemingueta pearacuaa catu co Cristo re. Ore co jae ipirãta mbae vae reta rami, jare pe reta co jae ipirãta vae reta rami. Pe reta piyepiua ñru vae reta pe, Ërei ñru vae reta orereriro. ¹¹ Jecuaeño oriyembai jare oreúe. Jecuaeño uata oreve temimonde. ñru vae reta orenupa. Mbaeti co orerenta. ¹² Jecuaeño ore candi nduparaviqui orepo pe. ñru vae reta uyepipeyu oreré, Ërei ore nduyerure Tumpa pe uyapo vaerã chupe reta icavi vae. ñru vae reta uyapo mbaembae icavi mbae vae oreve, Ërei ore orepiaguasu chupe reta. ¹³ ñru vae reta iyapu oreré, Ërei ore orempiari cavi chupe reta. Jecuaeño ñru vae reta oremombo ipite güi, iti jare icavi'ã ma uyeporu vaerã vae uyemombo rami.

¹⁴ Aicuatía'ã cuarãi pumimaraca vaerã. Pe reta co jae cherivi aau vae reta. Jáeramo cuarãi pumbiaracuaa. ¹⁵ Echa'ã yepe tẽi jocua pemboe Cristo re vae reta uyepapa diez mil, Ërei jeta'ã co peru. Echa'ã che co jae peru mburugüirovia Cristo Jesús regua re. Echa'ã che amimbeu peve ñee icavi vae. ¹⁶ Jáeramo che pumiñera pico vaerã pecha che aico rami.

¹⁷ Cua jeco pegua amondo ma peve Timoteo. Jae co cherivi aau vae, jare jae uyeyocui cavi yandeYa pe. Jae pemimanduata co quirãi che aico Cristo re, jare quirãi cuarãi amboe opaete upurugüirovia vae uyembatimbati vae reta opaete re rupi. ¹⁸ Ërei amocue pepite pe ñugüiñoi vae uyembutuicha, ipia pe uyemingueta tẽi ndarau ma aa pepi ramo. ¹⁹ Ërei aata imambaeño pepi, yandeYa uipota yave. Jare aa yave, aicuaata mbae ipuere uyapo jocua uyembutuicha vae reta. Ndarau apirandu mbae ra jei reta. ²⁰ Echa'ã yayeyocui Tumpa pe yave, ñanoï mbaepuere. Yayeminguetaiño'ã. ²¹ ¿Mbae nunga ra pipota? ¿Pipota ra aa vaerã pepi aiporaraca peve vaerã? Ani ¿pipota ra añemimichi reve aicuaaca vaerã peve chepurauu?

5

Menda re uyuvanga vae uñeña

¹ Jeta vae uicuaa quirāi penti pepite pe oī vae güireco ichi-raanga. Jocua uyuvanga menda re vae mbae pichīi ete vae uyapo. Echa'a uicuaa'a Tumpa vae reta umaño'a etei uyapo vaerā jucuarāi. ² Agüiyeta tēi piyembicate mbae re. Pemara eteta tēi ma cua re. Pemombota tēi pepite güi jocua cuimbae jucuarāi jeco vae. ³ Echa'a yepe tēi che aī'a co pepi, ērei jecuaño chepia pe ayemingueta peré, jare aāa ma jocua cuimbae jucuarāi jeco vae. Jucuarāi aāata tēi pepi aī yave. ⁴ Piyembati yave pemiadora vaerā yandeYa Jesús, pemandúa quirāi che chepia pe ayemingueta aī peré jare quirāi yandeYa Jesús imbaepuere penoita co. ⁵ Agüiye pemaño jocua cuimbae re uyembati vaerā pe reta ndive. Jucuarāi imarata uyapo vae re, jare jecove uyembiasacata yandeYa ou ye yave.

⁶ Icavi'a co piyembicate pico vaerā. Picuaa co jocua yae vae: "Mboviño levadura umbiyasi opaete masa uñemona vae." ⁷⁻⁸ Yamijaanga judío reta pascua pe uyapo vae. Echa'a judío reta omombo mbiyape indechi vae levadura güinoi vae, jare fiesta uyapo yave jou mbiyape ipiau vae levadura güinoi mbae vae. Jae ramiño vi pe reta co jae mbiyape ipiau vae levadura mbaeti güinoi vae rami. Jáeramo agüiye ma yayapo icavi mbae vae yayapose vae. Echa'a Cristo uyeyucaca yanderé, pascua pe maemimba reta uyeyucaca uñemee vaerā Tumpa pe rami. Jáeramo jecuaño yayapo icavi vae añete vae rupi.

⁹ Che aicutatía peve ĩru tupapire, jare joco pe che poyocui agüiye vaerā piñemiĩru aguasa uyapo vae reta ndive. ¹⁰ Poyocui'a etei piyembiyao vaerā opaete cua ivi pegua aguasa uyapo vae reta güi, jare ĩru vae reta imbaembae uipota vae reta güi, jare ĩru vae reta güi imbaembae upĩro vae reta güi, jare tumpa-raanga reta umbiadora vae reta güi. Echa'a jucuarāi piyapo yave, pepuereta'a tēi pico cua ivi pe. ¹¹ Ĕrei aicutatía co peve agüiye vaerā piñemiĩru penti upurugüirovia vae jei iyupe vae ndive aguasa uyapo yave, ani ĩru vae reta imbaembae uipota yave, ani tumpa-raanga reta umbiadora yave, ani icavi mbae vae japicha reta coti jei yave, ani jecuaño usavipo yave, ani ĩru vae reta güi imbaembae upĩro yave. Agüiye etei pecaru jocua nunga ndive. ¹²⁻¹³ Echa'a chepuere'a etei aāa upurugüirovia mbae vae reta. Tumpa uāata co jocua reta. Ĕrei pe reta penoi mbaepuere peāa vaerā upurugüirovia vae reta. Jáeramo pembisiri pepite güi cuimbae jocua icavi mbae vae uyapo vae.

6

Ñeapo reta

¹ Ime yave quía pepite pe oī vae ĩru vae mbae re umbijeco vae, icavi'a co uñeapo vaerā ĩru vae re upurugüirovia mbae vae reta pe. ¿Maera pa uñeapo'a jese uñeñoño tee Tumpa peguarā vae reta pe? ² ¿Picuaa'a pa uñeñoño tee Tumpa peguarā vae reta uāata co ivi pegua reta? Jáeramo ¿maera pa pepuere'a pepuruāa mbaembae yavai'a ñapuruāa jese vaerā vae re? Echa'a pe reta peāata ivi pegua reta. ³ Picuaa co quirāi yande ñaāata ángel reta. Jáeramo ¿maera pa pepuere'a pepuruāa cua ivi pegua teco re? Echa'a cua mbaembae yavai'a co ñapuruāa jese vaerā. ⁴ Jáeramo ime yave quía ĩru vae cua ivi pegua teco re umbijeco vae, agüiye pemaño upurugüirovia mbae vae reta re uāa vaerā. ⁵ Cuarāi jae pumimaraca vaerā. ¿Mbaeti pa co penti iyaracuaa catu vae pepite pe? ¿Mbaeti pa quía pepite pe penti ñeapo ipuere uyapicatu vae? ⁶ Echa'a upurugüirovia vae reta uñeapo iyee upurugüirovia mbae vae reta pe.

⁷ Ĕrei jucuarāi piñeapo piyee yave, penti teco tuicha vae co. Agüiye piñeapo piyee, yepe tēi penti vae uyapo icavi mbae vae ĩru vae pe ani penti vae umbitavi ĩru vae. ⁸ Pe reta piyapo icavi mbae vae ĩru upurugüirovia vae reta pe jare pemitavi ĩru upurugüirovia vae reta.

⁹ Picuaa co quirāi jupi mbae vae reta ndarau ico Tumpa iporoyocua pe. Agüiye piyemitavi. Aguasa uyapo vae reta, jare tumpa-raanga umbiadora vae reta, jare menda re uyuvanga vae reta, jare cuimbae uyupii uyereco vae reta, ¹⁰ jare imonda vae reta, jare ĩru vae reta imbaembae uipota vae reta, jare usavipo vae reta, jare uyepipeyu vae reta, jare ĩru vae reta güi imbaembae upĩro vae reta ndarau ico Tumpa iporoyocua pe. ¹¹ Jare jucuarāi piyapose amocue pe reta. Ĕrei yandeRu Tumpa iEspiritu oyoe pegüi opaete

cua mbaembae icavi mbae vae, jare peñono tee Tumpa peguarā, jare pembujupi. Cuarāi uyeyapo peve yandeYa Jesucristo jee re.

Pembiadora Tumpa perete pe

¹² Chepuere ayapo opaete aipota vae. Ērei icavi'ā opaete ayapo vaerā. Añete co, chepuere ayapo opaete aipota vae. Ērei ndarau che amaēñoca cherē mbae pe. ¹³ Tembú yanderie peguarā co, jare yanderie tembú pegua co. Ērei Tumpa umbaita co mocui reve. Ērei ñanoi'ā yanderete yayapo vaerā aguasa. Ñanoi yanderete yayeyocui vaerā yandeYa pe, jare yandeYa ipuere umee yandeve opaete yanderete uipota vae. ¹⁴ Jare Tumpa umbijecove ye yandeYa güeru umanocue vae reta ipite güi. Jae ramiño vi umbijecove yeta yanderete güeru umanocue vae reta ipite güi imbaepuere pe.

¹⁵ Picuaa co perete co jae Cristo jete pegua. Jáeramo agüiye etei peya cuña iaguasapota vae re. ¹⁶ ¿Picuaa'ā pa quirāi cuimbae uñemñiru penti cuña iaguasapota vae ndive vae uyeyapo pentiño jae ndive? Echa'ā Tumpa jei cuarāi: “Mocui reve uyeyapota penti ramiño.” Jucuarāi jei. ¹⁷ Ērei jocua uñemñiru yandeYa ndive vae uyeyapo pentiño yandeYa ndive Espiritu Santo rupi.

¹⁸ Agüiye piyapo aguasa. Opaete ĩru mbaeyoa piyapo vae piyapo'ā co perete pe. Ērei aguasa piyapo yave, perete coti etei mbaeyoa piyapo. ¹⁹ ¿Picuaa'ā pa perete co jae Espiritu Santo ico pipe vae? Echa'ā Tumpa ombou peve Espiritu Santo, jare jae ico pepia pe. Jáeramo pe reta pico'ā ma piyupeguarā. ²⁰ Echa'ā Tumpa umbiepi jeta peré, peapo vaerā jae imbaerā. Jáeramo pembiadora Tumpa perete pe jare perecove pe. Echa'ā mocui reve Tumpa imbae co.

7

Menda regua

¹ Añave aipota aicutía peve jocua mbaembae picuatía cheve jese vae re. Icavi tēi co cuimbae agüiye vaerā güireco cuña. ² Ērei agüiye vaerā piyapo aguasa, penti penti cuimbae tugüinoi jembirecoi jare penti penti cuña tugüinoi imei. ³ Cuimbae tuico jembireco ndive, uyupii reta icavi yugüireco vaerā vae rupi. Jae ramiño vi cuña tuico ime ndive, uyupii reta icavi yugüireco vaerā vae rupi. ⁴ Cuña ipuere'ā uyapo jete pei jae uipota uyapo vae rupi. Echa'ā jete ime imbae co. Jae ramiño vi cuimbae ipuere'ā uyapo jete pei jae uipota uyapo vae rupi. Jae jete jembireco imbae co. ⁵ Mocui reve pipota'ā pepoco piyee yave mbovi ara pegua piyerure vaerā Tumpa pe, icaviño jucuarāi piyapo. Ērei agüiye piyeeya ete. Taicue rupi pepoco ye piyee, agüiye vaerā Satanás pe perēgua pepuere'ā ma piyopia yave perete uipota vae güi. ⁶ Ērei cua che jae peve picuaa vaerā mbae icavi piyapo vaerā. Poyocui'ā co mbae re. ⁷ Ērei aipota tēi opaete cuimbae reta yugüireco vaerā che aico rami. Ērei penti penti güinoi Tumpa umee chupe vae. Jare Tumpa umee penti vae pe vae uyuavi umee ĩru vae pe vae güi.

⁸ Jáeramo che jae ndeiño umenda vae reta pe jare ime umano vae reta pe cua: Icavi tēi co agüiye vaerā umenda, che amenda'ā rami. ⁹ Ērei ipuere'ā yave oyopia jete uipota vae güi, icavi co umenda vaerā. Echa'ā ipuere'ā yave uyapo jete uipota ete uyapo vae, uiporara eteta co. Jáeramo icavi co umenda vaerā.

¹⁰ Jare ayocui umenda vae reta cuarāi - ěrei cheño'ā ayocui, echa'ā yandeYa vi oyocui cuarāi: Cuña agüiye tomombo ime. ¹¹ Ērei omombo yave ime, tuico umenda mbae reve, ani tuñatima ye ime pe tuico ye jae ndive. Jare cuimbae agüiye tomombo jembireco.

¹² Ērei ĩru reta pe che jae cua - mboroyocui yandeYa umee vae'ā co: Ime yave penti cuimbae upurugüirovia vae jare jembireco upurugüirovia'ā yave, jembireco uipota yave ico jae ndive, agüiye tomombo. ¹³ Jae ramiño vi ime yave penti cuña upurugüirovia vae jare ime upurugüirovia'ā yave, ime uipota yave ico jae ndive, agüiye tomombo. ¹⁴ Echa'ā cuimbae upurugüirovia mbae vae aramoi güiroviata Cristo re jembireco upurugüirovia vae jeco pegua. Jae ramiño vi cuña upurugüirovia mbae vae aramoi güiroviata Cristo re ime upurugüirovia vae jeco pegua. Jare uyemombo reta yave, isambiai reta ndarau ndipo güirovia Cristo re. Ērei uyemombo'ā reta yave, aramoi güiroviata Cristo re. ¹⁵ Ērei upurugüirovia mbae vae omombo yave upurugüirovia vae, cua mboroyocui amimbeu peve vae upurugüirovia vae peguarā'ā co. Echa'ā Tumpa yandeparavo yaico cavi vaerā yandepiacatu reve. ¹⁶ Echa'ā nde, cuña, ndicuaa'ā uyembiasacata ra neme ndereco

pegua. Jae ramiño vi nde, cuimbae, ndicuaa'ã uyembiasacata ra nembireco ndereco pegua.

¹⁷ Ërei penti penti jecuaeño tuyapo mbaraviqui yandeYa umee chupe uyapo vaerã vae. Penti penti tuico, Tumpa ueni uyembiasaca vaerã yave ico rami. Jare jucuarã iyocui opaete upurugüirovia vae uyembatimbatí vae reta. ¹⁸ Aramoi Tumpa ueni uñemicircuncidaca vae uyembiasaca vaerã. Tupita jucuarãño. Jae ramiño vi aramoi Tumpa ueni uñemicircuncidaca mbae vae uyembiasaca vaerã. Agüiye tuñemicircuncidaca. ¹⁹ Nañemicircuncidaca yave, mbae'ã co. Jae ramiño vi ñañemicircuncidaca'ã yave, mbae'ã co. Jaerã icavi yayapo vaerã Tumpa iporoyocui reta. ²⁰ Penti penti jecuaeño tuico Tumpa ueni uyembiasaca vaerã yave ico rami. ²¹ Aramoi Tumpa ueni penti uyeyocui vae uyembiasaca vaerã. Agüiye tipiatiti jocua re. Ërei ipuere yave uyeyora ipatrón güi, icavi co uyapo vaerã. ²² Echa'ã yandeYa ueni yave uyeyocui vae uyembiasaca vaerã, yandeYa oyora ma opaete imbaeyoa güi. Jae ramiño vi yandeYa ueni yave uyeyocui mbae vae uyembiasaca vaerã, jae uyeyapo ma Cristo jembiocuirã. ²³ Tumpa umbiepi ma perepi vaerã. Jáeramo piyeyocui chupe. ²⁴ Cherivi reta, penti penti tuico Tumpa ueni uyembiasaca vaerã yave ico rami. Jucuarãi tuyeyocui Tumpa pe.

²⁵ Añave taicuatía peve ndeiño umenda vae re. Anoi'ã mboroyocui yandeYa güi jesegua. Ërei che tupumbiaracua. Jare pepuere chererovia, yandeYa cheparareco ramo. ²⁶ Jáeramo che jae icavi co penti cuimbae oí vaerã añave oí rami, cua ara reta pe yaiporara ramo. ²⁷ Jocua cuimbae umenda ma vae agüiye tomombo jembireco. Jare jocua cuimbae ndeiño umenda vae, agüiye tueca jembirecorã. ²⁸ Ërei umenda yave, iyoa'ã co. Jae ramiño vi cuñatai umenda yave, iyoa'ã vi co. Ërei yemipia'ã ivi pegua güinoita umenda vae reta, jare che aipota'ã piyemipia'ã vaerã jucuarãi.

²⁹ Ërei che jae peve cua, cherivi reta: Mbaetita ma ima yaico vaerã. Jáeramo mbaeti ma tiempo jembireco güinoi vae reta uyemipia'ã ete vaerã jembireco re. ³⁰ Jae ramiño vi mbaeti ma tiempo ipiatiti vae reta uyao vaerã. Jae ramiño vi mbaeti ma tiempo uyerovia vae reta upuca vaerã. Jae ramiño vi mbaembae ogua vae reta mbaeti ma güinoi tiempo opa vaerã uiporu imbaembae. ³¹ Jare mbaembae cua ivi pegua uiporu vae agüiye tuiporta ete. Echa'ã mbaembae cua ivi pegua opata co.

³² Ërei aipota'ã mbae pemipia'ã vaerã. Cuimbae umenda mbae vae uyandareco yandeYa iparaviqui re. Echa'ã uipota umbiyerovia yandeYa. ³³ Ërei cuimbae umenda vae uyandareco mbaembae ivi pegua re. Echa'ã uipota umbiyerovia jembireco. ³⁴ Jae ramiño vi cuña ime reve vae uyuvavi cuñatai ndeiño umenda vae güi. Echa'ã ndeiño umenda vae uyandareco yandeYa iparaviqui re. Echa'ã uipota jete jare jecove uñeño tee vaerã Tumpa peguarã. Ërei umenda vae uyandareco mbaembae ivi pegua re. Echa'ã uipota umbiyerovia ime.

³⁵ Jare cua che jae peve icavi peve vaerã. Aipota'ã etei poyopia menda güi. Jaerã aipota piyapo vaerã jocua icavi piyapo vaerã vae, pepuere vaerã piyeyocui yandeYa pe piyemipia'ã mbae reve.

³⁶ Ërei penti cuimbae uicuaa yave uyapo'ã co jupi vae tayi ndeiño umenda vae coti - echa'ã aramoi tayi tairusu'ã ma jare uipota tẽi umenda. Tumaerã tayi re umenda vaerã. Jucuarãi uyapo yave, iyoa'ã co. ³⁷ Ërei aramoi ñru cuimbae ipia pe ipirãta jare güinoi mbaepuere uyapo vaerã iquirẽi uyapo vae yepe tẽi yavai chupe, jare jae ipia pe uyemingueta cavi tayi re agüiye vaerã umaerã jese umenda vaerã. Jucuarãi yave, icavi uyapo. ³⁸ Jáeramo cuimbae umaerã tayi re umenda vaerã vae icavi uyapo. Ërei cuimbae umaerã'ã tayi re umenda vaerã vae icavi ete uyapo.

³⁹ Mboroyocui jei vae rupi cuña ime pegua co ime ico rambueve. Ërei ime umano yave, cuña ipuere umenda ye jae uipota vae ndive. Ërei tumenda cuimbae yandeYa re güirovia vae ndive. ⁴⁰ Ërei che jae icavi eteta co chupe umenda'ã ye yave. Jare aicuaa Tumpa iEspíritu chembiaracuaa che jae vaerã cuarãi.

8

Soo uñemee tumpa-raanga pe vae

¹ Añave taicuatía peve soo uñemee tumpa-raanga pe vae re. Añete co, opaete yaicuaa cua regula. Yaicuaerã yave yayembicate co, Ërei yayerau yave ñañemimirãta co. ² Ime

yave quía ipia pe uyemingueta iyee uicuaa co mbaembae, jae uicuaa'á viteño mbae uicuaata tēi vae. ³ Ērei ime yave quía uau Tumpa vae, Tumpa uicuaa cua nunga.

⁴ Jayave yayemingueta soo uñemee tumpa-raanga pe vae re. Yaicuaa co tumpa-raanga güinoi'á co tecove. Jare yaicuaa vi Tumpa pentiño co. ⁵ Ime mbaembae ivi pegua reta umbijee tumpa vae. Cua mbaembae ñugüinoi ivi pe jare ara re. Jeta co jocua tumpa reta, jare jeta vi co ivi pegua iya reta. ⁶ Ērei yande yaicuaa ime co pentiño Tumpa. Jae co yandeRu. Jae uyapo opaete, jare yande yaico yambiadora vaerā. Ime vi co pentiño yandeYa. Jae co Jesucristo. Jae vi uyapo opaete, jare jae umee yandeve tecove.

⁷ Ērei ime amocue cua regua uicuaa mbae vae. Echa'á jae reta tenonde yave umbiadora tumpa-raanga, jare jecuaño ipia pe uyemingueta quirāi soo jou vae uñemee co tumpa-raanga pe. Jáeramo jou yave, ipia pe uyemingueta tēi mbae icavi mbae vae co uyapo oī. Echa'á ipirāta'á ipurugüirovia re. ⁸ Ērei yau yave, mbae'á co Tumpa pe. Echa'á yau yave, Tumpa ndarau jei mbae icavi vae co yayapo. Jare yau'á yave, Tumpa ndarau jei mbae icavi mbae vae co yayapo. ⁹ Pepuere peu jocua nunga soo. Ērei piñemoa agüiye vaerā cua piyapo vae rupi jocua ipirāta'á ipurugüirovia re vae uyapo mbae icavi mbae echa chupe vae. ¹⁰ Echa'á nde ndicuaa cavi co cua regua. Ērei jocua ipirāta'á ipurugüirovia re vae nderecha yave ndeguapi neñ tumpa-raanga jo pe soo ndeu vaerā, aramoī jae ipia pe uyemingueta jae vi co ipuere jou soo uñemee tumpa-raanga pe vae. ¹¹ Jáeramo ipirāta'á ipurugüirovia re vae opiata ndipo nde ndicuaa ndiyupe vae jeco pegua. Ērei jese vi co Cristo umano. ¹² Jáeramo jucuarāi peyoa yave ĩru upurugüirovia vae ipurugüirovia re ipirāta'á vae coti, Cristo coti peyoa vi co. Echa'á jocua ĩru upurugüirovia vae uyapo mbae ipia pe uyemingueta tēi icavi'á uyapo vaerā vae. ¹³ Jáeramo ĩru upurugüirovia vae iyoa yave che jau vae jeco pegua, ndarau ye jau soo, agüiye vaerā ĩru upurugüirovia vae iyoa ayapo vae jeco pegua.

9

Temimondo ipuere uyapo vae

¹ Che vi chepuere ayapo che aipota vae rupi. Echa'á che co jae penti temimondo. Che aecha yandeYa Jesús. Jare pe reta perovia yandeYa re che aparaviqui chupe ramo. ² Aramoī ĩru vae reta jei'á che co jae penti temimondo. Ērei pe reta picuaa cavi che co jae penti temimondo. Echa'á pe reta perovia yandeYa re, jare cua uicuaaca che co jae penti temimondo.

³ Cua co che jae iñera cheré vae reta pe: ⁴ Orepuere co ndou ipotave tembíu. ⁵ Nduipota yave, ore vi orepuere numenda cuña upurugüirovia vae ndive jare ndugüiraa orerupíe, ĩru temimondo reta jare yandeYa tivi reta jare Pedro uyapo rami. ⁶ Aramoī pepia pe piyemingueta tēi jaeño Bernabé jare che orepuere'á nduico nduparaviqui mbae reve. ⁷ Ime yave quía oo uñerāro vaerā vae, omondo vae umbiepi co chupe. Uva oñoti vae jou co uva iacue. Jae ramiño vi ovecha reta re uyandareco vae jou co ovecha ineche. ⁸ Cua mbaembae che jae ivi pegua reta jei rami. Ērei jucuarāi vi jei mboroyocui. ⁹ Echa'á Moisés iporoyocui pe uyecuatía oī cuarāi: “Güey trigo umbipiriri oī yave, agüiye iyuruyocua.” Jucuarāi uyecuatía oī. Ērei Tumpa cua jei yave, jei'á co güeyeta reta reño. ¹⁰ Jei vi oreré. Echa'á ore co jae co pe uparaviqui vae reta rami. Umaeti vae jare trigo umbipiriri vae uāro pāve uyerovia reve. Echa'á mocui reve uipota ucaru iparaviqui güi. ¹¹ Ore co jae umaeti vae rami. Echa'á numimbeu peve mbaembae Espiritu pegua. Jae ramiño vi ore co jae umbaeviro vae rami. Echa'á yavaita'á tēi peve ore nonoi vaerā mbaembae ivi pegua jocua penoi vae güi. ¹² ĩru vae reta ipuere yave güinoi mbaembae pegüi, orepuere eteta tēi chugüi reta. Ērei yepe tēi orepuere nonoi mbaembae pegüi, ěrei nduyerure'á peve jese. Opaete numiaguanta, agüiye vaerā numbiavai ñee icavi vae Cristo regua. ¹³ ¿Picuaa'á pa quirāi Tumpa jo pe uparaviqui vae reta jou tembíu Tumpa jo pegua? Echa'á maemimba uyeyucacue Tumpa pe uñemeearendo pe vae uparaviqui vae reta jou maemimba uyeyucacue isoo. ¹⁴ Jae ramiño vi yandeYa oyocui ĩru vae reta umbiepi vaerā ñee icavi vae umimbeu vae reta pe. ¹⁵ Ērei che aipota'á etei ĩru vae reta umbiepi vaerā cheve. Aicuatiā'á vi cua mbaembae peve, pe reta pembiepi vaerā cheve. Ayerovia cua chepuere jae peve vae re. Icavi ete co amano vaerā pe reta pembiepi cheve vaerāve.

¹⁶ Yepe tēi amimbeu ñee icavi vae, ěrei ayembicate'á etei. Echa'á yandeYa cheocui amimbeu vaerā. Amimbeu'á yave ñee icavi vae, aramoī mbae icavi mbae vae uyeyapota

cheve. ¹⁷ Echa'ã che ayapo yave cua mbaraviqui che etei aipota ramo, icavita tēi ĩru vae reta umbiepi vaerã cheve. Ĕrei ayapo cua mbaraviqui, yandeYa cheocui ayapo vaerã ramo. Jáeramo ñee icavi vae amimbeu yave, ayeyocui aĩ Tumpa pe. ¹⁸ Ayerovia ete quirã amimbeu ñee icavi vae acovara mbae reve. Jare Tumpa umbiepi cheve cua yerovia anoi vae pe. Echa'ã yepe tēi amimbeu ñee icavi vae, jare yepe tēi icavi co ĩru vae reta umbiepi vaerã ñee icavi vae umimbeu vae pe, Ĕrei che aipota'ã ĩru vae reta umbiepi vaerã cheve.

¹⁹ Jáeramo ĩru vae reta ipuere'ã cheocui mbae ayapo vaerã. Ĕrei ayeyapo ma opaete vae jembiocuirã, jeta vae güirovia vaerã Cristo re chereco pegua. ²⁰ Judío reta ndive aico yave, che aico vi penti judío ico rami, judío reta güirovia vaerã Cristo re chereco pegua. Mboroyocui jei vae uyapo vae reta ndive aico yave, che aico vi penti mboroyocui jei vae uyapo vae ico rami, jae reta vi güirovia vaerã Cristo re chereco pegua. Cuarã ayapo, yepe tēi añave aico'ã ma mboroyocui jei vae re. ²¹ Moisés iporoyocui güinoi'ã vae reta ndive aico yave, che aico vi penti Moisés iporoyocui güinoi'ã vae ico rami, jae reta vi güirovia vaerã Cristo re chereco pegua. Cua uipota'ã jei aico'ã ma Tumpa iporoyocui re. Echa'ã che aico Cristo iporoyocui re. ²² Ipirãta'ã ipurugüirovia re vae reta ndive aico yave, che aico vi penti ipirãta'ã ipurugüirovia re vae ico rami, jae reta vi güirovia vaerã Cristo re chereco pegua. Jecuaeño ayemboyoaque penti penti ndive, amocue vae uyembiasaca vaerã chereco pegua. ²³ Jare opaete cua ayapo ĩru vae reta güirovia vaerã ñee icavi vae, jae reta uñemiiru vaerã che ndive.

²⁴ Pe reta picuaa co quirã amocue vae uñeñocui yave, opaete jae reta osi, Ĕrei pentiño upurumiamiri jare güinoi upurumiamiri vae pe uñemea vae. Pico penoi vaerã upurumiamiri vae pe uñemeeta vae. ²⁵ Jare penti penti uipota upurumiamiri vae uyecucui opaete mbaembae icavi'ã chupe vae güi. Jare jae reta jucuarã uyapo güinoi vaerã upurumiamiri vae pe uñemea vae imambae icumegua vae. Ĕrei yande yaipota ñanoi mbae jaeño mai pegua icota vae. ²⁶ Jáeramo che aico penti uñeñocui vae simi osi vae rami, mbaeti osiño vae rami. Che aico penti uñerãro vae uipota upurumiamiri vae rami. ²⁷ Echa'ã aiporaraca cherepe pe, uyapo vaerã che aipota uyapo vaerã vae, agüiye vaerã che etei anoi'ã upurumiamiri vae pe uñemeeta vae, yepe tēi amimbeu ĩru vae reta pe.

10

Tumpa-raanga regua

¹ Jare aipota picuaa cavi vaerã, cherivi reta, quirã opaete Israel pegua reta yugüiraa jocua amapĩtu igüi pe, jare opaete jae reta uasa i guasu. ² Jare opaete vae uyeyapo pentiño Moisés ndive amapĩtu igüi pe yugüiraa yave jare i guasu uasa reta yave. ³ Jare opaete vae jou tembiu Espĩritu Santo umee chupe reta vae. ⁴ Jare opaete vae jou i Espĩritu Santo umee chupe reta vae. Jare opaete vae jou jocua ita Espĩritu pegua jae reta jupie oo vae güi. Jare jocua ita Cristo co. ⁵ Ĕrei Tumpa pochi jeta vae pe. Jáeramo opa uyucaca ueya ñana pe.

⁶ Jare Tumpa uechaca yandevae cua mbaembae uyeyapo chupe reta vae, agüiye vaerã yande yaipota mbaembae icavi mbae vae jae reta uipota vae rami. ⁷ Jáeramo agüiye pemiadora tumpa-raanga, amocue jae reta umbiadora tumpa-raanga rami. Echa'ã Tumpa ñee pe uyecuatĩa oĩ cuarã: "Jae reta uguapi ucaru vaerã. Jayave upũa reta upirae vaerã." Jucuarã uyecuatĩa oĩ. ⁸ Agüiye vi yayapo aguasa, amocue jae reta uyapo rami. Jare jucuarã uyapo ramo, umano veintitrés mil jocua ara. ⁹ Agüiye vi yayapo icavi mbae vae yaicuaa vaerã tuicha ra yandeYa ipiaguasu. Echa'ã jucuarã uyapo amocue jae reta, jare uyucaca reta mboi reta pe. ¹⁰ Agüiye vi piñeenguru yandeYa coti. Echa'ã jucuarã uyapo amocue jae reta, jare Tumpa uyucaca penti ángel pe.

¹¹ Ĕrei Tumpa uechaca opaete cua mbaembae uyeyapo chupe reta vae, jare uyecuatĩa oĩ yanembiaracuaa vaerã. Echa'ã yande yaico ara taicuegua vae reta pe. ¹² Jáeramo ipia pe uyemingueta ipirãta co ipurugüirovia re vae tuñemoa ngatu agüiye vaerã iyoa. ¹³ Jecuaeño aña guasu pepiãro uyavica peve vaerã. Echa'ã jucuarã uyapo opaete vae pe. Ĕrei jecuaeño pepuere perovia catu Tumpa pembali vaerã. Echa'ã Tumpa ndarau umaeño perẽgua ete vaerã aña guasu pe. Echa'ã aña guasu pepiãro yave, Tumpa uicuaacata peve quirã pepuere piyapo agüiye vaerã peyoa, jare jucuarã pepuereta pemiamiri aña guasu.

¹⁴ Jáeramo, cherivi reta, agüiye pemiadora tumpa-raanga. ¹⁵ Che jae cua peve, jare chepia pe ayemingueta pe reta co jae iyaracuaa vae reta. Pe reta etei pepuere picuaa añete ra cua che jae peve vae. ¹⁶ Ñamee yasurupai yandeYa pe jocua vino re. Vino uyemijaanga icavi vae yandeYa uyapo yandeve vae re. Jucuarái yayapo yave, yaicuaaca quirái yande ñaí pentiño Cristo ndive Cristo jugüi uyepeyere vae jeco pegua. Jae ramiño vi ñapisāa yave mbiyape, yaicuaaca quirái yande ñaí pentiño Cristo ndive Cristo jete umano vae jeco pegua. ¹⁷ Echa'ā yepe tēi yande co jeta vae, ěrei yande co jae Cristo jete pegua reta. Jáeramo yande ñaí penti rami. Echa'ā mbiyape pentiño co, jare opaete vae yau jocua mbiyape.

¹⁸ Yamijaanga Israel pegua reta. Jae reta jou maemimba uyeyucacue Tumpa pe uñemee vae isoo, jare jucuarái uicuaaca quirái jae reta uñemiiru Tumpa ndive jocua maemimba uyeyucacue vae jeco pegua. ¹⁹ Aipota'ā etei jae penti tumpa-raanga co jae penti tumpa añetete vae. Aipota'ā vi jae soo tumpa-raanga pe uñemee vae ĩru soo rami'ā co. ²⁰ ěrei che jae peve cua: Jocua reta umee maemimba uyeyucacue vae isoo añā reta pe. Umee'ā Tumpa pe. Jare aipota'ā piñemiiru vaerā añā reta ndive. ²¹ Icavi'ā etei peu vaerā vino uyemijaanga yandeYa jugüi re vae vino añā reta pe uñemee vae ndive. Jae ramiño vi icavi'ā etei peu vaerā mbiyape uyemijaanga yandeYa jete re vae soo añā reta pe uñemee vae ndive. ²² Agüiye ñamiñemiro yandeYa añā reta pe. YandeYa ipuere ete co yandegüi.

Opaete mbae piyapo vae rupi pemiadora Tumpa

²³ Chepuere ayapo opaete aipota vae. ěrei icavi'ā opaete ayapo vaerā. Añete co, chepuere ayapo opaete aipota vae. ěrei opaete'ā yanembori ñanepirāta vaerā. ²⁴ Agüiye quía tuyapo jae uipota uyapo vaeño. Penti penti tuiporta tombori ĩru vae reta.

²⁵ Pepuere peu ipotave soo mercado pe uñemee vae. Agüiye pepirandu uñemee ra tumpa-raanga pe. Echa'ā picuaa yave, aramoi pepia pe piyeminguetata jupi'ā co peu vaerā. ²⁶ Echa'ā cua ivi jare opaete ivi pegua co jae yandeYa imbae.

²⁷ Penti upurugüirovia mbae vae uparea yave peve pecaru vaerā jae ndive, pipota yave peo, peu ipotave umee peve peu vaerā vae. Agüiye pepirandu uñemee ra soo tumpa-raanga pe. Echa'ā picuaa yave, aramoi pepia pe piyeminguetata jupi'ā co peu vaerā. ²⁸ ěrei aramoi uparea peve vae jeita peve: “Uyuca reta cua maemimba umee vaerā tumpa-raanga pe.” Jucuarái jei peve yave, agüiye peu umimbeu peve vae jeco pegua. Echa'ā aramoi jae ipia pe uyeminguetata jupi'ā co peu vaerā. ²⁹ Añave chemiari añ ĩru vae ipia pe uyemingueta jese vae re, pe reta pepia pe uyemingueta'ā jese vae re. ěrei aramoi pepia pe uyeminguetata cuarái: “ěrei ¿maera pa ndere cheve chepuere'ā co jau soo ĩru vae ipia pe uyemingueta jese vae jeco pegua? ³⁰ Echa'ā jecuaeño che amee yasurupai Tumpa pe cherembü re. Jáeramo ¿maera pa chembijeco jese? Echa'ā amee yasurupai Tumpa pe jese.” Jucuarái ndipo pepia pe piyeminguetata. ³¹ ěrei che jae peve cua: Jecuaeño pemiadora Tumpa. Opaete mbaembae peu vae rupi jare opaete mbaembae piyapo vae rupi pemiadora Tumpa. ³² Agüiye piyapo icavi mbae echa ĩru vae reta pe vae - judío reta pe, jare judío mbae vae reta pe, jare Tumpa uiparavo vae reta pe. Echa'ā piyapo yave, aramoi pemiavaita. ³³ Jucuaráiño vi che ayapo opaete mbaembae icavi echa opaete ĩru vae reta pe vae. Aico'ā che ayembiyerovia vaeraño. Jaeño aipota ambori jeta ĩru vae reta, jae reta uyembiasaca vaerā.

11

¹ Pico che aico rami. Echa'ā jecuaeño che aico Cristo uipota aico vaerā rami.

Cuña reta jemimonde

² Jare ayerovia peré, cherivi reta, quirái jecuaeño pemandúa cheré, jare jecuaeño piyapo che animbeu peve rami. ³ ěrei aipota picuaa vaerā cua: Cuimbae reta uyeyocui Cristo pe, jare cuña reta uyeyocui ime pe, jare Cristo uyeyocui Tumpa pe. ⁴ Penti cuimbae uyerure Tumpa pe yave ani umimbeu Tumpa iñee ĩru vae reta pe yave, uñeācasoi reve, penti ñemimaraca co. ⁵ ěrei penti cuña uyerure Tumpa pe yave ani umimbeu Tumpa iñee ĩru vae reta pe yave, uñeācasoi mbae reve, penti ñemimaraca vi co. Echa'ā jae oyovaque cuña opaete iñāca uñeāpi vae ndive. ⁶ Cuña uñeācasoi mbae vae tuñeāpi ía. Echa'ā penti ñemimaraca co cuña ía chutu ete yave ani opaete iñāca uñeāpi yave. Jáeramo cuña

tuñeācasoi. ⁷ Añete co, icavi'ā cuimbae uñeācasoi vaerā. Echa'ā cuimbae uyemijaanga Tumpa re jare Tumpa yaruanda vae re. Ērei cuña uyemijaanga cuimbae yaruanda vae re. ⁸ Echa'ā Tumpa uyapo'ā cuimbae cuña güi. Uyapo cuña cuimbae güi. ⁹ Jae ramiño vi Tumpa uyapo'ā cuimbae cuña iñurā. Uyapo cuña cuimbae iñurā. ¹⁰ Jáeramo icavi co cuña uñeācasoi vaerā uicuaaca vaerā uyeyocui co cuimbae pe, jare ángel reta uecha vaerā. ¹¹ Ērei cuimbae ipuere'ā ico cuña mbae reve. Jae ramiño vi cuña ipuere'ā ico cuimbae mbae reve. YandeYa uyapo reta yugüireco vaerā penti rami. ¹² Añete co, Tumpa uyapo cuña cuimbae güi. Ērei cuimbae oa cuña güi. Jare Tumpa uyapo opaete.

¹³ Tapirandu peve cua re: ¿Icavi ra cuña uyerure vaerā Tumpa pe uñeācasoi mbae reve? ¹⁴ Opaete vae yaicuaa quirāi penti cuimbae iavucu yave, penti ñemimaraca co. ¹⁵ Ērei penti cuña iavucu yave, iyaruandaca co. Echa'ā Tumpa umee cuña pe ia iñaca uyasoi vaerā. ¹⁶ Ērei ime yave quía uipota uyeaca cua re vae, tuicuaa quirāi ore nduyemboe jucuarāi. Jae ramiño vi upurugüirovia vae opaete que rupi uyembatimbatu umbiadora vaerā Tumpa vae reta jucuarāi vi uyemboe.

Icavi mbae uyapo vae, yandeYa re imandúa yave

¹⁷ Ērei chepuere'ā ayerovia peré añave aicuatiata peve jese vae re. Echa'ā piyembati yave, piyapo icavi mbae vae, icavi vae piyapo vaerāve. ¹⁸ Cua rani tae peve: Jerācua cheve quirāi piyembiyao piyugüi, piyembati yave pemiadora vaerā Tumpa. Jare chepia pe ayemingueta aramoi añete co. ¹⁹ Echa'ā imeta co yembiyao reta pepite pe, añetete upurugüirovia vae reta uyecuaa vaerā pepite pe. ²⁰ Jáeramo piyembati yave pemandúa vaerā yandeYa re, añetete'ā co pemandúa yandeYa re tembúu peu yave. ²¹ Echa'ā amocue pe reta pempipi peu tembúu peru vae ndei ñru reta yugüeru mbove. Jáeramo penti vae iyembaí, jare ñru vae usavipo. ²² Pipota yave pecaru cavi, pepuere pecaru perenta pei. Agüiye perñro ñru Tumpa uiparavo vae reta. Agüiye pemimaraca mbaeti mbae güiñoi vae reta. ¿Mbae ra jaeta peve? ¿Ayeroviata ra peré cua jeco pegua? Ndarau etei co.

Pablo oporomoe quirāi yanemandúa vaerā yandeYa re

(Mt 26.26-29; Mr 14.22-25; Lc 22.14-20)

²³ Echa'ā yandeYa umimbeu cheve che amimbeu-yuapi ye peve vae. Jae co cua: YandeYa uipisi mbiyape jocua piare uñemeeta umano vaerā yave. ²⁴ Jayave yasurupai Tumpa pe umee yave, upisāa mbiyape jare jei: “Pipisi peu. Cua co jae cherete peré ameeta vae. Peu cua, pemandúa vaerā cheré.” Jucuarāi jei. ²⁵ Jae ramiño vi yandeYa uipisi copa opa ma ucaru reta yave, jare jei: “Cua vino co jae Tumpa jei piau ye vae cherugüi pe ayapota vae. Peu ñave ñave, pemandúa cheré.” Jucuarāi jei. ²⁶ Echa'ā mbiyape jare vino peu ñave ñave, picuaacata quirāi yandeYa umano co, jare jucuarāi piyapota yandeYa ou ye regua.

²⁷ Jáeramo ime yave quía jou mbiyape jare vino yanemimandúa yandeYa re vae cua icavi mbae vae uyapo reve vae, iyoa co yandeYa jete jare jugüi coti. ²⁸ Ērei penti penti tuñeāa ipia pe. Jayave tou jocua mbiyape jare jocua vino. ²⁹ Echa'ā ime yave quía jou mbiyape jare vino cua icavi mbae vae uyapo reve vae, uyembijeco jou ramo. Echa'ā uyandareco'ā yandeYa jete re. ³⁰ Cua jeco pegua jeta pepite pe ñugüiñoi vae reta imbaerasi jare ipitu mbaerasi jeco pegua, jare jeta ma umano. ³¹ Echa'ā ñañeāa yave, yandeYa ndarau uiporaraca yandeve. ³² Ērei yaiporara yandeYa ñanenupa ramo, icavi vaerā yandeve, agüiye vaerā yayembijeco upurugüirovia mbae vae reta ndive.

³³ Jáeramo, cherivi reta, piyembati yave pecaru vaerā, piñeraāro rani. ³⁴ Jare ime yave quía iyembaí vae, tucaru rani jenta pe, agüiye vaerā yandeYa uiporaraca peve, piyembati yave. Jare opaete ñru mbaembae ayapicatuta aa pepi yave.

12

Mbaepuere reta Espiritu Santo umee vae

¹ Añave, cherivi reta, aipota amimbeu peve mbaepuere reta Espiritu Santo umee vae regua. Aipota'ā pico vaerā picuaa mbae reve.

² Picuaa cavi quirāi ndei perovia yandeYa re mbove, pemiadorase tumpa-raanga reta, piyemboe jese rami, yepe tēi tumpa-raanga reta iñee'ā etei. ³ Jáeramo aipota picuaa vaerā cua: Tumpa iEspiritu rupi piyemingueta yave, ndarau piyepipeyu Jesús re. Jare jaño Espiritu Santo rupi ipuere quía jei: “Jesús co jae cheYa.”

⁴Jare mbaepuere Espiritu Santo umee vae reta uyuavi, ěrei Espiritu Santo pentiño co. ⁵Jare jocua mbaraviqui yayapo yayeyocui vaerã yandeYa pe vae reta uyuavi, ěrei yandeYa pentiño co. ⁶Jare yepe tẽi mbaraviqui yayapo vae reta uyuavi, Tumpa pentiño co, jare Tumpa umbupuere opaete vae opaete mbaraviqui reta uyapo vaerã. ⁷Ěrei Espiritu Santo umee mbaepuere penti penti pe, penti penti ipuere vaerã ombori ĩru vae reta. ⁸Echa'ã Espiritu Santo umee penti vae pe uyemingueta vaerã iyaracuaa catu reve. Jare jae etei umee ĩru vae pe uyemingueta vaerã uicuaa cavi reve. ⁹Jare Espiritu Santo umee ĩru vae pe mburugũirovia. Jare jae etei umee ĩru vae pe umbigũiera vaerã imbaerasi vae reta. ¹⁰Umee ĩru vae pe uyapo vaerã miacañi reta, jare ĩru vae pe umimbeu vaerã Tumpa iñee. Umee ĩru vae pe uicuaa vaerã ou ra penti ñee Espiritu Santo gũi ani ambie coti gũi. Umee ĩru vae pe uyemingueta vaerã ambiembie vae iñee reta pe, jare ĩru vae pe umimbeu vaerã mbae uipota jei ambiembie vae iñee reta pe uyendu vae. ¹¹Ěrei pentiño co Espiritu Santo opaete cua mbaepuere reta gũinoi vae reta umbupuere vae. Jare jae umee mbaepuere uyuavi vae reta jae uipota vae rupi.

Cristo jete pegua reta pentiño co

¹²Echa'ã pentiño co yanderete. Ěrei yanderete pe ñanoi yandepi jare yandepo jare yandeapisa jare yanderesa jare jeta ĩru ĩru vae. Jare opaete yanderete pegua reta uyapo pentiño yanderete, yepe tẽi jeta uyuavi vae co. Jae ramiño vi Cristo jete pegua reta pentiño co. ¹³Echa'ã pentiño co Espiritu Santo jare jae yanembibautiza opaete, Cristo jete yayeyapo vaerã. Pentiño vi co Cristo jete. Jucuarã Espiritu Santo uyapo judío reta jare judío mbae vae reta pe. Jae ramiño vi jae uyapo uyeyocui vae reta jare uyeyocui mbae vae reta pe. Jare pentiño co Espiritu Santo cua uyapo yandeve vae.

¹⁴Ime jeta yanderete pegua reta, pentiño'ã co. ¹⁵Aramoi yandepi jeita: “Che ipo'ã co. Jáeramo che jete pegua'ã co.” Ěrei yepe tẽi jucuarã jeita, ěrei yanderete pegua co. ¹⁶Jae ramiño vi aramoi yandeapisa jeita: “Che jesa'ã co. Jáeramo che jete pegua'ã co.” Ěrei yepe tẽi jucuarã jeita, ěrei yanderete pegua co. ¹⁷Opaete yanderete yanderesa catuii yave, ndarau tẽi yandepuere mbae yayandu. Jae ramiño vi opaete yanderete yandeapisa catuii yave, ndarau tẽi yandepuere mbae ñaetu. ¹⁸Ěrei Tumpa oñono penti penti yanderete pegua reta yanderete pe jae uipota vae rupi. ¹⁹Jare ime yave pentiño yanderete pegua, ndarau tẽi yanderete. ²⁰Ěrei ime co jeta yanderete pegua reta, ěrei pentiño co yanderete.

²¹Jare yanderesa ipuere'ã jei yandepo pe: “Che aipota'ã nde chembori vaerã.” Jae ramiño vi ñaneãca ipuere'ã jei yandepi pe: “Che aipota'ã nde chembori vaerã.” ²²Añete, jucuarã'ã co. Echa'ã yanderete pegua reta iparaviqui'ã echa vae uparaviqui ete co. ²³Jare yanderete pegua reta icavi'ã echa yandeve vae ñamopõra. Jae ramiño vi yanderete pegua reta ñanemara jese vae yamiemonde cavi.

²⁴Ěrei yanderete pegua reta icavi tẽi yandeve vae ñamopõra'ã. Ěrei Tumpa umbiyuapiyuapi opaete yanderete pegua reta, jare uipiua jocua yanderete pegua yande yaipiu'ã vae reta. ²⁵Jucuarã uyapo, agũiyi vaerã yanderete pegua reta uyembiyao uyugũii, opaete yanderete pegua reta uyandareco cavi vaerã iyee. ²⁶Jare penti yanderete pegua uiporara yave, opaete yanderete pegua reta uiporara pãve. Jae ramiño vi penti yanderete pegua uyepiua yave, opaete yanderete pegua reta uyerovia pãve.

²⁷Jare pe reta co jae Cristo jete, jare penti penti co jae Cristo jete pegua. ²⁸Jare Tumpa oñono amocue vae upurugũirovia vae reta ipite pe temimondo retarã yugũireco vaerã. Oñono vi ĩru vae reta Tumpa iñee umimbeu vaerã. Oñono vi ĩru vae reta omboe vaerã upurugũirovia vae reta. Oñono vi ĩru vae reta uyapo vaerã miacañi reta, jare ĩru vae reta umbigũiera vaerã imbaerasi vae reta, jare ĩru vae reta ombori vaerã ĩru upurugũirovia vae reta, jare ĩru vae reta ipuere vaerã oyocui ĩru upurugũirovia vae reta, jare ĩru vae reta uyemingueta vaerã ambiembie vae iñee reta pe. ²⁹Opaete'ã co temimondo reta vae. Opaete'ã vi co Tumpa iñee umimbeu vae reta. Opaete'ã vi co upurugũirovia vae reta omboe vae reta. Opaete'ã vi co miacañi reta uyapo vae reta. ³⁰Opaete'ã vi co imbaerasi vae reta umbigũiera vae reta. Opaete'ã vi co ambiembie vae iñee reta pe uyemingueta vae reta. Opaete'ã vi co mbae uipota jei ambiembie vae iñee reta pe uyendu vae umimbeu vae reta. ³¹Ěrei pipota ete penoi vaerã mbaepuere icavi ete ĩru reta gũii vae reta. Ěrei animbeuta peve mbae icavi ete cua mbaembae reta gũii vae.

13

Mburuau icavi ete

¹ Aramoí chepuere ayemingueta ambiembie vae iñee reta pe jare ángel reta iñee pe. Ērei apuruau'ā yave, che jae vae mbae'ā co, jare ayeyapo campana ipu rami ani temimbi iñee rami. ² Jare aramoí ime anoi mbaepuere Tumpa iñee amimbeu cavi vaerā. Jare aramoí aicuaa mbaembae ĩru vae reta pe uyecuaa mbae vae jare mbaembae ĩru vae reta uicuaa mbae vae. Jare aramoí ime anoi mburugüirovia tuicha ete vae chepuere vaerā ambisiri ivitu guasu reta. Ērei apuruau'ā yave, che mbae'ā co. ³ Jare aramoí ameeta opaete chembaembae amingarú vaerā iparavete vae reta. Jare aramoí ameeta cherete etei amano vaerā tata pe. Ērei apuruau'ā yave, mbae'ā co cheve.

⁴ Yapuruau yave, yandepiaguasu jare yandepiacavi ĩru vae reta pe. Yapuruau yave, yaipota'ā ĩru vae reta imbaembae, yayemitenonde'ā, yayembicate'ā, ⁵ yayapo'ā icavi mbae vae, yaipota'ā mbae yandeyupeguarāño, yandearasi'ā, yanemandua'ā icavi mbae vae ĩru vae reta uyapo yandeve vae re, ⁶ yayerovia'ā ĩru vae reta iyoa yave, Ērei yayerovia añete vae re. ⁷ Yapuruau yave, ñamiaguanta opaete yapurugüirovia reve, jare ñaño yandepiaguasu reve.

⁸ Mburuau ndarau etei opa. Ērei mbaepuere Tumpa iñee umimbeu vaerā ñanoi vae opata co. Jae ramiño vi mbaepuere ambiembie vae iñee reta pe yayemingueta vaerā ñanoi vae opata co. Jare mbaepuere mbaembae yaicuaa vaerā ñanoi vae opata co. ⁹ Echa'ā mboviño co jocua yaicuaa vae, jare Tumpa iñee yamimbeu yave mboviño vi co jocua yamimbeu vae. ¹⁰ Ērei opaete uyecuaa yave, jocua mboviño vae opata co.

¹¹ Che chemichi yave, ayemingueta penti sambiai uyemingueta rami, jare aicuaa penti sambiai uicuaa rami, jare chepia pe ayemingueta penti sambiai ipia pe uyemingueta rami. Ērei acuacuaa ma yave, ayapo'ā ma penti sambiai uyapo rami. ¹² Ñamae yave yanderova re espejo pe, yayeecha cavi'ā. Jucuarāño vi añave yaicuaa cavi'ā mbaembae regua. Ērei ñamae yave ĩru vae re coiño güi, yaecha cavi. Jucuarāño vi penti ara yaicuaa cavita mbaembae regua. Echa'ā añave mboviño aicuaa. Ērei jocua ara aicuaata opaete, Tumpa checuaa rami. ¹³ Ērei jecuae yapurugüiroviata, jare ñaño yayerovia reve, jare yapuruata. Ērei mburuau icavi ete cua ĩru mocui güi.

14

Ambiembie vae iñee reta

¹ Jecuaño pepuruau. Jare penoi quirēi pipota vaerā mbaepuere Espiritu Santo umee vae reta. Ērei pemitenonde mbaepuere Tumpa iñee pepuere pemimbeu vaerā. ² Echa'ā ambiembie vae iñee reta pe uyemingueta vae uyemingueta Tumpa pe, ĩru vae reta pe'ā. Echa'ā quía uicuaa'ā mbae jei vae. Jae uyemingueta Espiritu Santo rupi uyecuaa mbae vae re. ³ Ērei Tumpa iñee umimbeu vae uyemingueta ĩru vae reta pe, umimirāta jare umbiaracuaa jare umbipiacatu vaerā. ⁴ Ambie vae iñee pe uyemingueta vae jaeño uñemimirāta. Ērei Tumpa iñee umimbeu vae umimirāta ĩru upurugüirovia vae reta.

⁵ Che aipota opaete pe reta piyemingueta vaerā ambiembie vae iñee reta pe. Ērei aipota ete pemimbeu vaerā Tumpa iñee. Echa'ā Tumpa iñee umimbeu vae uyeyocui ete ĩru upurugüirovia vae reta pe ambiembie vae iñee reta pe uyemingueta vae güi. Ērei ambiembie vae iñee reta pe uyemingueta vae umimbeu yave mbae uipota jei ambiembie vae iñee reta pe uyandu vae, uyeyocui vi ĩru upurugüirovia vae reta pe. Echa'ā umimbeu yave, umimirāta ĩru upurugüirovia vae reta. ⁶ Jáeramo, cherivi reta, che aa yave pepi, jare ayemingueta yave ambiembie vae iñee reta pe, ndarau etei mbae icavi vae ayapo peve, aicuaaca'ā peve yave Tumpa uicuaaca cheve vae, ani amimbeu peve mbae aicuaa vae, ani Tumpa iñee, ani pomboe mbae re.

⁷ Yamijaanga mbaembae tecove güinoi mbae vae ipu vae. Temimbi ñamiñee yave ani miori yambopu yave, yambopu cavi'ā yave, ndarau quía uicuaa mbae nunga canta ra ipu oī vae. ⁸ Picuaa co quirāi sundaro reta uñerārota yave, penti temimbi uñee sundaro reta uyeyapicatu uñerāro vaerā. Ērei uñee cavi'ā yave temimbi, ndarau quía uyeyapicatu uñerāro vaerā. ⁹ Jae ramiño vi pe reta piyemingueta'ā yave ñee ĩru vae reta ipuere uicuaa cavi vae pe, ndarau quía uicuaa mbae pere vae. Piyemingueta yuvangaño. ¹⁰ Añete co, ime jeta ñee uyuvavi vae reta cua ivi pe, jare opaete vae uicuaa iñeeñeei.

¹¹ Jáeramo aicuaa'á yave írú vae iñee, ayemingueta chupe yave, jae uicuaata che co jae ambie ivi pegua, jare jae uyemingueta cheve yave, che aicuaata jae co ambie ivi pegua. ¹² Jae ramiño vi pe reta pipota ete penoi vaerá mbaepuere Espíritu Santo umee vae reta. Jáeramo pipota ete jocua mbaepuere pipe írú upurugüirovia vae reta pepuere pemimiráta vae reta.

¹³ Jáeramo ambie vae iñee pe uyemingueta vae tuyurure Tumpa pe ipuere vaerá umimbeu mbae uipota jei ambie vae iñee pe uyandu vae. ¹⁴ Echa'á che ayerure yave Tumpa pe ambie vae iñee pe, aicuaa'á che jae vae. Echa'á cheespirituno co uyerure. ¹⁵ Jáeramo ¿mbae ra ayapota? Cheespíritu uyerure reve ayerureta Tumpa pe, jare ayerureta Tumpa pe aicuaa reve vi. Jae ramiño vi cheespíritu ucanta reve acantata, jare acantata aicuaa reve vi. ¹⁶ Echa'á nde nemees yae yasurupai Tumpa pe ndeespíritu peño, ñee ndiyemingueta pipe vae uicuaa mbae vae ndarau ipuere uñemírú nde ndive, yasurupai Tumpa pe nemees yave. Echa'á uicuaa'á mbae ndere vae. ¹⁷ Añete co, icavi ete nde nemees yasurupai Tumpa pe, érei jocua írú vae nemimiráta'á pipe. ¹⁸ Che amees yasurupai Tumpa pe quirái jeta ete ayemingueta ambiembie vae iñee reta pe opaete pe reta güi. ¹⁹ Érei ayembati yave írú upurugüirovia vae reta ndive, aipota ete jae pandepo ñeeo aicuaa reve amboe vaerá írú vae reta, diez mil ñee ambie vae iñee pe jae vaeráve.

²⁰ Cherivi reta, agüiye pepia pe piyemingueta sambiai reta ipia pe uyemingueta rami. Agüiye piyapo icavi mbae vae, sambiai-rai reta uyapo'á icavi mbae vae rami. Érei pepia pe piyemingueta mbaembae re ucuacuaa vae reta ipia pe uyemingueta rami. ²¹ Mboroyocui pe uyecuatía oí cuarái: “Ayemingueta cua ivi pegua reta pe ambie ivi pegua reta iñee pei uyemingueta vae rupi. Érei jeseve ndarau uyapisaca cheré” —jei yandeYa. Jucuarái uyecuatía oí. ²² Jáeramo ambiembie vae iñee reta pe yayemingueta yave, yaicuaaca Tumpa imbaepuere upurugüirovia mbae vae reta pe, upurugüirovia vae reta pe'á. Érei Tumpa iñee yamimbeu yave, yaicuaaca upurugüirovia vae reta pe, upurugüirovia mbae vae reta pe'á. ²³ Jáeramo opaete pepurugüirovia vae reta piyembati yave, opaete pe reta piyemingueta yave ambiembie vae iñee reta pe, jare uique yave pepite pe cua nunga ñee reta uicuaa mbae vae reta ani upurugüirovia mbae vae reta, jae reta jeita pembiquere co. ²⁴ Érei opaete pe reta pemimbeu yave Tumpa iñee, jare uique yave pepite pe penti upurugüirovia mbae vae ani penti uicuaa mbae vae, jae uicuaata iyugüi quirái jae co iyoa vae jare uñeáata, uyandu yave opaete pe reta pere vae. ²⁵ Jare jucuarái uyecuaata chupe opaete ipia pe oí vae, jare uyeaticata umbiadora reve Tumpa, jare jeita quirái añetete Tumpa ico pepite pe.

Piyapo cavi opaete mbiacatu reve

²⁶ Jáeramo, cherivi reta, ¿mbae ra yaeta? Piyembati yave, penti penti pipota mbiadora Tumpa pecanta reve, ani pipota peporombio, ani pipota piyemingueta ambie vae iñee pe, ani pipota picuaaca írú reta pe Tumpa uicuaaca peve vae, ani pipota pemimbeu mbae uipota jei ambie vae iñee pe uyendu vae. Piyapo opaete piñemimiráta vaerá. ²⁷ Ime yave quía reta uipota uyemingueta ambiembie vae iñee reta pe vae, tuyemingueta mocui ani mbapiño, jare tuñeraáro tuyemingueta, jare penti vae tumimbeu mbae uipota jei ambiembie vae iñee reta pe uyendu vae. ²⁸ Érei joco pe oí'á yave mbae uipota jei ambiembie vae iñee reta pe uyendu vae ipuere umimbeu vae, agüiye quía tuyemingueta ambie vae iñee pe uyembatia pe. Jaeño ipuere uyemingueta iyupe jare Tumpa pe ambie vae iñee pe. ²⁹ Jae ramiño vi tuyemingueta mocui ani mbapi Tumpa iñee umimbeu vae reta, jare uyapisaca jese vae reta ipia pe tuyemingueta icavi ra jocua uyandu vae. ³⁰ Érei Tumpa uicuaaca yave mbae írú vae uguapí oí vae pe, uyemingueta oí vae tiquí. ³¹ Echa'á jucuarái opaete pe reta pepuere pemimbeu Tumpa iñee penti penti rupi, opaete vae piyemboe vaerá jare piyembipiacatu vaerá. ³² Jare Tumpa iñee umimbeu vae reta ime mbaepuere güinoi uñeraáro vaerá. ³³ Echa'á Tumpa uipota opaete piyapo vaerá mbiacatu reve. Uipota'á piyapo vaerá tecorai piyembatia pe. Echa'á jucuarái Tumpa uipota opaete uñeño tee Tumpa peguará vae reta uyembatimbatia pe.

³⁴ Piyembati yave, tiquí toí cuña reta. Echa'á ñamaño'á jese reta oporombio vaerá. Penti penti tuyapo ime jei vae. Echa'á jucuarái jei mboroyocui. ³⁵ Jare ime yave mbae cuña uipota uicuaa vae, tupirandu ime pe jenta pe. Echa'á piyembatia pe cuña reta uyemingueta yave, penti ñemimaraca co.

³⁶ Pemandúa quirāi pe reta rani'ā co pemimbeu Tumpa iñee, jare pe retaño'ā co piyandu Tumpa iñee. ³⁷ Aramoi quía ipia pe uyemingueta iyee jae co penti Tumpa iñee umimbeu vae ani mbaepuere Espiritu Santo umee vae güinoi vae. Jocua nunga tuicuaa quirāi cua mbaembae aicutiā pe veve vae yandeYa iporoyocui reta co. ³⁸ Ērei uipotā'ā yave uicuaa, tupita uicuaa mbae reve.

³⁹ Jáeramo, cherivi reta, penoi quirēi pipota vaerā pemimbeu Tumpa iñee, jare agüiye piyopia uipotā uyemingueta ambiembie vae iñee reta pe vae. ⁴⁰ Ērei piyapo cavi opaete mbiacatu reve.

15

Cristo icove ye ou umanocue vae reta ipite güi

¹ Añave, cherivi reta, aipota pumimandúa ñee icavi vae amimbeu peve vae re. Echa'ā pe reta perovia cua ñee icavi vae jare pepirāta jese. ² Jare piyembiasaca ñee icavi vae rupi pemandúa yave amimbeu peve vae re, añetete pegua pepurugüirovia yave.

³ Echa'ā cua rani amimbeu peve, quirāi Cristo umano yanembaeyoa reta re, cuarāi Tumpa iñee pe uyecuatía oī rami. Cua co uyecuaaca cheve vae. ⁴ Amimbeu vi peve quirāi Cristo uñefoti jare mbapi ara rupi icove ye ou umanocue vae reta ipite güi, cuarāi Tumpa iñee pe uyecuatía oī rami. ⁵ Jocua jaicue rupi uyecuaa Pedro pe, jare jocua rendave pe uyecuaa jocua doce vae pe. ⁶ Jocua rendave pe uyecuaa jeta upurugüirovia vae reta yati vae pe. Jocua reta quinientos uasa. Jare jeta jocua reta imeño co ñugüinoi. Ērei amocue umano ma. ⁷ Jocua rendave pe uyecuaa Jacobo pe, jare joco güi uyecuaa opaete temimondo reta pe.

⁸ Jare taicue ete uyecuaa cheve vi. Che co jae penti sambiai ocua seri vae echa rami. ⁹ Echa'ā che co jae penti temimondo, ěrei opaete ĩru temimondo reta uyepiua chegüi. Jupi'ā ayembijee vaerā temimondo pe. Echa'ā che ayapose icavi mbae vae Tumpa uiparavo vae reta pe. ¹⁰ Che co jae penti temimondo Tumpa ipiacavi rupi. Jare ipiacavi umee cheve vae ucañi'ā etei. Echa'ā che aparaviqui tanta ete opaete ĩru reta güi. Ērei chei'ā co aparaviqui. Tumpa ipiacavi umee cheve vae chemimbaraviqui. ¹¹ Aicuaa'ā quía ra umimbeu peve quirāi Cristo icove ye ou umanocue vae reta ipite güi, che ani ĩru reta. Ērei jucuarāi numimbeu, jare jucuarāi pe reta perovia.

Umanocue vae reta icove yeta co

¹² Jáeramo ¿maera pa jei amocue pepite pe ñugüinoi vae mbaeti quía ipuere icove ye ou umanocue vae reta ipite güi? Echa'ā ore numimbeu peve quirāi Cristo icove ye co ou umanocue vae reta ipite güi. ¹³ Ērei mbaeti yave quía ipuere icove ye ou umanocue vae reta ipite güi, Cristo vi icove yeta'ā tēi ou umanocue vae reta ipite güi. ¹⁴ Jare Cristo icove ye'ā yave ou umanocue vae reta ipite güi, cua numimbeu peve vae mbaetita tēi co mbae, jare pepurugüirovia vi mbaetita tēi co mbae. ¹⁵ Jare jucuarāi yave, oreaputa tēi Tumpa re. Echa'ā ore numimbeu quirāi Tumpa umbijecove ye Cristo güeru umanocue vae reta ipite güi. Ērei quía ipuere'ā yave icove ye ou umanocue vae reta ipite güi, Tumpa umbijecove yeta'ā tēi Cristo güeru umanocue vae reta ipite güi. ¹⁶ Echa'ā quía ipuere'ā yave icove ye ou umanocue vae reta ipite güi, Cristo icove yeta'ā tēi ou umanocue vae reta ipite güi. ¹⁷ Jare Cristo icove ye'ā yave ou umanocue vae reta ipite güi, pepurugüirovia mbaetita tēi co mbae, jare uyembaita'ā tēi pembaeyoa reta. ¹⁸ Jae ramiño vi, jucuarāi yave, Cristo re güirovia vae reta umano ma vae ucañiteita tēi co. ¹⁹ Cua ivi pe ñaī rambueve ñaño tēi yave yayerovia reve Cristo re, yandepiatiti eteta tēi upurugüirovia mbae vae reta güi.

²⁰ Ērei yaicuaa Cristo icove ye co ou umanocue vae reta ipite güi. Jae rani icove ye ou umanocue vae reta ipite güi, uicuaaca vaerā opaete umanocue vae reta icove yeta co. ²¹ Echa'ā mano uique cua ivi pe penti cuimbae mbaeyoa uyapo vae jeco pegua. Jae ramiño vi umanocue vae reta icove yeta ĩru cuimbae uyapo vae jeco pegua. ²² Echa'ā Adán co jae opaete vae itenondegua. Jáeramo opaete vae umano. Jae ramiño vi yande yaico Cristo re. Jáeramo opaete yaicove yeta co. ²³ Cristo rani icove ye. Ērei Cristo ou ye yave, opaete güirovia Cristo re vae reta icove yeta. ²⁴ Jare taicue ete opata co opaete, Cristo uequi ma yave imbaepuere opaete mburuvicha reta ara pegua jare ivi pegua jare ipotave mbaepuere güinoi vae güi, jare umee ma yave iporoyocua Tumpa pe - jae co yandeRu. ²⁵ Echa'ā Cristo oyocuita co opaete ivi pegua reta, umiamiri opaete jovaicho

reta regua. ²⁶ Jare taicue ete Cristo umbaita mano. ²⁷ Echa'a Tumpa umee ma Cristo pe mbaepuere umiamiri vaerã opaete. Echa'a jucuarãi jei Tumpa iñee pe uyecuatía oĩ vae. Ërei cua opaete jei vae uipota'a jei Tumpa etei. Echa'a Tumpa umee mbaepuere Cristo pe. ²⁸ Jare Tumpa Tai umiamiri ma yave opaete, jae etei uyeyocuita Tumpa pe. Echa'a Tumpa umee chupe mbaepuere umiamiri vaerã opaete. Jayave Tumpa oyocuita opaete.

²⁹ Jare amocue vae uyembibautizaca umanocue vae reta ipepica pe. ¿Maera ra uyapo reta jucuarãi? Echa'a ndarau icove ye yave umanocue vae reta, ¿maera ra uyembibautizaca umanocue vae reta ipepica pe?

³⁰ Jare ¿maera ra orequirẽi nduiporara nduico opa ara rupi? ³¹ Opa ara ñru vae reta uipota cheyuca. Cua añete co, cheriví reta, yerovia anoi peré vae añete rami. Echa'a ayerovia peré yandeYa Jesucristo re. ³² Yandepuere yae yamijaanga reve che añerãro maemimba pochí vae reta ndive Efeso pe. Ërei ¿mbae pe ra icaví cheve? Umanocue vae reta ndarau icove ye yave, yandepuere yae: "Yayecou. Echa'a piareve ñamanota co."

³³ Agüiye petavi. Pochí vae reta ndive ñañemíru yave, jae reta yanembopochí vi. ³⁴ Piyerova Tumpa cotí piyapo vaerã jupi vae. Agüiye ma peyoa. Echa'a amocue pe reta picuaa'a Tumpa. Cua jae peve pemara vaerã.

¿Quirãita ra icove ye umanocue vae reta?

³⁵ Ërei aramoi quía jeita: "¿Quirãita ra icove ye umanocue vae reta? Jare ¿mbae nunga jete ra güinoita?" ³⁶ Jucuarãi jei vae iyaracuaa'a co. Echa'a penti temiti jáicue ñañoti yave, umano co jeñi vaerã. ³⁷ Jare jocua ñañoti vae oyovaque'a co temiti ucuacuaa ma vae ndive. Ñañoti jáicueño, aramoi trigo jáicue ani ñru temiti jáicue. ³⁸ Ërei Tumpa umbicuacuaa, temiti oĩ vaerã Tumpa jei vae rupi. Jare Tumpa umbuyuavi opaete temiti reta. ³⁹ Jae ramiño vi oyovaque'a opaete jete. Echa'a ime cuimbae jete, jare maemimba jete, jare jevae i rupigua jete, jare güira jete. Opaete uyuavi uyugüi. ⁴⁰ Jae ramiño vi ime mbaembae ara re ñugüinoi vae, jare ime mbaembae ivi pe ñugüinoi vae. Mbaembae ara re ñugüinoi vae ipõra. Jare mbaembae ivi pe ñugüinoi vae ipõra. Ërei ipõra vae pe uyuavi uyugüi. ⁴¹ Ipõra co guarasi jare yasi jare yasitata reta. Ërei ipõra vae pe uyuavi uyugüi. Jae ramiño vi opaete yasitata reta ipõra vae pe uyuavi uyugüi. ⁴² Jucuarãita vi uyeyapo, umanocue vae reta icove ye yave. Echa'a uñeñoti yave, umano vae jetcue icumegua. Ërei icove ye yave ndarau etei icumegua. ⁴³ Uñeñoti yave, mbaeti co mbae yaipiú vaerã. Ërei icove ye yave, ipõra eteta co. Uñeñoti yave, güinoi'a etei mbaepuere. Ërei icove ye yave, ipirãta eteta co. ⁴⁴ Umano vae jetcue uñeñoti yave, ivi pegua co. Ërei icove ye yave, ara pegua co. Ime co jete ivi pegua. Jae ramiño vi ime jete ara pegua.

⁴⁵ Echa'a Tumpa iñee pe uyecuatía oĩ cuarãi: "Tumpa umee tecove cuimbae tenondegua vae pe - jae co Adán. Jocua Adán taicuegua vae - jae co Cristo - tecove ara pegua umee vae co." Cuarãi uyecuatía oĩ. ⁴⁶ Ërei ara pegua tenonde'a oĩ. Jocua ivi pegua tenonde oĩ, jare taicue oĩ ara pegua. ⁴⁷ Cuimbae tenondegua vae ivi pegua co. Echa'a Tumpa uyapo ivi güi. Ërei cuimbae taicuegua vae co jae yandeYa ara güi ou vae. ⁴⁸ Yanderete ivi pegua oyovaque cuimbae ivi pegua jete ndive. Jae ramiño vi yanderete ara pegua oyovaqueta cuimbae ara pegua jete ndive. ⁴⁹ Yaguacatu ma cuimbae ivi pegua. Jae ramiño vi yaguacatua cuimbae ara pegua.

⁵⁰ Jare cua che jae peve, cheriví reta: Yanderete ivi pegua ndarau uique Tumpa iporoyocua pe. Jae ramiño vi mbae icumegua vae ndarau uique icumegua mbae oĩ vae pe. ⁵¹ Mase, tamimbeu peve ndeño uyecuaa vae. Ndarau opaete ñamano, Ërei opaete ñanoita yanderete ipiau vae. ⁵² Jare cua uyeyapota imambae pegua penti jei vae pe Tumpa itrompeta uñee yave. Echa'a Tumpa itrompeta uñeeta co, jare umanocue vae reta icove yeta güinoi vaerã jete ndarau etei icumegua vae. Jare yande imeño ñaí vae vi ñanoita yanderete ipiau vae. ⁵³ Echa'a yanderete icumegua vae uyepepicata yanderete ndarau etei icumegua vae ndive. Jae ramiño vi yanderete ipuere umano vae uyepepicata yanderete ndarau etei ipuere umano vae ndive. ⁵⁴ Jare ñanoi yave yanderete ndarau etei icumegua vae yanderete icumegua vae ipepica pe, jare ñanoi yave yanderete ndarau etei ipuere umano vae yanderete ipuere umano vae ipepica pe, uyeyapota ma co Tumpa iñee pe uyecuatía oĩ vae. Echa'a uyecuatía oĩ cuarãi: "Tumpa umiamiri mano jare umbai. ⁵⁵ Mano güinoi'a etei mbaepuere yanderé. Ñanemiamiri'a etei." Jucuarãi uyecuatía oĩ. ⁵⁶ Añave mano güinoi mbaepuere yanderé mbaeyoa jeco pegua. Jare mboroyocui

uicuaaca mbaeyoa. ⁵⁷ Ērei ñamee yasurupai Tumpa pe. Echa'ã jae umiamiri mano yandeve yandeYa Jesucristo rupi.

⁵⁸ Jáeramo, cherivi reta aau vae, piñemiatangātu jare piñemimirāta. Jecuaeño tanta peparaviqui yandeYa pe. Echa'ã picuaa quirāi peparaviqui yave yandeYa pe, yandeYa umbijecoviata peve.

16

Corepoti umbatita oporombori vaerā

¹ Añave tamimbeu peve quirāi pembati vaerā corepoti pembori vaerā ĩru uñeño tee Tumpa peguarā vae reta. Ayocui ma cua re upurugüirovia vae reta Galacia rupi uyematimbati vae. Jae ramiño vi pe reta piyapo jucuarāi. ² Domingomingo pe penti penti piñuvatu corepoti Tumpa pembupuere rupi, agüiye vaerā pembati che aa pepi yave ramo. ³ Jare che aa avāe yave pepi, ameeta tupapire reta piparavo vae reta pe jare amondota reta Jerusalén pe güiraa vaerā corepoti pemeeta vae. ⁴ Jare icavi yave cheve che vi aa vaerā, jae reta yugüiraata cherupie.

Pablo ipia pe uyemingueta uyapo vaerā vae re

⁵ Jare che aata pepi, Macedonia rupi aasa yave. Echa'ã aasata co Macedonia rupi. ⁶ Jare aramoi apitata pe reta ndive. Aramoi apitata pepi ambiasa opaete roi ara reta, pe reta chembori vaerā aa ye yave icoti'ã perenta güi. ⁷ Aipota'ã apou pepi michi peguaño. Echa'ã aipota apita pepi ima pegua, yandeYa uipota yave. ⁸ Ērei apitata cua pe Efeso pe Pentecostés ara ou uvāe regua. ⁹ Echa'ã ime cua pe jeta mbaraviqui chepuere ayapo yandeYa pe vae, jare ime vi jeta oyovaicho yandeYa iparaviqui ndive vae reta.

¹⁰ Ērei Timoteo oo yave pepi, piyandareco cavi jese, ipiagüive oĩ vaerā pepite pe. Echa'ã jae vi uparaviqui yandeYa pe, che ayapo rami. ¹¹ Agüiye quía tugüiriro. Ērei outa yave checoti perenta güi, pembori ou vaerā checoti ipiacatu reve. Echa'ã aipota jae ou vaerā chepi ĩru yanderivi reta jupie.

¹² Tamimbeu peve yanderivi Apolos. Chequirēi ete jae oo vaerā pepi ĩru yanderivi reta jupie. Ērei uipota'ã etei oo pepi añave. Ērei oota co jae ipuere yave.

Saludo reta

¹³ Piñemoa, pepirāta pepurugüirovia re, piyembucuibae, piñemiatangātu. ¹⁴ Opaete piyapo vae piyapo pepuruu reve.

¹⁵ Añave, cherivi reta, pe reta picuaa quirāi Estéfanos jenta pegua reta rani güirovia Cristo re Acaya pe, jare quirāi jae reta jecuaeño uparaviqui tanta uyeyocui vaerā ĩru uñeño tee Tumpa peguarā vae reta pe. ¹⁶ Jáeramo aipota pe reta piyeyocui vaerā cua nunga pe, jae reta peocui yave, jare vi piyeyocui vaerā opaete orembori vae reta jare uparaviqui yandeYa pe vae reta pe, jae reta peocui yave. ¹⁷ Ayerovia Estéfanos jare Fortunato jare Acaico yugüeru chepi vae re. Echa'ã jae reta uyapo cheve icavi vae pe reta pepuere'ã piyapo cheve vae. ¹⁸ Echa'ã jae reta chembiyerovia co. Jae ramiño vi jae reta pembiyerovia. Jáeramo pepuere pipiua nunga reta.

¹⁹ Upurugüirovia vae reta Asia rupi uyematimbati vae jei peve Tumpa ndiveño peĩ. Aquila jare Priscila jare upurugüirovia vae reta uyembati jae reta jenta pe vae jei vi peve Tumpa ndiveño peĩ yandeYa re perovia ramo. ²⁰ Opaete yanderivi reta jei peve Tumpa ndiveño peĩ. Saludo reta piyapo piyupe yave, piñecuāva piyerau reve.

²¹ Che aicutía cua chepo pe etei. Che vi jae peve Tumpa ndiveño peĩ.

²² Ime yave quía uau'ã yandeYa Jesucristo vae, Tumpa uiporaracata chupe. YandeYa outa.

²³ YandeYa Jesucristo tumee peve ipiacavi. ²⁴ Chepuruu toĩ opaete pe reta perovia Cristo Jesús re vae ndive. Amén.

SEGUNDA CARTA DEL APOSTOL SAN PABLO A LOS CORINTIOS

¹ Che co jae Pablo. Che co jae Jesucristo jemimondo Tumpa jei vae rupi. Yanderivi Timoteo vi ime cua pe oī che ndive. Aicutía cua tupapire opaete pepurugüirovia vae Corinto pe piyembati vae reta pe, jare opaete ĩru uñeño tee Tumpa peguarā vae opaete Acaya rupi ñugüinoi vae reta pe. ² YandeRu Tumpa jare yandeYa Jesucristo tumeē peve ipiacavi jare ipiacatu.

Pablo uiporara

³ Yambiadora Tumpa. Jae co yandeYa Jesucristo Tu. Jae co yandeRu vi. Jae yandeparareco. Jae jecuaeño yanembipiacatu. ⁴ Echa'ā jae jecuaeño yanembipiacatu yaiporara yave, yandepuere vaerā yambipiacatu ĩru uiporara ñugüinoi vae reta. Echa'ā jucarāi vi Tumpa yanembipiacatu. ⁵ Echa'ā yaiporara ete yave Cristo re yarovia ramo, yandepiacatu ete vi Cristo rupi. ⁶ Jare ore nduiporara yave, nduiporara co pe reta penoi vaerā mbiacatu jare yembiasa. Jare Tumpa yanembipiacatu yave, jucarāi uyapo pe reta penoi vaerā mbiacatu jare yembiasa. Jare jucarāi pepuere pemiaguanta pepiaguasu reve piporara yave ore nduiporara rami. ⁷ Jare jecuaeño ndugüirovia catu peré pemiaguanta vaerā. Echa'ā nduicuaa quirāi pe reta vi piporara ore nduiporara rami. Jae ramiño vi nduicuaa quirāi Tumpa pempipiacatu orembipiacatu rami.

⁸ Echa'ā nduipota picuaa vaerā, cherivi reta, quirāi nduiporara Asia pe nduico yave. Nduiporara ete. Orepue'ā seri numiaguanta. Jáeramo orepia pe nduyemingueta tēi numanota co. ⁹ Añete co, orepia pe nduyemingueta tēi Tumpa umaeñota co oreré numano vaerā. Ērei jucarāi Tumpa uicuaaca oreve orepue'ā co nduyeco orembaepuere rei, jaēño orepue'ā nduyeco Tumpa re. Echa'ā Tumpa ipuere umbijecove ye umanocue vae reta. ¹⁰ Echa'ā jae orerepi numano seri yave, jare jecuae orerepi mano güi. Jae ramiño vi ndugüirovia orerepi yeta co. ¹¹ Pe reta vi pepuere orembori. Echa'ā pepuere piyerure Tumpa pe oreré. Jare jucarāi yave, jeta vae umeeta yasurupai Tumpa pe jae uyapota oreve vae re. Echa'ā Tumpa uyapota co oreve, jeta vae uyurureta chupe oreré ramo.

Maera Pablo uipota oo Corinto pe

¹² Echa'ā ore nduico cavi upurugüirovia mbae vae reta ipite pe jare pepite pe vi, Tumpa orembori ramo. Ndupurumbitavi'ā etei. Jare cuarāi nduico Tumpa ipiacavi rupi, nduico'ā orearacuaa rupiño. Jare nduicuaa cua añete co. Jáeramo nduyerovia. ¹³ Echa'ā peminguetā ramiño nduicuatía peve. Jare pepuere picuaa cavi nduicuatía peve vae. Jare aipota jecuaeño picuaa cavi vaerā. ¹⁴ Añete co, amocue pe reta oreucua cavi ma. Echa'ā pe reta piyerovia oreré. Jae ramiño vi ore nduyeroviata peré yandeYa Jesús ivāe ara pe.

¹⁵ Jare cua aicuaa cavi ramo, aipota tēi aa rani pepi, che pumbiyerovia vaerā tēi mocui vese. ¹⁶ Echa'ā aipota tēi apou pepi Macedonia pe ayu yave, jare apou ye pepi Macedonia güi aa ye yave, pe reta pepuere vaerā chembori aa ye yave perenta güi Judea coti. ¹⁷ Jare chepia pe ayemingueta yave jucarāi ayapo vaerā, chepia pe ayeminguetaiño'ā co jese. Echa'ā chepia pe ayemingueta yave mbae ayapo vaerā, chepia pe ayemingueta'ā che jae vae rupiño. Che jae yave: “Ayapota co”, ndarau jae voi ye: “Ayapota'ā.” ¹⁸ Tumpa vi uicuaa quirāi ore ndoe yave: “Nduyapota co”, ndarau ndoe voi ye: “Nduyapota'ā.” ¹⁹ Echa'ā Tumpa Tai jae co Cristo Jesús - che jare Silvano jare Timoteo numimbeu peve vae jei yave: “Ayapota co”, ndarau jei voi ye: “Ayapota'ā.” Jaeño jae jei: “Ayapota co.” ²⁰ Echa'ā opaete Tumpa jei uyapota vae Cristo uyapota co. Jáeramo orepue'ā ndoe: “Amén”, Tumpa pe Cristo rupi, jare jucarāi numbiadora Tumpa. ²¹ Jare Tumpa oremimirāta Cristo rupi jare oreño tee nduyapo vaerā iparaviquí. Jae ramiño vi Tumpa pemimirāta. ²² Jare Tumpa umeē ma yandeve Espiritu Santo, uicuaaca vaerā yande jae imbae co, jare Espiritu Santo yandepia pe ico ramo, yaicuaa jeta ete co Tumpa umeeta yandeve.

²³ Jare ndeño aa Corinto pe agüiye vaerā añeengata peve. Tumpa uicuaa cua amimbeu peve vae añete co. ²⁴ Nonoi'ā etei mbaepuere pepurugüirovia re. Echa'ā pepirāta ma pepurugüirovia re. Jaeño nduipota pombori, pe reta piyerovia vaerā.

2

¹Jáeramo che jae chiyupe ndaruu aa ye pepi chepiatiti reve. ²Echa'a che pumbipiatiti yave, ¿quía ra co chembiyeroviata? Pe retaño co. Èrei che pumbipiatitita tēi, aa pepi yave. ³Jáeramo aicutía peve, agüiye vaerã pe reta chembiyerovia vaerãve chembiipiatiti, aa pepi yave. Echa'a che arovia che ayerovia yave, pe reta vi piyeroviata co. ⁴Echa'a aicutía peve ayao reve, chepiatiti ramo. Ayandu chepia pe. Aipota'ã pepiatiti vaerã. Èrei aipota picuaa vaerã quirãi tuicha ete co chepuruaa pecoti.

Pembiasa icavi mbae vae uyapo vae pe

⁵Jocua iyoa vae cheño'ã chembiipiatiti. Amocue pe reta vi pumbipiatiti. ⁶Jeta ma pe reta piporaraca chupe. Jáeramo agüiye ma piporaraca ye chupe. ⁷Añave icavi co pembiasa vaerã chupe. Icavi co añave pembipiacatu vaerã. Agüiye ma piporaraca ye chupe. Echa'a piporaraca ye yave chupe, aramoi uyapota mbae icavi mbae vae, ipiatiti ete ramo. ⁸Jáeramo che pumiñera pemimbeu vaerã chupe quirãi jecuaño co peau vae. ⁹Echa'a cua jeco pegua aicutía peve, aicuaa vaerã mbae ra piyapota. Aipota aicuaa piyapota ra opaete che jae peve piyapo vaerã vae. ¹⁰Pe reta pembiasa yave quía pe mbae, che vi ambiasa chupe. Echa'a jocua ambiasa quía pe vae, ime yave mbae ambiasa vaerã quía pe vae, ambiasa co chupe peré Cristo jovai. ¹¹Yaipota'ã Satanás ñanemiamiri vaerã. Echa'a yaicuaa cavi co mbae jae uipota uyapo vae.

Pablo uyemipia'ã Troas pe

¹²Jare che aa avãe yave Troas pe amimbeu vaerã ñee icavi vae Cristo regua, yepe tēi yandēYa umee cheve aparaviqui cavi vaerã chupe, ¹³Èrei chepiacatu'ã etei avãe'ã yanderivi Tito joco pe ramo. Jáeramo che jae Troas pegua reta pe aa yeta co, jare ayu chugüi reta Macedonia coti.

Ñapurumiamiri Cristo rupi

¹⁴Yasurupai numee Tumpa pe. Echa'a jae jecuaño orembori ndupurumiamiri vaerã Cristo rupi, jare umee oreve ñee icavi vae nduicuaaca vaerã opaete que rupi, mbae ipiche cavi vae uñeetu opaete que rupi rami. ¹⁵Numimbeu yave ñru vae reta pe Cristo regua, numbiyerovia Tumpa, mbae ipiche cavi vae yanembiyerovia rami. Jare numimbeu uyembiasaca vae reta pe jare ucañiteita vae reta pe, mbae ipiche cavi vae uñeetu opaete que rupi vae rami. ¹⁶Echa'a numimbeu yave ucañiteita vae reta pe, mbae ipiche cavi vae amijaanga oreré vae uyeyapo mbaeyachi quía upuruyuca pipe vae rami. Jae ramiño vi numimbeu yave uyembiasaca vae reta pe, jae uyeyapo mbae tecove umee vae rami. Jare mbaeti quía ipuere jaiño uyapo cua mbaraviqui. ¹⁷Echa'a jeta vae uiporu Tumpa ñee umingana vaerã mbaembae iyupeguarã. Èrei ore jae reta rami'ã co. Ore numimbeu cavi Tumpa ñee Tumpa oreocui numimbeu vaerã rami. Oremiari Tumpa jovaque Cristo re ndugüirovia ramo.

3

Trato ipiau vae

¹Aramoi pe reta pepia pe piyemingueta tēi ore numbipi ye nduyembutuicha. Jucuarãi'ã co. Pipota'ã ndipo ndugüeru vaerã peve tupapire reta nduicuaaca vaerã peve quía co ore. Pipota'ã ndipo pemea oreve tupapire reta nduicuaaca vaerã ñru vae reta pe quía co ore. Echa'a ñru vae reta güinoi jocua nunga tupapire. ²Nduyembutuicha'ã co. Echa'a pe reta co jae oretupapire rami uyecuatía oñ orepia pe vae rami. Opaete vae ipuere perecha uicuaa vaerã quía co ore, penti tupapire ipuere umingueta rami. ³Echa'a opaete vae ipuere uicuaa quirãi pe reta co jae penti tupapire Cristo güi ore ndugüeru vae rami. Èrei pe reta co penti tupapire Tumpa imeño mai ico vae iEspíritu pe uyecuatiaa vae rami, mbaeti co penti tupapire tinta pe uyecuatía vae rami. Tumpa uicuatía ñee pepia re etei. Uicuatía'ã ita reta re.

⁴Jare cuarã orepuere ndoe peve, ndugüirovia catu Tumpa Cristo rupi ramo. ⁵Oreño orepuere'ã etei mbae nduyapo. Èrei Tumpa umee oreve imbaepuere. ⁶Jae ramiño vi Tumpa umee oreve mbaepuere, nduyeyocui cavi vaerã chupe trato ipiau vae re. Cua trato ipiau vae Espiritu pegua co, mboroyocui uyecuatía oñ vae pegua'ã co. Echa'a mboroyocui uyecuatía oñ vae jei vae uyapo'ã vae umanota co. Èrei Espiritu Santo umee yandeve tecove opa mbae vae.

⁷ Jocuá mboroyocui uyecuatía oĩ ita reta re vae uñemee Moisés pe yave, Tumpa umiembipe Moisés iárambo. Jáeramo Israel pegua reta ipuere'ã umae ngatu Moisés jova re. Echa'ã Moisés jova jembipe ete. Ērei yepe tēi mboroyocui jei vae uyapo'ã vae umanota co, Ērei uñemee Moisés jova jembipe ete reve. Ērei jocua jembipe vae ima'ã ico. ⁸ Jáeramo jocua ñee Espiritu Santo güeru yandeve vae icavi ete mboroyocui jei vae güi. ⁹ Echa'ã yepe tēi mboroyocui jei vae uyapo'ã vae umanota co, Ērei icavise. Jáeramo icavi ete ma jocua güi ñee uicuaaca yandeve Tumpa yanembujupi co vae. ¹⁰ Echa'ã tenonde yave Tumpa uipiua mboroyocui. Ērei ucañi ma mboroyocui imbaepuere. Echa'ã cua añave Tumpa uipiua ma vae icavi ete chugüi. ¹¹ Echa'ã jocua mboroyocui ita reta re uyecuatía vae icavise, yepe tēi uyembai ma. Jáeramo jocua taicuegua vae icavi ete chugüi, echa'ã ndarau opa.

¹² Jare cua ndugüirovia ramo, numimbeu cavi peve opaete. ¹³ Nduyapo'ã Moisés uyapo rami. Echa'ã jae umbiyasoi jova penti tarapo pe, agüiye vaerã Israel pegua reta umae ngatu jova re. Echa'ã uipota'ã Israel pegua reta uecha vaerã quirãi ove jocua jova re jembipe vae. ¹⁴ Ērei Israel pegua reta uicuaa cavi'ã. Echa'ã jecuaño iyaracuaa uyeasoi oĩ, Moisés jova tarapo pe uyeasoi rami. Jáeramo uicuaa cavi'ã, trato indechi vae umingueta yave. Ērei jocua trato indechi vae Cristo umbai ma. ¹⁵ Ērei Moisés uicuatía vae umingueta yave, jecuaño ime oĩ jocua iyaracuaa uyasoi vae. ¹⁶ Ērei yandeYa coti uyerova yave, uyeequita jocua iyaracuaa uyasoi vae. ¹⁷ Jare yandeYa oyovaque Espiritu Santo ndive. Jare ime yave quía güinoi yandeYa iEspiritu vae, ipuere iyaracuaa catu. ¹⁸ Jare yande co jova uyasoi mbae vae rami co. Jáeramo yande co jae penti espejo rami. Echa'ã ñru vae reta ipuere uicuaa yandeYa regua, umae yave yanderé. Jare yande ñamae ngatu yandeYa re ramo, jecuaño yandeYa iEspiritu uparaviqui yandepia pe, ñaĩ vaerã yandeYa rami.

4

¹ Jáeramo orecuri'ã. Echa'ã Tumpa orepapareco jare umee oreve nduyeyocui vaerã chupe. ² Nduyapo'ã etei ñru vae reta uyapo viari imara ramo vae. Nduyapo'ã etei mbae ndupurumbitavi vaerã. Ndorova'ã vi Tumpa ñnee. Jaeño numimbeu ñru vae reta pe añete vae, jare jucuarãi opaete vae ipuere uicuaa quirãi ore nduico cavi Tumpa jovaque. ³ Amocue vae jei ipuere'ã uicuaa cavi ñee icavi vae ore numimbeu vae. Ērei jucuarãi jei, jae reta ucañiteita ramo. ⁴ Echa'ã jae reta güirovia'ã Tumpa. Jáeramo cua ivi pegua reta ñya umipitumimbi iyaracuaa, agüiye vaerã uicuaa cavi ñee icavi vae Cristo uyembiaadora vae regua. Cristo co jae Tumpa etei cuimbaerã uyeyapo vae. Echa'ã ñee icavi vae penti tembipe yanemiembipe vae rami co. ⁵ Ore nuñemiñee yave, numimbeu yandeYa Cristo Jesús, orempiari'ã co oriye. Echa'ã ore co jae perembiocui retaño, Jesús nduau ramo. ⁶ Echa'ã opaete pitumimbi yave, Tumpa jei tome toĩ tembipe. Jae ramiño vi Tumpa umiembipe orepia pe penti tembipe rami, nduicuaa vaerã quirãi jae uyembiaadora ete. Tumpa imbaepuere uyecuaa Jesucristo rupi.

Mburugüirovia rupi yaico

⁷ Jare cua icavi ete vae ime Tumpa güi nonoi vae ico orerete pe, yepe tēi orerete ivi pegua co, uyecuaa vaerã cua mbaepuere tuicha ete vae ime nonoi vae Tumpa imbaepuere co, orembaepuereño'ã co. ⁸ Opaete que rupi nduiporara, Ērei jecuaño orepuere nduparaviqui Tumpa pe. Nduicuaa'ã mbae nduyapo vaerã, Ērei jecuaño Tumpa uicuaaca oreve. ⁹ ñru vae reta uyapo icavi mbae vae oreve, Ērei jecuaño Tumpa ime oĩ ore ndive. Numano seri, Ērei jecuaño Tumpa umee oreve tecove. ¹⁰ Opaete que rupi nduquiy'e'ã numano vaerã Jesús umano rami, uyecuaa vaerã orerete re tecove Jesús ime güinoi vae. ¹¹ Echa'ã yepe tēi imeño noĩ, Ērei jecuaño nduquiy'e'ã numano vaerã Jesús nduau ramo, uyecuaa vaerã orerete umano vae re tecove Jesús ime güinoi vae. ¹² Jáeramo jecuaño nduiporara ete nduico, pe reta penoi vaerã tecove opa mbae vae.

¹³ Orepurugüirovia oyovaque co jocua mburugüirovia yamingueta jese vae ndive. Echa'ã Tumpa ñnee pe uyecuatía oĩ cuarã: "Che arovia. Jáeramo chemiari jese." Jucuarãi uyecuatía oĩ. Jae ramiño vi ore ndugüirovia. Jáeramo orempiari jese. ¹⁴ Jare nduicuaa Tumpa umbijecove ye co yandeYa Jesús güeru umanoque vae reta ipite güi. Jae ramiño vi nduicuaa Tumpa orembijecove yeta co orereru umanoque vae reta ipite güi nduico vaerã Jesús ndive, jare oreñonota pe reta ndive jae jovai. ¹⁵ Echa'ã opaete nduiporara,

orepuere vaerã pombori, jare Tumpa ipiacavi oĩ vaerã jeta vae ndive. Echa'ã jucuarã jave, jeta vae umeeta yasurupai Tumpa pe, jare jucuarã Tumpa uyembiaadoracata.

¹⁶ Jáeramo orecueri'ã. Echa'ã yepe tẽi orerete pe jecuaeño nduiporara, ãrei Tumpa jecuaeño umee oreve imbaepuere. ¹⁷ Echa'ã yaiporara vae michi ete jare michi peguaño co. Jare yaiporara yave, Tumpa umeeta yandeve yerovia tuicha ete vae ndarau etei opa vae. ¹⁸ Jáeramo yandepia pe yayemingueta'ã mbaembae yandepuere yaecha vae re. Yandepia pe yayemingueta mbaembae yandepuere'ã yaecha vae re. Echa'ã mbaembae yandepuere yaecha vae opata co. Ërei mbaembae yandepuere'ã yaecha vae ndarau etei opa.

5

¹ Echa'ã yaicuaa yanderete umanota co. Jae co penti tenta ima'ã ico vae rami. Ërei Tumpa umeeta yandeve yanderete ipiau vae. Jae co penti tenta Tumpa uyapo vae rami. Jare cua Tumpa umeeta yandeve vae ara pegua co, ivi pegua'ã co, jare ndarau etei opa. ² Echa'ã cua yanderete pe yaico rambueve, yaiporara, jare yaipota ete ñanoi yanderete ipiau vae penti tenta Tumpa uyapo vae rami. ³ Jare Tumpa umee yave yandeve yanderete ipiau vae, ndarau etei ñaĩ yanderete mbae reve. ⁴ Echa'ã cua yanderete pe yaico rambueve, yaiporara co, yavai ete yandeve ramo. Ërei yaipota'ã ñaĩ yanderete mbae reve. Yaipota ñanoi yanderete ipiau vae, ñanoi vaerã tecove opa mbae vae, agüiye vaerã ñamano. ⁵ Jare cuarã Tumpa uparaviqui yandepia pe, jare umee ma yandeve Espiritu Santo uicuaaca vaerã yandeve jocua umeeta yandeve vae.

⁶ Jáeramo jecuaeño yayerovia. Echa'ã yaicuaa cua ivi pe yaico rambueve, ndei ñaĩ yandeYa ndive. ⁷ Echa'ã yaico yandeYa re yandepurugüirovia reve. Ërei ndeño yaecha. ⁸ Ërei jecuaeño yayerovia. Jare ñanequirẽi yaeya yanderete, ñaĩ vaerã yandeYa ndive. ⁹ Jáeramo jecuaeño yaipota yambiyerovia yandeYa cua ivi pe yaico rambueve jare jae ndive ñaĩ ma yave. ¹⁰ Echa'ã opaete vae ñaĩta Cristo jovai, jae ñanerãa vaerã. Jare Cristo umbijecoviata penti penti pe cua ivi pe ico rambueve uyapo vae. Jae umbijecoviata icavi vae uyapo vae jare icavi mbae vae uyapo vae pe.

Umimbeu quirã yayembipiacatu Tumpa ndive

¹¹ Jáeramo ore nduparaviqui ñru vae reta güirovia vaerã yandeYa re. Echa'ã nduicuaa yandeYa orerãata co. Ërei Tumpa uicuaa maera nduyapo opaete nduyapo vae. Jae ramiño vi aipota pe reta picuaa vaerã cua. ¹² Ndoe'ã co peve cua nduyembicate vaerã. Ërei nduipota pe reta picuaa vaerã cua, pepuere vaerã pepiamaiña orecoti. Echa'ã jucuarã yave, pepuereta pemiari cua re ñru vae reta pe, jae reta uyembicate yave. Echa'ã jae reta uyembicate mbae uyecuaa vae re. Uyembicateta tẽi co ipia pe güinoi vae re. ¹³ Aramoi ñru vae reta jeita orembiquere co. Ërei jaeno nduipota numbiadora Tumpa. Ërei jei reta yave ore orearacuaa co, icavi co peve. ¹⁴ Echa'ã Cristo oreraru ramo, orequirẽi ete nduyeyocui chupe. Echa'ã nduicuaa cavi Cristo umano opaete yanderé. Jáeramo opaete yande ñamano vi yaicose vae güi. ¹⁵ Jare Cristo umano opaete vae re, yande jecuaeño yayeyocui vaerã chupe yaico rambueve cua ivi pe, agüiye vaerã yaico yandiyupe vaerãño. Echa'ã Cristo umano yanderé jare icove ye ou umanocue vae reta ipite güi. ¹⁶ Jáeramo añave güiive ndarau yandepia pe yayemingueta ñru vae re jae co ivi peguaño. Yepe tẽi yaicuaa quirãi Cristo ico cua ivi pe, ãrei añave güiive ndarau yandepia pe yayemingueta jese jocua re. ¹⁷ Jáeramo ime yave quã güirovia Cristo re vae, Tumpa umee chupe tecove ipiau vae. Uipota'ã ma mbaembae tenonde yave uipota vae. Uipota ma mbaembae tecove ipiau vae pegua.

¹⁸ Jare Tumpa uyapo opaete cua. Jare jae yanembipiacatu jae ndive Cristo rupi, jare umee yandeve yamimbeu vaerã ñru vae reta pe quirãi jae uipota umbipiacatu reta jae ndive. ¹⁹ Cua uipota jei Tumpa umbipiacatu jae ndive opaete ivi pegua reta Cristo rupi, agüiye vaerã umbijeco reta imbaeyoa reta re. Jare Tumpa umee yandeve yamimbeu vaerã ñru vae reta pe quirãi uipota umbipiacatu reta jae ndive. ²⁰ Jáeramo Cristo yanemondo jae ipepica pe. Jare ñanemiari yave, jae co Tumpa imiari oĩ yande rupi. Echa'ã Tumpa uipota umbipiacatu ñru vae reta jae ndive. Jáeramo yande ñamiñera ñru vae reta Cristo jee re uyembipiacatu vaerã Tumpa ndive. ²¹ Cristo iyoa'ã etei. Ërei Tumpa uiporaraca chupe opaete yanembaeyoa re, Tumpa ipuere vaerã yanembujupi yarovia Cristo re yave.

6

¹ Ore nduparaviqui Tumpa ndive. Jáeramo ore pumiñera agüiye vaerã piyuvanga Tumpa ipiacavi re. ² Echa'ã Tumpa jei iñee uyecuatía oĩ vae pe cuarãi:

“Chepiacavi ramo, ayapisaca nderé.

Che nduepi jocua ara ndiyembiasaca yave.”

Jucuarãi jei. Mase, añave Tumpa ipiacavi. Añave ara co yembiasa pegua.

³ Jecuaeño nduico cavi, agüiye vaerã quía numbiavai. Jucuarãi nduico, agüiye vaerã ñru vae reta jei: “Jocua Tumpa jembiocui reta uyapo icavi mbae vae.” ⁴ Jecuaeño nduipota nduicuaaca ñru vae reta pe quirãi nduyeyocui cavi Tumpa pe. Echa'ã orepiaguasu. Nduiporara ete. Jecuaeño uata mbaembae oreve. Yavai co nduico vaerã. ⁵ Ñru vae reta orenupa jare oreñoño peresoriruru pe. Ñru vae reta uyapo tecorai oreré. Tanta nduparaviqui. Amo pe ndoque'ã. Amo pe mbaeti orerembiurã. ⁶ Nduyapo'ã mbae pichĩ vae ñru vae reta coti. Nduicuaaca añete vae ñru vae reta pe. Numiaguanta ñru vae reta uyapo icavi mbae vae oreve yave. Orepiacavi ñru vae reta pe. Jecuaeño Espiritu Santo orembori. Añetete nduau ñru vae reta. ⁷ Numimbeu ñru vae reta pe ñee añete vae, jare Tumpa orembori imbaepuere pe. Jecuaeño nduyapo jupi vae, amocue vae güirovia vaerã Cristo re, jare agüiye vaerã ñru vae reta ipuere orembijeco mbae re. ⁸ Amocue vae orepiu, jare amocue vae orereriro. Amocue vae jei mbaembae icavi vae oreré, jare amocue vae jei mbaembae icavi mbae vae oreré. Yepe tẽi ñru vae reta jei ore co jae upurumbitavi vae reta, jecuaeño ndoe añete vae. ⁹ Ñru vae reta orecaa'ã. Ërei Tumpa orecaa cavi. Numano seri aveiño, ërei jecuaeño noĩ. Ñru vae reta orenupa, ërei ndeiño oreyuca. ¹⁰ Orepiatiti, ërei jecuaeño nduyerovia. Oreparavete, ërei jeta ñru vae reta güirovia Cristo re ore rupi. Mbovi ete mbaembae ivi pegua nonoi, ërei ime nonoi jeta ete Tumpa umeo oreve vae.

¹¹ Numisimi orempiari peve, Corinto pegua reta. Picuaa ma quirãi ore puau vae. ¹² Yayerau'ã yave, ore nonoi'ã teco. Pe reta co penoi teco. ¹³ Tachemiari peve penti tu imiari isambiai reta pe rami. Ore puau ramo, pe reta vi picuaaca oreve quirãi pe reta orerau.

Agüiye piñemiñru upurugüirovia mbae vae reta ndive

¹⁴ Agüiye piñemiñru upurugüirovia mbae vae reta ndive. Echa'ã upurugüirovia mbae vae reta ipiyemingueta oyovaque'ã upurugüirovia vae reta ipiyemingueta ndive. Echa'ã jupi vae oyovaque'ã etei jupi mbae vae ndive. Jae ramiño vi tembipe jare pñtumimbi ipuere'ã etei yugüireco pãve. ¹⁵ Cristo uñemiñru'ã etei Satanás ndive. Jae ramiño vi upurugüirovia vae ico'ã upurugüirovia mbae vae ico rami. ¹⁶ Icavi'ã etei tumpa-raanga reta ñugüiño vaerã Tumpa ico vae pe. Jare pe reta co jae Tumpa ico pipe vae rami. Echa'ã Tumpa jei cuarãi:

“Aicota jare aguatata ipite rupi.

Aicota jae reta iTumparã,

jare jae reta yugüirecota chembaerã.”

Jucuarãi jei Tumpa imeño mai ico vae. ¹⁷ Jáeramo jae jei vi peve cuarãi:

“Jáeramo pesiri icavi mbae vae uyapo vae reta ipite güi.

Agüiye ye ma piñemiñru jae reta ndive.

Agüiye piyapo icavi mbae vae jae reta uyapo rami.

Jare che pumbiresiveta.

¹⁸ Jare che aicota peRurã,

jare pe reta picota cherairã jare cherayirã.”

Jucuarãi jei yandeYa opaete mbaepuere güiñoi vae.

7

¹ Tumpa umimbeu ma yandeve opaete cua jei uyapota vae. Jáeramo, cherivi reta, aicuatía peve cuarãi: Agüiye ma yayapo icavi mbae vae yanderete pegua jare yanderecove pegua. Jecuaeño ñañeñoño tee Tumpa peguarã yaquiyi reve Tumpa güi.

Pablo uyerovia Corinto pegua reta uyapo vae re

² Picuaaca oreve quirāi co orerau. Ore nduyapo'ā etei mbae icavi mbae vae ipotave vae pe. Jae ramiño vi nduyapoca'ā etei mbae icavi mbae vae ipotave vae pe. Ndupu-rumbitavi'ā etei. ³ Jae'ā peve cua pumbijeco vaerā. Echa'ā che jae ma peve quirāi ore puau ete. Jáeramo ñamano yave ani jecuae yaico yave, ipuereta'ā mbae uequi cua mburuau orepia güi. ⁴ Amisimi chemiari peve, jare iru vae reta pe chemiari yave ayerovia ete peré. Yepe tēi nduiporara ete noī, Tumpa jecuaeño chembipiacatu jare ayerovia ete.

⁵ Macedonia pe ndoyu nuvāe güiive, orepuere'ā etei nduputu opaeete nduiporara vae güi. Iru vae reta oyovaicho ore ndive oreminguiye vaerā. ⁶ Ērei Tumpa umbipiacatu ipiatiti vae reta. Jáeramo jae orembipiacatu Tito ou yave uvāe orepi. ⁷ Jare orepiacatu'ā Tito ou uvāe orepi vae reño. Orepiacatu ete vi nduicuaa yave quirāi pe reta pembipiacatu Tito. Echa'ā jae umimbeu oreve quirāi pe reta pipota ete cherecha vaerā, jare quirāi pepiatiti ete jocua uyeyapo vae re, jare quirāi pipota ete chembiyerovia. Jáeramo che ayerovia ete peré.

⁸ Aicuaa yave quirāi che pumbipiatiti aicuatía peve vae pe, che vi chepiatiti, yepe tēi mbovi ara rupiño pepiatiti. Ērei añave chepiatiti'ā, yepe tēi che pumbipiatiti aicuatía peve vae pe. ⁹ Añave ayerovia. Ērei ayerovia'ā pepiatiti ramoño. Echa'ā pepiatiti ramo, peeya piyemingueta icavi mbae vae pepia pe oī vae. Jare cua jeco pegua ayerovia ma. Echa'ā mbiatiti penoi vae icavi Tumpa pe. Jáeramo ore nduyapo'ā co mbae icavi mbae vae peve. ¹⁰ Echa'ā mbiatiti ñanoi vae icavi yave Tumpa pe, yaeya yandiyemingueta icavi mbae vae yandepia pe oī vae, jare Tumpa yanderepi. Jare cua re ndarau yandepiatiti. Ērei yandepiatiti yave upurugüirovia mbae vae reta ipiatiti rami, Tumpa yanderepita'ā tēi. ¹¹ Echa'ā picuaa ma quirāi piñemiatangātu ete Tumpa coti, mbiatiti penoi vae icavi Tumpa pe ramo. Echa'ā pipota picuaaca cheve pe reta penoi'ā co teco. Pepochi jocua mbaeyoa re, jare pequiye vi jese. Pipota ete cherecha vaerā. Pipota ete vi piyapo che amimbeu peve piyapo vaerā vae. Echa'ā pipota piporaraca icavi mbae vae uyapo vae pe. Aicuaa ma quirāi mbaeti etei teco penoi cua uyeyapo vae re. ¹² Aicuatía peve yave, aicuatía'ā icavi mbae vae uyapo vae jeco peguaño, jare aicuatía'ā vi icavi mbae vae uyeyapo chupe vae jeco peguaño. Ērei aicuatía peve picuaa vaerā quirāi pe reta orerau ete co Tumpa jovaque. Echa'ā cuarāi Tumpa uyembadoracata co. ¹³ Jáeramo Tumpa orembipiacatu ma. Jare nduyerovia ete Tito uyerovia peré vae re. Jare jucuarāi Tumpa orembipiacatu. Echa'ā pe reta pembiyerovia Tito. ¹⁴ Echa'ā chemiari cavi Tito pe peré, jare chemara'ā jocua re. Opaete ndoe peve vae añete co. Jae ramiño vi Tito uicuaa ma añete co jocua che jae chupe peré vae. Echa'ā chemiari cavi chupe peré. ¹⁵ Jare Tito perau ete ma. Echa'ā imandúa quirāi piyapo jae jei peve piyapo vaerā vae, jare quirāi pembiresive cavi pipiu reve jare piñemimichi reve. ¹⁶ Jáeramo ayerovia peré. Echa'ā opaete pe chepuere pugüirovia catu.

8

Corepoti umbati oporombori vaerā

¹ Añave aipota aicuaaca peve quirāi upurugüirovia vae Macedonia pe uyembatimbati vae reta uicuaaca Tumpa ipiacavi uñemee chupe reta vae. ² Echa'ā uiporara ramo, yavai ete chupe reta. Ērei uyerovia. Jare yepe tēi iparavete ete reta, ěrei jeta umee, ombori vaerā iru upurugüirovia vae reta. ³ Chepuere amimbeu peve quirāi jae reta umee che chepia pe ayemingueta icavi co umee vaerā vae. Añete co, umee reta jeta ete ye chepia pe ayemingueta icavi co umee vaerā vae güi. Jare umee reta che ayocui mbae reve. ⁴ Jare uyerure oreve numbiresive vaerā jocua uipota umee vae, jucuarāi ipuere vaerā ombori iru uñeño tee Tumpa peguarā vae reta. ⁵ Jare uyapo reta jeta ete ye ore nuāro tēi uyapota vae güi. Echa'ā uñemee reta yandeYa pe uyeyocui vaerā. Jayave uñeño reta oreve vi, orembori vaerā Tumpa jei vae rupi. ⁶ Jáeramo numiñera Tito opa vaerā umbati pe reta pemeeta pepiacavi jeco pegua vae. Echa'ā jae etei umbipi umbati. ⁷ Pepurugüirovia tuicha ete co. Icavi ete peporomboe. Jeta mbaembae picuaa. Peratangātu jare orerau ete. Opaete cua piyapo cavi. Jáeramo picuaaca vi quirāi pepiacavi ete cua pemeeta vae re.

⁸ Cua che jae peve vae penti mboroyocui'ā co. Ērei chemiari peve cuarāi iru vae reta uipota umee ombori vaerā iru upurugüirovia vae reta ramo, jare cuarāi piyapo yave, picuaacata pepuruau añetete co. ⁹ Picuaa cavi co quirāi yandeYa Jesucristo uicuaaca

ipiacavi. Echa'a yepe tēi jae icocatu ete, ērei uyembiparavete yanderau ramo, yande yaicocatu vaerā Tumpa coti.

¹⁰ Che pumbiaracuaa cua re cuarāi: Icavi co piyapo vaerā cua. Echa'a penti año ma pe reta pipota tēi pembori vaerā, jare pembipi pembati pemee vaerā. ¹¹ Jáeramo añave opa piyapo cue jucuarāi piyapo. Echa'a cue año pe pipota piyapo cua. Jáeramo añave opa piyapo cue año pe pipota piyapo vae. Pemee jocua penoi vae güi, pembori vaerā ĩru upurugüirovia vae reta. ¹² Echa'a yaipota yave ñamee ñanequirēi reve, Tumpa uipota ñamee vaerā ime ñanoi vae rupi. Tumpa uipota'a ñamee vaerā mbaeti yave ñanoi ñamee vaerā.

¹³ Echa'a aipota'a etei piyembiparavete vaerā ĩru vae reta yugüireco cavi vaerā. ¹⁴ Ĕrei aipota opaete vae oyovaque yugüireco vaerā. Añave pe reta pepuere pemee mbovi jeta penoi vae güi pembori vaerā mbaembae uata chupe vae reta. Jae ramiño vi jae reta jeta güinoi yave jare mbaembae uata peve yave, jae reta ipuereta umee peve mbovi jeta güinoita vae güi. Jáeramo jucuarāi opaete vae oyovaque yugüirecota. ¹⁵ Echa'a Tumpa ĩnee pe uyecuatía oī cuarāi: "Jocua jeta güinoi vae uasa'a mbae güinoi, jare jocua mboviño güinoi vae pe uata'a mbae." Jucuarāi uyecuatía oī.

Tito jare ĩru reta

¹⁶ Ĕrei amee yasurupai Tumpa pe quirāi jae umiatangātu Tito pecoti, oremiatangātu pecoti rami. ¹⁷ Echa'a Tito uipota uyapo ore nduipota uyapo vaerā vae. Ĕrei jatangātu ete pecoti ramo, jaeiño iquirēi oo pepi.

¹⁸ Jare nomondo jae jupie orerivi opaete upurugüirovia vae reta uyembatimbati vae pe uyemingueta cavi jese vae. Echa'a jae umimbeu cavi ñee icavi vae. ¹⁹ Jare jocua reño'a. Echa'a upurugüirovia vae reta uyembatimbati vae uiparavo, jae oo vaerā orerupie orembori vaerā cua mbaraviqui mbiacavi pegua re. Cua mbaraviqui nduyapo numbiadoraca vaerā yandeYa jare nducuaaca vaerā quirāi nduipota ndoporombori. ²⁰ Cuarāi nduipota nduyapo, agüiye vaerā quía orembijeco cua jeta corepoti numbati opaete que rupi numee vaerā iparavete vae reta pe vae re. ²¹ Jecuaeño nduipota nduyapo jupi vae ĩru vae reta jovaque, yandeYa jovaqueño'a.

²² Jare nomondo vi jae reta jupie ĩru orerivi. Jeta vese ma jae uicuaaca oreve quirāi jatangātu jeta mbaembae re. Jare añave jae jatangātu ete pererovia catu ramo. ²³ Ime yave quía upirandu Tito re vae, pepuere pere jae co cheĩru jare uparaviqui co che ndive ore pombori vaerā. Ani upirandu yave ĩru orerivi reta re, pepuere pere upurugüirovia vae uyembatimbati vae reta omondo, jare jae reta umbiadoraca co Cristo. ²⁴ Jáeramo picuaaca chupe reta quirāi peau. Jucuarāi yave, ĩru upurugüirovia vae uyembatimbati vae reta vi uicuaata, jare jucuarāi uicuaata añete co mbaembae icavi vae ndoe chupe reta peré vae.

9

Corepoti uyembatita vae

¹ Tamimbeu ye peve corepoti pembatita vae re. Cua corepoti rupi pepuere pembori ĩru uñeño tee Tumpa peguarā vae reta. Ĕrei cua picuaa ma che aicuatía mbae reve. ² Che aicuaa quirāi pipota ete piyapo cua. Echa'a cua re chemiari cavi peré Macedonia pegua reta pe. Che jae chupe reta quirāi penti año ma pipota peporombori pe reta Acaya pe pico vae. Jare ĩru vae reta yandu yave quirāi pe reta pipota peporombori, jae reta vi uipota oporombori. ³ Ĕrei amondo ma orerivi reta pepi, agüiye vaerā oremiariño peré cua re, jare pemicutiño voi penoi vaerā corepoti, che jae ma rami. ⁴ Aramoi amocue Macedonia pegua reta yugüiraata cherupíe, che aa yave pepi. Jare pembati'a yave corepoti, jae reta uicuaa yave, oremarata. Echa'a ndoe chupe reta quirāi pe reta pipota peporombori. Jae ramiño vi pe reta pamarata. ⁵ Jáeramo chepia pe ayemingueta icavi co ayocui vaerā orerivi reta jae reta rani yugüiraa vaerā pepi. Jucuarāi jae reta ipuereta pembori opa vaerā pembati corepoti tenonde yave pere pipota pemee vae. Jare jucuarāi yave, che aa yave pepi, uyecuaata quirāi pemee pepiacavi ramo, mbaeti ore poyocui ramoño. ⁶ Yamijaanga umaeti vae mbaembae pemee vae re. Pemandúa cua re: Mboviño oñoti vae mboviño uavirota. Jare jeta oñoti vae jeta uavirota. ⁷ Penti penti tumee iquirēi reve uipota umee rami. Agüiye quía tumee jacatēi reve ani che ayocui ramoño. Echa'a Tumpa uau uyerovia reve umee vae. ⁸ Jare Tumpa ipuere umee peve jeta

mbaembae ipiacavi jeco pegua, agüiye vaerã mbae uata peve, pe reta jecuaeño pepuere vaerã peporombori opaete mbaraviqui icavi vae re. ⁹ Echa'ã Tumpa iñee pe uyecuatía oĩ cuarãi:

“Jeta umee iparavete vae reta pe.

Jupi vae uyapo vae re Tumpa jaeño mai pegua imanduata.”

Jucuarãi uyecuatía oĩ. ¹⁰ Tumpa umee yandeve ñaneremitirã ñañoti vaerã, jare yanderembiurã yau vaerã. Jae ramiño vi umeeta peve opaete, pepuere vaerã piyapo icavi vae, jare umivendiseta ñru vae reta jupi vae piyapo vae rupi. ¹¹ Jucuarãi pe reta penoita opaete mbaembae icavi vae, pepuere vaerã jeta pemee. Jare ore ndugüüraa yave ñru vae reta pe pemeeta vae, jae reta umeeta yasurupai Tumpa pe. ¹² Echa'ã piyeyocui yave Tumpa pe cuarãi, pemeeta ñru uñeño tee Tumpa peguarã vae reta pe mbaembae uata chupe reta vae. Ërei cuaño'ã uyeyapota. Echa'ã cuarãi piyapo yave, jeta vae umeeta yasurupai tuicha Tumpa pe. ¹³ Jare piyeyocui yave Tumpa pe pemeeta chupe reta vae rupi, jae reta umbiadorata Tumpa peré. Echa'ã cuarãi picuaacata chupe reta quirãi piyapo cua icavi vae, ñee icavi vae Cristo regua perovia ramo. Jare jae reta umbiadorata Tumpa jeta pemeeta chupe reta jare opaete vae pe vae jeco pegua. ¹⁴ Jare jae reta uyerureta Tumpa pe peré, jare perauta Tumpa ipiacavi uyecuaa peré vae jeco pegua. ¹⁵ Ñamee yasurupai Tumpa pe regalo jae umee yandeve vae re. Yandepuere'ã etei yaicuaa cavi cua regalo Tumpa umee yandeve vae.

10

Mbaepuere Pablo güinoi vae

¹ Che etei pumiñera cua re. Cristo umee cheve añemimichi jare chepiaguasu vaerã. Jáeramo chepuere pumiñera cuarãi, yepe tẽi amocue vae jei añemimichi ete pepi aĩ rambueve, Ërei aĩ'ã yave pepi chemiari peve aquiye mbae reve. ² Ërei che pumiñera cua re. Echa'ã aipota'ã añeengata peve aa yave pepi. Ërei chepia pe ayemingueta aramoi icavi co añeengata vaerã amocue pepite pe ñugüinoi vae pe. Echa'ã jae reta ipia pe uyemingueta tẽi ore nduico ore ndoe vae rupiño. ³ Ërei yepe tẽi ore nduico cua ivi pe, Ërei nduiporu'ã orembaepuereño nuñerãro vaerã aña guasu ndive. ⁴ Echa'ã ore nuñerãro'ã orembaepuere peño. Ore nuñerãro Tumpa imbaepuere tuicha vae pe, orepuere vaerã numiamiri aña guasu, yepe tẽi imbaepuere tuicha co. ⁵ Jucuarãi nduicuaaca añete'ã co upurugüürovia mbae vae reta ipiyemingueta jare opaete moromboe aña guasu uiporu agüiye vaerã ñru vae reta uicuaa Tumpa vae. Jare jucuarãi nduyapo opaete vae ipia pe uyemingueta vaerã Cristo uipota ipia pe uyemingueta vaerã rami. ⁶ Jare jeta pe reta pepia pe piyemingueta yave Cristo uipota pepia pe piyemingueta vaerã rami, chepuere aiporaca opaete jucuarãi'ã uipota ipia pe uyemingueta vae reta pe.

⁷ Pe reta pemptuicha ñru vae reta mbae uyecuaa vae re. Aramoi quía uicuaa cavi jae co Cristo imbae. Ërei tuicuaa cavi ore vi co jae Cristo imbae, jae rami. ⁸ YandeYa umee oreve mbaepuere orepuere vaerã pombori. Umee'ã oreve pumbiavai vaerã. Jare cua mbaepuere nonoi vae jecuaeñotai co aipiu. Ndarau chemara jese. ⁹ Jáeramo agüiye pepia pe piyemingueta che aipota puminguíye aicuatía peve vae pe. ¹⁰ Echa'ã amocue vae jei cuarãi: “Pablo uicuatía yandeve vae pe jei yandeve jeta mbaembae yayai vae yayapo vaerã, jare uicuatía mbaepuere güinoi vae rami. Ërei jae etei oĩ vae yandepi, uyecuaa quirãi jae mbaeti etei mbaepuere güinoi, jare imiari yave, ñarĩro co.” Jucuarãi jei. ¹¹ Ërei jucuarãi jei vae tuicuaa cua: Nduicuaaca orembaepuere nduicuatía peve vae pe, pepi noi'ã yave. Jae ramiño vi nduicuaacata orembaepuere nduyapota vae pe, pepi noi yave.

¹² Ime amocue vae uyembutuicha vae. Nduipota'ã etei nduyemboyovaque jae reta ndive. Nduipota'ã vi ndoe peve mbaraviqui ore nduyapo vae icavi ete co mbaraviqui jae reta uyapo vae güi. Jae reta iyaracuaa'ã. Echa'ã uñeãa reta iyemingueta rupiño, jare jei reta mbaraviqui jae reta uyapo vae icavi ete mbaraviqui ñru reta uyapo vae güi. ¹³ Ërei ore ndarau ndoe ore nduyapo penti mbaraviqui icavi vae, nduyapo'ã yave. Echa'ã ore nduyapo mbaraviqui icavi vae Tumpa umee oreve nduyapo vaerã vae. Jare Tumpa umaeño oreré nduyapo vaerã mbaraviqui icavi vae pepite pe vi. ¹⁴ Tumpa etei umee oreve mbaepuere cua mbaraviqui nduyapo vaerã. Nduyavi'ã. Añete co, nduyavita tẽi, Tumpa umee'ã yave oreve cua mbaepuere. Jáeramo ndoo ma pepi numimbeu vaerã peve ñee icavi vae Cristo regua. ¹⁵ Ndarau etei ndoe ore nduyapo mbaraviqui icavi vae ñru

vae reta uyapo vae. Ērei nduipota uyembutuicha vaerā pepurugüirovia. Jare jucuarāi yave, pepuereta orembori jeta ete mbaraviqui orepuere vaerā nduyapo, Tumpa uipota nduyapo vaerā vae rupi, ¹⁶jare orepuere vaerā numimbeu ñee icavi vae perenta cuti rupi ñugüinoi vae reta pe. Echa'ā nduipota'ā etei ndoe ore nduyapo mbaraviqui icavi vae ĩru vae uyapo Tumpa jae vae rupi vae.

¹⁷ Ērei ime yave quía uipota uyembicate vae, tuyembicate yandeYa re. ¹⁸ Echa'ā yandeYa umbutuichaca vae uyembutuichacata co, uyembutuichaca'ā co jaeiño.

11

Pablo jare temimondo añetete mbae vae reta

¹ Aipota pepiaguasu vaerā cheve, chemiari rambueve iyaracuaa mbae vae rami. Jáeramo pepiaguasu cheve. ² Añemiagiüiro ete peré. Echa'ā Tumpa umee cheve jucuarāi añemiagiüiro vaerā peré. Echa'ā aipota pumee Cristo pe, penti cuñatai icavi vae ndeiño cuimbae güireco vae penti cuimbae ndive umenda yave uñemee ime pe rami. ³ Ērei chepia pe ayemingueta quirāi aramoi petavita, agüiye vaerā pepia pe piyemingueta cavi Cristo re. Echa'ā jucuarāi jocua mboi ipoqui upurumbitavi vaerā vae umbitavi Eva. ⁴ Echa'ā ou yave pepi quía Jesús regua umimbeu peve vae, chupe pepiaguasu ete co, yepe tēi jae umimbeu'ā Jesús regua ore numimbeu peve rami. Jae ramiño vi pepiaguasu co chupe jae umimbeu peve yave pembiresive vaerā ĩru espíritu tenonde yave Espíritu pembiresive vae güi uyuavi vae. Jae ramiño vi pepiaguasu co chupe jae umimbeu peve yave ĩru ñee icavi echa vae tenonde yave ñee icavi vae perovia vae güi uyuavi vae. ⁵ Ērei che arovia jocua temimondo nondeguia vae reta pe reta pere chupe vae jeta'ā etei uyapo Tumpa pe che ayapo vae güi. ⁶ Yepe tēi chepoqui'ā chemiari vaerā, ěrei aicuaa catu chemiari peve jese vae. Jare jecuaeño nduicuaaca cua peve opaete nduyapo vae rupi.

⁷ Amimbeu peve yave ñee icavi vae Tumpa güi ou vae acovara'ā etei peve mbae re. ¿Ayapo echa ra mbaeyoa peve? Echa'ā che añemimichi ayapo vaerā icavi vae peve. ⁸ Ambiresive ĩru upurugüirovia vae reta uyembatimbatí vae güi corepoti agüiyeta tēi ambiresive chugüi reta vae. Echa'ā jae reta umbiepi cheve, chepuere vaerā ayeyocui peve. ⁹ Jare aico pepi rambueve mbae uata cheve yave, mbaeti quía pepite pe amambeco chembori vaerā. Echa'ā yanderivi Macedonia güi yugüeru vae reta güeru cheve mbae uata cheve vae. Jare jucuarāi aico, agüiye vaerā pumambeco chembori vaerā. Jare jecuaeño aicota jucuarāi. ¹⁰ Ayerovia ete cua re, jare jecuae chemiarita jese opaete Acaya rupi. Mbaetita quía ipuere chemiqui. Echa'ā Cristo ico chepia pe. Jáeramo aicuaa cua che jae vae añete vae co. ¹¹ Cua uipota'ā jei che puau'ā co. Tumpa uicuaa puau co.

¹² Ērei jecuaeño ayapo vae jecuaeñota co ayapo. Echa'ā jocua ĩru reta uipota ete tēi uyemboyoaque ore ndive, ipuere vaerā uyembutuicha. Ērei cuarāi jecuae ayapo yave, ndarau ipuere. ¹³ Jae reta temimondo añetete vae reta'ā co. Uparaviqui reta upurumbitavi vaerā. Jae reta uipota ĩru vae reta ipia pe uyemingueta jese vaerā jae reta co Cristo jemimondo reta. ¹⁴ Jare agüiye ñanepiacañi cua re. Echa'ā Satanás etei ipuere uyembiambie, uyecuaa vaerā penti ángel tembipe pe ico vae rami. ¹⁵ Jáeramo penti miacañi'ā co Satanás pe uyeyocui vae reta uyembiambie yave uyecuaa vaerā jupi vae uyapo vae reta rami. Ērei taicue rupi Tumpa uiporacata chupe reta uyapo vae jeco pegua.

Pablo uiporara

¹⁶ Cua che jae ye peve: Agüiye quía ipia pe tuyemingueta che co jae iyaracuaa mbae vae. Ērei jucuarāi pepia pe piyemingueta yave, pepiaguasu cheve penti iyaracuaa mbae vae pe pepiaguasu rami, che vi ayembicate vaerā michi pegua. ¹⁷ Aicuaa cavi chepuere ayembicate. Ērei cuarāi chemiari yave, chemiari aĩ penti iyaracuaa mbae vae imiari rami. Chemiari'ā co aĩ yandeYa uipota chemiari vaerā rami. ¹⁸ Jeta vae uyembicate ñugüinoi jae retaiño uyapo vae re. Jáeramo che vi ayembicateta. ¹⁹ Echa'ā pe reta pepiaguasu piyerovia reve iyaracuaa mbae vae reta pe, pe reta pepia pe piyemingueta pearacuaa ramo. ²⁰ Echa'ā pepiaguasu pemimbaraviqui tanta piyeyocui vaerā chupe vae reta pe, jare pecorepoti umingasta vae reta pe, jare pembitavi vae reta pe, jare pererüro vae reta pe, jare ocua perova re vae reta pe. ²¹ Ērei pe reta pere ore orepirāta'ā co. Che jae peve

añete co jocua pere oreve vae. Ērei ime yave quía ipuere uyembicate vae, che vi chepuere ayembicate. Añave chemiari aī iyaracuaa mbae vae imiari rami.

²² Jae reta jei: “Ore co jae hebreo reta.” Che jae vi co. Jae jei reta: “Ore co jae Israel pegua reta.” Che jae vi co. Jae jei reta: “Ore co jae Abraham inēmoña reta pegua.” Che jae vi co. ²³ Jae jei reta: “Ore nduyeyocui Cristo pe.” Che ayeyocui ete Cristo pe chugüi reta. Ayemingueta ye aī iyaracuaa mbae vae uyemingueta rami. Che aparaviqui tanta ete chugüi reta. Jeta vese ĩru vae reta chenupa chicote pe - chepuere'ã opa aipapa. Jeta vese añeñonoca peresoriru pe. Jeta vese amano seri. ²⁴ Pandepo vese judío reta chenupa chicote pe. Chenupa ñave ñave uiporu cheré treinta y nueve vese chicote. ²⁵ Mbapi vese ĩru vae reta chenupa ivira pe. Penti vese cheapi reta ita pe. Mbapi vese chalana guasu aa i guasu rupi pipe vae uyea. Penti vese apita i guasu pe etei penti piare jare penti ara. ²⁶ Jeta ete aguata opaete que rupi. I chereraa seri. Upurupiãro vae reta cheraãro aguata vae rupi. Cherentaigua reta oyovaicho che ndive. Jae ramiño vi judío mbae vae reta oyovaicho che ndive. Amano seri tenta guasu reta pe jare tape rupi jare i guasu pe. Jae upurugüirovia-raanga vae reta oyovaicho che ndive. ²⁷ Tanta aparaviqui aiporara reve. Jeta vese aque cavi'ã. Chiyembai jare cheúe. Jeta vese uata cheve tembú, roi cheve jare uata cheve temimonde.

²⁸ Jae ĩru mbaembae amimbeu'ã peve vae uyeyapo cheve chembiavai vaerã. Jae opa ara rupi jeta ete chepia pe ayemingueta opaete upurugüirovia vae uyembatimbatí vae reta re. ²⁹ Ime yave quía ipirãta'ã ipurugüirovia re vae, che vi añemiiru jae ndive chepia pe. Ime yave quía ĩru vae umbiavai vae, che vi chepochi jese. ³⁰ Pipota yave ayembicate vaerã, ayembicateta co jocua mbaembae chepirãta'ã co uicuaaca vae re. ³¹ Tumpa uicuaa cheapu'ã etei aī. Jae co yandeYa Jesús Tu. Opaete vae umbiadorata jaeño mai pegua. ³² Damasco pe aico yave, Damasco pegua reta juvicha mburuvicha guasu Aretas jee vae pe uyeyocui vae uipota tēi chepisi. Jáeramo oyocui sundaro reta uãro vaerã opaete Damasco jonque reta. ³³ Ērei cheĩru reta chembigüeyi penti canasta pe penti ventana Damasco iquesemba ita pegua vae pe oĩ vae rupi. Jae jucuarã asi Damasco pegua reta juvicha güi, agüiye vaerã chepisi.

12

YandeYa umee ipiacavi Pablo pe

¹ Pipota ayembutuicha vaerã, yepe tēi icavi'ã co ayembutuicha vaerã. Ērei tamimbeu peve quirã yandeYa uechaca jare uicuaaca cheve mbaembae. ² Che co jae penti cuimbae Cristo re güirovia vae. Uasa ma catorce año ayereraa vae ara ivate ete oĩ vae pe. Aicuaa'ã oo ra cherete ani oo'ã ra. Tumpaño uicuaa. ³⁻⁴ Jae aicuaa quirã ayereraa ara pe, jare joco pe ayandu ñee reta jupi'ã penti cuimbae ñee uaa vaerã vae. Tumpa umaño'ã penti cuimbae re ñee omõē jocua ñee reta re. Aicuaa'ã oo ra cherete ani oo'ã ra. Tumpaño uicuaa. ⁵ Ayembicateta tēi cua re. Ērei ndarau ayembicate. Jaeño ayembicateta jocua mbaembae chepirãta'ã co uicuaaca vae re. ⁶ Ērei ndarau chemiari iyaracuaa mbae vae imiari rami, yepe tēi ayembicate. Echa'ã chemiarita tēi añete vae re. Ērei ndarau chemiari jese, agüiye vaerã quía chembutuicha jese. Echa'ã aipota ĩru vae reta ipia pe uyemingueta vaerã mbae ayapo vae uecha vae jare cheporombœ uyandu vae reño.

⁷ Jeta vese yandeYa uicuaaca cheve mbaembae. Jae agüiye vaerã ayembicate ete cua re, ou cheve penti mbaerasi chemambeco vaerã. Chemambeco penti yuu yandesoo pe oĩ vae yanamambeco rami. Jocua mbaerasi Satanás ombou uiporaraca cheve vaerã. ⁸ Ayerure yandeYa pe mbapi vese cua mbaerasi re, upita vaerã chegüi. ⁹ Ērei yandeYa jei cheve cuarã: “Tamee ndeve chepiacavi nemiaguanta vaerã. Echa'ã nde nepirãta'ã ramo, chepuere aicuaaca quirã tuicha ete co chembaepuere.” Jucuarã jei. Jáeramo ayerovia chepirãta'ã ramo. Echa'ã chepirãta'ã ramo, Cristo umee cheve imbaepuere. ¹⁰ Añete co, chepirãta'ã. ĩru vae reta chererĩro. Mbaembae uata cheve. ĩru vae reta uyapo icavi mbae vae cheve. Yavai ete aico vaerã. Ērei opaete cua mbaembae uyeyapo cheve yave Cristo pe ayeyocui ramo, ayerovia co. Echa'ã che etei chepirãta'ã yave, yandeYa chemimirãta.

¹¹ Ayeyapo ma penti iyaracuaa mbae vae rami ayembicate vaerã. Pe reta etei pipota jucuarã ayapo vaerã. Pe reta chembicatcata tēi co. Echa'ã jocua temimonde tenondegua vae reta pe reta pere chupe vae jeta'ã etei uyapo Tumpa pe che ayapo vae güi. Chepuere jae cua, yepe tēi che mbae'ã etei co. ¹² Añete co, che aicuaaca peve quirã che

co jae penti temimondo añetete vae pepi aico rambueve. Echa'ã aparaviqui chepiaguasu reve. Ayapo miacañi reta picuaa vaerã. ¹³ ¿Maera pa pepia pe piyemingueta che ayapo'ã pepite pe ñru upurugüirovia vae uyembatimbati vae reta ipite pe ayapo rami? Añete co, pemiapi'ã cheve jae reta umbiepi cheve rami. Jocua icavi'ã echa peve yave, chembiasa.

Pablo umimbeu oo yeta co Corinto pegua reta ipi

¹⁴ Mase, mocui vese ma apou pepi. Jare añave ayeyapicatu aĩ, aa ye vaerã pepi. Jare ndarau aipota pemiapi vaerã cheve. Echa'ã aipota'ã pecorepoti. Pombori vaerãno aipota. Che co jae peru rami. Icavi co tu reta uñuvatu vaerã mbaembae umee vaerã isambiai reta pe. Yae'ã co sambiai reta pe uñuvatu vaerã mbaembae umee vaerã tu pe. ¹⁵ Chequirẽi amingasta chembaembae jare chequirẽi vi ayemingasta ayerovia reve chepuere vaerã pombori. Yepe tẽi pe reta cherau ete'ã, ãrei che puau ete.

¹⁶ Ërei aramoi amocue vae jeita cuarã: "Añete co, Pablo jei'ã yandevẽ yambiapi vaerã chupe. Ërei jae ipoqui upurumbitavi vaerã. Yanembitavi co." Aramoi jucuarã jeita. ¹⁷ Che pumbitavica'ã etei jocua amondo pepi vae reta pe. ¹⁸ Amiñera Tito oo vaerã pepi, jare amondo jae jupie ñru yanderivi. Tito pemitavi'a etei co. Jae uyapo Espiritu Santo imbaepuere pe che ayapo vae rami.

¹⁹ Aramoi pepia pe piyemingueta quirã añave oremiari cuarã nduyerepi vaerãno. Ërei jucuarã'ã co. Oremiari cuarã Tumpa jovaque Cristo re ndugüirovia ramo. Jare opaete nduyapo pe reta pepirãta vaerã pepurugüirovia re. Echa'ã ore puau ete. ²⁰ Ërei aa ye yave pepi, chepia pe ayemingueta aramoi aechata pico'ã che aipota pico vaerã rami, jare aramoi jocua jeco pegua che ayapota pe reta pipota'ã ayapo vaerã vae. Echa'ã chepia pe ayemingueta aramoi piyeaca uyupii, peacataã piyee, pepochi piyupe, piyembiyao piyugüi, pemiari ndaye re ñru pe, piñera piyee, piyembicate jare piñeengueta piyupe. ²¹ Jae ramiño vi chepia pe ayemingueta aramoi Tumpa umañota cheré chemara vaerã pegüi, aa ye yave pepi. Echa'ã aramoi chepiatiti eteta jeta pepite pe ñugüinoi vae mbaeyoa uyapo vae re, uyerova'ã yave teco pichii vae güi, jare aguasa uyapo vae güi, jare mbiquere uyapo vae güi.

13

Aracuaa reta jare saludo reta

¹ Mocui vese ma apou pepi. Añave aa yeta pepi. Ime yave quã teco uyapo vae, timiari mocui ani mbapi uicuaa cavi jeco regua vae, yaicuaa vaerã añete co. ² Amimbeu ma peve taicue rupi pepi aa yave, jare añave aĩ'ã pepi, ãrei amimbeu ye aĩ peve. Cua aicutã opaete mbaeyoa uyapo vae reta pe jare opaete ñru reta pe: Che aa ye yave pepi, aiporaracata co iyoa vae reta pe. ³ Jocua uicuaacata peve quirãi Cristo imiari peve che rupi. Echa'ã cua pipota picuaa. Jare Cristo ipuere'ã vae rami'ã co peré. Echa'ã uicuaaca peve imbaepuere. ⁴ Echa'ã yepe tẽi Cristo mbaeti mbaepuere güinoi vae rami co uyecutu curusu re yave, ãrei icove ye Tumpa imbaepuere rupi. Jae ramiño vi ore etei mbaeti mbaepuere nonoi, ãrei picuaata quirãi nonoi tecove ipiau vae Cristo güi Tumpa imbaepuere rupi. Jáeramo nonoita co mbaepuere pepite pe.

⁵ Jecuañõ pemaẽ piyee picuaa vaerã pe reta co upurugüirovia vae añetete vae reta. Picuaa co quirãi Jesucristo ico pepia pe, pe reta co jae upurugüirovia vae añetete vae reta yave. ⁶ Ërei aipota picuaa vaerã ore co jae upurugüirovia vae añetete vae reta. ⁷ Jare nduyerure Tumpa pe agüiye vaerã piyapo mbae icavi mbae vae. Nduipota'ã cua, ñru vae reta ipia pe uyemingueta vaerã ore nduyapo icavi vae. Jaeño nduipota pe reta piyapo vaerã icavi vae, yepe tẽi aramoi ñru vae reta ipia pe uyemingueta ore nduyapo'ã icavi vae. ⁸ Echa'ã nonoi'ã mbaepuere ndoyovaicho vaerã añete vae ndive. Jaeño orepuere nuñemĩru añete vae ndive. ⁹ Pe reta pepirãta vave pepurugüirovia re, ore nduyerovia, yepe tẽi pere ore orepirãta'ã co. Jare cua re nduyerure: Tumpa tapemimirãta ete pepurugüirovia re. ¹⁰ Jáeramo aicutã peve cuarãi pepi aĩ'ã rambueve, agüiye vaerã aiporu mbaepuere yandẽYa umee cheve vae aiporaraca vaerã peve pepi aa yave. Echa'ã yandẽYa umee cheve jocua mbaepuere pombori vaerã, aiporaraca peve vaerãno'ã.

¹¹ Jaeño ma, cherivi reta. Piyerovia. Piñemimirãta pepurugüirovia re. Piyembipiacatu. Pico cavi pepiacatu reve penti ramiño. Jare Tumpa etei oĩta pe ndive. Tumpa yanderau

jare yanembipiacatu. ¹² Saludo reta piyapo piyupe yave, piñecuáva piyerau reve.

¹³ Opaete uñeño tee Tumpa peguarā vae reta jei peve Tumpa ndiveño pei.

¹⁴ YandeYa Jesucristo tumee opaete peve ipiacavi. Tumpa tumee opaete peve ipuruau. Espiritu Santo tumee opaete peve yerovia jae uñemĩru pe ndive ramo. Amén.

LA CARTA DEL APOSTOL SAN PABLO A LOS GÁLATAS

¹ Che co jae Pablo. Che co jae Jesucristo jemimondo. Cuimbae reta'ã cheparavo, jare cuimbae reta'ã chemondo. YandeRu Tumpa jare Jesucristo chemondo. Tumpa umbijecove ye Jesucristo güeru umanocue vae reta ipite güi. ² Che jare opaete yanderivi che ndive ñugüinoi vae reta nduicuatía cua tupapire opaete pepurugüirovia vae reta Galacia rupi piyembatimbatí vae pe. ³ YandeRu Tumpa jare yandeYa Jesucristo tumee peve ipiacavi jare ipiacatu. ⁴ YandeYa Jesucristo ñemee umano vaerã yanembaeyoa reta re, yanderepi vaerã teco icavi mbae vae ivi pegua güi. Echa'a cua co jae yandeRu Tumpa jei vae. ⁵ YandeRu Tumpa tuyembadoraca jaeño mai pegua. Amén.

Ñee icavi vae pentiño co

⁶ Chepiacañi ete quirãi imambae ete piyembopiaca Tumpa güi perovia vaerã ñru ñee icavi echa vae. Echa'a Tumpa preparavo Cristo ipiacavi rupi. ⁷ Ërei mbaeti co ñru ñee icavi vae. Jaeño ime amocue pembopa vae. Echa'a jae reta uipota perovia vaerã ñru ñee icavi echa vae ñee icavi vae Cristo regua ipepica pe. ⁸ Ërei numimbeu ma peve ñee icavi vae. Jare ime yave quía ñru ñee icavi echa vae umimbeu peve vae - ore yepe ani penti ángel ara güi ou vae yepe - Tumpa tuyapo mbae icavi mbae vae chupe. ⁹ Cua co tenonde yave ndoe ma peve. Ërei añave amimbeu ye peve. Perovia co ñee icavi vae. Ime yave quía ñru ñee icavi echa vae umimbeu peve vae, Tumpa tuyapo mbae icavi mbae vae chupe. ¹⁰ Aipota'ã etei ivi pegua reta chembutuicha vaerã. Aipota Tumpaño chembutuicha vaerã. Aipota'ã etei ivi pegua reta uyemingueta cavi vaerã checoti. Echa'a aipota yave mona ivi pegua reta uyemingueta cavi vaerã checoti, ndarau tẽi ayeyocui Cristo pe.

Quirãi Pablo uyeyapo Jesucristo jemimondorã

¹¹ Ërei aipota picuaa vaerã, cherivi reta, cua: Cua ñee icavi vae che amimbeu vae ou'ã co cuimbae güi. ¹² Echa'a mbaeti penti ave cuimbae umimbeu cheve. Ayemboe'ã etei jese cuimbae güi. Jaeño Jesucristo uicuaaca cheve.

¹³ Pe reta picuaa ma quirãi judío reta iporomboe re che aicose. Echa'a ayapose jeta ete mbae icavi mbae vae Tumpa uiparavo vae reta coti, jare aipota tẽi opa amicañi. ¹⁴ Jare judío reta iporomboe re cheratangãtu ete jeta cherentaigua cheaveigua reta güi. Echa'a cheratangãtu ete chetenondegua reta iporomboe re. ¹⁵ Ërei Tumpa cheñono tee iyupegarã ndei chesi güi aa mbove, jare cheparavo ipiacavi jeco pegua. Jare jae uipota ma yave, ¹⁶ uicuaaca Tai cheve, che amimbeu vaerã judío mbae vae reta pe. Cua uyeyapo yave, ayemingueta'ã jese quía ndive. ¹⁷ Aa'a vi Jerusalén pe Tumpa jemimondo reta tenonde Tumpa omondo chegüi vae ñugüinoi vae pe. Ërei aa Arabia pe, jare joco güi ayu ye Damasco pe.

¹⁸ Cua jaicue rupi, mbapi año uasa ma yave, aa Jerusalén pe ayemingueta vaerã Pedro ndive, jare apita jae ndive quince ara. ¹⁹ Ërei aecha'a penti ave ñru temimondo. Jaeño aecha Jacobo - jae co yandeYa tiví. ²⁰ Mase, cua aicuatía peve vae añete vae co. Tumpa uicuaa catu añete vae co.

²¹ Cua jaicue rupi aa Siria jare Cilicia pe. ²² Jare Cristo re güirovia vae Judea pe uyembatimbatí vae reta checuaa'a, cherecha'a ramo. ²³ Jaeño jae reta uyandu jei cuarãi: "Jocua cuimbae icavi mbae vae uyapose yandave vae añave umimbeu mburugüirovia tenonde yave uipota tẽi opa umicañi vae." Jucuarãi uyandu jei. ²⁴ Jare umbiadora reta Tumpa chereco pegua.

2

¹ Cua jaicue rupi, catorce año uasa ma yave, aa ye Jerusalén pe Bernabé ndive, jare araa vi Tito. ² Jare aa, Tumpa uicuaaca cheve aa vaerã ramo, jare amimbeu cavi chupe reta jocua ñee icavi vae amimbeu judío mbae vae reta pe vae. Ërei amimbeu rani itenondegua reta peño. Echa'a aipota ayemingueta cavi jae reta ndive, jae reta uicuaa cavi vaerã jocua jecuaeño amimbeu vae. ³ Jare ipuere'ã quía umicircuncidaca Tito che ndive oí vae, yepe tẽi jae griego co, ⁴ jare yepe tẽi amocue mbaeti añetete upurugüirovia vae reta uique viari orepite pe. Echa'a uipota uecha viari quirãi ra nduico. Echa'a uicuaa reta ore numimbeu

co quirái Cristo Jesús oreyora ma mboroyocui güi. Echa'ã uipota tēi nduico ye vaerã mboroyocui re. ⁵ Ërei nuñemaño'ã etei jese reta. Echa'ã nduipota jecuaño penoi vaerã ñee icavi vae añetete vae.

⁶ Ërei itenondegua uyembutuichaca echa vae reta ipuere'ã etei umiiru ñee amimbeu vae ndive. Yepe tēi tenonde yave uyembutuichaca reta co, ãrei jocua uipota'ã jei mbae cheve. Echa'ã Tumpa uau'ã penti vaerã ñru vae güi. ⁷ Ërei jae reta uicuaa ma Tumpa umee co cheve amimbeu vaerã ñee icavi vae judío mbae vae reta pegua, Pedro pe umimbeu vaerã ñee icavi vae judío reta pegua umee rami. ⁸ Echa'ã Tumpa omondo Pedro ico vaerã jemimondorã judío reta pegua. Jae ramiño vi jae chemondo aico vaerã jemimondorã judío mbae vae reta pegua. ⁹ Jáeramo uicuaa reta ma yave quirái Tumpa umee cheve ipiacavi, Jacobo, Cefas jare Juan - jae reta co itenondegua echa vae reta - chepopsis jare uipopsis vi Bernabé, uicuaaca vaerã penti rami co noi, jare ore ndoo vaerã judío mbae vae reta pe, jare jae reta yugüüraa vaerã judío reta pe. ¹⁰ Jaeño jei reta oreve oremandúa vaerã iparavete vae reta re. Ërei che etei aipota ete ayapo jucuarã.

Pablo umbijeco Pedro Antioquía pe

¹¹ Ërei Pedro ou yave Antioquía pe, chupe etei ambieta, teco güinoi ramo. ¹² Echa'ã ndei amocue judío reta Jacobo güi yugüeru mbove, Pedro ucaruñoi judío mbae vae reta ndive. Ërei yugüeru ma yave, Pedro ucaru'ã ma judío mbae vae reta ndive, jare opou'ã ma ipi. Echa'ã uquiye judío reta güi. ¹³ Jayave ñru judío reta vi uyemboe Pedro jeco re, jare uyapo reta jae uyapo rami. Jáeramo Bernabé vi uñemaño chupe reta, uyapo vaerã jae reta uyapo rami. ¹⁴ Ërei aecha yave uyapo'ã jupi añete vae ñee icavi vae pegua rupi, che jae Pedro pe opaete vae jovaque: “Yepe tēi nde co jae penti judío, ãrei ndico judío mbae vae reta yugüüreco rami, ndico'ã judío reta yugüüreco rami. Jáeramo ¿maera pa ndipota judío mbae vae reta yugüüreco vaerã judío reta yugüüreco rami?” Jucuarã jae chupe. ¹⁵ Ore mbaeti etei co judío mbae vae reta - mbaeyoa pegua ndoe chupe vae. Ërei yepe tēi ore co jae judío reta etei, ¹⁶ nduicuaa ndarau quía ipuere uyembujupica mboroyocui jei vae re uyapo vae rupi. Jaeño ipuere uyembujupica güirovia yave Jesucristo re. Jáeramo ore vi ndugüürovia ma Jesucristo re nduyembujupica vaerã mburugüürovia Cristo re nonoi vae rupi, nduyembujupica'ã mboroyocui jei vae re nduyapo vae rupi. Echa'ã ndarau quía uyembujupica mboroyocui jei vae re uyapo vae rupi.

¹⁷ Jare nduipota yave nduyembujupica Cristo re, ore vi nduyecuaa mbaeyoa pegua reta. Ërei yepe tēi nduyecuaa cuarã, ãrei Cristo oreapo'ã etei co mbaeyoa pegua retarã. ¹⁸ Echa'ã aipota yave ayapo ye jocua ambai vae, añete co che ayeyapo mbaeyoa peguarã. ¹⁹ Mboroyocui jei vae rupi amano ma co. Jáeramo añave che co jae penti umano ma mboroyocui coti vae rami. Jare jáeramo añave chepuere ayeyocui Tumpa pe. ²⁰ Cristo umano curusu re yave, che amano vi jae ndive. Jáeramo aicove'ã ma, jaeño Cristo icove chepia pe. Jare cua ivi pe aico rambueve, aico co mburugüürovia Tumpa Tai re anoi vae re. Echa'ã jae cherau, jare uñemee umano vaera cheré. ²¹ Aríro'ã Tumpa ipiacavi. Echa'ã mboroyocui jei vae re yayapo vae rupi yandepuere yayembujupi yave mona, Cristo umanoñota tēi.

3

Mboroyocui ani mburugüürovia

¹ Galacia pegua reta, pe reta co jae iyaracuaa mbae vae reta rami. ¿Quía pa pembítavi, agüiye vaerã perovia añete vae? Echa'ã perovaque etei amimbeu cavi ma quirái Jesucristo uyecutu curusu re. ² Cuaño aipota pemimbeu vaerã cheve: ¿Pembiresive pa Espíritu Santo mboroyocui jei vae re piyapo vae rupi, ani ñee icavi vae piyandu yave pepurugüürovia ramo? ³ ¿Pearacuaa'ã etei pa co? Pe reta pembipi Espíritu Santo rupi. ¿Piñemimírátata pa pe retaiño pepuere piyapo vae rupi? ⁴ ¿Piporaraño ma pa jeta mbaembae? Quirái mona agüiye piporaraño. ⁵ Tumpa umee peve Espíritu Santo, jare uyapo miacañi reta pepite pe. ¿Uyapo pa cua mbaembae mboroyocui jei vae re piyapo vae rupi, ani ñee icavi vae piyandu yave pepurugüürovia ramo?

⁶ Jucuarã vi Abraham güürovia Tumpa, jare Tumpa umbujupi ipurugüürovia jeco pegua. ⁷ Jáeramo picuaa co cua: Mburugüürovia güinoi vae reta co jae Abraham tai reta rami. ⁸ Tumpa iñee pe uyecuatía oí ñee icavi vae Tumpa umimbeu Abraham pe

vae. Tumpa umimbeu chupe ndei uyeyapo mbove. Echa'ã jei Abraham pe cuarãi: "Nde rupi opaete ivi pegua reta amivendiseta." Jucuarãi jei chupe. Echa'ã Tumpa uicuaa ndei uyeyapo mbove quirãi umbujupita judío mbae vae reta ipurugüirovia jeco pegua. ⁹ Jáeramo Tumpa añave umivendise mburugüirovia güinoi vae reta, Abraham umivendise rami. Echa'ã Abraham vi güinoi mburugüirovia.

¹⁰ Opaete uipotata uyembujupi mboroyocui jei vae re uyapo vae rupi vae reta jecuaño teco güinoi. Echa'ã Tumpa iñee pe uyecuatía oĩ cuarãi: "Tuyembijeco toĩ jocua jecuaño uyapo'ã opaete uyecuatía oĩ mboroyocui itupapire pe vae." Jucuarãi uyecuatía oĩ. ¹¹ Echa'ã yandepuere yaicuaa quirãi mbaeti penti ave ipuere uyembujupi Tumpa jovaque mboroyocui jei vae re uyapo vae rupi. Echa'ã Tumpa iñee pe uyecuatía oĩ cuarãi: "Tumpa umbujupi vae güinoita tecove upurugüirovia ramo." Jucuarãi uyecuatía oĩ. ¹² Jare mboroyocui mburugüirovia pegua'ã co. Echa'ã Tumpa iñee pe uyecuatía oĩ mboroyocui re cuarãi: "Ime yave quía cua nunga uyapo vae, icota uyapo ramo." Jucuarãi uyecuatía oĩ.

¹³ Mboroyocui yanembijecose. Ërei Cristo yanderepi ma chugüi. Echa'ã jae uyembijecoca yandepépica pe. Echa'ã Tumpa iñee pe uyecuatía oĩ cuarãi: "Teco güinoi jocua uyecutu curusu re vae." Jucuarãi uyecuatía oĩ. ¹⁴ Jare cua uyeyapo Cristo pe, Tumpa umivendise vaerã Cristo Jesús rupi judío mbae vae reta, umivendise Abraham rami, jare yande ñanoi vaerã Espíritu Tumpa jei umeeta vae yandepurugüirovia jeco pegua.

¹⁵ Cheriví reta, tachemiari peve cua ivi pe mbae uyeyapo vae re. Ivi pegua reta penti trato uyapo yave uyupu, yepe tẽi ivi pegua retaño co, ndarau quía ipuere umbai, jare ndarau jare ipuere mbae umĩru jae ndive. ¹⁶ Cuarãi vi Tumpa jei umeeta mbaembae Abraham jare iñemoña pe. Tumpa imiari'ã iñemoña reta re. Echa'ã jucuarãi yave mona, uipotata tẽi jei jeta vae. Ërei imiari iñemoña re. Echa'ã cua uipotata jei penti vae. Jare jocua penti vae Cristo co. ¹⁷ Jáeramo che jae peve cua: Tumpa tenonde yave uyapo penti trato Abraham ndive, jare uicuaaca chupe añetete vae co. Jayave cuatrocientos treinta año uasa ma yave ramo, Tumpa umimbeu mboroyocui. Jáeramo mboroyocui ipuere'ã umbai jocua trato. Echa'ã umbai yave mona, Tumpa ndarau tẽi uyapo jei uyapota vae. ¹⁸ Echa'ã mboroyocui re yave mona Abraham güinoita Tumpa jei umeeta chupe vae, ndarau tẽi güinoi jei uyapota vae re. Ërei uyeyapo co Tumpa jei uyapota vae Abraham pe.

¿Maera pa uñemee mboroyocui?

¹⁹ Jayave ¿maera pa uñemee mboroyocui? Uñemiiru co mbaeyoa reta jeco pegua, jocua Abraham iñemoña Tumpa jei umeeta vae ou regua. Jare Tumpa uicuaaca mboroyocui Moisés pe ángel reta rupi, Moisés uicuaaca-yuapi ye vaerã Israel pegua reta pe. ²⁰ Jare uicuaaca-yuapi ye vae oĩ mocui vae ipãu pe, uicuaaca-yuapi ye vaerã penti vae güi iru vae pe. Ërei Tumpa co jae pentiño.

²¹ Ërei mboroyocui oyovaicho'ã etei co Tumpa jei uyapota vae ndive. Echa'ã tecove uñemee yave mona mboroyocui Tumpa uicuaaca vae re, añetete co mboroyocui upurumbujupita tẽi. ²² Ërei Tumpa iñee pe uyecuatía oĩ vae uicuaaca opaete vae iyoa co, Tumpa jei uyapota vae uñemee vaerã mburugüirovia Jesucristo re güinoi vae reta pe. ²³ Ërei ndei ndugüirovia Jesucristo re mbove, mboroyocui güinoise mbaepuere oreré, penti peresoriru iyandarecoa mbaepuere güinoi pereso reta re rami. Jare mboroyocui güinoise mbaepuere oreré, Tumpa uicuaaca regua ndugüirovia vaerã Jesucristo re. ²⁴ Jáeramo mboroyocui oreyandarecoa rami vi co. Jae uyandarecose oreré, Cristo ou regua orembujupica vaerã mburugüirovia rupi. ²⁵ Ërei güinoi'ã ma mbaepuere oreré jocua uyandarecose oreré vae. Echa'ã ndugüirovia ma Cristo re. ²⁶ Jare opaete pe reta vi Tumpa tai reta co mburugüirovia Cristo Jesús re penoi vae rupi. ²⁷ Echa'ã opaete pe reta piyembibautizaca ma piyeyapo vaerã Cristo jete peguarã. Jáeramo pe reta piyeyapo ma penti ramiño Cristo ndive. ²⁸ Cristo Jesús re uyuvavi'ã uyupii judío jare judío mbae vae, uyeyocui vae jare uyeyocui mbae vae, cuimbae jare cuña. Echa'ã Cristo Jesús re opaete pe reta penti ramiño co. ²⁹ Jare pe reta co jae Abraham iñemoña reta rami. Echa'ã pe reta co jae Cristo imbae. Jáeramo pembae co jocua Tumpa jei Abraham pe umeeta vae.

4

¹ Ērei che jae peve cua: Penti cuimbae umano yave, tai güinoita tu imbaembaecue vae sambiai ico rambueve, oyovaque penti uyeyocui vae ndive, yepe tēi opaete mbaembae imbae ma co. ² Echa'ā omboe vae reta jare uyandareco jese vae reta güinoi mbaepuere jese jare imbaembae re, jae uepiti regua iaño tu amiri ndei umano mbove umimbeu vae. ³ Jae ramiño vi tenonde yave moromboe ivi pegua mbaepuere güinoi oreré. Echa'ā jayave nduicose jocua sambiai rami. ⁴ Ērei ou ma uvāe yave ara, Tumpa ombou Tai. Jae oa cuña güi, jare mboroyocui güinoi mbaepuere jese, ⁵ jae ipuere vaerā uepi mboroyocui güinoi mbaepuere jese vae reta, ore orepuere vaerā nduyeyapo Tumpa tai retarā. ⁶ Jare tai reta ma pe reta pico ramo, Tumpa ombou pepia pe Tai iEspíritu. Jae jei: “CheRu, cheRu.” ⁷ Jáeramo pe reta uyeyocui vae reta'ā ma. Pe reta co jae Tumpa tai reta. Jare tai reta ma pico ramo, Tumpa umee vae pembae co Cristo rupi.

Pablo ipiatiti upurugüirovia vae reta re

⁸ Añete co, tenonde yave picuaa'ā Tumpa yave, piyeyocuisse tumpa-raanga reta pe. Jae reta mbaeti etei tecove güinoi. ⁹ Ērei añave picuaa ma Tumpa, Tumpa pecuaa ma ramo. Jáeramo ¿maera pa pipota perovia ye moromboe reta ivi pegua? Echa'ā güinoi'ā mbaepuere pembori vaerā. ¿Maera pa pipota güinoi vaerā mbaepuere peré? ¹⁰ Echa'ā piyandareco peñ ara reta re, yasi reta re, fiesta reta iara reta re jare año reta re. ¹¹ Chepiatiti ete peré. Echa'ā chepia pe ayemingueta aramoi aparaviquiño ma pepite pe. ¹² Cherivi reta, pumiñera piyapo vaerā che ayapo rami. Echa'ā che ayeyapo peñurā. Mbaeti etei mbae icavi mbae vae piyapo checoti. ¹³ Echa'ā pe reta picuaa co quirāi chembaerasi jeco pegua tenonde yave amimbeu peve ñee icavi vae. ¹⁴ Jare yepe tēi chembaerasi, ěrei chereriro'ā jare chemitarēi'ā. Echa'ā pe reta chembiresive cavi. Penti ángel Tumpa güi ou yave mona pepi, pembiresiveta tēi jucuarāi. Jare Cristo Jesús ou yave mona pepi, pembiresiveta tēi jucuarāi. ¹⁵ ¿Maera pa penoi'ā ma jocua yerovia penoise vae? Echa'ā chepuere amimbeu peregua cua: Pepuere yave mona, peequita tēi peresa piyugüi, pemee vaerā cheve. ¹⁶ Che amimbeu peve añete vae. Cua uipota'ā jei ayemboyovaicho ma pe ndive.

¹⁷ Jocua pembopa vae reta jatangātu ete peré, ěrei icavi'ā peve peguarā. Echa'ā uipota pembopia oregüi, pe reta peratangātu vaerā jese reta. ¹⁸ Ērei icavi jecuaño peratangātu vaerā icavi vae re - mbaeti pepi ai yaveño. ¹⁹ Cherivi reta, penti cuña uiporara imembi oata yave vae rami che aiporara ye ma ai Cristo jecove uyecuaa vaerā peré. ²⁰ Aipota tēi ai vaerā pe reta ndive añave, jare aipota'ā tēi pumingueta vaerā cuarāi. Echa'ā chepiacañi ete peré.

Umijaanga Agar jare Sara

²¹ Pe reta pipota mboroyocui güinoi vaerā mbaepuere peré. Pemimbeu cheve, ¿picuaa'ā pa mboroyocui pe uyecuatía oī vae? ²² Echa'ā Tumpa iñee pe uyecuatía oī vae umimbeu quirāi Abraham mocui tai güinoi. Penti tai cuña uyeyocui vae imembi co, jare ñru tai cuña uyeyocui mbae vae imembi co. ²³ Jare jocua uyeyocui vae imembi uñemoña cuimbae jei vae jeco peguaño. Ērei jocua uyeyocui mbae vae imembi uñemoña Tumpa jei ramo. ²⁴ Jare cua co penti jaanga. Echa'ā cua cuña reta uyemijaanga jocua mocui trato re. Penti trato co jae ivitu guasu Sinaí jee vae re uñeme vae. Cua trato pegua reta co jocua oa uyeyocui vaerā vae reta rami. Echa'ā jucuarāi vi co Agar imembi. ²⁵ Echa'ā cua Agar uyemijaanga ivitu guasu Sinaí Arabia pegua re, jare uyemijaanga vi tenta guasu Jerusalén cua ivi pe oī vae re. Echa'ā jocua tenta guasu Jerusalén jare joco pegua reta uyeyocui vae reta rami co. ²⁶ Ērei jocua Jerusalén ara pe oī vae uyeyocui mbae vae reta rami co. Echa'ā jae yandesí rami co. ²⁷ Echa'ā Tumpa iñee pe uyecuatía oī cuarāi:

“Nde nemembi'ā. Ērei iyerovia,

yepe tēi ndepuere'ā etei nenoi nemembirā.

Nde nemembirasi'ā etei. Ērei esapicai ndiyerovia reve.

Echa'ā cuña ime mbae vae güinoita jeta ete imembi cuña ime reve vae güi.”

Jucuarāi uyecuatía oī.

²⁸ Cherivi reta, Isaac oa Tumpa jei ramo. Jae ramiño vi yande ñanoi tecove Tumpa jei vae jeco pegua. ²⁹ Ērei jocua cuimbae jei vae jeco peguaño uñemoña vae uyapo icavi mbae vae jocua Espiritu Santo imbaepuere rupi uñemoña vae pe. Jae ramiño vi añave

uyeyapo yandevé jucuarái. ³⁰ Ērei ¿mbae pa jei Tumpa ñnee pe uyecuatía oí vae? Jei cuarái: “Emombo cuña uyeyocui vae jare imembi. Echa'ã cuña uyeyocui vae imembi ndarau güinoi Abraham imbaembae. Jaeño cuña uyeyocui mbae vae imembi güinoita Abraham imbaembae.” Jucuarái jei. ³¹ Jáeramo, cherivi reta, yandé mbaeti co jocua cuña uyeyocui vae imembi rami. Yandé co jae jocua cuña uyeyocui mbae vae imembi rami.

5

Cristo yandeyora ma

¹ Yayeyora ma. Echa'ã Cristo yandeyora ma. Jáeramo jecuaeño pipota ete pico uyeyora vae reta rami. Agüiye ye ma pipota pico uyeyora mbae vae reta rami.

² Mase, che jae peve, piñemicircuncidaca yave, pe reta co jae uyeyoraca'ã etei Cristo pe vae rami. ³ Amimbeu ye opaete piñemicircuncidaca vae pe, cua piyapo vae uipota jei piyapota co opaete mboroyocui jei vae. ⁴ Jare cua uipota jei pipota'ã ma Cristo pembujupi vaerã. Echa'ã pipota tēi piyembujupi mboroyocui jei vae re piyapo vae rupi. Pipota'ã ma piyembujupi mbiacavi rupi. ⁵ Echa'ã yandé yarovia Tumpa yanembujupi yandepurugüirovia rupi. Jare Espiritu Santo yanembori cuarái yarovia vaerã. ⁶ Echa'ã Cristo Jesús re yarovia yave, ñañemicircuncidaca yave mbae'ã co, jare ñañemicircuncidaca'ã yave mbae'ã co. Jaeño icavi Tumpa pe ñanoi yave jocua mburugüirovia umee yandevé mburuau ñru vae reta coti vae.

⁷ Tenonde voi peguata cavi co Tumpa coti. ¿Quía pa pemiavai, agüiye vaerã perovia añete vae? ⁸ Echa'ã Tumpa preparava ma jare umee peve aracuaa, ěrei cua ñru aracuaa ou'ã Tumpa güi. ⁹ Mboviño levadura uñemíai opaete masa rupi. ¹⁰ YandéYa umee ma cheve mbiacatu peré, quirái pe reta pepia pe piyeminguetata che chepia pa ayemingueta rami. Aicuaa'ã quía ra co jae pemiavai vae. Ērei Tumpa uiporacata co chupe.

¹¹ Cherivi reta, che amimbeu'ã etei ñru vae reta pe uñemicircuncidaca vaerã. Echa'ã cherovaicho reta uyapo icavi mbae vae cheve amimbeu'ã ramo. Echa'ã jocua amimbeu yave, ndarau tēi quía chererĩro Cristo icurusu regua amimbeu vae jeco pegua. ¹² Quirái mona uyembisiri reta jocua pemambeco vae reta.

¹³ Añete co, cherivi reta, Tumpa preparavo pico vaerã uyeyora vae reta rami. Ērei agüiye pere piyupe: “Tumpa yandeyora ma. Jáeramo yandepuere yayapo ipotave yaipota vaeño.” Agüiye pere jucuarái. Ērei piyeyocui piyupe, piyerau ramo. ¹⁴ Echa'ã opaete mboroyocui oyovaque cua ndive: “Eau nderapicha nde ndiyerau rami.” ¹⁵ Ērei piñerãro yave uyupii, aramoi piñemitarēita.

Espiritu Santo jei vae uyuavi yandé yaipota vae güi

¹⁶ Jáeramo che jae peve cua: Pico Espiritu Santo jei vae re, agüiye vaerã pico pe pere vae reño. ¹⁷ Echa'ã peiño pere vae uyuavi Espiritu Santo jei vae güi, jare Espiritu Santo jei vae uyuavi peiño pere vae güi. Mocui reve uyuavi uyugüi. Jáeramo pepuere'ã piyapo pipota piyapo vae. ¹⁸ Ērei pico yave Espiritu Santo jei vae re, mboroyocui mbaeti etei mbaepuere güinoi peré.

¹⁹ Jare jocua mbaeyoa reta yae vae reño yaico yave, yayapo vae uyepocuavi'ã co. Echa'ã yayapo cuarái: Yayuvanga menda re. Yayapo aguasa. Yayapo pichíi vae. Yanembiquere. ²⁰ Yambiadora tumpa-raanga reta. Yayapo paye reta. Ñanemitarēi. Yayovaicho ñru vae reta ndive. Ñanemiarĩro. Yandepochi catu ñru vae reta coti. Yaipota mbaembae yandiyupe peguarãño. Yayembiyao ñru vae reta güi. Yarovia moromboe añete mbae vae. ²¹ Ñaneacatãa yanderapicha re. Yapuruyuca. Yasavipo. Uasa ete yacaru. Jare ñru cua nunga icavi mbae vae yayapo. Echa'ã amimbeu ma peve quirái cua nunga icavi mbae vae jecuaeño uyapo vae reta ndarau yugüireco Tumpa iporoyocua pe. Jare añave amimbeu ye peve.

²² Ērei Espiritu Santo umee yandevé mburuau, yerovia, mbiacatu, mbiaguasu, mbiacavi, mburugüirovia, ²³ jare ñemimichi. Yayapo icavi vae jare ñañemoa. Cua reta re ipuere'ã etei co mboroyocui. ²⁴ Jare Cristo imbae reta umbai ma jei vaeno. Echa'ã uipota'ã ma tenonde yave uau jare uipota vae reño vae. ²⁵ Echa'ã Espiritu Santo umee yandevé tecove ipiau vae. Jáeramo yaico Espiritu Santo jei vae re. ²⁶ Agüiye yaipota ñru vae reta yanembicate vaerã. Agüiye yayovaicho uyupii. Agüiye ñaneacatãa yandiyee.

6

Piyemborimbóri

¹ Cherivi reta, ime yave quía uyepocouca mbae icavi mbae vae uyapo yave vae, pe reta peguata cavi Tumpa coti vae piyapicatu piñemimichi reve. Piñemoa ngatu. Echa'ã aramoí añã guasu uipotata vi uyapoca vaerã peve mbae icavi mbae vae. ² Piyemborimbóri, tivita poi vae reta piyemborimbóri pevoi vaerã rami. Echa'ã jucuarã piyapo yave, piyapota co Cristo iporoyocui.

³ Ērei ime yave quía uyembutuicha vae, uyembitavi co. Echa'ã jae mbae'ã co. ⁴ Ērei penti penti tuyemboe quirã i puere uicuaa icavi ra mbaraviqui uyapo vae. Jayave mbaraviqui icavi vae uyapo yave, ipuereta uyerovia jese iyee. Ndarau uipota ĩru vae reta umbiyerovia vaerã jese. ⁵ Echa'ã penti penti tuyapo iparaviqui, yepe tēi yavai chupe penti tivita poi vae rami.

⁶ Tumpa ĩnee re uyemboe vae tumee mbaembae güinoi vae güi oporombõe vae pe.

⁷ Agüiye piyembitavi. Pepuere'ã pemitavi Tumpa. Echa'ã Tumpa umeeta penti penti pe uyapo vae rupi. ⁸ Ime yave quía ico jei vae reño vae, Tumpa ndarau umee chupe mbae icavi vae. Ērei ime yave quía ico Espĩritu Santo jei vae re vae, Tumpa umeeta chupe tecove opa mbae vae Espĩritu Santo rupi. ⁹ Jare agüiye yandecueri icavi vae yayapo vae güi. Echa'ã Tumpa umbijecoviata yandeve, yandecueri'ã yave. ¹⁰ Jáeramo yandepuere yave, yayapo icavi vae opaete vae pe. Icavi ete co yayapo vaerã icavi vae upurugüirovia vae reta pe.

Pablo uyerovia yandeYa Jesucristo icurusu re

¹¹ Mase, tuicha co cua cuatía reta chepo pe etei aicutía peve vae. ¹² Uipota uyepiucã ĩru vae reta pe vae reta uipota ete piñemicircuncidaca vaerã, agüiye vaerã ĩru vae reta uyapo icavi mbae vae chupe reta Cristo icurusu jeco pegua. ¹³ Ērei jae reta etei uyapo'ã mboroyocui jei vae, yepe tēi uñemicircuncidaca reta. Ērei uipota pe reta piñemicircuncidaca vaerã, jae reta uyerovia ete vaerã ĩru vae reta jovaque, jucuarã piyapo yave. ¹⁴ Ērei yandeYa Jesucristo icurusu reño ayeroviata ĩru vae reta jovai. Jesucristo re arovia ramo, opaete mbaembae upurugüirovia mbae vae reta ueca vae mbae'ã co cheve. Pentu cuimbae uyecutu curusu re vae umano mbaembae ivi pegua güi. Jae ramiño vi che aeca'ã ma mbaembae ivi pegua. ¹⁵ Echa'ã Cristo Jesús re yarovia yave, ñañemicircuncidaca yave mbae'ã co, jare ñañemicircuncidaca'ã yave mbae'ã co. Jaeño icavi Tumpa pe ñanoi vaerã tecove ipiau vae. ¹⁶ Jare opaete cua tecove ipiau vae re yugüireco vae pe tumee Tumpa mbiacatu jare mburuparareco. Tumee vi Israel pegua reta Tumpa imbae vae pe.

¹⁷ Añave güiye agüiye quía tachimambeco. Echa'ã cherete re uyecuaa chepere reta. Cua anoi yandeYa Jesús pe ayeyocui ramo. ¹⁸ Cherivi reta, yandeYa Jesucristo ipiacavi toi pe ndive. Amén

LA CARTA DEL APOSTOL SAN PABLO A LOS EFESIOS

¹ Che co jae Pablo. Che co jae Jesucristo jemimondo Tumpa jei vae rupi. Aicuatía cua tupapire Efeso pe pico vae pe. Tumpa peñono tee iyupeguarã, jare piyeyocui cavi Cristo Jesús pe. ² YandeRu Tumpa jare yandeYa Jesucristo tumee peve ipiacavi jare ipiacatu.

Tumpa yanemivendise Cristo rupi

³ Yambiadora Tumpa. Jae co yandeYa Jesucristo Tu. Tumpa umee yandeve jeta mbaembae icavi vae ara pegua Espiritu Santo rupi, Cristo re yarovia ramo. ⁴ Echa'ã ndei ivi uyeyapo mbove, Tumpa yandeparavo, yande ñaï vaerã Cristo imbaerã. Cua uyapo, ñaneñono tee vaerã iyupeguarã, jare yanembujupi vaerã jae jovaque. ⁵ Tumpa yanderau. Jáeramo tenonde yave yandeparavo yayeyapo vaerã tai retarã Jesucristo rupi. Echa'ã cua iquirëi ete uyapo jae jei vae rupi. ⁶ Jare cua uyapo, yambiadora vaerã ipiacavi tuicha vae jeco pegua. Tumpa ipiacavi ete yandeve Tai uau vae rupi. ⁷ Jesucristo yanderepi ma. Echa'ã umano yanderé. Jáeramo Tumpa umbiasa yandeve yanembaeyoa reta. Echa'ã jae ipiacavi tuicha ete co. ⁸ Tumpa iyaracuaa catu jare opaete uicuaa. Jáeramo ipiacavi ete yandeve. ⁹ Tenonde yave uicuaaca'ã iquirëi uyapo vae. Èrei añave uicuaaca yandeve iquirëi uyapo vae. Cua uyapo jae jei vae rupi. ¹⁰ Cua co Tumpa iquirëi uyapo vae: Umbatita opaete mbaembae uyeyapocue vae, Cristo oï vaerã iYarã - opaete mbaembae ara pe ñugüinoi vae, jare opaete mbaembae ivi pe ñugüinoi vae. Cua Tumpa uyapota ara iyapi yave.

¹¹ Tenonde yave Tumpa yandeparavo ñanoi vaerã jae umeeta yandeve vae. Jae yandeparavo, yande ñaï vaerã Cristo imbaerã. Jare Tumpa cua uyapo iquirëi ramo. Echa'ã jae uyapo opaete mbaembae jae jei vae rupi. ¹² Cua Tumpa uyapo uyembiadoraca vaerã ñru vae reta pe ore rupi. Echa'ã ore rani ndugüirovia Cristo re. ¹³ Jare pe reta vi perovia Cristo re, piyandu yave ñee añete vae. Echa'ã jocua ñee icavi vae umimbeu peve quirã piyembiasaca vaerã. Jare perovia Cristo re yave, Tumpa umee peve Espiritu Santo, uicuaaca vaerã pe reta jae imbae co. Echa'ã Tumpa jei umee vaerã Espiritu Santo. ¹⁴ Tumpa umee yandeve Espiritu Santo, uicuaaca vaerã ñanoita opaete Tumpa umeeta yandeve vae. Cua Tumpa umeeta yandeve yanderepi ete yave. Yande co jae imbae. Jare Tumpa cua uyapo yave, uyembiadoracata co cua jeco pegua.

Pablo uyerure Tumpa pe upurugüirovia vae reta re

¹⁵ Jáeramo che aicuaa güive quirã pe reta perovia yandeYa Jesús re, jare quirã peau opaete Tumpa oñono tee iyupeguarã vae reta, ¹⁶ jecuaeñoi amee yasurupai Tumpa pe peré, jare jecuaeñoi chemandúa peré, ayerure Tumpa pe yave. ¹⁷ Tumpa tumee peve aracuaa Espiritu Santo rupi, jare tuicuaaca peve mbaembae, picuaa cavi vaerã Tumpa regua. Tumpa co jae yandeYa Jesucristo uicuaaca yandeve vae. Jae co yandeRu uyembiadoraca vae. ¹⁸ Tumpa tumee peve aracuaa, picuaa vaerã quirã pepuere peãro piyerovia reve. Echa'ã jae peparavo cuarã. Tumpa tuicuaaca vi peve quirã uyembiadoraca eteta opaete vae pe umeeta yandeve vae jeco pegua. Echa'ã jae ñaneñono tee iyupeguarã. ¹⁹ Tumpa tuicuaaca vi peve quirã tuicha ete imbaepuere yanembori vaerã. Echa'ã yande yarovia Cristo re. Tumpa uicuaaca ma tuicha ete co cua imbaepuere. ²⁰ Echa'ã cua imbaepuere rupi Tumpa umbijecove ye Cristo güeru umanocue vae reta ipite güi, jare umee chupe uguapi vaerã iyacata coti ara pe. ²¹ Cristo imbaepuere tuicha ete opaete mburuvicha reta ara pegua jare ivi pegua jare ipotave mbaepuere güinoi vae imbaepuere güi. Cristo imbaepuere tuicha ete opaete cua ara reta pe mbaepuere güinoi vae reta jare opaete ara reta outa vae pe mbaepuere güinoita vae reta imbaepuere güi. ²² Echa'ã Tumpa umee Cristo pe ico vaerã opaete vae iYarã. Umee vi chupe ico vaerã upurugüirovia vae reta iYarã. ²³ Echa'ã upurugüirovia vae reta Cristo jete co. Jáeramo upurugüirovia vae reta jare Cristo pentiño co. Jare Tumpa umee opaete mbaembae Cristo pe.

2

Tumpa yanembiasia ipiacavi jeco pegua

¹ Jare Tumpa umee ma peve tecove ipiau vae. Echa'ã tenonde yave penoi'ã tecove ipiau vae pereco icavi mbae vae jare pembaeyoa reta jeco pegua. ² Jare jocua jeco pegua jecuaño piyapose icavi mbae vae upurugüirovia mbae vae reta jeco rami. Echa'ã jucuarã uipota piyapo vaerã jocua mburuvicha icavi mbae vae yandepuere mbae yaecha vae - jae co jocua aña guasu upurugüirovia mbae vae reta ipia pe uparaviqui oĩ vae. Jucuarã uparaviqui, agüiye vaerã jae reta uyapo Tumpa jei vae. ³ Tenonde yave opaete yande vi yaico yande yae vae reño jae reta rami. Echa'ã yaicose yanderete jare yandepiyemingüeta uipota vae re. Jáeramo Tumpa uiporacata tẽi yandeve, opaete ñru vae reta pe uiporacata rami. Echa'ã yande vi ivi pegua reta co jae reta rami. ⁴ Ërei Tumpa yandeparareco ete, jare yanderau ete. ⁵ Jáeramo umee yandeve tecove opa mbae vae yaico vaerã Cristo ndive, yepe tẽi tenonde yave ñanoi'ã tecove opa mbae vae yanembaeyoa reta jeco pegua. Tumpa yanembiasia ipiacavi jeco pegua. ⁶ Tumpa umbijecove ye Cristo Jesús güeru umanocue vae reta ipite güi. Jae ramiño vi umee yandeve tecove opa mbae vae Cristo Jesús ndive, jare yandepo pentiño Cristo Jesús ndive. ⁷ Cua uyapo, uicuaaca vaerã ara reta outa vae pe quirãi tuicha ete co ipiacavi. Cua ipiacavi uicuaaca ma yandeve Cristo Jesús rupi. ⁸ Echa'ã Tumpa yanembiasia ipiacavi jeco pegua, yapurugüirovia ramo. Yande yamingana'ã etei yembiasia. Jae co Tumpa umeeiño yandeve vae. ⁹ Mbaeti quía ipuere umingana yembiasia ipotave mbaraviqui rupi, agüiye vaerã quía ipuere jei: “Cheparaviqui rupi co amingana yembiasia.” ¹⁰ Echa'ã Tumpa yandepo. Jare yandepo ma penti ramiño Cristo Jesús ndive, yande yayapo vaerã icavi vae. Echa'ã tenonde yave Tumpa iquirẽi jecuaño yayapo vaerã icavi vae.

Cristo yanembipiacatu Tumpa ndive

¹¹ Jáeramo pemandúa cua re: Pe reta co jae judío mbae vae reta. Jare jocua uñemicircuncidaca jee vae reta - jae reta uñemicircuncidaca co jete pe - jae reta pembijee uñemicircuncidaca mbae vae reta. ¹² Jáeramo jocua ara reta pe Cristo mbae'ã co peve. Echa'ã pe reta Israel pegua reta'ã co, jare Tumpa jei umeeta Israel pegua reta pe vae pembaerã'ã co. Jáeramo peãro'ã mbae piyerovia reve. Echa'ã picose cua ivi pe Tumpa picuaa mbae reve. ¹³ Tenonde yave pe reta mbiri pico Tumpa güi. Ërei añave piyeyapo penti ramiño Cristo Jesús ndive, jare coiño ma co pico Tumpa güi Cristo imano jeco pegua. ¹⁴ Echa'ã Cristo co jae mbiacatu umee yandeve vae. Jae uyapo penti ramiño judío reta jare judío mbae vae reta. Tenonde yave judío reta jare judío mbae vae reta oyovaicho uyupii. Uyembiyao reta uyugüi. Ërei Cristo umbai ma yembiyao. ¹⁵ Echa'ã Cristo umano yave, umbai mboroyocui. Echa'ã mboroyocui umimbeu judío reta pe mbae uyapo vaerã. Jáeramo Cristo umbai mboroyocui, uyapo vaerã mocui reve penti ramiño jae ndive. Jucuarã umee mbiacatu. ¹⁶ Jare cua uyapo, umbipiacatu vaerã Tumpa ndive mocui reve penti ramiño imano jeco pegua. Echa'ã imano jeco pegua oyovaicho'ã ma uyupii.

¹⁷ Jayave ou umimbeu mbiacatu regua pe reta tenonde yave mbiri pico chugüi vae pe jare ore tenonde yave coiño nduico chugüi vae pe. ¹⁸ Echa'ã Cristo rupi mocui reve yandepuere yaya yandeRu re Espiritu Santo rupi. Echa'ã Espiritu Santo pentiño co. ¹⁹ Jáeramo pe reta ambie ivi pegua reta rami'ã ma co. Pe reta co jae uñeño tee Tumpa peguarã vae reta jentaigua reta. Pe reta co jae Tumpa jentarã reta. ²⁰ Yamijaanga penti tenta. Temimondo reta jare Tumpa iñee umimbeu vae reta tenta iguapicarã oñono vae reta rami co, jare pe reta co jae tenta rami. Jesucristo etei co jae ita uñeño tenonde tentarã vae rami. ²¹ Opaete tenta uyeyapocavi oĩ ita uñeño tenonde tentarã vae ndive, jare uyeyapo oĩ penti tenta uñeño tee yandeYa peguarã vae. ²² Pe reta vi penti ramiño co yandeYa ndive. Jáeramo pe reta vi co jocua tenta rami. Echa'ã Tumpa ico jocua tenta pe Espiritu Santo rupi.

3

Tumpa uicuaaca Pablo pe tenonde yave uyecuaa mbae vae

¹ Jáeramo che etei ayerure Tumpa pe peré. Che co jae penti pereso pereco pegua, Cristo Jesús pe ayeyocui ramo - pe reta co jae judío mbae vae reta. ² Picuaa ma co aipo

quirāi Tumpa uicuaaca cheve ñee Tumpa ipiacavi regua, che aicuaaca-yuapi ye vaerā peve. Cuarāi ayeyocui aī Tumpa pe. ³ Picuaa ma co aipo quirāi jae etei uicuaaca cheve jocua tenonde yave uyecuaa mbae vae. Echa'ā cua regua aicuatía ma peve mbovi ñee peña. ⁴ Pemingueta yave, picuaa cavita co quirāi che aicuaa jocua Cristo regua tenonde yave uyecuaa mbae vae. ⁵ Tenonde yave cua uyecuaa'ā etei ivi pegua reta pe. Ērei añave Tumpa uicuaaca temimondo oñono tee iyupeguarā vae reta pe jare iñee umimbeu vae reta pe. Jae uicuaaca chupe reta Espíritu Santo rupi. ⁶ Jae co cua: Uyandu yave ñee icavi vae, jare güirovia yave Cristo Jesús re, judío mbae vae upurugüirovia vae reta güinoita imbaerā judío upurugüirovia vae reta ndive, jare mocui reve uyeyapota penti ramiño - penti jete rami - jare mocui reve güinoita Tumpa jei umeeata vae. ⁷ Che ayeyocui Tumpa pe. Ipiacavi jeco pegua Tumpa umee cheve jae imbaepuere rupi che amimbeu vaerā ñee icavi vae. ⁸ Yepe tēi che co jae uñeñono tee Tumpa peguarā vae reta jaicuegua ete, ěrei Tumpa cua umee cheve ipiacavi jeco pegua, che amimbeu vaerā judío mbae vae reta pe quirāi yaicocatu ete co Tumpa coti, Cristo re yarovia yave. Echa'ā mbaeti quía ipuere uicuaa cua regua ipiyamingueta rupiño. ⁹ Jare Tumpa umee cheve aicuaaca vaerā opaete vae pe quirāi Tumpa umee cheve ayeyocui vaerā chupe cua tenonde yave uyecuaa mbae vae re. Echa'ā tenonde yave Tumpa uicuaaca'ā etei quía pe cua. Tumpa co jae opaete mbaembae iyapoa. ¹⁰ Cua Tumpa umee cheve, mburuvicha reta jare mbaepuere güinoi vae ara pe ñugüinoi vae reta uicuaa vaerā quirāi Tumpa iyaracuaa catu co. Cua uicuaata reta upurugüirovia vae reta rupi. ¹¹ Echa'ā cuarāi Tumpa jecuaeño iquirēi uyapo yandeYa Jesucristo rupi. ¹² Yandepuere yaya Tumpa re Cristo rupi. Echa'ā yarovia ma Cristo re ramo, yandepuere yaya yaquiye mbae reve. ¹³ Jáeramo agüiye pepiatiti aiporara pereco pegua vae re. Pepuere pemiadora Tumpa cua re.

Cristo ipuruau

¹⁴ Jáeramo che ayeatica yandeYa Jesucristo Tu jovai. ¹⁵ Opaete jentarā ara pe ñugüinoi vae reta jare jentarā ivi pe ñugüinoi vae reta güinoi jee chugüi. ¹⁶ Ayerure Tumpa pe umee vaerā peve mbaepuere. Echa'ā jae imbaepuere jeco pegua uyembiadoraca ete. Jare cua mbaepuere rupi Tumpa iEspíritu tapemimirāta pepia pe. ¹⁷ Tuyecuaa cavi quirāi Cristo ico pepia pe pepurugüirovia jeco pegua. Tumpa tapemimirāta jare tapemiatangātu ipuruau pe, ¹⁸ pepuere vaerā picuaa cavi opaete uñeñono tee Tumpa peguarā vae reta ndive quirāi tuicha ete co Cristo ipuruau, ¹⁹ jare picuaa vaerā Cristo ipuruau, yepe tēi ipuere'ā quía uicuaa cavi ete opaete jocua mburuau. Pepia titinee Tumpa pe.

²⁰ Jare añave yambidora Tumpa. Echa'ā jae ipuere ete opaete yande yayerure chupe jese vae güi, jare opaete yandepia pe yayemingueta jese vae güi. Jeta ete uyapota yandeve imbaepuere yandepia pe uparaviqui vae rupi. ²¹ Tumpa tuyembiadoraca opaete vae pe upurugüirovia vae reta rupi jare Cristo Jesús rupi jaeño mai pegua. Amén.

4

Penti ramiño Espíritu Santo rupi

¹ Che co jae penti pereso, yandeYa pe ayeyocui ramo. Che pumiñera jecuaeño pico cavi vaerā, iru vae reta uicuaa vaerā Tumpa preparavo co. ² Piñemimichi uyucoti. Agüiye pepochi piyupe. Pepiaguasu piyupe. Piyerau ramo, agüiye piñeengata piyupe. ³ Piñemiatangātu pico vaerā penti ramiño pepiacatu reve Espíritu Santo rupi. ⁴ Cristo jete pegua reta pentiño co, jare Espíritu Santo pentiño co. Jae ramiño vi Tumpa preparavo, peāro vaerā piyerovia reve penti ramiño. ⁵ Ime vi pentiño yandeYa, jare opaete yarovia yandeYa re, jare opaete yayembibautizaca Espíritu Santo pe. ⁶ Tumpa vi pentiño co. Jae co yandeRu. Jae co yandeYa. Jae uparaviqui opaete yande rupi. Jae ico yandepia pe.

⁷ Ērei Cristo umee yandeve penti penti pe ipiacavi, yandepuere vaerā yayapo mbaraviqui Cristo uipota yayapo vaerā vae. ⁸ Echa'ā Tumpa iñee pe uyecuatía oī cuarāi: “Uyupi oo ara pe yave, güiraa pereso reta, jare umee mbaepuere ivi pegua reta pe Tumpa iparaviqui uyapo vaerā.” Jucuarāi uyecuatía oī.

⁹ Tapirandu peve, ¿mbae pa uipota jei cua uyupi oo ara pe jei vae? Uipota jei ugüeyi rani vi co ivi igüi pe etei. ¹⁰ Jocua ugüeyi vae co jae uyupi oo ivate ete opaete ara reta güi vae etei. Jucuarai uyupi, uyeyapo vaerä opaete mbaembae iYarä. ¹¹ Jare Cristo etei umee amocue vae pe temimondo retarä yugüireco vaerä. Jare umee amocue vae pe Tumpa inee umimbeu vaerä. Umee vi amocue vae pe umimbeu vaerä ñee icavi vae. Umee vi ñru vae reta pe uyandareco vaerä upurugüirovia vae reta re, jare ñru vae reta pe omboe vaerä upurugüirovia vae reta. ¹² Cua Cristo uyapo, uñeño tee Tumpa peguarä vae reta ipiräta vaerä ipurugüirovia re, jae reta ipuere vaerä uparaviqui Tumpa pe, Cristo jeterä uyeyapo vaerä. ¹³ Cristo uipota yayeyapo vaerä penti ramiño yandepurugüirovia rupi, yaicuaa cavi vaerä jae co Tumpa Tai. Uipota yayeyapo vaerä penti cuimbae ipiräta vae rami. Jare jucuarai yayeyapota co, yandepia tinee oi Cristo pe yave. ¹⁴ Cristo uipota'ä yaico vaerä sambiai reta rami. Echa'ä sambiai reta uicuaa'ä mbae ra güirovia vaerä. Echa'ä penti ara ipuere güirovia penti moromboe, jare ñru ara ipuere güirovia ñru moromboe. Echa'ä moromboe añete mbae vae re oporomboe vae reta ipoqui ete co upurumbitavi vaerä. ¹⁵ Ërei yande jecuaeño yae añete vae yayerau reve. Jucuarai yave, yaicota ucuaa vae reta rami, Cristo uipota rami. Echa'ä jae co upurugüirovia vae reta inäca. ¹⁶ Cristo jare upurugüirovia vae reta penti cuimbae rami co. Echa'ä opaete cuimbae jete jare opaete iyuapiapia uparaviqui penti ramiño, icavi oi vaerä cuimbae. Jae ramiño vi opaete upurugüirovia vae reta uparaviqui penti ramiño uyerau reve, Cristo jeterä uyeyapocavi vaerä.

Tecove ipiau vae

¹⁷ Jáeramo che amimbeu peve yandeYa jee re cua: Agüiye ma pico upurugüirovia mbae vae reta yugüireco rami. Echa'ä jae reta yugüireco ipiyemingueta cavi mbae reve. ¹⁸ Echa'ä ipiyemingueta uñemipitumimbi ma. Güinoi'ä tecove Tumpa umee vae. Echa'ä uicuaa'ä Tumpa regua, ipiatanta ramo. ¹⁹ Jecuaeño imbiquere, jare imara'ä etei. Echa'ä uipota ete reta uyapo vaerä opaño mbae pichii vae. ²⁰ Ërei jucuarai'ä co Cristo pemboe. ²¹ Piyandu ma co aipo chupe, jare piyemboe ma co aipo añete vae re. Echa'ä añete vae co jae Jesús. ²² Jáeramo agüiye ma pico picose rami. Peeya piyugüi pereco mai indechicue pichii vae. Echa'ä picose pe pere vae reño, jare jucuarai piyembitavi. ²³ Tuyembipiau pepiyemingueta. ²⁴ Pipisi teco mai ipiau vae. Echa'ä teco mai ipiau vae jupi co, jare uyapoca'ä etei mbaeyoa peve. Cua teco mai ipiau vae icavi co Tumpa pe.

²⁵ Jáeramo agüiye ma peapu piyupe. Opaete pere añete vae perapicha pe. Echa'ä opaete yande penti ramiño co.

²⁶ Pepochi yave, agüiye peyoa. Agüiye pepitu pearasi reve.

²⁷ Agüiye pemaño aña guasu re mbaepuere güinoi vaerä peré.

²⁸ Imondase vae agüiye ye ma timonda. Ërei tuyapo ipo pe mbaraviqui icavi vae, ime vaerä güinoi mbae umee vaerä iparavete vae pe.

²⁹ Agüiye pemoë ñee pichii vae. Ërei pemoë ñee icavi vae, pembori vaerä ñru vae reta. Echa'ä jucuarai Tumpa ipuere ombori uyapisaca peré vae reta. ³⁰ Jare agüiye pembipiatiti Tumpa iEspiritu Santo. Echa'ä Tumpa umee ma peve Espiritu Santo, uicuaaca vaerä pe reta jae imbae co. Jare Espiritu Santo icota pe reta ndive, Tumpa perepi ete regua.

³¹ Agüiye pembasi pico piyupe. Agüiye pepochi piyupe. Agüiye pearasi piyupe. Agüiye piñengata piyupe. Agüiye pere icavi mbae vae piyupe. Agüiye piyapo icavi mbae vae piyupe. ³² Ërei pepiacavi piyupe. Piyerau. Piyembiasa uyupii. Echa'ä Tumpa pembiasa ma Cristo rupi.

5

Yaico Tumpa jei vae re

¹ Jecuaeño pico Tumpa jei vae re. Echa'ä Tumpa co jae yanderu jare jae yanderau.

² Jáeramo pico piyerau reve, Cristo yanderau rami. Echa'ä Cristo uñemee umano vaerä, penti maemimba uyeyucacue Tumpa pe uñemee vae rami. Jare cua uyapo umbai vaerä yanembaeyoa reta. Cua umbiyerovia Tumpa, mbae ipiche cavi vae upurumbiyerovia rami.

³ Ërei agüiye etei piyapo aguasa jare opaete mbae pichii vae, jare agüiye pipota ñru vae reta imbaembae. Echa'ä Tumpa peño tee ma iyupeguarä. ⁴ Jare agüiye vi

piyemingueta imbiquere vae reta uyemingueta rami. Agüiye piyemingueta iyaracuaa mbae vae reta uyemingueta rami. Agüiye peyurupichii ñee icavi mbae vae pe. Echa'ã icavi'ã piyemingueta vaerã jucuarãi. Ërei cua mbaembae icavi mbae vae pere vaerãve pemee yasurupai Tumpa pe. ⁵ Echa'ã pe reta picuaa cua: Aguasa uyapo vae reta, jare opaete mbae pichii vae uyapo vae reta, jare ñru vae reta imbaembae uipota vae reta - echa'ã uipota ete ñru vae reta imbaembae Tumpa güi - ndarau yugüireco Cristo jare Tumpa iporoyocua pe. ⁶ Agüiye pemaño quía re pemitavi vaerã cua re. Echa'ã cua icavi mbae vae jeco pegua Tumpa uiporacata co Tumpa jei vae uyapo'ã vae reta pe. ⁷ Jáeramo agüiye pico jae reta yugüireco rami.

⁸ Echa'ã tenonde yave pe reta picose yugüireco pítumimbi pe vae reta rami. Ërei añave pico tembipe yandeYa umee peve vae pe. Jecuaño pico yugüireco tembipe pe vae reta rami. ⁹ Echa'ã tembipe pe yugüireco vae reta ipiacavi, jare jupi vae uyapo, jare jei añete vae. ¹⁰ Jecuaño pipota picuaa yandeYa uipota piyapo vaerã vae. ¹¹ Agüiye etei piñemñru pítumimbi pe yugüireco vae reta ndive. Echa'ã jocua uyapo reta vae icavi'ã Tumpa pe. Ërei picuaaca icavi mbae vae co jocua uyapo reta vae. ¹² Echa'ã penti ñemimaraca co yayemingueta vaerã jocua uyapo viari reta vae re. ¹³ Tembipe oñ yave, opaete uyecuaa cavi, jare yandepuere yaicuaaca icavi mbae vae co opaete jocua mbaembae. Echa'ã jocua uyapo opaete uyecuaa cavi vaerã vae tembipe co. ¹⁴ Jáeramo Tumpa jei oque vae pe cuarãi:

“Esarecoño ma.

Icove ye penti ou umanocue vae reta ipite güi vae rami.

Cristo tumee ndeve tembipe.”

Jucuarãi jei.

¹⁵ Jáeramo piñemiatangātu pico cavi vaerã. Agüiye pico iyaracuaa mbae vae reta yugüireco rami. Pico iyaracuaa catu vae reta yugüireco rami. ¹⁶ Jecuaño piyapo icavi vae. Echa'ã jeta vae uyapo icavi mbae vae. ¹⁷ Jáeramo agüiye pearacuaa mbae vae echa. Ërei picuaa cavi yandeYa jei vae. ¹⁸ Jare agüiye pesavipo. Echa'ã usavipo vae reta uyapo jeta mbae icavi mbae vae. Ërei pemaño Espíritu Santo re umitínee vaerã pepia. ¹⁹ Picuaaca quirãi piyerovia ete canta reta yambiadora Tumpa pipe vae pe. Pecanta jare pambiadora yandeYa pepia pe. ²⁰ Jecuaño pemee yasurupai opaete mbae re yandeRu Tumpa pe yandeYa Jesucristo jee re.

Yayeyocui yandiyupe

²¹ Piyeyocui piyupe, pipiu Cristo ramo.

²² Cuña reta tuyeyocui ime pe, uyeyocui yandeYa pe rami. ²³ Echa'ã cuimbae oyocui jembireco, ñaneãca oyocui yanderete rami. Jae ramiño vi Cristo co jae upurugüirovia vae reta iñãca. Jare upurugüirovia vae reta co jae Cristo jete, jare Cristo co jae upurugüirovia vae reta umbiasa vae. ²⁴ Jare upurugüirovia vae reta uyeyocui Cristo pe. Jáeramo jae ramiño vi cuña reta tuyeyocui ime pe opaete mbae re.

²⁵ Cuimbae reta tuau jembireco, Cristo uau upurugüirovia vae reta rami. Echa'ã jae uñemee mano vaerã jese reta, ²⁶ oñono tee vaerã iyupeguarã, jare oyoe vaerã. Echa'ã iñee yandeyoe, mbae yaoe i pe rami. ²⁷ Jucuarãi Cristo uyapo, upurugüirovia vae reta uyembutuichaca vaerã jae jovai ñugüinoi yave. Ndarau güinoi mbae iquia vae jare mbae pichii vae. Ndarau etei güinoi cua nunga mbaembae. Echa'ã Cristo uñemee mano vaerã, upurugüirovia vae reta uñeño tee vaerã chupeguarã, jare icavi ete ñugüinoi vaerã. ²⁸ Cuimbae reta tuau jembireco, jete uau rami. Cuimbae jare jembireco pentiño co. Jáeramo jocua uau jembireco vae jae co uyerau. ²⁹ Echa'ã mbaeti etei quía umitarãi jete. Opaete vae umingaru jete, jare uyandareco jese. Jae ramiño vi Cristo uyandareco upurugüirovia vae reta re. ³⁰ Echa'ã yande co jae Cristo jete pegua reta. Yande co jae Cristo isoo jare icãgüe pegua reta. ³¹ Cua jeco pegua penti cuimbae tusiri tu jare ichi güi, jare tuñemñru jembireco ndive, mocui reve uyeyapo vaerã penti ramiño. ³² Yandepuere'ã etei yaicuaa cavi cua regua. Ërei chemiari añ peve Cristo jare upurugüirovia vae reta re. ³³ Ërei penti penti tuau jembireco, jae uyerau rami. Jare cuña tuipiu ime.

6

¹ Cunumi reta jare cuñatai reta tuyapo tu jare ichi jei vae, yandeYa re güirovia ramo. Echa'ã cua jupi co. ² Tumpa umimbeu Moisés rupi mboroyocui reta. Jare mboroyocui itenondegua vae co cua: "Ipiu nderu jare ndesi, ³ ndico cavi vaerã, jare ndicopucu vaerã ivi pe." Jucuarãi Tumpa jei umeeata vae.

⁴ Jare tu reta agüiye tumbiarasiño isambiai reta. Ērei tumbicuacuaa cavi. Tomboe jupi vae re, jare tumbiaracuaa, yandeYa uipota rami.

⁵ Uyeyocui vae reta tuyapo ipatrón jei vae uipiu reve jare umbutuicha reve. Ipiquirēi reve tuyeyocui ipatrón pe. Tuyeyocui chupe, Cristo pe uyeyocui rami. ⁶ Agüiye tuyeyocui cavi ipatrón pe jae umae oĩ jese yaveño, umbiyerovia vaerãño. Tuyeyocui chupe, Cristo pe uyeyocui ramo, jare Tumpa jei vae ipiaquirēi reve uyapo ramo. ⁷ Tuyeyocui chupe, iquirēi ete ramo. Tuyeyocui chupe, Cristo pe uyeyocui rami. Echa'ã cuimbae peño'ã uyeyocui. ⁸ Tuicuaa cua: Ipotave vae - penti uyeyocui vae ani penti uyeyocui mbae vae - mbae icavi vae uyapo yave, yandeYa uyapota vi chupe mbae icavi vae.

⁹ Jare patrón reta tuyapo icavi vae jembiocui reta coti. Agüiye jecuaeño tuyuvanga catu. Echa'ã tuicuaa jae reta vi güinoi co iYa ara pe. Jare yandeYa ara pe oĩ vae uau'ã penti vaño ñru vae güi.

Mbaepuere yandeYa ipuere umee yandeve vae

¹⁰ Taicue rupi ete tae peve, cherivi reta, cua: Piñemiatangātu jocua mbaepuere yandeYa ipuere umee yandeve vae re. ¹¹ Piporu opaete Tumpa ipuere umee yandeve vae, pepuere vaerã piyerepi opaete mbae icavi mbae vae aña guasu uipota uyapo peve vae güi. ¹² Echa'ã ñañerãro'ã ñaĩ ivi pegua reta ndive. Ñañerãro ñaĩ espíritu icavi mbae vae ara pe ñugüinoi vae reta ndive. Jae reta co ivi pegua pĩtumimbi pe yugüireco vae reta iya reta, jare mbaepuere güinoi reta oporoyocui vaerã. ¹³ Jáeramo piporu opaete Tumpa ipuere umee yandeve vae, agüiye vaerã pemaño piyee icavi mbae vae uñerãro pe ndive vae reta pe, jare piñerãro yave, jecuaeño pepirãta vaerã. ¹⁴ Jáeramo piñemimirãta. Yamijaanga sundaro. Sundaro güinoi mbaembae ipuere vaerã uñerãro cavi. Jae ramiño vi Tumpa umee yandeve vae yanembupuere, yandepuere vaerã ñañerãro cavi. Echa'ã pere yave añete vae, icavita peve sundaro jumbicuaa icavi sundaro pe rami. Jare piyapo yave jupi vae, icavita peve sundaro icamisa fierro pegua icavi sundaro pe rami. ¹⁵ Jare pipota yave pemimbeu ñru vae reta pe ñee icavi vae mbiacatu regua, icavita peve sundaro ipipasa icavi sundaro pe rami. ¹⁶ Jare mburugüirovia jecuaeño penoi yave, icavita peve penti yeyopiaca icavi sundaro pe rami. Echa'ã sundaro ipuere oyopia yeyopiaca pe opaete ui jovaicho reta uyapĩ pipe vae. Jae ramiño vi mburugüirovia jecuaeño penoi yave, ndarau piyapo icavi mbae vae, yepe tēi aña guasu uipota ete piyapo vaerã. ¹⁷ Jare jecuaeño pemandúa yave quirãi Tumpa pembroia ma co, icavita peve aca regua fierro pegua icavi sundaro pe rami. Jare piporu yave Tumpa ñee Espíritu Santo imbaepuere rupi, icavita peve penti quisepucu icavi sundaro pe rami. ¹⁸ Jecuaeño piyerure Tumpa pe mbaembae re. Jecuaeño piyerure Espíritu Santo rupi. Jecuaeño piñemiatangātu, agüiye vaerã pecueri. Jecuaeño piyerure Tumpa pe opaete uñeño tee Tumpa peguarã vae reta re. ¹⁹ Piyerure ete cheré, Tumpa umee vaerã cheve chemiari vaerã aquiye mbae reve, aicuaaca vaerã ñee icavi vae tenonde yave uyecuaa mbae vae. ²⁰ Echa'ã Tumpa chembou amimbeu vaerã cua ñee, jare cua ñee jeco pegua pereso aĩ. Piyerure cheré, amimbeu vaerã aquiye mbae reve. Echa'ã jucuarãi icavi co amimbeu vaerã.

²¹ Tíquico umimbeuta peve opaete mbaembae, picuaa vaerã cheregua jare ayapo aĩ vae regua. Tíquico co jae yanderivi. Aau co. Jae uyeyocui cavi yandeYa pe. ²² Jáeramo amondo pepi, picuaa vaerã oreregua, jare jae pembipiacatu vaerã.

²³ Cherivi reta, yandeRu Tumpa jare yandeYa Jesucristo tumee peve mbiacatu jare mburuau jare mburugüirovia. ²⁴ Tumpa tumee ipiacavi opaete mburuau opa mbae vae yandeYa Jesucristo coti güinoi vae reta pe. Amén.

LA CARTA DEL APOSTOL SAN PABLO A LOS FILIPENSES

¹ Che co jae Pablo, jare Timoteo ime cua pe oĩ che ndive. Ore nduyeyocui Cristo Jesús pe. Aicutatía cua tupapire Filipos pe pico vae pe - pe reta co jae tenondegua reta, jare ĩru upurugüirovia vae reta ombori vae reta, jare opaete ĩru uñeño tee Tumpa peguarã vae reta. Pe reta perovia Cristo Jesús re. ²YandeRu Tumpa jare yandeYa Jesucristo tumee peve ipiacavi jare ipiacatu.

Pablo uyerure Tumpa pe upurugüirovia vae reta re

³ Ameer yasurupai Tumpa pe chemandúa peré ñave ñave. ⁴ Ayerure Tumpa pe opaete peré yave, jecuaeño ayerure ayerovia reve. ⁵ Echa'ã pe reta jecuaeño chembori amimbeu vaerã ñee icavi vae pe reta piyandu güive. ⁶ Tumpa umbipi ma uyapo penti mbaraviqui icavi vae pepia pe, jare aicuaa catu jae etei co jecuaeño uyapota jocua mbaraviqui Jesucristo ou ye regua. ⁷ Icavi co chepia pe ayemingueta vaerã cuarãi peré. Echa'ã puau ete. Peresorĩru pe aĩ rambueve, jare aicuaaca yave ĩru vae reta pe ñee icavi vae Tumpa pegua co jare añete vae co, Tumpa jecuaeño umee cheve ipiacavi. Jare mbiacavi umee cheve vae umee peve vi. ⁸ Echa'ã Tumpa uicuaa quirãi che puau ete co, Jesucristo etei perau rami. ⁹ Jare ayerure Tumpa pe jecuaeño tucuacuaa pepuruau picuaa catu reve jare pearacuaa catu reve, ¹⁰ pipota vaerã piyapo icavi vae, pico cavi vaerã, agüiye vaerã quía ipuere pembijeco mbae re Cristo ou ye regua. ¹¹ Ayerure jecuaeño piyapo vaerã mbaembae icavi vae jupi vae pegua Jesucristo rupi. Echa'ã cuarãi Tumpa uyembadoracata.

Pablo jecuaeño uipota uyeyocui Cristo pe

¹² Cherivi reta, aipota picuaa vaerã quirãi uyeyapo cheve vae ombori ma uñemiai vaerã ñee icavi vae. Umbiavai'ã etei. ¹³ Echa'ã opaete sundaro mburuvicha guasu jenta pe ñugüinoi vae reta jare opaete ĩru vae reta uicuaa quirãi che cua peresorĩru pe aĩ Cristo pe ayeyocui ramo. ¹⁴ Jare jeta yanderivi reta uñemiatangãtu ma yandeYa coti, uicuaa reta peresorĩru pe uyeyapo cheve vae ramo. Jare jae reta umimbeu Tumpa ñee uquiye mbae reve.

¹⁵ Añete co, amocue vae umimbeu Cristo regua ñacatãa cheré ramo, jare jovaichopota che ndive ramo. Ērei ĩru vae reta umimbeu iquirēi ramo. ¹⁶ Jocua jovaichopota che ndive vae reta umimbeu Cristo regua uipota tēi cheacatãa vaerã jese reta ramo. Jucuarã uipota tēi aiporara vaerã, peresorĩru pe aĩ rambueve. ¹⁷ Ērei ĩru vae reta umimbeu Cristo regua, cherau ramo. Echa'ã uicuaa reta quirãi Tumpa cheñoño cua pe, aicuaaca vaerã ĩru vae reta pe ñee icavi vae Tumpa pegua co. ¹⁸ Ērei icaviño co. Echa'ã opaete quirãi rupi jaeñoi umimbeu reta Cristo regua - amocue vae uipota tēi uyapo icavi mbae vae cheve, jare ĩru vae reta uipota uyapo icavi vae cheve. Cua jeco pegua ayerovia aĩ. Jare jecuaeño co ayeroviata. ¹⁹ Echa'ã aicuaa opaete cua icavita co cheve, pe reta piyerure cheré ramo, jare Jesucristo eEspĩritu chembori ramo. ²⁰ Cuarãi uyeyapota che aipota ete vae. Echa'ã jecuaeño aipota aico, agüiye vaerã chemara mbae re. Aipota aico aquíye mbae reve, jecuaeño Cristo uyembadoraca vaerã cherete rupi, amano yave ani jecuaeño aico yave. ²¹ Echa'ã jecuaeño aico yave, ayeyocuiñotai co Cristo pe. Jare amano yave, icavi eteta co cheve. ²² Jare jecuaeño aico yave, aparaviquita Tumpa pe, icavi vae ayapo vaerã. Aicuaa'ã icavi ra amano vaerã, ani icavi ra aicoño vaerã. ²³ Mocui reve aipota tēi. Echa'ã aipota amano, Cristo ndive aĩ vaerã. Cua icavi eteta co cheve. ²⁴ Ērei icavi ndipo jecuaeño aico vaerã, chepuere vaerã pombori. ²⁵ Aicuaa catu cua. Jáeramo aicuaa jecuaeño aicota, apita vaerã opaete pe reta ndive, jare pombori vaerã, piñemimirãta vaerã pepurugüirovia re piyerovia reve, ²⁶ jare pe reta pemiadora ete vaerã Cristo Jesús chereco pegua, che aĩ ye yave pepi.

²⁷ Jaeño pico cavi. Echa'ã perovia ma ñee icavi vae Cristo regua. Jáeramo icavi co pico cavi vaerã. Aramoĩ aata apou pepi. Ērei aa'ã yave, aipota pererãcua cavi vaerã cheve, quirãi piñemimirãta penti ramiño, jare quirãi piñemiatangãtu penti ramiño mburugüirovia ñee icavi vae regua penoi vae re, ²⁸ jare quirãi pequiye'ã etei oyovaicho pe ndive vae reta güi. Echa'ã cua uicuaaca jae reta yugüiraata co cañitei pe. Ērei cua

uicuaaca vi Tumpa pembiasa ma co. ²⁹ Echa'ã Tumpa umee peve perovia vaerã Cristo re. Jae ramiño vi umee peve piporara vaerã Cristo jeco pegua. ³⁰ Jáeramo pe reta piporara peĩ, tenonde yave cherecha aiporara rami, jare añave picuaa aiporara co.

2

Cristo uñemimichi, jare Tumpa umbiadoraca

¹ Jáeramo Cristo ipuere pemiatangātu ramo, jare Cristo ipuruau ipuere pembiapiacatu ramo, jare Espiritu Santo ipuere imiari peve ramo, jare pepuere piyerau ramo, jare pepuere piyeparareco ramo, ² pico cavi uyupii, jare piyerau, jare penti ramiño pico pepia pe piyemingueta vae oyovaque reve. Cuarãi piyapo yave, ayerovia eteta co. ³ Agüiye mbae piyapo piyovaicho reve uyupii. Agüiye mbae piyapo piyembicate reve. Ërei opaete mbaembae piyapo piñemimichi reve. Penti penti tumae cavi ïru vae re. Agüiye tuyembicate. ⁴ Penti penti tuyandareco ïru vae reta re. Agüiye tuyandareco iyeeiño.

⁵ Pepia pe piyemingueta uyucoti, Cristo Jesús ipia pe uyemingueta rami. ⁶ Echa'ã jae etei co Tumpa. Ërei yepe tēi jae oyovaque Tumpa ndive, uyembutuicha'ã cua re. ⁷ Ërei jae uñemimichi, jare uyeyapo cuimbaerã uyeyocui vaerã ivi pegua reta pe. ⁸ Jare cuimbaerã uyeyapo ma yave, uñemimichi ye, jare umano Tumpa jei vae uyapo vaerã. Jare umano penti curusu re cuimbae jeco vae umano vae rami. ⁹ Jáeramo Tumpa umbutuichaca ete ma, jare umee chupe mbaepuere opaete ïru mbaepuere güi tuicha ete vae, ¹⁰ opaete ara pe ñugüinoi vae reta, jare opaete ivi pe ñugüinoi vae reta, jare opaete cañitei pe ñugüinoi vae reta uyeatica vaerã Jesús jovai, ¹¹ jare opaete vae jei vaerã Jesucristo co jae opaete vae iYa. Jare cua uyeyapo yave, yandeRu Tumpa uyembiaadoracata opaete vae pe.

Upurugüirovia vae reta tembipe rami co

¹² Che puau co. Pe ndive aico rambueve, jecuaeño piyapo che jae peve piyapo vaerã vae. Jare yepe tēi añave aĩ'ã ma pe ndive, Ërei jecuaeño piñemiatangātu ete yembiasa penoi vae rupi pipiu reve Tumpa güi jare pembiadora reve. ¹³ Echa'ã Tumpa etei umee peve quirēi piyapo vaerã jae jei vae. Echa'ã Tumpa jei vae icavi co.

¹⁴ Opaete piyapo vae piyapo piñeenguru mbae reve jare piyeaca mbae reve. ¹⁵ Jucuarãi yave, ndarau quía pembijeco mbae re, jare ndarau mbae icavi mbae vae piyapo ïru vae coti, jare picota upurugüirovia mbae vae reta ipite pe pereco mbae reve. Pe reta co jae Tumpa tai reta. Jáeramo piyecuaa upurugüirovia mbae vae reta ipite rupi, guarasi umiembipe ivi pe vae rami. Echa'ã upurugüirovia mbae vae reta jupi'ã jare jecopochi co. ¹⁶ Jecuaeño pemimbeu ïru vae reta pe ñee tecove opa mbae vae ipuere umee chupe reta vae, chepuere vaerã ayerovia Cristo ou ye yave. Echa'ã aicuaata añemiatangätuiño'ã jare aparaviquiño'ã. ¹⁷ Ayeyocui ma Tumpa pe pepite pe, pe reta pepurugüirovia vaerã. Jare jocua mburugüirovia penoi vae amee Tumpa pe, sacerdote maemimba uyeyucacue umee rami. Aramoi cherugüi uyepiyereta vi, vino uyepiyere maemimba uyeyucacue iárambo rami. Ërei cua uyeyapo yave, jeseve ayeroviata co opaete pe reta ndive. ¹⁸ Cua jeco pegua pe reta vi piyerovia che ndive.

Timoteo jare Epafrodito

¹⁹ Ërei yandeYa Jesús uipota yave, amondota Timoteo pepi curi, che vi chepiacatu vaerã, aicuaa yave peregua. ²⁰ Echa'ã mbaeti co quía ye ipia pe uyemingueta peré che chepia pe ayemingueta peré rami vae. Mbaeti co quía ye añetete iquirēi uyandareco peré vae. ²¹ Echa'ã opaete ïru vae reta iquirēi uyandareco iyeeiño. Iquirēi'ã uyandareco Cristo Jesús iparaviqui re. ²² Ërei picuaa co quirãi Timoteo jecocavi, jare quirãi jae uyeyocui Tumpa pe che ndive, ñee icavi vae numimbeu vaerã. Jae uparaviqui Tumpa pe che ndive, penti tai uparaviqui tu ndive vae rami. ²³ Jáeramo aipota amondo curi, aicuaa yave mbae ra uyeyapota cheve. ²⁴ Ërei yandeYa uipota yave, che vi aata pepi curi.

²⁵ Ërei amondo ma pecoti Epafrodito. Echa'ã icavi echa cheve amondo vaerã. Jae co yanderivi yandeYa re. Jae vi uparaviqui Tumpa pe che ndive, jare jecuaeño uñemiatangātu yandeYa re. Pe reta pembou chepi uyandareco vaerã cheré. ²⁶ Jae uipota ete perecha, jare ipiatiti ete. Echa'ã jerãcua peve quirãi jae imbaerasi. ²⁷ Añete co, imbaerasi ete. Umano seri. Ërei Tumpa uiparareco. Jare jucuarãi Tumpa uicuaaca vi cheve ipuruparareco - mbaeti Epafrodito peño. Echa'ã chepiatiti ïru mbaembae re. Ërei jae umano yave mona, chepiatiti eteta tēi. ²⁸ Jáeramo amondo pecoti chequirēi ete reve,

piyerovia vaerā, peeche ye yave, jare agüiye vaerā che chepiatiti ete. ²⁹ Pembiresive cavi yandeYa re piyerovia reve. Jare jecuaño pemaē cavi jae rami vae reta re. ³⁰ Echa'ā Cristo iparaviqui jeco pegua umano seri. Uipiu'ā umano vaerā, ipuere vaerā uyandareco cheré pepepica pe. Echa'ā pe reta pepuere'ā piyandareco cheré.

3

Añemiatangātu, aipisi vaerā Tumpa umeeta cheve vae

¹ Cuaño ma tamimbeu peve, cherivi reta: Piyerovia yandeYa re. Checueri'ā etei aicuatía cua peve. Echa'ā icavi peve jecuaño cua aicuatía vaerā, agüiye vaerā petavi. ² Piñemoa ñee icavi vae re oyovaicho vae reta güi. Echa'ā jae reta oporomboe moromboe añete mbae vae re. Jae reta uñemicircuncidaca jete peño. ³ Echa'ā yande co jae uñemicircuncidaca ipia pe vae reta. Echa'ā yande yambiadora Tumpa iEspíritu rupi. Yayerovia catu Cristo Jesús re. Yayeco'ā etei yandiye. ⁴ Ērei che vi ime tēi anoi ayeco vaerā chiyee. Ime yave quía ye ipia pe uyemingueta ime güinoi uyeco vaerā iyee vae, che vi ime tēi anoi jeta ete chugüi. ⁵ Echa'ā añemicircuncidaca ocho ara ma anoi yave aa güiye. Che co jae penti Israel pegua. Che co jae Benjamín iñemoña pegua. Che co jae penti hebreo añetete vae. Che co jae penti fariseo. Echa'ā jecuaño aicose mboroyocui jei vae re. ⁶ Añemiatangātuse ayeyocui vaerā Tumpa pe. Jáeramo ayapose icavi mbae vae Cristo re güirovia vae reta pe. Mbaeti quía ipuere chembijeco mbae re. Echa'ā cherecove jecuaño jupi mboroyocui rupi. ⁷ Tenonde yave ayembicate cua mbaembae re. Ērei añave ayembicate'ā etei jese Cristo re arovia güiye. ⁸ Jae ramiño vi ayembicate'ā etei ipotave mbae re, aicuaa vaerā cheYa Cristo Jesús. Echa'ā cua icavi ete cheve opaete güi. Cristo Jesús re arovia güiye ayembicate'ā etei ma mbae re. Echa'ā opaete jocua mbaembae iti rami co cheve, Cristo anoi vaerā, ⁹ jare uyecuaa vaerā quirāi che co jae Cristo imbae. Aipota'ā ma ayembujupi mboroyocui jei vae re ayapo vae rupi. Ayembujupi ma mburugüirovia Cristo re anoi vae rupi. Echa'ā Tumpa chembijupi ma, Cristo re arovia ramo. ¹⁰ Aipota co aicuaa cavi Cristo. Aipota anoi jocua mbaepuere Cristo icove ye yave ou umanocue vae reta ipite güi uyeporu vae. Aiporara yave, aipota aicuaa aiporara co Cristo jeco pegua, chequirēi vaerā amano Cristo umano vae rami. ¹¹ Jucuarāi yave, aārota aicove ye vaerā ayu unemocue vae reta ipite güi.

¹² Ndeño aicuaa cavi Cristo. Ndeño co che jupi. Ērei jecuaño añemiatangātu, aipisi vaerā Tumpa umeeta cheve vae. Echa'ā cua jeco pegua Cristo Jesús cherepi. ¹³ Cherivi reta, chepia pe ayemingueta'ā chiyee aepiti ma co. Ērei cuaño ayapo - checañi uasacue güi, aepiti vaerā chequirēi reve uyemiaanga oī cheve vae. ¹⁴ Jáeramo añemiatangātu, aepiti vaerā Tumpa umeeta cheve vae. Umeeta cheve Cristo Jesús uyapo yandevae vae jeco pegua, ara pe cherera cheve.

¹⁵ Jáeramo opaete ñañemimiráta Tumpa coti vae cuarāi yandepia pe yayemingueta. Jare pepia pe piyemingueta'ā yave cuarāi, Tumpa uicuaacata peve. ¹⁶ Ērei jecuaño yaico yaicuaa ma vae re. Yandepia pe yayemingueta penti ramiño.

¹⁷ Cherivi reta, piyapo che ayapo rami. Jare jecuaño pemaē ngatu jocua yugüireco cavi vae reta re. Echa'ā jucuarāi picuaa ore nduico. ¹⁸ Echa'ā ime jeta yugüireco oyovaicho reve Cristo icurusu regua ndive vae. Jeta vese ma amimbeu peve cua reta regua, jare añave amimbeu ye peve ayao reve. ¹⁹ Cua reta yugüiraata cañitei pe. Mbae yau vae reño ipia pe uyemingueta reta. Icavi chupe reta jocua imarata tēi jese vae. Mbaembae cua ivi pegua reño ipia pe uyemingueta reta. ²⁰ Ērei yandeivirā ara pe co oī. Echa'ā ñaāro ñaī joco güi ou vaerā yanembiasa vae - jae co yandeya Jesucristo. ²¹ Jae umbiambieta yanderete cua ivi pe ñanoi vae yanderete ipiau vae ndive. Echa'ā yanderete ipiau vae icavi eteta co jae jete rami. Cuarāi yandeYa uyapota imbaepuere rupi. Echa'ā jocua imbaepuere rupi ipuere opaete mbaembae re.

4

Jecuaño piyerovia catu yandeYa re

¹ Jáeramo, cherivi reta, jecuaño piñemimiráta yandeYa imbaepuere rupi. Che pauu, jare aipota puecha. Ayeroviaño mai peré. Chemiari cavi peré iru vae reta pe.

² Amiñera Evodia jare Síntique yugüireco cavi vaerā uyupii. Echa'ā mocui reve güirovia yandeYa re. ³ Jare che numiñera vi - echa'ā nde co jae cheparaviqui iru ete -

nembori vaerā cua cuña reta. Echa'ā jae reta uparaviqui tanta che ndive, numimbeu vaerā ñee icavi vae. Uparaviqui reta Clemente ndive jare ñru che ndive uparaviqui vae reta ndive vi. Cua reta jee Tumpa uicuatía ma ilibro pe. Echa'ā Tumpa umee ma tecove opa mbae vae chupe reta.

⁴Jecuaño piyerovia catu yandeYa re. Tae ye cua: Piyerovia catu. ⁵Opaete vae tuicuaa quirāi pe reta pepiacavi co. YandeYa ou ye seri ma co.

⁶Agüiye etei piyemipia'ā mbae re. Òrei jecuaño piyere Tumpa pe opaete mbaembae re yasurupai Tumpa pe pemee reve, jare cuarāi pemimbeu Tumpa pe mbae pipota vae. ⁷Jare Tumpa umeeta peve ipiacatu. Yandepia pe yayemingueta rupiño yandepuere'ā etei yaicuaa Tumpa ipiacatu. Cua mbiacatu uyandarecota pepia re jare pepiyemingueta re. Echa'ā ou Cristo Jesús güi.

Pepia pe piyemingueta cua re

⁸Cuaño ma tamimbeu peve, cherivi reta: Pepia pe piyemingueta opaete mbae añete vae re, opaete mbae icavi vae re, opaete mbae jupi vae re, opaete mbae iyoa mbae vae re, opaete mbae ipōra vae re, jare opaete mbae yandepuere ñanemiari cavi jese vae re. Yandepuere yae yave: “Cua icavi co”, jare yandepuere yaipiu icavi vae ramo, yandepia pe yayemingueta jese.

⁹Piyemboe ma che amimbeu peve piyapo vaerā vae re. Piyandu co che jae peve vae, jare peecha co che ayapo vae. Jáeramo cuarāi piyapo, jare Tumpa pemborita. Echa'ā jae umee yandeve ipiacatu.

Filipos pegua reta ofrenda ombou Pablo pe vae

¹⁰Èrei ayerovia ete, jare amee yasurupai yandeYa pe peré. Echa'ā ima ma pembou'ā mbae chembori vaerā. Òrei añave pemandúa ye ma cheré. Añete co, jecuaño pemandúa cheré, òrei pepuere'ā pembou mbae chembori vaerā. ¹¹Jae'ā cuarāi, mbae uata cheve ramo. Echa'ā aicuaa ma quirāi aico vaerā chepiacatu reve chepuere rupiño. ¹²Aicuaa quirāi aico vaerā, mboviño mbaembae anoi yave. Aicuaa vi quirāi aico vaerā, jeta mbaembae anoi yave. Opaete pegua aicuaa ma quirāi aico vaerā cheangapii reve jare chiyembae reve. Aicuaa ma quirāi aico vaerā, jeta mbaembae anoi yave, jare jeta mbaembae uata cheve yave. ¹³Opaete chepuere ayapo Cristo rupi. Echa'ā jae umee cheve imbaepuere.

¹⁴Èrei piyapo ma icavi vae cheve. Echa'ā chembori ma, aiporara añ yave. ¹⁵Jare pe reta Filipos pegua picuaa vi quirāi ñee icavi vae ambipi amimbeu yave, aa Macedonia güi yave, mbaeti ye ñru uyembatimbatí vae reta ombou cheve ofrenda chembori vaerā, jaeño pe reta pembou cheve. ¹⁶Echa'ā Tesalónica pe aico yave, pembou cheve ofrenda chembori vaerā. Jayave taicue rupi pembou ye ofrenda cheve. ¹⁷Ayerovia pembou cheve vae re. Èrei ayerovia'ā jese chembori ramoño. Ayerovia ete jese mbae icavi vae piyapo ramo. Jare aipota jecuaño mbae icavi vae piyapo vaerā, Tumpa umbijecovia vaerā peve. ¹⁸Èrei che opaete mbaembae anoi. Jeta ete anoi. Mbaeti mbae uata cheve. Echa'ā Epafrodito umee ma cheve pembou cheve vae. Jocua pembou vae penti ofrenda icavi vae uñemee Tumpa pe vae rami co. Jocua nunga umbiyerovia Tumpa. Jae co mbae ipiche cavi vae rami. ¹⁹Jare cheRu Tumpa umeeta peve opaete mbaembae icavi peve vae jeta ete güinoi vae güi. Echa'ā Cristo Jesús uyapo vae jeco pegua jeta ete güinoi yandeve peguarā.

²⁰YandeRu Tumpa tuyembiaadoraca jaeño mai pegua. Amén.

²¹Tumpa ndiveño toí opaete uñeño tee Tumpa peguarā vae reta. Echa'ā güirovia Cristo Jesús re. Yanderivi reta che ndive ñugüinoi vae vi jei peve Tumpa ndiveño peí. ²²Jae ramoño vi opaete uñeño tee Tumpa peguarā vae reta cua pe ñugüinoi vae jei peve Tumpa ndiveño peí. Cua reta ipite pe ime amocue César pe uyeyocui vae.

²³YandeYa Jesucristo tumee opaete peve ipiacavi. Amén.

LA CARTA DEL APOSTOL SAN PABLO A LOS COLOSENSES

¹ Che co jae Pablo. Che co jae Jesucristo jemimondo Tumpa jei vae rupi. Yanderivi Timoteo ime vi cua pe oĩ che ndive. ² Aciuatía cua tupapire Colosas pe pico vae pe. Pe reta vi co jae cherivi reta. Tumpa peñoño tee iyupeguarã, jare piyeyocui cavi Cristo pe. YandeRu Tumpa jare yandeYa Jesucristo tumee peve ipiacavi jare ipiacatu.

Pablo uyerure Tumpa pe upurugüirovia vae reta re

³ Numee yasurupai Tumpa pe peré. Jae co yandeYa Jesucristo Tu. Jare jecuaño nduyerure peré. ⁴ Cuarã nduyapo, nduicuaa güive quirã perovia Cristo Jesús re, jare quirã peau opaete uñeñoño tee Tumpa peguarã vae reta. ⁵ Pe reta penoi cua mburuau, peãro peĩ piyerovia reve Tumpa umeeta peve vae ramo. Echa'ã Tumpa uñuvatu ma peve ara pe. Pe reta picuaa cua regua, ñee icavi vae piyandu yave. Echa'ã ñee icavi vae añete vae co. ⁶ Cua ñee jerãcua peve vae jerãcua vi opaete ivi rupi. Jare opaete que rupi quía quía güirovia, jare uyeyocui Tumpa pe pe reta rami. Echa'ã pe reta perovia, jare piyeyocui Tumpa pe, jocua ara Tumpa ipiacavi regua piyandu güive. Echa'ã picuaa añete co cua ñee. ⁷ Cua re piyembo Epafras güi. Epafras uyeyocui Cristo pe ore ndive, jare nduau ete. Jae co penti Cristo jembiocui pepuere perovia catu vae. ⁸ Jare jae uicuaaca oreve mburuau Espiritu Santo umeet peve vae.

⁹ Jáeramo ore vi cua nduyandu güive, jecuaño nduyerure peré. Nduyerure Tumpa pe, jae uicuaaca cavi vaerã peve jei vae. Tumpa tumee peve opaete aracuaa Espiritu pegua, picuaa cavi vaerã jae jei vae. ¹⁰ Tumpa tapembori, pico cavi vaerã. Echa'ã pe reta co jae yandeYa imbae. Jare cuarã pico yave, pembiyeroviata co yandeYa. Jecuaño piyeyocui yandeYa pe icavi vae piyapo vae rupi. Jare jecuaño piyemboe Tumpa re, picuaa cavi ete vaerã. ¹¹ Tumpa tapemimirãta imbaepuere tuicha ete vae pe, pepiaguasu vaerã piyerovia reve. ¹² Pemee yasurupai yandeRu pe. Echa'ã jae umeet ma peve penoi vaerã pembaerã opaete iru uñeñoño tee Tumpa peguarã vae reta pe uñemeeta vae. Echa'ã cua reta yugüireco tembipe pe. ¹³ YandeRu yanderepi ma mbaepuere pitumimbi re güinoi vae güi, jare yandererova ma Tai iporoyocua pe. Jae uau Tai. ¹⁴ YandeRu yanderepi Tai imano rupi, jare yanembiasa yanembaeyoa reta güi.

Cristo yanembipiacatu ma Tumpa ndive imano rupi

¹⁵ Mbaeti etei quía uecha Tumpa. Èrei Tai uicuaaca yandevet quirã co jae. Tai co jae opaete mbaembae uyeyapo vae iYa. ¹⁶ Echa'ã jae uyapo opaete. Jae uyapo opaete ara pe oĩ vae jare opaete ivi pe oĩ vae. Jae uyapo opaete yandepuere yaecha vae jare opaete yandepuere mbae yaecha vae. Jae uyapo opaete mburuvicha reta ara pegua jare ivi pegua, jare opaete mbaepuere güinoi vae. Jae etei uyapo opaete iyupeguarã. ¹⁷ Jare jae icoño mai ndei mbae uyeyapo mbove, jare mbaetita tẽi mbae ipuere ico jae uyandareco'ã yave jese. ¹⁸ Jare upurugüirovia vae reta co jae Cristo jete rami, jare Cristo co jae upurugüirovia vae reta iñaca rami. Jae co tenondegua vae. Echa'ã jae tenonde voi icove ye ou umanocue vae reta ipite güi, jae ico vaerã opaete vae iYarã. ¹⁹ Echa'ã Tumpa uipota vae co jae etei ico vaerã Cristo jete pe. ²⁰ Tumpa uipota vae vi co umbipiacatu vaerã jae ndive Cristo rupi opaete ivi pe ñugüinoi vae reta jare opaete ara pe ñugüinoi vae reta. Echa'ã umeet ma yandevet ipiacatu Cristo imano rupi curusu re.

²¹ Jare tenonde yave pe reta mbiri ete pico Tumpa güi. Echa'ã piyovaichose pepia pe Tumpa ndive, jare piyapose icavi mbae vae. Èrei añave Cristo pembipiacatu ma Tumpa ndive. ²² Jucuarã jae uyapo imano rupi cuimbaerã uyeyapo yave. Jare jucuarã uyapo, peñoño tee vaerã iyupeguarã, jare agüiye vaerã penoi mbaeyoa, jare agüiye vaerã quía ipuere pembijeco mbae re, jae jovai peĩ yave, ²³ jecuaño piñemimirãta yave jare piñemiatangãtu yave pepurugüirovia re, jare jecuaño peãro yave piyerovia reve ñee icavi vae rupi uñemeet peve vae. Echa'ã pe reta picuaa ñee icavi vae opaete ivi pegua reta pe jerãcua vae. Jare che vi amimbeu ñee icavi vae, jare cuarã ayeyocui Tumpa pe.

Pablo uyeyocui upurugüirovia vae reta pe

²⁴ Añave ayerovia aiporara aī peré vae re. Echa'ā aiporara aī cherete pe jocua uataño co Cristo jete uiporara vaerā vae. Echa'ā jae jete co jae upurugüirovia vae reta. ²⁵ Echa'ā uñemeche cheve ayeyocui vaerā upurugüirovia vae reta pe. Tumpa etei cheapo jae jembiocuirā, che ayeyocui vaerā peve, jare amimbeu vaerā peve opaete Tumpa iñee. ²⁶ Cua co jocua tenonde yave uyecuaa mbae vae. Echa'ā Tumpa uicuaaca'ā etei tenonde yave. Ērei añave Tumpa uicuaaca co oñono tee iyupeguarā vae reta pe. ²⁷ Echa'ā Tumpa iquirēi uicuaaca chupe reta quirāi cua tenonde yave uyecuaa mbae vae mbaeyecou tuicha vae güinoi judío mbae vae reta coti. Jae co Cristo ico pepia pe vae. Jáeramo pepuere peāro piyerovia reve Tumpa pemiyeeroviata vae re.

²⁸ Ore vi numimbeu Cristo regua. Numbiaracuaa opaete vae, jare nombœ opaete vae orearacuaa catu reve, penti ramiño vaerā Cristo imbaepuere rupi. ²⁹ Cua jeco pegua che vi aparaviqui aī Tumpa pe. Tanta aparaviqui aī aiporara reve Cristo imbaepuere rupi. Echa'ā jae tanta uparaviqui oī chepia pe.

2

¹ Ērei aipota picuaa vaerā quirāi tanta aparaviqui aiporara reve peré, jare Laodicea pegua reta re, jare opaete cherecha mbae vae reta re. ² Aipota ete pepiacatu vaerā, jare piyerau vaerā, penti ramiño pico vaerā. Aipota piñemimirāta vaerā opaete picuaa vae rupi, jare picuaa vaerā jocua tenonde yave uyecuaa mbae vae Cristo regua yandeRu Tumpa uicuaaca yandevae vae. ³ Pipota yave pearacuaa catu, Cristo re uñevāe opaete aracuaa. Jare pipota yave picuaa cavi mbae regua, Cristo uicuaa cavi opaete mbae regua. ⁴ Jare cua che jae peve, agüiye vaerā quía pemitavi ñee icavi echa vae pe. ⁵ Echa'ā yepe tēi che aī'ā pepi, ěrei jecuaeño chepia pe ayemingueta peré. Aicuaa quirāi pico cavi co uyupii, jare quirāi piñemimirāta pepurugüirovia Cristo regua re. Jare cua re ayerovia.

⁶ Pemiysive ma yandeYa Jesucristo mburugüirovia rupi. Jae ramiño vi jecuaeño pico perovia reve jese. ⁷ Piñemimirāta Cristo imbaepuere rupi, pecuacuaa cavi vaerā jese. Piñemiatangātu pepurugüirovia re. Echa'ā jucuarāi co piyemboe. Jecuaeño pemee yasurupai Tumpa pe pepurugüirovia re.

Cristo umee ma yandevae tecove ipiaiu vae

⁸ Piñemoa, agüiye vaerā quía pemitavi aracuaa tavi pegua pe. Echa'ā cua nunga aracuaa moromboe ivi pegua retaño co. Oporomboe'ā Cristo re, jaeño mbaembae ivi pegua re.

⁹ Echa'ā Cristo co jae Tumpa etei cuimbaerā uyeyapo vae. ¹⁰ Jáeramo opaete mbaembae penoi, Cristo penoi ramo. Echa'ā jae co opaete mburuvicha reta ara pegua jare ivi pegua iYa. ¹¹ Jare piñemicircuncidaca ma vi pepia pe, Cristo re perovia ramo. Echa'ā Cristo uyapo peve pepia pe vae penti cuimbae uñemicircuncidaca vae jete pe uyeyapo vae rami co. Echa'ā Cristo perepi opaete mbaeyoa imbaepuere güi. ¹² Piyembibautizaca yave, piñeñoti co Cristo ndive, jare Tumpa umee peve tecove opa mbae vae Cristo ndive. Cua uyeyapo Tumpa imbaepuere rupi, pepurugüirovia ramo. Echa'ā Tumpa umbijecove ye Cristo güeru umanocue vae reta ipite güi. ¹³ Tenonde yave pe reta penoi'ā tecove opa mbae vae pemaeyoa reta jeco pegua, jare piñemicircuncidaca'ā pemaeyoa reta güi ramo. Ērei Tumpa umee ma peve tecove opa mbae vae Cristo ndive jare pemiysia ma opaete pemaeyoa reta güi. ¹⁴ Tumpa umbai ma mboroyocui uyecuatía oī vae. Echa'ā jocua uyecuatía oī vae oyovaichose ore ndive, jare jecuaeño orembijecose. Ērei Tumpa güiraa co oregüi, Cristo uyecutuca curusu re yave. ¹⁵ Jáeramo Tumpa yanderepi ma opaete mbaepuere yanderé güinoise vae reta güi, jare umimaraca reta opaete vae jovaque. Echa'ā Tumpa umiamiri reta, Cristo umano yave curusu re.

¹⁶ Jáeramo agüiye quía tapembijeco mbae peu vae re, jare fiesta reta iara reta re, jare yasipiaiu re, jare mbutuu ara reta re. ¹⁷ Echa'ā opaete cua reta jaanga retaño co. Tenonde yave Tumpa umijaanga reta uyeyapota vae re. Echa'ā cua reta uyemijaangaño Cristo re. ¹⁸ Agüiye quía tapeopia Tumpa umeeta peve vae güi. Echa'ā amocue vae uñemimichiraanga, jare umbiadora ángel reta. Cua nunga ipia pe uyemingueta tēi uicuaa co uecha mbae vae regua, jare uyembicate ipiyemingueta rupiño uicuaa vae re, yepe tēi mbae uicuaa cavi'ā. ¹⁹ Cua nunga uyeco'ā Cristo re. Echa'ā Cristo co jae upurugüirovia vae reta iñaca. Echa'ā opaete yandeyuapiapia jare yanderayi uyapo yanderete penti ramiño. Ērei

yanderete uyeco ñaneāca re, ucuacuaa cavi vaerā. Jucuarāiño vi Cristo jete ucuacuaa Tumpa jei vae re.

²⁰ Pe reta pemano co Cristo ndive moromboe ivi pegua reta güi. Jáeramo ¿maera pa jecuaeño pico ivi pegua reta yugüireco rami? jare ¿maera pa piyapo iporoyocui reta? ²¹ Echa'ā jae reta peocui cuarāi: "Agüiye pipisi. Agüiye peu. Agüiye piyaviqui." Jucuarāi jei reta. ²² Ērei opaete jocua mbaembae uyembaita co, uyeporu yave. Jare opaete cua mboroyocui reta moromboe ivi pegua retaño co. ²³ Añete co, cua nunga mboroyocui aracuaa pegua echa co. Echa'ā cua nunga mboroyocui iyapoa reta umbiadora-raanga Tumpa pe ipia pe uyemingueta vae reño, jare uñemimichi-raanga, jare uiporaraca jete pe. Ērei cua mbaembae rupi ipuere'ā etei oyopia jete uipota vae reta.

3

¹ Tumpa umee ma peve tecove opa mbae vae Cristo ndive. Jáeramo jecuaeño pepia pe piyemingueta mbaembae ara pe ñugüiñoi vae re. Echa'ā joco pe Cristo uguapi oī Tumpa iyipi pe iyacata coti. ² Jecuaeño pepia pe piyemingueta mbaembae ara pe ñugüiñoi vae re. Agüiye jecuaeño pepia pe piyemingueta mbaembae ivi pe ñugüiñoi vae reño. ³ Echa'ā pemano ma ivi pegua güi, jare perecove añetete vae ime ma oī Cristo ndive Tumpa oī vae pe. Mbaeti quia ipuere uecha. ⁴ Cristo co jae perecove añetete vae. Cristo uyecuaa ye yave, pe reta vi piyecuaata jare piyeroviata jae ndive.

Teco mai indechi vae jare teco mai ipiau vae

⁵ Jáeramo agüiye pemaño icove vaerā jocua teco mai ivi pegua icavi mbae vae perete pe oī vae. Agüiye piyapo aguasa. Agüiye pepia pe piyemingueta icavi mbae vae re. Agüiye peporopotaiño. Agüiye pipota icavi mbae vae. Agüiye pipota ĩru vae reta imbaembae - echa'ā pipota yave, pipota ete ĩru vae reta imbaembae Tumpa güi. ⁶ Cua icavi mbae vae jeco pegua Tumpa uiporaracata co jae jei vae uyapo'ā vae reta pe. ⁷ Tenonde yave pe reta vi piyapose cua icavi mbae vae reta. Echa'ā picose jucuarāi piyapo vaerā. ⁸ Ērei añave pemombo piyugüi opaete cua ĩru icavi mbae vae reta. Agüiye pepochi. Agüiye pearasi. Agüiye piyapo icavi mbae vae piyupe. Agüiye pere icavi mbae vae piyupe. Agüiye pemoē ñee pichii vae. ⁹ Agüiye peapu piyupe. Echa'ā pemombo ma piyugüi pereco mai indechicue pichii vae jare icavi mbae vae reta piyapose vae. ¹⁰ Jare pipisi ma teco mai ipiau vae. Echa'ā cua teco mai ipiau vae umbipiauta pepia pe piyemingueta vae, picuaa cavi vaerā Tumpa regua, jare pico vaerā jae jei vae re. Echa'ā Tumpa umee peve cua teco mai ipiau vae. ¹¹ Jare cua teco mai ipiau vae güiñoi vae reta ipite pe mbaeti ma uyuavi uyugüi judío mbae vae jare judío, uñemicircuncidaca vae jare uñemicircuncidaca mbae vae, ñanaigua reta, uyeyocui vae jare uyeyocui mbae vae. Echa'ā jaeño Cristo ico opaete vae ipia pe.

¹² Tumpa perau, jare peparavo peñoño tee vaerā iyupeguarā. Jáeramo pico cavi. Piyeparareco. Pepiacavi piyupe. Piñemimichi piyupe. Peciaguasu piyupe. ¹³ Pemiaguanta piyupe, jare piyembiasa, ime yave quia ĩru vae mbae re umbijeco vae. Echa'ā yandeYa pembiasa ma. Jae ramiño vi pe reta piyembiasa. ¹⁴ Jare piyerau. Echa'ā mburuau icavi ete opaete ĩru güi. Echa'ā piyerau yave, pico cavi eteta uyupii penti ramiño. ¹⁵ Jare Tumpa ipiacatu pepia pe oī vae tuicuaaca peve mbae icavi piyapo vaerā vae. Echa'ā cuarā Tumpa peparavo, pico vaerā penti ramiño. Jare jecuaeño pemee yasurupai Tumpa pe.

¹⁶ Ñee Cristo regua jecuaeño tuico pepia pe. Piyemboe jare piyembiaracuaa pearacuaa catu reve. Piyerovia reve pecanta yandeYa pe canta reta yambiadora pipe vae. ¹⁷ Jare mbae re piyemingueta yave jare mbae piyapo yave, piyemingueta jese jare piyapo opaete yandeYa Jesús jee re. Jare jecuaeño pemee yasurupai yandeRu Tumpa pe yandeYa Jesús rupi.

Yayeyocui yandiyupe

¹⁸ Cuña reta tuyeyocui ime pe. Echa'ā icavi co jucuarāi uyapo vaerā. Echa'ā güirovia ma yandeYa re.

¹⁹ Cuimbae reta tuau jembireco, jare agüiye tipochiño chupe.

²⁰ Cunumi reta jare cuñatai reta tuyapo opaete tu jare ichi jei vae. Echa'ā cua icavi co yandeYa pe.

²¹ Tu reta agüiye tumbiarasiño isambiai reta, agüiye vaerã isambiai reta umbiaqui.

²² Uyeyocui vae reta tuyapo opaete ipatrón jei vae. Agüiye tuyeyocui cavi ipatrón pe jae umae oĩ jese yaveño, umbiyerovia vaerãño. Ipiquirẽi reve tuyeyocui chupe uipiu reve yandeYa güi. ²³ Jare opaete uyapo vae, tuyapo ipiaquirẽi reve. Tuyeyocui ipatrón pe, yandeYa pe uyeyocui rami. Echa'ã cuimbae peño'ã uyeyocui oĩ. ²⁴ Jare tuicuaa yandeYa umbijecoviata co chupe jocua umeeta chupe vae pe. Echa'ã uyeyocui co oĩ yandeYa Cristo pe. ²⁵ Èrei icavi mbae vae uyapo vae pe Tumpa umbijecoviata vi icavi mbae vae uyapo vae re. Echa'ã Tumpa uau'ã penti vaeno iru vae güi.

4

¹ Patrón reta tuyapo jupi vae jembiocui reta pe, jare agüiye tumbitavi. Echa'ã tuicuaa jae reta vi güinoi co iYa ara pe.

² Jecuaeño piyerure Tumpa pe. Piñemiatangātu, jecuaeño piyerure vaerã pemee reve yasurupai Tumpa pe. ³ Jae ramiño vi piyerure oreré, Tumpa uicuaaca vaerã oreve quirãi numimbeu vaerã ñee. Echa'ã chequirẽi chemiari tenonde yave Cristo regua uyecuaa mbae vae re. Echa'ã jáeramo che aĩ cua peresoriru pe. ⁴ Piyerure cheré, aicuaaca cavi vaerã iru vae reta pe. Echa'ã icavi co cuarã ayapo vaerã.

⁵ Pico pearacuaa catu reve upurugüirovia mbae vae reta ndive. Jecuaeño piyapo icavi vae. ⁶ Jecuaeño piyemingueta ñee icavi vae pe mbae icavi vae re. Jare piyemboe quirãi piyemingueta vaerã ipotave vae pe.

Saludo reta

⁷ Tíquico co jae cherivi aau vae. Jae co penti yandeYa jembiocui che ndive uyeyocui cavi yandeYa pe vae. Jae umimbeuta peve opaete cheregua. ⁸ Echa'ã cuarã amondo pepi, jae uicuaa vaerã peregua, jare jae pembipiacatu vaerã. ⁹ Amondo vi jae ndive Onésimo. Jae vi co cherivi aau vae yandeYa pe uyeyocui cavi vae. Jae co penti perentaigua. Jae umimbeuta peve opaete mbae cua pe uyeyapo vae. ¹⁰ Aristarco jei peve Tumpa ndiveño peĩ. Jae ime che ndive oĩ peresoriru pe. Marcos vi jei peve Tumpa ndiveño peĩ. Jae co Bernabé jii. Echa'ã che poyocui ma pembiresive cavi vaerã, jae oo pepi yave. ¹¹ Jesús vi jei peve Tumpa ndiveño peĩ. Jae co Justo pe uyembijee vae. Echa'ã opaete judío reta upurugüirovia vae güi cua retaño chembori amimbeu vaerã Tumpa iporoyocua regua. Jae reta chembipiacatu ete. ¹² Epafras vi jei peve Tumpa ndiveño peĩ. Jae vi uyeyocui Cristo pe. Jare jae vi co penti perentaigua. Jae jecuaeño uyerure ete Tumpa pe peré, piñemimirãta vaerã, jare picuaa cavi vaerã opaete Tumpa jei vae. ¹³ Echa'ã che etei chepuere amimbeu peve quirãi Epafras uparaviqui tanta peré, jare Laodicea jare Hierápolis pe ñugüinoi vae reta re. ¹⁴ Lucas jare Demas vi jei peve Tumpa ndiveño peĩ. Lucas co jae upurupiano vae aau vae.

¹⁵ Tumpa ndiveño toĩ upurugüirovia vae reta Laodicea pegua, jare Ninfas jare opaete upurugüirovia vae reta Ninfas jenta pe uyembati vae. ¹⁶ Pe reta pemingueta ma yave cua tupapire, pemondo Laodicea pe upurugüirovia vae reta joco pe uyembati vae vi umingueta vaerã. Jare jocua tupapire Laodicea pe amondo vae pe reta pemingueta vi. ¹⁷ Pere Arquivo pe tuñemiatangātu, uyapo vaerã mbaraviqui yandeYa umee chupe vae, uyeyocui vaerã yandeYa pe.

¹⁸ Che etei jae peve Tumpa ndiveño peĩ. Cua aicutiã chepo pe etei. Pemandúa peresoriru pe aĩ vae re. Tumpa tumee peve ipiacavi. Amén.

PRIMERA CARTA DEL APOSTOL SAN PABLO A LOS TESALONICENSIS

¹ Che co jae Pablo. Che ndive ime ñugüinoi Silvano jare Timoteo. Aicutafía cua tupapire opaete pepurugüirovia vae reta Tesalónica pe piyembati vae pe. Pe reta co jae yandeRu Tumpa jare yandeYa Jesucristo imbae. YandeRu Tumpa jare yandeYa Jesucristo tumee peve ipiacavi jare ipiacatu.

Jeta vae uicuaa Tesalónica pegua reta ipurugüirovia regua

² Jecuaño numee yasurupai Tumpa pe peré, jare oreacañi'ã pegüi. Jecuaño nduyurure Tumpa pe peré. ³ Jare nduyurure yandeRu Tumpa pe yave, jecuaño oremandúa quirái pico Tumpa coti vae re. Echa'ã preparaviqui Tumpa pe, perovia Jesucristo re jare peau ramo, jare jecuaño pepiaguasu, peãro piyerovia reve yandeYa Jesucristo ou ye vaerã ramo. ⁴ Pe reta co jae orerivi reta. Tumpa perau jare preparavo. Cua nduicuaa cavi co. ⁵ Echa'ã numimbeu yave peve ñee icavi vae, Espíritu Santo umee oreve mbaepuere numimbeu cavi vaerã peve. Ñeeiño'ã co. Echa'ã nduicuaa cavi añetete co ñee icavi vae. Jare pe reta picuaa cavi co quirái ore nduico cavi pepite pe, puau ramo.

⁶ Jare pe reta pembipi pico, ore nduico rami, jare yandeYa ico rami. Perovia co numimbeu peve vae. Jáeramo piporara ete. Ërei Espíritu Santo pembiyerovia. ⁷ Cua jeco pegua opaete upurugüirovia vae reta Macedonia pegua jare Acaya pegua uicuaa quirái icavi co yugüireco vaerã. ⁸ Echa'ã pe reta pemimbeu ñee icavi vae yandeYa regua ñru vae reta pe. Macedonia jare Acaya pegua reta uicuaa perovia co Tumpa re. Jare opaete que rupi rupi uicuaa vi. Jáeramo uata'ã ma mbae ore numimbeu vaerã chupe reta. ⁹ Echa'ã jae reta etei umimbeu ñru vae reta pe quirái ore ndoo perenta pe, jare mbae uyeyapo joco pe. Umimbeu reta vi quirái pembiadora'ã ma tumpa-raanga reta - echa'ã piyerova ma jocua reta güi Tumpa coti - jare quirái piyeyocui ma Tumpa añetete vae pe - jae co jecuaño ico vae. ¹⁰ Umimbeu reta vi quirái peãro pei Tumpa Tai ou ye vaerã ara güi - jae co Jesús. Echa'ã Tumpa umbijecove ye güeru umanocue vae reta ipite güi. Tumpa uiporaracata co upurugüirovia mbae vae reta pe, ërei Jesús yanderepi ma ñru vae reta uiporarata vae güi.

2

Quirái Pablo uyeyocui Tumpa pe Tesalónica pe

¹ Ndooyave perenta pe, ndooiño'ã co. Cua picuaa pe reta etei, cherivi reta. ² Yepe tõi nduiporara Filipos pe, ñru vae reta uyapo icavi mbae vae oreve yave - cua vi picuaa - ërei numimbeu peve ñee icavi vae Tumpa ombou vae. Nduquiye'ã, yepe tõi yavai ete oreve. Echa'ã Tumpa orembori. ³ Jocua numimbeu peve vae añete co. Ndueca'ã co pembiepi vaerã oreve cua numimbeu peve vae. Nduipota'ã etei vi pumbitavi. ⁴ Tumpa etei uicuaa quirái nduyeyocui chupe, jare uicuaaca ma icavi numimbeu vaerã ñee icavi vae. Jáeramo numimbeu ñru vae reta pe, Tumpa numbiyerovia vaerã. Numimbeu'ã, ivi pegua retaño numbiyerovia vaerã. Echa'ã Tumpa uicuaa cavi orepi pe oi vae. ⁵ Ndoe'ã etei mbae peve, piyembutuicha vaerã. Cua picuaa co pe reta. Nduipota viari'ã mbae pegüi oreypueguarã. Cua uicuaa vi co Tumpa. ⁶ Ndueca'ã vi pe reta jare ñru vae reta orembutuicha vaerã. Ërei icavita tõi ndueca pe reta orembutuicha vaerã. Echa'ã ore co jae Cristo jemimondo reta. ⁷ Ërei ore nduyandareco peré puau reve, penti ichi imembi umicambu vae uyandareco uau reve vae rami. ⁸ Ore puau. Jáeramo numimbeu ma peve ñee icavi vae Tumpa ombou vae. Ore puau ete co. Jáeramo orerecove yepe numetei tõi peré. ⁹ Pemandúa quirái tanta nduparaviqui oreacandi reve, cherivi reta. Nduparaviqui ara rupi jare pñtu rupi, agüiye vaerã pumambeco mbae pemee vaerã oreve vae re. Jucuarái nduyapo, jare numimbeu vi peve ñee icavi vae Tumpa ombou vae.

¹⁰ Pe reta co jae upurugüirovia vae reta. Pe reta picuaa, jare Tumpa vi uicuaa quirái nduico pepite pe. Jecuaño nduyapo icavi vae. Mbaeti quía ipuere orembijeco mbae re. Jecuaño nduyapo jupi vae. ¹¹ Oremiari peve - penti penti pe - penti tu imiari tai reta pe rami. Ore pumbiaracuaa, jare pumbipiacatu. Opaete cua picuaa cavi. ¹² Ore poyocui

piyapo vaerā icavi vae. Echa'ā pe reta co jae Tumpa imbae. Jare Tumpa reparavo ma, pe reta vi pico vaerā iporoyocua pe.

¹³ Jáeramo jecuaeño numee yasurupai Tumpa pe. Echa'ā numimbeu peve yave Tumpa iñee, perovia jae co Tumpa iñee añetete vae - ore numimbeu peve vaeño'ā co. Jare cua Tumpa iñee jecuaeño uparaviqui pepia pe, pe reta pepurugüirovia ramo. ¹⁴ Jare uyeyapo ma peve, Judea pe uyembatimbati vae reta pe uyeyapo vae rami, cherivi reta. Jae reta vi co Tumpa imbae. Echa'ā güirovia Cristo Jesús re. Echa'ā perentaigua reta uyapo icavi mbae vae peve, judío reta uyapo icavi mbae vae jocua upurugüirovia vae reta pe rami. ¹⁵ Echa'ā judío reta uyucaca Tumpa iñee aracae umimbeu vae reta jare yandeYa Jesús vi, jare oreve vi uyapo icavi mbae vae. Uipota'ā uyapo Tumpa jei vae, jare oyovaicho opaete vae ndive. ¹⁶ Echa'ā jecuaeño orembiavai, agüiye vaerā oreiari judío mbae vae reta pe, uyembiasaca vaerā. Jucuarāi jecuaeño judío reta uyapo jeta ete icavi mbae vae. Ērei Tumpa uiporaraca eteta co chupe reta.

Pablo uipota oo opou ye Tesalónica pegua reta pe

¹⁷ Michi peguaño co mbiri noĩ pegüi, cherivi reta. Ērei yepe tēi puecha'ā ma, ērei jecuaeño oremandúa peré. Nduipota ete tēi puecha ye. ¹⁸ Jáeramo nduipota tēi ndoo Tesalónica pe. Jecuaeño che etei aipota tēi aa pepi. Ērei Satanás jecuaeño orembiavai. ¹⁹ YandeYa Jesús ou yeta co ara güi. Jare ore nuāro noĩ nduyerovia reve. Echa'ā jae ndive ñai yave, ore nduyeroviata, jare yandeYa jeita icavi co nduyapo, pe reta vi joco pe peĩta ramo. ²⁰ Añete co, nduyeroviata pereco pegua, yandeYa jei yave icavi co nduyapo.

3

¹ Jare orequirēi ete tēi ndoo pepi ramo, nduyemingueta ndupita vaerā oreño Atenas pe, ² jare nomondo vaerā pepi Timoteo. Jae co yanderivi. Jae uyeyocui Tumpa pe. Umimbeu ore ndive ñee icavi vae Cristo regua. Jáeramo nomondo Timoteo, jae pematangātu vaerā, jare pembipiacatu vaerā pepurugüirovia re. ³ Agüiye pepiatiti ete, piporara ramo. Echa'ā pe reta etei picuaa jucuarāi yaiporarata co. ⁴ Ore nduico yave pe ndive, numimbeu peve yaiporarata vae. Jare jucuarāi uyeyapo ma. Cua picuaa co. ⁵ Jáeramo chequirēi ete tēi aa pepi ramo, amondo Timoteo, aicuaa vaerā pepurugüirovia regua. Echa'ā chepia pe ayemingueta aramondi jocua uipota ivi pegua reta icavi mbae vae uyapo vaerā vae uparaviqui ma pepia pe, uyapoca vaerā peve icavi mbae vae. Echa'ā jucuarāi jare mona, nduparaviquiñota tēi co.

⁶ Ērei Timoteo ou uvāe yave cua pe Tesalónica güi, umimbeu oreve quirāi pepurugüirovia cavi peĩ, jare quirāi peau yandeYa. Jei vi oreve quirāi jecuaeño pemandúa oreré orerau reve, jare quirāi pipota orerecha, ore nduipota puecha rami. ⁷ Jáeramo, cherivi reta, yepe tēi iru vae reta uyapo icavi mbae vae oreve jare nduiporara noĩ, ērei orepiacatu pepurugüirovia jeco pegua. ⁸ Orepiacatu noĩ, pe reta jecuaeño piyeyocui yandeYa pe ramo. ⁹ Jáeramo numee yasurupai tuicha Tumpa pe peré. Echa'ā nduyerovia ete pereco pegua yandeRu Tumpa jovaque. ¹⁰ Jare tanta nduyerure Tumpa pe ara rupi jare pĩtu rupi, ndoo vaerā puecha. Nduipota numimbeu peve mbaembae ndeiño picuaa cavi vae, pepirāta vaerā pepurugüirovia re.

¹¹ YandeRu Tumpa etei jare yandeYa Jesús taoremondo pepi. ¹² Jare yandeYa tuparaviqui pepia pe, piyerau ete vaerā, jare peau vaerā opaete vae. Pepuruau, ore puau rami. ¹³ Jare yandeYa tapemimirāta, piyapo vaerā jupi vae, jare agüiye vaerā yandeRu Tumpa pembijeco mbae re, yandeYa Jesús ou ye yave. Jae ou yeta co opaete uñeño tee chupeguarā vae reta ndive.

4

Quirāi yandepuere yambiyerovia Tumpa

¹ Pe reta picuaa ma quirāi pico vaerā, jare quirāi pembiyerovia vaerā Tumpa. Cua numimbeu ma peve. Jáeramo añave pumbiaracuaa yandeYa Jesús jee re, cherivi reta, jecuaeño pico cuarāi, pembiyerovia ete vaerā Tumpa.

² Echa'ā pe reta picuaa mboroyocui reta numimbeu peve vae. YandeYa Jesús umimbeu oreve numimbeu peve vaerā. ³ Echa'ā Tumpa uipota piñeño tee vaerā chupeguarā. Uipota'ā piyapo vaerā aguasa. ⁴ Jáeramo penti penti penoi pembireco. Piyapo jupi vae pembireco coti, jare pemaē cavi jese pipiu reve. ⁵ Agüiye peporopotaiño. Echa'ā jucuarāi

uyapo ivi pegua güirovia'ã Tumpa re vae reta. ⁶ Agüiye piyapo cua nunga icavi mbae vae. Echa'ã cua nunga icavi mbae vae piyapo yave, piyapo co icavi mbae vae perivi reta pe. Jare jucuarã piyapo yave, yandeYa uiporaracata co peve jocua jeco pegua. Cua numimbeu ma peve, agüiye vaerã piyapo. ⁷ Echa'ã Tumpa yandeparavo, ñañeño ttee vaerã chupeguarã - yandeparavo'ã yaporopota vaerã. ⁸ Jáeramo perïro yave ore poyocui piyapo vaerã vae, perïro co Tumpa iporoyocui - oreporoyocuiño'ã co. Echa'ã Tumpa umee ma yandeve Espïritu Santo, jae ico vaerã yandepia pe.

⁹ Aicutiata'ã peve mburuau penoi vaerã ïru upurugüirovia vae reta coti vae re. Echa'ã picuaa ma co. Tumpa pemboe ma piyerau vaerã. ¹⁰ Añete co, peau opaete upurugüirovia vae Macedonia pegua reta. Èrei pumiñera jecuaeño piyerau ete vaerã, cherivi reta. ¹¹ Cua poyocui: Pico pepiacatu reve. Jare piyapo peparaviqui. Pemimbaraviqui pepo. Jucuarã ore poyocui ma. ¹² Jucuarã pico yave, piyepiucata co upurugüirovia mbae vae reta pe, jare ndarau mbae uata peve.

YandeYa ou yeta

¹³ ¿Picuaa'ã pa umanocue vae reta regua, cherivi reta? Nduipotã picuaa vaerã, agüiye vaerã pepiatiti, ïru vae reta ipiatiti rami. Echa'ã jae reta mbaeti mbae uãro vaerã uyerovia reve. ¹⁴ Yande yarovia Jesús umano co jare icove ye co ou umanocue vae reta ipite güi. Jae ramiño vi Tumpa ombouta Jesús ndive upurugüirovia vae umanocue vae reta.

¹⁵ Jáeramo numimbeu peve yandeYa umimbeu oreve vae. Jae co cua: YandeYa ou ye yave, yande imeño ñai vae ndarau yaa umanocue vae reta jenonde. ¹⁶ Echa'ã yandeYa ete ñuñeyita ara güi ñee mbaepuere pegua reve. Uyenduta vi penti ángel tenondegua vae ñee jare Tumpa itrompeta. Jare Cristo re güirovia vae umanocue vae reta icove yeta rani yugüeru ïru umanocue vae reta ipite güi. ¹⁷ Cua jaicue rupi yande cua ivi pe imeño ñai vae ndeño ñamano vae yaa pãveta jae reta ndive. YandeYa yandereupita, ñañeovãiti vaerã jae ndive amapïtu re. Jare jaeño mai pegua yaicota yandeYa ndive. ¹⁸ Jáeramo piyembipiacatu cua ñee reta pe.

5

¹ Èrei jocua ara reta re mbaeti ma mbae uata amimbeu vaerã peve, cherivi reta. ² Penti imonda vae ou aramoïño pïtu yave. Jae ramiño vi yandeYa outa aramoïño. Cua picuaa cavi ma co. ³ Ivi pegua reta jeita ñugüinoi: “Tecorai'ã ma. Mbaeti ma mbae yaquiyee chugüi vae.” Jucuarã jeita. Jayave outa aramoïño chupe reta mbaesusere, cuña imembarasi aramoïño ou chupe rami. Jare ndarau oyepete reta jocua mbaesusere güi. ⁴ Penti imonda vae uique aramoïño penti tenta pe pïtumimbi yave, tenta iya uicuaa mbae reve. Èrei pe reta jocua tenta iya rami'ã co, cherivi reta. Pico'ã pïtumimbi pe. ⁵ Echa'ã opaete pe reta pico guarasi jembipe yave yugüireco vae rami. Echa'ã guarasi umee tembipe. Yaico'ã co pïtu yave yugüireco vae rami. Echa'ã pïtu yave, pïtumimbi co. ⁶ Jáeramo agüiye pico oque vae reta rami. Echa'ã ïru vae reta yugüireco jucuarã. Èrei ñañemiatangãtu, jare ñañemoa ngatu ñai. ⁷ Echa'ã oque vae reta oque pïtu yave, jare usavïpo vae reta usavïpo pïtu yave. ⁸ Èrei yande yaico guarasi jembipe yave yugüireco vae rami. Jáeramo ñañemoa ñai. Yarovia jare yaau Tumpa. Echa'ã cuarã yave, jae co penti camisa fierro pegua uñerãro vae omonde vae rami. Ñãaro vi yayerovia reve yayembiasaca ete vaerã. Echa'ã cuarã yave, jae co penti ãca regua fierro pegua uñerãro vae oñoño vae rami. ⁹ Echa'ã Tumpa yandeparavo'ã uiporaraca vaerã yandeve. Jae yandeparavo co, yayembiasaca vaerã yandeYa Jesucristo uyapo yandave vae jeco pegua. ¹⁰ Echa'ã yandeYa Jesucristo umano yanderé, yande yaico vaerã jae ndive. Ñamano yave ani ndei ñamano yave, yaicota jae ndive. ¹¹ Jáeramo piyembipiacatu jare piñemimirãta, jucuarã piyapo pei rami.

Pablo umbiaracuaa upurugüirovia vae reta

¹² Cherivi reta, pumiñera pipiu vaerã yandeYa pe uyeyocui vae pepite pe ñugüinoi vae reta. Echa'ã jae reta co petenondegua reta yandeYa iparaviqui re. Jae reta pembiaracuaa. ¹³ Pipiu jare peau iparaviqui jeco pegua. Jare pico cavi uyupii pepiacatu reve.

¹⁴ Cherivi reta, pumiñera vi pembiaracuaa vaerã iyaquí vae reta, jare pembipiacatu vaerã ipiatiti vae reta, jare pembori vaerã ipirãta mbae vae reta, jare pepiaguasu vaerã opaete vae pe.

¹⁵ Piñemoa ngatu. Īru vae uyapo yave icavi mbae vae pecoti, agüiye piyeepe icavi mbae vae pe. Jecuaeño pico cavi uyupii, jare pico cavi vi opaete vae ndive.

¹⁶ Jecuaeño piyerovia catu. ¹⁷ Jecuaeño piyerure Tumpa pe. ¹⁸ Jecuaeño pemee yasurupai Tumpa pe ipotave mbae re. Echa'ã cua co jae Tumpa uipota vae. Echa'ã perovia ma Cristo Jesús re.

¹⁹ Agüiye piyopia Espíritu Santo iparaviqui. Echa'ã jae uparaviqui oĩ pepia pe. ²⁰ Agüiye perĩro Tumpa iñee umimbeu vae reta iñee. ²¹ Pepia pe piyemingueta cavi opaete mbae re. Piñuvatu piyupe icavi vaeño. ²² Agüiye piyapo ipotave icavi mbae vae.

²³ Tumpa umee ma yandevē ipiacatu. Tumpa etei tapeñono tee iyupeguarãño. Tuyandareco cavi peespíritu re, jare perezove re, jare perete re, agüiye vaerã quía ipuere pembijeco mbae re yandeYa Jesucristo ou ye yave. ²⁴ Tumpa uyapota co cua. Echa'ã jae peparavo ma, jare jecuaeño uyapo jei uyapota vae.

²⁵ Cherivi reta, piyerure Tumpa pe oreré.

²⁶ Saludo reta piyapo piyupe yave, piñecuãva piyerau reve.

²⁷ Che pumiñera pemingüeta vaerã cua tupapire opaete yanderivi reta pe. Jae co yandeYa jei vae. Jae oñono tee reta iyupeguarã.

²⁸ YandeYa Jesucristo tumee peve ipiacavi. Amén.

SEGUNDA CARTA DEL APOSTOL SAN PABLO A LOS TESALONICENSES

¹ Che co jae Pablo. Che ndive ime ñugüinoi Silvano jare Timoteo. Aicuatía cua tupapire opaete pepurugüirovia vae reta Tesalónica pe piyembati vae pe. Pe reta co jae yandeRu Tumpa jare yandeYa Jesucristo imbae. ² YandeRu Tumpa jare yandeYa Jesucristo tumee peve ipiacavi jare ipiacatu.

Tumpa upuruáata jupi vae rupi

³ Jecuaeño numee yasurupai Tumpa pe peré, cherivi reta. Jare icavi co cuarái nduyapo vaerã. Echa'ã jecuaeño ucuacuaa pepurugüirovia, jare mburuau penoi uyucoti vae jecuaeño ucuacuaa vi. ⁴ Jáeramo ore nduyemingueta cavi peré ñru upurugüirovia vae uyembatimbati vae reta pe oremiari peré yave. Numimbeu chupe reta quirái pepiaguasu jare tanta pepurugüirovia, yepe tēi ñru vae reta jecuaeño uyapo icavi mbae vae peve jare uiporaraca peve. ⁵ Cua uicuaaca quirái Tumpa jecuaeño upuruáa jupi vae rupi, jare jucuarái Tumpa jeita jupi co pe reta pico vaerã jae ndive iporoyocua pe. Echa'ã jocua jeco pegua añave piporara pico.

⁶ Echa'ã jupi co Tumpa uiporaraca vaerã uiporaraca peve vae reta pe. ⁷ Jare pe reta piporara vae peputuuta ore ndive. Echa'ã jupi co Tumpa yanembuputu vaerã, yandeYa Jesús uyecuaa ye yave, ara güi ou yave ángel mbaepuere güinoi vae reta ndive. ⁸ Yugüeruta tata jendi vae rami. Jayave yandeYa uiporaraca uicuaa'ã Tumpa vae reta pe. Echa'ã jae reta uipota'ã güirovia ñee icavi vae yandeYa Jesucristo regua. ⁹ Jáeramo uiporaraca co. Echa'ã yandeYa umbisirita reta yugüireco vaerã jaeño mai pegua mbiri chugüi. Ndarau etei uecha reta yandeYa imbaepuere tuicha ete vae rupi uyapota vae. ¹⁰ Echa'ã jucuarái uyeyapota, yandeYa ou ye yave. Jare jocua ara reta pe opaete uñeño tee yandeYa peguarã vae reta umbiadorata yandeYa. Opaete güirovia jese vae reta ipiacañita yandeYa re. Jare pe reta vi perovia numimbeu peve vae.

¹¹ Jáeramo jecuaeño nduyerure Tumpa pe peré. Echa'ã ore nduyeyocui Tumpa pe jare jae preparavo vi. Nduipota Tumpa jei vaerã jupi co preparavo vaerã. Tumpa tapembori imbaepuere rupi, piyapo vaerã opaete mbae icavi vae pipota piyapo vae, jare preparaviqui vaerã pepurugüirovia reve. ¹² Jucuarái yave, ñru vae reta umbiadorata yandeYa Jesucristo jee icavi vae piyapo vae regua. Jare pe reta vi piyepiucata perovia jese ramo. Jare cua uyeyapota yandeRu Tumpa jare yandeYa Jesucristo ipiacavi jeco pegua.

2

Cuimbae mbaeyoño iparaviqui vae uyecuaata

¹ YandeYa Jesucristo ou yeta co jare jae yanematita ñañeovãiti vaerã jae ndive. Jáeramo ore pumiñera cua, cherivi reta: ² Agüiye piyembopa jare agüiye piyemipia'ã. Aramoi ñru vae reta jei ma peve uyaro ma oñ yandeYa ivãe ara. Aramoi jei peve Espíritu Santo umimbeu chupe reta, ani jei jerãcua chupe reta, ani jei ore nduicuatía jucuarái penti tupapire pe. ³ Ërei agüiye pemaño quía re pembítavi vaerã. Echa'ã jocua ara ndarau ou rai. Echa'ã ndei ou mbove, upurugüirovia mbae vae reta oyovaicho eteta Tumpa ndive, jare uyecuaata jocua cuimbae mbaeyoño iparaviqui vae. Jae co ucañiteita vae. ⁴ Jae uyembutuichata jare oyovaichota opaete moromboe Tumpa regua ndive jare ndarau umaño ivi pegua reta re umbiadora vaerã Tumpa. Jae uguapita Tumpa jo pe jare jeita: "Che Tumpa co."

⁵ ¿Pemandua'ã pa quirái che aĩ pepi rambueve amimbeu peve cua mbaembae re? ⁶ Jare picuaa vi quirái añave ime quía oyopia vae. Echa'ã jae oyopia oñ jocua mbaeyoño iparaviqui vae, agüiye vaerã uyecuaa ndei ivãe ara ou mbove. ⁷ Echa'ã jocua icavi mbae ndeiño uyecuaa vae uparaviqui ma oñ. Ërei añave oyopia oñ vae oyopiata co, Tumpa güiraa cua ivi güi regua. ⁸ Jayave uyecuaata jocua icavi mbae vae. Ërei yandeYa uyucata ipitúe pe. Umbaita co, ou yave jembipe así reve. ⁹ Jocua icavi mbae vae outa uyapo vaerã Satanás iparaviqui. Güinoita mbaepuere tuicha vae jare uyapota miacañi reta upurumbítavi vaerã. ¹⁰ Uyapota opaete mbae jupi mbae vae umbítavi vaerã ucañiteita vae reta. Echa'ã jae reta uipota'ã güirovia añete vae. Echa'ã güirovia yave, uyembiasacata

tēi co. ¹¹ Jáeramo Tumpa umaēnota jese reta uyembitavi vaerā añete mbae vae rupi, güirovia reta vaerā jocua apu. ¹² Jáeramo ucañiteita reta. Echa'ā güirovia'ā añete vae. Jaeño uyerovia jupi mbae vae re.

Tumpa yandeparavo yanembiasa vaerā

¹³ Ērei icavi co jecuaēno numee vaerā yasurupai Tumpa pe peré, cherivi reta. Echa'ā yandeYa perau jare Tumpa preparavo iyipi güive pembiasa vaerā, Espiritu Santo peñoño tee Tumpa peguarā ramo jare añete vae perovia ramo. ¹⁴ Cuarā Tumpa preparavo ñee icavi vae numimbeu peve vae rupi, pe reta vi piyembutuichaca vaerā yandeYa Jesucristo ndive.

¹⁵ Jáeramo, cherivi reta, pepirāta pepurugüirovia re. Agüiye peacañi ore pomboe jese vae güi. Echa'ā ore pomboe oriñee pe jare tupapire nduicuatía peve vae pe. ¹⁶ YandeRu Tumpa yanderau jare umee yandeve mbiacatu ndarau etei opa vae. Jáeramo yandepuere ñaáro yayerovia reve ipiacavi jeco pegua. YandeYa Jesucristo etei jare yandeRu Tumpa ¹⁷ tumee peve ipiacatu jare tapemimirāta ñee icavi vae pere vaerā, jare icavi vae piyapo vaerā.

3

Tumpa ñnee tuyepiucua

¹ Cuaño aipota, cherivi reta - piyerure oreré, yandeYa ñnee jecuaēno uñemiai vaerā, opaete vae güirovia vaerā pe reta perovia rami. Jucuarāi yave, yandeYa ñnee uyepiucata co. ² Piyerure vi yandeYa orerepi vaerā cuimbae icavi mbae vae oyovaicho ore ndive vae reta güi. Echa'ā opaete vae'ā güirovia yandeYa re. ³ Ērei jecuaēno yandepuere yarovia catu yandeYa re. Jae pemimirātata pepurugüirovia re, jare umeeta peve mbaepuere agüiye vaerā piñemiamirica icavi mbae vae pe. ⁴ Jare ore pugüirovia catu yandeYa re perovia ramo, quirāi piyapo pei jare piyapota ore ndoe peve piyapo vaerā vae. ⁵ YandeYa tapembori picuaa cavi vaerā quirāi Tumpa perau, jare penoi vaerā mbiaguasu Cristo uipota umee peve vae.

ICavi co uparaviqui vaerā

⁶ Añave ore poyocui, cherivi reta, yandeYa Jesucristo jee re, piyembiyao vaerā ipotave upurugüirovia vae iyaqui vae güi. Echa'ā jocua nunga uipota'ā ico moromboe nduicuaaca peve vae re. ⁷ Pe reta etei picuaa quirāi icavi co pico vaerā ore nduico rami. Echa'ā ore nduico pepite pe yave, nduico'ā co nduparaviqui mbae reve. ⁸ Nducaruiño'ā vi numbiepi mbae reve. Ērei tanta nduparaviqui ara rupi jare pítu rupi, agüiye vaerā quía pepite pe oí vae uyemambeco oreré. ⁹ Cuarāi nduyapo yepe tēi mbaepuere nonoi nduyerure vaerā peve mbaembae re. Ērei nduipota nduicuaaca peve quirāi ore nduico, pe reta vi pico vaerā ore nduico rami. ¹⁰ Echa'ā nduico pepi yave, poyocui cuarāi: Ime yave quía ñatēi uparaviqui vae, agüiye quía tumingarú. ¹¹ Echa'ā jerācua oreve quirāi ime pepite pe amocue iyaqui vae. Yugüiraaiño írú vae reta iparaviqui re umae uicuaa vaerā. Ērei iquii'ā-raanga iyupe uparaviqui vaerā. Ērei uyapo'ā mbae ave. ¹² Ērei ndoyocui jare numbiaracuaa jocua nunga yandeYa Jesucristo jee re uparaviqui reta vaerā mbiacatu reve, ime vaerā güinoi mbae jou vaerā.

¹³ Ērei pe reta, cherivi reta, agüiye pecueri icavi vae piyapo vae güi. ¹⁴ Jare ime yave quía cua nduicuatía peve piyapo vaerā vae uyapo'ā vae, picuaa cavi jesequa quía nunga vae, jare agüiye piñemíru jae ndive, jae imara vaerā. ¹⁵ Agüiye piyovaicho jae ndive. Ērei pembiaracuaa penti perivi pembiaracuaa rami.

Saludo reta

¹⁶ Jare yandeYa etei mbiacatu umee vae jecuaēno tumee peve ipiacatu opaete rupi. YandeYa toí opaete pe ndive.

¹⁷ Che etei jae peve Tumpa ndiveño pei. Aicuatía cua chepo pe etei. Jucuarāi ayapo opaete aicuatiaca vae pe, aechaca vaerā añetete co. Cuarāi aicuatía. ¹⁸ YandeYa Jesucristo tumee opaete peve ipiacavi. Amén.

PRIMERA CARTA DEL APOSTOL SAN PABLO A TIMOTEO

¹ Che co jae Pablo. Che co jae Jesucristo jemimondo. Tumpa jare yandeYa Jesucristo iporoyocui rupi che ayeyapo temimondorã. Tumpa yanembiasa ma jare ñaãro yandeYa Jesucristo yayerovia reve. ² Aicuatía cua tupapire ndeve, Timoteo. Nde co jae cherai añetete vae yandepurugüirovia re. YandeRu Tumpa jare yandeYa Jesucristo tumee ndeve ipiacavi jare ipuruparareco jare ipiacatu.

Umimbeu moromboe añete mbae vae reta regua

³ Epita Efeso pe, Macedonia coti aa yave che jae ndeve rami, ndiyocui vaerã amocue vae agüiye vaerã oporomboe ambie moromboe re. ⁴ Īru vae reta umimbeu aracae ndaye retaño jare jecuaeño umierãcua mbae itenondegua reta pe uyeyapo vae reguaño. Che jae ndeve ndiyocui vaerã vi agüiye vaerã uyapisaca jocua nunga re. Echa'ã uyapisaca jese yave, umbipita uyeaca jocua mbaembae re, jare jucuarã yave, ndarau uyeyocui cavi Tumpa pe. Echa'ã yayeyocui Tumpa pe mburugüirovia re.

⁵ Jare jucuarã iyocui, jae reta güinoi vaerã mburuau. Yandepia uyeyoe yave mbaeyoa güi, jare yaicuaa yave yayapo'ã co icavi mbae vae, jare ñanoi yave mburugüirovia añetete vae Tumpa coti, ñanoita mburuau. ⁶ Ērei amocue vae uyavi cua mbaembae. Jáeramo uyembopa jare añave uyeacaiño. ⁷ Jae reta uipota tēi oporomboe mboroyocui re. Ērei uicuaa cavi'ã mbae jei vae jare mbae imiari jese vae, yepe tēi imiari jese uicuaa cavi vae imiari rami.

⁸ Yaicuaa mboroyocui icavi co, uyeporu yave Tumpa uipota uyeporu vaerã rami. ⁹ Echa'ã yaicuaa mboroyocui uyeyapo'ã co mbaepuere güinoi vaerã jupi vae reta re. Jaeño uyeyapo mbaepuere güinoi vaerã mboroyocui jei vae uipota'ã uyapo vae reta re, jare Tumpa jei vae uipota'ã uyapo vae reta re, jare iyoa vae reta re, jare icavi mbae vae uyapo vae reta re, jare icavi mbae vae Tumpa coti jei vae reta re, jare tu uyuca vae reta re, jare ichi uyuca vae reta re, jare opaete upuruyuca vae reta re, ¹⁰ jare aguasa uyapo vae reta re, jare cuimbae reta uyupii uyerereco vae re, jare oñomi japicha umee vaerã corepoti re vae reta re, jare iyapu vae reta re, jare ĩru vae re uñeapo iyapu reve vae reta re, jare ipotave moromboe añete vae ndive oyovaicho vae reta re. ¹¹ Cua moromboe añete vae ñee icavi vae pegua co. Tumpa jecuaeño uyerovia catu jare uyembidoraca ñee icavi vae rupi. Jae umimbeu cheve ñee icavi vae, che amimbeu-yuapi ye vaerã.

Quirã Pablu uyeyocui yandeYa pe

¹² Jare amee yasurupai yandeYa Cristo Jesús pe imbaepuere umee cheve vae re. Jae uicuaaca quirãi chererovia catu. Echa'ã umee cheve ayeyocui vaerã chupe. ¹³ Jucuarãi uyapo, yepe tēi tenonde yave che jae icavi mbae vae yandeYa coti, jare ayapo icavi mbae vae yandeYa re güirovia vae reta pe, jare cherecopochi icoti. Ērei yandeYa cheparareco. Echa'ã apurugüirovia'ã ramo, opaete cua ayapo aicuaa'ã icavi mbae vae ayapo ramo. ¹⁴ Jare yandeYa umee cheve jeta ete ipiacavi. Jae ramiño vi umee cheve mburugüirovia jare mburuau. Echa'ã cua reta yanembae co Cristo Jesús re yarovia vae.

¹⁵ Cua co jae ñee yandepuere yarovia catu vae, jare icavi co opaete vae güirovia vaerã: Cristo Jesús ou cua ivi pe umbiasa vaerã iyoa vae reta, jare che co jae iyoa vae reta güi iyoa ete ye vae. ¹⁶ Ērei cuarã yandeYa cheparareco. Echa'ã che co jae iyoa ete vae ramo, Jesucristo cheparareco yave, jae uicuaaca quirãi jae ipiaguasu tuicha ete co. Jare che co jae penti jaanga rami, ĩru vae reta vi uicuaa vaerã ipuere güirovia jese, jae reta vi güinoi vaerã tecove opa mbae vae. ¹⁷ Yambiadora jaeño mai pegua yanderuvicha guasu opa mbae vae. Jae ndarau etei umano jare mbaeti quía ipuere uecha. Jaeño co Tumpa. Amén.

¹⁸ Cua mbaraviqui re ndoyocui, cherai Timoteo. Echa'ã jucuarãi tenonde yave nemimbeu Tumpa ñee umimbeu vae reta. Nemandúa jocua re, ndepuere vaerã niñerãro cavi icavi mbae vae ndive. ¹⁹ ĩñemimirãta ndepurugüirovia re, jare agüiye iyapo mbae ndicuaa agüiyeta tēi ndiyapo vae. Echa'ã amocue vae uyapo agüiyeta tēi uyapo vae. Jáeramo, uyembopa ipurugüirovia re. ²⁰ Cuarãi uasa Himeneo jare Alejandro. Jáeramo

amaeño'á jese reta uñemiñru vaerã ñru upurugüirovia vae reta ndive. Cua jeco pegua ndarau ndipo jei reta icavi mbae vae Tumpa coti.

2

Umimbeu quirã iyerure vaerã Tumpa pe

¹ Cua rani jae peve: Upurugüirovia vae reta tuyerure Tumpa pe opaete vae re, jare tumee yasurupai Tumpa pe jese reta. ² Jucuarã tuyerure mburuvicha guasu reta re, jare opaete mbaepuere güinoi vae reta re, yaico cavi vaerã vandepiacatu reve, vandepuere vaerã yayeyocui Tumpa pe yambiadora reve. ³ Echa'ã icavi co yayapo vaerã jucuarã, yambiyerovia vaerã Tumpa - jae co yanembiasa vae. ⁴ Jae uipota opaete vae uyembiasaca vaerã jare uicuaa cavi vaerã añete vae. ⁵ Echa'ã ime pentiño Tumpa. Jae ramiño vi ime pentiño ipuere umbipiacatu ivi pegua reta Tumpa ndive vae. Jae co penti cuimbae Cristo Jesús jee vae. ⁶ Jae uñemee umano vaerã, ipuere vaerã uepi opaete vae. Jare Tumpa uicuaaca cua, ara ou ma uvãe yave uicuaaca vaerã. ⁷ Jare yandeYa cheparavo amibeu vaerã cua regua. Jae cheapo jemimondorã, amboe vaerã judío mbae vae reta mburugüirovia añete vae re. Cua che jae peve vae añete vae co. Cheapu'ã etei co.

⁸ Jáeramo aipota cuimbae reta iyerure vaerã Tumpa pe opaete que rupi rupi. Agüiye tuyerure mbochi reve jare mbae umbasi reve. Tuyerure ipia icavi reve. ⁹ Jae ramiño vi cuña reta agüiye tomonde temimonde ipõra ete vae ñru vae reta pe uechaca vaerãño. Agüiye tiyemipia'ã ete temimonde re, ani ía re, ani mbaembae oro pegua vae re jare mbaembae ipõra ete vae re. ¹⁰ Ërei tuyapo icavi vae. Echa'ã amocue cuña reta jei uyapo co Tumpa uipota uyapo vaerã vae. Jáeramo icavi co jocua nunga uyapo vaerã icavi vae. ¹¹ Cuña reta tiqui yemboe pe uñemimichi reve. ¹² Jare ayocui'ã cuña reta oporomboe vaerã jare güinoi vaerã mbaepuere cuimbae reta re. Tiquiño. ¹³ Echa'ã Tumpa uyapo Adán rani jare jaicue rupi uyapo Eva. ¹⁴ Jare Adán itavi'ã. Cuña itavi. Jare itavi ramo, cuña iyoa. ¹⁵ Cuña reta jecuaeño imembita uiporara reve, ñrei Tumpa uepita. Ërei jecuaeño tupurugüirovia jare tupuruau. Tuñeño tee Tumpa peguarã. Jecuaeño tuico cavi.

3

Quirã icavi ico vaerã upurugüirovia vae reta itenondegua

¹ Añete co cua yae vae: Ime yave quía uipota uyeyapo upurugüirovia vae reta itenondeguarã vae, uipota uyapo mbaraviqui icavi vae. ² Jáeramo upurugüirovia vae reta itenondegua tuico cavi, agüiye vaerã quía umbijeco mbae re. Tugüireco pentiño cuña. Tuñemoa ngatu. Jecuaeño tuyapo icavi vae, uyepiua vaerã ñru vae reta pe. Tiquirëi umbiresive vaerã mboupa reta jenta pe. Ticatu toporomboe. ³ Agüiye ticause. Agüiye tiñerãrose. Tiplacavi. Agüiye tijovaichopota. Agüiye tuipota ete corepoti iyupeguarã. ⁴ Toyocui cavi opaete jenta pegua reta. Toyocui cavi isambiai reta, jae reta uyapo vaerã tu jei vae jare uipiu vaerã. ⁵ Echa'ã cuimbae icatu'ã yave oyocui cavi vaerã jenta pegua reta, ndarau etei ipuere uyandareco Tumpa uiparavo vae reta re. ⁶ Jare agüiye tuyeyapo upurugüirovia vae reta itenondeguarã penti cuimbae güirovia ramo yandeYa re vae. Echa'ã jucuarã uyeyapo yave, aramoí uyembicateta, jare ñru vae reta umbijecota icate re, Tumpa umbijeco añã guasu jae uyembicate yave rami. ⁷ Jae ramiño vi upurugüirovia vae reta itenondegua tierãcua cavi, upurugüirovia mbae vae reta imiari cavi vaerã jese. Echa'ã jucuarã'ã yave, aramoí jae reta umbijecota, jare jucuarã upurugüirovia vae reta itenondegua aramoí uñemiamiricata añã guasu pe.

Quirã icavi ico vaerã ñru upurugüirovia vae reta ombori vae

⁸ Jae ramiño vi ñru upurugüirovia vae reta ombori vae reta tuyepiua ñru vae reta pe. Agüiye tipurumbitavise. Agüiye ticause. Agüiye tuipota ete corepoti iyupeguarã. ⁹ Tuicuaa cavi jocua opaete vae pe'ã uyecuaa vae yandepurugüirovia regua, jare agüiye tuyapo mbae uicuaa agüiyeta tõi uyapo vae. ¹⁰ Epirandu rani jese jecocavi ra, jare ñru vae reta uicuaa cavi yave ico cavi co, ipuere uyeyocui Tumpa pe jucuarã. ¹¹ Cua reta jembireco vi tuyepiua ñru vae reta pe. Agüiye tiyapu ñru vae re. Tuñemoa ngatu jare tuico cavi, ñru vae reta ipuere vaerã güirovia catu opaete pe. ¹² ñru upurugüirovia vae reta ombori vae reta tugüireco pentiño cuña, jare toyocui cavi isambiai reta jare opaete

jenta pegua reta. ¹³ Echa'ã cua reta uyeyocui cavi yave Tumpa pe, uyepiua ñru vae reta pe, jare ipuere imiari uquiye mbae reve mburugüirovia güinoi Cristo Jesús re vae re.

Uyecuaa yandevae vae

¹⁴ Chepia pe ayemingueta imambaeño aa vaerã ndepi. Ërei cua mbaembae re aicutã ndeve, ¹⁵ ndicuaa vaerã quirãita ndico Tumpa jentarã reta ndive - jae reta co Tumpa imeño mai ico vae uiparavo vae reta - jae reta ñnemimirãta añete vae re jare uicuaaca ñru vae reta pe añete vae. Echa'ã aramoí apitata ima cua pe. ¹⁶ Añete co, ñanemiapiacañi ete cua yandevaeño uyecuaa vae. Echa'ã yande yayeyocui Tumpa pe.

Tumpa uyeyapo cuimbaerã.

Espíritu Santo uicuaaca jae co jupi vae.

Ángel reta uecha.

Jerãcua opaete ivi pegua reta pe.

Ivi pegua reta güirovia jese.

Jare Tu umbiresive ye ara pe.

4

Umimbeu yarovia vae güi uyerovata vae reta

¹ Jare Espiritu Santo umimbeu yandevae quirã ara reta taicuegua vae pe amocue vae uyerovata yarovia vae güi. Jae reta güiroviata aña upurumbitavi vae reta jare moromboe reta añe reta uipota güirovia vaerã vae. ² Oporombocua reta yave, iyaputa upurumbitavi vaerã. Jare ndarau ipiatiti jese, ipiatanta ramo. ³ Oyoziata ñru vae reta agüiye vaerã umenda, jare oyopiatã ñru vae reta agüiye vaerã jou mbae nunga tembú, yepe tẽi Tumpa uyapo yandevae tembú yau vaerã yasurupai ñamee reve chupe. Echa'ã yande yarovia Tumpa jare yaicuaa ma añete vae. ⁴ Echa'ã opaete mbaembae Tumpa uyapo vae icavi co. Agüiye ñarĩro mbae nunga tembú. Icavi co yau vaerã yasurupai ñamee reve Tumpa pe. ⁵ Echa'ã ñeño tee co yau vaerã Tumpa ñee jare yerure rupi.

Jesucristo pe uyeyocui cavi vae

⁶ Nemimandúa yave yanderivi reta cua mbaembae re, ndiyeyocui cavi co Jesucristo pe. Jecuae ñnemimirãta ñee yarovia vae reta re jare moromboe añete vae regua re. Echa'ã cua reta re jecuaeño ndico. ⁷ Ërei agüiye erovia aracae ndaye vae reta. Ërei ñemiatangãtu ndiyapo vaerã Tumpa uipota yayapo vaerã vae. ⁸ Echa'ã yanderete yamungúe yave, michi peguaño icavi yandevae. Ërei ñañemiatangãtu yave yayapo vaerã Tumpa uipota yayapo vaerã vae, jecuaecuae icavi ete yandevae. Echa'ã icavi yandevae cua ivi pe yaico rambueve, jare icavita vi yandevae Tumpa ndive ma yaico yave. ⁹ Cua co ñee yandepuere yarovia catu vae, jare icavi co opaete vae güirovia vaerã. ¹⁰ Echa'ã cuarã yaparaviqui ñaĩ yaiporara reve, Tumpa imeño mai ico vae re yarovia ramo. Jae co opaete vae umbiasa vae. Jae umbiasa güirovia jese vae reta.

¹¹ Cua mbaembae re eporoyocui jare eporomboc. ¹² Agüiye quã tanereriño ndetairusu ramo. Ërei jecuaeño nde rani ico cavi, ñru upurugüirovia vae reta uicuaa vaerã quirã icavi co jae reta vi yugüireco vaerã. Jáeramocua jecuaeño nemiari icavi vae re. Jecuaeño iyapo icavi vae. Jecuaeño epuruau. Jecuaeño erovia Tumpa. Agüiye iyapo mbae pichĩ vae. ¹³ Che aa avã ndeve regua, jecuaeño ñemiatangãtu nemingueta vaerã Tumpa ñee ñru vae reta pe, jare ndepurumbiaracuaa vaerã, jare ndeporomboc vaerã. ¹⁴ Jecuaeño ñemiatangãtu ndiporu vaerã mbaepuere Tumpa umee ndeve vae. Echa'ã ñemee ndeve Tumpa ñee umimbeu vae reta jei rami, upurugüirovia vae reta itenondegua reta oñoño yave ipo nderé.

¹⁵ Jecuaeño iyandareco cavi cua mbaembae re opaete ndepia reve, uyecuaa vaerã opaete vae pe quirã icavi ete co ndiyemboe neĩ. ¹⁶ Ñemoa ngatu ndico cavi vaerã jare ndeporomboc cavi vaerã. Jecuaeño ñemiatangãtu jese reta. Echa'ã jucuarã ndiyapo yave, ndiyerepicata jare ndeepicata vi uyapisaca nderé vae reta.

5

Quirã umbiaracuaa vaerã ñru upurugüirovia vae reta

¹ Agüiye inēengata cuimbae indechi vae reta pe. Ērei embiaracuaa, penti cuimbae umbiaracuaa tu rami. Jare embiaracuaa cuimbae tairusu vae reta, penti cuimbae umbiaracuaa tivi rami. ² Embiaracuaa cuña ucuacuaa vae reta, penti cuimbae umbiaracuaa ichi rami, jare embiaracuaa cuñatai reta, penti cuimbae umbiaracuaa jindi rami. Agüiye ndepia pe iyemingueta icavi mbae vae jese reta.

³ Embori ime umano vae reta mbaeti etei güinoi yave quía ombori vaerā. ⁴ Ērei ime umano vae ime yave güinoi imembi reta ani jamariro reta, jae reta rani tombori, uicuaaca vaerā uyeyocui co Tumpa pe. Echa'ā ime umano vae jae reta jentarā co. Jucuarāi tuyapo reta ombori vaerā ichi jare iyari. Echa'ā jucuarāi uyapo yave, umbiyerovia Tumpa. ⁵ Ērei penti ime umano vae mbaeti etei güinoi quía ombori vaerā vae co jae penti añetete ime umano vae. Jae güirovia Tumpa, jare jecuaeño uyerure chupe pítu rupi jare ara rupi. ⁶ Ērei ime umano vae ueca yave jete umbiyerovia vaerāño, uyeyocui'ā etei Tumpa pe, penti umanocue vae ipuere'ā etei uyeyocui ĩru vae pe rami. ⁷ Jáeramo cua mbaembae re iyocui upurugüirovia vae reta, agüiye vaerā quía umbijeco reta mbae re. ⁸ Ērei ime yave penti upurugüirovia vae uyandareco'ā jenta pegua reta re jare ĩru jentarā reta re vae, upurugüirovia mbae vae echa. Jeta upurugüirovia mbae vae reta uyapo cavi ete chugüi. Echa'ā jae reta yandareco jenta pegua reta re jare ĩru jentarā reta re.

⁹ Agüiye emiiru ime umano vae ĩru ime umano vae reta ndive ndei sesenta año güinoi mbove. Sesenta año güinoi yave ramo emiiru jae reta ndive mbaeti yave imegua, ¹⁰ jare ĩru vae reta umierācua yave icavi vae uyapo vae, jare uyandareco cavi yave sambiai reta re, jare umingaru yave jenta pe opou vae reta, jare uyeyocui yave uñemimichi reve ĩru uñeño tee Tumpa peguarā vae reta pe, jare ombori yave uiporara vae reta, jare uñemiatangātu yave uyapo vaerā icavi vae.

¹¹ Ērei agüiye emiiru tairusu ime umano vae reta ĩru ime umano vae reta ndive. Echa'ā cua nunga uipota ye yave cuimbae, uipota'ā ma uyeyocui Cristo pe ĩru ime umano vae reta uyeyocui chupe rami. Uipotano umenda. ¹² Jáeramo güinoi teco. Echa'ā uyapo'ā ma tenonde yave jei uyapo vaerā upurugüirovia vae reta pe vae. ¹³ Jae ramiño vi iyaqui uyeyapo jare opou reño. Jae ramiño vi uyemingueta japicha re jare ĩru vae iparaviqui re iyurungueta. Imiari mbaembae agüiyeta tēi imiari jese vae re. ¹⁴ Jáeramo aipota tairusu ime umano vae reta umenda ye vaerā. Icavi co imembi vaerā jare uyandareco cavi vaerā jenta pegua reta re. Agüiye tuyapo mbae icavi mbae vae, agüiye vaerā oyovaicho Cristo ndive vae ipuere umbijeco mbae re. ¹⁵ Echa'ā amocue vae uyerova ma uyapo vaerā Satanás uipota uyapo vaerā vae.

¹⁶ Penti cuña upurugüirovia vae jentarā ime umano yave, upurugüirovia vae tombori ime umano vae, agüiye vaerā ime umano vae uyeco ĩru upurugüirovia vae reta re jae reta ombori vaerā, jae reta ipuere vaerā ombori ĩru ime umano vae reta mbaeti etei jentarā güinoi ombori vaerā vae.

¹⁷ Jupi co upurugüirovia vae reta itenondegua Tumpa iparaviqui uyapo cavi vae reta uyepiucua vaerā jare ĩru reta umbiepi vaerā chupe reta. Jae ramiño vi jupi co upurugüirovia vae reta itenondegua Tumpa inēe umimbeu jare oporomboe vae reta uyepiucua ete vaerā jare ĩru reta umbiepi vaerā chupe reta. ¹⁸ Echa'ā Tumpa inēe pe uyecuatía oĩ cuarāi: “Güeye trigo umbipiriri oĩ yave, agüiye iyuruyocua.” Jare: “Jupi co umimbaraviqui vae umbiepi vaerā uparaviqui vae pe mbaraviqui uyapo vae.” Cuarāi uyecuatía oĩ.

¹⁹ Ime yave quía penti upurugüirovia vae reta itenondegua mbae re umbijeco vae, agüiye iyapisaca jese ipuere'ā yave imiari mocui ani mbapi uicuaa cavi jeco regua vae. ²⁰ Iyoa vae reta pe ere iyoa co opaete vae jovaque, ĩru vae reta uquiye vaerā mbaeyoa uyapo. ²¹ Che ndoyocui Tumpa jare yandeYa Jesucristo jare ángel reta Tumpa uiparavo vae jovaque: Cua mbaembae jecuaeño iyapo, jare agüiye eau penti vaerā ĩru vae güi. Oyovaque reve iyapo opaete vae pe. ²² Agüiye ndeapura iyapo vaerā upurugüirovia vae reta itenondeguarā, agüiye vaerā niñemiiru ĩru cuimbae reta ndive imbaeyoa reta re. Agüiye iyapo mbae pichii vae.

²³ Imeño nderie pe nembraerasi. Cua jeco pegua vino jeu michi michi nepoarā. Agüiye ĩno jeu.

²⁴ Amocue vae imbaeyoa reta tenonde voi uyecuaa cavi jare uicuaaca quirāi uñeāacata co. ĩru vae reta imbaeyoa reta uyecuaata taicue rupi. ²⁵ Jae ramiño vi icavi vae amocue

vae uyapo vae tenonde voi uyecuaa cavi, jare icavi vae añave uyecuaa mbae vae vi uyecuaata co.

6

¹ Opaete uyeyocui patrón pe vae reta tuiptu ipatrón, agüiye vaerã ñru vae reta jei icavi mbae vae Tumpa coti jare yandeporomboe coti. ² Jare ipatrón upurugüirovia yave, chupe uyeyocui vae reta agüiye tugüiro. Echa'a aramoi ipia pe uyeminguetata güiro vaerã, ipatrón vi upurugüirovia ramo. Ërei uyeyocui vae reta tuyeyocui cavi ipatrón pe. Echa'a ipatrón vi güirovia yandeYa re, jare yandeYa uau. Jare icavi eteta co ipatrón pe, jembicui reta uparaviqui cavi yave chupe. Cua mbaembae re eporomboc jare epurumbiaracuaa.

Yayeyocui Tumpa pe yandepiacatu reve

³ Aramoi ñru vae oporomboeta ambie moromboe re, jare ndarau güirovia moromboe añete vae, yepe tẽi moromboe añete vae co jae yandeYa Jesuscristo regua. Echa'a jocua moromboe añete vae yanemboe quirã yayeyocui vaerã Tumpa pe. ⁴ Ërei jocua nunga oporomboc vae ueymbiccate co, jare uicuaa'a mbae ave. Echa'a jecuaño uyeaca. Jare cua icavi'a co. Jáeramo ñacataã, jare jovaichopota, jare jei icavi mbae vae, jare jei quirã ñru vae reta uyapo icavi mbae vae. ⁵ Jocua nunga uyeacaiño mbae icavi mbae vae re. Ipiayemingueta jupi'a co. Jae reta uicuaa'a etei añete vae. Ipiã pe uyemingueta tẽi ipuere uyeyocui Tumpa pe icocatu vaerã. Agüiye ñnemũru jocua nunga ndive. ⁶ Ërei yayeyocui yave Tumpa pe, icavi ete co yandave, yaico yave yandepiacatu reve. ⁷ Echa'a yaa yandesĩ güi yave, mbaeti etei mbae yaru. Jae ramiño vi ñamano yave, ndarau etei mbae yaraa. ⁸ Jáeramo ñanoi yave añave yanderembiurã jare yanderemimonderã, yaico yandepiacatu reve. ⁹ Ërei yavai'a uipota icocatu vae reta iyoa vaerã. Yavai'a aña guasu uyavica chupe reta vaerã. Jáeramo jae reta ipia pe uyemingueta cavi mbae reve uipota ete jeta mbaembae icavita'a etei chupe reta vae. Echa'a jocua nunga mbaembae pe uñemicañitei reta. ¹⁰ Echa'a corepoti uipota ete vae uyapo opaete mbaembae icavi mbae vae. Jare amocue vae uipota ete icocatu ramo, uyembopia mburugüirovia yandeYa regua güi, jare umbieta tẽi jucuarã uyapo ramo.

Tanta eparaviqui Tumpa pe

¹¹ Ërei nde co jae cuimbae Tumpa pe uyeyocui vae. Jáeramo agüiye etei iyapo jucuarã. Ërei ipota ete ndiyapo vaerã jupi vae jare ndiyeyocui vaerã Tumpa pe. Jae ramiño vi ipota ete mburugüirovia, jare mburuau, jare mbiaguasu, jare ñemimichi. ¹² Jecuaño eparaviqui tanta ndiporara reve yarovia vae re. Ico cavi yandeYa ndive, echa'a jae umee yandave tecove opa mbae vae. Echa'a cuarã Tumpa ndeparavo. Jare nemimbeu cavi ma ndepurugüirovia jeta uyapisaca nderé vae reta pe. ¹³ Cua re co che ndoyocui Tumpa jee re. Echa'a jae umee tecove opaete pe. Ndoyocui vi jese Cristo Jesús jee re. Echa'a jae umimbeu cavi añete vae regua Poncio Pilato jovaque. ¹⁴ Jecuaño iyapo cua che ndoyocui jese vae. Jucuarã ndiyapo yave, ndarau mbae icavi mbae vae ndiyapo, jare ndarau quía ipuere nembijeco mbae re, yandeYa Jesucristo ou ye regua. ¹⁵ Echa'a ara ou uvãe yave, Tumpa uechacata co yandeYa Jesucristo. Tumpa jecuaño uyerovia catu. Jaeño co opaete vae iYa. Jae co mburuvicha guasu mbaepuere tuicha ete vae güinoi vae. Jae imbaepuere tuicha ete co opaete ñru mburuvicha guasu reta imbaepuere güi. Jae co opaete ivi pegua reta iya reta iYa. ¹⁶ Jaeño co umano mbae vae. Jae ico tembipe oĩ vae pe. Mbaeti quía ipuere oya jocua tembipe re. Mbaeti etei quía uecha Tumpa, jare mbaeti etei quía ipuere uecha. Tuyembiadoraca Tumpa jaeño mai pegua. Imbaepuere tuicha ete co. Amén.

¹⁷ Iyocui cua ivi pegua mbaembae re icocatu vae reta agüiye vaerã ticate iyee iparavete vae reta güi, jare agüiye vaerã uyeco icorepoti re. Echa'a aramoi imbaembae opa. Ërei tuyeco Tumpa imeño mai ico vae re. Echa'a jae umee yandave opaete mbaembae yayerovia vaerã. ¹⁸ Jare iyocui vi tuyapo icavi vae. Echa'a jucuarã yave, icocatuta co Tumpa coti icavi vae uyapo vae re. Jecuaño tiquirẽi umee vaerã güinoi vae güi ñru vae reta pe, ombori reta vaerã. ¹⁹ Echa'a jucuarã uyapo yave, güinoita mbae icavi vae opa mbae vae ara outa vae reta peguarã, jare güinoita tecove opa mbae vae.

²⁰Timoteo, jecuaeño iyandareco cavi jocua uñemee ndeve ndiyandareco vaerã jese vae re. Agüiye iyapisaca ndaye reta re. Echa'ã jei vae mbae'ã co. Agüiye erovia Tumpa ndive oyovaicho vae reta jei tēi uicuaa cavi vae. Echa'ã uicuaa'ã co mbae. ²¹Echa'ã amocue jei tēi uicuaa cavi vae uyembopia yarovia vae güi.

Tumpa tumee ndeve ipiacavi. Amén.

SEGUNDA CARTA DEL APOSTOL SAN PABLO A TIMOTEO

¹ Che co jae Pablo. Che co jae Jesucristo jemimondo Tumpa jei vae rupi. Echa'ã cheparaviqui jae co amimbeu vaerã quirã Tumpa jei umee vaerã tecove opa mbae vae opaete Cristo Jesús re güirovia vae reta pe. ² Aicutia cua tupapire ndeve, Timoteo. Echa'ã nde co jae cherai aau ete vae. YandeRu Tumpa jare yandeYa Cristo Jesús tumee ndeve ipiacavi jare ipurupareco jare ipiacatu.

Cristo regua umimbeu ñru vae reta pe

³ Jecuaeño chemandúa nderé pïtu rupi jare ara rupi ayerure Tumpa pe yave. Jáeramo amee yasurupai Tumpa pe. Ambiadora Tumpa, chetenondegua reta umbiadora rami. Jare jucuarai ayapo yave, ayapo'ã mbae aicuaa agüiyeta tã ayapo vae. ⁴ Aipota ete nduecha, ayerovia ete vaerã. Echa'ã chemandúa quirã oremondo peï yave nderesai nemombo vae re. ⁵ Chemandúa vi ndepurugüirovia añetete vae re. Ndiyar Loida jare ndesi Eunice rani güinoi jocua mburugüirovia, jare aicuaa cavi nde vi co nenoi.

⁶ Jáeramo turumimandúa cua re. Ñemiatangātu jocua mbaepuere Tumpa umee ndeve vae re ndiyapo vaerã iparaviqui. Echa'ã uñemee co ndeve chepo añono nderé yave. ⁷ Tumpa umee yandeve Espíritu Santo ñanoi vaerã mbaepuere, jare yapuruau vaerã, jare ñañemoa vaerã, agüiye vaerã yaquiyee mbaembae güi. ⁸ Jáeramo agüiye nemara nemimbeu vaerã yandeYa regua. Agüiye vi nemara chereco pegua. Echa'ã che aico cua peresoriru pe yandeYa pe ayeyocui ramo. Ërei iporaraño che aiporara rami ñee icavi vae jeco pegua. Echa'ã Tumpa umee yandeve mbaepuere, yaiporara yave. ⁹ Tumpa yanembiasa jare yandeparavo ñañeño tee vaerã iyupeguarã. Yandeparavo'ã co mbae icavi vae yande yayapo vae jeco pegua. Yandeparavo co jae jei vae rupi jare ipiacavi rupi. Echa'ã ipiacavi yandeve Cristo Jesús rupi ndei ivi uyeyapo mbove. ¹⁰ Cristo Jesús ou cua ivi pe yanembiasa vaerã. Jocua rupi Tumpa añave uicuaaca yandeve ipiacavi. Echa'ã Cristo Jesús umbai mano imbaepuere, jare uicuaaca quirã yandepuere ñanoi tecove opa mbae vae. Jare cua yamimbeu ñee icavi vae rupi.

¹¹ Tumpa cheparavo amimbeu vaerã ñee icavi vae. Jae umee cheve aico vaerã Jesucristo jemimondorã, jare aporomboe vaerã jese. ¹² Jáeramo aiporara aï. Ërei chemara'ã. Echa'ã aicuaa arovia co Cristo re, jare aicuaa vi jae ipuere uñuvatu cheve che amee chupe uñuvatu vaerã vae jocua ara ou uvãe regua.

¹³ Jecuaeño eporomboe moromboe añete vae re. Echa'ã jocua re che nomboe. Jare jecuaeño enoi mburugüirovia jare mburuau Cristo Jesús umee yandeve vae. ¹⁴ Tumpa umee ndeve mbaepuere. Jecuaeño iporu jocua mbaepuere ndiyeyocui cavi vaerã chupe Espíritu Santo rupi. Echa'ã Espíritu Santo ico yandepia pe.

¹⁵ Ndicuaa ma co quirã opaete Asia pegua reta usiri chegüi. Cua reta ipite pegua co jae Fígelo jare Hermógenes. ¹⁶ YandeYa tuiparareco Onesiforo jenta pegua reta. Echa'ã Onesiforo jeta vese chembiyerovia, jare imara'ã opou vaerã chepi, yepe tã aico peresoriru pe. ¹⁷ Añete co, Roma pe ou uvãe rupive, chereca opaete que rupi chevãe regua. ¹⁸ YandeYa tumaño tugüinoi ipurupareco jocua ara ou uvãe yave. Echa'ã nde etei ndicuaa catu quirã jeta ete uyeyocui cheve Efeso pe.

2

Jesucristo pegua sundaro icavi vae

¹ Jáeramo, cherai, ñemimirãta mbiacavi Cristo Jesús umee yandeve vae rupi. ² Jeta mbaembae re aporomboe jeta vae jovaque. Jocua mbaembae ndiyandu vae re emboe cuimbae nderovia catu vae reta, jae reta vi ipuere vaerã omboe-yuapi ye jese ñru vae reta.

³ Iporara che aiporara rami. Echa'ã uiporara co Cristo Jesús isundaro reta. ⁴ Jare penti sundaro oo uñerãro vaerã vae mbaeti uyemipia'ã etei mbaembae cua ivi pegua re, umbiyerovia vaerã uiparavo sundarorã vae. ⁵ Jae ramiño vi uñeñoociñocui vae, osi'ã yave oporombosi vae reta jei vae rupi, ipuere'ã etei güinoi upurumbisipe vae pe uñemee vae. ⁶ Jae ramiño vi co pe uparaviqui vae rani uipisita uyeaviro vae. ⁷ Jecuaeño ndepia

pe iyemingueta che jae ndeve vae re. Jare yandeYa tumee ndeve aracuaa ndicuaa cavi vaerã opaete.

⁸ Jesucristo co jae David inẽmoña pegua. Imandúa quirã jae etei icove ye ou umanocue vae reta ipite güi. Jae umee cheve cua ñee icavi vae amimbeu vaerã. ⁹ Jare ñee icavi vae amimbeu ramo aiporara aĩ. Echa'ã cheño peresoriru pe icavi mbae vae uyapo vae rami. Ērei mbaeti quía ipuere oñoño Tumpa inee peresoriru pe. ¹⁰ Járamo opaete aiporara chepiaguasu reve Tumpa uiparavo vae reta jeco pegua, jae reta vi güinoi vaerã yembiasa Cristo Jesús rupi, jare güinoi vaerã vi yembutuicha opa mbae vae.

¹¹ Cua co jae ñee yandepuere yarovia catu vae:

“Jae ndive ñamano yave,
jae ndive yaicove yeta vi.

¹² Yandepiaguasu reve yaiporara yave, jae ndive yaporoyocuita vi.

Yaicuacu yave, jae vi yandecuacuta.

¹³ Yepe tẽi yarovia'ã, ěrei jae jecuaeño uyapo jei vae.

Echa'ã jae jei yave mbae uyapota, uyapota co.”

Uparaviqui cavi Tumpa pe vae

¹⁴ Emimandúa reta cua mbaembae re, jare iyocui reta yandeYa jee re agüiye vaerã uyeaca reta ñee reta re. Echa'ã jucuarã uyeaca yave, ndarau etei icavi chupe reta, jaño ombopata uyapisaca jese vae reta. ¹⁵ Inemiatangātu ndeporombocue cavi vaerã ñee añete vae umimbeu yandevae vae, Tumpa uicuaa vaerã icavi co ndeparaviqui. Jucuarã yave, ndarau nemara ndeparaviqui jeco pegua. ¹⁶ Ērei agüiye uyapisaca ndaye reta re. Echa'ã jei vae mbae'ã co. Jare ndaye reta re imiari vae reta uyapota jeta mbaeyoa reta. ¹⁷ Jare jae reta iporombocue uñemaita mbaerasi yanderete pe uñemai vae rami. Cua reta ipite pegua co jae Himeneo jare Fileto. ¹⁸ Jae reta uyavi añete vae. Echa'ã jei tẽi uasa ma co ara upurugüirovia vae reta icove ye vaerã ou umanocue vae reta ipite güi. Jare jucuarã jei ramo, amocue vae uicuaa'ã mbae güirovia vaerã. ¹⁹ Ērei Tumpa jei vae añete co uyepipica'ã etei. Yaicuaa cua Tumpa inee pe uyecuatía oĩ vae rupi. Echa'ã uyecuatía oĩ cuarã: “YandeYa uicuaa imbae reta.” Jare: “Penti penti che co jae Cristo imbae jei vae agüiye tuyapo jupi mbae vae.” Jucuarã uyecuatía oĩ.

²⁰ Ērei penti tenta tuicha vae pe ime plato reta oro pegua jare corepoti pegua. Jae ramiño vi ime plato reta ivira pegua jare ñaeu pegua. Jare iya uiporu amocue, plato ipõra vae reta uipota yave, jare uiporu iru reta, plato ipõra mbae vae uipota yave. ²¹ Jae ramiño vi yaeya yave icavi mbae vae, yandeYa ñaneño teeta iyupeguarã, ipuere vaerã yandeporu, tenta tuicha vae iya plato ipõra vae reta uiporu rami. Jare jucuarã yave, yandeYa ipuereta yandeporu ipotave mbae icavi vae yayapo vaerã.

²² Agüiye etei iyapo mbaembae icavi mbae vae tairusu vae reta uipota uyapo vae. Ērei ipota ete ndiyapo vaerã jupi vae. Jae ramiño vi ipota ete mburugüirovia, jare mburuau, jare mbiacatu. Jare inemĩru uyerure yandeYa pe ipia iquía mbae reve vae reta ndive.

²³ Ērei agüiye iyeaca iyaracuaa mbae vae reta ndive. Echa'ã jae reta uicuaa'ã etei uyeaca jese vae. Jare nde ndicuaa quirã uyeaca yave uyupii, umbipi uñerãro uyupii. ²⁴ Jare icavi'ã co yandeYa pe uyeyocui vae uñerãro vaerã. Tipiacavi opaete vae pe. Ticatu oporombocue vaerã. Tipiaguasu. ²⁵ Tomboe uñemimichi reve oyovaicho jae ndive vae reta. Echa'ã aramoi Tumpa umaeñota jese reta ueya vaerã ipiyemingueta icavi mbae vae jare uicuaa vaerã añete vae, ²⁶ jare uñemoa vaerã, oyepe vaerã aña guasu güi. Echa'ã maemimba yaipisi ñuai pe rami, aña guasu uipisi reta, jae reta uyapo vaerã aña guasu jei vae.

3

Ara taicuegua reta pe uyeyapota vae

¹ Icuua catu cua vi: Ara taicuegua reta pe yavai eteta co yaico cavi vaerã. ² Upurugüirovia mbae vae reta jaño uyerauta. Uipota eteta reta corepoti. Uyembicateta jae reta uyapo vae re. Uyembicateñoita. Jeita icavi mbae vae Tumpa coti. Ndarau uyapo tu jare ichi jei vae. Ndarau umee yasurupai mbae re. Ndarau uyeyocui Tumpa pe. ³ Ndarau upuruparareco. Ndarau umbiasa japicha reta. Iyaputa japicha re. Ndarau uñemoa. Jovachopotata. Umitarẽita icavi vae uyapo vae reta. ⁴ Umbitavita japicha reta. Uyapota

mbaembae ipia pe uyemingueta mbae reve. Uyererovia catu eteta. Tumpa uau vaerãve, uipota eteta uyembiyerovia. ⁵Uyapota mbaembae ñru vae reta ipia pe uyemingueta vaerã tẽi jese jae reta uyeyocui co Tumpa pe. Ërei ndarau güinoi Tumpa imbaepuere. Agüiye inẽñĩru jocua nunga ndive.

⁶Jocua nunga cuimbae reta oo ñru vae jenta pe, jare umbitavi cuña reta iyaracuaa mbae vae. Jocua nunga cuña reta iyoo ete, jare jeta mbae icavi mbae vae uipota uyapo ramo, uyembopa. ⁷Jecuaño uipota uyemboe mbaembae re, ãrei ndarau etei ipuere uicuaa añete vae. ⁸Jare ipaye vae reta Janes jare Jambres jee vae oyovaicho Moisés ndive rami, jocua nunga cuimbae reta vi oyovaicho añete vae ndive. Pichĩ vae reño ipia pe uyemingueta. Jae reta'ã co upurugüirovia vae añetete vae reta. ⁹Ërei ndarau ipuere jecuaño upurumbitavi. Echa'ã uyecuaata opaete vae pe quirã jae reta iyaracuaa mbae vae co, jucuarã Janes jare Jambres uyecuaa rami.

Pablo oyocui Timoteo

¹⁰Ërei nde ndicuaa catu co cheporomboe, jare quirã che aico, jare aipota ayapo Tumpa pe vae, jare chepurugüirovia, jare quirã chepiaguasu aiporara reve, jare chepurauu, ¹¹jare quirã aiporara ñru vae reta uyapo icavi mbae vae cheve yave Antioquia pe jare Iconio pe jare Listra pe. Ërei yandeYa cherepi opaete aiporara vae güi. ¹²Añete co, opaete Cristo Jesús re güirovia vae reta uipota uyeyocui Tumpa pe vae pe uyapota icavi mbae vae ñru vae reta. ¹³Jare icavi mbae vae uyapo vae reta jare upurumbitavi vae reta jeta ete icavi mbae vae uyapota. Jae reta umbitavita ñru vae reta jare uyembitavita vi.

¹⁴Ërei nde jecuaño eporomboe ndiyemboe jese vae re. Echa'ã ndicuaa catu jocua moromboe añete co. Jare ndicuaa catu vi quã co nemboe jese, ¹⁵jare quirã nemichi güiive ndicuaa Tumpa re uyecuatã oĩ vae. Echa'ã jocua ipuere nembiaracuaa, ndiyembiasaca vaerã mburugüirovia Cristo Jesús regua rupi. ¹⁶Opaete Tumpa inee pe uyecuatã oĩ vae Tumpa co umimbeu, jare icavi co yandeve. Echa'ã uyecuatã oĩ vae rupi yaicuaa mbae nunga moromboe añete vae jare mbae nunga moromboe añete mbae vae. Umimbeu yandeve yayavi yave, jare yandepuere yayemboe jupi vae re. ¹⁷Jucuarã yande yayeyocui Tumpa pe vae yandepuere yaicuaa opaete Tumpa uipota yaicuaa vaerã vae, jare yandepuere yayapo opaete mbae icavi vae.

4

Emimbeu ñee icavi vae

¹Jáeramo che ndoyocui cua re, Tumpa jare yandeYa Jesucristo jee re. Echa'ã yandeYa Jesucristo uãata ime ñugüinoi vae reta jare umanocue vae reta jae ou ye yave oporoyocui vaerã. ²Emimbeu Tumpa inee. Jecuaño inemiatangãtu opa ara rupi. Icuaca iyoo vae pe imbaeyoa, jare embieta chupe jese. Epurumbiaracuaa jare eporomboe ndepiaguasu reve. ³Echa'ã outa ara reta uvãe agüiye vaerã ivi pegua reta uipota uyapisaca moromboe añete vae re. Ërei jei vae reño uecata reta jeta eporomboe vae reta, uyemboe vaerã chugüi reta mbae uipota uyapisaca jese vae reño. ⁴Jare ndarau uipota uyapisaca añete vae re. Ërei uipotata uyapisaca araca vae ndaye reta re. ⁵Ërei jecuaño inemoa ngatu. Agüiye neatẽi ndiporara vaerã. Inẽño nonemimbeu vaerã ñee icavi vae. Iyapo opaete ndiyeyocui vaerã Tumpa pe.

⁶Jecuaño ayeyocui Tumpa pe, jare añave aicavi ma aĩ amano vaerã. Echa'ã coiño ma ou amano vaerã. ⁷Che aparaviqui tanta aiporara reve. Opa ma ayapo Tumpa umee cheve ayapo vaerã vae. Jecuaño añemimirãta yarovia vae re. ⁸Jaeño ma. Uñeñuvatu ma oĩ cheve penti corona jupi vae pegua. Jare yandeYa umeeta cheve penti corona jocua ara. YandeYa co jae upuruãa jupi vae rupi vae. Jare umeeta vi jocua nunga corona opaete uãro ñugüinoi ivãe ara re vae reta pe - cheveño'ã co.

Pablo oyocui Timoteo

⁹Inemiatangãtu imambae ndeyu vaerã chepi. ¹⁰Demas oo ma chegüi Tesalónica coti, jae uau ete mbaembae cua ivi pegua ramo. Crescente vi oo Galacia coti, jare Tito oo Dalmacia coti. ¹¹Jaeño Lucas upita che ndive. Eeca Marcos nderu vaerã nderupie. Echa'ã jae ipuereta chembori Tumpa iparaviqui pe. ¹²Amondo ma Tíquico Efeso pe. ¹³Aeya chesaco Troas pe Carpo jenta pe. Ndeyu yave chepi, eru cheve. Eru libro reta vi jare tupapire reta. Agüiye neacañi tupapire reta güi.

¹⁴ Alejandro mbaembae fierro pegua uyapo vae uyapo jeta icavi mbae vae cheve. YandeYa tumbiepi chupe uyapo vae re. ¹⁵ Nde vi iñemoa chugüi. Echa'ã jae oyovaicho ete yande ndive, ñaniñee güirovia'ã ramo.

¹⁶ Tenonde uñeapo reta cheré yave, chembori'ã quía. Quiave upita'ã che ndive. Ayerure Tumpa pe agüiye vaerã jae umbijeco reta jese. ¹⁷ Ërei yandeYa chembori jare chemimirãta, amimbeu cavi vaerã ñee icavi vae opaete vae pe, jare opaete judío mbae vae reta uyandu vaerã. Jucuarãi yandeYa cherepi, penti cuimbae uyerepi yaguapãta iyuru güi rami. ¹⁸ Jare yandeYa cherepita opaete icavi mbae vae güi, jare chereraata ara pe iporoyocua pe. YandeYa tuyembadoraca jaeño mai pegua. Amén.

Saludo reta

¹⁹ Tumpa ndiveño toĩ Priscila jare Aquila, jare Onesíforo jenta pegua reta. ²⁰ Erasto upita Corinto pe. Ërei aeya Trófimo Mileto pe. Jae imbaerasi oĩ ayu joco güi yave. ²¹ Iñemiatangātu ndeyu vaerã chepi ndei roi iara ou uvã mbove. Eubulo, jare Pudente, jare Lino, jare Claudia, jare opaete ñru upurugüirovia vae reta jei peve Tumpa ndiveño peĩ.

²² YandeYa Jesucristo toĩ nde ndive. Tumee ipiacavi peve. Amén.

LA CARTA DEL APOSTOL SAN PABLO A TITO

¹ Che co jae Pablo. Ayeyocui Tumpa pe. Echa'a che co jae Jesucristo jemimondo. Jae chemondo Tumpa uiparavo vae reta pe güirovia vaerã jese, jare uicuaa vaerã añete vae, uyeyocui vaerã Tumpa pe, ² jare uãro vaerã uyerovia reve tecove opa mbae vae. Echa'a Tumpa ipuere'a etei iyapu, jare jae jei ndei ivi uyeyapo mbove umee vaerã yandeve tecove opa mbae vae. ³ Ërei uicuaaca iñee jae uipota ma yave che amimbeu vae rupi. Echa'a Tumpa co jae yanembiasa vae, jare umee cheve iñee amimbeu vaerã iporoyocui rupi. ⁴ Aicuatía cua tupapire ndeve, Tito. Nde co jae cheraí añetete vae yandepurugüirovia re. YandeRu Tumpa jare yandeYa Cristo Jesús yanembiasa vae tumee ndeve ipiacavi, ipuruparareco jare ipiacatu.

Tito iparaviqui Creta pe

⁵ Che ndueya Creta pe nde ndiyapicatu vaerã opaete uata uyeyapicatu vaerã vae, jare niñoño vaerã upurugüirovia vae reta itenondegua retarã tenta guasu-rai-rai rupi che ndoyocui rami. ⁶ Upurugüirovia vae reta itenondegua tuico cavi, agüiye vaerã quía umbijeco mbae re. Tugüireco pentiño cuña. Isambiai reta tupurugüirovia, jare agüiye tuyapo icavi mbae vae, jare jecuaeño tuyapo tu jare ichi jei vae. Echa'a jucuarãi yave, ndarau quía umbijeco reta. ⁷ Upurugüirovia vae reta itenondegua uyeyocui Tumpa pe. Jáeramo tuico cavi, agüiye vaerã quía umbijeco mbae re. Agüiye tuyembicate. Agüiye tipiarai. Agüiye ticause. Agüiye tijovaichopota. Agüiye tuiopota ete corepoti iyupeguarã. ⁸ Ërei tiquirëi tumingaru opou ipi vae reta. Icavi vaeño tuyapo. Tuñemoa. Tuyapo jupi vae. Tuyeyocui cavi Tumpa pe. ⁹ Tuñemiatangātu ñee yandepuere yarovia catu vae re. Echa'a jese uyemboe. Jucuarãi yave, ipuereta upurumbiaracuaa moromboe añete vae rupi, jare ipuereta vi uicuaaca oyovaicho jae ndive vae reta pe uyavi vae.

¹⁰ Ime jeta ñru vae ipurumbiaracuaa re uipota'a uyapisaca vae reta. Jeta ete judío reta jocua nunga. Jae reta imiariño jare upurumbitavi. ¹¹ Icavi co ñamiqui vaerã jocua nunga. Echa'a jae reta oporomboe agüiyeta tēi oporomboe jese vae re umingana vaerã corepoti iyupeguarã. Jare iporomboe rupi ombopa jeta tenta pegua reta.

¹² Penti oporomboe vae Creta pegua jei jentaigua reta re cuarã: "Creta pegua reta jecuaeño iyapu, jovaichopota, iyaquí jare icaru etc." Jucuarãi jei. ¹³ Cua jei jese reta vae añete co. Jáeramo tanta rupi embieta chupe reta, uñemimirãta reta vaerã ipurugüirovia re. ¹⁴ Agüiye tuyapisaca judío reta araca vae indaye reta re. Agüiye vi tuyapisaca uyerova ma añete vae güi vae reta iporoyocui reta re.

¹⁵ Ipiayemingueta iquia mbae vae pe opaete mbaembae iquia mbae co. Ërei upurugüirovia mbae vae ipiayemingueta iquia vae pe opaete mbaembae iquia co. Echa'a ipiayemingueta iquia co, jare ipiatiti'a etei mbae icavi mbae vae uyapo yave. ¹⁶ Jae reta jei tēi uicuaa Tumpa. Ërei mbae uyapo vae uicuaaca ñru vae reta pe uicuaa'a co Tumpa. Echa'a jae reta uyapo mbaembae pichĩ ete vae. Uyapo'a reta Tumpa jei vae. Uyapo'a etei mbae icavi vae.

2

Pablo jei Tito pe umimbeu vaerã moromboe añete vae

¹ Ërei nde emimbeu ñru vae reta pe mbaembae moromboe añete vae pegua. ² Ndechi reta tuñemoa jare tuyepiua ñru vae reta pe. Tipirãta ipurugüirovia re. Tupuruau. Tipiaguasu. ³ Jae ramiño vi cuña ucuacuaa vae reta tuyugüireco cavi uyeyocui vaerã Tumpa pe. Agüiye tiyapu ñru vae re. Agüiye ticause. Toporomboe icavi vae re. ⁴ Tomboe cuña tairusu vae reta uau vaerã ime jare imembi reta, ⁵ jare uñemoa vaerã, jare agüiye vaerã uyapo mbae pichĩ vae, jare uparaviqui cavi vaerã jenta pe, jare uyapo vaerã icavi vae, jare uyapo vaerã ime jei vae. Echa'a jucuarãi uyapo reta yave, ñru vae reta ndarau jei icavi mbae vae Tumpa iñee coti.

⁶ Jae ramiño vi iyocui cuimbae tairusu vae reta uñemoa vaerã. ⁷ Jecuaeño nde rani iyapo icavi vae, ñru vae reta uicuaa vaerã quirãi icavi co jae reta vi yugüireco vaerã. Eporomboe añete vae re Tumpa ndipiu reve. ⁸ Iporu ñee reta icavi vae, agüiye vaerã

quía nembijeco nde ndere vae re, jare oyovaicho nde ndive vae imara vaerã, ipuere'ã etei jei mbae icavi mbae vae ndecoti ramo.

⁹Iyocui uyeyocui vae reta uyapo vaerã ipatrón jei vae jare umbiyerovia vaerã ipatrón opaete mbae re. Agüiye ñee tomoë güirave. ¹⁰Agüiye timonda. Tuechaca ipatrón pe ipuere vaerã güirovia catu. Echa'ã jucuarã yave, ipatrón uicuaata icavi ete co moromboe Tumpa regua jembiocui uyemboe jese vae. Tumpa co jae yanembiasa vae.

¹¹Echa'ã Tumpa ipiacavi rupi yayembiasaca co, jare Tumpa uicuaaca opaete vae pe jae ipiacavi vae co. ¹²Tumpa ipiacavi rupi yayemboe ma quirã icavi co yaeya vaerã mbaeyoa reta jare mbaembae upurugüirovia mbae vae reta uipota ete vae, jare ñañemoa vaerã, jare yayapo vaerã jupi vae, jare yayeyocui vaerã Tumpa pe. Jucuarã yaico cua ivi pe ñaĩ rambueve. ¹³Jare jecuaño ñaãro yayerovia reve Cristo Jesús ou ye uycuaa vaerã jembipe reve. Jae co Tumpa etei uyembiadoraca vae. Jae co yanembiasa vae. ¹⁴Echa'ã jae uñemee umano vaerã yanderé, jae yanderepi vaerã opaete icavi mbae vae güi, jare oyoe vaerã yandepia yanembaeyoa reta güi, yande yayeyapo vaerã imbae retarã, yande yaipota ete vaerã yayapo icavi vae.

¹⁵Cua mbaembae re eporomboe. Epurumbiaracuaa jare embieta icavi mbae vae uyapo vae pe. Jecuaño iporu mbaepuere Tumpa umee ndeve vae. Agüiye quía tanereríro.

3

Tumpa yanembujupi ipiacavi rupi

¹Emimandúa uyapisaca nderé vae reta uyapo vaerã mburuvicha reta jare mbaepuere güinoi vae reta jei vae, jare uyapo vaerã ipotave mbae icavi vae. ²Agüiye tei icavi mbae vae ipotave vae coti. Agüiye tijovaichopota. Tipiaguasu. Tuñemimichi opaete vae ndive.

³Tenonde yave yande vi yandearacuaa'ã. Yayapo'ãse Tumpa jei vae. Yayembitavise. Yaicose yaipota vae reño yayembiyerovia vaerã. Jecuaño yayapose icavi mbae vae jare yaipotase ñru vae reta imbaembae. Ñru vae reta ñanemitarëise jare ñañemitarëise.

⁴Èrei Tumpa uicuaaca yandeve quirã jae ipiacavi yandeve jare yanderau co. Jae co yanembiasa vae. ⁵Tumpa yanembiasa yandeparareco ramo, jupi vae yayapo ramo'ã. Jae yandeyoe yanembaeyoa güi, ñanoi vaerã tecove ipiau vae. Espiritu Santo rupi ñanoi ma tecove ipiau vae. ⁶Echa'ã Tumpa umee yandeve Espiritu Santo opaete imbaepuere reve Jesucristo rupi. Jesucristo co jae yanembiasa vae. ⁷Jucuarã Tumpa uyapo ñanoi vaerã tecove opa mbae vae, jare jocua ñaãro ñaĩ yayerovia reve. Echa'ã Tumpa yanembujupi ipiacavi rupi.

⁸Cua co ñee yandepuere yarovia catu vae. Jare aipota jecuaño tanta ndeporoyocui vaerã co mbaembae re, Tumpa re güirovia vae reta uñemiatangātu uyapo vaerã icavi vae. Echa'ã jucuarã uyapo reta yave, icavita co opaete vae pe. ⁹Èrei agüiye iyeaca iyaracuaa mbae vae reta ramí. Agüiye vi iyapisaca mbae itenondegua reta pe uyeyapo vae reguaño umierãcua vae reta re. Agüiye iyeaca mbaembae mboroyocui regua re. Echa'ã jucuarã uyapo vae reta uyapo'ã co mbae icavi vae. Mbae'ã co uipota jei jae reta imiari jese vae.

¹⁰Ime yave quía uipota umbiyao amocue upurugüirovia vae reta ñru upurugüirovia vae reta güi vae, ere chupe penti ani mocui vese agüiye vaerã uyapo jucuarã. Èrei uipota'ã yave ueya jeco, agüiye ñnemíru jae ndive. ¹¹Echa'ã ndicuaa jocua nunga ipuere'ã co ipia pe uyemingueta cavi. Jae iyoa, jare jae etei uicuaa iyoa co.

Mboroyocui reta

¹²Amondo yave ndepi Artemas ani Tíquico, ñnemiatangātu ndeyu vaerã chepi Nicópolis pe. Echa'ã chequirëi apita joco pe roi iara uasa regua. ¹³Embori opaete ndepuere rupi Zenas mboroyocui uicuaa catu vae jare Apolos, yugüiraa cavi vaerã, agüiye vaerã mbae uata chupe reta. ¹⁴Jare upurugüirovia vae reta tuyemboe jecuaño uyapo vaerã icavi vae, ipuere vaerã ombori mbae uata chupe vae reta. Echa'ã jucuarã uyapo reta yave, uyeyocui co Tumpa pe.

Saludo reta

¹⁵Opaete che ndive ñugüinoi vae jei peve Tumpa ndiveño peí. Tumpa ndiveño toí opaete upurugüirovia vae reta. Echa'ã jae reta orerau ete. Tumpa tumee opaete peve ipiacavi. Amén.

LA CARTA DEL APOSTOL SAN PABLO A FILEMÓN

¹ Che co jae Pablo. Che co jae penti pereso Cristo Jesús pe ayeyocui ramo. Yanderivi Timoteo ime vi cua pe oĩ che ndive. Aicuatía cua tupapire ndeve, Filemón. Ore nduau co. Nde ndeparaviqui ore ndive. ² Aicuatía ndeve vi, Apia. Nde co jae orerindi yandeYa re. Jae ramiño vi aicuatía ndeve, Arquipo. Nde ndeparaviqui tanta ore ndive. Aicuatía vi opaete upurugüirovia vae reta nerenta pe uyembati vae pe, Filemón. ³ YandeRu Tumpa jare yandeYa Jesucristo tumee peve ipiacavi jare ipiacatu.

Filemón ipuruau jare ipurugüirovia

⁴ Jecuaeño ayerure Tumpa pe nderé, Filemón, jare amee yasurupai Tumpa pe nderé. ⁵ Echa'ã jerãcua cheve mburuau jare mburugüirovia nde neno yandeYa Jesús coti jare opaete uñeño tee yandeYa peguarã vae reta coti vae. ⁶ Ime amocue ndepurugüirovia rupi yandeYa re güirovia vae. Ayerure Tumpa pe jocua reta uicuaa cavi vaerã opaete mbae icavi vae Cristo rupi ñanoi vae. ⁷ Ayerovia ete jare chepiacatu ndepuruau re, cherivi. Echa'ã nde nembipiacatu uñeño tee yandeYa peguarã vae reta.

Pablo umiñera Onésimo re

⁸ Che ndoyocuita tẽi ndiyapo vaerã jupi ndiyapo vaerã vae. Echa'ã Cristo umee cheve mbaepuere cuarãi ndoyocui vaerã. ⁹ Ërei mburuau checoti neno ramo, cheiño numiñera. Chendeche ma co, jare che co jae penti pereso Cristo Jesús pe ayeyocui ramo. ¹⁰ Che numiñera Onésimo re. Echa'ã jae uyeyapo ma cherairã yandeYa re peresoriru pe aĩ rambueve.

¹¹ Tenonde yave Onésimo uyeyocui cavi'ã ndeve. Ërei añave uyeyocui cavita co ndeve uyeyocui cavi cheve rami. ¹² Jare amondo ye ndepi, yepe tẽi aau ete. Embiresive nde chembiresive rami. ¹³ Echa'ã amimbitata tẽi che ndive, jae uyeyocui vaerã cheve ndepepica pe, peresoriru pe aĩ rambueve. Cua peresoriru pe aĩ ñee icavi vae amimbeu ramo. ¹⁴ Ërei aipota'ã ayapo jucuarãi, aicuaa'ã icavita ra ndeve ramo. Aipota ndiyapo vaerã icavi vae cheve, nde etei nequirẽi ndiyapo yave. Aipota'ã ndoyocui jese. ¹⁵ Aramoi Onésimo osi ndegüi ndereya michi pegua, nde neno ye vaerã jaeño mai pegua. ¹⁶ Ërei jae penti uyeyocui vaẽño'ã ma co. Echa'ã añave jae co yanderivi yaau vae. Jare penti nderivi icavi ete ndeve penti uyeyocui ndeve vae güi. Che aau co. Jae ramiño vi nde ndeau eteta co. Echa'ã jae co penti cuimbae nde rami, jare mocui reve perovia yandeYa re.

¹⁷ Jáeramo embiresive cavi nde chembiresive rami. Echa'ã nde cheapo penti neĩrurã. ¹⁸ Jae uyapo yave icavi mbae vae ndeve ani ipía yave ndeve mbae re, cheve ecovara. ¹⁹ Chepo pe etei aicuatía ndeve cua. Che tambiepi ndeve. Ërei chepuere numimandúa quirãi nde ndepía vi cheve nderecove re. ²⁰ Añete co, cherivi, iyapo cua icavi vae cheve yandeYa re yarovia ramo. Chembipiacatu. Echa'ã mocui reve yarovia yandeYa re.

²¹ Aicuatía cuarãi ndeve, aicuaa catu nde ndiyapota co che jae ndeve vae ramo. Aicuaa catu vi ndiyapota co jeta ete che jae ndeve vae güi. ²² Jare numiñera vi cua: Iyapicatu cheve aĩ pepi vaerã. Echa'ã chepia pe ayemingueta aĩ aramoi Tumpa chemondota pepi. Echa'ã pe reta piyerure Tumpa pe cheré chemondo vaerã pepi.

Saludo reta

²³ Epafras jei ndeve Tumpa ndiveño eĩ. Jae ime peresoriru pe oĩ che ndive Cristo Jesús pe uyeyocui ramo. ²⁴ Jare Marcos, Aristarco, Demas jare Lucas jei vi ndeve Tumpa ndiveño eĩ. Jae reta chembori yandeYa iparaviqui re.

²⁵ YandeYa Jesucristo tumee peve ipiacavi. Amén.

LA CARTA A LOS HEBREOS

Tumpa uyemingueta ma Tai rupi

¹ Aracae yave Tumpa uyemingueta aveiño yandetenondegua reta pe iñee umimbeu vae reta rupi. Jeta quirairāi rupi uyemingueta chupe reta. ² Ērei añave cua ara reta pe Tumpa uyemingueta ma yandevē Tai rupi. Tumpa uyapo opaete uyeyapo vae Tai rupi, jare Tai rupi vi jei mbae uasata opaete uyeyapo vae pe vae. Tumpa jei vae co Tai güinoi vaerā opaete uyeyapo vae. ³ Tumpa Tai oyovaque Tumpa ndive, jare cua ivi pe ico rambueve uicuaaca quirāi Tumpa imbaepuere tuicha ete co. Echa'ā jae uiporu Tumpa imbaepuere etei. Opaete uyeyapo vae jecuaeño ico Tumpa Tai jei vae rupi jare imbaepuere rupi. Jae etei uñemee umano vaerā, ipuere vaerā umbai yanembaeyoa reta, jare cua jaicue rupi uguapi Tumpa iyipi pe iyacata coti ara pe.

Tumpa Tai jare ángel reta

⁴ Jucuarāi Tumpa Tai uicuaaca quirāi jae imbaepuere tuicha ete ángel reta imbaepuere güi. Jae ramiño vi tee uñemee chupe vae uyembutuichaca ete ángel reta jee güi. ⁵ Echa'ā Tumpa jei Tai pe cuarāi:

“Nde co jae cheRai.

Cua ara aicuaaca nde co jae cheRai.”

Jucuarāi jei. Jucuarāi'ā jei Tumpa ángel pe. Jare Tumpa jei Tai re cuarāi:

“Che co jae Tu,

jare jae co cheRai.”

Jucuarāi jei. Jucuarāi'ā jei Tumpa ángel regua. ⁶ Tumpa Tai co jae opaete mbaembae uyeyapo vae iYa. Jare Tumpa ombou ye yave Tai cua ivi pe Tumpa jeita cuarāi:

“Jare opaete ángel reta tumbiadora.

Echa'ā jae reta uyeyocui cheve.”

Jucuarāi jeita. ⁷ Ángel reta re imiari yave, Tumpa jei cuarāi:

“Ayocui ángel reta uyapo vaerā che jae vae.

Jatangātu ete uyeyocui vaerā cheve.”

Jucuarāi jei. ⁸ Ērei Tumpa jei Tai pe cuarāi:

“Nde co jae Tumpa etei.

Ndeporoyocuita jaeño mai pegua.

Nde ndeporoyocuita jupi vae rupi.

⁹ Nde jecuaeño ndiyapo jupi vae.

Ndiyapota'ā etei mbaeyoa.

Jáeramō che noñoño opaete írū vae reta itenondeguarā, ndiyerovia ete vaerā.

Che co jae neTumpa.”

Jucuarāi jei. ¹⁰ Jare Tumpa jei vi Tai pe cuarāi:

“Nde co jae opaete mbae iYa.

Aracae ete nde ndiyapo ivi.

Jae ramiño vi ndiyapo opaete ara re oī vae.

¹¹ Jae reta opata, ěrei nde jaeño mai ndicota.

Jae reta opaete indechita penti temimonde indechi vae rami.

¹² Echa'ā indechi ete ma yave, uyemombo, jare uyeporu írū temimonde jocua indechi vae ipépica pe.

Ērei nde jaeño mai ndicota.

Nde ndarau etei nendechi.”

Jucuarāi jei. ¹³ Jare Tumpa jei vi Tai pe cuarāi:

“Eguapi cheyipī pe cheacata coti, nderovaicho reta opa amiamiri regua.”

Jucuarāi jei. Jucuarāi'ā jei Tumpa ángel pe.

¹⁴ Echa'ā ángel reta uyeyocui Tumpa pe, jare Tumpa ombou ángel reta ombori vaerā uyembiasacata vae reta.

2

Yembiasa icavi ete vae

¹ Jáeramo icavi co ñaneratangātu ete vaerā yayapisaca jese vae re, agüiye vaerā yapia chugüi. ² Echa'a aracae yave Tumpa uyemingueta Israel pegua reta pe ángel reta rupi. Ērei Israel pegua reta uyapo'a Tumpa jei vae. Jáeramo Tumpa uiporaraca chupe reta iyoa reta ramo. Echa'a Tumpa co jae jupi vae. ³ Jae ramiño vi Tumpa uyemingueta ma yandeve yembiasa icavi ete yandeve vae re. Jáeramo uiporacata yandeve vi, yayapisaca'a yave jese. Echa'a yandeYa rani imiari cua yembiasa re, jare yaicuaa añete co uyapisaca jese vae reta umimbeu yandeve vae rupi. ⁴ Tumpa etei vi uicuaaca añete co jae reta umimbeu yandeve vae. Echa'a umaño jese reta uyapo vaerā miacañi reta uecha vae reta uicuaa vaerā, jare Tumpa umee chupe reta mbaepuere reta Espíritu Santo rupi jae etei uipota vae rupi.

Jesucristo uyeyapo cuimbaerā

⁵ Ángel reta ndarau yugüireco mburuvicha retarā ivi icota vae yayemingueta jese vae pe. ⁶ Ērei Tumpa iñee pe yamingueta quirāi penti vae jei Tumpa pe cuarāi:

“Yepe tēi ivi pegua reta mbaeti co mbae,

ērei nde ndiyandareco jese reta jare jecuaño nembori reta.

⁷ Añave jae reta imbaepuere michi ete ángel reta imbaepuere güi.

Cuarāi oī nde ndipota ramo.

Ērei michi peguaño cuarāita oī.

Echa'a tenonde yave neme Adán pe mbaepuere tuicha vae jare nembutuichaca.

Nde neme chupe güinoi vaerā mbaepuere opaete nde ndiyapo vae re.

⁸ Nde nemaño jese ico vaerā opaete mbaembae juvicharā.”

Jucuarāi jei. Cua uipota jei mbaeti co mbae Adán jei vae ñatēi uyapo vae. Ērei yaicuaa quirāi añave ivi pegua reta ndei yugüireco opaete mbaembae juvicha retarā. ⁹ Ērei yaicuaa Tumpa umee ma co Jesús pe mbaepuere tuicha vae jare umbiadoraca. Echa'a

Jesús imbaepuere vi uyeyapo michi ete ángel reta imbaepuere güi, ērei michi peguaño.

Echa'a jucuarāi uyeyapo, Jesús umano vaerā opaete ivi pegua reta re, Tumpa uicuaaca vaerā ipiacavi co yandeve. ¹⁰ Tumpa uyapo opaete, jare jae uyembutuichaca opaete

uyapo vae pe. Jae uipota jeta ivi pegua reta uyeyapo vaerā tai retarā jare uyembutuichaca vaerā. Jáeramo icavi chupe Jesús uiporara vaerā. Echa'a uiporara vae rupi Jesús uepiti

upurumbiasa vaerā.

¹¹ Jesús ñaneño tee Tumpa peguarā, jare yande co jae pentiño Jesús ndive. Jáeramo jae ñanereni tivi reta. Imara'a jucuarāi ñanereni vaerā. ¹² Echa'a yamingueta Tumpa

iñee pe quirāi Jesús jei Tumpa pe cuarāi:

“Che numimbeuta cherivi reta pe.

Yati yave, numbiadorata canta pipe ipite pe.”

Jucuarāi jei. ¹³ Jare jei vi cuarāi:

“Aroviata Tumpa.”

Jare jei vi cuarāi:

“Mase, co aī jare ime vi cua pe ñugüinoi Tumpa tai reta jae umiiru che ndive vae.”

Jucuarāi jei.

¹⁴ Opaete tai reta ivi pegua reta co. Jáeramo Jesús etei vi uyeyapo ivi peguarā, imano rupi umiamiri vaerā aña guasu. Echa'a aña guasu güinoise mbaepuere mano regua.

¹⁵ Cua jeco pegua Jesús ipuere yanderepi. Echa'a ñanemichi güiye yaquiye mano güi. Ērei Jesús yandeyora ma cua quiye güi. ¹⁶ Añete co, Jesús ou'a ombori vaerā ángel reta.

Ou co ombori vaerā Abraham iñemoñaeta. ¹⁷ Jocua uyeyapota Jesús tivi retarā vae ivi pegua reta co. Jáeramo icavi co Jesús vi uyeyapo vaerā ivi peguarā, ipuere vaerā

umbai ivi pegua reta imbaeyoa reta. Jae co sacerdote tenondegua Israel pegua rami.

Echa'a sacerdote tenondegua uique Tumpa oī vae pe Israel pegua reta imbaeyoa reta re. Jae ramiño vi Jesús uique Tumpa oī vae pe yanderé. Yandepuere yarovia catu. Jae

yandeparareco. ¹⁸ Echa'a aña guasu umingueta uyavica vaerā tēi chupe. Jáeramo aña guasu yanemingueta yave uyavica vaerā yandeve, Jesús ipuere yanembori.

3

Jesús jare Moisés

¹ Cherivi reta, Tumpa peñono tee iyupeguarā. Tumpa etei ara pe ico vae peparavo. Jáeramo pepia pe piyemingueta cavi Jesús re. Tumpa ombou Jesús umimbeu vaerā yandeve Tumpa regua, yande yarovia vaerā jese, jare añave Jesús ico Tumpa oī vae pe yanembori vaerā yandepurugüirovia re, sacerdote tenondegua ombori Israel pegua reta rami. ² Moisés uyapo cavi mbaraviqui Tumpa umee chupe uyapo vaerā vae. Jae ramiño vi Jesús uyapo cavi mbaraviqui Tumpa umee chupe uyapo vaerā vae. ³ Jare Jesús uyembutuichaca ete Moisés güi. Yamiijaanga penti tenta. Moisés uyemijaanga tenta re. Ērei Jesús uyemijaanga tenta iyapoa re. Jecuaeño yambuicha ete co tenta iyapoa tenta güi. ⁴ Jare penti penti tenta uyeyapoca tenta iyapoa pe. Ērei Tumpa uyapo opaete. ⁵ Moisés uyapo cavi mbaraviqui Tumpa umee chupe uyapo vaerā vae. Jucuarāi uyeyocui cavi Tumpa pe, jare Tumpa uicuaaca cua yandeve yaicuaa vaerā quirāi opaete Moisés imiari Tumpa re vae añete co. ⁶ Ērei Cristo co jae Tumpa Tai jare jae co opaete Tumpa re güirovia vae reta iYa. Echa'ā yande vi co jae imbae, jecuaeño yave ñaneratangātu jare yayerovia yave ñaāro ñai vae re.

Tumpa imbae reta iputu

⁷ Jáeramo pemandúa Espiritu Santo jei vae re. Echa'ā Tumpa iñee pe yamingueta quirāi Espiritu Santo jei yandetenondegua reta pe cuarāi:

“Cua ara piyapisaca chiñee re.

⁸⁻⁹ Jáeramo agüiye piyemipiatanta.

Echa'ā petenondegua reta uyemipiatanta ñana pe ñugüinoi yave.

Jae reta chembiavai jare chembiarasi.

Jare cuarenta año uecha reta opaete ayapo vae.

¹⁰ Jáeramo chearasi petenondegua reta pe, jare che jae cuarāi:

‘Jecuaeño opia reta chegüi ipia pe.

Uipota'ā etei reta uyapo che aipota tēi uyapo vaerā vae.’

Jucuarāi che jae.

¹¹ Jáeramo chearasi chupe reta ramo, che jae cuarāi:

‘Añete co, jae reta ndarau uique Canaán pe.

Echa'ā joco pe uputuuta tēi co.’

Jucuarāi che jae.”

Jucuarāi jei Espiritu Santo.

¹² Jáeramo, cherivi reta, piñemoa, agüiye vaerā pepia uñemitanta perovia'ā Tumpa ramo. Echa'ā pepia uñemitanta yave, peopiata Tumpa imeño mai ico vae güi. ¹³ Ērei pepuere rambueve, piñemiatangätungātu opa ara rupi, agüiye vaerā penti pepite pe oī vae yepe uyemipiatanta mbaeyoa rupi. Echa'ā mbaeyoa ipuere yanembitavi yayemipiatanta vaerā. ¹⁴ Echa'ā yande yayeyapo ma Cristo iiru retarā jecuaeño yave ñaneratangātu tenonde voi mburugüirovia ñanoi vae re. ¹⁵ Pemandúa cua Tumpa iñee pe uyecuatía oī vae re:

“Cua ara piyapisaca chiñee re” —jei Espiritu Santo—.

“Jáeramo agüiye piyemipiatanta.

Echa'ā petenondegua reta uyemipiatanta ramo, chearasi chupe reta.”

Jucuarāi uyecuatía oī.

¹⁶ Yepe tēi uyandu reta Tumpa iñee, ěrei amocue yandetenondegua reta umbiarasi Tumpa. Añete co, opaete Moisés güeru Egipto güi vae reta umbiarasi Tumpa. ¹⁷ Jáeramo Tumpa iarasi cuarenta año jocua yandetenondegua reta pe, iyoa reta ramo. Jare jae reta umano ñana pe. ¹⁸ Echa'ā Tumpa jei cuarāi:

“Añete co, jae reta ndarau uique Canaán pe.

Echa'ā joco pe uputuuta tēi co.”

Jucuarāi jei Tumpa. Jare jucuarāi uyeyapo chupe reta, güirovia'ā Tumpa ramo.

¹⁹ Jáeramo yaicuaa jae reta ipuere'ā co uique Canaán pe, güirovia'ā Tumpa ramo.

4

¹ Jáeramo pequiye. Echa'a aramoi amocue pe reta ndarau peepiti penoi vaerã jocua mbutuu Cristo ipuere umee peve vae. Tumpa etei jei umee vaerã yandeve cua mbutuu. ² Tumpa umimbeu yandetenondegua reta pe ñee icavi vae, ãrei jocua ñee icavi vae uyapo'a mbae chupe reta. Echa'a güirovia'a reta jocua uyandu vae. Jae ramiño vi Tumpa umimbeu yandeve penti ñee icavi vae. ³⁻⁵ Jare yande yarovia Tumpa vae yaepiti jocua mbutuu Cristo umee yandeve vae. Echa'a Tumpa jei cuarãi:

“Chearasi ete chupe reta.

Añete co, jae reta ndarau uique Canaán pe.

Echa'a joco pe uputuuta tõi co.”

Jucuarãi jei Tumpa. Echa'a Tumpa ñnee pe uyecuatía oĩ cuarãi:

“Tumpa opa iparaviqui uyapo seis ara pe.

Jayave jocua jaicue rupi uputuu penti ara.”

Jucuarãi uyecuatía oĩ. Ërei yepe tõi opa iparaviqui uyapo cua ivi uyeyapo ma yave, ãrei uyecuatía oĩ Tumpa ñnee pe quirãi Tumpa jei cuarãi:

“Jae reta ndarau uique Canaán pe.

Echa'a joco pe uputuuta tõi co.”

Jucuarãi jei Tumpa.

⁶ Jáeramo yaicuaa cua: Tenonde voi Tumpa umimbeu jocua ñee icavi vae yandetenondegua reta pe. Ërei jae reta mbaeti güinoi jocua mbutuu Tumpa umeeta tõi chupe reta vae, güirovia'a Tumpa ramo. Jáeramo imeño jocua mbutuu amocue vae güinoita vae.

⁷ Jare Tumpa umimbeu yandeve ara. Echa'a ñma ma jae jei yave David rupi cuarãi: “Cua ara.” Echa'a uyecuatía oĩ cuarãi:

“Cua ara piyapisaca chiñee re” —jei Espiritu Santo—.

“Jáeramo agüiye piyemipiatanta.”

Jucuarãi uyecuatía oĩ.

⁸ Josué umee'a jocua mbutuu yandetenondegua reta pe. Echa'a umee chupe reta yave mona, mbaetita tõi Tumpa uyemingueta taicue rupi ñru ara re. ⁹ Jáeramo imeño mbutuu Tumpa umeeta imbae reta pe vae. ¹⁰ Tumpa uputuu opa iparaviqui uyapo yave. Jae ramiño vi yande ñanoi yave jocua mbutuu Tumpa umee yandeve vae, yaparaviqui'a ma yembiasa ñanoi vaerã. ¹¹ Jáeramo ñaneratangãtu ñanoi vaerã jocua mbutuu. Jocua yandetenondegua güirovia'a Tumpa vae reta opa umano. Jae ramiño vi pe reta perovia'a yave Tumpa, pecañiteita co.

¹² Echa'a Tumpa ñnee güinoi mbaepuere umee vaerã yandeve tecove opa mbae vae. Pentu quisepecu jaimbeyovai vae ipuere yanembipere etc. Ipuere uyasia yandesoo jare ñanecãgüie yepe. Ërei Tumpa ñnee imbaepuere tuicha ete quisepecu imbaepuere güi. Echa'a Tumpa ñnee uique yandepia pe etei jare uicuaaca yandeve mbae yaipota vae regua jare mbae Espiritu Santo regua. Tumpa ñnee ipuere uicuaaca yandeve yandepiyemingueta etei, icavi ra ani icavi'a ra. ¹³ Mbaeti mbae Tumpa uyapo vae ipuere uñemi Tumpa güi. Echa'a jae uecha jare uicuaa opaete regua. Jare jae ñanerãata opaete yayapo vae re.

Jesús co jae sacerdote tenondegua rami

¹⁴ Jesús co jae Tumpa Tai. Jae uyupi oo ara pe, jare joco pe uyerure Tumpa pe yanderé, sacerdote tenondegua uyerurese yandetenondegua reta re rami. Ërei Jesús imbaepuere tuicha ete sacerdote tenondegua imbaepuere güi. Jare cua yaicuaa ramo, jecuae ñaneratangãtu ñanoi vaerã mburugüirovia. ¹⁵ Jesús mbaeti co sacerdote tenondegua ipuere'a ipiatiti yaiporara yave vae rami. Echa'a aña guasu umingueta uyavica vaerã tõi chupe, aña guasu yanemingueta rami. Ërei jae iyoa'a etei. ¹⁶ Jáeramo yaya yaquiye mbae reve Tumpa re, Tumpa yandeparareco vaerã jare ñanoi vaerã ipiacavi. Echa'a Tumpa ipiacavi jeco pegua yanemborita yaiporara yave.

5

¹ Tumpa uiparavo penti cuimbae uyeyapo vaerã sacerdote tenondeguarã, jare umee chupe uyerure vaerã Tumpa pe ñru vae reta re, jare ipuere vaerã umee Tumpa pe ofrenda reta jare maemimba uyeyucacue reta. Maemimba uyeyucacue reta mbaeyoa reta regua co. ² Amocue iyoa vae reta uicuaa cavi'a imbaeyoa reta regua, ãrei ñru iyoa vae reta uicuaa

uyapo'a co Tumpa jei vae. Ērei sacerdote tenondegua ipuere uiparareco opaete vae, yavai'a co jae etei iyoa vaerā ramo. ³Jare cua jeco pegua icavi co sacerdote tenondegua umee vaerā Tumpa pe maemimba uyeyucacue imbaeyoa reta re, jucuarāi umee ĩru vae reta imbaeyoa reta re rami. ⁴Jare mbaeti quía ipuere uyeparavo jaeiño, ico vaerā sacerdote tenondeguarā. Jaeño Tumpa uiparavo vae ipuere ico sacerdote tenondeguarā. Echa'a jucuarāi Tumpa uiparavo Aarón.

⁵Jae ramiño vi Cristo uyembutuicha'a jaeiño. Echa'a uyeparavo'a jaeiño, ico vaerā sacerdote tenondeguarā. Tumpa uiparavo Cristo ico vaerā sacerdote tenondeguarā. Echa'a uyecuatía oĩ Tumpa iñee pe quirāi Tumpa jei Cristo pe cuarāi:
“Nde co jae cheRai.

Cua ara aicuaaca nde co jae cheRai.”

Jucuarāi jei. ⁶Jare Tumpa iñee pe uyecuatía ye oĩ cuarāi:

“Nde ndicota penti sacerdoterā jaeño mai pegua” —jei Tumpa—, “Melquisedec rami.”

Jucuarāi uyecuatía oĩ.

⁷Cristo cua ivi pe ico rambueve, uyao reve uyerure Tumpa pe ombori vaerā. Echa'a Tumpa ipuere tēi umbiasa mano güi. Jare Tumpa uyapisaca iyerure re, Cristo jecuaeño uipota uyapo Tumpa jei vae ramo. ⁸Ērei yepe tēi jae co Tumpa Tai, ěrei uyemboe uyapo vaerā Tumpa jei vae uiporara vae rupi. ⁹Jare opaete Tumpa jei vae uyapo ma yave, ipuere umee yembiasa opa mbae vae opaete uyapo jae jei uyapo vaerā vae reta pe. ¹⁰Tumpa iñee pe uyecuatía oĩ cuarāi:

“Nde co jae penti sacerdote tenondegua” —jei Tumpa—, “Melquisedec rami.”

Jucuarāi uyecuatía oĩ.

Agüiye pepia Tumpa güi

¹¹Aipota tēi amimbeu peve jeta cua regua, ěrei yavai co oĩ amimbeu peve vaerā. Echa'a picuaata'a, yepe tēi piyapisaca jese. ¹²Añave pe reta pemboeta tēi ĩru vae reta mbaembae re, piyemboe yave jese. Ērei piyemboe'a jese. Jáeramo icavi co che pomboe ye vaerā jocua Tumpa umimbeu yandave vae yavai'a etei co yaicuaa vaerā vae. Tamijaanga tembú re. Sambiai-rai reta ipuere'a jou tembú, jaeño neche. Pe reta sambiai-rai reta rami co. Echa'a piyemboe cavi'a Tumpa umimbeu yandave vae re. ¹³Sambiai-rai necheño ipuere jou vae uicuaa'a mbae ave. Jae ramiño vi pe reta piyemboe'a ñee Tumpa umimbeu yandave vae re. Echa'a piyemboe jese yave, picuaata tēi mbae jupi vae. ¹⁴Ērei ucuaa vae reta jou tembú. Jae ramiño vi Tumpa umimbeu yandave vae re uyemboe cavi vae reta uicuaa cavi mbae icavi vae jare mbae icavi mbae vae.

6

¹Jáeramo agüiye yayemboe ye moromboe tenondegua Cristo regua re. Aipota pomboe ĩru moromboe pepirāta vaerā pepurugüirovia re. Tenonde yave piyemboe quirāi pepuere peeya piyemingueta icavi mbae vae pepia pe oĩ vae - echa'a piyapose vae rupi pepuere'a penoi tecove opa mbae vae. Piyemboe vi mburugüirovia Tumpa coti vae re, ²jare quirāi piyembibautizaca piyeyoe vaerā Tumpa coti. Piyemboe vi quirāi temimondo reta oñono ipo ĩru vae reta iñāca re. Piyemboe vi umanocue vae reta icove ye vae re jare quirāi Tumpa uāata ivi pegua reta jare jae reta uiporarata jaeño mai pegua. ³Cua aipota ayapo, Tumpa umaeño yave cheré. ⁴⁻⁶Penti vae uicuaa yave Tumpa, Tumpa uicuaaca chupe vae rupi, jae uicuaa vi quirāi icavi ete mbaepuere Tumpa umee vae, jare uñemĩru Espĩritu Santo ndive. Jae uicuaa vi Tumpa iñee icavi ete vae jare mbaepuere reta ara ndeño ou uvāe vae reta pe Tumpa uicuaacata vae. Ērei cua nunga opia yave Tumpa güi, ndarau etei ipuere ye ueya iyemingueta icavi mbae vae ipia pe oĩ vae. Jae co uyuca ye Tumpa Tai rami, jare jucuarāi güĩrroca ĩru vae reta pe.

⁷Echa'a oquiñoi yave, ama umāqui ivi. Jayave ivi iya oñoti temiti, jare temiti yagüiye cavi yave, oñoti vae uyerovia ete. Jayave ivi iya jeita icavi ete jocua ivi. Echa'a ivi uiporu cavi ama Tumpa ombou vae. ⁸Ērei jocua ivi pe uñemoña yave yurāti catuii, ivi iya jeita icavi'a etei jocua ivi. Aramoi Tumpa uyepipeyuta jese. Jocua ivi opata ocai.

⁹Ērei, cherivi reta, yepe tēi chemiari ma peve cuarāi, ěrei aicuaa pe reta pepia'a co Tumpa güi. Piyapo co icavi vae piyembiasaca ramo. ¹⁰Uyecuaa quirāi peau Tumpa. Picuaaca pepuruau co piyapo vae rupi. Echa'a jecuaeño piyeyocui ĩru uñeño tee Tumpa peguarā vae reta pe. Tumpa ndarau ñacañi piyapo vae güi. Echa'a ñacañi chugüi

yave, mbaetita tēi jupi. ¹¹ Jare aipota pe reta penti penti jecuae picuaaca piñemiatangātu co cua re, jecuae piyerovia catu vaerā peāro pei vae re. ¹² Agüiye peaqui. Pico ĩru güirovia Tumpa vae reta yugüireco rami. Echa'ā jae reta ipurugüirovia jeco pegua ipiaguasu, güinoi vaerā Tumpa jei umeeta chupe reta vae.

Tumpa jei umeeta chupe Abraham pe vae

¹³ Tumpa jei umeeta Abraham pe vae re, Tumpa jei jee re uyapota co. Echa'ā mbaeti co mbaepuere tuicha ete Tumpa imbaepuere güi vae. ¹⁴ Jare Tumpa jei Abraham pe cuarāi: “Añete co, che numivendiseta co.

Ameeta ndeve jeta ete niñemoñaā retarā.”

Jucuarāi jei. ¹⁵ Jare Abraham, ĩma ma uāro yave ipiaguasu reve, güinoi Tumpa jei umeeta chupe vae. ¹⁶ Penti vae jei yave ĩru vae pe mbae uyapota chupe, jei mbaepuere tuicha vae güinoi vae jee re uyapota co. Jare cua jei vae uicuaaca ĩru vae pe uyapota co, agüiye vaerā ĩru vae ipia pe uyemingueta ndarau ndipo uyapo. ¹⁷ Jae ramiño vi Tumpa uipota ete uicuaaca jei güinoita vae reta pe quirāi jae jei vae uyepepica'ā etei. Jáeramo jei jee re uyapota co jei vae. ¹⁸ Mocui reve - Tumpa jei vae jare jei vae re vae - uyepepica'ā etei, jare yaicuaa cua mocui reve añete co, Tumpa iyapu'ā etei ramo. Jáeramo cua ñanemimirāta yandepurugüirovia re. Echa'ā yande yayerova yandereco mai indechi vae güi jare yayerure Tumpa pe yanderepi vaerā. Jare ñaāro ñai yayerovia reve ñanoi vaerā Tumpa jei umeeta yandeve vae. ¹⁹ Jare cua ñaāro ñai yayerovia reve vae yanembori agüiye vaerā yapia Tumpa güi, jare yanemboya Tumpa ara pe oĩ vae re. ²⁰ Echa'ā Jesús rani oo ma uique ara pe yanderonnde, jare Tumpa uyapo ma sacerdote tenondeguarā jaeño mai pegua Melquisedec rami.

7

Jesús co jae sacerdote Melquisedec rami

¹ Cua Melquisedec co jae Salem pegua reta juvicha guasu. Tumpa ara pe ico vae uyapo cua Melquisedec sacerdoterā. Abraham ou ye yave Salem pe uyucaca yave jocua mburuvicha guasu reta, uñeñovāiti Melquisedec ndive, jare Melquisedec jei Abraham pe cuarāi: “Tumpa tanemivendise.” ² Jayave Abraham umee Melquisedec pe diezmo opaete güinoi vae güi. Tee Melquisedec uipota jei “mburuvicha guasu jupi vae”. Cua Melquisedec co jae Salem pegua reta juvicha guasu, jare cua uipota jei “mburuvicha guasu mbiacatu pegua”. ³ Yaicuaa'ā quía reta ra jae tu jare jae ichi. Yaicuaa'ā vi quía reta ra jae itenondegua reta. Yaicuaa'ā vi quirāi yave ra ichi güi oa, jare quirāi yave ra umano. Jáeramo yandepuere yamijaanga Melquisedec Tumpa Tai re. Echa'ā jae co penti sacerdote imeño mai ico vae rami.

⁴ Mase, Tumpa uipiuca ete co cua cuimbae. Echa'ā yandetenondegua Abraham etei umee chupe diezmo opaete mbaembae upĩro jovaicho reta güi vae güi. ⁵ Jare Israel pegua reta umee diezmo Leví iñemoñaā sacerdote retarā uyeyapo vae reta pe, yepe tēi jentarā reta co. Echa'ā opareve Abraham iñemoñaā reta co. Tumpa oyocui jucuarāi Moisés iporoyocui pe. ⁶ Ērei Melquisedec Leví iñemoñaā pegua'ā co. Ērei Abraham umee diezmo chupe, jare Melquisedec jei Abraham pe cuarāi: “Tumpa tanemivendise.” Jare pemandúa cua re: Abraham co jae uipisi Tumpa güi jei umeeta chupe vae. ⁷ Jare penti vae jei yave: “Tumpa tanemivendise”, ĩru vae pe, añetete jocua cuarāi jei vae uyembutuichaca ete ĩru vae güi. ⁸ Jare cua ivi pe Israel pegua reta umee diezmo sacerdote reta pe, yepe tēi jocua sacerdote reta umano vae co. Ērei Abraham umee diezmo Melquisedec pe. Jare Tumpa iñee pe uyecuatía oĩ jese vae rupi jae co imeño ico vae rami. ⁹ Jare yandepuere yae cua: Leví co jae Abraham iñemoñaā pegua ramo, jae etei umee diezmo Melquisedec pe, yepe tēi Israel pegua reta umee diezmo Leví iñemoñaā reta pe. ¹⁰ Echa'ā Leví Abraham iñemoñaā pegua co, Ērei ndeiño oa Abraham tai Isaac jee vae Melquisedec uñeñovāiti Abraham ndive yave. Jare Leví Isaac iñemoñaā pegua co.

¹¹ Tumpa uicuaaca Moisés iporoyocui Israel pegua reta pe yave, umee amocue Leví iñemoñaā reta pe sacerdote retarā yugüireco vaerā. Ērei jocua nunga sacerdote reta ipuere'ā opa umbai mbaeyoa reta. Jáeramo icavi co ico vaerā ĩru sacerdote uyuvai jocua reta güi vae. Cua ĩru sacerdote Melquisedec rami co, Aarón iñemoñaā pegua'ā co. ¹² Jocua reta uyeyapo sacerdote retarā, jae reta co Leví iñemoñaā pegua reta ramo.

Ērei cua ĩru sacerdote uyuvavi jocua reta güi vae Leví ñemoña pegua'a co. ¹³⁻¹⁴ Echa'ã uyecuaa cavi quirãi cua ĩru sacerdote Tumpa ñee jucuarãi imiari jese vae - jae co yandeYa - Judá ñemoña pegua co, Leví ñemoña pegua'a co. Judá ñemoña ave uparaviqui'ã sacerdoterã maemimba uyeyucacue ñimeearendã pe. Echa'ã Moisés umimbeu'ã etei Judá ñemoña reta ipuere uyeyapo sacerdote retarã.

¹⁵ Ērei uyecuaa cavi ete quirãi icavi co uyeyapo vaerã ĩru sacerdoterã Melquisedec rami vae. ¹⁶ Jocua reta uyeparavoca yugüireco vaerã sacerdote retarã mboroyocui rupi, jae reta co Leví ñemoña pegua reta ramo. Ērei cua ĩru vae uyeparavoca ico vaerã sacerdoterã, imbaepuere tuicha ete ramo. Echa'ã jae güinoi tecove ndarau etei opa vae. ¹⁷ Echa'ã Tumpa ñee pe uyecuatía oĩ jese cuarãi:

“Nde ndicota penti sacerdoterã jaẽño mai pegua” —jei Tumpa—, “Melquisedec rami.” Jucuarãi uyecuatía oĩ. ¹⁸⁻¹⁹ Tenonde yave Tumpa oyocui amocue Leví ñemoña reta yugüireco vaerã sacerdote retarã. Ērei jae reta ipuere'ã opa umbai mbaeyoa reta. Jáeramo Tumpa oyocui'ã ma yugüireco vaerã sacerdote retarã. Umee yandevicavi ete jocua reta güi vae. Echa'ã añave ñanoi ñaãro ñaĩ yayerovia reve vae, jare cua jeco pegua yandepuere yaya Tumpa re. ²⁰⁻²¹ Jare jocua reta sacerdote retarã uyeyapo yave, Tumpa jei'ã etei mbae jee re. Ērei Tumpa umee yave cua ĩru vae pe ico vaerã sacerdoterã, jei co mbae jee re. Echa'ã yandeYa Tumpa jei chupe cuarãi:

“Che jae ma cheree re, jare ndarau aipepica cua jae vae:

‘Nde ndicota penti sacerdoterã jaẽño mai pegua, Melquisedec rami.’ ”

Jucuarãi jei. ²² Trato ipiauí vae icavi ete trato tenondegua vae güi. Jare Jesús co jae penti sacerdote imeño mai ico vae ramo, yaicuaa añetete Tumpa uyapota cua taicue rupi jei vae. ²³ Jare jeta ete co jocua sacerdote reta. Echa'ã penti penti mano. Jare sacerdote umano yave, ĩru vae uyeyapo sacerdoterã uyapo vaerã mbaraviqui. ²⁴ Ērei cua cuimbae imeño mai ico. Jáeramo ipuere uyapo sacerdote iparaviqui jaẽño mai pegua. Ndarau uipota ĩru vae uyapo vaerã iparaviqui. ²⁵ Jáeramo Jesús ipuere umbiasa ete opaete oya Tumpa re jae uyapocue vae rupi vae reta. Echa'ã jae imeño mai ico uyerure vaerã Tumpa pe jese reta.

²⁶ Icavi ete co uyerure vaerã yanderé cua nunga sacerdote tenondegua. Echa'ã jae co jupi vae. Mbaeti etei jeco. Jae co iyoa mbae vae. Ipuere'ã etei iyoa. Jae ico ara pe. ²⁷ Jocua ĩru sacerdote tenondegua reta opa ara rupi umee Tumpa pe maemimba uyeyucacue reta imbaeyoa reta re rani jare ĩru Israel pegua reta imbaeyoa reta re. Ērei Jesús uyapo'ã jucuarãi. Echa'ã penti veseño Jesús umee Tumpa pe uyeyucacue vae. Jare jocua uyeyucacue vae jae etei co. ²⁸ Echa'ã cuimbae reta mboroyocui rupi uyeparavoca yugüireco vaerã sacerdote tenondegua retarã vae iyoa mbae vae reta'ã co. Ērei añave mboroyocui uasa ma, jare Tumpa uiparavo Tai ico vaerã sacerdote tenondeguarã jocua jei jee re vae rupi. Jare Tumpa Tai iyoa mbae vae co jaẽño mai pegua.

8

Jesús jare trato ipiauí vae

¹ Opaete che jae ma peve vae uipota jei cua: Ime ñanoi cua nunga sacerdote tenondegua. Jae uguapí ma oĩ Tumpa iyipí pe iyacata coti ara pe. ² Tumpa jo ñana pe Israel pegua reta uyapo vae uyemijaanga ara re. Echa'ã jocua o japipe pe Tumpa oĩ vae pe sacerdote tenondegua uyapose iparaviqui. Jae ramiño vi Jesús añave uyapo iparaviqui ara pe Tumpa oĩ vae pe. Israel pegua reta uyapo jocua o. Ērei yandeYa Tumpa uyapo ara.

³ Jare sacerdote tenondegua penti penti uyeparavoca umee vaerã Tumpa pe ofrenda reta jare maemimba uyeyucacue reta. Jáeramo icavi co cua sacerdote tenondegua vi güinoi vaerã mbae umee vaerã chupe. ⁴ Ivi peño ico yave mona, mbaetita tẽi ico sacerdoterã. Echa'ã jocua ĩru sacerdote reta umee Tumpa pe ofrenda reta mboroyocui rupi. ⁵ Ērei mbaraviqui jae reta uyapo vae uyemijaangaño mbaraviqui ara pegua re. Echa'ã ndei Moisés uyapoca Tumpa jo mbove, Tumpa umimbeu chupe quirãi uyapoca vaerã. Jei chupe cuarãi: “Mase, iyapoca opaete o cua amijaanga ndeve cua ivitu guasu re vae rami.” Jucuarãi jei chupe. ⁶ Jare mbaraviqui Tumpa umee Jesús pe vae icavi ete mbaraviqui jocua ĩru sacerdote reta uyapo vae güi. Jae ramiño vi trato Jesús rupi yande ñanoi vae icavi ete trato tenondegua vae güi. Echa'ã jocua Tumpa jei umeeta yandevicavi ete jocua Tumpa jei umeeta trato tenondegua vae rupi vae güi.

⁷ Jocuá trato tenondegua vae rupi ipuere'ã opa uyembai mbaeyoa reta. Jáeramo icavi co Tumpa uyapo vaerã íru trato. ⁸ Echa'ã Tumpa uicuaa Israel pegua reta iyoa vae reta co. Jáeramo Tumpa ínee pe uyecuatía oĩ quirãí yandeYa Tumpa jei cuarãí:

“Mase, outa ara reta amee vaerã trato ipiau vae Israel pegua reta jare Judá pegua reta pe. ⁹ Jocuá trato tenondegua vae amee itenondegua reta pe, aru yave Egipto güi.

Èrei trato ipiau vae uyuavi trato tenondegua vae güi.

Echa'ã jae reta uyapo'ã che jae chupe reta uyapo vaerã vae, trato tenondegua vae amee chupe reta yave.

Jáeramo ayandareco cavi'ã jese reta.

¹⁰ Echa'ã jocua ara reta rendave pe amee ta trato ipiau vae Israel pegua reta pe.

Jae co cua: Ipia pe ambiyemingueta reta cheporoyocui reta re, jare ayapocata chupe reta cheporoyocui reta.

Jae reta chembiadorata.

Echa'ã uicuaata che co jae Tumpa.

Jare che amborita reta.

Echa'ã yugüirecota chembae retarã.

¹¹ Ndarau etei quía omboe jentaigua cheré.

Ndarau etei quía omboe jentarã cheré.

Ndarau etei quía jei íru vae pe: ‘Iyemboe yandeYa re’.

Echa'ã opaete vae - sambiaí reta jare ucuacuaa vae reta - checuata co.

¹² Aipararecota reta. Echa'ã ambiasata chupe reta imbaeyoa reta.

Ndarau ye chemandúa imbaeyoa reta re.”

Jucuarãí jei Tumpa. ¹³ Tumpa jei umeeta co chupe reta trato ipiau vae. Cua uipota jei jocua trato tenondegua vae indechi ma co. Jare mbae indechi vae opa seri ma co oĩ.

9

¹ Tumpa umee yave Israel pegua reta pe trato tenondegua vae, oyocui quirãí umbiadora reta vaerã jocua o ñana pe uyapo reta vae pe. ² Jocuá o güinoi mocui o-rai. Tenondegua vae pe ñugüinoi lámpara reta, jare mesa, jare mbiyape uñeñono tee vae reta Tumpa peguarã. Cua o-rai jee Lugar Santo. ³ Jare jocua Tumpa jo umbiyao vae cuti oĩ íru o-rai Lugar Santísimo jee vae. ⁴ Joco pe ñugüinoi mesa oro pegua mbae ipiche cavi vae sacerdote reta uapi íarambo vae, jare ita reta Tumpa uicuatía mboroyocui reta jese vae jiru. Jocuá jiru ívira pegua vae co, èrei opaete icupe rupi oro catuui. Jare jocua jiru japipe pe ñugüinoi yapepo oro pegua maná oĩ pipe vae, jare Aarón ipopoca joqui vae, jare ita reta Tumpa uicuatía mboroyocui reta jese vae. ⁵ Jare jocua jiru íaramboga jocua oro catuui Tumpa uicuaaca Israel pegua reta pe ipurupareco pipe vae co, jare jocua íarambo ñugüinoi jocua mocui ángel-raanga oro pegua ipõra ete vae. Jocuá nunga ángel jee co querubine. Aipota tõi amimbeu cavi peve jocua jiru íaramboga regua, èrei chepuere'ã añave.

⁶ Opaete cua mbaembae uyeyapocavi ma yave, sacerdote reta jecuaeño uique o-rai tenondegua vae pe, joco pe uyapo vaerã iparaviquí. ⁷ Èrei sacerdote tenondeguaño uique íru o-rai pe penti veseño año pe, jare jecuaeño uruique tugüi. Jae jare íru Israel pegua reta iyoa uicuaa cavi'ã reve ramo, sacerdote tenondegua umee tugüi Tumpa pe opaete jocua mbaeyoa reta re. ⁸ Jucuarãí Espiritu Santo uicuaaca ipuere'ãño uique opaete vae Tumpa oĩ vae pe, jocua o-rai tenondegua vae oĩ rambueve. ⁹ Echa'ã jocua o-rai tenondegua vae penti jaangaño co. Joco pe sacerdote reta umee Tumpa pe ofrenda reta jare maemimba uyeyucacue reta. Èrei jocua ipuere'ã opa umbai jucuarãí umbiadora Tumpa vae imbaeyoa reta. Jare sacerdote reta etei uicuaa uyembai'ã co imbaeyoa reta. ¹⁰ Jaeño güinoi mboroyocui tembü regua reta jare quirãí jae reta uyeyoe vaerã Tumpa coti. Opaete jocua mboroyocui reta ívi peguaño co. Tumpa umimbeu chupe reta jocua mboroyocui reta jae reta uyapo vaerã, Tumpa opaete uyapicatu regua.

¹¹ Èrei Cristo uyeyapo ma sacerdote tenondeguarã uyapo vaerã icavi vae yandave. Jare jae uyapo iparaviquí ara pe. Ara icavi ete jocua Tumpa jo Israel pegua reta ñana pe uyapo vae güi. Echa'ã jocua Tumpa jo ívi peguaño co. ¹² Jare sacerdote tenondegua ívi pegua uique yave Lugar Santísimo pe, uruique capura jugüi jare vaca tairusu vae jugüi. Èrei Cristo uique yave ara pe, uruique jae jugüi etei. Pentí veseño uique jare cuarãí umbiepi

yanembaeyoa reta re. Jáeramo ñanoi ma yembiasa opa mbae vae. ¹³ Penti Israel pegua uyapo yave mbae Tumpa coti uyeminguia vae, sacerdote ipuere uipi toro jugüi pe ani capura jugüi pe ani i vaca ocaicue ndive uyea vae pe oyoe vaerã jete Tumpa coti. Jucuarãi uñeñoño tee Tumpa peguarã. ¹⁴ Èrei Cristo jugüi ipuere ete jocua reta güi. Echa'ã Cristo iyoa mbae vae co. Èrei jae umano uñemee vaerã Tumpa pe Espiritu Santo imeño mai ico vae rupi. Jáeramo jae jugüi ipuere umbai mbaembae mano pegua piyapo vae. Jare picuaata uyembai ma co, pepuere vaerã piyeyocui Tumpa imeño mai ico vae pe.

¹⁵ Jare cua jeco pegua Tumpa uicuaaca ma trato ipiaü vae Cristo rupi. Echa'ã Cristo umano umbiepi vaerã trato tenondegua vae güinoi vae reta imbaeyoa reta re. Jáeramo jocua Tumpa uiparavo vae reta güinoita imbaerã opa mbae vae Tumpa jei umeeta chupe reta vae.

¹⁶ Cuimbae jei yave umee vaerã mbaembae ñru vae reta pe jae umano yave, jae reta ndarau ipuere güinoi jocua mbaembae imbaerã ndei iya umano mbove. ¹⁷ Echa'ã cuimbae umano yave ramo jae reta ipuere güinoi imbaerã jocua mbaembae. Ndarau ipuere güinoi mbaembae jei umeeta vae imeño ico rambueve. ¹⁸ Jáeramo Moisés uiporu tugüi trato tenondegua vae uyeyapo vaerã. ¹⁹ Echa'ã Moisés opa rani umimbeu Israel pegua reta pe opaete mboroyocui reta. Jayave jocua jaicue rupi uiporu vaca tairusu vae reta jugüi jare capura reta jugüi jare i jare ovecha-raagüe uñemipiña vae jare ñana hisopo jee vae uipi vaerã tupapire jare opaete Israel pegua reta. ²⁰ Jare Moisés jei chupe reta cuarãi:

“Cua tugüi uicuaaca peve trato Tumpa umee ma peve vae.

Echa'ã cua trato rupi Tumpa peocui mbae piyapo vaerã.”

Jucuarãi jei. ²¹ Jae ramiño vi Moisés uipi tugüi pe Tumpa jo jare opaete sacerdote reta jembiporu reta. ²² Jare mboroyocui rupi opaete seri uyeyoe Tumpa coti tugüi pe. Jare maemimba reta uyeyuca'ã yave, Tumpa umbiasata'ã tõi Israel pegua reta pe imbaeyoa reta.

Jesús umano güiraa vaerã imbaeyoa reta

²³ Jare opaete cua reta mbaembae ara pegua jaanga retaño co. Jáeramo icavi co uyeyoe vaerã Tumpa coti jucuarãi. Èrei icavi co mbaembae ara pegua ete uyeyoe vaerã Tumpa coti Cristo jugüi pe. Echa'ã Cristo jugüi icavi ete maemimba reta jugüi güi. ²⁴ Cristo uique ma ara pe, uique'ã penti o uñeñoño tee Tumpa peguarã vae Israel pegua reta uyapo vae pe. Echa'ã jocua o penti jaangaño co. Jocua o uyemijaanga Tumpa jo añetete vae re. Cristo ico ma Tumpa oñ vae pe yanembori vaerã. ²⁵ Jare sacerdote tenondegua ivi pegua uruique Lugar Santísimo pe maemimba reta jugüi. Ipuere'ã co uruique jae jugüi. Jare jucuarãi jecuaeño uyapo opa año rupi. Èrei Cristo uñemee'ã ma jecuaeño umano vaerã. ²⁶ Echa'ã jecuaeño jucuarãi uñemee yave mona, umanota tõi uiporara reve jeta vese ivi uyeyapo güive. Èrei añave penti veseño ara taicuegua reta pe ou ma Cristo cua ivi pe umbai vaerã mbaeyoa reta imano rupi. ²⁷ Ìvi pegua reta umano, ou uvãe yave ara umano vaerã. Jare umano yave Tumpa uãata co. ²⁸ Jae ramiño vi Cristo penti veseño uñemee umano vaerã, ipuere vaerã güiraa chugüi reta jeta vae imbaeyoa reta. Jare uyecuaa yeta opaete uyerovia reve uãro ñugüinoi vae reta pe. Èrei uyecuaa ye yave, outa umbiasa ete reta vaerã, outa'ã umbiepi ye vaerã mbaeyoa re.

10

¹ Mboroyocui michiño uicuaaca icavi vae Tumpa uyapota vae. Uicuaaca cavi'ã. Echa'ã maemimba uyeyucacue reta uñemee Tumpa pe opa año. Èrei jocua nunga ipuere'ã etei opa umbai jucuarãi oya Tumpa re vae reta imbaeyoa reta. ² Echa'ã ipuere yave mona opa umbai, uñemee yeta'ã tõi co maemimba uyeyucacue reta. Echa'ã jucuarãi umbiadora Tumpa vae reta ipia pe uyemingueta yeta'ã tõi co jecuaeño mbaeyoa reta güinoi vae re. ³ Èrei jocua maemimba uyeyucacue reta Tumpa pe uñemee vae umimandúa opa año Israel pegua reta imbaeyoa reta re. ⁴ Echa'ã toro jugüi jare capura jugüi ipuere'ã etei umicani ete mbaeyoa reta.

⁵ Jáeramo Cristo ou yave cua ivi pe, jei Tumpa pe cuarãi:

“Ndipota'ã jocua maemimba uyeyucacue uñemee ndeve vae reta.

Jáeramo nde nemeche cheherete uñemee vaerã.

⁶ Maemimba uyeyucacue reta ocai uñemee vaerã ndeve.

Ērei jocua reta nembiyerovia'ā.

Jae ramiño vi maemimba uyeyucacue reta mbaeyoa reta re uñemee vae nembiyerovia'ā.

⁷ Jayave che jae ndeve:

‘Mase, che ayu ayapo vaerā nde ndere vae.

Nde co jae Tumpa.

Echa'ā jucuarāi uyecuatía oī cheré niñee pe.' ”

Jucuarāi jei Cristo Tumpa pe. ⁸ Cristo jei tenonde voi cuarāi:

“Ndipota'ā jocua maemimba uyeyucacue uñemee ndeve vae reta.

Maemimba uyeyucacue reta ocai uñemee vaerā ndeve.

Ērei jocua reta nembiyerovia'ā.

Jae ramiño vi maemimba uyeyucacue reta mbaeyoa reta re uñemee vae nembiyerovia'ā.”

Jucuarāi jei, yepe tēi jocua nunga uñemee Tumpa pe mboroyocui rupi. ⁹ Jayave jocua jaicue rupi jei ye cuarāi:

“Mase, che ayu ayapo vaerā nde ndere vae.

Nde co jae Tumpa.”

Jucuarāi jei. Cua uipota jei jocua maemimba uyeyucacue uñemee vae reta mbaeti ma co mbaerā icavi, jare jocua ipepica pe Cristo jete uñemee Tumpa pe. ¹⁰ Echa'ā Jesucristo umee jete Tumpa pe penti veseño jaeño mai pegua. Jare cua jeco pegua Tumpa ñaneñoño tee iyupeguarā jei vae rupi.

¹¹ Jocua ivi pegua sacerdote reta uyemboi Tumpa jo pe opa ara rupi uyeyocui vaerā Tumpa pe. Jeta vese jae reta umee Tumpa pe maemimba uyeyucacue reta. Opa ara jocua jocuaño uyapo reta. Ērei jocua nunga ipuere'ā etei umbai mbaeyoa reta. ¹² Ērei cua cuimbae Cristo jee vae umano umee vaerā jete Tumpa pe. Penti veseño jucuarāi uyapo, ipuere vaerā umbai mbaeyoa reta jaeño mai pegua. Jare jocua jaicue rupi uguapi Tumpa iyipi pe iyacata coti. ¹³ Jare uguapi joco pe güiive, jecuaeño uāro oī Tumpa opa umiamiri vaerā jovaicho reta regua. ¹⁴ Echa'ā penti veseño umee jete Tumpa pe, jare jucuarāi umbiasa ete jaeño mai pegua Tumpa oñono tee iyupeguarā vae reta.

¹⁵ Jare Espiritu Santo vi umimbeu cua yandeve. Echa'ā uyecuatía oī Tumpa iñee pe quirāi yandeYa tenonde voi jei cuarāi:

¹⁶ “Jocua ara reta rendave pe ameeta cua trato ipiau vae chupe reta.

Ipia pe ambiyeminguetata reta cheporoyocui reta re,

jare ayapocata chupe reta cheporoyocui reta.”

Jucuarāi jei. ¹⁷ Jayave taicue rupi jei cuarāi:

“Jare ndarau ye chemandúa imbaeyoa reta re.”

Jucuarāi jei. ¹⁸ Jare Tumpa umbiasa yandeve yanembaeyoa reta ramo, mbaeti ma mbae ñamee vaerā yanembaeyoa reta re.

Yaique Tumpa oī vae pe

¹⁹ Jáeramo, cherivi reta, yandepuere yaique yaquiye mbae reve Tumpa oī vae pe Jesús jugüi jeco pegua. ²⁰ Echa'ā Jesús umano yanderé yandepuere vaerā yaique Tumpa oī vae pe, maemimba uyeyuca yave sacerdote tenondegua uique Lugar Santísimo pe rami. Jucuarāi Jesús uyapo yandeve penti tape ipiau vae Tumpa oī vae pe, ñanoi vaerā tecove opa mbae vae. ²¹ Yande co jae Tumpa imbae reta, jare Jesús co jae sacerdote tenondegua uyerure Tumpa pe yanderé vae. ²² Jáeramo yaya Tumpa re ñanequirēi ngatu reve. Yarovia Tumpa uipota co yaya vaerā jese. Sacerdote ivi pegua oyase Tumpa re yave, uyeipi tugüi pe jare oyoe jete i icavi vae pe. Jae ramiño vi yande yaya Tumpa re yave, tuyeyoe Tumpa coti mbaeyoa güi yandepia jare yanderete. ²³ Jecuaeño ñaneratangātu yamimbeu vaerā ĩru vae reta pe ñaāro ñaī yayerovia reve vae. Echa'ā yandepuere yarovia catu Tumpa jei umeeta yandeve vae. ²⁴ Jare yayandareco yandiye. Ñañemiatangātu yayerau vaerā jare icavi vae yayapo vaerā. ²⁵ Amocue vae uyembati'ā ma ĩru upurugüirovia vae reta ndive. Agüiye yayapo jae reta rami. Yayembati jare ñañemiatangātu. Ñañemiatangātu ete, yaicuaa jocua ara outa ma oī ramo.

²⁶ Ērei yandeyoa yave ñanequirēi ngatu reve añete vae yaicuaa yave, mbaeti ye ma quía uñemee vaerā mbaeyoa reta re. ²⁷ Jaeño ñaārota yaquiye reve Tumpa ñanerāa vaerā. Echa'ā Tumpa pochí ete jovaicho reta pe. Jae co penti tata mbaembae opa uapi vae rami. ²⁸ Pentí Israel pegua Moisés iporoyocui uyapo'ā vae umano, ĩru mocui ani

mbapi Israel pegua reta umimbeu yave imbaeyoa re. Īru vae reta uiparareco'ã etei. ²⁹ Ērei Tumpa upuruãa yave, güĩrĩro Tumpa Tai vae uiporara eteta Israel pegua reta güi. Echa'ã güĩrĩro Tumpa Tai vae ipia pe uyemingueta Tumpa Tai jugüi mbae'ã co, yepe tēi jocua jugüi uicuaaca chupe trato Tumpa umee chupe vae, jare jocua jugüi rupi Tumpa ofono teeta tēi iyupeguarã. Jucuarã güĩrĩro Tumpa Tai vae güĩrĩro vi Espĩritu Santo ipiacavi. ³⁰ Yaicuaa co Tumpa jare quirãi jae jei Israel pegua reta pe cuarã:

“Che co jae peYa.

Che puãata co.

Che aiporaracata co peve.”

Jucuarãi jei. Jare yaicuaa quirãi jei vi chupe reta cuarã:

“Che co jae peYa.

Pe reta co jae chembae reta.

Che puãata co.”

Jucuarãi jei vi. ³¹ Penti quiyē tuicha vae co Tumpa imeño mai ico vae uiporaraca yave quã nunga vae pe.

³² Ērei pemandúa ara reta uasa vae re. Jocua ara reta pe, Cristo re piyemboe yave, ĩru vae reta uiporaraca ete peve, ěrei jecuaeño pepirãta pepurugüirovia re. ³³ Īru vae reta pererĩro. Echa'ã jei reta icavi mbae vae peve jare uyapo reta icavi mbae vae peve. Jae ramiño vi piñemĩru ma jucuarãi uiporara vae reta ndive. ³⁴ Echa'ã piparareco peresoriru pe ñugüinoi vae reta. Jare ĩru vae reta pemaembae upiro pegüi yave, piyerovia catu. Echa'ã picuaa penoi co ara pe mbaembae icavi ete jocua güi vae. Echa'ã mbaembae ara pegua jaeño mai pegua co. Ērei mbaembae ivi pegua jaeño mai pegua'ã co. ³⁵ Jáeramo jecuaeño perovia catu Tumpa pequiyē mbae reve, Tumpa umee vaerã peve icavi ete vae.

³⁶ Echa'ã Tumpa uipotã pepiaguasu vaerã. Jucuarãi yave, Tumpa umeeta peve jei umeeta vae, opa ma piyapo yave Tumpa jei vae. ³⁷ Tumpa iñee pe uyecuatã oĩ cuarã:

“Imbae jae outa vae outa co.

Ou seri ma co oĩ.

³⁸ Tumpa umbujupi vae güinoita tecove opa mbae vae, upurugüirovia ramo.

Ērei ime yave quã opia Tumpa güi vae, ndarau ayerovia jese.”

Jucuarãi uyecuatã oĩ. ³⁹ Ērei yande jae'ã co Tumpa güi opia vae reta. Echa'ã jae reta yugüiraata cañite pe. Yande yapurugüirovia yanderecove uyembiasaca vaerã.

11

Mburugüirovia regua

¹ Mburugüirovia ñanoi yave, yaicuaa ñanoita co ñããro ñãã yayerovia reve vae, yepe tēi mbaetiño yaecha. ² Yandetenondegua reta umbiyerovia Tumpa ipurugüirovia re.

³ Yapurugüirovia yave, yaicuaa ivi jare opaete ara re ñugüinoi vae uyeyapo co Tumpa jei vae rupi, jare opaete cua reta yandepuere yaecha vae uyeyapo'ã mbae güi. Echa'ã ndei Tumpa uyapo mbove, mbaeti co mbae ave.

⁴ Abel güirovia Tumpa. Jáeramo umee Tumpa pe maemimba uyeyucacue. Cua icavi ete Tumpa pe jocua Caĩn umee Tumpa pe vae güi. Jare Tumpa uicuaaca umbujupi co Abel jocua umee Tumpa pe vae rupi. Jare yepe tēi Abel umano, ěrei jocua uyapo vae mbae uicuaaca yandeve.

⁵ Enoc güirovia Tumpa. Jáeramo Tumpa güiraa ivi güi jecove reve. Mbaeti quã ipuere uvãe chupe. Echa'ã Tumpa güiraa ivi güi. Echa'ã ndei Tumpa güiraa mbove, Tumpa uicuaaca quirãi Enoc umbiyerovia. ⁶ Ērei yarovia'ã yave Tumpa, yandepuere'ã yambiyerovia. Echa'ã yarovia'ã yave ime co penti Tumpa, yandepuere'ã yaya jese. Jae ramiño vi yarovia'ã yave Tumpa uyecuaata co yandeve jecuaeño yaeca yave, yandepuere'ã yaya jese.

⁷ Noé güirovia Tumpa. Jáeramo uyapo chalana guasu jentarã reta oyepē vaerã ĩporu guasu güi. Echa'ã ndei ĩporu guasu uyeyapo mbove, Tumpa uicuaaca Noé pe uyeyapota co. Jáeramo Noé uyapo chalana guasu umbiadora Tumpa ramo. Jare jocua uyapo vae rupi Noé uicuaaca ivi pegua reta icavi mbae vae uyapo vae reta co, jare Tumpa umbujupi ipurugüirovia jeco pegua.

⁸ Abraham güirovia Tumpa. Jáeramo uyapo Tumpa umimbeu chupe uyapo vaerã vae. Echa'ã Tumpa umimbeu chupe oo vaerã ambie ivi Tumpa umeeta imbaerã vae pe. Jayave

Abraham oē oo jenta güi, yepe tēi uicuaa'ā queti oo vae. ⁹ Abraham güirovia Tumpa ramo, icoiño ivi Tumpa jei umeeta chupe vae pe jo carpa guacapi pegua pe. Jucuarāi uyecuaa jocua ivi jae imbae'ā co. Jae ramiño vi Isaac jare Jacob yugüireco joco pe jo guacapi pegua pe, yepe tēi Tumpa jei chupe reta vi umeeta co jocua ivi imbaerā. ¹⁰ Echa'ā Abraham uāro oī uique vaerā tenta guasu Tumpa uyapo vae. Jocua tenta guasu ndarau opa.

¹¹ Sara güirovia Tumpa. Jáeramo Tumpa umee chupe imembi vaerā. Jare Sara imembi, yepe tēi ucuacuaa ete. Echa'ā güirovia Tumpa uyapota co jei uyapota vae. ¹² Jáeramo jeta ete co Abraham iñemoñaeta reta, yepe tēi Abraham indechi ete ma. Jeta ete co yasitata ara re ñugüinoi vae reta jare jeta ete co ivicuīti i guasu jembei pe oī vae. Jae ramiño vi jeta ete co Abraham iñemoñaeta reta.

¹³ Cua reta umano güirovia reve Tumpa, yepe tēi Tumpa ndeiño umee chupe reta jei umeeta chupe reta vae. Jae reta jei iyupe imbae'ā co cua ivi. Ērei uicuaa ima yave Tumpa uyapota co jei uyapota vae. ¹⁴ Jare jei reta yave iyupe cua ivi imbae'ā vae co, uipota jei uāro ñugüinoi ĩru ivi yugüireco pipe vaerā. ¹⁵ Añete co ipia pe uyemingueta yave jocua ivi Abraham oē oo chugüi vae re yugüiraa ye vaerā joco pe, aramoi ipuereta tēi yugüiraa ye joco pe. ¹⁶ Ērei uipota reta ivi icavi ete jocua güi vae. Uipota penti ivi ara pegua. Jáeramo Tumpa imara'ā jee re. Echa'ā jee co Abraham jare Isaac jare Jacob i Tumpa. Jare jae uyapo ma chupe reta tenta guasu jentarā.

¹⁷ Tumpa uipota uicuaa uyapota ra Abraham Tumpa jei chupe uyapo vaerā vae. Jáeramo Abraham uyucata tēi Isaac umee vaerā Tumpa pe. Jucuarāi uyapo güirovia Tumpa ramo. Yepe tēi Tumpa umee ma chupe jei umeeta chupe vae reta, ěrei uyucata tēi tai jae vaēño umee vaerā Tumpa pe. ¹⁸ Echa'ā Tumpa jei ma Abraham pe Isaac re cuarāi: “Nenoita niñemoñaeta reta Isaac rupi.” Jucuarāi jei. ¹⁹ Abraham uicuaa jae uyuca yave tai, Tumpa ipuere umbijecove ye. Jare yandepuere yamijaanga cua uyeyapo vae, yae yave Abraham umbiresive Isaac mano güi.

²⁰ Isaac güirovia Tumpa. Jáeramo uyerure Tumpa pe umivendise vaerā Jacob jare Esaú uyeyapota chupe reta vae re.

²¹ Jacob güirovia Tumpa. Jáeramo umanota ma yave, uyerure Tumpa pe umivendise vaerā José tai reta mocui reve, jare umbiadora Tumpa uyeco oī rambueve ipopoca re.

²² José güirovia Tumpa. Jáeramo umanota ma yave, jei Israel pegua reta pe oēta co yugüiraa Egipto güi, jare oyocui reta jetecue re.

²³ Moisés tu jare ichi güirovia Tumpa. Jáeramo Moisés ichi güi oa ma yave, tu jare ichi oñomi jo pe mbapi yasi. Echa'ā uecha Moisés ipōra ete co, jare uquiye'ā mburuvicha guasu Egipto pegua iporoyocui güi.

²⁴ Moisés güirovia Tumpa. Jáeramo ucuacuaa ma yave, uipota'ā ico vaerā Faraón tayi imembirā. ²⁵ Ipuere tēi uyapo mbaeyoa uyembiyerovia vaerā michi pegua. Ērei uipota ete jocua güi uiporara Tumpa imbae reta ndive. ²⁶ Echa'ā Moisés güirovia icavi ete chupe uñererñroca vaerā Cristo jeco pegua opaete corepoti Egipto pe oī vae güinoi vaerā vae güi. Echa'ā uicuaa icavi ete co Tumpa umeeta chupe vae opaete corepoti Egipto pe oī vae güi.

²⁷ Moisés güirovia Tumpa ramo, oē oo Egipto güi. Uquiye'ā mburuvicha guasu güi, yepe tēi mburuvicha guasu pochi ete chupe. Jare Moisés urupia ima ñana pe. Echa'ā yepe tēi mbaeti quía ipuere uecha Tumpa, ěrei jae ico quía uecha Tumpa vae ico rami. ²⁸ Moisés güirovia Tumpa ramo, omboe Israel pegua reta pascua re. Jocua ara pe jae reta uipi jonque penti penti tugüi pe, agüiye vaerā ángel uyuca tai tenondegua reta. Echa'ā jocua ángel uyuca Egipto pegua reta tai tenondegua vae reta.

²⁹ Israel pegua reta güirovia Tumpa. Jáeramo i Guasu Pita jee vae uasa ivi utini vae rupi uasa rami. Ērei Egipto pegua reta uasa rambueve, i ou ye chupe reta jare opa umbipitupa.

³⁰ Israel pegua reta güirovia Tumpa ramo, Jericó iquēsea ita pegua vae uyapara Israel pegua reta siete ara ma uyere jese yave.

³¹ Cuña aguasa rupi ico vae Rahab jee vae güirovia Tumpa. Jáeramo opaete Jericó pegua güirovia'ā Tumpa vae reta umano yave, Rahab umano'a. Echa'ā jae umbiresive cavi Israel pegua reta uipiāro yave Jericó.

³² Jeta ete ma che jae güirovia Tumpa vae reta re. Chepuere'ā ma amimbeu vaerā peve Gedeón, Barac, Sansón, Jefte, David, Samuel jare Tumpa iñee umimbeu vae reta regua. ³³ Jae reta vi güirovia Tumpa. Jáeramo umiamiri mburuvicha guasu reta, uyapo jupi vae, Tumpa umee chupe reta jei umeeta chupe reta vae, jare Tumpa uyandareco jese reta

agüiye vaerã yaguapãta reta uyuca. ³⁴ Jae reta ombove tata tuicha vae reta. Amocue vae jovaicho reta uipota tãi uyuca quisepecu pe, ãrei ipuere'a. Ipitu reta yave, Tumpa umee chupe reta mbaepuere. Jatangãtu ete reta uñerãro vaerã jae ombosi sundaro reta ambie ivi reta güi yugüero uñerãro vaerã jae reta ndive vae. ³⁵ Amocue cuña reta icuimbae uyeyucaca, jare Tumpa umbijecove ye güero umanocue vae reta ipite güi, jae reta ipuere ye vaerã uyandareco cuña reta re. Īru vae reta uyeyucaca ivira pe. Uiporaraca chupe reta vae reta jei ipuere jecuae yugüireco cua ivi pe, uyapo yave jae reta jei chupe reta uyapo vaerã vae, ãrei uipota'a reta. Echa'a uicuaa Tumpa umbijecove yeta güero umanocue vae reta ipite güi jare jayave icavi eteta chupe reta cua ivi pe jecuae yugüireco vae güi. ³⁶ Īru vae reta uiporara ete uñererãroca jare uñenupaca chicote pe yave. Jare Īru vae reta uñerãroca peresoriru pe jare uyepocuaaca joco pe. ³⁷ Amocue vae jovaicho reta uyapi ita pe uyuca. Īru vae reta jovaicho reta uyasia icúa rupi sierra pe uyuca. Īru vae reta uiporara jovaicho reta jei yave ipuere jecuae yugüireco cua ivi pe, uyapo yave jae reta jei chupe reta uyapo vaerã vae. Īru vae reta uyeyucaca quisepecu pe. Amocue vae uguata opaete que rupi jare jemimonde co jae ovecha ipirecue ani capura ipirecue. Mbaeti etei mbae güinoi reta. Uiporara ete reta. Jovaicho reta uyapo icavi mbae vae chupe reta. ³⁸ Jocua güirovia Tumpa vae reta uguataguata ñana reta rupi jare ivitu guasu reta rupi, jare yugüireco ivicua tuicha vae reta pe. İvi pegua reta iyoa ete. Jáeramo ipuere'a uicuaa icavi ete co jocua güirovia Tumpa vae reta.

³⁹ Opaete jocua reta umbiyerovia Tumpa ipurugüirovia re. Ĕrei Tumpa umee'a chupe reta jei umeeta chupe reta vae. ⁴⁰ Echa'a Tumpa uicuaa yande ñanoita co mbae icavi ete umeeta chupe reta vae güi vae, agüiye vaerã jae reta uyembiasaca ete ndei yande yayembiasaca ete mbove.

12

Yarovia catu Jesús yanembori vaerã

¹ Jeta ete co güirovia Tumpa vae amimbeu peve vae reta. Jocua reta rupi yan-depuere yaicuaa icavi co yandeve yarovia vaerã Tumpa. Jáeramo yamombo yandeyugüi opaete yanembaeyoa. Echa'a mbaeyoa yanembiaivai ete. Yamijaanga penti ñeñocui. Nañeñocuiñocui yave, icavi co yamombo vaerã yandeyugüi opaete poi vae, jare yasi vaerã ñamiaguanta reve. Jare ramioño vi yaico yandepiaguasu reve cua ivi pe. Echa'a Tumpa umee yandeve yaico vaerã cua pe. ² Jare yarovia catu Jesús yanembori vaerã. Echa'a Jesús ipurugüirovia tuicha ete opaete Īru vae reta ipurugüirovia güi. Jae tuicha urupia umano vaerã curusu re. Joco pe oĩ rambueve, Īru vae reta güiriro, ãrei jae jei'a mbae ave jocua re. Echa'a uicuaa taicue rupi uyerovia catuta co. Añave uguapi oĩ Tumpa iyipi pe iyacata coti.

³ Pepia pe piyemingueta Jesús re, quirãi iyoa vae reta icavi mbae vae jei yave icoti, jae umiaguanta. Echa'a pepia pe piyemingueta yave jese, ndarau pecueri jare ndarau pepitu pepia pe. ⁴ Yepe tãi piñerãro mbaeyoa ndive, ãrei ndeño piñerãro pemaño vaerã. ⁵⁻⁶ Tumpa imiari peve penti tu imiari tai pe rami. Echa'a Tumpa ñee pe uyecuatã oĩ cuarãi:

“Cheraĩ, agüiye ndepochi yandeYa uiporaraca ndeve yave agüiye vaerã ndeyoa, jare agüiye ndecueri yandeYa umimbeu ndeve nembayoa yave.

Echa'a yandeYa uiporaraca uau vae pe, agüiye vaerã iyoa.

Jucuarãi uiporaraca chupe, tairã uyapo yave.”

Jucuarãi uyecuatã oĩ. Aramoi pe reta peacañi jocua güi. ⁷ Pemiaguanta Tumpa jucuarãi uiporaraca peve yave. Echa'a Tumpa jucuarãi uyapo, pe reta co jae tai reta ramo. Echa'a tu reta uiporaraca tai pe jucuarãi. ⁸ Yaicuaa opaete tai reta uiporara jucuarãi. Jáeramo piporara'a yave jucuarãi, pe reta jae'a co tai ete reta. ⁹ Añete co, yanderu ivi pegua uiporaraca yandeve, agüiye vaerã yandeyoa, jare yaicuaa icavi co uyapo. Jáeramo agüiye etei yandepochi yandeRu ara pegua uiporaraca yandeve yave yaico vaerã icavi vae yayapo reve. ¹⁰ Echa'a yanderu ivi pegua uiporaraca yandeve michi pegua jei vae rupiño. Ĕrei yandeRu ara pegua uiporaraca yandeve, agüiye vaerã yandeyoa. Cua icavi co yandeve. Echa'a jae iyoa mbae vae co. ¹¹ Añete co, yaiporara ñaĩ yave, yandepiatiti. Yayerovia'a co. Ĕrei taicue rupi jocua yaiporara vae yanembori yayapo vaerã jupi vae yandepiacatu reve, ñamañoño yave Tumpa re yanemboe jese yaiporara vae rupi.

Piyapisaca Tumpa jei vae re

¹²Jáeramo agüiye ma pecueri. Agüiye ma pepitu. ¹³Piyapo jupi vae, agüiye vaerā ipitu vae opia Tumpa güi. Jucuarāi piyapo yave, pepuereta pembori ipitu vae ipirāta vaerā.

¹⁴Piñemiatangātu pepiacatu vaerā opaete vae ndive, jare piñeñoño tee vaerā Tumpa peguarā. Echa'ā uñeñoño tee Tumpa peguarā vaerā ipuere uecha yandeYa Tumpa. ¹⁵Jare piñemoa, agüiye vaerā quía uyerova Tumpa ipiacavi güi, jare agüiye vaerā pembipi piñemitarēi. Echa'ā piñemitarēi yave, piyembiaivaita co jare jeta vae iyoata. ¹⁶Jare piñemoa, agüiye vaerā oī pepite pe aguasa uyapo vae, jare agüiye vaerā oī quía güirō uñeñoño tee Tumpa peguara vae. Esaú jucuarāi uyapo. Echa'ā Esaú umee tiví pe tembfu re Tumpa umeeta tēi Esaú pe vae. Echa'ā Tumpa umeeta tēi co chupe, Esaú co jae Isaac tai tenondegua ramo. ¹⁷Jare picuaa quirāi taicue rupi Esaú uipota tēi güinoi Tumpa umeeta tēi chupe vae. Ērei Isaac jei chupe ipuere'ā co güinoi. Yepe tēi uyerure jese uyao reve, ěrei ipuere'ā etei mbae uyapo. Tu jecuaeño jei chupe ipuere'ā co güinoi.

¹⁸Ērei pe reta mbaeti co Israel pegua ivitu guasu Sinaí iyipi pe ñugüinoi vae reta rami. Echa'ā jocua ivitu guasu ivi pegua co. Israel pegua reta ipuere oya jocua ivitu guasu re. Jocua ivitu guasu re tata jendi oī. Pītumimbi oī jare ivitu ete joco pe. ¹⁹Jare jae reta uyandu trompeta iñee jare Tumpa iñee. Jare Tumpa iñee uyandu ma yave, uyerure Moisés pe agüiye vaerā Tumpa uyemingueta ye chupe reta. ²⁰Echa'ā Tumpa oyocui reta cuarāi: “Penti maemimba upīro yave cua ivitu guasu re, piyapita co ita pe piyuca.” Cua mboroyocui yavai ete Israel pegua reta pe. ²¹Opaete vae uquiye ete uecha vae jeco pegua. Jare Moisés etei jei cuarāi: “Aquiye ete. Ariri ete aquiye ramo.” Jucuarāi jei.

²²Ērei pe reta peya ma ivitu guasu Sión re. Joco pe oī Tumpa imeño mai ico vae jenta guasu. Jae co Jerusalén ara pegua. Joco pe ñugüinoi vi jeta ete ángel reta. ²³Joco pe ñugüinoi vi opaete Tumpa uiparavo tecove ipiau vae güinoi vaerā vae reta. Echa'ā Tumpa uicuatfía jae reta jee ara pe. Opaete vae uyembati joco pe. Jare joco pe oī vi Tumpa - jae uāata opaete vae. Jare joco pe ñugüinoi vi jupi vae reta iespíritu. Jae reta uyembiasaca ete ma. ²⁴Jare joco pe oī vi Jesús. Echa'ā Jesús rupi ñnani trato ipiau vae. Jare joco pe oī vi Jesús jugüi jae yanderipi pipe vae. Jocua tugüi icavi ete tugüi Abel mbae uipi pipe vae güi.

²⁵Tumpa pemingueta oī. Piñemoa piyapo vaerā jae jei peve piyapo vaerā vae. Israel pegua reta uiporara uyapo'ā Tumpa ivi pe jei chupe reta uyapo vaerā vae ramo. Jae ramiño vi yande yaiporara eteta, yayapo'ā yave Tumpa jei yandeve yayapo vaerā vae. Echa'ā añave Tumpa umingueta oī ara güi. ²⁶Tumpa ivi pe umingueta yave, iñee umicāta ivi. Ērei añave jei cuarāi: “Tamicāta penti vese ye ivi jare ara.” Jucuarāi jei. ²⁷Jare cua penti vese ye jei vae uipota jei Tumpa umbaita co umicāta vae reta. Echa'ā Tumpa etei uyapo jocua reta. Jucuarāi uyapota Tumpa jecuaeño ñugüinoi vaerā ipuere'ā uñemicāta vae reta.

²⁸Jare Tumpa umee yandeve yaico vaerā iporoyocua pe, jare iporoyocua ipuere'ā uñemicāta. Jáeramo ñamee yasurupai Tumpa pe ipiacavi re. Echa'ā Tumpa ipiacavi rupi yandepuere yayeyocui chupe, jare jucuarāi yambiyerovia. Jecuaeño yayeyocui chupe yambiadora jare yaipiu reve. ²⁹Echa'ā Tumpa co jae penti tata opaete mbaembae uapi vae rami.

13

Quirāi pembiyerovia Tumpa

¹Cheriví reta, jecuaeño piyerau.

²Jecuaeño pequirēi pemingarū vaerā mboupa reta. Echa'ā jucuarāi amocue vae umingarū ángel reta uicuaa mbae reve. ³Jecuaeño pemandúa peresorirū pe ñugüinoi vae reta re, pemanduata tēi co jese reta jae reta ndive peí yave rami. Amocue vae uiporara ñugüinoi ĩru vae reta uyapo icavi mbae vae chupe reta ramo. Pemandúa vi jese reta. Echa'ā pe reta vi pico cua ivi pe, jare aramoi ĩru vae reta uiporaracata peve vi jucuarāi.

⁴Umenda vae reta jecuaeño tuyapo jupi vae güireco vae coti. Agüiye quía tuyuvanga menda re. Echa'ā Tumpa uāata aguasa uyapo vae reta jare menda re uyuvanga vae reta.

⁵Agüiye pico jecuaeño jeta corepoti pipota ete reve. Pemee yasurupai Tumpa pe mbaembae penoi vae re. Agüiye piñemiro ĩru vae pe jeta'ā mbaembae penoi ramo.

Echa'a Tumpa etei jei cuarāi: "Jecuaño aicota nde ndive nombori vaerā." Jucuarāi jei.
⁶Jáeramo yandepuere yae yaquíye mbae reve cuarāi:

"YandeYa chembori.

Ndarau aquiye mbae güi.

Íru vae reta ndarau ipuere mbae uyapo cheve cheminguiye vaerā."

Jucuarāi yandepuere yae.

⁷Piyapisaca cavi petenondegua reta iñee re. Echa'a jae reta umimbeu peve Tumpa iñee. Pepurugüirovia jae reta upurugüirovia rami. Echa'a picuaa quirāi jae reta yugüireco umbiadoraca vaerā Tumpa. ⁸Jesucristo uyepepica'a etei. Iyipi güive jare jaño mai pegua uyepepica'a. ⁹Ime amocue moromboe uyuavi vae ore ndoporomboe'a jese vae. Agüiye perovia jocua nunga moromboe. Echa'a perovia yave, pepiata Tumpa güi. Icavi co ñañemimirāta vaerā yandepurugüirovia re Tumpa ipiacavi rupi. Ndarau yandepuere ñañemimirāta yandepurugüirovia re mboroyocui reta tembú regua rupi. Echa'a íru vae reta uipota tēi uñemimirāta ipurugüirovia re jocua rupi, ěrei ipuere'a.

¹⁰Israel pegua reta jou maemimba uyeyucacue isoo Tumpa jo ivi pegua pe uñe-meearenda pe. Yande vi ñanoi jocua maemimba uyeyucacue uñemeearenda rami vae, jare jae reta ipuere'a uñemiiru yande ndive joco pe. ¹¹Echa'a sacerdote tenondegua güiraa maemimba uyeyucacue reta jugüi Lugar Santísimo japipe pe Israel pegua reta imbaeyoa reta re. Jayave íru vae reta güiraa maemimba uyeyucacue reta isoo tenta reta güi ñana pe uapi. ¹²Jáeramo Jesús vi umano uiporara reve tenta guasu güi ñana pe, ñaneño tee vaerā Tumpa peguarā jae jugüi rupi. ¹³Jáeramo yaeya yandeyugüi yandereco mai indechicue vae jare yaya Jesucristo re, yepe tēi íru vae reta ñanereriro güirō Jesús rami. ¹⁴Echa'a mbaeti ñanoi penti tenta guasu jaño mai pegua oí vae cua ivi pe. ěrei ñaño ñañ jocua tenta guasu oíta vae. ¹⁵Jáeramo jecuaño yambiadora Tumpa Jesús rupi, yambiyerovia vaerā Tumpa. Cua uipota jei ñanemiari yave íru vae reta pe, yamimbeu chupe reta Tumpa regua. ¹⁶ěrei agüiye ñaneatēi yayapo vaerā icavi vae jare ñamee vaerā mbaembae iparavete vae reta pe. Echa'a cua yayapo yave, yambiyerovia Tumpa.

¹⁷Piyapisaca cavi petenondegua reta iñee re jare piyapo jae reta jei peve piyapo vaerā vae. Echa'a jae reta uyandereco oí perecove re, jare uicuaa Tumpa uāata co iparaviqui re. Jucuarāi piyapo yave, jae reta uparaviquita Tumpa pe uyerovia reve, ipiatiti mbae reve. Echa'a ipiatiti reve uparaviqui yave Tumpa pe, ndarau icavi peve.

¹⁸Piyerure Tumpa pe oreré. Echa'a nduicuaa jecuaño nduyapo icavi vae pecoti. Jecuaño nduipota nduyapo jupi vae. ¹⁹Jare che pumiñera ete piyerure vaerā Tumpa pe, jae chemondo ye vaerā imambae pepi.

Tumpa ndiveño toí

²⁰Añave ayerure Tumpa mbiacatu umee yandevae vae pe peré. YandeYa Jesús imbaepuere tuicha ete co, jare jae uyandereco yanderé penti ovecha reta iyandarecoa iovecha reta re uyandereco rami. YandeYa Jesús umano, Tumpa ipuere vaerā umee yandevae itrato opa mbae vae. Jáeramo Tumpa umbijecove ye güeru umanocue vae reta ipite güi. ²¹Tumpa tuparaviqui pepia pe, piyapo vaerā icavi vae, jare jucuarāi piyapo vaerā jei vae. Tumpa tuparaviqui pepia pe Jesucristo rupi, pe reta piyapo vaerā jocua umbiyerovia Tumpa vae. Jesucristo tuyembiaadoraca jaño mai pegua. Amén.

²²Cherivi reta, che pumiñera pepiaguasu vaerā cua che jae peve piyapo vaerā vae re. Echa'a mboviño aicutía peve cua tupapire pe. ²³Tamimbeu peve cua: Yanderivi Timoteo oē ma peresoriru güi. Aramoi jae oota imambae pepi. Jare che aata jae jupie.

²⁴Tumpa ndiveño toí opaete petenondegua reta jare opaete íru Tumpa oñono tee iyupegarā vae reta. Italia pegua reta vi jei peve Tumpa ndiveño peí.

²⁵Tumpa tumee opaete peve ipiacavi. Amén.

LA CARTA DE SANTIAGO

¹ Che co jae Santiago. Che co jae Tumpa jare yandeYa Jesucristo jembiocui. Aicutatía aĩ ua tupapire doce ati Israel pegua uñemiai ñugüinoi vae reta pe. Tumpa ndiveño peĩ.

Aracuaa Tumpa umee vae

² Cheriví reta, amo pe yavai ete peve pico cavi vaerã Tumpa coti. Ërei jucuarã yave, piyerovia eteño. ³ Echa'ã picuaa co quirã mbaembae pemiavai vae uicuaaca peve ipirãta co pepurugüirovia. Jare cua picuaa yave, pepiaguasu ucuacuaa. ⁴ Ërei pemaño pepiaguasu re ucuacuaa cavi vaerã, pepiaguasu ete vaerã. Jucuarã yave, ndarau mbae uata peve. Piyeyocui cavita Tumpa pe. ⁵ Ime yave quía aracuaa uata chupe vae, tuyerure Tumpa pe jese. Echa'ã Tumpa uipota ete umee aracuaa penti penti pe. Ndarau uñeengata quía pe mbaeti aracuaa güinoi ramo. Umeeta co aracuaa chupe. ⁶ Ërei tuyerure Tumpa pe jese mburugüirovia reve. Agüiye tuyerure chupe jese mburugüirovia mbae reve. Echa'ã uyerure chupe jese mburugüirovia mbae reve vae iaparoa i guasu pe oĩ vae rami co. Echa'ã ivitu uyepeyu yave, coti coti güiraa. ⁷ Jocua uyerure yandeYa Tumpa pe aracuaa re mburugüirovia mbae reve vae agüiye ipia pe tuyemingueta Tumpa umeeta co mbae chupe. ⁸ Echa'ã yepe tẽi uyerure Tumpa pe mbae re, ãrei güirovia'ã Tumpa umeeta co chupe. Jocua nunga uicuaa'ã etei mbae uyapo vaerã.

⁹ Pentí upurugüirovia vae iparavete vae tuyerovia jeta Tumpa umee chupe vae re. ¹⁰ Ërei upurugüirovia vae icocatu vae tuyerovia Tumpa umimichi ramo. Echa'ã yepe tẽi icocatu, ãrei umanota co penti mbaepoti umano rami. ¹¹ Guarasi jasi yave jare ivitu jacu ou yave, ñana ipiru jare mbaepoti reta umano. Ipõra'ã ma. Jae ramiño vi icocatu vae aramoioño umanota.

Ipiaguasu vae uicuaata ipurugüirovia ipirãta co

¹² Tuyerovia ipiaguasu vae jocua mbaembae umbiavai vae ou chupe yave. Echa'ã uicuaata ipurugüirovia ipirãta co jare uñemeeta chupe tecove opa mbae vae. Echa'ã yandeYa jei umee vaerã tecove opa mbae vae opaete uau vae reta pe. ¹³ Ime yave quía yavai ete chupe ico cavi vaerã Tumpa coti vae, jare jocua jeco pegua uipota yave uyapo mbaeyoa, agüiye tei: "Tumpa uipota ayapo vaerã mbaeyoa." Echa'ã Tumpa uipota'ã etei uyapo mbaeyoa. Jae ramiño vi uipota'ã etei quía uyapo vaerã mbaeyoa. ¹⁴ Ërei penti penti ipiyemingueta icavi mbae vae rupi uipota uyapo mbaeyoa. Echa'ã jocua mbaeyoa icavi echa chupe uyapo vaerã. ¹⁵ Ipiayemingueta icavi mbae vae reta uyapoca mbaeyoa reta. Jare taicue rupi mbaeyoa upuruyuca.

¹⁶ Agüiye petaví, cheriví reta aau vae. ¹⁷ Tumpa umee mbaembae yandeve ipiacavi ramo, jare opaete umee yandeve vae icavi ete co. Jae uyapo tembipe jare uyepepica'ã etei. Jecuaño ipiacavi yandeve. ¹⁸ Tumpa uipota ramo, yandeapo tai retarã ñee añete vae rupi, ñaneño tee vaerã iyueguarã, mbae yagüiye vae reta nondegua vae Tumpa pe uñeño tee rami.

Piyapo ñee piyapisaca jese vae

¹⁹ Jáeramo, cheriví reta aau vae, penti penti tuipota ete tuyapisaca, agüiye tiñee rai, agüiye tipochi rai. ²⁰ Echa'ã pochi vae ndarau uyapo jupi vae Tumpa uipota tẽi uyapo vaerã vae. ²¹ Jáeramo peeya opaete pichii vae jare opaete icavi mbae vae. Jare perovia piñemimichi reve ñee pepia pe uñeño vae. Echa'ã jucuarã yave, piyembiasacata co.

²² Ërei piyapo ñee piyapisaca jese vae. Agüiye piyapisacaiño jese. Echa'ã piyapisacaiño yave ñee re, piyembitaviño co peĩ. ²³ Ime yave quía ñee uyapisaca jese vae uyapo'ã vae - uyapisacaiño jese - jae co espejo pe umae iyee vae rami. ²⁴ Yepe tẽi umae ma iyee, ãrei joco güi oo rupive ñacañi uyeecha vae güi. ²⁵ Ërei ime yave quía jecuaño mboroyocui icavi ete vae oporoyora vae re uyapisaca cavi vae, ñacañi'ã yave uyapo vaerã mboroyocui jei vae uyapisaca jese yave, Tumpa umivendiseta uyapo ramo.

²⁶ Ime yave quía mbaembae uyapo vae rupi Tumpa pe uyeyocui echa vae, tuñemoa cavi mbae jei vae re. Echa'ã uñemoa cavi'ã yave mbae jei vae re, uyembitavi co oĩ, jare mbaembae uyapo vae umbiyerovia'ã etei Tumpa. ²⁷ Añetete yaiporta yave

yayapo mbaembae yayeyocui vaerã yandeRu Tumpa pe, yaa yapou tirẽi reta jare cuña ime umano vae reta uiporara ñugüinoi vae ipi, jare agüiye yayapo icavi mbae vae upurugüirovia mbae vae reta uyapo vae.

2

Iccatu vae reta jare iparavete vae reta

¹ Cherivi reta, pe reta perovia yandeYa Jesucristo re. Jae uyembidoraca ma. Jáeramo agüiye piparavo pipiu vaerã iccatu vae reta jare perĩro vaerã iparavete vae reta. ² Aramoi uiqueta piyembatia pe cuimbae iccatu vae jare cuimbae iparavete vae. Cuimbae iccatu vae jemimonde ipõra ete jare güinoi ipoãcaregua oro pegua vae. Ërei cuimbae iparavete vae jemimonde indechi ete. ³ Pemaecavi yave jemimonde ipõra ete vae re jare pere yave chupe: “Eguapi cua pe. Cua tenda icavi co”; jare pere yave iparavete vae pe: “Iyemboi joco pe”; ani: “Eguapi ivi pe”, ⁴ pipiu co peĩ jocua iccatu vae jare perĩro co peĩ iparavete vae. Icavi'ã jucuarã pepuruyapo vaerã. Icavi mbae co pepia pe piyemingueta.

⁵ Piyapisaca cheré, cherivi reta aau vae. Tumpa uiparavo iparavete vae reta iccatu vaerã ipurugüirovia re jare güinoi vaerã imbaerã iporoyocua pe. Echa'ã jocua Tumpa jei umeeta opaete uau vae reta pe. ⁶ Ërei pe reta perĩro iparavete vae reta. Picuaa co quirã iccatu vae reta uyembiiya pembaembae re jare uñeapo peré. ⁷ Tumpa peparavo Jesucristo jee re. Ërei picuaa co quirã iccatu vae reta jei icavi mbae vae jocua tee icavi vae coti.

⁸ Tumpa iñee pe uyecuatía oĩ cuarã: “Eau nderapicha nde ndiyerau rami.” Cua co jae mboroyocui Tumpa iporoyocua pegua. Piyapo yave cua mboroyocui, piyapo co icavi vae. ⁹ Ërei piparavo yave pipiu vaerã iccatu vae reta jare perĩro vaerã iparavete vae reta, piyapo mbaeyoa. Echa'ã mboroyocui uicuaaca peve piyavi co mboroyocui. ¹⁰ Ime yave quía opaete mboroyocui jei vae uyapo cavi vae, penti uyavi yave, uyavi ma opaete mboroyocui. ¹¹ Mboroyocui pe uyecuatía oĩ cuarã: “Agüiye iyuvanga menda re.” Ërei jae ramiño vi uyecuatía oĩ cuarã: “Agüiye epuruyuca.” Aramoi nde ndiyuvanga'ã menda re. Ërei ndepuruyuca yave, ndiyavi ma mboroyocui. ¹² Tumpa perãata mboroyocui oporoyora vae rupi. Jáeramo piyemingueta cavi jare piyapo icavi vae. ¹³ Echa'ã ime yave quía uiparareco'ã japicha vae, Tumpa uãata uiparareco mbae reve, yepe tẽi Tumpa upuruparareco uyerovia reve upuruãa yave.

Mburugüirovia jare mboroyocui jei vae

¹⁴ Cherivi reta, aramoi quía jei güinoi co mburugüirovia, Ërei uyapo'ã mboroyocui jei vae. Jucuarã yave, ipurugüirovia mbae'ã co. Ndarau uyembiasaca ipurugüirovia rupi. ¹⁵ Aramoi penti perivi ani penti perindi mbaeti güinoi jemimonderã jare jemiurã. ¹⁶ Pere yave chupe: “Tumpa reño ecua”, Ërei pemee'ã yave chupe mbaembae uata chupe vae, jocua pere vae mbae'ã co. ¹⁷ Jae ramiño vi piyapo'ã yave mboroyocui jei vae, jaeño mburugüirovia penoi, jare jocua mbae'ã co.

¹⁸ Aramoi quía jeita: “Nde ndere nenoi co mburugüirovia jare che jae ayapo mboroyocui jei vae.” Nde ndepuere'ã ndicuaaca cheve ndepurugüirovia. Echa'ã ndiyapo'ã mboroyocui jei vae. Ërei che aicuaacata ndeve chepurugüirovia mboroyocui jei vae ayapo vae rupi. ¹⁹ Nde nderovia ime co pentiño Tumpa. Icavi co jocua nderovia vaerã. Ërei aña reta vi güirovia jocua. Ërei jae reta uriri uquiye ramo. ²⁰ Nde co jae iyaracuaa mbae vae. ¿Ndipota pa aicuaaca vaerã ndeve quirã ndepurugüirovia mbae'ã co, ndiyapo'ã yave mboroyocui jei vae? ²¹ Nemandúa yandetenõdegua Abraham re. Jae uyembujupica uyapo vae re, umee tai Isaac Tumpa pe uñemearendã pe yave. ²² Ndepuere ndicuaa quirã Abraham ipurugüirovia uyapoca chupe Tumpa jei chupe uyapo vaerã vae. Abraham uyapo vae uicuaaca icavi ete co ipurugüirovia. ²³ Jare uyeyapo Tumpa iñee pe uyecuatía oĩ vae. Echa'ã uyecuatía oĩ cuarã: “Abraham güirovia Tumpa, jare Tumpa umbujupi ipurugüirovia jeco pegua. Jare Abraham uyembijee Tumpa iamigo pe.” Jucuarã uyecuatía oĩ. ²⁴ Jáeramo pepuere picuaa quirã Tumpa umbujupi mboroyocui jei vae uyapo vae. Umbujupi'ã mburugüiroviaño güinoi vae.

²⁵ Jae ramiño Rahab aguasa rupi ico vae uyembujupica uyapo vae re, Israel pegua reta Josué omondo vae re umaeño upita vaerã jenta pe yave jare omondo ye ambie tape rupi yave.

²⁶ Penti jete tecove mbaeti güinoi vae umano ma co. Jae ramiño vi ndepurugüirovia mbae'ã co, ndiyapo'ã yave mboroyocui jei vae.

3

Ñanecū

¹ Cherivi reta, agüiye pipota opaete piyeyapo vaerã oporombocoe vae retarã. Echa'ã picuaa quirãi oporombocoe vae reta uyavi yave, uyembijeco ete ñru vae reta güi. ² Echa'ã yande opaete yayavi. Ime yave quía uyavi'ã jei vae re vae, jae icavi ete co. Jocua nunga güinoi mbaepuere opaete jete re. ³ Mase, ñañoño cavayu reta iyuru pegua iyuru pe, jae reta yugüiraa vaerã yaipota vae coti. Jucuarãi yandepuere yarovarova cavayu reta. ⁴ Jae ramiño vi yepe tẽi chalana guasu reta tuicha ete jare yepe tẽi amo pe ivitu tanta vae güiraa i guasu rupi, yepe tẽi chalana guasu itimón michi ete, ãrei pipe chalana guasu uruguata vae ipuere güi rovarova chalana guasu jae uipota vae coti. ⁵ Jae ramiño vi ñanecū michi co, ãrei pipe yandepuere yayembicate ete.

Penti tata michi ete jendĩ vae ipuere uapĩ ñuu guasu. ⁶ Jare ñanecū penti tata rami co. Uyapoca jeta ete icavi mbae vae. Yepe tẽi yanderete pegua co, ãrei uyapo icavi mbae vae opaete yanderete pegua pe. Echa'ã tata mbaembae uapĩ rami, ñanecū uyapoca yandave icavi mbae vae. Jare cua icavi mbae vae ou cañitei güi ete. ⁷ Ivi pegua reta umimaso ma ipotave maemimba reta, jare güira reta, jare mboi reta, jare jevae i rupigua reta. Güinoi reta mbaepuere umimaso vaerã. ⁸ ãrei yandepuere'ã ete ñamimaso ñanecū. Yandepuere'ã jese. Jecuaeño uyapoca yandave jeta ete icavi mbae vae. Imbayachi ete vae rami co. ⁹ Ñanecū pe yambiadora yandeRu Tumpa. Jae ramiño vi ñanecū pe yayepipeyu ñru vae reta re, yepe tẽi Tumpa uyapo reta jae ete rami. ¹⁰ Ñanecū pe yambiadora Tumpa jare yayepipeyu ñru vae reta re. Cherivi reta, icavi'ã yayapo vaerã cuarã. ¹¹ I icavi vae jare i ro vae ipuere'ã ete i oẽ penti icua i oẽ vae güiño. ¹² Iva ipuere'ã ete umee saini reta. Jae ramiño vi uva ipuere'ã ete umee iva reta. Jae ramiño vi penti icua i oẽ vae ipuere'ã ete umee i icavi vae jare i ro vae.

Piyerure Tumpa pe aracuaa re

¹³ Ime yave quía pepite pe iyaracuaa vae, tuico cavi. Jucuarãi yave, icavi vae uyapo vae uicuaacata quirãi iyaracuaa co uñemimichi reve. ¹⁴ ãrei peacatãa yave ñru vae reta re jare pepochi yave chupe reta, agüiye piyembicate. Echa'ã piyembicate yave, peapu co. Piyapo'ã peĩ añete vae rupi. ¹⁵ Jucuarãi piyapo yave, piyerure'ã peĩ Tumpa pe umee vaerã peve aracuaa. Pico upurugüirovia mbae vae reta yugüireco rami. Pico pere vae reño. Pico aña reta yugüireco rami. ¹⁶ Echa'ã peacatãa yave ñru vae reta re jare pepochi yave chupe reta, piñerãrota uyupii jare piyapota opaete mbae icavi mbae vae. ¹⁷ ãrei piyerure yave Tumpa pe umee vaerã peve aracuaa, ndarau piyapo picñi vae. Pepiacatuta co. Pepiaguasuta co. Piyapota co Tumpa uipota piyapo vaerã vae. Pipararecota co opaete vae. Pepiacavita co. Pepirãta co pepurugüirovia re. Ndarau pepurumbitavi. ¹⁸ Pe reta penoi yave mbiacatu, pico pepiacatu reve. Jucuarãi yave, piyapota jupi vae.

4

Cua ivi pegua iamigo oyovaicho Tumpa ndive

¹ ¿Maera pa piñerãro uyupii? Tamimbeu peve. Piñerãro uyupii, ime ñugüinoi icavi mbae vae pepia pe ramo. ² Pipota tẽi mbaembae, ãrei penoi'ã. Pepuruyuca jare jecuae pipota tẽi mbaembae, ãrei pepuere'ã penoi. Piñerãro uyupii. ãrei penoi'ã, piyerure'ã Tumpa pe jese ramo. ³ Piyerure tẽi mbaembae re Tumpa pe, ãrei jae umee'ã peve. Piyerure cavi'ã. Echa'ã piyerure mbaembae re piporu vaerã pepia jei vae reño. ⁴ Pe reta menda re uyuvanga vae reta rami co. ¿Picuaa'ã pa quirãi cua ivi pegua iamigo oyovaicho Tumpa ndive? Jáeramo pipota yave piyeyapo ivi pegua iamigorã, piyeyapota co Tumpa jovaichorã. ⁵ Añete vae co cua Tumpa ñnee pe uyecuatía oĩ vae: “Espíritu Santo yandepia pe ico vae yanderau ete.” Jucuarãi uyecuatía oĩ. ⁶ ãrei Espíritu Santo umee yandave jeta

ete ipiacavi. Echa'á Tumpa ñnee pe uyecuatía oĩ cuarái: “Tumpa oyovaicho uyembicate vae reta ndive. Ērei umee ipiacavi uñemimichi vae reta pe.” Jucuarái uyecuatía oĩ.

⁷ Jáeramo piyapo Tumpa uipota piyapo vaerá vae. Piñerāro aña guasu ndive, jare jae osita pegüi. ⁸ Peya Tumpa re jare Tumpa oyata peré. Pe reta co jae iyoa vae reta. Agüiye ma piyapo pichii vae. Piyoe pepia agüiye vaerá penoi pepiayemingueta icavi mbae vae. ⁹ Pepiatiti jare piyao. Pepiatiti pepuca vaerāve. Pepiatiti piyerovia vaerāve. ¹⁰ Piñemimichi yandeYa jovai, jare jae pembutuichacata.

Agüiye pere icavi mbae vae uyucoti

¹¹ Cherivi reta, agüiye pere icavi mbae vae uyucoti. Ime yave quía jei icavi mbae vae tivi coti vae, uāa co oĩ tivi. Jocua nunga jei oĩ icavi mbae vae mboroyocui coti jare uāa co oĩ mboroyocui. Ērei neāa yave mboroyocui, ndiyapo'á mboroyocui jei vae. Jaeño neāa mboroyocui. ¹² Jaeño Tumpa umee mboroyocui jare ipuere upuruāa. Jae ipuere upurumbiasa jare ipuere upurumbai. Nde ndepuere'á etei ndepuruāa.

Picuaa'á mbae ra uyeyapota piareve pe

¹³ Piyapisaca michi pegua cua re. Echa'á pe reta pere cuarái: “Añave ani curiye yaata jocua tenta guasu pe, jare yaicota joco pe penti año pegua. Yaguata mbaembae jare ñameeta mbaembae ñamingana vaerá corepoti.” Jucuarái pere. ¹⁴ Ērei pe reta picuaa'á mbae ra uyeyapota piareve pe. Picuaa'á imeñota ra peĩ piareve pe. Echa'á perecove ivíti rami co. Uyecuaa michi peguaño. Jayave imambae mbaeti ma oĩ. ¹⁵ Jáeramo pereta tēi cuarái: “YandeYa uipota yave, yaicota joco pe jare yayapota jocua jocua.” Jucuarái pereta tēi. ¹⁶ Pere'á yave jucuarái, piyembicate co peĩ pe reta etei piyapota vae re. Jare jucuarái piyembicate yave, piyapo icavi mbae vae.

¹⁷ Jáeramo picuaa yave mbae icavi piyapo vaerá vae, piyapo'á yave, peyoa co.

5

Iccatu vae icavi mbae vae uyapo vae reta

¹ Piyapisaca michi pegua, picocatu vae reta. Piporara eteta co. Jáeramo piyapo pesapicai reve. ² Jeta ete penoi vae jepita'á mbae ave, jare cupii reta urucumeguata peremimonde ipōra ete vae reta. ³ Oro jare corepoti penoi vae opata iyuquiri. Jare jocua uicuaacata pe reta piyapo co icavi mbae vae. Jáeramo piporarata co, tata yanderapi yave yaiporara rami. Picocatu co. Ērei ndarau penoi ara reta piyerovia vaerá jeta ete penoi vae re. ⁴ Mase, uparaviqui peve vae reta umbaeviro peco reta pe, ěrei pembiepi'á chupe reta. Jae reta ñeengueta peve. Jare yandeYa uyandu ma quirái ñeengueta peve jocua umbaeviro vae reta. ⁵ Cua ivi pe pico rambueve, piyecou tembú icavi vae pe jare piporu pecorepoti piyapo vaerá jeta icavi mbae vae. Piyeminguira ma co. Ērei imambae pemanota. ⁶ Pe reta pembijeco jocua jupi vae jare piyuca vi. Jare jae ipuere'á uyerepi pegüi.

Pepiaguasu jare piyerure Tumpa pe

⁷ Jáeramo, cherivi reta, pepiaguasu yandeYa ou ye regua. Tamijaanga umaeti vae. Umaeti yave, uāro ima güinoi vaerá mbaeviro. Ipiaguasu ete. Echa'á oquñoi yave, temiti ucuacuuaa jare yagüiye. ⁸ Jae ramiño vi pe reta pepiaguasu. Jecuaeño piñemiatangātu. Echa'á uyaro ma yandeYa ou ye vaerá.

⁹ Agüiye piñeenguru piyupe, cherivi reta. Echa'á piñeenguru yave piyupe, piyembijecota. Echa'á upuruāa vae imambae outa uvāe. ¹⁰ Cherivi reta, pemandúa Tumpa ñnee araca umimbeu vae reta re. Jae reta imiari iru vae reta pe yandeYa jee re. Jae reta uicuaaca yandevē quirái yaiporara yave, icavi co ñamiaguanta vaerá yandepiaguasu reve. ¹¹ Añete co, yande yae uyerovia ma co jucuarái umiaguanta vae reta. Picuaa co quirái Job ipiaguasu ete, jare quirái yandeYa umivendise ete taicue rupi. Echa'á yandeYa yanderau jare yandeparareco ete.

¹² Ērei, cherivi reta, agüiye mbae pere ara jee re ani ivi jee re ani mbae jee re ave. Pere “añete co” ani “añete'á co.” Uasa pere yave, peyoata co jare Tumpa perāata co.

¹³ Ime yave quía pepite pe uyemipia'á oĩ vae, tuyerure Tumpa pe. Ime yave quía pepite pe uyerovia vae, tumbiadora Tumpa canta pe. ¹⁴ Ime yave quía pepite pe imbaerasi vae, tueni upurugüirovia vae reta itenondegua reta. Jayave jae reta toñoño aceite imbaerasi vae re yandeYa jee re, jare tuyerure Tumpa pe jese. ¹⁵ Jare mburugüirovia reve uyerure

reta yave, imbaerasi vae ucuera. Echa'ã yandeYa umbigüerata. Jare imbaerasi vae uyapo yave mbaeyoa reta, Tumpa umbiasata chupe. ¹⁶ Peyoa yave uyucoti, pemimbeu piyupe. Jayave piyerure piyee Tumpa pe, Tumpa pembigüera vaerã. Penti jupi vae uyerure yave ipia reve, Tumpa uyapota jeta ete chupe. ¹⁷ Elías co jae penti ivi pegua yande rami. Èrei jae uyerure ipia reve Tumpa pe agüiye vaerã oqui. Jare oqui'ã etei mbapi año jare seis yasi. ¹⁸ Jayave Elías uyerure ye Tumpa pe jare uyembipi oqui jare temiti ucuacuaa ye.

¹⁹ Cherivi reta, ime yave quía pepite pe añete vae güi opia vae, jare ñru vae ombori yave umiñatima ye vaerã añete vae pe, ²⁰ picuaa cua: Jocua oporombori vae uepi opia vae jecove mano güi, jare jucuarãi ombori ramo, Tumpa umbiasata opia vae pe opaete imbaeyoa.

PRIMERA CARTA DEL APOSTOL SAN PEDRO

¹ Che co jae Pedro. Che co jae Jesucristo jemimondo. Aicutatía aī cua tupapire opaete Israel pegua Ponto jare Galacia jare Capadocia jare Asia jare Bitinia rupi uñemai vae reta pe. ² YandeRu Tumpa peparavo jare ndei ivi uyeyapo mbove uicuaa pe reta piyeyapota co tai retarā. Jare Espiritu Santo peñono tee Tumpa peguarā. Oyoe ma pepia Jesucristo jugüi pe. Jáeramo añave piyapo Tumpa uipota piyapo vaerā vae. Tumpa tumee peve jeta ete ipiacavi jare ipiacatu.

Ñãaro ñaī yayerovia reve

³ Tuyembiadoraca Tumpa. Jae co yandeYa Jesucristo Tu. Jae yandeparareco ete. Jáeramo yandeyapo tai retarā. Jare Jesucristo icove ye ou umanocue vae reta ipite güi ramo, añave ñãaro ñaī yayerovia reve. ⁴ Tumpa uñuvatu ma peve ara pe pembraerā. Jocua icavi ete co. Ipuere'ā etei uyepepica jare ndarau etei opa. ⁵ Jare imbaepuere pe Tumpa uyandareco oī peré perovia jese ramo. Jáeramo piyembiasacata. Cua uyecuaata ara taicuegua reta pe.

⁶ Jáeramo piyerovia ete cua re, yepe tēi aramoi añave michi pegua pepiatiti mbaembae yavai peve vae jeco pegua. ⁷ Echa'ā cua mbaembae yavai peve vae uicuaacata peve ipirāta ra pepurugüirovia. Oro yambichiriri tata pe, yandepuere vaerā yamombo chugüi iquiacue, ipōra ete oī vaerā oro, yepe tēi oro opata. Jae ramiño vi Tumpa uipota ipirāta ete vaerā pepurugüirovia. Echa'ā pepurugüirovia icavi ete Tumpa pe oro güi. Jare pepurugüirovia ipirāta yave, piyembutuichaca eteta co Jesucristo uyecuaa ye yave. ⁸ Yepe tēi peecha'ā Jesucristo, ěrei peau. Yepe tēi añave peecha'ā, ěrei perovia jese. Jáeramo piyerovia ete. Tumpa etei umee peve cua yerovia, jare yavai pemimbeu cavi vaerā ĩru vae reta pe cua yerovia regua. ⁹ Jare perovia Jesucristo re ramo, Tumpa umeeta peve piyembiasaca vaerā.

¹⁰ Tumpa iñee aracae umimbeu vae reta uicutatía mbiacavi Tumpa umeeta peve vae re. Jae reta uipota ete uicuaa yembiasa uñemeeta peve vae regua, jare upirandu ete uyupe jese. ¹¹ Cristo iEspiritu ico jae reta ipia pe jare umimbeu ndei uyeyapo mbove quirāi Cristo uiporarata jare quirāi taicue rupi uyembiadoracata. Jare jae reta upirandu tēi uyupe mbae ra uipota jei Espiritu Santo jare quirāi yave ra uyeyapota. ¹² Tumpa uicuaaca chupe reta jocua uicutatía vae yandeve peguarā co - iyupeguarā'ā co. Jare Jesucristo ombou Espiritu Santo ara güi jemimondo reta pe, jae reta umimbeu vaerā peve ñee icavi vae. Jare ángel reta uipota ete uicuaa cua mbaembae regua.

Pico peyoya mbae reve

¹³ Jáeramo pepia pe piyemingueta cavi cua re. Piñemoa. Jecuaeñoi peāro piyerovia reve mbiacavi Jesucristo uyecuaa ye yave uñemeeta peve vae. ¹⁴ Pe reta co jae Tumpa tai reta. Jáeramo piyapo jae uipota piyapo vaerā vae. Tenonde yave pico pe pere vae reño, picuaa'ā Tumpa ramo. Agüiye ma pico jucuarāi. ¹⁵ Tumpa peparavo, jare Tumpa iyoa mbae vae co. Jáeramo opaete mbae piyapo vae pe pico peyoya mbae reve. ¹⁶ Echa'ā Tumpa iñee pe uyecuatía oī cuarāi: “Pico peyoya mbae reve” —jei Tumpa—. “Echa'ā che co jae iyoa mbae vae.” Jucuarāi uyecuatía oī.

¹⁷ Jare pemandúa quirāi piyerure yandeRu pe yave, piyerure peī uau'ā penti vaēno ĩru vae güi vae pe. Jae upuruāata opaete vae uyapo vae rupi. Jáeramo cua ivi pe pico rambueve, pequiyee chugüi. ¹⁸ Tenonde yave pe reta pico petenondegua reta iyemboe rupi. ěrei mbaerā'ā co pico. Añave Tumpa perepi jocua güi. ěrei piyerepi'ā corepoti jare oro pe. Echa'ā corepoti jare oro opata co. ¹⁹ Tumpa perepi Cristo jugüi pe. Jocua jugüi icavi ete Tumpa pe. Echa'ā Cristo uñemee umano vaerā, Israel pegua reta penti ovecharāi icavi ete vae umee Tumpa pe rami. ²⁰ Tumpa uiparavo Cristo umano vaerā ndei ivi uyeyapo mbove. ěrei cua ara taicuegua reta pe ramo Cristo ou ivi pe umano vaerā peré. ²¹ Jare pe reta perovia Tumpa re Cristo jeco pegua. Echa'ā Tumpa umbijecove ye Cristo güeru umanocue vae reta ipite güi jare umbiadoraca ma. Añave perovia ma Tumpa re, jare pepuere peāro piyerovia reve jae perepi ete vaerā.

²² Espíritu Santo pembroi perovia vaerã añete vae. Jáeramo añave pepia uyeyoe jare cua jeco pegua añetete piyerau. Jáeramo jecuaeño piyerau opaete pepia reve. ²³ Penoi ma tecove ipiau vae. Cua nunga tecove ou'ã peru jare pesi güi. Echa'ã tecove jae reta umee peve vae opata. Èrei tecove ipiau vae ndarau etei opa. Penoi tecove ipiau vae Tumpa iñee rupi. Tumpa iñee jecuaeño umee tecove jare ndarau etei opa. ²⁴ Tumpa iñee pe uyecuatía oĩ cuarã:

“Ivi pegua reta temiti reta rami co.

Echa'ã temiti ipoti yave, ipõra co.

Èrei temiti umano yave, umano vi ipoti.

Jae ramiño vi yepe tẽi ivi pegua reta uyembutuicha, èrei opata co ipirãta.

²⁵ Èrei yandeYa iñee ndarau etei opa.”

Jucuarãi uyecuatía oĩ. Jare cua co jae ñee icavi vae írú vae reta umimbeu peve vae.

2

¹ Jáeramo agüiye piyapo icavi mbae vae. Agüiye piyembitavi. Agüiye piñecatãa. Agüiye pendayepota. ² Sambiaí oa ramo vae reta jou neche jare jucuarãi ipirãta. Jae ramiño vi pequirẽi reve piyemboe Tumpa iñee re pepirãta vaerã pepurugüirovia re. ³ Echa'ã picuaa ma yandeYa ipiacavi co peve.

Ita icove vae

⁴ Jecuaeño peya yandeYa re. Jae co jocua ita icove vae. Ivi pegua reta omombo jocua ita. Èrei Tumpa uiparavo. Echa'ã uau ete. ⁵ Jae ramiño vi pe reta co jae ita icove vae reta rami. Piyeyapo ma penti tenta Espíritu Santo uyapo oĩ vae rami. Tumpa peño tee iyupeguarã. Piyeyapo ma sacerdote retarã. Echa'ã sacerdote reta Israel pegua umee Tumpa pe maemimba uyeyucacue reta. Jae ramiño vi pe reta piyapo Espíritu Santo uipota piyapo vaerã vae. Jucuarãi yave, pembiyeroviata Tumpa Jesucristo rupi. ⁶ Echa'ã Tumpa iñee pe uyecuatía oĩ cuarã:

“Mase” —jei Tumpa—, “añono Jerusalén pe ita tenondegua vae.

Che aiparavo jare aau.

Güirovia jese vae ndarau etei jei: ‘Agüiyeta tẽi arovia jese.’ ”

Jucuarãi uyecuatía oĩ. ⁷ Pe reta peau, perovia jese ramo. Èrei güirovia'ã jese vae reta pe tae cua Tumpa iñee pe uyecuatía oĩ vae:

“Ita tenta iyapoa reta omombo vae uyeyapo ma ita tenondegua vae.

⁸ Jae co penti ita ivi pegua reta ipisapãa jese vae rami.

Uyepiaca reta jocua ita re.”

Jucuarãi uyecuatía oĩ. Echa'ã jae reta uicuaa cavi'ã Tumpa iñee, güirovia'ã Jesucristo re ramo. Tumpa uipota jucuarãi uyeyapo vaerã.

Pe reta co jae Tumpa uiparavo vae reta

⁹ Èrei pe reta co jae Tumpa uiparavo vae reta. Pe reta piyeyocui Tumpa pe iporoyocua pe. Tumpa peño tee iyupeguarã pico vaerã jae imbaerã. Jucuarãi Tumpa uyapo pe reta pemimbeu vaerã írú vae reta pe quirã Tumpa ipiacavi co jare quirãi jae peparavo pico vaerã jae jembipe icavi ete vae pe, agüiye vaerã pico pĩtumimbi pe. ¹⁰ Tenonde yave pe reta Tumpa jentarã reta'ã co. Èrei piyeyapo ma Tumpa jentarã retarã. Tenonde yave Tumpa peparareco'ã. Èrei añave peparareco.

Piyeyocui cavi Tumpa pe

¹¹ Cherivi reta, pe reta pico'ã upurugüirovia mbae vae reta yugüireco rami, jare michi peguaño picota cua ivi pe. Jáeramo agüiye pico pe pere vae reño. Echa'ã perete perecove jovaicho co. ¹² Piyapo icavi vae upurugüirovia mbae vae reta ipite pe. Echa'ã jucuarãi piyapo yave, yepe tẽi jae reta jei icavi mbae vae pecoti, èrei uechata icavi vae piyapo vae, jare jocua jeco pegua umbiadorata reta Tumpa, ou uvãe yave ara Tumpa uãa reta vaerã.

¹³ Piyapo opaete ivi pegua mboroyocui reta. Echa'ã cua yandeYa jei vae co. Jáeramo piyapo peruvicha guasu jei peve piyapo vaerã vae. Echa'ã jae co opaete perentaigua reta juvicha guasu. ¹⁴ Piyapo vi peruvicha reta jei peve piyapo vaerã vae. Echa'ã peruvicha guasu ombou reta peve uiporaraca vaerã icavi mbae vae uyapo vae reta pe jare umbutuichaca vaerã icavi vae uyapo vae reta. ¹⁵ Iyaracuaa mbae vae reta jei icavi mbae vae pecoti, pecuaa'ã ramo. Jáeramo piyapo icavi vae agüiye vaerã ipuere reta jei jucuarãi.

Echa'a cua co jae Tumpa jei vae. ¹⁶ Tumpa perepi ma mbaeyoa güi. Ērei agüiye piyapo icavi mbae vae Tumpa perepi ma mbaeyoa güi ramo. Echa'a Tumpa perepi mbaeyoa güi, piyeyocui vaerã chupe. ¹⁷ Pipiu opaete vae. Peau opaete upurugüirovia vae reta. Pequiye Tumpa güi. Pipiu peruvicha guasu.

¹⁸ Che tae uyeyocui vae reta pe cua: Piyapo pepatrón jei peve piyapo vaerã vae pipiu reve. Amocue pepatrón reta ipiacavi jare ipiaguasu peve. Ērei yepe tēi amocue pepatrón reta uyapo icavi mbae vae peve, ěrei jeseve piyapo jei peve piyapo vaerã vae. ¹⁹ Piyapo yave picuaa Tumpa uipota piyapo vaerã vae, jare piporara yave jocua jeco pegua, pembiyeroviata Tumpa. ²⁰ Ērei piyapo yave icavi mbae vae, pepatrón uiporacata peve. Jare yepe tēi piporara pepiaguasu reve, ěrei ndarau piyembutuichaca. Ērei pepatrón uiporacata yave peve, yepe tēi piyapo icavi vae, piporara yave pepiaguasu reve, pembiyeroviata Tumpa. ²¹ Echa'a cuarã Tumpa preparavo. Echa'a Cristo uiporara peré, pe reta piyapo vaerã jae uyapo rami. ²² Echa'a Cristo iyoa'a. Upurumbitavi'a etei. ²³ Yepe tēi ĩru vae reta jei icavi mbae vae icoti, ěrei Cristo jei'a icavi mbae vae icoti reta. Uiporara oĩ yave, jei'a uiporacata co uiporacata chupe vae reta pe. Jaeño oñono Tumpa ipo pe. Echa'a uicuaa Tumpa upuruã jupi vae rupi. ²⁴ Cristo etei güiraa yanembaeyoa reta jete re jocua curusu re, yande ñamano vaerã mbaeyoa reta güi jare yaico vaerã jupi vae re. Jae umano ramo, yande ñanoci tecove opa mbae vae. ²⁵ Echa'a tenonde yave pe reta pepia Tumpa güi, ovecha reta tape güi opia rami. Ērei añave peyu ye ma uyandareco perecove re vae pe, ovecha reta yugüeru ye iyandarecoa pe rami.

3

Umenda vae reta tuyugüireco cavi uyupii

¹ Jae ramiño vi cuña reta tuyeyocui ime pe. Echa'a jucuarãi yave, yepe tēi ime güirovia'a Tumpa iñee, ěrei aramoi jembireco ipuere güiroviaca ime pe Tumpa iñee umimbeu'a chupe reve. Echa'a ime uechata quirãi icavi ico jembireco. ² Uechata quirãi jembireco ico cavi uipiu reve, jare quirãi uyapo'a mbae pichĩ vae. ³ Cuña reta agüiye tuiyapota tuñemopõra ete mbaembae jete re uyecuaa vae peño. Echa'a amocue cuña reta uyapicatu cavi ía jare oñono iyee mbaembae oro pegua vae jare omonde temimonde jepi ete vae uñemopõra vaerã. ⁴ Ērei cuña reta tuiyapota tuñemopõra icavi vae ipia pe oĩ vae pe. Echa'a jocua mbaembae jete re oĩ vae opata co. Ērei icavi vae ipia pe oĩ vae ndarau opa. Jáeramo tuñemimichi jare agüiye tuñengata ime pe. Echa'a cua icavi ete Tumpa pe. ⁵ Aracae yave cuña güirovia Tumpa re vae reta uñeño tee Tumpa peguarã, jare jae reta vi uñemopõra icavi vae ipia pe oĩ vae pe. Echa'a jae reta vi uyeyocui ime pe. ⁶ Sara uyeyocui Abraham pe jare jei chupe: "Cheya." Jáeramo cuña añave güirovia Tumpa re vae reta Sara rami co, icavi vae uyapo reta yave. Jare jucuarãi uyapo yave, ndarau uquiye mbaembae güi.

⁷ Jae ramiño vi cuimbae reta tuyugüireco cavi jembireco ndive. Tuyandareco cavi jese jare tumbutuicha. Timandúa quirãi cuimbae ipirãta ete cuña güi. Echa'a Tumpa uyapo cuimbae jare jembireco penti ramiño jare umee mocui reve pe yugüireco vaerã ipiacavi rupi. Cuimbae reta jucuarãi yugüireco yave, Tumpa uyapisacata iyerure reta re.

Pico cavi uyupii

⁸ Cuaño ma tamimbeu ye peve. Pico cavi penti ramiño. Pepiacavi piyupe. Piyerau. Piyeparareco. Piñemimichi. ⁹ ĩru vae uyapo yave icavi mbae vae peve, agüiye piyapo icavi mbae vae chupe. Jae ramiño vi ĩru vae uñeengata yave peve, agüiye piñeengata chupe. Piñeengata vaerãve piyerure Tumpa pe jese, Tumpa uyapo vaerã icavi vae chupe. Echa'a cuarã Tumpa preparavo, ipuere vaerã uyapo icavi vae peve vi. ¹⁰ Tumpa iñee pe uyecuatía oĩ cuarãi:

"Pipota yave pico cavi pepiacatu reve, agüiye pere icavi mbae vae quã pe, jare agüiye peapu quã pe.

¹¹ Agüiye piyapo icavi mbae vae.

Jaeño piyapo icavi vae.

Jecuaeño pipota pico cavi pepiacatu reve.

¹² Echa'a yandeYa jecuaeño uma jupi vae reta re, jare uyapisaca iyerure reta re.

Ērei uma'e'ā icavi mbae vae uyapo vae reta re."

Jucuarāi uyecuatā oī.

¹³ Ndarau ndipo quía uipota uyapo icavi mbae vae peve, pe reta icavi vae jecuaeño piyapo yave. ¹⁴ Ērei piporara yave jupi vae piyapo ramo, piyerovia. Aramoi ĩru vae reta uipotata peminguiye. Ērei agüiye pequiye chugüi reta. Agüiye piyemambeco jese. ¹⁵ Pemiadora Cristo pepia pe. Echa'ā jae co yandeYa. Jare ime yave quía upirandu peve maera ra peāro pei piyerovia reve vae, jecuaeño piñemicuatĩro pemimbeu vaerā chupe piñemimichi jare pipiu reve. ¹⁶ Agüiye piyapo mbae picuaa agüiyeta tēi piyapo vae. Jucuarāi yave, ĩru vae reta jei yave icavi mbae vae pecoti, imarata co iyapu peré vae re. Echa'ā uicuaata quirāi piyapo icavi vae Cristo re perovia ramo. ¹⁷ Tumpa uipotata yave, aramoi piporara icavi vae piyapo vae jeco pegua. Ērei cua icavi co. Icavi'ā co piyapo yave icavi mbae vae jare piporara yave jocua jeco pegua. ¹⁸ Cristo vi penti veseño uiporara yanembaeyoa reta re. Jae co jupi vae, ērei uiporara jupi mbae vae reta imbaeyoa reta re. Jare jucuarāi uiporara yanembipiacatu vaerā Tumpa ndive. Ērei yepe tēi ĩru vae reta uyuca, ērei Espĩritu Santo umbijecove ye güeru umanocue vae reta ipite güi. ¹⁹ Jayave Cristo oo espĩritu rupi uñemiñee umanocue vae reta ipereso ñugüinoi vae pe. ²⁰ Echa'ā jocua umanocue vae reta yugüireco Noé ico yave. Jae reta güirovia'ā Tumpa jei vae, yepe tēi Tumpa ipiaguasu chupe reta jare uāro Noé jocua chalana guasu uyapo oī rambueve. Ērei mboviño oyepi i güi jocua chalana guasu pe. Ochoño uyembiasaca. ²¹ Jare jocua penti jaanga co. Jae ramiño vi añave pe reta piyembiasaca piyembibautizaca yave Jesucristo icove ye ou umanocue vae reta ipite güi ramo. Pepuere'ā piyembiasaca piyoe perete vae rupi. Jaeño pepuere piyembiasaca pipota yave piyapo Tumpa jei piyapo vaerā vae. ²² Jesucristo oo ma ara pe jare ico ma Tumpa iyipi pe iyacata coti. Ángel reta jare opaete mbaepuere güinoi vae reta uyeyocui chupe.

4

Piyeyocui piyupe mbaepuere reta penoi vae pe

¹ Cristo uiporara cua ivi pe ico rambueve. Jáeramo piñemicuatĩro piporara vaerā jae uiporara rami. Echa'ā yaiporara yave, mbaeyoa ipuere'ā ma yanderé. ² Jucuarāi yave, ndarau yaico yae vae reño cua ivi pe yaico rambueve. Yaipotata yayapo Tumpa jei vae. ³ Echa'ā ara uasa vae reta pe yaico yae vae reño upurugüirovia mbae vae reta yugüireco rami. Jocua ara reta pe yayapose pichĩi vae, yacause, yayapose paraeta yavasipo vaerā, jare yambidorase tumpa-raanga reta, yepe tēi mboroyocui jei agüiye vaerā yambidora. ⁴ Jare upurugüirovia mbae vae reta pe yavai ma uicuaa vaerā maera ra pe reta piyapo'ā ma opaete mbae icavi mbae vae jae reta ndive. Jáeramo jei reta icavi mbae vae pecoti. ⁵ Ērei Tumpa uāa yave icove vae reta jare umanocue vae reta, jae reta vi uyemboita Tumpa jovai. ⁶ Jare cua jeco pegua Tumpa jembiocui reta umimbeu ñee icavi vae umanota vae reta pe, iespĩritu reta yugüireco vaerā Tumpa ico rami, yepe tēi cua ivi pe yugüireco rambueve ivi pegua reta uiporaca chupe reta.

⁷ Ērei uyaro ma opaete mbae opa vaerā. Jáeramo piñemoa jare jecuaeño piyerure Tumpa pe. ⁸ Tamimbeu peve cua icavi ete vae: Piyerau. Echa'ā piyerau yave, ndarau piyembijeco jeta pemaeyoa reta re. ⁹ Piyeminguaru piñeenguru mbae reve. ¹⁰ Tumpa mee penti penti pe mbaepuere reta piyeyocui vaerā chupe. Jáeramo piyeyocui piyupe mbaepuere reta penoi vae pe. Jucuarāi piyeyocui cavita co Tumpa pe Tumpa ipiacavi tuicha vae rupi. ¹¹ Uñemiñee vae tuñemiñee Tumpa umimbeu chupe mbae jei vaerā vae rami. Uyeyocui ĩru vae reta pe vae, tuyeyocui chupe reta mbaepuere Tumpa mee chupe vae pe. Jucuarāi yave, ĩru vae reta umbiadorata Tumpa Jesucristo rupi opaete piyapo vae re. YandeYa Jesucristo tuyembidoraca jare tugüinoi opaete mbaepuere jaeño mai pegua. Amén.

Cristo re güirovia ramo uiporara vae

¹² Cherivi reta, piporara eteta co. Ērei piporara pei yave, agüiye pepiacañi jese. Echa'ā uyeyapo vi jucuarāi ĩru vae reta pe. ¹³ Ērei piporara pei yave, piyerovia. Echa'ā picuaa piporara pei Cristo uiporara rami. Jare cua jeco pegua, opaete vae uicuaa yave quirāi Cristo uyembidoraca co, pe reta piyerovia eteta. ¹⁴ ĩru vae reta jei yave icavi mbae vae pecoti Cristo re perovia ramo, piyerovia. Echa'ā Tumpa iespĩritu ico pepia pe. Jae

reta jei icavi mbae vae Cristo coti. Ērei pe reta pemiadoraca Cristo. ¹⁵ Ērei agüiye quá tupuruyuca ani toñomi mbaembae ani tuyapo icavi mbae vae ani tumae ĩru vae iparaviqui re. Echa'ã jucarãi uyapo yave, uiporata co icavi mbae vae uyapo ramo. ¹⁶ Ērei penti Cristo imbae vae uiporata yave Cristo re güirovia ramo, agüiye timara. Tumbiadora Tumpa jese.

¹⁷ Tumpa uãata co opaete ivi pegua reta, jare tenonde uãata rani jae imbae reta. Yepe tēi yande co jae imbae reta, ěrei ñanerãata co. Jáeramo uiporata eteta co jocua Tumpa iñee icavi vae güirovia mbae vae reta. Echa'ã Tumpa jei chupe reta güirovia vaerã.

¹⁸ Tumpa iñee pe uyecuatía oĩ cuarãi:

“Tumpa umbujupi ma vae reta yavai rupi uyembiasacata.

Jáeramo ndarau etei uyembiasaca Tumpa jei vae güirovia'ã vae reta.

Echa'ã uyembai'ã imbaeyoa reta.”

Jucarãi uyecuatía oĩ. ¹⁹ Jáeramo Tumpa jei vae rupi uiporata vae reta jecuaeño tuyapo icavi vae jare tumaño Tumpa re uyandareco vaerã jese reta. Echa'ã Tumpa yandeapo jare jecuaeño uyandarecota yanderé.

5

Pemiatangātu Tumpa imbae reta

¹ Tambiaracuaa ma tenondegua pepite pe ñugüinoi vae reta. Echa'ã che co jae penti tenondegua, jare amimbeu ĩru vae reta pe quirãi Cristo uiporata yanderé. Jare Cristo uyecuaa yave, che vi ayeroviata jae ndive. Tupumbiaracuaa cuarãi: ² Pemiatangātu Tumpa imbae pepite pe ñugüinoi vae reta. Piyandareco jese reta pequirēi reve. Agüiye piyapo peparaviqui peatēi reve. Piyapo peparaviqui pipota ete piyeyocui Tumpa pe ramo. Agüiye piyapo pemingana corepoti vaerãño. ³ Jare pe reta pico cavi, ĩru upurugüirovia vae reta uicuaa vaerã quirãi icavi co jae reta vi yugüireco vaerã. Agüiye piyocuiño pembae vae echa rami. Echa'ã jae reta Tumpa imbae reta co. ⁴ Jare Cristo ou ye yave - jae co opaete yanderé uyandareco vae - umeeta peve corona ndarau etei opa vae. Echa'ã pe reta piyeroviata jae ndive.

⁵ Tambiaracuaa ma cuimbae tairusu vae reta cuarãi: Piyapo petenondegua reta jei vae. Jare opaete vae piyeyocui piyupe piñemimichi reve. Echa'ã Tumpa umee ipiacavi uñemimichi vae reta pe. Ērei oyovaicho uyembicate vae reta ndive. ⁶ Jáeramo piñemimichi Tumpa jovaque. Echa'ã jae imbaepuere tuicha ete co. Jare jae pembu-tuichacata ara ou uvãe yave piyembutuichaca vaerã. ⁷ Pemimbeu Tumpa pe opaete pepiatiti jare piyemipia'ã jese vae. Echa'ã jae uyandareco oĩ peré.

⁸ Jecuaeño piñemoa. Echa'ã aña guasu perovaicho co, jare uipota uyapo icavi mbae vae peve, penti yaguapita uguata ueca mbae uyuca jou vaerã vae rami. ⁹ Ērei piñemimirãta pepurugüirovia re agüiye vaerã aña guasu pemiamiri. Picuaa co quirãi opaete ĩru upurugüirovia vae ivi pe yugüireco vae reta uiporata ñugüinoi pe reta piporata rami. ¹⁰ Ērei Tumpa ipiacavi tuicha ete co. Jae yandeparavo umee vaerã yandev yerovia opa mbae vae Cristo Jesús rupi. Piporata co michi pegua. Ērei Tumpa etei pemiadoracaata, jare pemimirãtata, jare pemiatangātuta. ¹¹ Tumpa tuyembidoraca jare tugüinoi opaete mbaepuere jaeño mai pegua. Amén.

Saludo reta

¹² Cua mboviño ma aicutía peve pumbiaracuaa vaerã, jare araacata Silvano ndive peve. Aicuaa Silvano co jae yanderivi uyeyocui cavi peve vae. Amimbeu ma peve Tumpa ipiacavi añetete vae. Piñemimirãta peĩ jocua mbiacavi re.

¹³ Opaete upurugüirovia vae Babilonia pe ñugüinoi vae reta jei peve Tumpa ndiveño peĩ. Tumpa uiparavo reta jae peparavo rami. Jae ramiño vi cherivi Marcos jei peve Tumpa ndiveño peĩ. ¹⁴ Piyembisaluda yave, piñecuãva piyerau reve. Tipiacatu opaete Cristo Jesús re güirovia vae reta. Amén.

SEGUNDA CARTA DEL APOSTOL SAN PEDRO

¹ Che co jae Simón Pedro. Che co jae Jesucristo jemimondo jare ayeyocui chupe. Jesucristo co jae yanembiasa vae. Tumpa jare Jesucristo jupi co. Jáeramo umee peve pepurugüirovia vaerã ore ndupurugüirovia rami. Yayerovia ete cua mburugüirovia re. Aicutáa aĩ cua tupapire peve.

² Aipota picuaa cavi vaerã Tumpa jare yandeYa Jesús, penoi vaerã jeta ete Tumpa ipiacavi jare ipiacatu.

Pico penti ramiño Tumpa ndive

³ Tumpa umee ma yandeve imbaepuere rupi yaico cavi vaerã jare yayapo vaerã jae uipota yayapo vaerã vae. Jare opaete cua ñanoi yaicuaa Tumpa ramo. Echa'ã Tumpa yandeparavo yayapo vaerã icavi vae jare yayembutuichaca vaerã. ⁴ Jare imbaepuere rupi Tumpa umee ma yandeve jei uyapota vae icavi ete vae reta. Yayerovia ete cua re. Jare cua jei uyapota vae reta rupi Tumpa umee ma peve pico vaerã penti ramiño jae ndive. Echa'ã jae perepi opaete icavi mbae vae ivi pegua güi, agüiye vaerã pico pe pere vae reño. ⁵ Jáeramo piñemiatangātu. Perovia co Tumpa re. Jecuaeño pipota piyapo icavi vae. Jae ramiño vi jecuaeño pipota picuaa cavi Tumpa regua. ⁶ Jae ramiño vi jecuaeño piñemoa. Jae ramiño vi jecuaeño pepiaguasu. Jae ramiño vi jecuaeño piyapo Tumpa uipota piyapo vaerã vae. ⁷ Jae ramiño vi jecuaeño pepiacavi. Jae ramiño vi jecuaeño pepuruau. ⁸ Echa'ã opaete cua piyapo yave, piñemimirátata co pepurugüirovia re jare picuaa cavita co yandeYa Jesucristo. Jáeramo pepuereta piyeyocui cavi yandeYa pe. ⁹ Ërei opaete cua uata chupe vae uicuaa cavi'ã mbaembae regua. Iyaracuaa'ã co. Nacañi ma co aipo quirã Tumpa umbiasa chupe imbaeyoa uyapocue vae reta.

¹⁰ Jáeramo, cherivi reta, piñemiatangātu picuaaca vaerã ñru vae reta pe quirã pe reta co jae añetete Tumpa uiparavo vae reta. Echa'ã jucarã piyapo yave, ndarau etei pepia Tumpa güi. ¹¹ Jare jucarã piyapo yave, pique cavita co piyerovia ete reve yandeYa Jesucristo iporoyocua opa mbae vae pe. Jae co yanembiasa vae.

¹² Jáeramo che jecuaeño pumimanduata cua re, yepe tẽi picuaa ma co jare pepirãta ma co añete vae piyemboe jese vae re. ¹³ Icavi echa cheve pumimandúa vaerã jese cua ivi pe aico rambueve, pumiatangātu vaerã. ¹⁴ Echa'ã aicuaa imambae amanota co yandeYa Jesucristo uicuaaca cheve rami. ¹⁵ Jecuaeño pumimanduata cua re, jecuaeño pemandúa vaerã jese che amano ma yave.

Ore nduecha co yandeYa Jesucristo imbaepuere

¹⁶ Nduicuaaca peve yandeYa Jesucristo imbaepuere jare quirã jae ou yeta co. Jocua nduicuaaca peve vae aracae ndaye reta'ã co. Jocua ndugüirovia vae añete co. Echa'ã ore nduecha co yandeYa Jesucristo imbaepuere. ¹⁷⁻¹⁸ Echa'ã ore noĩ jae ndive jocua ivitu guasu jae uiparavo vae re, yandeRu Tumpa umbiadoraca yave jare uechaca oreve imbaepuere. Jare ore nduyandu jocua ñee ara güi ou chupe vae. Echa'ã Tumpa etei uyembidoraca vae jei cuarã: “Cua co jae cheRai auu ete vae. Chembiyerovia etc.” Jucarã jei.

¹⁹ Ërei pepuere perovia catu Tumpa ñee aracae umimbeu vae reta uicutáa vae ore nduecha vae güi. Jáeramo icavi co pepia pe piyemingueta cavi vaerã jae reta uicutáa vae re. Echa'ã jae reta uicutáa vae yanembori yaicuaa cavi vaerã yavai yaicuaa vaerã vae, penti tembipe yanembori yaecha cavi vaerã pitumimbi pe rami. Pepia pe piyemingueta cavi yave jese, picuaa cavita co, penti yasitata jembipe tuicha ete vae pepia pe umiembipe rami. ²⁰ Taicuaaca peve cua: Jocua Tumpa ñee aracae umimbeu vae reta uicutáa vae jae reta iyeminguetaiño'ã co. ²¹ Echa'ã Tumpa ñee aracae umimbeu vae reta imiari'ã jae reta etei uipota imiari ramo. Espíritu Santo etei umimbeu chupe reta mbae jei vaerã. Jáeramo jae reta jei vae Tumpa ñee etei co.

2

Upurumbítavi vae reta
(Jds 4-13)

¹ Èrei Israel pegua reta ipite pe yugüireco aracae amocue upurumbítavi vae reta. Jae reta jei iyapu reve: “Che co jae penti Tumpa ñee umimbeu vae.” Jae ramiño vi yugüirecota pepite pe amocue upurumbítavi vae reta. Jae reta jeita iyapu reve: “Che co jae penti Tumpa ñee re oporomböe vae.” Jae reta ipoqui eteta umimbeu vaerã moromböe añete mbae vae. Uipotata reta urucumegua Tumpa iparaviqui. Jare uicucuta reta yandeYa umbiepi imbaeyoa reta re vae. Èrei imambae yandeYa urucumeguata reta.

² Jare jeta vae uyapota pichii vae upurumbítavi vae reta umimbeuta chupe reta uyapo vaerã vae. Jare cua jeco pegua ñru vae reta jeita icavi mbae vae moromböe añete vae coti.

³ Jare upurumbítavi vae reta uipotata pemaembae jare pemitavita upiro vaerã pegüi pemaembae. Èrei ima ma Tumpa uãa reta. Jáeramo urucumeguata reta imambae.

⁴ Echa'ã Tumpa umbiasa'ã ángel iyoa vae reta. Jae omombo ara güi cañitei pe. Joco pe uñeapiti ñugüinoi pñtumimbi pe jare uãro ñugüinoi Tumpa uãa reta vaerã. ⁵ Jae ramiño vi aracae Tumpa umbiasa'ã upurugüirovia mbae vae reta. Jaeño uepi iporu guasu güi Noé jocua ñru siete vae ndive. Echa'ã Noé umimbeu tẽi ñru vae reta pe uyapo vaerã jupi vae. Èrei jae reta uipotata'ã güirovia Tumpa jei chupe reta uyapo vaerã vae. Jáeramo Tumpa ombou iporu guasu opa vaerã umbai reta.

⁶ Jae ramiño vi Tumpa ombou tata tenta guasu reta Sodoma jare Gomorra pe opa umbai vaerã. Jaeño upita joco pe tanimbu reta. Jare jocua tenta guasu reta pe uyeyapo vae rupi Tumpa jei vae uyapo'ã vae reta ipuere uicuaa Tumpa uiporacata co chupe reta.

⁷ Èrei Tumpa uepi Lot. Echa'ã jae jupi jare uyemipia'ã mbaembae pichii vae jocua jecopochi vae reta uyapo vae re. ⁸ (Echa'ã jocua jupi vae ico jae reta ipite pe, jare uecha jare uyandu icavi mbae vae uyapo reta vae. Jáeramo uyemipia'ã opa ara rupi.)

⁹ Jae ramiño vi yandeYa uicuaa quirã uepi vaerã jei vae uyapo vae reta mbaesusere reta güi jare quirã uiporacata vaerã jupi mbae vae uyapo vae reta pe ara jae uãa reta vaerã vae ou uvãe regua. ¹⁰ Amocue vae uyapo pichii vae jae jei vae rupiño jare güiriro mbaepuere güinoi vae reta. Tumpa uiporacata eteta co jocua reta pe. Echa'ã jae reta uyembicate jare ñatẽi uyapo mburuvicha reta jei uyapo vaerã vae. Uquiyẽ'ã

reta jei vaerã icavi mbae vae mbaepuere güinoi vae reta coti. ¹¹ Ángel reta imbaepuere tuicha ete jocua jupi mbae vae uyapo vae reta imbaepuere güi. Èrei yepe tẽi imbaepuere tuicha co, èrei ángel reta ipuere'ã umbijeco yandeYa jovaque jocua mbaepuere güinoi vae reta. ¹² Èrei jocua jupi mbae vae uyapo vae reta jei icavi mbae vae uicuaa mbae vae coti. Jae reta maemimba reta rami co. Yaipisi jare yayuca maemimba reta. Jae ramiño vi jocua jupi mbae vae uyapo vae reta umanota icavi mbae vae uyapo vae jeco pegua.

¹³ Jare cua uyeyapota chupe reta jupi mbae vae uyapo ramo. Echa'ã ara rupi yepe icavi echa chupe reta uyapo vaerã icavi mbae vae. Jae reta uñemñru pe reta ndive. Ucaru reta yepe pe reta ndive. Èrei uyerovia upurumbítavi vaerã. Icavi'ã co ucaru reta vaerã pe reta ndive. Echa'ã peñru añetete vae reta'ã co. ¹⁴ Jae reta jecuaño uipotata uyuvanga menda re. Jecuaño uipotata uyapo ipotave mbaeyoa, jare uyapoca mbaeyoa ipurugüirovia re ipirãta'ã vae reta pe. Jae reta jecuaño uyemboe uipotata vaerã ñru vae reta imbaembae. Tumpa uiporacata chupe reta.

¹⁵ Echa'ã yugüireco'ã Tumpa jei yugüireco vaerã rami. Opia reta Tumpa güi. Uyapo reta Beor tai Balaam jee vae uyapo rami. Echa'ã Balaam uau ete corepoti jupi mbae vae uyapo vae rupi umingana vae. ¹⁶ Èrei Tumpa uicuaaca Balaam pe agüiye vaerã tẽi uyapo jocua jupi mbae vae. Echa'ã yepe tẽi penti mburica ipuere'ã uyemingueta, èrei Tumpa umee Balaam imburica pe uyemingueta vaerã penti cuimbae uyemingueta rami, jare jucuarã uicuaaca Balaam pe - jae co penti Tumpa ñee aracae umimbeu vae - agüiye vaerã tẽi uyapo jocua uipotata uyapo vae.

¹⁷ Jocua jupi mbae vae uyapo vae reta icua tipa ma vae reta rami co. Jae ramiño vi amapñtu ivitu ete yave tanta osi vae reta rami co. Echa'ã yugüiraa voita pñtumimbi oñ vae pe. ¹⁸ Imiari reta uyembicate reve. Jáeramo jei vae reño yugüireco vae reta güirovia reta, jare uyapo ye pichii vae, yepe tẽi tenonde yave oyepe uyapo'ã Tumpa jei vae reta güi. ¹⁹ Jocua jupi mbae vae uyapo vae reta jei tẽi chupe reta uyeyorata co. Èrei jae reta etei icavi mbae vae jembiocui reta co. Echa'ã ime yave quã mbae güinoi mbaepuere jese vae, jae ico jocua mbae jembiocuirã. ²⁰ Echa'ã oyepe yave pichii vae ivi pegua güi yandeYa

Jesucristo regua uicuaa vae rupi - jae co yanembiasa vae - ěrei taicue rupi umbipi yave uyapo ye pichii vae jare pichii vae güinoi mbaepuere jese, icavi mbae ete co tenonde ico vae güi. ²¹ Echa'a uicuaa ma quirai uyembujupica vaera. ěrei uyapo'a mboroyocui Tumpa umimbeu chupe reta vae. Icavi ete tei co agüiye vaera uicuaa quirai uyembujupica vaera. ²² ěrei uyeyapo chupe reta jocua yae chupe vae rami. Echa'a yae cuarai: "Yimba oo ye jou igüiecue. Jae ramiño vi cuchi uyeyoe vae oo ye uñemutuñuu." Jucuarai yae. Jare cua añete co.

3

YandeYa ivãe ara uvãeta co

¹ Cherivi reta, cua tupapire aicutia peve vae mocui ma co. Mocui reve pe pumimandua picuaa ma vae re, añetete pepia pe piyemingueta vaera jese. ² Aipota pepia pe piyemingueta vaera Tumpa inee araca umimbeu vae reta jei vae re. Jae reta uñeño tee Tumpa peguarã. Jae ramiño vi aipota pepia pe piyemingueta vaera mboroyocui ore numimbeu peve vae re. Ore co jae yandeYa jemimondo reta. Jae co yanembiasa vae. ³ Aipota picuaa vaera cua rani: Ara taicuegua reta pe amocue vae oyoyaita Tumpa inee umimbeu vae reta. Yugüirecota jae jei vae reño. ⁴ Jare jeita cuarai: "Pe reta pere tei Jesucristo ou yeta co. ěrei ndarau etei ou. Echa'a yandetenondegua reta umano güiye opaete mbaembae oyovaqueño co oi. Tumpa opaete uyapo güiye opaete mbaembae oyovaqueño co oi." Jucuarai jeita. ⁵ ěrei jae reta uipota'a imandua quirai araca ete Tumpa uyapo opaete ara re ñugüinoi vae inee imbaepuere pe jare quirai uyapo ivi jare i guasu reta, ⁶ jare quirai opa umbai opaete ivi pe oi vae iporu guasu ombou yave. ⁷ ěrei Tumpa umimbeu yandeve quirai mbaembae ara re añave ñugüinoi vae jare ivi vi oyovaqueñota oi umbai regua tata pe. Echa'a jucuaraita Tumpa uyapo, uãa uyapo'a jei vae reta yave. Jayave jae omondota reta tata guasu pe.

⁸ Cherivi reta, icavi co picuaa vaera cua: YandeYa pe penti ara mil año ramiño co jare mil año penti ara ramiño co. ⁹ Amocue vae ipia pe uyemingueta tei yandeYa ndarau ou ye. Echa'a jei reta ima ete ma co jei uyapota vae. ěrei jucuarai'a. Echa'a yandeYa ipiaguasu yandeve. Uipota'a penti ave oo vaera tata guasu pe. Uipota opaete vae ueya vaera iyemingueta icavi mbae vae ipia pe oi vae.

¹⁰ ěrei yandeYa ivãe ara outa co penti imonda vae pitu yave ou mbaembae oñomi vaera rami. Jare yandeYa ivãe ara pe opaete mbaembae ara re añave yaecha vae uyembaita tanta jiapu reve. Jacu eteta co jare opaete mbaembae opata ocai. Ivi vi jare opaete mbaembae ivi pe ñugüinoi vae ocaita co. ¹¹ Jáeramo pico cavi peyoa mbae reve jare jecuaño piyapo Tumpa jei vae. Echa'a picuaa opaete mbaembae añave yaecha vae opata ocai. ¹² Peãro pequiri reve Tumpa ivãe ara ou uvãe vaera. Echa'a Tumpa ivãe ara pe Tumpa uapita opaete mbaembae ara re ñugüinoi vae jare opata umbai. Jacu eteta co jare opaete mbaembae opata ocai. ¹³ ěrei Tumpa uyapota ara re mbaembae ipiau vae. Jae ramiño vi uyapota ivi ipiau vae. Jare joco pe imeta jaño mbae jupi vae. Echa'a Tumpa cua jei uyapota co.

¹⁴ Jáeramo, cherivi reta, cua mbaembae ipiau vae peãro ramo, piñemiatangãtu agüiye vaera piyapo mbaeyoa. Jucuarai yave, pepiacatuta jare ndarau quia pembijeco mbae re yandeYa ou ye yave. ¹⁵ Picuaa quirai yandeYa ipiaguasu co yandeve yayembiasaca vaera. Jare cua re yanderivi Pablo yaau vae uicutia ma peve. Tumpa umee Pablo pe aracuaa umimbeu cavi vaera peve. ¹⁶ Jare opaete tupapire uicutia vae pe Pablo umimbeu yembiasa regua. Amo pe yavai yaicuaa vaera mbae ra uipota jei Pablo uicutia vae. Jare amocue vae güirova Pablo uicutia vae. Jae ramiño vi jae reta güirova iru Tumpa inee uyecuatia oi vae. Jae reta uyemboe cavi'a Tumpa inee re jare ipirãta'a ipurugüirovia re. Jare jucuarai güirova ramo, jae reta etei uyerova Tumpa güi.

¹⁷ Picuaa ma co cua mbaembae regua, cherivi reta. Jáeramo pe reta vi piñemoa, agüiye vaera piyavi jocua icavi mbae vae uyapo vae reta uyavi rami. Echa'a jucuarai piyavi yave, ndarau pepirãta pepurugüirovia re. ¹⁸ ěrei piñemimirãta pepurugüirovia re Tumpa ipiacavi rupi. Jare jecuaño pipota picuaa cavi yandeYa Jesucristo regua. Jae co yanembiasa vae. YandeYa tuyembiadoraca añave jare jaño mai pegua. Amén.

PRIMERA CARTA DEL APOSTOL SAN JUAN

Ñee tecove opa mbae vae umee vae

¹ Nduicuatía noĩ peve jocua Ñee tecove opa mbae vae umee vae regua. Jae jecuaño ico ndei ivi uyeyapo mbove. Jare ore nduyandu jocua Ñee. Nduecha cavi. Numae jese. Nduyaviqui vi orepo pe etei. ² Jocua Ñee tecove opa mbae vae etei co. Numimbeu peve quirãi ore etei nduecha. Nduicuaaca peve jae co tecove opa mbae vae. Jae imeño mai ico yandeRu Tumpa ndive ndei ivi uyeyapo mbove, ãrei ou uyecuaa oreve. ³ Numimbeu peve nduecha jare nduyandu vae, pe reta vi piñemiĩru vaerã ore ndive. Añetete ñañemiĩru ma yandeRu Tumpa jare Tai Jesucristo ndive. ⁴ Jare cua mbaembae regua nduicuatía peve piyerovia ete vaerã.

Tumpa ico tembipe oĩ vae pe

⁵ Numimbeu peve ñee Jesucristo umimbeu oreve vae. Jae co cua: Tumpa ico tembipe oĩ vae pe. Ico'ã etei pĩtumimbi oĩ vae pe. ⁶ Aramoi yae ñañemiĩru ma co jae ndive. Ërei yaico yave pĩtumimbi oĩ vae pe yugüireco vae rami, yandeapu co. Yaico'ã co añete vae rupi. ⁷ Ërei yaico yave tembipe oĩ vae pe yugüireco vae rami - echa'ã Tumpa vi ico tembipe oĩ vae pe - ñañemiĩru uyupii, jare Jesucristo jugüi yandeyoe opaete yanembaeyoa reta güi. Jesucristo co jae Tumpa Tai.

⁸ Yae yave yandeyoa'ã co, yayembitavi co. Yae'ã etei co añete vae. ⁹ Yamimbeu yave Tumpa pe yanembaeyoa reta, yandepuere yarovia catu Tumpa umbiasa vaerã yandeve yanembaeyoa reta, jae jupi ramo. Jae yandeyoeta co opaete jupi mbae vae yayapo vae güi. ¹⁰ Yae yave yayapo'ã co mbaeyoa, Tumpa iñee ico'ã yandepia pe. Echa'ã Tumpa jei yayapo co mbaeyoa. Jáeramo yayapo'ã yave mbaeyoa, Tumpa iyaputa tẽi co.

2

Cristo uyerure Tumpa pe yanderé

¹ Cheraĩ reta, aicuatía cua mbaembae regua peve agüiye vaerã peyoe. Ërei yandeyoa yave, ime co quía uyerure yandeRu Tumpa pe yanderé vae. Jae co Jesucristo. Jae co jupi vae. ² Tumpa uiporaracata tẽi yandeve yanembaeyoa reta jeco pegua. Ërei Jesucristo uiporara yandepipica pe, agüiye vaerã Tumpa uiporaraca yandeve. Jare Jesucristo umano opaete ivi pegua reta imbaeyoa reta re, yanembaeyoa reta reño'ã co.

³ Jesucristo iporoyocui reta yayapo yave, cua uicuaaca yandeve yaicuaa co. ⁴ Ime yave quía, "Aicuaa co Jesucristo", jei vae, iyapu co uyapo'ã yave Jesucristo iporoyocui reta. Jocua nunga jei'ã añete vae. ⁵ Ërei Jesucristo jei vae uyapo vae añetete uau ete Tumpa. Jare yaau yave Tumpa, yaicuaa yande co jae Jesucristo imbae reta. ⁶ Ime yave quía, "Che co jae Cristo imbae", jei vae, tuico cavi Jesucristo ico rami.

Mboroyocui ipiau vae

⁷ Cherivi reta, cua aicuatía aĩ peve vae mboroyocui ipiau vae'ã co. Jaeño penti mboroyocui indechi vae iyipi güiive picuaa vae. Cua mboroyocui indechi vae co jae ñee piyandu iyipi güiive vae. ⁸ Ërei cua mboroyocui mburuau regua jecuaño ipiau. Jesucristo yanderau jare pe reta piyeru vi. Echa'ã pĩtumimbi uasa ma jare tembipe añetete vae jembipe oĩ.

⁹ Ime yave quía, "Che aico tembipe oĩ vae pe", jei vae, ãrei umitarẽi yave ĩru upurugüirovia vae, jecuaño ico pĩtumimbi oĩ vae pe. ¹⁰ Ime yave quía ĩru upurugüirovia vae uau vae, jae jecuaño ico tembipe oĩ vae pe. Jáeramo ipuere uecha cavi uguata cavi vaerã uyepiaca mbae reve. ¹¹ Ërei ime yave quía ĩru upurugüirovia vae umitarẽi vae, jae jecuaño ico pĩtumimbi oĩ vae pe. Jáeramo jae co uguata oo pĩtumimbi pe vae rami. Uicuaa'ã queti ra oo oĩ vae. Echa'ã ipuere'ã etei uecha pĩtumimbi pe.

¹² Aicuatía cuarãĩ peve, cheraĩ reta, Tumpa umbiasa peve pemaeyoa reta ramo. Umbiasa ma peve Jesucristo jee re. ¹³ Tae ucuaa vae reta pe cua: Aicuatía cuarãĩ peve picuaa Jesucristo ramo. Jae imeño mai ico ndei ivi uyeyapo mbove. Tae tairusu vae reta

pe cua: Aicuatía cuarāi peve pemiamiri añã guasu ramo. Aicuatía cuarāi peve, cherai reta, picuaa yandeRu Tumpa ramo.

¹⁴ Tae ye ucuacuaa vae reta pe cua: Aicuatía cuarāi peve picuaa Jesucristo ramo. Jae imeño mai ico ndei ivi uyeyapo mbove. Tae tairusu vae reta pe cua: Aicuatía cuarāi peve pepirāta pepurugüirovia re ramo, jare Tumpa iñee ico pepia pe ramo, jare pemiamiri añã guasu ramo.

¹⁵ Agüiye peau cua ivi pegua. Agüiye peau mbaembae ivi pe ñugüinoi vae. Ime yave quía cua ivi pegua uau vae, uau'ã co Tumpa. ¹⁶ Cua ivi pegua uau vae reta jecuaeño uipota iporopota jare uipota opaete mbaembae ipōra vae uecha vae jare uyembicate imbaembae re. Ërei opaete cua ivi pegua co. YandeRu Tumpa pegua'ã co. ¹⁷ Jare cua ivi pegua opata co. Jare opa ma yave, ndarau quía uipota ye. Ërei Tumpa jei vae uyapo vae icota jaeño mai pegua.

Cristo ndive oyovaicho vae

¹⁸ Cherai reta, ou ma uvãe ara taicuegua reta. Piyandu quirāi Cristo ndive oyovaicho vae outa co. Ërei añave ime ñugüinoi jeta Cristo ndive oyovaicho vae reta. Jáeramo yaicuaa ou ma co uvãe ara taicuegua reta. ¹⁹ Jae reta uyembiyao yandegüi, añetete'ã uñemñiru yande ndive ramo. Echa'ã añetete uñemñiru yave yande ndive, jecuae uyembatita tēi yande ndive. Ërei uyembiyao reta yandegüi, uyecuaa vaerã añetete'ã co uñemñiru yande ndive.

²⁰ Ërei Espiritu Santo ou ma pepia pe. Jáeramo pe reta picuaa opaete. ²¹ Pe reta jae'ã co añete vae picuaa'ã vae. Picuaa co añete vae. Jáeramo aicuatía peve. Jare picuaa quirāi penti apu añete vae pegua'ã co.

²² Ime yave quía, “Jesús jae'ã co Cristo”, jei vae, jae co penti iyapu vae. Ime yave quía güirovia'ã yandeRu Tumpa jare Tai re vae, jae co Cristo ndive oyovaicho vae. ²³ Ime yave quía güirovia'ã Tumpa Tai re vae, jae uicuaa'ã etei yandeRu Tumpa. Ërei güirovia Tumpa Tai re vae uicuaa co yandeRu Tumpa.

²⁴ Jáeramo jecuaeño perovia iyipi güiive piyemboe jese vae. Echa'ã jucuarāi yave, jecuaeño piñemñiru cavita Tumpa Tai ndive jare yandeRu Tumpa ndive vi. ²⁵ Jare Tumpa jei ma umeeta co yandeve tecove opa mbae vae.

²⁶ Cuarāi aicuatía ma peve, amimbeu vaerã peve jocua uipota pembopia vaerã Tumpa güi vae reta. ²⁷ Ërei Tumpa umee ma peve Espiritu Santo, jare jae ico pepia pe. Jáeramo picuaa ma cua regua ñru vae umimbeu peve mbae reve. Echa'ã Espiritu Santo pemboe opaete mbaembae re, jare Espiritu Santo jecuaeño jei añete vae. Ipuere'ã etei iyapu. Jáeramo jecuaeño piñemñiru Jesucristo ndive Espiritu Santo pemboe rami.

²⁸ Añave, cherai reta, piñemiatangātu piñemñiru vaerã Jesucristo ndive. Jucuarāi yave, jae ou ye yave, ñaíta jae jovai yayerovia reve. Ndarau ñanemara jae ndive ñañeovāiti yave. ²⁹ Picuaa quirāi Tumpa co jae jupi vae. Jáeramo picuaa vi quirāi Tumpa umee ma tecove opa mbae vae opaete jupi vae uyapo vae reta pe.

3

Tumpa tai reta

¹ Mase, yandeRu Tumpa ñanereni jae tai retarã. Cua uicuaaca yandeve quirāi yandeRu Tumpa yanderau ete. Jáeramo upurugüirovia mbae vae reta yandecuaa cavi'ã, uicuaa'ã Tumpa ramo. ² Cherivi reta, añave yande co jae Tumpa tai reta. Jare Tumpa ndeño uicuaaca yandeve quirāita ra ñaí. Ërei yaicuaa ñaíta co Cristo rami jae ou ye yave. Echa'ã yaecha cavita. Jae etei oíta yanderovai. ³ Jare ime yave quía uāro oí uyerovia reve uecha vaerã vae, jae uipota ete ico iyoa mbae reve. Echa'ã Cristo iyoa mbae vae co.

⁴ Ime yave quía mbaeyoa uyapo vae, jae uyavi Tumpa iporoyocui. Echa'ã iyoa vae uyavi Tumpa iporoyocui. ⁵ Jare picuaa quirāi Jesucristo uyeyapo cuimbaerã umbai vaerã yanembaeyoa reta. Jare jae iyoa'ã etei. ⁶ Ime yave quía uñemñiru Jesucristo ndive vae, jae uipota'ã jecuaeño iyoa. Jecuaeño uipota iyoa vae Jesucristo imbae'ã co. Uicuaa'ã etei Jesucristo.

⁷ Cherai reta, agüiye quía tapembitavi. Jesucristo jupi co. Jae ramiño vi jupi vae uyapo vae jupi co. ⁸ Jecuaeño mbaeyoa uyapo vae añã guasu imbae co. Echa'ã añã guasu

jecuaeño iyoa iyipi güive. Jare Tumpa Tai uyeyapo cuimbaerã umbai vaerã aña guasu iparaviqui.

⁹ Tumpa güi tecove opa mbae vae güinoi vae jecuaeño uyapo'ã mbaeyoa. Echa'ã güinoi ma tecove Tumpa güi. Jáeramo ipuere'ã jecuaeño uyapo mbaeyoa. Echa'ã ime ma güinoi tecove opa mbae vae Tumpa güi. ¹⁰ Jare yandepuere yaicuaa quía ra co jae Tumpa tai reta jare quía ra co jae aña guasu tai reta. Ime yave quía jupi vae uyapo mbae vae, jae Tumpa imbae'ã co. Jae ramiño vi ime yave quía ñru upurugüirovia vae uau'ã vae, jae Tumpa imbae'ã co.

¹¹ Echa'ã iyipi güive piyandu cua ñee: Yayerau. ¹² Agüiye yayapo Caín uyapo rami. Echa'ã Caín aña guasu imbae co jare uyua tiví. Jare picuaa co maera uyua. Caín uyapo icavi mbae vae, jare tiví uyapo jupi vae. Jáeramo Caín uyua tiví.

¹³ Agüiye pepicañi, cherivi reta, upurugüirovia mbae vae reta pemitarëi yave. ¹⁴ Yande yaicuaa yaasa ma co mano güi tecove opa mbae vae pe, ñru upurugüirovia vae reta yaau ramo. Ñru upurugüirovia vae uau'ã vae güinoi'ã tecove opa mbae vae. ¹⁵ Ime yave quía ñru upurugüirovia vae umitarëi vae, jae penti upuruyua vae rami co. Jare picuaa quirã penti upuruyua vae güinoi'ã etei tecove opa mbae vae. ¹⁶ Jesucristo etei uicuaa yandeve Tumpa ipuruau. Echa'ã umano yanderé. Jae ramiño vi icavi co yande ñamano vaerã ñru upurugüirovia vae reta re. ¹⁷ Èrei ime yave quía mbaembae ivi pegua re icocatu vae, jare ime yave upurugüirovia vae mbaembae uata chupe vae, jocua icocatu vae ñatëi yave omborí mbaembae uata chupe vae, jae güinoi'ã Tumpa ipuruau ipia pe. ¹⁸ Cherai reta, añetete yaau yave ñru vae, yayapota mbae yamborí vaerã. Ndarau ñanemiariño yandepurugüirovia re. ¹⁹⁻²⁰ Cuarã yaicuaata yaico co añete vae re, jare yepe tēi yayembijeco mbae re yandepia pe, èrei yandepiacatuta Tumpa jovaque. Echa'ã Tumpa uicuaa jeta ete opaete yande yaicuaa vae güi. Tumpa uicuaa opaete. ²¹ Cherivi reta, yayembijeco'ã yave yandepia pe, jecuaeño yandepuere yaya Tumpa re yaquiyē mbae reve. ²² Jare yayerure yave Tumpa pe mbae re, jae umeeta yandeve, yayapo iporoyocui reta ramo. Echa'ã jocua yayapo vae umbiyerovia Tumpa. ²³ Jare Tumpa jei yandeve yarovia vaerã Tai Jesucristo jee re jare yayerau vaerã. Jae co mboroyocui Tumpa umimbeu yandeve vae. ²⁴ Jare Tumpa iporoyocui reta uyapo vae uñemiñru Tumpa ndive, jare Tumpa uñemiñru jae ndive. Jare yaicuaa Tumpa uñemiñru co yande ndive. Echa'ã Tumpa umeē yandeve Espiritu Santo ico vaerã yandepia pe.

4

Ñee uyuaivi vae reta

¹ Cherivi reta, ime cua ivi pe jeta upurumbitavi vae reta. Jae reta jei iyapu reve: “Che co jae penti Tumpa iñee umimbeu vae.” Jáeramo pepia pe piyemingueta cavi piyandu vae re, agüiye vaerã perovia ñee ou'ã Tumpa güi vae. ² Yandepuere yaicuaa ou ra ñee Tumpa iEspiritu güi. Echa'ã ñee umimbeu peve vae jei yave Jesús co jae Cristo cuimbaerã uyeyapo vae, jocua ñee ou Tumpa güi. ³ Èrei ñee umimbeu peve vae yave jei'ã Jesús co jae Cristo, jocua ñee ou'ã Tumpa güi. Jocua upurumbitavi vae oyovaicho Cristo ndive. Echa'ã piyandu quirã Cristo ndive oyovaicho vae reta yugüeruta co. Jare ime ma ñugüinoi ivi pe.

⁴ Cherai reta, pe reta co jae Tumpa imbae reta, jare pemiamiri ma Cristo ndive oyovaicho vae reta. Echa'ã Espiritu Santo ico pepia pe jare jae imbaepuere tuicha ete ivi pegua reta iya imbaepuere güi. ⁵ Echa'ã jae reta ivi pegua co. Jáeramo uyemingueta mbaembae ivi pegua reño, jare upurugüirovia mbae vae reta uyapisaca cavi jese reta. ⁶ Èrei yande co jae Tumpa imbae reta. Ime yave quía uicuaa Tumpa vae, jae uyapisaca yanderé. Èrei ime yave quía Tumpa imbae'ã vae, jae uyapisaca'ã yanderé. Jare cuarã yaicuaa añete vae pegua ra penti ñee, ani taví pegua ra.

Tumpa mburuau etei co

⁷ Cherivi reta, yayerau. Echa'ã Tumpa umeē yandeve mburuau. Jare upuruau vae güinoi tecove opa mbae vae Tumpa güi, jare uicuaa Tumpa. ⁸ Upuruau mbae vae uicuaa'ã Tumpa. Echa'ã Tumpa mburuau etei co. ⁹ Tumpa ombou Tai jae vaeño ivi pe yande ñanoi vaerã tecove opa mbae vae Tai uyapo yandeve vae jeco pegua. Jare jucuarã Tumpa uicuaa yandeve yanderau co. ¹⁰ Jáeramo yaicuaa ma mburuau añetete vae. Echa'ã

tenonde yave yande yaau'a Tumpa. Ērei Tumpa yanderau jare ombou Tai ivi pe, jae uiporara vaerā yanembaeyoa reta re, agūiye vaerā Tumpa uiporaraca yandeve.

¹¹ Cherivi reta, Tumpa yanderau ete. Jáeramo jae uipota yayerau vaerā. ¹² Mbaeti etei quía uecha Tumpa. Ērei yayerau yave, Tumpa ico yandepia pe, jare mburuau Tumpa coti ñanoi vae jecuaeño ucuacuaa.

¹³ Jare Tumpa umee ma yandeve iEspíritu. Jáeramo yaicuaa yande ñañemĩru co Tumpa ndive, jare Tumpa ico yandepia pe. ¹⁴ Ore nduecha Tumpa Tai, jare numimbeu ĩru vae reta pe quirāi yanderu Tumpa ombou Tai ivi pe umbiasa vaerā ivi pegua reta. ¹⁵ Ime yave quía, "Jesús co jae Tumpa Tai", jei vae, jae uñemĩru Tumpa ndive, jare Tumpa ico ipia pe. ¹⁶ Yaicuaa Tumpa yanderau co jare yarovia jecuaeño yanderauta co. Tumpa mburuau etei co. Jare upuruau reve ico vae uñemĩru Tumpa ndive, jare Tumpa ico ipia pe.

¹⁷ Jare ñañemĩru Tumpa ndive ramo, mburuau Tumpa coti ñanoi vae ucuacuaa, yandepuere vaerā ñāi Tumpa jovai yaquiye mbae reve jocua ara ñanerāa yave. Echa'a cua ivi pe yaico rambueve, Tumpa ico yandepia pe. ¹⁸ Ndarau yaquiye Tumpa güi, jae yanderau ramo. Tumpa ipuruau tuicha ete. Jáeramo ndarau yaquiye chugüi. Echa'a ime yave quía Tumpa güi uquiye vae, jae ipia pe uyemingueta Tumpa uiporaracata co chupe. Tumpa güi uquiye vae uicuaa'a Tumpa uau ete co.

¹⁹ Yande yaau Tumpa jae rani yanderau ramo. ²⁰ Ime yave quía, "Che aau Tumpa", jei vae, umitarēi yave ĩru upurugüirovia vae, iyapu co. Echa'a uau'a ĩru upurugüirovia vae, yepe tēi ipuere uecha. Jáeramo ipuere'a uau Tumpa. Echa'a uecha'a etei Tumpa. ²¹ Jare Tumpa umimbeu ma yandeve cua mboroyocui: "Uau Tumpa vae tuau vi ĩru upurugüirovia vae."

5

Quirāi yaicuaa Tumpa tai reta

¹ Opaete güirovia Jesús co jae Cristo vae reta güinoi tecove opa mbae vae Tumpa güi. Jare uau yanderu Tumpa vae uau vi Tumpa tai reta. ² Yaau yave Tumpa jare yayapo yave Tumpa iporoyocui reta, yaicuaa yaau co Tumpa tai reta. ³ Echa'a yaau yave Tumpa, yayapo iporoyocui reta, jare yavai'a co yayapo vaerā iporoyocui reta. ⁴ Tecove opa mbae vae Tumpa güi güinoi vae umiamiri ivi pegua oyovaicho jae ndive vae. Añete co, yandepuere ñamiamiri ivi pegua oyovaicho yande ndive vae yandepurugüirovia rupi. ⁵ Güirovia Jesús co jae Tumpa Tai vae ipuere umiamiri ivi pegua oyovaicho jae ndive vae.

Espíritu Santo umimbeu vae

⁶ Jesucristo umbipi iparaviqui uyembibautizaca ma i pe yave, jare opa uyapo iparaviqui umano curusu re yave. Jaeño'a umbipi iparaviqui. Opa uyapo umano curusu re yave. Jare Espíritu Santo umimbeu cua regua. Echa'a Espíritu Santo jecuaeño umimbeu añete vae. ⁷ Jare ime ara pe mbapi cua regua umimbeu vae. Echa'a yanderu Tumpa jare Ñee jare Espíritu Santo umimbeu pāve. Jare cua mbapi pentiño co. ⁸ Jae ramiño vi ime ivi pe mbapi cua regua umimbeu vae. Echa'a Espíritu Santo jare i jare Jesús jugüi umimbeu pāve penti ramiño. ⁹ Yarovia ivi pegua reta umimbeu yandeve vae, yepe tēi amo pe umimbeu yandeve vae añete vae'a co. Ērei Tumpa umimbeu yandeve vae jecuaeño añete vae. Jáeramo jecuaeño yandepuere yarovia Tumpa umimbeu yandeve vae. Jare jae umimbeu yandeve Jesús regua cuarāi: "Cua co jae cheRai." ¹⁰ Tumpa Tai re güirovia vae uicuaa ipia pe Jesús co jae Tumpa Tai. Jare Tumpa etei umimbeu yandeve cua. Jáeramo cua güirovia'a vae güirovia'a Tumpa. Ērei cua añete'a yave, Tumpa iyaputa tēi co yandeve. ¹¹ Jare Tumpa umimbeu yandeve cua: Jae umee yandeve tecove opa mbae vae. Ime ñanoi cua tecove opa mbae vae Tumpa Tai re yarovia ramo. ¹² Tumpa Tai güinoi ipia pe vae ime güinoi tecove opa mbae vae. Tumpa Tai güinoi mbae ipia pe vae güinoi'a tecove opa mbae vae.

Picuaa penoi co tecove opa mbae vae

¹³ Pe reta perovia Tumpa Tai jee re. Jáeramo aicutía cua peve picuaa vaerā penoi co tecove opa mbae vae. ¹⁴ Jare yandepuere yarovia catu Tumpa. Echa'a yaicuaa Tumpa uyandu co yandeve yayerure yave chupe mbae jae uipota yayerure vaerā chupe jese vae

re. ¹⁵ Jare cuarāi yayerure chupe mbae re yave, yaicuaa jae uyapota co yandiyerure. Echa'ā yaicuaa jae uyandu co yandeve.

¹⁶ Penti upurugüirovia vae uyapo yave mbaeyoa, iru upurugüirovia vae ipuere uyerure Tumpa pe jese, jocua mbaeyoa mano pegua'ā yave. Jucuarāi yave, Tumpa umaēñota mbaeyoa uyapo vae re icoño vaerā. Ime co penti mbaeyoa mano pegua. Penti upurugüirovia vae uyapo yave jocua nunga mbaeyoa, iru upurugüirovia vae agüiye tuyerure Tumpa pe jese. ¹⁷ Opaete mbae jupi mbae vae mbaeyoa co. Ērei ime mbaeyoa mano pegua'ā vae.

¹⁸ Yaicuaa tecove opa mbae vae Tumpa güi güinoi vae jecuaeño uyapo'ā mbaeyoa. Echa'ā Tumpa Tai etei uyandareco jese agüiye vaerā aña guasu uipisi.

¹⁹ Yaicuaa yande co jae Tumpa tai reta jare quirāi aña guasu güinoi mbaepuere opaete upurugüirovia mbae vae reta re.

²⁰ Jae ramiño vi yaicuaa Tumpa Tai ou ma co cua ivi pe jare umee yandeve yaicuaa vaerā Tumpa añetete vae. Ñañemiiru ma Tumpa ndive. Echa'ā ñañemiiru ma Tumpa Tai Jesucristo ndive. Jae co Tumpa añetete vae. Jae umee yandeve tecove opa mbae vae.

²¹ Cheraí reta, agüiye pemiadora tumpa-raanga reta. Amén.

SEGUNDA CARTA DEL APOSTOL SAN JUAN

¹ Che co jae Juan. Jecuaeño aico upurugüirovia vae reta itenondeguarã. Nde co jae penti cuña Tumpa uiparavo vae. Aicutatía aĩ cua tupapire ndeve jare nemembi reta pe. Che puau añete vae perovia ramo. Jae ramiño vi opaete añete vae uicuaa vae reta perau che puau rami. ² Echa'ã jocua jecuaeño añete vae ico yandepia pe, jare icota yande ndive jaeño mai pegua.

³ YandeRu Tumpa jare yandeYa Jesucristo - jae co yandeRu Tai - tumee peve ipiacavi jare ipuruparareco jare ipiacatu, añetete co peau ramo.

Moromboe añete vae Cristo regua güirovia vae

⁴ Aicuaa yave nemembi reta yugüireco añete vae rupi, ayerovia ete. Echa'ã yandeRu yandeocui jucuarã yaico vaerã. ⁵ Jare añave che numiñera, cherindi, nemandúa vaerã iyipi güive yaicuaa vae re. Echa'ã iyipi güive Tumpa yandeocui yayerau vaerã. Cua aicutatía ndeve vae mboroyocui ipiau vae'ã co. ⁶ Añetete yaau yave Tumpa, yayapota Tumpa iporoyocui reta. Jare iyipi güive piyandu cua mboroyocui. Jáeramo icavi co jecuaeño piyapo vaerã.

⁷ Echa'ã ime ma ivi pe ñugüinoi jeta upurumbitavi vae reta. Jae reta jei'ã Jesús co jae Cristo cuimbaerã uyeyapo vae. Jocua upurumbitavi vae reta oyovaicho Cristo ndive. ⁸ Yaparaviqui ma tanta ñanoi vaerã Tumpa umeeta yandevae vae. Jáeramo piñemoa, agüiye vaerã pemicañi. Aipota penoi vaerã opaete Tumpa uipota penoi vaerã vae.

⁹ Amocue vae ipia pe uyemingueta tēi jae reta uicuaa cavi ete mbaembae regua ĩru vae reta güi. Ērei güirovia'ã yave moromboe añete vae Cristo regua, uicuaa'ã Tumpa. Moromboe añete vae Cristo regua güirovia vae uicuaa yandeRu Tumpa. Jae ramiño vi uicuaa Tumpa Tai. ¹⁰ Ou yave pepi penti oporomboe vae, umimbeu'ã yave peve cua moromboe añete vae, agüiye pemaño jese upita vaerã perenta pe, jare agüiye pere chupe: “Tumpa ndiveño.” ¹¹ Echa'ã pere yave chupe: “Tumpa ndiveño”, piñemĩru ma jae ndive icavi mbae vae uyapo vae re.

Aipota aa pepi

¹² Aipota jeta jae peve, ěrei jaeño ma jaeta peve cua tupapire pe. Echa'ã aipota aa pepi ñanemiari yandiyupe vaerã, yayerovia ete vaerã.

¹³ Ndepiquii Tumpa uiparavo vae imembi reta jei ndeve: “Tumpa ndiveño eĩ.” Amén.

TERCERA CARTA DEL APOSTOL SAN JUAN

¹ Che co jae Juan. Jecuaño aico upurugüirovia vae reta itenondeguarã. Che nduau, cherivi Gayo, añete vae nderovia ramo.

² Cherivi, aicuaa quirãi nde ndico cavi Tumpa coti. Jare jecuaño ayerure Tumpa pe nderé, jecuaño ndico cavi vaerã opaete mbaembae re jare agüiye vaerã nembraerasi.

³ Echa'ã amocue yanderivi reta yugüeru cua pe umimbeu cheve quirãi añete vae ico ndepia pe jare quirãi nde jecuaño ndico añete vae rupi. Jáeramo ayerovia ete nderé.

⁴ Añete co, ayerovia ete ayandu yave quirãi cherai reta jecuaño yugüireco anete vae rupi.

Gayo ombori ñru upurugüirovia vae reta

⁵ Cherivi, ñru upurugüirovia vae reta nembori yave, yepe tẽi ndicuaa'ã reta, ndiyeyocui cavi neĩ Tumpa pe. ⁶ Jae reta etei umimbeu ndepuruau upurugüirovia vae cua pe uyembati vae reta pe. Icavi ete co nembori reta vaerã yugüeru yave nerenta güi. Ndiyapota Tumpa uipota ndiyapo vaerã vae. ⁷ Echa'ã jae reta vi uyeyocui ñugüinoi Tumpa pe. Jare uguata reta opaete que rupi rambueve, jei'ã upurugüirovia mbae vae reta pe ombori vaerã. ⁸ Jáeramo icavi co yande yambori reta vaerã. Echa'ã cuarã yandepuere ñañemĩru jae reta ndive umimbeu vaerã ñru vae reta pe añete vae regua.

Icavi mbae vae Diótreres uyapo vae

⁹ Aicuatã ma cua re upurugüirovia vae uyembati vae reta pe. Ërei Diótreres uipota'ã uyapo che jae chupe uyapo vaerã vae. Echa'ã icavi ete echa chupe uyemitenonde vaerã ñru upurugüirovia vae reta ipite pe. ¹⁰ Jáeramo che aa yave pepi chemanduata co Diótreres uyapo vae re. Jae uyemingueta icavi mbae vae orecoti. Ombori'ã etei upurugüirovia vae ambie coti güi pepi yugüiraa vae reta. Jae ramiño vi jei ñru upurugüirovia vae reta pe agüiye vaerã ombori reta. Jare ime yave upurugüirovia vae reta iquirẽi ombori reta vae, Diótreres umaño'ã jese reta uyembati vaerã ñru upurugüirovia vae reta ndive.

Opaete vae uyemingueta cavi Demetrio re

¹¹ Cherivi, jecuaño iyapo icavi vae. Agüiye iyapo icavi mbae vae. Icavi vae uyapo vae Tumpa tai co. Ërei icavi mbae vae uyapo vae uicuaa'ã Tumpa.

¹² Opaete vae uyemingueta cavi Demetrio re. Echa'ã jae jecuaño ico añete vae rupi. Ore vi numimbeu peve jae jecuaño uyapo icavi vae. Jare picuaa ore numimbeu peve vae añete co.

Saludo reta

¹³ Aipota tẽi jeta jae ndeve, ãrei jaeño ma jaeta ndeve cua tupapire pe. ¹⁴ Ërei aipota aa apou ndepi imambaeño ñañemiari yandiyupe vaerã.

¹⁵ Tumpa tumee ndeve ipiacatu. Neamigo reta jei ndeve Tumpa ndiveño eĩ. Tumpa ndiveño toĩ cheamigo joco pe ñugüinoi vae reta.

LA CARTA DEL APOSTOL SAN JUDAS

¹ Che co jae Judas. Che co jae Jacobo tivi. Che ayeyocui Jesucristo pe. Aicutafía aĩ cua tupapire yandeRu Tumpa uiparavo vae reta pe. Tumpa perau jare peñono tee Jesucristo peguarã. Jesucristo jecuaeño uyandareco peré.

² Tumpa tumee peve jeta ete ipuruparareco jare ipiacatu jare ipuruau.

Moromboe añete mbae vae reta
(2 P 2.1-7)

³ Cherivi reta, aipota ete aicutafía peve yandiyembiasa regua. Èrei icavi echa cheve aicutafía vaerã peve ñru mbaembae regua. Jáeramo cua tupapire pe aipota pumbiaracuaa pepuere vaerã piñemiatangātu yandepurugüirovia re. Echa'ã Tumpa uicuaaca cua mburugüirovia oñono tee iyupeguarã vae reta pe. Agüiye etei perovia moromboe añete mbae vae. ⁴ Echa'ã amocue cuimbae Tumpa jei vae uyapo mbae vae uñemñiru viari pe reta ndive. Jae reta jei Tumpa ipiacavi chupe reta ramo, ipuere uyapo pichñi vae. Èrei jae reta oyovaicho yandeYa Jesucristo ndive. Ìma ma Tumpa uicuaaca yandeve quirã jae reta uiporarata co.

⁵ Jáeramo yepe tēi picuaa ma, èrei aipota pumimandúa ye cua re: YandeYa uepi Israel pegua reta güeru Egipto güi. Èrei taicue rupi opa uyuca jei vae güirovia'ã vae reta. ⁶ Jae ramiño vi Tumpa uiporaraca amocue ángel pe. Echa'ã tenonde voi Tumpa umee chupe reta mbaepuere. Èrei jae reta uipota'ã uyeyocui Tumpa pe ramo, ueya yugüirecoarenda. Jáeramo Tumpa uñapíti oñono reta pítumimbi pe. Joco pe jaeño maĩ pegua uãro ñugüinoi Tumpa uãa reta vaerã jocua ara pe. ⁷ Jae ramiño vi Tumpa uiporaraca Sodoma jare Gomorra jare tenta guasu iyipi rupi ñugüinoi vae reta pegua reta pe. Echa'ã jocua tenta guasu reta pegua reta jecuaeño uyapo aguasa jare cuimbae joco pe yugüireco vae reta jecuaeño uyerereco uyupii. Jáeramo Tumpa uiporaraca ete chupe reta uicuaaca vaerã ñru vae reta pe agüiye vaerã uyapo jae reta uyapo rami. Jáeramo Tumpa opa uyuca reta tata pe. Jare jocua tata uyemijaanga tata opa mbae vae re.

⁸ Jae ramiño vi moromboe añete mbae vae re oporomboe vae reta ipia pe uyemingueta cavi'ã. Jae reta uyapo pichñi vae jete pe, jare güiñiro mburuvicha reta, jare jei icavi mbae vae mbaepuere güinoi vae reta coti. ⁹ Èrei Miguel etei - jae co ángel reta itonondegua - uipiu umbijeco vaerã ña guasu. Echa'ã jae uyeaca yave ña guasu ndive Moisés jetecue re, jei chupe: “YandeYa tuñeengata ndeve.” ¹⁰ Èrei moromboe añete mbae vae re oporomboe vae reta jei icavi mbae vae uicuaa mbae vae coti. Jae reta maemimba reta rami co. Echa'ã yugüireco jei vae reño. Jáeramo uiporaracata. ¹¹ Tumpa uiporaracata chupe reta. Uyapo reta Cañ uyapo rami. Jae ramiño vi corepoti uipota ete ramo, uyapo reta icavi mbae vae Balaam uyapo rami. Jae ramiño vi uyapo reta Tumpa jei chupe reta agüiye vaerã uyapo vae, Coré uyapo rami. ¹² Pe reta piyembati yave pecaru vaerã piyeraru reve, jae reta vi ucaru pe reta ndive imara mbae reve. Èrei icavi'ã co ucaru reta vaerã pe reta ndive. Echa'ã añetete'ã co peñru reta. Jae reta amapítu ama mbaeti güinoi vae reta rami co. Echa'ã jocua nunga amapítu tanta osi ivitu ete yave, èrei ama oqui'ã etei. Jae ramiño vi temiti reta ía ipiru ndei ipuere yagüiye mbove vae rami co. Echa'ã taicue rupi temiti reta etei ipiru, iya opa omombo japo reta reve ramo. ¹³ Ou ivitu tanta uyepuyu i guasu íarambo yave, uyeyapo íaparoa tuicha vae, èrei i íarambo jaeño uyecuaa tiriyai. Jocua oporomboe vae reta jocua íaparoa rami co. Echa'ã jae reta uyapo uñemimaraca vaerãño. Jae ramiño vi jae reta yasitata uguata vae reta rami co. Echa'ã yugüiraata pítumimbi oĩ vae pe yugüireco vaerã joco pe jaeño maĩ pegua.

¹⁴ Jare Enoc - jae co siete ñemoña pegua Adán güi vae - jae co penti Tumpa ñínee araca umimbeu vae - jei cua reta re cuarã: “Mase, yandeYa outa jeta ete oñono tee iyupeguarã vae reta ndive. ¹⁵ Jare ou yave, uãata opaete vae. Uicuaacata quirã Tumpa jei vae uyapo'ã vae reta jecuaeño uyapo icavi mbae vae uipota'ã uyapo Tumpa jei vae ramo. Jae ramiño vi uicuaacata quirã jocua iyoa vae reta jei icavi mbae vae icoti.” Jucuarã jei.

¹⁶ Jae reta iñeenguru ĩru vae reta re jare iñera ĩru vae reta re. Jecuaeño yugüireco jei vae reño. Umbiyerovia-raangaiño ĩru vae reta. Echa'ã uipotaiño ĩru vae reta umee vaerã mbaembae chupe reta.

Piñemimirãta pepurugüirovia re

¹⁷ Ĕrei, cherivi reta, pemandúa yandeYa Jesucristo jemimondo reta umimbeu peve vae re. ¹⁸ Echa'ã jae reta umimbeu peve quirãĩ ara taicuegua reta pe amocue vae oyoyaita Tumpa iñee umimbeu vae reta jare quirãĩ jecuaeño yugüirecota jei vae reño Tumpa jei vae uyapo'ã ramo. ¹⁹ Jocua reta iporomboe güirovia vae reta uyembiyao moromboe añete vae güirovia vae reta güi. Echa'ã jocua reta uicuaa'ã etei Tumpa jare mbaeti güinoi Espĩritu Santo ipia pe. ²⁰ Ĕrei piñemimirãta pepurugüirovia re, cherivi reta. Echa'ã pepurugüirovia Tumpa pegua co. Jare piyerure Espĩritu Santo imbaepuere rupi. ²¹ Jecuaeño pico cavi, Tumpa ipuere vaerã uicuaaca peve ipuruau. Jare jecuaeño peãro piyerovia reve penoi vaerã tecove opa mbae vae yandeYa Jesucristo ipuruparareco rupi.

²² Piparareco amocue ipurugüirovia re ipirãta'ã vae. ²³ Pembori ĩru vae reta uyembiasaca vaerã mbaembae tata güi peepi rami. Piparareco reta, Ĕrei piñemoa vi imbaeyoa reta güi. Echa'ã icavi co piñamitãa vaerã chugüi imbaeyoa reta.

Yambiadora Tumpa

²⁴⁻²⁵ Añave yambiadora Tumpa. Echa'ã jae yanembiasa yandeYa Jesucristo uyapo vae rupi. Jaeño co Tumpa. Jae uyembiaadoraca ete co jare güinoi mbaepuere tuicha ete vae añave jare jaeño mai pegua. Jáeramo ipuere umee peve mbaepuere agüiye vaerã pepia chugüi jare piyemboi vaerã teco mbae reve jae jovai. Joco pe peechata Tumpa jare piyerovia eteta. Amén.

APOCALIPSIS O REVELACIÓN A SAN JUAN

¹ Che co jae Juan. Che co jae Jesucristo jembiocui. Tumpa uicuaaca Jesucristo pe imambae uyeyapota vae. Jare Jesucristo ombou ángel uyeyocui chupe vae umimbeu vaerã cheve, che amimbeu-yuapi ye vaerã Jesucristo jembiocui reta pe. ² Cua aicutáfã vae Tumpa iñee co. Jesucristo etei umimbeu cheve cua. Che aecha cua opaete.

³ Cua amimbeu peve ndei uyeyapo mbove. Cua umingueta vae reta jare cua uyandu vae reta uyeroviata co, uyapo reta yave Tumpa jei vae cua pe aicutáfã vae. Echa'ã uyaro ma ara reta cua amimbeu peve vae uyeyapo vaerã.

Siete tenta guasu Asia pegua pe uyembatimbati vae reta pe

⁴⁻⁵ Che aicutáfã añi cua tupapire pepurugüirovia vae siete tenta guasu Asia pegua pe piyembatimbati vae reta pe. Tumpa jare Espíritu Santo siete jembiape güinoi vae - jae Tumpa iguapia jovai oĩ - jare Jesucristo tumee peve ipiacavi jare ipiacatu. Tumpa iyipi güive jare añave jecuaeño ico. Jare jae jecuae oĩta. Jesucristo co jae jecuaeño umimbeu cavi Tumpa regua vae. Jare tenonde voi icove ye ou umanocue vae reta ipite güi. Jare co opaete ivi pegua reta juvicha guasu reta Juvicha. Jare yanderau jare umbai opaete yanembaeyoa reta jugüi pe. ⁶ Jare yandeapo mburuvicha guasu retarã jare sacerdote retarã yayeyocui vaerã Tumpa pe - jae co Jesucristo Tu. Jesucristo tuyembiaadoraca jare tugüinoi opaete mbaepuere jaeño mai pegua. Amén.

⁷ Mase, jae outa amapĩtu reve, jare opaete vae uechata. Israel pegua reta vi uechata. Echa'ã Israel pegua reta uicutuca. Jare opaete jocua ivi pegua reta ipiatiti eteta jese. Cuarãi tuyeyapo. Amén.

⁸ —Che co jae Alfa jare Omega jee vae —jei yandeYa Tumpa—. Che co jae tenondegua vae jare taicuegua vae. Che co jae añave jare iyipi güive ico vae. Che co jae jecuae oĩta vae. Che co jae opaete mbaepuere güinoi vae —jei.

Juan uecha cuimbaerã uyeyapo vae

⁹ Che co jae periquei Juan, Jesús re yarovia ramo. Che vi aiporara añi pe reta rami Tumpa iporoyocua jeco pegua, jare chepiaguasu pe reta pepiaguasu rami.

Che añi ivi i mbite pe oĩ vae Patmos jee vae pe penti peresorã Tumpa iñee amimbeu jare Jesús regua chemiari ramo. ¹⁰ Espíritu Santo imbaepuere rupi añevãe domingo ara pe, jare ayandu cheraicue coti ñee jiapu ete vae. Jiapu penti trompeta rami. ¹¹ Jare ñee jei:

—Che co jae Alfa jare Omega jee vae. Che co jae tenondegua vae jare taicuegua vae.

Jayave jei:

—Icuatía penti tupapire pe ndeechata vae. Jayave emondo tupapire upurugüirovia vae siete tenta guasu Asia pegua pe uyembatimbati vae reta pe. Emondo Efeso pe, jare Esmirna pe, jare Pérgamo pe, jare Tiatira pe, jare Sardis pe, jare Filadelfia pe, jare Laodicea pe —jei cheve.

¹² Jayave ayerova aecha vaerã chemingueta vae. Jare ayerova amae yave, aecha siete vela iguapica oro pegua reta. ¹³ Jare aecha jocua siete vela iguapica reta ipite pe penti cuimbae. Cuimbaerã uyeyapo vae echa cheve. Güinoi temimonde pucu ipi rupi uvãe vae. Jare ipitía rupi aecha güinoi penti cuacuaa oro pegua. ¹⁴ Ía tĩ ovecha-raagüe tĩ vae rami echa cheve. Tĩ asi co roi tĩ asi vae rami. Jare jesa tata jendi oĩ vae rami co. ¹⁵ Ipi bronce uyembacu yave tata pe uyepiro ete vae rami echa cheve. Jare uyemingueta yave, iñee jiapu ete i guasu jiapu rami. ¹⁶ Jare güinoi siete yasitata reta ipo iyacata pe, jare iyuru güi oĩ penti quisepucu jaimbeyovai vae. Jova jembipe ete guarasi ara mbite yave jembipe rami.

¹⁷ Jare aecha yave, aa jae jovai cuimbae umano vae rami. Jayave jae oñono ipo iyacata cheré jare jei cheve:

—Agüiye equiye. Che co jae tenondegua vae jare taicuegua vae —jei—. ¹⁸ Che co jae jecuaeño ico vae. Amano, ñrei, mase, añave aico jaeño mai pegua. Jare che anoi mbaepuere mano jare cañitei re —jei—. ¹⁹ Icuatía opaete mbaembae ndeecha vae regua jare emimbeu mbae re uyemijaanga jocua mbaembae. Jucuarã nemimbeuta mbae taicue

rupi uyeyapota vae —jei cheve—. ²⁰ Taicuaaca ndeve mbae re uyemijaanga siete yasitata reta chepo cheacata pe ndeecha vae jare mbae re uyemijaanga siete vela iguapica oro pegua reta. Siete yasitata reta uyemijaanga siete ángel reta re. Jocua siete ángel reta uyeyocui upurugüirovia vae jocua siete tenta guasu reta pe uyembatimbati vae reta pe. Jare siete vela iguapica reta uyemijaanga upurugüirovia vae jocua siete tenta guasu reta pe uyembatimbati vae reta re —jei—.

2

Ñee Efeso peguarã

¹ Icuatfa ángel upurugüirovia vae Efeso pe uyembati vae reta pe uyeyocui vae pe cuarã: ‘Cua jei siete yasitata reta ipo iyacata pe uipisi vae - jae siete vela iguapica oro pegua reta ipite pe uguata vae co:

² Che aicuaa preparaviqui. Tanta preparaviqui jare pepiaguasu vi. Piñemiñru'a icavi mbae vae uyapo vae reta ndive. Ime pepite pe ñugüinoi jocua “Che co jae Jesús jemimondo” jei vae reta. Ërei jae reta Jesús jemimondo reta'a co. Jare pe reta peeca picuaa vaerã añetete ra co Jesús jemimondo reta. Jare añave picuaa iyapu reta co. ³ Jare pe reta cherau ramo, pepiaguasu jare pemiaguanta pecueri mbae reve.

⁴ Ërei chepuere pumbijeco mbae re. Jae co cua: Cherau'a ma tenonde yave cherause vae rami. ⁵ Jáeramo pemandúa quirã tenonde yave cherau ete. Peeya piyemingueta icavi mbae vae pepia pe oĩ vae, jare piyapo ye mbaraviqui reta tenonde yave piyapose vae rami. Echa'a peeya'a yave piyemingueta icavi mbae vae pepia pe oĩ vae, aata imambae pepi jare ambisirita pevela iguapica jenda güi.

⁶ Ërei ayerovia cua re: Nicolaíta reta uyapo vae icavi'a peve. Echa'a jocua icavi'a ete vi cheve.

⁷ Uipota uyandu vae tuyapisaca Espíritu Santo upurugüirovia vae uyembatimbati vae reta pe jei vae re. Upurumiamiri vae pe ameeta jou vaerã jocua ivira tecove umee vae güi. Jocua ivira ime parafo mbite pe oĩ. Joco pe ico Tumpa.'

Jucuarã icuatfa —jei—.

Ñee Esmirna peguarã

⁸ Jare icuatfa ángel upurugüirovia vae Esmirna pe uyembati vae reta pe uyeyocui vae pe cuarã: ‘Cua jei jocua tenondegua vae jare taicuegua vae - jae umano, Ërei icove ye: ⁹ Che aicuaa preparaviqui jare quirã piporara jare preparavete (ërei picocatu co Tumpa coti). Aicuaa vi quirã jocua judío-raanga reta jei icavi mbae vae pecoti. Yepe tẽi jei reta: Ore co jae judío reta, Ërei jae'a co. Echa'a jae reta uyapo Satanás jemiapi. ¹⁰ Agüiye pequiye piporarata vae güi. Mase, añã guasu peñonocata amocue pe reta peresoriru pe, uyecuaa vaerã pepurugüirovia añetete ra. Jare piporarata diez ara pegua. Jecuaño perovia cheré, yepe tẽi aramoi pemanota pepurugüirovia jeco pegua. Jucuarã yave, ameeta peve tecove opa mbae vae.

¹¹ Uipota uyandu vae tuyapisaca Espíritu Santo upurugüirovia vae uyembatimbati vae reta pe jei vae re. Upurumiamiri vae re ndarau etei mbaepuere güinoi mano mocuia.'

Jucuarã icuatfa —jei—.

Ñee Pérgamo peguarã

¹² Jare icuatfa ángel upurugüirovia vae Pérgamo pe uyembati vae reta pe uyeyocui vae pe cuarã: ‘Cua jei quisepecu jaimbeyovai vae güinoi vae:

¹³ Aicuaa preparaviqui jare quiupe pico. Echa'a perenta guasu pe jeta ete vae uyapo Satanás jemiapi. Ërei pe reta jecuaño picuaaca quirã perovia cheré. Peeya'a etei pepurugüirovia, yepe tẽi yavai ete peve jocua ara reta pe Antipas uyeyucaca pepite pe yave. Antipas uyeyucaca, chemimbeu cavi ramo. Echa'a Satanás etei ico perenta guasu pe.

¹⁴ Ërei chepuere pumbijeco mbovi mbaembae re. Echa'a ime pepite pe ñugüinoi Balaam iporomboe güirovia vae reta. Balaam ombae Balac quirã ipuere umbiavai Israel pegua reta. Echa'a jae reta umbipi jou tembú tumpa-raanga reta pe uñemee vae jare uyapo aguasa. ¹⁵ Jae ramiño vi ime pepite pe ñugüinoi nicolaíta reta iporomboe güirovia vae reta, jare jocua moromboe icavi'a ete cheve.

¹⁶ Jáeramo peeya piyemingueta icavi mbae vae pepia pe oī vae. Peeya'a yave, aata pepi imambae jare añerärota jae reta ndive. Aiporuta jese reta quisepecu cheyuru güi oē vae.

¹⁷ Uipota uyandu vae tuyapisaca Espiritu Santo upurugüirovia vae uyembatimbati vae reta pe jei vae re. Upurumiamiri vae pe ameeta jocua maná uyecuaa mbae vae. Ameeta vi chupe penti ita tī vae. Jocua ita re ime penti tee ipiau vae uyecuatía oī. Jaeño ameeta ita chupe vae uicuaata jocua tee.'

Jucuarāi icuatía —jei—.

Ñee Tiatira peguarā

¹⁸ Jare icuatía ángel upurugüirovia vae Tiatira pe uyembati vae reta pe uyeyocui vae pe cuarāi: 'Cua jei Tumpa Tai. Jae jesa tata jendi oī vae rami co, jare ipi bronce uyembacu yave tata pe uyepiro ete vae rami:

¹⁹ Che aicuaa peparaviqui jare pepuruau jare pepurugüirovia jare quirāi piyeyocui cheve jare pepiaguasu. Jare jecuaño peparaviqui tanta. Añete co, tenonde yave peparaviqui tanta, ãrei taicue rupi peparaviqui tanta ete.

²⁰ Ërei chepuere pumbijeco cua re: Pemaño jocua cuña Jezabel jee vae re oporomboc vae rā pepite pe. Jae jei jae co penti cuña Tumpa iñee umimbeu vae. Ërei jae umbitavi cherembicui reta. Echa'ā jae umimbeu chupe reta uyapo vaerā aguasa jare jou vaerā tembú tumpa-raanga reta pe uñemee vae. ²¹ Jare amee ma ara reta jocua cuña pe ueya vaerā iyemingueta icavi mbae vae ipia pe oī vae, agüiye vaerā uyapo aguasa. Ërei jecuaño uyapo jocua icavi mbae vae. ²² Mase, amimbaerasita jocua cuña, jare aiporaraca eteta jae ndive menda re uyuvanga vae reta pe, ueya'ā reta yave icavi mbae vae jae ndive uyapo vae. ²³ Jare ayucata jocua cuña imembi reta, jare opaete upurugüirovia vae uyembatimbati vae reta uicuaata quirāi che aicuaa opaete vae iyemingueta ipia pe oī vae. Jare ameeta peve penti penti mbae piyapo vae rupi. ²⁴⁻²⁵ Ërei tae peve cua: Cua reño pumbijeco. Ërei piñemimirāta mburugüirovia penoi vae re che ayu ye regua. (Cuarāi chemiari aī upurugüirovia vae Tiatira pegua jocua cuña iporomboc güirovia mbae vae reta pe. Echa'ā jae reta uicuaa'ā Satanás iporomboc uyecuaa mbae vae jei chupe vae.)

²⁶ Upurumiamiri vae pe ameeta mbaepuere ipuere vaerā oyocui ivi pegua reta, jecuaño yave uyapo cheparaviqui. ²⁷ Jare oyocuita penti popoca fierro pegua pe. Güinoita mbaepuere jese reta mbaepuere penoi pembiperasoraso vaerā penti iru ñaeu pegua vae rami. Echa'ā cheRu umee cheve etei cua nunga mbaepuere. ²⁸ Jare ameeta chupe yasitata neimbove asi uyecuaa vae.

²⁹ Uipota uyandu vae tuyapisaca Espiritu Santo upurugüirovia vae uyembatimbati vae reta pe jei vae re.'

Jucuarāi icuatía —jei—.

3

Ñee Sardis peguarā

¹ Jare icuatía ángel upurugüirovia vae Sardis pe uyembati vae reta pe uyeyocui vae pe cuarāi: 'Cua jei jocua siete yasitata reta güinoi vae - jae co Espiritu Santo siete jembiapo güinoi vae uyeyocui chupe vae:

Che aicuaa peparaviqui. İru vae reta jei tēi picove catu co, ãrei picove catu'ā co Tumpa coti. ² Piñemoa ngatu jare piñemimirāta jocua imeño penoi vae re. Echa'ā pepirāta'ā etei jese. Piyapo'ā mbaraviqui Tumpa uipota piyapo vaerā vae. ³ Jáeramo pemandúa Tumpa umee peve vae re jare quirāi piyapisaca jese. Piñemimirāta jocua re, jare peeya piyemingueta icavi mbae vae pepia pe oī vae. Echa'ā piñemoa ngatu'ā yave, aata pepi imambae penti imonda vae uique o pe rami, jare ndarau picuaa quirāi yave ra aata pepi.

⁴ İme mbovi Sardis pegua uyapo'ā icavi mbae vae reta. Jae reta uguatata che ndive jemimonde tī vae reve icavi vae uyapo vae ramo.

⁵ Upurumiamiri vae pe ameeta temimonde tī vae omonde vaerā, jare ndarau ambai jee libro tecove opa mbae vae pegua güi. Aicuaacata cheRu jare ángel cheRu pe uyeyocui vae reta jovaque jae co chembae.

⁶ Uipota uyandu vae tuyapisaca Espiritu Santo upurugüirovia vae uyembatimbati vae reta pe jei vae re.'

Jucuarāi icuatía —jei—.

Ñee Filadelfia peguarã

⁷Jare icuatía ángel upurugüirovia vae Filadelfia pe uyembati vae reta pe uyeyocui vae pe cuarái: 'Cua jei iyoa mbae vae. Jae co añete vae jei vae. Jae güinoi mbaepuere Tumpa umee David pe vae. Jocua mbaepuere penti onque illave rami co. Echa'ã jae uipea yave penti onque, mbaeti quía ipuere uyuquenda ye. Jae ramiño vi jae uyuquenda yave penti onque, mbaeti quía ipuere uipea ye:

⁸Che aicuaa peparaviqui. Mase, aechaca ma peve penti onque uyepea oĩ vae. Mbaeti quía ipuere uyuquenda jocua onque. Pempaepuere michi co, ãrei piyapo che jae peve piyapo vaerã vae jare checuacu'ã.

⁹Ime pepite pe ñugüinoi jocua uyapo Satanás jembiape vae reta. Yepe tõi jei reta: Ore co jae judío reta, ãrei jae'ã co. Iyapu reta. Mase, ayapota chupe reta yugüiraa vaerã uyeatica perovai, jare aicuaacata chupe reta che puau co.

¹⁰Piyapo che jae peve piyapo vaerã vae pepiaguasu reve ramo, che puepita opaete ivi pe yugüireco vae reta uiporarata vae güi. ¹¹Mase, aa yeta imambae. Piñemimirãta mburugüirovia penoi vae re, agüiye vaerã ñru vae pe uñemee ndecorona ndegüi.

¹²Upurumiamiri vae pe ameeta ico vaerã cheTumpa jo pe, jare ndarau etei oẽ chugüi. Güinoita mbaepuere tuicha vae penti oquita ipirãta ete vae rami. Jare aicuatiaata jese cheTumpa jee jare cheTumpa jenta guasu jee - jae co Jerusalén ipiau vae cheTumpa ombouta ara güi vae. Jae ramiño vi aicuatiaata jese cheree ipiau vae.

¹³Uipota uyandu vae tuyapisaca Espiritu Santo upurugüirovia vae uyembatimbati vae reta pe jei vae re.'

Jucuarãi icuatía —jei—.

Ñee Laodicea peguarã

¹⁴Jare icuatía ángel upurugüirovia vae Laodicea pe uyembati vae reta pe uyeyocui vae pe cuarái: 'Cua jei jocua Amén jee vae. Jae jecuaeño umimbeu cavi añete vae Tumpa regua. Jae co opaete Tumpa uyapo vae iYa:

¹⁵Che aicuaa peparaviqui, jare quirãi chemitarẽi'ã jare cherau'ã. Icavita tõi co cheve chemitarẽi yave ani cherau yave. ¹⁶Chemitarẽi'ã jare cherau'ã. Jáeramo pomobota, penti cuimbae tembú uyúe mbae vae iyuru güi omombo rami.

¹⁷Echa'ã pe reta pere cuarái: Yaicocatu co. Jeta mbaembae ñanoi. Mbaeti etei mbae uata yandeve. Jucuarãi pere. ãrei picuaa'ã quirãi pepiatiti ete, jare peparavete, jare peresa mbae, jare penani.

¹⁸Che pumbiaracuaa pegua vaerã chegüi oro tata pe uyembichiriri iquiacue oẽ vaerã chugüi vae, picocatu vaerã, jare temimonde ti vae peremimonderã, agüiye vaerã penani yave pemara. Jae ramiño vi che pumbiaracuaa piñono vaerã moa peresa pe pepuere vaerã pemae. ¹⁹Che aiporaraca aau vae pe, amboe vaerã. Jáeramo piñemiatangãtu jare peeya piyemingueta icavi mbae vae pepia pe oĩ vae.

²⁰Mase, che ayemboi añ onque pe jare ambopu añ onque. Ime yave quía chiñee uyandu vae, uipea yave onque, aikueta acarú vaerã jae ndive, jare jae ucaruta che ndive.

²¹Upurumiamiri vae pe ameeta uguapi vaerã che ndive cheguapia pe. Echa'ã che vi apurumiamiri jare aguapi cheRu ndive iguapia pe.

²²Uipota uyandu vae tuyapisaca Espiritu Santo upurugüirovia vae uyembatimbati vae reta pe jei vae re.'

Jucuarãi icuatía —jei—.

4

Ara pe ñugüinoi vae reta umbiadora yandeYa

¹Cua jaicue rupi amae jare aecha penti onque uyepea oĩ ara pe. Jare ñee tenonde yave ayandu vae jei cheve. Pentu trompeta rami ñneeãta reve jei cheve:

—Iyupi cua pe jare aechacata ndeve mbaembae uyeyapota vae.

²Jare jupivoiño Espiritu Santo imbaepuere rupi aecha penti guapia ara pe jare quía uguapi oĩ guapia pe. ³Jare joco pe uguapi oĩ vae ita ipõra ete vae reta jaspe jare cornalina jee vae echa cheve. Jare aecha penti yii jocua guapia iyipi rupi. Jare yii ita ipõra ete vae esmeralda jee vae echa cheve. ⁴Jare aecha jocua guapia iyipi rupi ñru veinticuatro guapia reta. Jare aecha jocua guapia reta pe uguapi ñugüinoi veinticuatro tenondegua

reta. Omonde reta temimonde tī vae jare iñāca re güinoi reta corona oro pegua. ⁵ Jare jocua guapia güi ou ama uvera rami vae. Jare ayandu jiapu vae reta. Jare aecha jocua guapia jovai siete lámpara jendi ñugüinoi vae reta. Jae co Espiritu Santo siete jemiapo güinoi vae. ⁶ Jare jocua guapia jovai aecha vi i guasu rami vae, ērei vidrio pegua echa cheve. Jare jocua guapia iyipi pe etei aecha irundi mbaembae icove vae reta. Jae reta güinoi jeta jesa ipuere vaerā umae jenonde jare jaicue uyerova mbae reve. ⁷ Jare penti jocua icove vae penti yaguapīta echa. Jare ĩru icove vae penti toro echa. Jare ĩru icove vae jova cuimbae jova echa. Jare ĩru icove vae penti güiraquee tuicha vae uveve oī vae echa. ⁸ Jare penti penti jocua irundi mbaembae icove vae reta güinoi seis ipepo reta, jare jete rupi güinoi jeta jesa. Jare jecuaeño jei reta:

—YandeYa Tumpa opaete mbaepuere güinoi vae iyoa mbae etei co. Jae iyipi güiive jare añave jecuaeño ico. Jare jae jecuae oīta.

Jucuarāi jei reta ara rupi jare pītu rupi. Uputuu'ā etei reta.

⁹ Jare jocua mbaembae icove vae reta umbiadora jocua guapia pe uguapi vae jecuaeño ico vae, jare umee yasurupai chupe. ¹⁰ Jare jocua veinticuatro tenondegua reta uyeatica jocua guapia pe uguapi vae jecuaeño ico vae jovai umbiadora vaerā, jare oñono reta icorona jocua guapia jovai, jare jei reta:

¹¹ —Jupi co nde neno i vaerā opaete yembiadora jare mbaepuere, oreYa Tumpa. Echa'ā nde ndiyapo opaete mbaembae. Opaete mbaembae uyeyapo nde ndere vae rupi —jei reta.

5

Tupapire jare Ovecha-rai

¹ Jare aecha penti libro guapia pe uguapi vae ipo iyacata pe. Jocua libro güinoi uyecuatiacue japipe rupi jare icupe rupi, jare uyeyuquenda oī. Güinoi siete yemboyya, agüiye vaerā quía uipea umingueta. ² Jare aecha penti ángel ipirāta vae, jare ángel iñeēata reve jei:

—¿Ime pa quía jupi co cua libro uipea vaerā vae? ¿Ime pa quía jupi co cua libro iyemboyya uequi vaerā vae? —jei.

³ Jare mbaeti co jocua libro ipuere uipea vae ara pe jare ivi pe jare ivigüi pe. Mbaeti co quía ipuere umae jese.

⁴ Jare ayao ete. Echa'ā mbaeti quía uñevāe jupi libro uipea umingueta vaerā vae. Mbaeti quía uñevāe jupi libro re umae vaerā vae.

⁵ Jayave penti tenondegua vae jei cheve:

—Agüiye iyao. Mase, Judā iñemoñaa reta pegua Yaguapīta jee vae - jae co David Iyipi jee vae - upurumiamiri ma uequi vaerā jocua siete libro iyemboyya jare uipea vaerā tupapire —jei.

⁶ Jare aecha penti Ovecha-rai. Uyeyucaca echa cheve. Uyemboi oī jocua guapia jare jocua irundi mbaembae icove vae reta ipāu pe, jocua tenondegua reta ipite pe. Jae güinoi siete jāti jare siete jesa - jae co Espiritu Santo siete jemiapo güinoi vae opaete ivi rupi uyemondoca vae. ⁷ Jare jocua Ovecha-rai oo uequi libro guapia pe uguapi vae ipo iyacata güi. ⁸ Jare libro güinoi ma yave, jocua irundi mbaembae icove vae reta jare jocua veinticuatro tenondegua reta uyeatica Ovecha-rai jovai. Penti penti güinoi arpa jare mbae ipiche cavi vae tinee oī copa oro pegua pe. Jocua mbae ipiche cavi vae uñeño te Tumpa peguarā vae reta iyerure reta co.

⁹ Jare jae reta ucanta penti canta ipiau vae. Ucanta cuarāi:

—Jupi co nde neno i vaerā jocua libro. Jupi co nde ndeequi vaerā jocua libro iyemboyya reta. Echa'ā nde ndiyeyucaca jare ndeepi Tumpa imbae retarā nderugüi rupi opaete ivi ambiembie pegua reta ipite güi. ¹⁰ Jare ndiyapo reta mburuvicha guasu retarā jare sacerdote retarā ipuere vaerā uyeyocui ñaneTumpa pe. Jare oporoyocuita reta ivi pe.

Jucuarāi ucanta reta.

¹¹ Jayave amae ye, jare ayandu jeta ángel reta iñee. Jocua ángel reta uyemboi ñugüinoi jocua guapia jare jocua mbaembae icove vae reta jare jocua tenondegua reta iyipi rupi. Jare uyepapa jeta ye ye. ¹² Jare ángel reta iñeēata reve jei:

—Jupi co Ovecha-rai uyeyucaca vae güinoi vaerã mbaepuere, jare icocatu vaerã, jare iyaracuaa vaerã, jare uyembiadoraca vaerã. Jupi co yasurupai tuicha ñamee vaerã chupe —jei reta.

¹³Jayave opaete ara pe jare ivi pe jare ivigüi pe jare i guasu pe ñugüinoi vae reta ayandu jei:

—Tuyembiadoraca guapia pe uguapi vae jare Ovecha-rai jaeño mai pegua. Ñamee yasurupai tuicha chupe reta. Tugüinoi reta opaete mbaepuere.

¹⁴Jayave jocua irundi mbaembae icove vae reta jei:

—Amén.

Jare jocua veinticuatro tenondegua reta uyeatica jare umbiadora imeño mai ico vae.

6

Libro iyemboyya reta

¹Jare aecha Ovecha-rai uipea penti jocua libro iyemboyya. Jayave ayandu penti mbaembae icove vae jei:

—Eyu.

Ara jiapu vae echa uyemingueta yave.

²Jare aecha penti cavayu tĩ vae, jare opo cavayu re vae güinoi güirapa. Jare uñemee chupe corona. Jare jecuaeño upurumiamiri.

³Jare Ovecha-rai uipea ñru libro iyemboyya. Uyepea ma mocui. Jayave ayandu ñru mbaembae icove vae jei:

—Eyu.

⁴Jare aecha oo ñru cavayu. Ërei cua cavayu pĩta vae. Jare opo cavayu re vae pe uñemee mbaepuere umiñerãro vaerã ivi pegua reta uyeyuca vaerã. Jare uñemee vi chupe penti quisepucu tuicha ete vae.

⁵Jare Ovecha-rai uipea ñru libro iyemboyya. Uyepea ma mbapi. Jayave ayandu ñru mbaembae icove vae jei:

—Eyu.

Jare aecha ñru cavayu. Ërei cua cavayu jũ vae. Jare opo cavayu re vae güinoi ipo pe umipesa pipe vae. ⁶Jare ayandu ñee jocua irundi mbaembae icove vae reta ipite pe jei:

—Mocui libra trigo jepi penti ara mbaraviqui jepi pegua, jare seis libra cebada jepi penti ara mbaraviqui jepi pegua. Jare agüiye erucumegua aceite jare vino.

⁷Jare Ovecha-rai uipea ñru libro iyemboyya. Uyepea ma irundi. Jayave ayandu ñru mbaembae icove vae jei:

—Eyu.

⁸Jare aecha ñru cavayu. Ërei cua cavayu iyu vae. Jare opo cavayu re vae jee co Mano. Jare Cañitei jee vae oo Mano jee vae jaicue. Jare uñemee chupe reta mbaepuere jeta ye ye ivi pegua reta re, ipuere vaerã uyeyucaca reta quisepucu pe jare caruai pe jare mbaerasi pe jare maemimba pochi vae reta pe.

⁹Jare Ovecha-rai uipea ñru libro iyemboyya. Uyepea ma pandepo. Jayave aecha uñemearenda igüi pe Tumpa ñnee jeco pegua uyeyucaca vae reta. Echa'ã jae reta uyeyucaca, umimbeu Tumpa ñnee ñru vae reta pe ramo. ¹⁰Jare jae reta ñneeãta reve jei:

—Nde co jae iyoa mbae vae, oreYa. Nde co jae añete vae jei vae. ¿Maera pa ndeiño neãa ivi pegua oreyuca vae reta? ¿Quirã i yave pa ndiporaracata chupe reta? —jei reta.

¹¹Jare temimonde tĩ vae uñemee penti penti pe, jare penti vae jei chupe reta:

—Peputuño joco pe michi pegua. Echa'ã uyeyucacata vi rani perivi Tumpa pe uyeyocui vae reta, pe reta piyeyucaca rami —jei.

¹²Jare aecha Ovecha-rai uipea ñru libro iyemboyya. Uyepea ma seis. Jayave ivi tanta ucãta. Jare guarasi uyeyapo jũ penti tarapo jũ vae rami, jare yasi uyeyapo pĩta tugüi rami.

¹³Jare yasitata ara re ñugüinoi vae reta oa ivi pe, penti iva fa yagüiye mbae vae reta oa jäca güi ivitu tanta umicãta yave vae rami. ¹⁴Jare ara etei uyembiyao mbite rupi jare uñeñoma penti tupapire uñeñoma rami. Jare opaete ivitu reta jare ivi i mbite pe ñugüinoi vae reta usiri jenda güi. ¹⁵Jare ivi pegua reta juvicha guasu reta jare mburuvicha reta jare icocatu vae reta jare sundaro reta juvicha reta jare mbaepuere güinoi vae reta jare opaete uyeyocui vae reta jare opaete uyeyocui mbae vae reta uñemi ivicua reta pe jare ita ivitu reta re ñugüinoi vae reta ipite rupi. ¹⁶Jare jei ivitu guasu reta jare ita reta pe:

—Pea oreré. Oreñomi guapia pe uguapi vae jova güi. Oreñomi, agüiye vaerã nduecha Ovecha-rai. Echa'ã jae pochi ete oreve —jei reta—. ¹⁷ Ou ma uvãe ara Ovecha-rai pochi vaerã oreve, jare mbaeti etei quã ipuere umiaguanta —jei reta.

7

Ciento cuarenta y cuatro mil vae reta

¹ Jare cua jaicue rupi aecha irundi ángel reta uyemboi ñugüinoi ivi pe. Pentí uyemboi guarasi oẽ vae coti, jare ñru uyemboi guarasi uique vae coti. Ñru uyemboi norte coti, jare ñru uyemboi sur coti. Jare jae reta oyopia irundi ivitu ivi iyipi rupi uyepeyu vae, agüiye vaerã uyepeyu ivi reta iárambo jare i guasu reta iárambo, jare agüiye vaerã uipeyu ivira reta. ²⁻³ Jare aecha ñru ángel ou guarasi oẽ vae coti güi, jare jocua ángel güeru Tumpa imeño mai ico vae imarca. Jayave ángel ñneeãta reve jei jocua irundi ángel reta pe:

—Agüiye perucumegua ivi reta jare i guasu reta jare ivira reta, ndei ñaneTumpa jembiocui reta isiva numimarca mbove.

Echa'ã jocua irundi ángel pe uñemee ma mbaepuere urucumegua vaerã ivi reta jare i guasu reta.

⁴ Jare ayandu mbovi Tumpa jembiocui reta ángel reta umimarca vae. Umimarca reta ciento cuarenta y cuatro mil Israel pegua reta opaete ati reta güi. ⁵ Umimarca reta doce mil Judá ñnemoñaã reta güi. Umimarca reta doce mil Rubén ñnemoñaã reta güi. Umimarca reta doce mil Gad ñnemoñaã reta güi. ⁶ Umimarca reta doce mil Aser ñnemoñaã reta güi. Umimarca reta doce mil Neftalí ñnemoñaã reta güi. Umimarca reta doce mil Manasés ñnemoñaã reta güi. ⁷ Umimarca reta doce mil Simeón ñnemoñaã reta güi. Umimarca reta doce mil Leví ñnemoñaã reta güi. Umimarca reta doce mil Isacar ñnemoñaã reta güi. ⁸ Umimarca reta doce mil Zabulón ñnemoñaã reta güi. Umimarca reta doce mil José ñnemoñaã reta güi. Umimarca reta doce mil Benjamín ñnemoñaã reta güi.

Jeta ete vae jemimonde tĩ vae reta

⁹ Cua jaicue rupi aecha jeta ete vae opaete ivi ambiembie ipite güi yugüeru vae reta. Mbaeti quã ipuere uipapa. Jae reta uyemboi ñugüinoi jocua guapia jare Ovecha-rai jovai. Jae reta jemimonde tĩ jare ipo pe güinoi carandai joqui. ¹⁰ Jare ñneeãta reve jei reta:

—ÑaneTumpa guapia pe uguapi vae upurumbiasa vae co. Ovecha-rai vi upurumbiasa vae co —jei reta.

¹¹ Jare opaete ángel reta uyemboi ñugüinoi jocua guapia jare jocua tenondegua reta jare jocua irundi mbaembae icove vae reta iyipi rupi. Jayave jae reta uyeatica guapia jovai jare umbiadora Tumpa. ¹² Jae reta jei:

—Amén. Nãmee yasurupai tuicha ñaneTumpa pe. Jae co iyaracuaa catu vae. Jae co opaete mbaepuere güinoi vae. Tuyembiadoraca jaëño mai pegua. Amén —jei reta.

¹³ Jayave penti jocua tenondegua vae upirandu cheve:

—¿Quã reta pa co cua jemimonde tĩ vae reta? ¿Queti güi pa yugüeru? —jei.

¹⁴ —Cheya, nde co ndicuaa —jae chupe.

Jayave jei cheve:

—Cua reta yugüeru cua pe uiporara ete rendave pe. Uputuca jemimonde jare umitĩ Ovecha-rai jugüi pe —jei—. ¹⁵ Jáeramo yugüireco ma Tumpa iguapia jovai, jare uyeyocui reta Tumpa pe ara rupi jare pĩtu rupi Tumpa jo pe. Jare guapia pe uguapi vae uyandarecota jese reta —jei—. ¹⁶ Ndarau ye iyembaí reta. Ndarau ye iúe reta. Ndarau ye jasi chupe reta guarasi. ¹⁷ Echa'ã Ovecha-rai jocua guapia mbite pe oĩ vae uyandarecota jese reta jare güiraata reta icua i oẽ vae tecove umee vae reta pe. Jare Tumpa oyoeta jesai chugüi reta —jei.

8

Libro iyemboyaa taicuegua vae

¹ Jare Ovecha-rai uipea ñru libro iyemboyaa. Uyepea ma siete. Jayave mbaeti mbae uyendu ara pe media ora rupi. ² Jare aecha jocua siete ángel Tumpa jovai uyemboi ñugüinoi vae reta. Jare uñemee chupe reta siete trompeta.

³Jare ou ĩru ángel uyemboi mbae ipiche cavi vae imesa iyipi pe, jare güinoi mbae ipiche cavi vae ĵiru oro pegua. Jare uñemee ángel pe jeta mbae ipiche cavi vae, ángel umee vaerã Tumpa pe opaete uñeñono tee Tumpa peguarã vae reta iyerure reta reve jocua mbae ipiche cavi vae imesa oro pegua pe. Echa'ã jocua mesa oĩ Tumpa iguapia jovai. ⁴Jare mbae ipiche cavi vae jatãti jare uñeñono tee Tumpa peguarã vae reta iyerure reta uyupi pãve ángel ipo güi Tumpa jovai.

⁵Jayave ángel uipisi jocua mbae ipiche cavi vae ĵiru jare umitinee tatãpi jendi vae mesa pe oĩ vae pe. Jayave omombo ivi pe. Jare ĵiapu ara, jare uyecuaa ama uvera vae reta, jare ivi ucãta.

Trompeta reta

⁶Jare jocua siete ángel siete trompeta güinoi vae reta uñemicuatĩro umiñee vaerã.

⁷Jayave penti ángel umiñee trompeta, jare oa ivi pe amandau jare tata tugüi reve. Jare mbite seri ivira reta jare opaete ñana ocai.

⁸Jayave ĩru ángel umiñee trompeta. Mocui ma umiñee. Jare penti ivitu guasu echa vae oa i guasu pe. Ocai echa jocua ivitu guasu. Jare mbite seri i guasu uyeyapo tugüirã.

⁹Jare mbite seri jevae i rupigua i guasu pe yugüireco vae reta umano. Jare mbite seri chalana guasu reta icumegua.

¹⁰Jayave ĩru ángel umiñee trompeta. Mbapi ma umiñee. Jare oa ara güi penti yasitata tuicha vae. Jendi oĩ penti lámpara rami, jare oa mbite seri i usiri vae reta pe jare icua icua i oẽ vae pe. ¹¹Jare jocua yasitata co jee Ajenjo. Jare jocua mbite seri i usiri vae reta iro ma. Jare jeta ete vae umano i iro vae jou ramo.

¹²Jayave ĩru ángel umiñee trompeta. Irundi ma umiñee. Jare mbae uyeyapo guarasi pe agüiye vaerã jembipe irundi ora rupi opa ara. Jae ramiño ñi mbae uyeyapo yasi jare yasitata reta pe agüiye vaerã jembipe irundi ora rupi opa pĩtu. ¹³Jayave aecha penti güiraquee uveve ara mbite rupi, jare ayandu iñeãta reve jei:

—Ivi pegua reta uiporara eteta co ĩru mbapi ángel reta trompeta umiñee yave. Echa'ã jae reta ndeiño umiñee —jei.

9

¹Jayave ĩru ángel umiñee trompeta. Pandepo ma umiñee. Jare aecha penti yasitata oa ara güi ivi pe. Jare uñemee chupe ivicua quipe ete vae illave. ²Jayave uipea ivicua quipe ete vae, jare jocua ivicua güi oẽ tatãti. Tatãti tata tuicha ete vae güi oẽ vae echa. Jare guarasi uyecuaa'ã tatãti ivicua güi oẽ vae jeco pegua. Jáeramo pĩtumimbi ma oĩ.

³Jare oẽ jocua tatãti güi tucu reta, jare uguata ivi rupi. Jare uñemee chupe reta mbaepuere oñõpi vaerã ivi pegua reta, chumicarape reta ñaneõpi rami. ⁴Jare Tumpa oyocui tucu reta agüiye vaerã urucumegua ñana jare ivira reta jare opaete temiti reta. Ērei ipuere oñõpi mbaeti güinoi Tumpa imarca isiva re vae reta. ⁵Jare uñemee tucu reta pe uiporaraca vaerã ivi pegua reta pe pandepo yasi pegua. Tucu reta ndarau upuruycua. Jaeño jasi eteta ivi pegua reta pe, penti chumicarape ñaneõpi yave jasi ete yandevae vae rami. ⁶Jare jocua ara reta pe ivi pegua reta uipotã tẽita umano. Ērei ndarau ipuere. Iquirẽi ete tẽita umano. Ērei ndarau etei ipuere.

⁷Jare jocua tucu reta cavayu uñemicuatĩro ma uñerãro vaerã vae reta echa. Jare iñãca re güinoi vae corona oro pegua echa. Jare jova cuimbae jova echa. ⁸Jare ía cuña ía echa. Jare ĵai reta yaguapĩta ĵai reta echa. ⁹Jare ipitía re güinoi vae camisa fierro pegua echa. Jare uveve reta yave, ipepo tanta ĵiapu, jeta ete cavayu reta uruguata icarretón ñerãro pe ĵiapu rami. ¹⁰Jare tucu reta juguai chumicarape juguai echa. Jare juguai pe güinoi ipõpia. Jare güinoi mbaepuere uiporaraca vaerã ivi pegua reta pe pandepo yasi pegua. ¹¹Jare jocua tucu reta juvicha guasu penti ángel jocua ivicua quipe ete vae pe ico vae co. Jare hebreo iñee pe jae jee co Abadón. Jare griego iñee pe jee co Apolión.

¹²Uasa ma penti susere. Ērei mocui mbaesusere ye uyeyapota curi.

¹³Jayave ĩru ángel umiñee trompeta. Seis ma umiñee. Jare ayandu ñee jocua mbae ipiche cavi vae imesa oro pegua ĵati reta ipite güi ou vae. Jocua mesa oĩ Tumpa jovai jare güinoi irundi ĵati. ¹⁴Jare jocua ñee jei jocua ángel trompeta umiñee ramo vae pe:

—Iyora jocua irundi ángel i usiri vae Eufrates pe uñeapĩti vae reta.

¹⁵ Jayave oyora jocua irundi ángel reta. Jae reta uñemicuatiro ma uyuca vaerā mbite seri ivi pegua reta. Uicuaa reta año jare yasi jare ara jare ora uyuca reta vaerā. ¹⁶ Jare uyepapa sundaro cavayu re opo vae reta. Ayandu doscientos millones co ñugüinoi.

¹⁷ Jare aecha jocua cavayu uyecuaa cheve vae reta. Aecha vi opo jese vae reta ipitía rupi güinoi icamisa fierro pegua pita vae jare jovi vae jare iyu vae. Jare cavayu reta iñaca yaguapita iñaca echa. Jare cavayu reta iyuru güi oē tata jare tatāti jare azufre. ¹⁸ Jare tata jare tatāti jare azufre cavayu reta iyuru güi oē vae uyuca mbite seri ivi pegua reta. ¹⁹ Echa'ā jocua cavayu reta güinoi mbaepuere uyuca vaerā ivi pegua reta iyuru pe jare juguai pe. Echa'ā juguai mboi rami co. Güinoi iñaca ipuere vaerā uichuu ivi pegua reta.

²⁰ Jare opaete ivi pegua reta uyeyucaca mbae vae cua mbaepuruyuca reta pe vae ueya'ā etei icavi mbae vae jecuaeño uyapo vae. Jecuae umbiadora reta aña reta jare tumparaanga oro pegua jare corepoti pegua jare bronce pegua jare ita pegua jare ivira tumpa, yepe tēi tumpa-raanga reta ipuere'ā uecha jare uyandu jare uguata. ²¹ Jae reta jecuae upuruyuca jare uyapo paye reta jare uyapo aguasa jare imonda.

10

Ángel jare libro michi vae

¹ Jare aecha iru ángel ipirāta ete vae ugüeyi ou ara güi. Jemimonde co jae penti amapitu jare iñaca re oī penti yii. Jova guarasi echa jare ipi mocui tata jendi vae echa. ² Jare güinoi ipo pe penti libro michi vae uyepa oī vae. Jare ou uyemboi i guasu re jare ivi re. Ipi iyacata oī i guasu re jare ipi iyaso oī ivi re. ³ Jayave tanta usapicai penti yaguapita uñee rami. Jare ángel usapicai ma yave, jiapu ara siete vese.

⁴ Jare siete vese ma jiapu ara yave, añemicuatiro mbae aicutía vaerā. Ērei ayandu ñee ara güi jei cheve:

—Agüiye emimbeu quía pe mbae siete ara jiapu reta jei vae. Agüiye icuatía mbae jei vae —jei.

⁵ Jare jocua ángel aecha uyemboi i guasu re jare ivi re vae uupi ipo ara coti. ⁶ Jare jei Tumpa jee re opata uyeyapo imambae. Tumpa co jae imeño mai ico vae. Jae uyapo ara jare opaete ara re oī vae, jare ivi jare opaete ivi pe oī vae, jare i guasu jare opaete i guasu pe oī vae. ⁷ Ērei iru ángel umiñeeta trompeta. Siete ma co cua re. Jare jocua ara reta pe jocua ángel umbipi umiñee yave, Tumpa opata uyapo jocua tenonde yave uyecuaa'ā vae. Echa'ā Tumpa uicuaaca cua iñee araca umimbeu vae reta pe. Echa'ā jae reta uyeyocui Tumpa pe.

⁸ Jare ayandu ye ñee ara güi jei cheve:

—Ecuá ángel i guasu re jare ivi re uyemboi oī vae pe ipisi jocua libro michi vae uyepa oī vae ángel ipo pe oī vae.

⁹ Jayave aa ángel coti jare jae chupe:

—Emee cheve jocua libro michi vae.

Jayave ángel jei cheve:

—Ipsí opa jeu. Ndeu ma yave, nderie jasita ndeve, ěrei ndeyuru pe jēeta co ei rami —jei.

¹⁰ Jayave aequi jocua libro michi vae ángel ipo güi jare opa jau. Jare cheyuru pe jēe ete co ei rami. Ērei jau ma yave, cherie jasi cheve.

¹¹ Jayave ángel jei cheve:

—Nemimbeu yeta co Tumpa iñee jeta ete vae ivi ambiembie pegua pe jare mburuvicha guasu reta pe.

11

Mocui cuimbae umimbeu Tumpa vae reta

¹ Jare uñemee cheve penti ivira mbaembae amiaanga pipe vaerā. Jare ayandu ñee jei cheve:

—Epüa ecua emiaanga Tumpa jo jare uñemeearenda, jare ipapa Tumpa jo pe umbiadora Tumpa vae reta. ² Ērei agüiye emiaanga Tumpa jo joca. Echa'ā jocua oca uñemee judío mbae vae reta pe. Jare jae reta güinoita mbaepuere tenta guasu uñeño tee Tumpa peguarā vae re cuarenta y dos yasi pegua —jei—. ³ Jare ameeata mbaepuere

jocua mocui cuimbae chemimbeuta vae reta pe, jare jae reta umimbeuta chiñee mil doscientos sesenta ara pegua. Jare mocui reve uyemondeta temimonde jü vae pe —jei.

⁴Jocua mocui ivira oliva jee vae uyemijaanga jocua mocui cuimbae reta re. Jae ramiño vi jocua mocui vela iguapica Tumpa ivi uyapo vae jovai uyemboi vae uyemijaanga jocua mocui cuimbae reta re. ⁵Jare ime yave quía iquirëi tēi uyapo icavi mbae vae jocua mocui cuimbae reta pe vae, oēta tata jocua mocui cuimbae reta iyuru güi jare opata uapi jovaicho reta. Jucuaräita umano iquirëi tēita uyapo icavi mbae vae jocua mocui cuimbae reta pe vae. ⁶Cua mocui reve güinoita mbaepuere ara re agüiye vaerä oqui opaete ara reta Tumpa iñee umimbeu reta rambueve. Jae ramiño vi güinoita mbaepuere i re uyapo vaerä tugüirä. Jae ramiño vi güinoita mbaepuere uiporaraca vaerä ivi pegua reta pe ipotave mbaerasi jae reta uipota rupiño.

⁷Jare opa ma Tumpa regua umimbeu yave, jocua maemimba ivicua quipe ete vae güi oēta vae uñerärota jae reta ndive jare umiamirita jare uyucata. ⁸Jare jocua mocui cuimbae jetecue upitata calle pe jocua tenta guasu yandeYa curusu re uyecutu vae pe. Yandepuere yambijee jocua tenta guasu Sodoma jare Egipto. Echa'ä jocua tenta guasu pegua reta oyovaicho Tumpa ndive. ⁹Jare opaete ivi ambiembie pegua reta umaeta jocua mocui cuimbae jetecue re mbapi ara y medio pegua. Ndarau umaño reta quía re oñoti vaerä. ¹⁰Jare ivi pegua reta uyeroviata jocua mocui cuimbae jetecue re. Uyapota reta fiesta jare omondota uyupe regalo reta. Echa'ä ndei umano mbove, jocua mocui Tumpa iñee umimbeu vae reta uiporaraca ete ivi pegua reta pe.

¹¹Jare mbapi ara y medio uasa ma yave, Espiritu Santo Tumpa güi ou vae umee tecove jocua mocui jetecue pe, jare mocui reve upüa uyemboi. Jare cua uecha vae reta uquiye ete co. ¹²Jare uyendu ñee ara güi. Iñeeäta reve jei:

—Piyupi cua pe.

Jayave jocua mocui reve uyupi ara pe amapütu reve. Jare jovaicho reta uecha yugüiraa.

¹³Jare jocua ora pe etei ivi tanta ucäta jare jeta catu tenta reta usururu jocua tenta guasu pe. Jare jocua ivicäta pe umano siete mil cuimbae reta. Jare tenta guasu pegua umano mbae vae reta uquiye ete jare umbiadora Tumpa ara pe ico vae.

¹⁴Uasa ma mocui susere. Ërei ñru mbaesusere imambae uyeyapota.

Trompeta taicuegua vae

¹⁵Jare ñru ángel umiñee trompeta. Siete ma umiñee. Jare uyendu ñee reta ara pe. Iñeeäta reve jei reta:

—Ivi pegua iporoyocua reta uyeyapo ma yandeYa iporoyocuiarä. Uyeyapo ma Cristo iporoyocuiarä. Jare jae oporoyocuita jaeño mai pegua —jei reta.

¹⁶Jare jocua veinticuatro tenondegua reta Tumpa jovai iguapia reta pe uguapi ñugüinoi vae uyeatica Tumpa jovai umbiadora vaerä. ¹⁷Jare jei reta:

—OreYa Tumpa. Nde co jae opaete mbaepuere güinoi vae. Nde co jae iyipi güiive jare añave jecuaño ico vae. Nde co jae jecuae oita vae. Numee yasurupai ndeve. Echa'ä ndicuaaca ma quiräi nembraepuere tuicha ete co, jare añave ndeporoyocui neñ —jei reta —. ¹⁸Jare ivi pegua reta pochi ndeve. Ërei nde vi ndepochi chupe reta. Jare ou ma uväe ara umanocue vae reta uñeäca vaerä, jare nde neme vaerä imbaerä niñee umimbeu vae reta pe - echa'ä jae reta uyeyocui ndeve - jare uñeño tee ndeve peguarä vae reta pe. Jae reta co sambiai reta jare ucuacuaa vae reta uipiü reve nembadora vae. Ou ma uväe ara nde nembai vaerä ivi urucumegua vae reta —jei reta.

¹⁹Jare Tumpa jo uyepa oñ ara pe jare uyecuaa Tumpa jo pe ita reta Tumpa uicuatfa mboroyocui reta jese vae jiru. Jare uvera jare jiapu ara. Jare ivi ucäta. Jare oa jeta amandau.

12

Cuña jare maemimba guasu püta vae

¹Jare uyecuaa ara re chepiacañi ete jese vae. Jae co penti cuña. Jemimonde guarasi co, jare uyemboi oñ yasi írambo, jare icorona doce yasitata reta co. ²Ipurüa jare imembi oata ma oñ. Jäse imembirasi ramo.

³Jare uyecuaa ye ara re ñru chepiacañi ete jese vae. Jae co penti maemimba guasu püta vae. Siete co inäca reta jare diez jäti reta. Jare penti penti inäca re güinoi corona.

⁴ Jare juguai uipisi mbite seri yasitata reta omombo ivi coti. Jare jocua maemimba guasu uyemboi cuña imembita vae jovai, opa vaerã tēi jou imembi, oa ma yave. ⁵ Jare cuña imembi cuimbae co. Jocua imembi cuimbae oyocuita opaete ivi pegua reta ipopoca fierro pegua pe. Jare cuña imembi yeyereraaca Tumpa pe Tumpa iguapia oī vae pe. ⁶ Jare jocua cuña osi ñana coti. Echa'ã joco pe Tumpa umicutatiro chupe jendarã. Jare amocue vae umingarū jocua cuña mil doscientos sesenta ara.

⁷ Jare uyeyapo penti ñerãro ara pe. Miguel jare ángel chupe uyeyocui vae reta uñerãro jocua maemimba guasu ndive. Jare maemimba guasu jare ángel chupe uyeyocui vae reta uñerãro jae reta ndive. ⁸⁻⁹ Ērei jae reta ipuere'ã umiamiri Miguel jare ángel chupe uyeyocui vae reta. Jare maemimba guasu uyemomboca ara güi. Mbaeti ye ma jendarã ara pe. Jocua maemimba guasu jocua mboi aracae Eva umingueta vae co. Jae co aña guasu. Jae co Satanás. Jae umbitavi opaete ivi pegua reta. Ērei jae uyemomboca ma ara güi ivi pe, jare ángel chupe uyeyocui vae reta vi uyemomboca ara güi jae ndive.

¹⁰ Jare ayandu ñee ara pe. Iñeeãta reve jei:

—Ou ma uvãe Tumpa upurumbiasa vaerã. Echa'ã jae güinoi opaete mbaepuere. Ou ma uvãe Tumpa oporoyocui vaerã Cristo imbaepuere rupi. Echa'ã Satanás umbijecose yanderivi reta Tumpa jovai ara rupi jare pñtu rupi. Ērei añave uyemomboca ara güi — jei—. ¹¹ Jare yanderivi reta umiamiri Satanás Ovecha-rai jugüü rupi jare Tumpa iñee ĩru vae reta pe umimbeu vae rupi. Uicuaa reta umanota co, ěrei uquiye'ã umano vaerã — jei—. ¹² Jáeramo piyerovia pe reta ara pe pico vae. Ērei ivi pe pico vae reta jare i guasu pe pico vae reta piporara eteta co. Echa'ã aña guasu ugüeyi ma pepite pe. Jare jae pochi ete. Echa'ã jae uicuaa michi peguaño ma ipuere uparaviqui —jei.

¹³ Jare jocua maemimba guasu uicuaa yave uyemomboca ma co ivi pe, uaicuemoña jocua cuña imembi cuimbae vae. ¹⁴ Ērei uñemee cuña pe mocui güiraquee tuicha vae ipipo, ipuere vaerã uveve ñana pe uñemi vaerã jocua mboi güi. Jare joco pe amocue vae umingarū mbapi año y medio.

¹⁵ Jare jocua mboi omombo jeta i iyuru güi. Uipota tēi jocua iporu uepiti vaerã cuña jare güiraa vaerã uyuca. ¹⁶ Ērei ivi etei ombori cuña. Echa'ã ivi uyepea, yande yaipea yandeyuru vae rami, jare iporu jocua maemimba guasu iyuru güi oē vae opa ucañi ivi uyepea vae pe. ¹⁷⁻¹⁸ Jayave maemimba guasu pochi cuña pe, jare oo uñerãro cuña imembi ndeñio umano vae reta ndive. Echa'ã jae reta uyapo Tumpa iporoyocui reta jare umimbeu Jesús regua.

13

Mocui maemimba guasu reta

¹ Jare jocua maemimba guasu uyemboi oī i guasu jembei pe. Jare aecha ĩru maemimba guasu oē i guasu güi. Siete co iñãca reta jare diez jãti reta. Jare güinoi corona penti penti jãti re. Jare iñãca reta re güinoi tee reta. Jare jocua tee reta uicuaaca quirãi jocua maemimba guasu jecuaeño jei icavi mbae vae Tumpa coti. ² Jare maemimba guasu joco pe aecha vae penti yagua echa. Jare ipi oso ipi echa, jare iyuru yaguapita iyuru echa. Jare maemimba guasu tenonde aecha vae umee cua ĩru maemimba guasu pe imbaepuere. Jare umaeño jese uguapi vaerã iguapia pe jare güinoi vaerã mbaepuere tuicha vae.

³ Jare aecha penti jocua maemimba guasu i guasu güi oē vae iñãca ipere umano vaerã tēi. Ērei ucuera ma jocua ipere mano pegua güi. Jare opaete ivi pegua reta ipiacañi jocua maemimba guasu re. ⁴ Jare opaete ivi pegua reta umbiadora maemimba guasu tenonde aecha vae. Echa'ã jae umee mbaepuere tuicha vae ĩru maemimba guasu pe. Jae ramiño vi opaete ivi pegua reta umbiadora jocua ĩru maemimba guasu. Jae reta jei:

—Mbaeti co quã ye cua maemimba guasu rami. Mbaeti etei quã ipuere uñerãro jae ndive.

⁵ Jare Tumpa umaeño jocua ĩru maemimba guasu re uyembutuicha vaerã jare jei vaerã icavi mbae vae Tumpa coti. Jare uñemee chupe mbaepuere jucuarãi uyapo vaerã cuarenta y dos yasi. ⁶ Jare jecuaeño jei jeta icavi mbae vae Tumpa coti jare Tumpa jee coti jare Tumpa jenta coti jare ara pe yugüireco vae reta coti. ⁷ Jare Tumpa umaeño jese uñerãro vaerã uñeñoño tee Tumpa peguarã vae reta ndive jare umiamiri vaerã. Jare uñemee chupe mbaepuere opaete ivi ambiembie pegua reta vae re. ⁸ Jare umbiadora

opaete ivi pegua reta jee uyecuatia'ā oī Ovecha-rai libro tecove opa mbae vae pegua pe vae. Ovecha-rai uyeyucaca co ndei ivi uyeyapo mbove.

⁹ Uipota uyandu vae tuyapisaca cua re. ¹⁰ Upurumiamiri vae reta uyucata amocue vae quisepecu pe, jae reta etei quisepecu pe upuruyuca ramo. Jare upurumiamiri vae reta güiraata ĩru vae reta ĩvi güi jembiocui retarā. Jáeramo icavi co uñeñoño tee Tumpa peguarā vae reta ĩpiaguasu vaerā jare jecuaeño mburugüirovia güiñoi vaerā.

¹¹ Jare aecha ĩru maemimba guasu oē ĩvigüi güi. Jare mocui co jāti penti ovecha rami. Ĕrei uyemingueta jocua maemimba guasu tenonde aecha vae rami. ¹² Jare imbaepuere oyovaque jocua ĩru maemimba guasu ĩ guasu güi oē vae imbaepuere ndive, jare oyocui opaete ivi pegua reta umbiadora vaerā jocua ĩru maemimba guasu ĩpere mano pegua güi ucuera vae. ¹³ Jare maemimba guasu taicue aecha vae uyapo jeta miacañi reta. Echa'ā jae mbae uyapo tata ou vaerā ara güi ĩvi pegua reta jovaque. ¹⁴ Jare imbaepuere pe uyapo miacañi reta jocua ĩru maemimba guasu jovaque. Jare jucuarāi umbitavi ĩvi pegua reta. Jare jei ĩvi pegua reta pe uyapo vaerā jocua ĩru maemimba guasu jaanga. Echa'ā umimandúa reta quirāi ĩpere ete penti quisepecu pe, ĩrei icove ye. ¹⁵ Jare jocua maemimba guasu taicue aecha vae güiñoi mbaepuere umee vaerā tecove jocua ĩru maemimba guasu jaanga pe, jocua jaanga uyemingueta vaerā. Jare uyucaca opaete ñatēi umbiadora maemimba guasu jaanga vae reta.

¹⁶ Jare oyocui opaete vae - sambiai reta jare ucuacuaa vae reta, icocatu vae reta jare ĩparavete vae reta, uyeyocui mbae vae reta jare uyeyocui vae reta - güiñoi vaerā penti marca ipo iyacata re ani isiva re. ¹⁷ Jare ime yave quía jocua ĩru maemimba guasu imarca ani jee ani jee ínúmero mbaeti güiñoi vae, ĩpuere'ā mbae ogua jare ĩpuere'ā mbae umee. ¹⁸ Icavi co penoi vaerā aracuaa. Uicuaa cavi vae tuipapa maemimba guasu ínúmero. Echa'ā penti cuimbae ínúmero. Inúmero co seiscientos sesenta y seis.

14

Ciento cuarenta y cuatro mil vae reta icanta

¹ Jare aecha jocua Ovecha-rai uyemboi oī ĩvitu guasu Sión re, jare joco pe ñugüiñoi jae ndive jocua ciento cuarenta y cuatro mil vae reta. Jae reta isiva re uyecuatia oī Ovecha-rai jee jare Ovecha-rai Tu jee. ² Jare ayandu ñee ara güi. Tanta ĩjapu ĩ guasu ĩjapu rami jare ara ĩjapu rami. Jare ayandu vi arpa ombopu vae reta ĩarpa ombopu ñugüiñoi.

³ Jare ucanta reta penti canta ĩpiau vae Tumpa iguapia jare jocua ĩrundi mbaembae icove vae reta jare tenondegua reta jovai. Jare mbaeti quía ĩpuere uicuaa jocua canta, jañoño jocua ciento cuarenta y cuatro mil vae reta. Echa'ā Cristo uepi jocua reta ĩvi pegua reta ĩpite güi. ⁴ Jae reta uyeminguia'ā cuña reta re. Echa'ā güireco'ā etei cuña. Jae reta yugüiiraa Ovecha-rai jaicue jae que rupi oo vae rupi. Jae reta uyerepica co ĩvi pegua reta ĩpite güi. Jae reta rani uyeyucaca, Tumpa jare Ovecha-rai pe uyeyocui ramo. ⁵ Jare jae reta upurumbitavi'ā etei. Mbaeti quía ĩpuere umbijeco reta mbae re.

Ángel reta ñee reta

⁶ Jare aecha ĩru ángel uveve ara mbite rupi. Tumpa umee ángel pe umimbeu vaerā ñee icavi vae opa mbae vae ĩvi pegua reta pe. Umimbeu opaete ĩvi ambiembie pegua reta pe. ⁷ ĩñeeāta reve jei chupe reta:

—Pequiye Tumpa güi jare pmbiadora. Echa'ā ora ou ma uvāe upuruāa vaerā. Pmbiadora. Echa'ā jae uyapo ara jare ĩvi jare ĩ guasu jare icua ĩ oē vae reta —jei.

⁸ Jare jocua ángel jaicue uveve ĩru ángel jare jei:

—Jocua tenta guasu Babilonia jee vae opa ma uyemba. Jocua Babilonia pegua reta umbiadora tumpa-raanga reta, jare uicuaaca opaete ĩru ĩvi pegua reta pe jucuarāi uyapo vaerā. Jáeramo Tumpa pochi chupe reta —jei.

⁹ Jare ĩru ángel uveve jaicue, jare ñeeāta reve jei:

—Ime yave quía jocua maemimba guasu ĩ guasu güi oē vae jare jaanga umbiadora jare imarca isiva re ani ipo re güiñoi vae, ¹⁰ jae uiporara eteta. Echa'ā Tumpa pochi eteta chupe jare uiporaraca eteta chupe. Jocua nunga uiporarata tata jare azufre ángel uñeñoño tee Tumpa peguarā vae reta jare Ovecha-rai jovai —jei—. ¹¹ Jare tatāti uyupita jañoño mai pegua jocua reta uiporarata ñugüiñoi vae güi. Jare jae reta ndarau ĩpuere

uputu ara rupi jare pītu rupi. Echa'a umbiadora reta jocua maemimba guasu jare jaanga jare güinoi maemimba guasu jee imarca —jei.

¹²Icavi co ipiaguasu vaerã uñeñono tee Tumpa peguarã vae reta. Jae reta uyapo Tumpa iporoyocui reta jare güirovia Jesús re.

¹³Jare ayandu penti ñee ara güi jei cheve: —Icuatía cuarã: Uyeroviata co cua güive yandeYa re güirovia reve umanota vae reta.

—Uyeroviata co —jei Espiritu Santo—. Echa'a uputuuta reta iparaviqui güi. Jare Tumpa uicuaacata jae reta uyapocue vae —jei.

Ou ma uvãe nembraeviro vaerã

¹⁴Jare aecha amapītu tī vae jare jocua amapītu re uguapi oī cuimbaerã uveyapo vae echa vae. Jare iñãca re güinoi corona oro pegua, jare uipisi penti hoz jaimbe vae. ¹⁵Jare penti ángel oē Tumpa jo güi jare iñeeãta reve jei amapītu re uguapi oī vae pe:

—Iporu jocua hoz neno vae nembraeviro vaerã. Echa'a ou ma uvãe nembraeviro vaerã. Echa'a yagüiye ma ivi pe oī vae. Icavi co nembraeviro vaerã —jei.

¹⁶Jare amapītu re uguapi oī vae uiporu hoz güinoi vae ivi re jare uaviro ivi pe oī vae. ¹⁷Jare ĩru ángel oē Tumpa jo ara pe oī vae güi. Jae vi güinoi hoz jaimbe vae. ¹⁸Jare ĩru ángel oē uñemearendã güi. Jae güinoi mbaepuere tata re. Jare iñeeãta reve jei ángel hoz jaimbe vae güinoi vae pe:

—Iporu hoz jaimbe vae neno vae jare eaviro ivi pegua uva reta. Echa'a yagüiye ma uva reta —jei.

¹⁹Jayave jocua ĩru ángel uiporu ivi re hoz güinoi vae jare uaviro ivi pegua uva reta. Jayave omombo reta uva uñetami pipe vae pe. Jocua uyemijaanga Tumpa iarasi re. ²⁰Jare jocua uva uñetami pipe vae oī tenta guasu güi ñana coti. Joco pe uitami uva. Jare tugüi oē jocua uva uñetami pipe vae güi, jare uvãe cavayu reta iyayu rupi jare usiri sesenta legua rupi.

15

Ángel reta jare siete mbaesusere taicuegua vae reta

¹Jare uyecuaa ye ara re chepiacañi ete jese vae. Aecha joco pe siete ángel siete mbaesusere taicuegua vae güinoi vae reta. Echa'a jocua reta re opata co Tumpa iarasi.

²Jare aecha i guasu vidrio pegua vae tata ndive uyea vae echa vae. Jare jocua maemimba guasu i guasu güi oē vae jare jaanga jare imarca jare jee inúmero umiamiri vae reta uyemboi ñügüinoi jocua i guasu vidrio pegua vae re, jare güinoi arpa reta Tumpa umee chupe reta vae. ³Jare ucanta reta Moisés Tumpa pe uyeyocui vae icanta jare Ovecha-rai icanta. Jei reta:

—Nde ndiyapo vae oremipiacañi ete, oreYa Tumpa. Nde neno opaete mbaepuere. Nde ndiyapo vae jupi co jare añete vae pegua co. Nde co jae opaete ivi pegua reta Juvicha Guasu —jei reta—. ⁴Opaete vae uquiyeta ndegüi, oreYa. Opaete vae umbiadorata nderee. Echa'a ndeño co jae iyoa mbae vae. Opaete ivi pegua reta yugüeruta nembraadora vaerã. Echa'a uyecuaa ma quirãi nde nepuruãa jupi vae rupi —jei reta.

⁵Cua jaicue rupi aecha uyepea oī ara pe ita Tumpa uicuatía mboroyocui reta jese vae reta jiru oī vae. ⁶Jare jocua siete ángel reta oē Tumpa jo güi. Güinoi reta jocua siete mbaesusere. Jemimonde nieso tī vae iquía mbae vae co, jare ipitía rupi güinoi icuacuaa oro pegua. ⁷Jare jocua irundi mbaembae icove vae reta güi penti umee jocua siete ángel reta pe siete copa oro pegua. Jocua copa reta tinee ñügüinoi Tumpa iarasi pe. Tumpa co jae imeño mai ico vae. ⁸Jare Tumpa iyaruandaa jare imbaepuere jeco pegua Tumpa jo tinee tatãti pe. Jare mbaeti quía ipuere uique Tumpa jo pe ndei jocua siete mbaesusere jocua siete ángel reta güinoi vae uveyapo mbove.

16

Siete copa Tumpa iarasi güinoi vae reta

¹Jare ayandu penti ñee Tumpa jo güi. Iñeeãta reve jei jocua siete ángel reta pe:

—Pecua pepiyere ivi re jocua siete copa Tumpa iarasi güinoi vae reta.

²Jayave penti ángel oo upiyere copa güinoi vae ivi re. Jare opa ituyutuyu ivi pegua reta jocua maemimba guasu imarca güinoi vae. Echa'á jae reta umbiadora jocua maemimba guasu jaanga.

³Jare írú ángel upiyere copa güinoi vae i guasu re. Mocui ma upiyere. Jare i guasu uyeyapo umanocue vae jugüi rami. Jare opaete mbaembae i guasu pe yugüireco vae reta umano.

⁴Jare írú ángel upiyere copa güinoi vae i usiri vae reta jare icua i oë vae reta re. Mbapi ma upiyere. Jare i usiri vae reta jare icua i oë vae reta uyeyapo tugüirā. ⁵Jare ayandu ángel i re mbaepuere güinoi vae jei:

—Jecuaño iyipi güive jare añave nde co jae jupi vae, oreYa. Nde co jae iyoa mbae vae. Jáeramo ndiporaraca chupe reta —jei—. ⁶Echa'á jae reta uyuca uñeño tee ndeve peguarā vae reta jare niñee umimbeu vae reta. Jáeramo nemeé ma chupe reta tugüi i ipepica pe. Icavi co ndiyapo vaerā jucuarāi —jei.

⁷Jare ayandu írú ñee uñemeearenda güi jei:

—Icavi co, oreYa Tumpa. Nde nenoí opaete mbaepuere. Jecuaño nepuruāa añete vae jare jupi vae rupi —jei.

⁸Jare írú ángel upiyere copa güinoi vae guarasi re. Irundi ma upiyere. Jare uñemee mbaepuere guarasi pe ipuere vaerā uapi ivi pegua reta tata pe. ⁹Jayave guarasi jasi ete jare uapi ivi pegua reta. Jáeramo ivi pegua reta jei icavi mbae vae Tumpa jee coti. Echa'á jae güinoi mbaepuere opaete cua susere reta re. Ërei ivi pegua reta ueya'á iyemingueta icavi mbae vae ipia pe oí vae. Umbiadora'á etei Tumpa.

¹⁰Jare írú ángel upiyere copa güinoi vae jocua maemimba guasu iguapia re. Pandepo ma upiyere. Jayave pitumimbi ou opaete maemimba guasu iporoyocui rupi. Jare opaete maemimba guasu pe uyeyocui vae reta uiporara ete. Uñecüsü reta uiporara ete ramo. ¹¹Jare jei reta icavi mbae vae Tumpa ara pe ico vae coti, uiporara ete jasi jare opa ituyutuyu ramo. Ërei jeseve ueya'á reta icavi mbae vae uyapo vae.

¹²Jare írú ángel upiyere copa güinoi vae i usiri vae Eufrates jee vae re. Tuicha co jocua Eufrates. Seis ma upiyere. Jare tipa voi Eufrates. Jucuarāi Tumpa umicuatíro mburuvicha guasu reta guarasi oë vae coti güi yugüeruta vae japerā. ¹³Jare aecha jocua maemimba guasu tenonde aecha vae, jare jocua írú maemimba guasu i guasu güi oë vae, jare jocua írú maemimba guasu ivigüi güi oë vae — jae jei umimbeu co Tumpa ñee, Ërei upurumbitavi. Jare aecha penti añia iquia ete vae oë iyuruyuru güi. Mbapi píte echa jocua añia reta. ¹⁴Jae reta co añia miacañi ipuere uyapo vae reta. Jae reta yugüiraa opaete ivi rupi mburuvicha guasu reta jenta jenta rupi. Jae reta umbati opaete mburuvicha guasu reta uñerāro vaerā Tumpa opaete mbaepuere güinoi vae ndive. Uñerārota reta co Tumpa ndive jocua ara pe.

¹⁵—Mase —jei yandeYa—, che aa yeta imbae, penti imonda vae ou mbaembae oñomi rami. Piyeroviata co jecuaño piñemicuatíro yave. Jecuaño piyapicatu peremimonde, agüye vaerā pemara írú vae reta perecha penani peí yave —jei.

¹⁶Jare Tumpa umbatica reta hebreo ñee pe Armagedón jee vae pe.

¹⁷Jare írú ángel upiyere copa güinoi vae ivitu re. Siete ma upiyere. Jare uyendu penti ñee Tumpa jo ara pe oí vae güi Tumpa iguapia güi. Ñeeáta reve jei:

—Opa ma uyeyapo.

¹⁸Jare tanta jiapu ara. Jare vera. Jare ivi tanta ucāta. Ivi pegua reta yugüireco güive jucuarāi'á ucāta ivi. Echa'á jocua ivicāta tanta ete co. ¹⁹Jare jocua tenta guasu uyembiyao mbapi pe jare opaete ivi rupi jeta tenta guasu uyembai. Jare Tumpa imandúa jocua tenta guasu Babilonia jee vae re uiporaraca ete vaerā chupe. Echa'á Tumpa pochi ete chupe. ²⁰Jare opaete ivi i mbite pe ñügüinoi vae reta opa osi, jare mbaeti ma uñevāe ivitu guasu reta. ²¹Jare oa ara güi amandau tuicha tuicha vae ivi pegua reta re. Jare amandau penti penti poi irundi arropa rupi. Jare ivi pegua reta jei icavi mbae vae Tumpa coti amandau jeco pegua. Echa'á amandau uiporaraca ete ivi pegua reta pe.

—Eyu cua pe. Taicuaaca ndeve quirāi uñeācata co jocua cuña iaguasa vae i guasu reta re uguapi vae —jei—. ²Ivi pegua mburuvicha guasu reta uyapo aguasa jocua cuña ndive. Ivi pegua reta uipota ete uyapo aguasa jae ndive, usavipo vae uyúe ete vino rami —jei.

³Jayave ángel chereraa Espíritu Santo imbaepuere pe ñana coti. Jare joco pe aecha penti cuña opo oí penti maemimba guasu píta vae re. Jare jocua maemimba guasu re uyecuatía oí jeta jee jare jocua cuatía reta rupi jei icavi mbae vae Tumpa coti. Jare siete co jocua maemimba guasu iñāca jare diez jāti. ⁴Jare cuña jemimonde píta, jare güinoi oro jare ita ipōra ete vae reta jete re. Uipisi penti copa oro pegua. Ērei jocua copa tinee oí mbaembae pichíi vae pe. Echa'ā jocua cuña iaguasa vae co. ⁵Jare isiva re uyecuatía oí jee cuarāi: “Babilonia mbaepuere tuicha vae güinoi vae. Jae co iaguasa vae reta ichi. Jae co ivi pegua pichíi vae uyapo vae reta ichi.” Jucuarāi uyecuatía oí. Jaeramo uyecuaa jocua cuña jee.

⁶Jare cuña usavipo echa cheve. Echa'ā jou ma uñeñono tee Tumpa peguarā vae reta jugüi. Jae reta uyeyucaca umimbeu Jesús re ramo. Jare aecha yave jocua cuña, chepiacañi ete jese.

⁷Jare ángel jei cheve:

—¿Maera pa nepiacañi? Tamimbeu ndeve ndeño uyecuaa vae cuña regua. Jae ramiño vi tamimbeu ndeve ndeño uyecuaa vae jocua maemimba guasu cuña opo jese vae regua. Siete co jocua maemimba guasu iñāca jare diez jāti —jei—. ⁸Maemimba guasu ndeecha vae icose, Ērei ico'ā ma. Ērei oēta ivicua quipe ete vae güi. Ērei oo yeta cañitei pe. Jare ivi pe yugüireco vae reta uecha yave jocua maemimba guasu icose vae, ipiacañita reta. Echa'ā jae reta jee uyecuatía'ā oí libro tecove opa mbae vae pegua pe ivi uyeyapo güive. Jocu maemimba guasu mbaeti ma ico. Ērei ico yeta co —jei—.

⁹Jare iyaracuaa vae uicuaata cua: Jocu siete iñāca uyemijaanga siete ivitu guasu cuña uguapi jese vae re —jei cheve—. ¹⁰Jae ramiño vi uyemijaanga siete mburuvicha guasu reta re. Pandepo mburuvicha guasu reta uasa ma. Penti imeño ico, jare penti ndeño ico. Jare jae ou yave, michi peguaño güinoita mbaepuere —jei—. ¹¹Jare jocua maemimba guasu icose Ērei mbaeti ma ico vae icota iru mburuvicha guasurā. Ocho co jocua re. Ērei jae oyovaque jocua siete vae güi penti ndive. Jare jae vi oota cañitei pe —jei—. ¹²Jare jocua diez jāti ndeecha vae uyemijaanga diez mburuvicha guasu reta re. Cua diez reve ndeño güinoi iporoyocua. Ērei güinoita reta mbaepuere yugüireco vaerā mburuvicha guasu retarā penti ora pegua jocua maemimba guasu i guasu güi oē vae mbaepuere güinoi yave —jei cheve—. ¹³Opaete cua diez mburuvicha guasu reta penti ramiño co, jare omborita reta jocua maemimba guasu opaete imbaepuere pe. ¹⁴Cua reta uñerārota Ovecha-rai ndive, jare Ovecha-rai umiamirita. Echa'ā Ovecha-rai co jae opaete vae iya reta iYa. Jae co opaete mburuvicha guasu reta Juvicha Guasu. Jare Ovecha-rai ndive ñugüinoi vae reta Tumpa uiparavo vae reta co. Echa'ā Tumpa uiparavo jocua reta uyeyocui cavi vaerā Ovecha-rai pe —jei cheve ángel.

¹⁵Jayave jei cheve:

—Ndeecha ma jocua cuña iaguasa vae uguapi oí i guasu reta re. Jocu i guasu reta uyemijaanga opaete ivi ambiembie pegua reta re. ¹⁶Ndeecha ma vi jocua maemimba guasu jāti diez co. Jocu diez jāti reta uyemijaanga diez mburuvicha guasu reta re. Jare reta umitarēita jocua cuña iaguasa vae. Ueyata reta jaeño upita vaerā. Jae nanita co. Jayave jocua diez mburuvicha guasu reta jouta cuña isoo jare opata uapi tata pe —jei—. ¹⁷Echa'ā Tumpa umiquirēi jocua diez mburuvicha guasu reta umee vaerā iporoyocua penti ramiño jocua maemimba guasu pe. Jare maemimba guasu güinoita iporoyocua reta Tumpa iñee reta uyeyapo regua. ¹⁸Jare jocua cuña ndeecha vae uyemijaanga jocua tenta guasu opaete ivi pegua mburuvicha guasu reta re mbaepuere güinoi vae re —jei.

18

Babilonia uyembai ma

¹Jare cua jaicue rupi aecha iru ángel ugüeyi ou ara güi. Ángel imbaepuere tuicha ete co. Tembipe oí ivi rupi ángel umiembipe ramo. ²Jare ángel iñeeāta reve jei:

—Tenta guasu Babilonia jee vae uyembai ma. Añave yugüireco joco pe añā reta. Penti peresoriru rami co. Echa'ā opaete añā mbaembae pichíi vae uyapo vae reta jare opaete güira mbaembae pichíi vae uyapo vae reta yugüireco joco pe, pereso reta peresoriru pe

yugüireco rami —jei—. ³ Opaete ivi pegua reta uipota ete uyapo aguasa Babilonia pegua reta ndive, usavipo vae uyúe ete vino rami. Jáeramo Tumpa pochi chupe reta. Jare ivi pegua mburuvicha guasu reta uyapo aguasa Babilonia pegua reta ndive. Jare opaete ivi rupi umaemee vae reta icocatu ma Babilonia pegua reta jeta mbaembae jepi ete vae ogua ramo —jei.

⁴ Jare ayandu írú ñee ara güi jei:

—Peë joco güi, chembae reta, agüiye vaerã piyapo mbaeyoa reta jae reta uyapo rami, jare agüiye vaerã piporara mbaesusera reta chupe reta uyeyapota vae —jei—. ⁵ Jae reta uyapo jeta ete mbaeyoa reta. Tumpa uiporaracata chupe reta imbaeyoa reta jeco pegua —jei—. ⁶ Tuiporara reta, jae reta uiporaraca peve rami. Tuiporara ete reta opaete icavi mbae vae uyapo vae jeco pegua. Jeta ete icavi mbae vae uyapo reta írú vae reta pe. Jáeramo tuiporara ete reta. ⁷ Jae reta uyembicate ete jare ogua jeta mbaembae jepi ete vae. Jáeramo tuiporara ete reta jare tipiatiti ete reta. Echa'ã jae reta jei iyupe ipia pe: 'Yaico mburuvicha guasu reta yugüireco rami. Yaico'ã co cuña ime umano vae reta yugüireco rami. Ndarau etei yandepiatiti' —jei reta, jei—. ⁸ Jáeramo penti ara peño uyeyapota chupe reta jeta mbaesusera. Outa chupe reta caruai. Jae reta ipiatitita jare umanota. Jare jenta guasu opata ocai. Echa'ã yandeYa Tumpa uãata reta jare opaete mbaepuere güinoi —jei—.

⁹ Jare ivi pegua mburuvicha guasu reta ipiatitita jese jare uyaota, jatãti uecha yave. Echa'ã jae reta uyapo aguasa joco pe, jare joco pe yugüireco yave, uyerovia ete opaete mbaembae jepi ete vae re. ¹⁰ Èrei jae reta uyemboita mbiri tenta guasu güi, agüiye vaerã uiporara jocua guasu tenta pegua reta uiporarata rami. Jare jeita reta: 'Paravete. Babilonia penti tenta guasu tuicha ete vae co tẽi. Penti ora peño Tumpa uiporaraca chupe' —jeita reta, jei—. ¹¹ Jare opaete ivi rupi umaemee vae reta ipiatitita jese jare uyaota. Echa'ã ndarau ma quía ogua imbaembae —jei—. ¹² Ndarau ma quía ogua mbaembae oro pegua jare corepoti pegua jare ita ipõra ete vae reta pegua, jare temimonde reta nieso ipõra ete vae jare seda, jare temimonde pãta vae reta, jare mbaembae ivira icavi ete vae pegua. Ndarau ma quía ogua mbaembae maemimba tuicha vae elefante jee vae jãi pucu pegua jare ivira jepi ete vae pegua jare cobre pegua jare fierro pegua jare ita tanta ete vae pegua —jei—. ¹³ Ndarau ma quía ogua mbaembae ipiche cavi vae reta, jare vino, jare aceite, jare harina ipu ete vae, jare trigo. Ndarau ma quía ogua mburica reta, jare ovecha reta, jare cavayu reta, jare carro reta, jare cuimbae reta, jare cuña reta —jei—.

¹⁴ Babilonia pegua reta jecuaeño uipota mbaembae jepi ete vae jare ipõra ete vae. Ndarau etei ma güinoi jocua mbaembae icavi vae —jei—. ¹⁵ Ogua reta jeta ete jocua mbaembae icavi vae. Jáeramo jocua mbaembae umee vae reta icocatu. Èrei umaemee vae reta uyemboita mbiri Babilonia güi agüiye vaerã uiporara jocua tenta guasu pegua reta uiporarata rami. Ipiatitita jese jare uyaota —jei—. ¹⁶ Jare jeita: 'Paravete. Penti tenta guasu tuicha ete vae co tẽi. Jare tenta guasu pegua reta jemimonde reta nieso ipõra vae co. Omonde reta temimonde pãta vae reta jare oñono reta iyee mbaembae oro pegua jare ita ipõra vae reta pegua' —jeita reta, jei—. ¹⁷ 'Icocatu ete reta. Èrei penti ora peño umicãni reta opaete imbaembae icavi vae' —jeita reta, jei—. Jare opaete chalana guasu iya reta jare chalana guasu pe uparaviqui vae reta - opaete i guasu rupi uguata umaemee vaerã vae reta - uyemboita mbiri Babilonia güi —jei—. ¹⁸ Jare usapicaita reta tenta guasu jatãti uecha yave. Jare jeita reta: 'Jocua tenta guasu tuicha ete co tẽi opaete írú tenta guasu reta güi' —jeita reta, jei—. ¹⁹ Jare oñonota reta ivicuii iñãca re usapicai reve. Jae reta ipiatitita uyao reve jare jeita: 'Paravete. Penti tenta guasu tuicha ete vae co tẽi. Jocua tenta guasu pegua reta ogua jeta mbaembae jepi ete vae. Jáeramo opaete chalana guasu iya reta umaemee vae icocatu ma. Èrei penti ora peño opa ma imbaembae' —jeita reta, jei—.

²⁰ Piyerovia jese, ara pe pico vae. Pe reta co jae temimondo reta jare Tumpa iñee umimbeu vae reta jare írú uñeño tee Tumpa peguarã vae reta. Echa'ã Tumpa uiporaraca chupe reta, jae reta uiporaraca peve ramo —jei.

²¹ Jare penti ángel ipirãta ete vae uipisi penti ita. Tuicha co jocua ita umbaesio pipe vae rami co. Jayave ángel omombo ita i guasu pe jare jei:

—Jucuarāita uyembai imambae ete jocua tenta guasu Babilonia jee vae. Ndarau ye ma quía uecha —jei—. ²²Jare uyemimbi vae reta ndarau ye ma uyemimbi joco pe. Jae ramiño vi uparaviqui vae reta ndarau ye ma uparaviqui joco pe. Jae ramiño vi umbaesos vae reta ndarau ye ma umbaesos joco pe. ²³Jae ramiño vi ndarau ye ma jendi joco pe mechero. Jae ramiño vi ndarau ye ma quía umenda joco pe. Echa'ā umaeme vae joco pe yugüireco vae reta uyembutuichacase ĩru vae reta pe. Ĕrei Babilonia pegua reta umbitavi opaete ivi pegua reta paye reta uyapo vae pe —jei.

²⁴Jare Babilonia pe uñevāe Tumpa iñee umimbeu vae reta jugüi jare ĩru uñeño tee Tumpa peguarā vae reta jugüi. Opaete ivi pe uyeyucaca vae reta jugüi uñevāe joco pe.

19

Ara pegua reta umbiadora yandeYa Tumpa

¹ Cua jaicue rupi ayandu jeta vae ara pe ñugüinoi vae reta iñeeāta reve jei:

—YandeYa tuyembidoraca. Echa'ā jae yanembiasa. YandeYa Tumpa opaete mbaepuere güinoi. Tuyembidoraca opaete vae pe —jei reta—. ²Jae upuruāa añete vae rupi jare jupi vae rupi. Echa'ā jae uāa jocua cuña iaguasa vae mbaepuere tuicha vae güinoi vae. Echa'ā jocua cuña uyapoca mbaeyoa opaete ivi pegua reta pe aguasa uyapo vae rupi. Ĕrei Tumpa uiporaraca ma jocua cuña pe, jae uyucaca Tumpa jembiocui reta ramo —jei reta.

³ Jare jae reta jei ye:

—YandeYa tuyembidoraca. Tatāti uyupita jaeño mai pegua.

⁴ Jare jocua veinticuatro tenondegua reta jare jocua irundi mbaembae icove vae reta uyeatica jare umbiadora Tumpa iguapia pe uguapi oĩ vae. Jae reta jei:

—Amén. YandeYa tuyembidoraca.

⁵ Jare ou penti ñee Tumpa iguapia güi jei:

—Pembidora yandeYa Tumpa. Pe reta co jae Tumpa jembiocui reta. Pe reta co jae sambiai reta jare ucuacuaa vae reta uipiu reve umbiadora Tumpa vae —jei.

⁶ Jayave ayandu mbae ye. Jeta ete vae uyemingueta ñugüinoi echa cheve. Tanta jiapu i guasu jiapu rami jare ara jiapu rami. Jare ayandu jei:

—YandeYa tuyembidoraca. YandeYa Tumpa opaete mbaepuere güinoi vae oporoyocui ma —jei—. ⁷ Yayerovia ete jese jare yambidora. Echa'ā ou ma uvāe Ovecharai umenda vaerā jare jembirecorā vae uyeyapicatu cavi ma —jei—. ⁸ Jare uñemee jembirecorā vae pe omonde vaerā penti temimonde nieso ipōra vae. Jocua jemimonde iquia mbae jare tĩ asi. Echa'ā jocua nieso ipōra vae uyemijaanga jupi vae uñeño tee Tumpa peguarā vae reta uyapo vae re —jei.

Ovecha-rai umendata

⁹ Jare penti ángel jei cheve:

—Icuatía cuarāi: Ovecha-rai umenda yave, Tumpa uiparavota amocue vae ucaru vaerā jae ndive. Uyerovia eteta jocua reta —jei—. Cua ñee Tumpa iñee etei co —jei.

¹⁰ Jayave che ayeatica ángel jovai ambiadora vaerā. Ĕrei jae jei cheve:

—Agüiye chembiadora. Che vi ayeyocui Tumpa pe, nde ndiyeyocui chupe rami. Che vi amimbeu Jesús regua, yanderivi umimbeu jesequa rami. Tumpaño embiadora. Echa'ā Jesús regua umimbeu vae reta umimbeu co Tumpa iñee, Tumpa iñee araca umimbeu vae reta umimbeu rami —jei.

Cavayu tĩ vae re opo vae

¹¹ Jare aecha ara uyepea oĩ. Jare aecha vi joco pe penti cavayu tĩ vae. Jare opo cavayu re yandeYa. Jae co jecuaño jei vae uyapo vae. Jae co jecuaño umimbeu cavi Tumpa regua vae. Jae upuruāa jupi vae rupi jare uñerāro jupi mbae vae uyapo vae reta ndive.

¹² YandeYa jesa tata jendi oĩ vae rami co, jare iñāca re güinoi jeta corona reta. Jare uyecuatía oĩ jese penti tee. Jaeño uicuaa jocua tee. Mbaeti quía ye uicuaa. ¹³ Jare jemimonde tugüi pe uñemipita vae co. Jare jae jee co Tumpa iñee. ¹⁴ Jare jeta ete vae yugieru ara güi yandeYa jaicue jeta ete sundaro reta rami. Opo reta cavayu tĩ vae reta re. Penti penti jemimonde nieso ipōra vae co. Tĩ jare iquia mbae jocua jemimonde.

¹⁵ Jare yandeYa iyuru güi oē penti quisepecu jaimbe vae. Pipe uyucata jeta ivi pegua reta. Jare oporoyocuita ipopoca fierro pegua pe. Uiporaraca eteta opaete jovaicho reta

pe. Echa'ã Tumpa opaete mbaepuere güiinoi vae pochi ete chupe reta. ¹⁶ Jare yandeYa jemimonde re jare iu re uyecuatía oĩ penti tee. Jae co cua: “Mburuvicha guasu reta Juvicha Guasu jare opaete vae iya reta iYa.”

¹⁷ Jare aecha penti ángel uyemboi oĩ guarasi re. Jare jae iñeeãta reve jei opaete güira uveve ñugüinoi vae reta pe:

—Peyu piyembati. Tumpa opaete mbaepuere güiinoi vae pemingaruta. ¹⁸ Peyu peu mburuvicha guasu reta jetecue, jare sundaro reta juvicha reta jetecue, jare cuimbae ipirãta ete vae reta jetecue. Peyu peu cavayu reta jetecue, jare opo jese vae reta jetecue. Peyu peu jeta ete cuimbae reta jetecue - uyeyocui mbae vae reta jetecue jare uyeyocui vae reta jetecue, sambiai reta jetecue jare ucuacuaa vae reta jetecue —jei.

¹⁹ Jare aecha jocua maemimba guasu jare ivi pegua mburuvicha guasu reta jare opaete isundaro reta uyembati ma ñugüinoi uñerãro vaerã cavayu re opo vae jare isundaro reta ndive. ²⁰ Jare uyepisica jocua maemimba guasu jocua ñru maemimba guasu jei umimbeu co Tumpa iñee upurumbitavi vaerã vae ndive. Echa'ã jocua upurumbitavi vae tenonde yave uyapo miacañi reta jocua maemimba guasu jovai, umbitavi vaerã maemimba guasu imarca güiinoi vae reta. Echa'ã jae reta umbiadora jocua maemimba guasu jaanga. Jayave cua mocui reve uyemomboca jecove reve tata guasu pe. Joco pe jendi oĩ azufre. ²¹ Jare opaete maemimba guasu isundaro reta uyeyucaca cavayu re opo vae iquisepucu pe. Echa'ã jocua quisepucu oẽ iyuru güi. Jare opaete güira reta uyemingapiita jetecue reta re.

20

YandeYa oporoyocuita mil año pegua

¹ Jare aecha penti ángel ugüeyi ou ara güi. Jae güiinoi ivicua quipe ete vae illave, jare ipo pe aecha penti cadena tuicha vae. ² Jare ángel uipisi jocua maemimba guasu tenonde aecha vae. Jae co jocua mboi aracae Eva uminguetã vae. Jae co aña guasu. Jee co Satanás. Jare ángel uipocua Satanás mil año pegua. ³ Jayave omombo ivicua quipe ete vae pe. Jayave uyuquenda ivicua jonque jare oñono jese mbae agüiye vaerã quía ipuere uipea ye. Jucuarãi uyapo agüiye vaerã Satanás umbitavi ivi pegua reta mil año pegua. Ërei mil año opa ma yave, Satanás uyeyoraca yeta michi pegua. ⁴ Jare aecha guapia reta jare amocue vae joco pe uguapi vae reta. Jare uñemee chupe reta upuruãa vaerã. Jare aecha Jesús regua umimbeu ramo uñeãcasiaca vae reta. Echa'ã jae reta umimbeu Tumpa iñee. Jae reta umbiadora'ã jocua maemimba guasu i guasu güi oẽ vae, jare umbiadora'ã jaanga, jare mbaeti etei vi güiinoi imarca isiva re jare ipo re. Jare jae reta icove ye yugüeru umanocue vae reta ipite güi jare oporoyocui Cristo ndive mil año. ⁵ Jocua reta tenonde icove ye yugüeru umanocue vae reta ipite güi. Ërei ñru umanocue vae reta icove yevi'ã jae reta ndive. Mil año uasa yave ramo icove ye ñru umanocue vae reta. ⁶ Uyeroviata reta co tenonde icove yeta yugüeru umanocue vae reta ipite güi vae reta. Echa'ã uñeñoño tee Tumpa peguarã vae reta co. Jocua mano mocuia ndarau ipuere jese reta. Jae reta yugüirecota sacerdote retarã, uyeyocui vaerã Tumpa jare Cristo pe. Jare oporoyocuita reta Cristo ndive mil año pegua.

⁷ Jare mil año opa ma yave, Satanás uyeyoraca yeta jare oẽta jocua peresoriru rami vae güi. ⁸ Jayave oota opaete ivi rupi umbitavi vaerã jeta ivi ambiembie pegua reta. Oota Gog pe jare Magog pe. Jare umbatita jeta ete vae uñerãro vaerã Cristo ndive. Jae reta jeta ete co, ivicuiti i guasu jembei pe oĩ rami. ⁹ Jare aecha quirãi jae reta yugüeru opaete Israel pegua reta iivi rupi jare uyere ñugüinoi jocua tenta guasu Tumpa uau vae re. Echa'ã joco pe yugüireco uñeñoño tee Tumpa peguarã vae reta. Ërei Tumpa ombou tata ara güi, jare tata opa uapi reta.

¹⁰ Jare aña guasu umbitavi reta vae uyemomboca tata guasu azufre jendi oĩ pipe vae pe maemimba guasu jare jocua ñru maemimba guasu jei umimbeu co Tumpa iñee upurumbitavi vaerã vae ñugüinoi vae pe. Jare joco pe mbapi reve uiporarata ara rupi jare pĩtu rupi jaeño mai pegua.

Guapia tĩ vae

¹¹ Jare aecha penti guapia tĩ vae. Tuicha co. Jare aecha vi guapia pe uguapi oĩ vae. Ivi jare ara opa osi jae jovai güi. Jare mbaeti ma ivi jare ara jendarã. ¹² Jare aecha umanocue

vae reta uyemboi ñugüinoi Tumpa jovai. Sambiaí reta jare ucuacuaa vae reta uyemboi ñugüinoi joco pe. Jare uyepea oí libro reta. Jae ramiño vi uyepea oí ñru libro. Jocua libro uicuaaca quía tecove opa mbae vae güinoi vae. Jare umanocue vae reta uñeäaca penti penti uyapocue vae rupi. Echa'ã penti penti uyapocue vae uyecuatía oí libro reta pe. ¹³ Jare i guasu umaño opaete umanocue vae pipe ñugüinoi vae reta re oë vaerã chugüi. Jare mano jare cañitei umaño opaete umanocue vae pipe ñugüinoi vae reta re oë vaerã chugüi. Jare penti penti uñeäaca uyapocue vae rupi. ¹⁴ Jare mano jare cañitei uyemomboca tata guasu pe. Cua co jae mano mocuia. ¹⁵ Jare jee uyecuatía'ã jocua libro tecove opa mbae vae pegua pe vae penti penti uyemomboca tata guasu pe.

21

Ara ipiau vae jare ivi ipiau vae

¹ Jare aecha ara ipiau vae jare ivi ipiau vae. Echa'ã ara tenonde ico vae jare ivi tenonde ico vae mbaeti ma. Jae ramiño vi mbaeti ma i guasu. ² Jare che etei aecha jocua tenta guasu uñeño tee Tumpa peguarã vae - jae co Jerusalén ipiau vae - ugüeyi ou Tumpa oí vae güi ara güi. Uyeyapicatu oí penti cuñatai umendata vae rami.

³ Jare ayandu penti ñee ara güi. Iñeäta reve jei:

—Mase, Tumpa ime ma ico ivi pegua reta ndive. Jae icota jae reta ndive. Ivi pegua reta yugüirecota Tumpa imbaerã, jare Tumpa icota jae reta ndive. Tumpa eteño icota jae reta iTumparã —jei—. ⁴ Jare Tumpa oyoeta opaete jesai reta. Ndarau ye quía umano. Ndarau ye quía ipiatiti. Ndarau ye quía uyao. Ndarau ye mbae jasi quía pe. Echa'ã mbaembae tenonde ico vae reta mbaeti ma —jei.

⁵ Jare Tumpa uguapi oí iguapia pe jare jei:

—Ayapopiauta opaete mbaembae.

Jayave jae jei cheve:

—Cua icuatía. Echa'ã chiñee añete co. Opaete vae ipuere güirovia catu —jei.

⁶ Jare jei vi cheve:

—Uyeyapo ma. Che co jae Alfa jare Omega jee vae. Che co jae tenondegua vae jare taicuegua vae. Ime yave quía uipota i tecove opa mbae vae pegua jou vae, tamee tou jepi mbae reve —jei—. ⁷ Upurumiamiri vae reta pe ameita imbaerã opaete mbaembae. Che etei aicota jae reta iTumparã jare jae reta yugüirecota cherai retarã —jei—. ⁸ Ërei uquíve vae reta, jare güirovia mbae Tumpa vae reta, jare pichii vae uyapo vae reta, jare upuruyuca vae reta, jare iaguasa vae reta, jare ipaye vae reta, jare umbiadora tumparaanga vae reta, jare opaete iyapu vae reta yugüiraata tata guasu azufre jendi oí pipe vae pe ñru vae reta ndive. Cua co jae mano mocuia —jei.

Jerusalén ipiau vae

⁹ Jare jocua siete ángel siete copa tinee siete mbaesusere taicuegua vae pe vae güinoi vae reta güi penti ou che aí vae pe jare jei cheve:

—Eyu cua pe. Taechaca ndeve Ovecha-rai jembirecorã vae.

¹⁰ Jayave ángel chereraa Espiritu Santo imbaepuere pe penti ivitu guasu re. Ivate ete jocua ivitu. Jayave uechaca cheve jocua tenta guasu Jerusalén jee vae ugüeyi ou ara güi Tumpa oí vae güi. Jocua tenta guasu uñeño tee Tumpa peguarã. ¹¹ Tumpa umbiyaruanda ma. Jare uvera penti ita ipõra ete vae uvera rami. Ita ipõra ete vae jaspe jee vae echa. Jocua jaspe jee vae jesãca vidrio rami. ¹² Jare tenta guasu uñequëse vae tuicha jare ivate, jare güinoi doce jonque. Jare jonque reta pe ñugüinoi doce ángel reta. Jare jonque reta re uyecuatía ñugüinoi Israel pegua reta jee. Echa'ã doce ati co jocua Israel pegua reta. ¹³ Guarasi oë vae coti tenta guasu jonque reta mbapi co. Norte coti tenta guasu jonque reta mbapi vi. Sur coti tenta guasu jonque reta mbapi vi. Guarasi uique vae coti tenta guasu jonque reta mbapi vi. ¹⁴ Jare tenta guasu uñequëse vae iguapica reta doce co. Jare iguapica reta re uyecuatía ñugüinoi Ovecha-rai jemimondo reta jee. Echa'ã doce co jocua Ovecha-rai jemimondo reta.

¹⁵ Jare imiari cheve vae güinoi penti ivira oro pegua umiaanga vaerã tenta guasu jare jonque reta jare uñequëse vae. ¹⁶ Jare guarasi oë vae coti jare norte coti jare sur coti jare guarasi uique vae coti tenta guasu uñequëse vae oyovaque. Jare ángel umiaanga tenta guasu ivira pe. Jare ipucucue jare ipiguasucue jare ivatecucue oyovaque. Pentu pentu

cuatrocientos sesenta legua rupi. ¹⁷ Jare ángel umiaanga tenta guasu uñequêse vae. Ivatecue ciento cuarenta y cuatro codo. Penti cuimbae jendivanga uyemiaanga yave, jae co penti codo. Echa'ã jucuarã umiaanga ángel.

¹⁸ Jare tenta guasu uñequêse vae ita ipõra ete vae jaspe jee vae pegua co. Jare tenta guasu etei oro catuui. Jesãca vidrio rami. ¹⁹ Jare tenta guasu uñequêse vae iguapica reta ita ipõra ete vae pegua co. Uyuavi reta uyugüii. Penti jaspe jee vae. Īru zafiro jee vae. Īru ágata jee vae. Īru esmeralda jee vae. ²⁰ Īru ónice jee vae. Īru cornalina jee vae. Īru crisólito jee vae. Īru berilo jee vae. Īru topacio jee vae. Īru crisopraso jee vae. Īru jacinto jee vae. Īru amatista jee vae. ²¹ Jare jocua doce tenta guasu jonque reta doce ita ipõra ete vae perla pegua co. Penti penti onque uyeyapo penti perla güii. Jare tenta guasu icalle reta oro catuui. Jesãca vidrio rami.

²² Jare mbaeti etei Tumpa jo joco pe. Echa'ã yandeYa Tumpa opaete mbaepuere güiinoi vae jare Ovecha-rai yugüireco joco pe penti Tumpa jo ipepica pe. ²³ Jare tenta guasu pegua reta ueca'ã guarasi jare yasi umiembipe vaerã. Echa'ã Tumpa jare Ovecha-rai jocua tenta guasu pegua reta jembipe co. ²⁴ Opaete ivi pegua reta uguata cavita joco pe, tembipe oita ramo, jare ivi pegua reta juvicha guasu reta yugüeruta joco pe umbiadora vaerã Tumpa. ²⁵ Jare ndarau etei uyeyuquenda tenta guasu jonque reta ara rupi. Jare ndarau vi pítu joco pe. ²⁶ Jare opaete ivi pegua reta yugüeruta joco pe umbiadora vaerã Tumpa. ²⁷ Ērei ndarau etei uique jocua tenta guasu pe ipotave iquia vae jare ipotave pichii vae uyapo vae jare ipotave iyapu vae. Jaeño Ovecha-rai ilibro tecove opa mbae vae pegua pe jee uyecuatía oĩ vae reta uiqueta joco pe.

22

¹ Jayave ángel uechaca cheve i usiri vae iquia mbae vae. Jesãca ete. Vidrio echa cheve. Tecove opa mbae vae pegua co jocua i. Oẽ usiri Tumpa jare Ovecha-rai iguapia güii. ² Jare tenta guasu icalle mbite rupi jare i usiri vae jembei reta rupi ñugüiinoi ivira tecove opa mbae vae pegua reta. Jocua ivira ía doce uyuavi vae reta co jare yagüiye opa yasi rupi. Jare ivi pegua reta ipuere uiporu ivira joqui reta moarã agüiye vaerã imbaerasi.

³ Jare ndarau ma oĩ yepipeyu ivi re. Echa'ã Tumpa jare Ovecha-rai iguapia oita joco pe. Jare Tumpa jembiocui reta uyeyocuita chupe. ⁴ Jare jae reta uechata Tumpa. Jare güiinoita reta isiva re Tumpa jee. ⁵ Jare ndarau pítu joco pe. Ndarau uiporu mechero jare guarasi jembipe. Echa'ã yandeYa Tumpa umeeta chupe reta tembipe. Jare jae reta oporoyocuita jaeño mai pegua.

Cristo ou yeta imambae

⁶ Jare ángel jei cheve:

—Cua ñee reta añete co. Yandepuere yarovia catu. Aracae yandeYa Tumpa uicuaaca mbaembae ñee umimbeu vae reta pe. Echa'ã jae oñono tee reta iyupeguarã ñee umimbeu vaerã. Jae ramiño vi yandeYa Tumpa chembou aicuaaca vaerã jembiocui reta pe imambae uyeyapota vae. Che co jae penti ángel Tumpa pe uyeyocui vae —jei—. ⁷ 'Mase, aa yeta imambae' —jei yandeYa, jei—. 'Piyapo yave ñee cua tupapire pe ñugüiinoi vae reta, piyeroviata co. Echa'ã cua ñee reta umimbeu peve uyeyapota vae' —jei, jei.

⁸ Che etei aecha cua mbaembae jare ayandu vi. Jare aecha jare ayandu yave, ayeatica ángel cua mbaembae uicuaaca cheve vae jovai ambiadora vaerã. ⁹ Ērei jae jei cheve:

—Agüiye chembiadora. Che vi ayeyocui Tumpa pe, nde ndiyeyocui chupe rami. Che vi amimbeu Tumpa ñee, yanderivi umimbeu rami. Echa'ã jae reta vi uyapo ñee cua libro pe uyecuatía oĩ vae reta. Tumpaño embiadora —jei.

¹⁰ Jare jei vi cheve:

—Emimbeu Īru vae reta pe ñee cua libro pe ñugüiinoi vae reta. Echa'ã cua ñee reta umimbeu uyeyapota vae jare coño ma ou uyeyapo vaerã —jei—. ¹¹ Jupi mbae vae uyapo vae jecuaeño tuyapo jupi mbae vae. Jae ramiño vi pichii vae uyapo vae jecuaeño tuyapo pichii vae. Jae ramiño vi jupi vae uyapo vae jecuaeño tuyapo jupi vae. Jae ramiño vi uñefono tee Tumpa peguarã vae jecuaeño tuñefono tee Tumpa peguarã —jei—.

¹² Mase, aa yeta imambae —jei yandeYa, jei—. Jare ameeta opaete vae pe imbaerã penti penti uyapocue vae rupi —jei, jei—. ¹³ Che co jae Alfa jare Omega jee vae. Che co jae tenondegua vae jare taicuegua vae —jei, jei—. ¹⁴ Piyapo yave yandeYa iporoyocui

reta, piyeroziata co. Echa'ã piyapo yave, pepuereta peu ivira tecove opa mbae vae pegua ía, jare pepuereta pique jocua tenta guasu pe jonque reta rupi —jei—.

¹⁵ Echa'ã tenta guasu pe ndarau uique Tumpa ñee ndive oyovaicho vae reta, jare ipaye vae reta, jare iaguasa vae reta, jare upuruyuca vae reta, jare tumpa-raanga reta umbiadora vae reta, jare opaete iquirêi reve iyapu vae reta —jei.

¹⁶ Jare yandeYa Jesús jei cheve:

—Che etei amondo penti ángel cheve uyeyocui vae umimbeu vaerã peve cua mbaembae upurugüirovia vae uyematimbati vae reta rupi. Che co jae David Iyipi jee vae. Che co jae David ñemoñaeta reta pegua. Che co jae yasitata guasu jembipe vae neimbove asi uyecuaa vae —jei.

¹⁷ Jare Espiritu Santo jare Ovecha-rai ndive umendata vae jei:

—Eyu.

Jare uyandu vae tei:

—Eyu.

Iúe vae ipuere ou cua pe. Ipotave vae ipuere jou i tecove opa mbae vae pegua jepi mbae reve. ¹⁸ Ñee cua tupapire pe ñugüinoi vae reta uicuaaca uyeyapota vae. Che amimbeu opaete cua ñee reta uyandu vae reta pe cua: Ime yave quía cua ñee reta ndive ñru ñee reta umiiruta vae, Tumpa umeeta chupe uiporara vaerã susere cua tupapire pe uyecuatía ñugüinoi vae reta. ¹⁹ Jare ime yave quía ñee cua tupapire pe ñugüinoi vae reta uipotata umbai vae, Tumpa ndarau umaño jese jou vaerã jocua ivira tecove opa mbae vae pegua ía. Ndarau vi umaño jese uique vaerã tenta guasu uñeño tee Tumpa peguarã vae pe. Ndarau vi umaño jese güinoi vaerã imbaerã mbaembae icavi vae cua libro pe uyecuatía oí vae.

²⁰ YandeYa umimbeu cheve opaete cua. Jae etei jei:

—Añete co, aa yeta imambae.

Yande yae:

—Amén. Eyu, yandeYa Jesús.

²¹ YandeYa Jesús tumee ipiacavi opaete imbae reta pe. Amén.